

Xtiidx Dios



New Testament in Zapotec, Santo Domingo Albarradas

(MX:zas:Zapotec, Santo Domingo Albarradas)

# **Xtiidx Dios**

## **New Testament in Zapotec, Santo Domingo Albarradas (MX:zas:Zapotec, Santo Domingo Albarradas)**

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

### **Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022

fb4ebcb8-e1f4-5bfc-b08c-f590e137d86d

## Contents

San Matew . . . . .	1
San Marcw . . . . .	69
San Lujc . . . . .	113
San Juan . . . . .	184
Ni been ree apóstoles . . . . .	236
Gui'ch par ree bén Rom . . . . .	302
Gui'ch yaløj par ree bén Corinto . . . . .	331
Gui'ch barojp par ree bén Corinto . . . . .	360
Gui'ch par ree bén Galacia . . . . .	379
Gui'ch par ree bén Éfeso . . . . .	389
Gui'ch par ree bén Filipos . . . . .	398
Gui'ch par ree bén Colosas . . . . .	405
1 Ts . . . . .	411
2 Ts . . . . .	417
Gui'ch yaløj par Timoteo . . . . .	420
Gui'ch barojp par Timoteo . . . . .	428
Gui'ch par Tito . . . . .	434
Gui'ch par Filemón . . . . .	438
Gui'ch par ree bén Hebreos . . . . .	440
Gui'ch bacaa Santiaaw . . . . .	461
Gui'ch yaløj bacaa San Pedr . . . . .	468
Gui'ch barojp bacaa San Pedr . . . . .	476
Gui'ch yaløj bacaa San Juan . . . . .	481
Gui'ch barojp bacaa San Juan . . . . .	488
Gui'ch bayon bacaa San Juan . . . . .	489
Gui'ch bacaa San Judas . . . . .	491
Ni balüü Jesucrist loj San Juan . . . . .	494

## **Xtiidxza'c Jesucrist ni bacaa San Matew**

*Xdiaagulal Jesucrist  
(Lc. 3:23-38)*

<sup>1</sup> Guie zëed laj ree bën naj xdiaagulal Jesucrist, bën zëed ree loj xdiaa rey Davi në loj xdiaa Abraham.

<sup>2</sup> Abraham brii laj xdad Isaac, abi' Isaac gojc xdad Jacob, guiáad Jacob gojc xdad Judá con ree bijchaman. <sup>3</sup> Dxel Judá cwa'man Tamar, abi' guyu xi'n reeman brii laj reeman Fares con Zara. Fares gojc xdad Esrom, Esrom gojc xdad Aram. <sup>4</sup> Aram gojc xdad Aminadab, Aminadab gojc xdad Naasón, Naasón gojc xdad Salmón. <sup>5</sup> Salmón gojc xdad Booz, guiáad xniaa Booz brii laj Rahab. Booz cwa'man Rut, abi' xi'n reeman brii laj Obed. Obed gojc xdad Isaí, <sup>6</sup> Isaí gojc xdad rey Davi. Dxel rey Davi con bën goc lacheel Urías guyu xi'n reeman brii lajman Salomón.

<sup>7</sup> Dxel Salomón gojc xdad Roboam, Roboam gojc xdad Abías, Abías gojc xdad Asa. <sup>8</sup> Asa gojc xdad Josafat, Josafat gojc xdad Joram, Joram gojc xdad Uzías. <sup>9</sup> Uzías gojc xdad Jotam, Jotam gojc xdad Acáz, Acáz gojc xdad Ezequías. <sup>10</sup> Ezequías gojc xdad Mainán, Mainán gojc xdad Amón, Amón gojc xdad Josías. <sup>11</sup> Dxel Josías gojc xdad Jeconías con ree bijchaman, tiamp ni guzu ree bën Israel Babilonia zi'c bën yu' ladxguiib.

<sup>12</sup> Chi ma barii reeman Babilonia lod guzu reeman zi'c bën yu' ladxguiib, gojl Salatíel, xdadaman gojc Jeconías. Dxel Salatíel gojc xdad Zorobabel. <sup>13</sup> Zorobabel gojc xdad Abiud, Abiud gojc xdad Eliaquim. Eliaquim gojc xdad Azor, <sup>14</sup> Azor gojc xdad Sadoc, Sadoc gojc xdad Aquim. Aquim gojc xdad Eliud, <sup>15</sup> Eliud gojc xdad Eleazar. Eleazar gojc xdad Matán, Matán gojc xdad Jacob. <sup>16</sup> Jacob gojc xdad Xiëb lacheel Li. Dxel Li gojc xniaa Jesús, bën la gajc Cristo.

<sup>17</sup> Zian gojc, diizd xtiamp Abraham xt xtiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree bën Israel Babilonia zi'c bën yu' ladxguiib, abi' zachidaj generacion guyu diizd tiamp ni barii ree bën Israel Babilonia xt chi bidxin dxej gojl Jesucrist loj guidxliuj.

*Gojl Jesucrist  
(Lc. 2:1-7)*

<sup>18</sup> Ze gojc gojl Jesucrist: Li, xniaaman, ma naj tia' Xiëb laaman. Per chi gad reeman tia' lasa', guyu xi'n Li por

xSprijt Dios. <sup>19</sup> Abi' Xiëb guial najman benza'c, ad guyëntaman nusa'nxtuman Li. Beenman xgab niro'nladxaman laaman ralanzi. <sup>20</sup> Per la'tgaj cayünman xgab zian, balüüloj tijb xianjl Dios lojman loj bacaal, rëb anjl guin lojman:

—Xiëb, xdiaa Davi, ad bal rdxebil tia'l Li, din xindo nüüm por xSprijt Dios zëëdix. <sup>21</sup> Tijb xindoniguiaaw gac xi'n Li, yagu'l lajx “Jesús”, din por laax gra ree xbejn xgac perdon xtol.

<sup>22</sup> Gra ree ni guie gojc persi guzojb xtiidx Dios zi'c gunee bën badëë xtiidxaman loj ree bejn, chi rëbaman:

<sup>23</sup> Tijb biinxdüb chu' xi'n,

abi' chi galix grii lajx Emanuel,  
rën guiëban: Dios za'në dunuj ree.

<sup>24</sup> Chi baban Xiëb, dxel beenman zi'c gunabee xianjl Dios laaman, cwa'man Li, <sup>25</sup> per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobëz guin JESÚS.

## 2

### *Bignaj ree bën rajc Jesús*

<sup>1</sup> Jesús gojlaman Belén tijb guiedx naaz Judea, tiamp gunabee rey Herodes. Dxel bidxin ree bën rajc, Jerusalén, laa reeman naj magos, za reeman niz oriente. <sup>2</sup> Abi' gunabdiidx reeman, rëb reeman:

—¿Con xrey ree bën Israel, bën ma gojl? Din dunujn diizd duladxan baguiaan xbajlaman xanyabaa, zeel zio'pan din yazuxiban lojman.

<sup>3</sup> Chi biguien rey Herodes zian, dád guyunawëëgaman, nëgajc gra ree bën Jerusalén guyunawëëg. <sup>4</sup> Zeel gurejdx Herodes gra ree bixhioz rniabee ree bixhioz, në ree mextr rajc ley, persi gunabdiidxaman loj reeman banguin naj gal Cristo. <sup>5</sup> Dxel rëb reeman:

—Belén naj galaman, tijb guiedx naaz Judea, din ze bacaa bën badëë xtiidx Dios loj ree bejn:

<sup>6</sup> Lüy Belén, tijb guiedx naaz Judea, majsi guiedx dobëz najl loj gra ree guiedxro' naaz Judea. Per lasajquil din luguedx Belén guin grii tijb bën nabee guiniaj tëëman da bën Israel reen.

<sup>7</sup> Dxel ralanzi gurejdx rey Herodes bën rajc guin ree, persi gunabdiidxaman goc balüüloj bajl xanyabaa guin loj reeman.

<sup>8</sup> Abi' guxhaalaman laa reeman Belén, rëbaman loj reeman:

—Gol wej, gol bignabdiidxchaaw graczi xcwent xindobëz guin. Abi' chi yadxeljidi laax, laa gol bagojn gajc naj, din në naj chigzuxib lojx.

<sup>9</sup> Chi gulox rëb Herodes loj reeman zian, dxel zë reeman. Abi' bajl xanyabaa baguiaa reeman diizd ladx reeman, nedan

loj reeman, xt lod yu' xindobëz guin guzudxen. <sup>10</sup> Chi baguiaa reeman bajl guin, dád babaa reeman. <sup>11</sup> Abi' chi guyu reeman lënü guin, baguiaa reeman xindo guin con xniaax Li. Abi' bazuxib reeman gojp reeman laax respejt. Dxel guxhal ro' xcaj reeman, abi' bazaladx reeman or, në yaal, nètëë mirra par xindo guin. <sup>12</sup> Chi ma guidxin dxej yaza reeman, dxel bagojn Dios laa reeman loj bacaal chitëë yayejc reeman niz lod za' Herodes, zianan zeel bayejc reeman niz lood ren.

### *Zë reeman Egipto*

<sup>13</sup> Chi ma zia ree bën rajc guin ladx reeman, dxel balüüloj tijb xianjl Dios loj Xiëb loj bacaal, rëbaman:

—Bixche, cwa' xindo guin con xniaax, gol chej niz Egipto. Ni gol guzuj xt chi ganin lëjt, din zaguuil Herodes laax din gugÿjtaman laax.

<sup>14</sup> Dxel bixche Xiëb, cwa'man xindobëz guin con xniaax, abi' guxhin guin brier reeman zë reeman niz Egipto. <sup>15</sup> Ni guzu reeman xt güjt rey Herodes. Zian guzobj xtiidx Dios ni gunee bën badëë xtiidxaman loj ree bejn, chi rëbaman: “Babedx da xi'nan Egipto.”

### *Gunabee Herodes guiët ree xindobëz*

<sup>16</sup> Chi gogbee Herodes guial basquiee ree bën rajc guin laaman, dád bidxe'chaman. Dxel gunabeeman guiët gra ree xindoniguaiaaw diizd ree xindo qui gojlri ree xt ree xindo ma yu' ree guia' tio'p ijz, xindo yu' ree Belén në gra ree guiedx riga' niz ni, guial yu'guijcaman ni rëb ree bën rajc guin guial ma gojc tio'p ijz ni baguiaa reeman bajl guin. <sup>17</sup> Zian gojc cumplid ni bacaa Jeremías, bën badëë xtiidx Dios loj ree bejn, chi rëbaman:

<sup>18</sup> Biguien cha' tijb bejn guiedx Ramá,

yu' guialroon në guialrbixdiaj,

Raquelan cayoon por ree xi'nman,

abi' ad rilet' chu gusquiejn laaman guial güjt ree xi'nman.

<sup>19</sup> Per chi güt Herodes, dxel balüüloj tijb xianjl Dios loj Xiëb loj bacaal lod zobj reeman, Egipto, abi' rëbaman lojman:

<sup>20</sup> —Bixche, cwa' xindobëz guin con xniaax. Gol baguiaj niz Israel, din ma güjt ree bën guyën nugÿjt laax.

<sup>21</sup> Dxel bixche Xiëb cwa'man xindobëz guin con xniaax, bayejc reeman niz Israel. <sup>22</sup> Per chi gogbee Xiëb guial Arquelao, xi'n Herodes, naj bën canabee niz Judea, bidxebaman naguiaj reeman niz ni. Dxel bagojn Dios laaman loj bacaal din che reeman niz Galilea, dxel zë reeman. <sup>23</sup> Chi bidxin reeman ni, gurej reeman guiedx Nazaret. Zian gojc persi guzobj diidx ni gunee ree bën badëë xtiidx Dios loj ree bejn, guial grii laj Jesús bën Nazaret.

## 3

*Diidx gunee Waj bén baroobnijs bejn ree*

*(Mr. 1:1-8; Lc. 3:1-9, 15-17; Jn.1 :19-28)*

<sup>1</sup> Lën ree dxej ni bidxin Waj, bén baroobnijs bejn ree, loj yujbidx niz Judea catie'chaman xtiidx Dios. <sup>2</sup> Rëbaman:

—Gol bayüjn xgab por xtolidi din ma zidyob xguialrniabee Dios.

<sup>3</sup> Xcwent Waj guinan bacaa Isaías, bén badëë xtiidx Dios loj ree bejn, chi rëbaman:

Rguien cha' tijb bén rbidxa' niz loj yujbidx, rëbaman:

“Gol beenchaaw xnejz dux Dad ree Dios, gol guxhal tijb nejz nali.”

<sup>4</sup> Con guidxlad camell gojcnë xab Waj, abi' lënman bixii tijb guid. Gudaw tëëman bi'tsu con dxijn yu' dajn. <sup>5</sup> Dxel bén Jerusalén ree në los demazri ree bén Judea nëtëë gra ree bén zobj gadëd ro' guiiw Jordán, brii reeman bicaagdiajg reeman ni rniee Waj. <sup>6</sup> Dxel guxhoobdol reeman, abi' baroobnijs Waj laa reeman loj guiiw Jordán guin.

<sup>7</sup> Per chi baguiaa Waj zien ree bénfarisew në ree bénsaducew bidxin din tiobnijs reeman, rëbaman loj reeman:

—iXi'n xindxab! ¿Chu bagojn lëjt din laadi loj castiro' ni zëed? <sup>8</sup> Gol gubajn zagdxe din guiguien guial waliquididi ma bayüjndi xgab por xtolidi, <sup>9</sup> abi' ad bal rlies xvalorgajquidi, rëbidi: “Dunujn zio'p loj xdiaa Abraham”, din naj rni lëjt xt guiaj guie ree zile' yayüjn Dios xdiaa Abraham. <sup>10</sup> Abi' ree bén ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rutüügaman laan din che'can. <sup>11</sup> Naj rni lojdi, curobnijsan lëjt con nijs zi'c tijb sen guial ma bayüjndi xgab por xtolidi. Per bén zidnal naj, laaman guroobnijs lëjt con xSprijt Dios con në bajl, din laaman mazri rajp guialrniabee guial lon, abi' ni'qui xgurëchaman ad rayalt gaxhiecan. <sup>12</sup> Abi' zi'c raya trigo zian güünnëman bejn. Din bén zinal ree xnejz Dios chinëman laa reeman lod rniabeeman, guiáad ree bén ad zinalt xnejz Dios guixhiaalaman laa reeman loj bajl ni ad yu't dxej yayü'.

*Gurobnijs Jesús*

*(Mr. 1:9-11; Lc. 3:21-22)*

<sup>13</sup> Lën ree dxej zii guza Jesús niz Galilea wejman ro' guiiw Jordán lod za' Waj, din guroobnijs Waj guin laaman. <sup>14</sup> Per ad nuyëntaman nuroobnijsaman Jesús, rëbaman lojman:

—Lüj rayal guroobnijs naj, ad najt rayal guroobnijs lüj.

<sup>15</sup> Dxel rëb Jesús lojman:

—Yo guna gac zian, din mazri zagdxe yaguieen gra zi'c rniabee Dios.

Dxel cwëjb Waj baroobnijsaman laaman. <sup>16</sup> Chi gulox gurobnijnsaman, naabzi bariiman loj nijs guin, dxejczy bixal xanyabaa, abi' baguiaaman zidguiajt xSprijt Dios zi'c tijb palom xt guijcaman. <sup>17</sup> Dxel biguien cha' tijb bejn xanyabaa, rëbaman:

—Bén guie naj da Xi'nan, bén rën da'tan bén rabaanë' tëën.

## 4

### *Gojc Jesús prueb*

(Mr. 1:12-13; Lc. 4:1-13)

<sup>1</sup> Dxel binë xSprijt Dios Jesús niz loj yujbidx, din güün xindxab laaman prueb.

<sup>2</sup> Ni guzuman tiuu dxej tiuu guiaal sin guialraw, dxel gu-laanman. <sup>3</sup> Abi' bidxin xindxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guiadxtil.

<sup>4</sup> Per badxi' Jesúsán rëbaman:

—Loj xtiidx Dios rëb: “Ad ganaxtizi guiadxtil guiban bejn, nëgajc gra diidx rniee Dios.”

<sup>5</sup> Dxel binë xindxab guin laaman Jerusalén, abi' gulë'pix laaman guijc yadooro' zojb luguiedxzii, <sup>6</sup> abi' rëbix lojman:

—Bal wali najl xi'n Dios, gudidya' diizd guie, din loj xtiidx Dios rëb:

Dios guixhiaal ree xianjlaman din guinia reeman lüj.

Guiniaaz reeman lüj con yaa reeman

chitëë ladx ni'czy tijb guiaj guia'l.

<sup>7</sup> Badxi' Jesúsán, rëbaman:

—Rëb gajc loj xtiidx Dios: “Ad güünl prueb xDadil Dios.”

<sup>8</sup> Dxel binë xindxab guin laaman tijb guijc guia' ya da't, lod balüüx laaman gra ree guiedx riga' loj guidxliuj në ree guialnaza'c yu' loj reen. <sup>9</sup> Abi' rebix lojman:

—Naj gune gra ree ni guie lojl, bal guzuxibil lon guiniajchi' tëël naj.

<sup>10</sup> Badxi' Jesúsán, rëbaman:

—Biquied, xindxab, din loj gajc xtiidx Dios rëb: “Gunajchi' xDadil Dios, tijbzi lojman been sirv.”

<sup>11</sup> Dxel biquied xindxab guin lojman, abi' bi't tio'p choon ree xianjl Dios persi been reeman laaman sirv.

### *Rzuloj Jesús rtie'chaman xtiidx Dios niz Galilea*

(Mr. 1:14-15; Lc. 4:14-15)

<sup>12</sup> Chi gogbee Jesús guial yu' Waj ladxguuib, bayejcaman Galilea. <sup>13</sup> Per ad gurejtraman guiedx Nazaret, wejman bisobaman guiedx Capernaum, tijb guiedx riga' gajxh ro' nijs Galilea niz lod goc ree xdajn Zabulón në Neftalí. <sup>14</sup> Zian gojc



persi gojc cumplid ni bacaa Isaías, bén badëë xtiidx Dios loj ree bejn, chi rëbaman:

<sup>15</sup> Bén Zabulón con ree bén Neftalí, në ree bén zojb gajxh ro' nijsdoo, nëtëë ree bén zojb xijch guiiw Jordán

con gra ree bén zojb niz Galilea, lod zojb ree bén ad najt bén Israel,

<sup>16</sup> gra reeman gubajn loj xcay.

Yan ma brii tijb biani par laa reeman,

abi' biani guin guxhal xquiarguejn ree bén ad nabant xnejz loj Dios.

<sup>17</sup> Diizd dxejzii guzuloj gutie'ch Jesús xtiidx Dios, rëbaman:

—Gol bayüjn xgab por xtolidi din ma zëed gajxh xguialrniabee Dios.

*Rbejdx Jesús tajp ree bén gac xbejnman*

*(Mr: 1:16-20; Lc. 5:1-11)*

<sup>18</sup> La'tgaj caza Jesús gajxh ro' nijsdoo Galilea, baguiaaman Simón bén la gajc Bëd con bijchaman Andrejs. Cuzaal reeman guijxh loj nijs din guiniaaz reeman bëjl. Guial laan naj xchiin reeman. <sup>19</sup> Dxel rëb Jesús loj reeman:

—Gol tanal naj, din gulün lëjt xhienaag güündi din guto'pidi bejn par Dios luar guiniaazidi bëjl.

<sup>20</sup> Loj hor guin gajc basa'n xguijxh reeman abi' zinal reeman laaman.

<sup>21</sup> Guzaman zatibda'n dxel baguiaaman zatio'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayüjnchaaw xguijxh reeman. Dxel gurejdx Jesús laa reeman, <sup>22</sup> abi' basa'n reeman barcw guin con xdad reeman, dxel laa zinal gajc reeman laaman.

*Rülüü Jesús zien ree bejn*

*(Lc. 6:17-19)*

<sup>23</sup> Wej Jesús guidibczi niz Galilea, abi' tijbgaj ree guiedx wejman lën ree yadoo persi balüüman bejn ree. Balüüman laa reeman xtiidx Dios, rëbaman loj reeman xhienaag naj xguialrniabee Dios, abi' bayüjnman bén rdoob ree në gra ree bén rajc xhietëez guialguijdxan. <sup>24</sup> Guidibczi niz Siria bire'ch xtiidx Jesús, abi' bidnë reeman bén cusagdiaj ree gadxagayaa ni mal në graloj ree guialguijdx, bén yu' ree xindxab luxdoo, në ree bén rëjtya', nëtëë ree bén ad rilet' suli, abi' bayüjn Jesús laa reeman. <sup>25</sup> Dád zien ree bejn binal laaman, bén Galilea ree, bén zëed ree Decápolis, bén Jerusalén ree, bén zëed ree niz Judea në ree bén zëed stiblad ro' guiiw Jordán.

## 5

*Ni balüü Jesús tijb guijc guia'*

<sup>1</sup> Chi baguiaa Jesús bén guixiuj ree, wë'paman tijb guijs guia' abi' gurejman, dxel gubig ree xbejnman lojman. <sup>2</sup> Abi' guzuloj culüüman laa reeman, rëbaman:

*Xiquilbaa ree bejn*

*(Lc. 6:20-23)*

<sup>3</sup> —Xiquilbaa ree bén ragbee guial ryaadx gagnë Dios laa reeman, din por zian yayal reeman lod rniabeeman.

<sup>4</sup> 'Xiquilbaa ree bén yu'naya, din Dios yagu' luxdoo reeman zagdxe.

<sup>5</sup> 'Xiquilbaa ree bén naj bén chaawladx, din laa reeman tia' guidxliuj ni rëb Dios gudëédaman loj reeman.

<sup>6</sup> 'Xiquilbaa ree bén rzajc zi'c chi rliaan bejn o chi re'caman nijs zian rën da't reeman güün reeman zi'c rniabee Dios, din Dios gagnë laa reeman din güün reeman zi'c ruladxaman.

<sup>7</sup> 'Xiquilbaa ree bén raya lasa', din zian yaya Dios laa reeman.

<sup>8</sup> 'Xiquilbaa ree bén naya loj Dios, din laa reeman guguiaa laaman.

<sup>9</sup> 'Xiquilbaa ree bén rüjn naguiejn cwedxenë lasa', din laa reeman grii laj xi'n Dios.

<sup>10</sup> 'Xiquilbaa ree bén cadëd loj guialzi por graloj ni rujnnë bejn laa reeman guial cayüjn reeman zi'c rniabee Dios, din laa reeman yayal lod rniabeeman.

<sup>11</sup> 'Xiquilbaadi, chi rüjnnë reeman lëjt xhiernarajc në chi rnieeguijdx reeman lëjt nëtëë chi rudxiib reeman guijsquidi graczi, guial najdi da bejnan. <sup>12</sup> Gol badxe' luxdoodi nix, gol babaa tëë din narooob naj ni gunee Dios lojdi xanyabaa. Abi' lëjt ragbee guial ziangajc basagzi reeman bén badëë ree xtiidx Dios loj ree bejn gocli chi gadidi gui't loj guidxliuj.

*Lëjt naj zi'c zëd në zi'c bajl*

*(Mr. 9:50; Lc. 14:34-35)*

<sup>13</sup> 'Lëjt naj zi'c zëd loj guidxliuj guie. Per bal id naxijran, ¿xhieza naag yayajcan naxij zatijb? Achetri dxiin güünan, gaz guire'chan abi' chë'p ree bejn guijcan.

<sup>14</sup> 'Lëjt naj zi'c tijb biani loj guidxliuj guie, naj tëëdi zi'c tijb guiedx ni riga' tijb guijs guia' abi' ad zajct guiguie'chan. <sup>15</sup> Ad ritiaguij tëët tijb guij par guida'cwan lën tijb yagalm, rtiaguijn persi rzojban ya din gusnin loj gra ree bén yu' lënü. <sup>16</sup> Ziangajc lëjt, gol gojc zi'c biani loj ree bejn, din chi guguiaa reeman ni zagdxe cayüjndi guza't reeman xDadidi Dios zagdxe bén yu' xanyabaa.

*Rülüü Jesús xcwent ley*

<sup>17</sup> 'Ad naladxidi zialan par günan ley tiblax, ley ni badëë Dios loj Moisejs o ni balüü ree bén badëë xtiidx Dios loj ree bejn, zialan par günanan cumplid. <sup>18</sup> Din naj rni lojdi,

la'tgaj yu' xanyabaa në guidxliuj, ad ziquiedt tijb punt o tijb lejtr loj ley xt chi gac gra ni naj gac. <sup>19</sup> Zianan zeel bën ad ruzoobt tijb mandamient ni zëed loj ley guin majsi nidobëz naj mandamient guin, bal rulüü tēeman bejn ree güün reeman zian, laaman lasajc ta'nzi lod rniabee Dios. Per bën ruzoob gra ree mandamient ni zëed loj ley guin, rulüü tēeman bejn ree guzoob reeman laan, laaman naj mazri bën lasajc lod rniabee Dios. <sup>20</sup> Zeel naj rni lojdi, bal id zabajndi mazri zagdxë guial loj ree mextr rajc ley në ree bënfarisew, ad zayaltidi lod rniabee Dios.

*Rulüü Jesús xcwent guialrdxe'ch lasa'*  
(Lc. 12:57-59)

<sup>21</sup> Lëjt ragbee guial rëb Dios loj ree xbéngulalidi: “Ad gugüjtil bejn, din bën gugüjt bejn yayalaman casti.” <sup>22</sup> Per naj rni lojdi, chutëez bën rdxe'chnë lasa', yayalaman casti, në bën rniece diidxguijdx lasa' xt loj guxtis zajc cheman, guiáad bën rëb loj lasa' achet sirv lüj, laaman yayal loj bajl yu' gabijl.

<sup>23</sup> Zeel bal zinël gon lën yadoo abi' yagaj rusaaladxil guial yu' bën rdxe'chil, <sup>24</sup> basa'nsii xgonl yagaj, yalojxgaj babenë bën rdxe'chil zagdxë, dxel ma zile' yajejquil din gusa'n xgonl.

<sup>25</sup> Bal chu bën rudëed lüj loj guxtis, baya'nnëman diidx zagdxë la'tgaj yu' tiamp, chitëe yayüman lüj loj guxtis, abi' guxtis guin nabee chu'l ladxguuib. <sup>26</sup> Naj rni lüj, ad zariitil ladxguuib guin xtczi quixil gra ni na guxtis guin.

*Rulüü Jesús xcwent guialrznë lacheel ben ren*

<sup>27</sup> Lëjt ragbee guial loj ley rëb: “Ad sunël lacheel ben ren.” <sup>28</sup> Per naj rni lëjt, chutëez bën rüjn xgabmal chi ruguiaaman tijb béngunaa, con laan ma beenman dol lën luxdooman por béngunaa guin.

<sup>29</sup> Bal laagajc guiaaløj ladbeel rüjn din güünl dol, mazri zagdxë naj gulëen bazaalan zijt. Din mazri zagdxë naj nit tibläd guiaaløjluar che guidibil gabijl. <sup>30</sup> Abi' bal laagajc yaa ladbeel rüjn din güünl dol, gutü'n bazaalan zijt. Din mazri zagdxë naj nit tibläd yaal luar che guidibil gabijl.

*Rulüü Jesús xcwent guial rala' lasa' bejn*  
(Mt. 19:9; Mr. 10:11-12; Lc. 16:18)

<sup>31</sup> Ma bacaagdiajg tēedi: “Chutëez bën rala' lacheel, rayal gudëedaman gui'ch lojman guial ma bala' lasa' reeman.” <sup>32</sup> Per naj rni lëjt: Xinguaaaw rala' xbéngunaa, abi' ad za'nët béngunaa guin xin ren, laagajc laax cayüjn din sunë xbéngunaax xin ren. Abi' xin tia' béngunaa guin dolan cayüjnx.

*Ad rayalt guza't xlia' bejn Dios*

<sup>33</sup> Rëb tëë Dios loj ree xbéngulalidi: “Ad guza't xlia'di Dios, rayal güündi cumplid ni rëbidi gudëedidi lojman.” <sup>34</sup> Per naj rni lojdi: Ad rayaltczi guza'tidi Dios, ni'qui xanyabaa par chililadx reeman lëjt din ni zobj Dios, <sup>35</sup> ni'qui guidxliuj din loj guidxliuj naj lod ruzuj guia'man, ni'qui Jerusalén din laan naj ladx rey mazri rniabee. <sup>36</sup> Ad guza't tëë guijquidi par chililadx reeman lëjt, din ni'qui tijb guidxguijquidi ad zajct güündi ni ya's o ni naquich ya. <sup>37</sup> Zagdxeli con gol güjdx “an” o “a'n”, din los demazri ree ni guinieedi loj xindxab zan.

*Ad yadxi'di ni mal por ni mal*

(Lc. 6:29-30)

<sup>38</sup> Lëjt ragbee guial loj ley rëb: “Bén cwëë guiaalojl, gulëë gajc guiaalojman. Guiáad bén cwëë layil, gulëë gajc layaman.” <sup>39</sup> Per naj rni lëjt: Ad yadxi'di ni mal por ni mal, bal chu chëëz xhajn ladbeedi, gol badëë stibladan chëëzaman. <sup>40</sup> Bal chu bén tilë lüj din cwëëxuuman xmanguil, badëë në xchamarril tia'man. <sup>41</sup> Abi' bal rüjn reeman lüj naguiejn güül tijb yuu din sanëlan tib kilometro, guzanën tio'p kilometro. <sup>42</sup> Chutëëz bén rniab xhienin lojl, badëëdan, bal chu tëë rgui'n xhienin lojl ad bal cwexuul gudëëdilan.

*Guyën bén rdxe'ch lüj*

(Lc. 6:27-28, 32-36)

<sup>43</sup> Ragbee tëëdi rëb ree bejn: “Guyën bén rën lüj, bidxe'ch tëë bén rdxe'ch lüj.” <sup>44</sup> Per naj rni lojdi: Gol guyën bén rdxe'ch lëjt, gol gurejdx tëë Dios por ree bén rzunal lëjt, din güün reeman lëjt ni mal. <sup>45</sup> Din zian gaquidi xi'n xDadidi Dios bén yu' xanyabaa, din laaman ruslejn xgubijdxaman par ree benza'c në par ree benmal, ruscäl tëëman guia par ree bén naban zi'c rayal në par ree bén ad nabant zi'c rayal. <sup>46</sup> Din bal rëndi ganaxzi bén rën lëjt, ¿xhieza tia'di loj Dios zian? Din xt bëndol ree rüjn zian. <sup>47</sup> Abi' bal ganaxzi bén rëndi rugajpdiozidi, ¿xhieza ni zagdx cayüjndi? Din xt bén ad nünbeet ree Dios rüjn zian. <sup>48</sup> Zeel gol gojc benza'c, zi'c naj xDadidi Dios bén yu' xanyabaa.

## 6

*Xhienaag gagnë lasa' bejn*

<sup>1</sup> Ad güündi ni zagdx niz loj ree bejn naabzi par yadxaloj reeman lëjt. Din bal güündi zian, xDadidi Dios bén yu' xanyabaa achet guneman lojdi. <sup>2</sup> Zeel chi güünl yudar bén ryaadx xhienin, ad guitie'chil diidx par gagbee bejn xhie cayüjnl zi'c rüjn ree bén rusquiee, lën ree yadoo në ree lunejz, din guilies bejn xvalor reeman naj reeman benza'c. Per diidxliczi rnin lojdi, laazan naj ni rayal reeman. <sup>3</sup> Zeel chi

güünl yudar bén ryaadx xhienin, ni'czi loj xmiwda'til ad gül diidx ni cayüjnl. <sup>4</sup> Mazri zagdxe lüjzi gagbee ni cayüjnl, abi' xDadil Dios laaman cuguiaa ni cayüjn lüjzi, laaman gunee ni rayalil.

*Xcwent xhienaag cwedx guiniab bejn Dios*  
(Lc. 11:2-4)

<sup>5</sup> 'Chi cwedx guiniabidi Dios, ad güündi zi'c rüjn ree bén rusquiee, bén ruladx ree rzuli par cwedx guiniab reeman Dios lén ree yadoo në ree xquin nejz, din yadxaloj bejn laa reeman. Din naj rni lojdi, laazan naj ni rayal reeman. <sup>6</sup> Per lüj chi cwedx guiniabil Dios, bayu lénü lidxil, basiaaw ro' port, dxel gurejdx gunab Dios bén za'në lüj. Abi' laaman cuguiaa ni cayüjn lüjzi, laaman gunee ni rayalil.

<sup>7</sup> 'Chi rbejdx rniabidi Dios, ad radxi'di diidx guin guië'tzi guië't naabzi par gacxhiey xtiidxidi, zi'c rüjn ree bén ad nünbeet Dios. Din laa reeman naladx guial zien ni rniee reeman mazri guidxga' Dios laa reeman. <sup>8</sup> Ad güündi zi'c rüjn reeman, din xDadidi Dios ma ragbeeman xhie ryaadxidi chi gadidi guiniab laan. <sup>9</sup> Zeel chi cwedx guiniabidi Dios, gol güjdx:

Dad, lüj yu' xanyabaa,  
rayal yaya'p da'tan lajl respejt.

<sup>10</sup> Gac zi'c rniabeel.

Gac zi'c rënl loj guidxliuj zi'c rajc xanyabaa.

<sup>11</sup> Banee ni yadaawan guixie guixie.

<sup>12</sup> Been dunujn perdon gra ree ni mal ma baguieenan zi'c raguieenan perdon bén rüjn ree dunujn ni mal.

<sup>13</sup> Ad guslaal dunujn yaguieenan dol, babëë dunujn loj gra ni mal.

<sup>14</sup> 'Din bal güündi perdon bén rüjn lëjt ni mal, ziangajc xDadidi Dios bén yu' xanyabaa züjn gajcaman perdon xtolidi.

<sup>15</sup> Per bal id züjndi perdon bén rüjn ree lëjt ni mal, ziangajc xDadidi Dios ad züjntaman lëjt perdon.

*Xcwent guialrba'n*

<sup>16</sup> 'Chi rba'ndi ad güün lojdi naya, zi'c rüjn ree bén rusquiee din guguiaa bejn guial naba'n reeman. Naj rni lojdi, guial laazan naj ni rayal reeman. <sup>17</sup> Per lüj, chi rba'nl, gudiib lojl gudüjn tëë guijqul <sup>18</sup> chitëë gagbee ree bejn guial naba'nl. Tijbzi xDadil Dios bén za'në lüj naj bén gagbee laan, abi' laaman gunee lüj ni rayal tia'l.

*Guialnaza'c yu' xanyabaa*  
(Lc. 12:33-34)

<sup>19</sup> 'Ad guto'pidi guialnaza'c loj guidxliuj guie lod zajc tiabe reen o xhin reen o chu' xingubaan cwan laa reen. <sup>20</sup> Zagdxeli

gol been naguiejn gol been gan guialnaza'c yu' xanyabaa lod ad zacabet reen, lod ad zaxint reen, lod ad zu tēēt xingubaan cwan laa reen. <sup>21</sup> Lod gapil guialnaza'c guin yagaj su luxdool.

*Guiaaloj bejn naj zi'c biani*

*(Lc. 11:34-36)*

<sup>22</sup> 'Guiaaloj bejn naj zi'c tijb biani par xcuerpaman. Zeel bal cayüjnl ni zagdxe, guidib xcuerpil rajp biani. <sup>23</sup> Per bal cayüjnl ni mal, guidib xcuerpil naj zi'c lod nacay, zi'c naj lod nacaybuu.

*Dios ya o milia*

*(Lc. 16:13)*

<sup>24</sup> Ad zile't chu güün sirv loj tio'p patron, din zadxe'chaman tijbaman abi' guiënman stijbaman, o gacaman benza'c con tijbaman abi' ad zëntaman stijbaman. Zeel ad zile't güündi sirv loj Dios në loj milia.

*Ahetczi rayal chu' bejn xgab*

*(Lc. 12:22-31)*

<sup>25</sup> 'Naj rni lējt: Ad chu'di xgab por ni gawidi në por ni guië'di din guibandi, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman. <sup>26</sup> Gol baguiaa ree be rzuj xanyabaa, ad rxübint reeb, ad rato'p tēēt reeb guialnaza'c, ad naj tēēt lod cu'chaaw reeb guialnaza'c guin. Per xDadidi Dios bën yu' xanyabaa rudëed ni raw reeb. Abi' mazri lasajquidi guial loj reeb. <sup>27</sup> Abi' tēē, ¿wen guial ru da'tidi xgab ma güün lējt mazri ziool ya?

<sup>28</sup> '¿Chexquiiza zeel dád rudi xgab por xabidi? Gol baguiaa xhienaag rni's ree guiaa dajn. Achet dxiin rüjn reen ad rguib tēēt reen, <sup>29</sup> per ni'qui rey Salomón ad guzujchaawt zi'c za'chaaw ree guiaa majsi mast guzujchaawaman. <sup>30</sup> Abi' bal gui'xh dajn ruzujchaaw Dios yan, majsi guixiezi che'can. Diidxgui lējt bën ad rliladxza'ct ree laaman, nid zuneeman ni gacwidi ya. <sup>31</sup> Zeel ad rudi xgab xhie gawidi, o xhie guië'di, o xhie gacwidi. <sup>32</sup> Din bën ad nünbeet ree Dios rüjn zian, laa reeman ru xgab por gra ree ni guin. Per lējt yu' xDadidi xanyabaa, abi' laaman ragbeechaaw xhienin ryaadxidi. <sup>33</sup> Per yalojxgaj gol baguiil güündi zi'c rniabee Dios, gol been tēē zi'c rënman, dxel laaman gunee gra ree ni ryaadxidi. <sup>34</sup> Ad chu'di xgab por ni gac guixie, gol basa'nan par guixie, zagdxeli gol guyu xgab tib dxejgaj.

## 7

*Xcwent guialrula'ch*

*(Lc. 6:37-38, 41-42)*

<sup>1</sup> 'Ad gula'chidi bejn chitëe saquidi zian. <sup>2</sup> Din bal rula'chidi bejn ziangajc saquidi, zi'c rüjnnëdi bejn ziangajc güünnë reeman lëjt. <sup>3</sup> Ad gula'chidi bën ren por falt dobëz ni rajpaman, zagdxeli gol guyu xgab por falt narooob ni rajpidi. <sup>4</sup> Abi' bal mazri falt narooob rajpidi, ¿xoxa guiëbidi loj stijb bejn: "Ad laat naj ni rüjnl?" <sup>5</sup> ¡Bën rusquiee! Yalojxgaj gol been zi'c rayal, chi ma rüjndi zian dxel ma zile' guiëbidi loj stijb bejn: "Ad laat naj ni rüjnl."

<sup>6</sup> 'Ad güüнди nagueijn güüncwent ree bën ad rënt güüncwent xtiidx Dios, chitëe xhie güünnë reeman lëjt. Din bal güüнди zian, laan naj zi'c chi ruzaal bejn tijb ni nagle' loj bë'cw, o chi ruzaal bejn tijb ni lasajc loj cüch abi' chë'pzib guijcan.

### *Ni guiniabidi zaca'dan*

*(Lc. 11:9-13; 6:31)*

<sup>7</sup> 'Naj rni lëjt: Gol gunab loj Dios, abi' laaman gunee ni rniabidi. Gol baguuilaman, zadxejlidi laaman. Gol gurejdx gunabaman, züjncwentaman lëjt. <sup>8</sup> Din bën rniab, zaca'man. Abi' bën rguuil, zadxejlaman, guiáad bën rbejdx rniab laaman, züjncwentaman laaman.

<sup>9</sup> 'Lëjt najdi dad, ¿wen zudëedi tijb guiaj loj xi'ndi ya chi guiniabix guiadxtil?, <sup>10</sup> ¿o zudëedi tijb bëel ya chi guiniabix bëjl? <sup>11</sup> Nacli lëjt najdi bëndol rajc rudëedi ni rën xi'ndi. ¡Diidxgui xDadidi bën yu' xanyabaa, nid zudëedaman ni zagdxex loj ree bën rniab laan ya!

<sup>12</sup> 'Gol beennë ree bejn zi'c rëndi güünnë reeman lëjt. Din zian rniabee xley Dios në ni bacaa ree bën badëe xtiidxaman loj ree bejn.

### *Port nadëe*

*(Lc. 13:24)*

<sup>13</sup> 'Gol been nagueijn din chu'di niz ro' port nadëe. Din port gulajg në nejj gulajg, laa reen naj ni zinë bejn loj nejj mal, abi' zien bejn zë loj nejj guin. <sup>14</sup> Per port nadëe guin në nejj nadëe guin laa reen naj ni rnë bejn lod yu' guialnaban tiblayaa, abi' ta'nzi ree bejn zë loj nejj guin.

### *Por ni rüjndi zayünbee ree bejn lëjt*

*(Lc. 6:43-44)*

<sup>15</sup> 'Gol gojp cudad con ree bën rusquiee rëb rudëed reeman xtiidx Dios. Din rulüü dád bën chaawladx reen, per rüjndi reeman par gusquiee reeman bejn. <sup>16</sup> Per zayünbeedi laa reeman por ni rüjn reeman, din ad rtiat uv loj yaquiëjch ad rtia tëet higo loj gui'xh guiëjch. <sup>17</sup> Zeel gra yag zagdxex rtia ni zagdxex lojn. Guiáad gra yag guijdx rtia ni guijdx lojn. <sup>18</sup> Ad rtiat ni guijdx loj yag zagdxex, ad rtia tëet ni zagdxex loj yag

guijdx. <sup>19</sup> Gra yag ad rtiat ni zagdx, rirugan dxel re'can.  
<sup>20</sup> Ziangajc lëjt zayünbeedi laa reeman por ni rüjn reeman.

*Ad grat bejn chu' lod rniabee Dios*  
*(Lc. 13:25-27)*

<sup>21</sup> 'Ad grat ree bén na lon: "Dad, Dad," chu' lod rniabee Dios, ganaxzi ree bén rüjn zi'c rën da Dadan, bén yu' xanyabaa.  
<sup>22</sup> Dxejzii, zien ree bén na lon: "Dad, Dad, por lüj batie'chan xtiidxil, abi' guial baza'tan lajl balëen xindxab ree luxdoo ree bejn, baguieen tëen zien ree milagr guial baza'tan lajl."  
<sup>23</sup> Dxel guiën loj reeman: "Ad benbeetzan lëjt, gol gubi'ca lon béndol."

*Tio'p loj cimiant*  
*(Lc. 6:47-49; Mr. 1:22)*

<sup>24</sup> 'Chutëez bén rucaagdiajg da diidxan abi' rüjnman ni rën, laaman naj zi'c tijb bén nasin gules xcimiant lidx loj guiaj.  
<sup>25</sup> Abi' gol guia, dxel biguiajt nijs ro' gubi' tëë bidoxh, gulaj reen lad yu guin, per ad gulenxantan guial naj xcimiantan loj guiaj. <sup>26</sup> Per bén riguejxn da diidxan abi' ad rüjntaman ni rën, laaman naj zi'c tijb bén ad nasint bazoob lidx loj üx. <sup>27</sup> Abi' chi gol guia biguiajt nijs narooob, gubi' tëë bidoxh. Abi' gulaj reen lad yu guin zianz gulenxanan, ni'qui tibda'nän ad baya'nt.  
<sup>28</sup> Chi gulox guneenë Jesús bén guin ree, graczi reeman badxa da't loj zi'c balüüman laa reeman, <sup>29</sup> guial rulüüman laa reeman zi'c bén rajp gualrniabee, ad zi'c rulüüt ree mextr rajc ley.

## 8

*Rayüjn Jesús tijb bén rajc gualguijdx la lepra*  
*(Mr. 1:40-45; Lc. 5:12-16)*

<sup>1</sup> Chi baza Jesús ruguia' guin, dád zien bejn nal laaman.  
<sup>2</sup> Dxel gubig tijb bejn lojman rajcaman gualguijdx la lepra, abi' bazuxibaman lojman, rëbaman:

—Dad, bal tiëbil, zile' yayüjnl naj.

<sup>3</sup> Dxel basli yaa Jesús baqui'män laaman, rëbaman:  
 —Rënan. Bayajc.

Chi rëb Jesús zian, loj hor ziigajc biquied gualguijdx guin abi' bayaman. <sup>4</sup> Dxel rëb Jesús lojman:

—Bacaagdiajg ni ganin lüj. Achu loj guiëbil guial ma baya-jquil. Lojzi bixhioz wej din guguaaman lüj, binë gon ni rayal chinël zi'c gunabee Moisejs, din gagbee gra ree bejn guial ma bayajquil.

*Bayajc xmojs tijb bén suldad rniabee ree suldad*  
*(Lc. 7:1-10)*



<sup>5</sup> Chi guyu Jesús luguiedx Capernaum, tijb suldad Rom rniabee ree suldad bibig lojman, guzajcaman laaman liaadx, <sup>6</sup> rëbaman:

—Dad, laa da mojsan naga' lidxan ragxuux. Ad rile't chixchex, dád cusagzi guialguijdx guin laax.

<sup>7</sup> Dxel rëb Jesús lojman:

—Gan din yayünan laax.

<sup>8</sup> Badxi' bën rniabee ree suldad guinan, rëbaman:

—Dad, ad rayaltan chu'l lidxan, per gunee diizd guie din yayajc da mojsan. <sup>9</sup> Din zi'c naj yu' ree bën rniabee naj, ziangajc naj yu' ree da suldadan xin rniabeen. Chi rën loj tijb reex: “Wej”, rejx, chi rën loj stijbix: “Guda,” ri'tix. Abi' chi rë loj da mojsan: “Been ni guin”, rüjnxan.

<sup>10</sup> Chi biguiejn Jesús zian, dád badxalojman abi' rëbaman loj ree bën zinal laaman:

—Naj rni lojdi, ni'qui Israel ad wadxaaglojtan tijb bën rililadx Dios zi'c rililadx bën guin Dios. <sup>11</sup> Naj rni lëjt, dád zien ree bën gralad yayal gawnë Abraham, në Isaac, në Jacob lod rniabee Dios. <sup>12</sup> Guiáad ree bën rayal niu lod rniabee Dios, laa reeman yayal lod nacay da't lod goon reeman lod gaw tëë lay reeman.

<sup>13</sup> Dxel rëb Jesús loj suldad rniabee guin:

—Baguiaj lidxil, gac tëë zi'c ma bililadxil.

Abi' loj hor guin gajc bayajc xmojs bën guin.

### *Rayüjn Jesús xnasuegr Bëd*

*(Mr. 1:29-31; Lc. 4:38-39)*

<sup>14</sup> Chi we Jesús lidx Bëd, baguiaaman xnasuegr Bëd naga'man yu'man xliaa. <sup>15</sup> Dxel gunaazaman yaaman, abi' bariiman xliaa guin, dxel bixchewan guzuloj cyaanman laa reeman.

### *Rayüjn Jesús zien ree bënragxu*

*(Mr. 1:32-34; Lc. 4:40-41)*

<sup>16</sup> Chi ma caxhin, binë ree bejn zien ree bën yu' xindxab luxdoo loj Jesús. Abi' con tijb diidx ni guneeman babëëman xindxab guin luxdoo reeman, bayüjn tëëman gra ree bënragxu. <sup>17</sup> Zian gojc persi gojc cumplid ni rëb Isaías, bën badëë xtiidx Dios loj ree bejn, chi rëbaman: “Laaman zignë dux guialguijdx ree, laa tëëman zignë dux guialzi ree.”

### *Bën rën chinal Jesús*

*(Lc. 9:57-62)*

<sup>18</sup> Chi baguiaa Jesús bénguixiuj nayaw laaman, gunabeeman tédaman stiblad ro' nijs naj yagaj. <sup>19</sup> Dxel gubig tijb mextr rajc ley loj Jesús, rëbaman:

—Mextr, rënan guidnaalan lüj bantëëz guin chel.

<sup>20</sup> Abi' rëb Jesús lojman:

—Bëz ree yu' xbiliaa reeb, abi' ree biguijn yu' xguixbitia's reeb. Per Bén guxhaal Dios ni'qui lod quixh guiycaman ad yu't.

<sup>21</sup> Dxel rëb stijb ree bén zinal laaman:

—Dad, baslaa naj gabenë' da dadan xt chi guiëtaman.

<sup>22</sup> Per rëb Jesús lojman:

—Tanal naj, basa'nman con ree bén ad rënt guidnal naj, laa reeman guquie'ch laaman chi guiëtaman.

*Racwëëz Jesús bidoxh*

(Mr. 4:35-41; Lc. 8:22-25)

<sup>23</sup> Guyu Jesús loj barcw con ree xbejnman, <sup>24</sup> abi' la'tgaj zë reeman loj nijs guin dxejlczi gubi' tijb bidoxh, ma cazëëbczi barcw guin xan nijs. Per Jesús naga'yëjsaman. <sup>25</sup> Dxel bicwëen ree xbejnman laaman, rëb reeman:

—¡Dad, gunaj dunujn! ¡Ma cayzëëban xan nijs!

<sup>26</sup> Badxi'man laan rëbaman:

—¿Chexc zeel dád rdxebidi? ¿Chexc zeel ad rliladxza'ctidi naj?

Dxel bixchewan abi' gunabeeman bacwëëz bi guin në nijs guin. Loj hor ziigajc babedxe reen. <sup>27</sup> Abi' ree xbejnman badxa da't loj reeman, zianz gunabdiidx loj lasa' reeman, rëb reeman:

—¿Chu bén guin, zeel xt bi në nijs ruzoob xtiidxaman?

*Tio'p ree bén yu' xindxab luxdoo*

(Mr. 5:1-20; Lc. 8:26-39)

<sup>28</sup> Chi bidxin Jesús stiblad ro' nijs guin, loj xguidxliuj ree bén Gadara, dxel tio'p ree xinguaaw yu' xindxab luxdoo brii reex lað ree baa abi' wej reex loj Jesús. Dád nadoxh reex, zeel ad rilet' chu téd lunejz guin. <sup>29</sup> Chi baguiaa reex Jesús, gurixdiaj reex rëb reex:

—¿Xhie rënl con dunujn, Jesús, Xi'n Dios? ¿Zëëdil guie ya din gusagzil dunujn chi gadli dxej guidxin?

<sup>30</sup> Per gajxh yagaj za' zien ree cüch, cayaw reeb, <sup>31</sup> abi' guzajc ree xindxab guin liaadx loj Jesús, rëb reex:

—Bal yabëël dunujn, banee mod yadxu'n lën ree cüch guin.

<sup>32</sup> Dxel rëb Jesús:

—Gol wej.

Dxel barii ree xindxab guin luxdoo ree bén guin bayu reex lën ree cüch guin. Abi' gra reeb guzuloj cuxüün zianz bitidia' reeb ro' tijb bala' xt loj nijs, lod gu' reeb nijs abi' güjt reeb.

<sup>33</sup> Abi' ree bén cayajp cüch guin ree, baxüün reeman. Dxel chi badxin reeman luguiedx guin, be reeman diidx gra ni goc në gra ni guzac ree bén yu' ree xindxab guin luxdoo. <sup>34</sup> Dxel gra ree bén guiedx guin brii wej lod za' Jesús, abi' chi baguiaa

reeman laaman, guzajc reeman laaman liaadx, din yazaman ladx reeman.

## 9

*Bayüjn Jesús bén nëjt xcuerp*  
(Mr. 2:1-12; Lc. 5:17-26)

<sup>1</sup> Dxel bayu Jesús loj tijb barcw, badëdaman stiblad ro' nijs guin abi' badxin ladxaman. <sup>2</sup> Yagaj binë ree bejn tijb xin nëjt xcuerp, naga'x loj da. Chi baguiaa Jesús guial rliladx reeman laaman, rëbaman loj xin ragxuu guin:

—Bagu' luxdool zagdx, xi'n. Ma benan perdon xtolil.

<sup>3</sup> Dxel tio'p choon ree mextr rajc ley been reeman xgab: “Diosan rüjnx tiblax guial rnieex zian.” <sup>4</sup> Per guial gogbee gajc Jesús xhie xgaben cayüjn reeman, dxel rëbaman loj reeman:

—¿Chexc zeel rüjndi xgabmal? <sup>5</sup> ¿Conin mazri nawëëg gac? ¿Guial guiën ya: “Ma benan perdon xtolil” o guiën: “Bixche, guza”? <sup>6</sup> Per yan, gulün lëjt guial naj, Bén guxhaal Dios ra'pan guialrniabee loj guidxliuj guie par günan perdon dol ree.

Dxel rëb Jesús loj xin ragxuu guin:

—Bixche. Baca' ni go'til loj. Baguij lidxil.

<sup>7</sup> Laa bixchegajquix zia lidxix. <sup>8</sup> Chi baguiaa ree bén guin zian, bidxeb reeman, abi' baza't reeman Dios zagdx por guialrniabee ni badëëman loj ree bejn.

*Rbejdx Jesús Matew*  
(Mr. 2:13-17; Lc. 5:27-32)

<sup>9</sup> Chi baza Jesús yagaj ziaman, baguiaaman tijb xin la Matew. Zojbix lod ruquijxix impuest, abi' rëbaman lojx:

—Tanal naj.

Dxel bisu Matew zinalix laaman.

<sup>10</sup> Tijb dxej chi cayaw Jesús lidx Matew con zien ree bén ruquijx impuest në ree bén zëëb xtiidx ad nabant xnejz, gra reeman zojbnë Jesús xan mex con ree xbejnman. <sup>11</sup> Chi baguiaa ree bénfarisew zian, gunabdiidx reeman loj ree xbejn Jesús rëb reeman:

—¿Chexc zeel cayawnë xmextridi bén ruquijx ree impuest në ree béndol?

<sup>12</sup> Chi biguiejn Jesús ni rëb reeman, dxel rëbaman:

—Bénnaadan ree ad ryaadxt reeman doctor, bénragxuu ree laa reeman ryaadx doctor. <sup>13</sup> Gol chej, gol basiid xhie rën guiëb loj xtiidx Dios lod rëb: “Ni mazri rënan naj guial yaya lasa'di luar guidnëdi gon lon.” Yan, naj ad zialtan par ree benza'c, zialan par ree béndol, din yayüjn reeman xgab por xtol reeman.

*Rniabdiidx reeman loj Jesús xcwent guialrba'n*  
(Mr. 2:18-22; Lc. 5:33-39)

<sup>14</sup> Dxel ree xbejn Waj, b́en baroobnijs bejn ree, bibig ree-man loj Jesús, zianz gunabdiidx reeman lojman, rēb reeman: —¿Chexc zeel dunujn con ree b́enfarisew dád zienvolt raba'nan, guiáad ree xbejnl ad rba'nt reeman?

<sup>15</sup> Badxi' Jesúsán rēbaman:

—Lod yu' gualruxhliaa, ¿wen runaya ree biooz ya chi za'nē xin cuxhliaa guin laa reeman? Per guidxin dxej chiquiedix, dxel guiba'n reeman.

<sup>16</sup> Achut rata' lajd cüb loj lajd yojx din zaxü'n lajd cüb guin, abi' mazri quixya'n lajd yojx guin. <sup>17</sup> Ad rgu' tēēt reeman vin cüb lēn anfr yojx din zaxya' anfr yojx guin, abi' zi'c anfr guin zi'c vin guin zaxin reen. Zeel naj gual chu' vin cüb lēn anfr cüb, din ni'qui tijb reen ad zaxint.

*Bayajc xi'n Jairo nē béngunaa bagaal xab Jesús*

(Mr. 5:21-43; Lc. 8:40-56)

<sup>18</sup> La'tgaj canee Jesús zian, bidxin tijb b́en rniabee lēn xyadoo ree b́en Israel, abi' bazuxibaman loj Jesús, rēbaman:

—Yangajczi güjt da xi'ndxa'pan, per bal gui'til guixhioob yaal guijquim zabanm.

<sup>19</sup> Dxel zinē Jesús laaman con ree xbejn Jesús. <sup>20</sup> Abi' tijb béngunaa ragxuu ma gojc chiptio'p ijz ad rbēzt ryajbaman rejn, gubigaman niz xijch Jesús abi' bagaalaman guia' xabaman, <sup>21</sup> gual gunaladxaman: “Bal gugaalaman majsi xabzaman, zayajcaman.” <sup>22</sup> Per badxi' loj Jesús, abi' baguiaadxi-jchaman béngunaa guin, dxel rēbaman lojman:

—Zagdxé bagu' luxdool, xi'n. Ma bayajquil gual bililadxil naj.

Abi' loj hor ziigajc bayajc b́en guin.

<sup>23</sup> Chi bidxin Jesús lidx b́en rniabee guin, baguiaaman ma riga' ree xinrucwejdx din chiquie'ch reex xi'nman, abi' ree bejn roon rbixdiaj reeman guijquim. <sup>24</sup> Dxel rēb Jesús loj reeman:

—Gol barii guie, din ad güjtt bindo guin, naga'yējszim.

Abi' baxijdxnē reeman laaman. <sup>25</sup> Chi ma barii reeman, zianz guyuman. Gunaazaman yaa bindo guin dxel bixchem.

<sup>26</sup> Abi' guidib niz yagaj bire'ch diidx ni goc.

*Rayüjn Jesús tio'p bénlutia'p*

<sup>27</sup> Chi baza Jesús yagaj, binal tio'p bénlutia'p laaman, rbixdiaj reeman, rēb reeman:

—¡Jesús, xdiaa Davi, baya dunujn!

<sup>28</sup> Chi badxin Jesús lod zojbaman, dxel bibig ree b́en guin lojman, abi' gunabdiidxaman loj reeman, rēbaman:

—¿Rliladxidi ya gual zile' yayünan lējt?

Badxi' reeman laan rēb reeman:

—Raliduladxan, Dad.

<sup>29</sup> Dxel bagaal Jesús guiaaloj reeman, rëbaman:

—Gac zi'c riladxidi.

<sup>30</sup> Abi' bayajc guiaaloj reeman, dxel rëb Jesús loj reeman:

—Ad bal chu loj guiëbidi guial bayajc guiaalojdi.

<sup>31</sup> Per naabzi baza reeman yagaj, guzuloj catie'ch reeman diidx guidib niz yagaj ni been Jesús.

### *Rayüjn Jesús tijb bengop*

<sup>32</sup> Chi baza ree bën bayüjn Jesús guiaaloj, dxel bidxinnë ree bejn tijb bengop, yu' xindxab luxdooan. <sup>33</sup> Abi' guloxzi babëë Jesús xindxab guin luxdoo bengop guin, laa guzuloj gajc caneeman. Abi' dád badxaloj ree bejn, rëb reeman:

—Ad goct waguiaa ree lasa' milagr guie niz Israel.

<sup>34</sup> Per ree bënfarisew rëb reeman:

—Bën guin rabëë xindxab luxdoo ree bejn por xguialrniabee gajc xindxab rniabee ree xindxab.

### *Raya Jesús bejn ree*

<sup>35</sup> Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaag rniabee Dios, rayüjn tëëman graloj guialrdoob në graloj guialguijdx ni rajc ree bejn. <sup>36</sup> Chi baguiaa Jesús benzien guin ree, bayaman laa reeman, guial dád naya riga' reeman, riga' reeman zi'c xiil ad rya'pt. <sup>37</sup> Dxel rëbaman loj ree xbejnman:

—Walican zien bejn rën gucaagdiajg xtiidx Dios, per ad zient bën guluü laa reeman yu'. <sup>38</sup> Zeel gol gunab loj Dios din guixhiaalaman mazri ree bën guluü laa reeman.

## 10

### *Gulej Jesús chiptio'p ree apóstoles*

(Mr. 3:13-19; Lc. 6:12-16)

<sup>1</sup> Gurejdx Jesús chiptio'p ree xbejnman, abi' badëëman guialrniabee loj reeman din yabëë reeman xindxab luxdoo ree bejn din yayüjn tëë reeman bejn ree graloj guialrdoob në graloj guialguijdx.

<sup>2</sup> Bën guie ree naj guidxiptio'p ree xi apóstoles Jesús: Simón bën gulëëljaman Bëd, con bijchaman Andrejs, në Jacob con Waj, bën naj ree xi'n Zebedeo. <sup>3</sup> Në Felip, Tol, Tumajs con Matew bën baquijx impuest, nëtëë Jacob xi'n Alfeo con Lebeo bën la gajc Tadeo <sup>4</sup> në Simón bën bi'ch loj ree bën Cananistas con Judas Iscariote bën yayü Jesús.

### *Rxhiaal Jesús gra ree xbejnman chigliüü reeman xtiidx Dios*

(Mr. 6:7-13; Lc. 9:1-6)

<sup>5</sup> Chi guxhaal Jesús guidxiptio'p ree xbejnman, rëbaman loj reeman:

—Ad chedi niz lod zobj ree bén ad najt bén Israel, ni'qui ree guiedx riga' niz Samaria, <sup>6</sup> gol chejli niz lod zobj ree bén Israel bén ad zinalt ree xnejz Dios. <sup>7</sup> Gol güjdx loj reeman guial ma zëed gajxh xguialrniabee Dios. <sup>8</sup> Gol bayüjn bénragxuu ree, gol basban bén ma güjt ree, gol bayüjn bén rajc ree guialguijdx la lepra, gol babëë tëë xindxab luxdoo ree bejn. Zi'cgajc cwa' lagajdi guialrniabee, ziangajc yayüjndi bejn lagajzi.

<sup>9</sup> 'Ad chinëdi or, ni'qui plajt, ni'qui cobr, <sup>10</sup> ni'qui guiixh. Ad bal chinë stib nejz xabidi, ni'qui stib nejz xgurëchidi, ni'qui yagriadxidi, din bén rüjn dxiin rayal gudëed ree bejn ni gawaman.

<sup>11</sup> 'Chi guidxindi tijb guiedx o tijb ciuda, gol gule'c ruson chu bén naj benza'c yaya'ndi lidx, yagaj gol baya'n xt chi yazadi luguiedx guin. <sup>12</sup> Abi' chi chu'di lënü guin, gol güjdx loj ree bén zobj yagaj: “Yabe'cdxe Dios luxdoodi.” <sup>13</sup> Bal rayal reeman guialnaza'c guin, zaya'nän con laa reeman guiáad bal id rayal reeman laan zayejcan con lëjt. <sup>14</sup> Guiáad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guiëbidi, gol baza yagaj, gol gudxiyp guxyuj guia'di zi'c tijb sen guial ad bazoobt reeman xtiidxidi. <sup>15</sup> Naj rni lëjt guial dxej ni yadëed ree bejn cwent loj Dios, mazri casti naroo yayal reeman guial loj ree bén Sodoma në Gomorra.

### *Guialzi ni zëed*

<sup>16</sup> Rëb tëë Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xiil loj ree cuyojt. Zeel gol gojc nasin zi'c bëël, gol gojc tëë nadoo zi'c palom. <sup>17</sup> Gol gojp cudad din zayü ree bejn lëjt loj ree guxtis, zaguijn reeman lëjt lën ree yadoo. <sup>18</sup> Abi' xt chinë reeman lëjt loj ree gobernador në loj ree rey guial rliladxidi naj, zian güdi da diidxan loj reeman në loj ree bén ad zinalt xnejz Dios. <sup>19</sup> Per chi chinë reeman lëjt loj guxtis, ad chu'di xgab xhie guinieedi xhie tëë naag guinieedan, din chi guidxin hor guinieedi, Dios yazaladx lëjt diidx ni guinieedi. <sup>20</sup> Din ad lëjtän guiniee, xSprijt xDadidi Diosan guiniee por lëjt.

<sup>21</sup> 'Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman në xniaa reeman abi' yayü reeman laa reeman par guiët reeman. <sup>22</sup> Gra bénguidxliuj guidxe'ch lëjt guial najdi da bejnän, per bén sudxi'ch loj guial rliladxaman naj xt dxej chigra guibanman, laaman yayal xanyabaa. <sup>23</sup> Chi sunal reeman lëjt tijb luguiedx par güün reeman lëjt xhienin, gol chej stijb guiedx, din naj rni lojdi, ad warat xguiedx Israel chedi chi gui't Bén guxhaal Dios.

<sup>24</sup> 'Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx. <sup>25</sup> Bén cusiid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, gulëëläj ree bejn naj Beelzebú, diidxgui lëjt najdi da bejnan.

*Chu rayal guidxeb bejn*

(Lc. 12:2-9)

<sup>26</sup> 'Ad guidxebidi bejn ree, din achet ni ralan yu' ni ad zaguiet, ni'qui tijb ni naguie'ch ad yu't ni ad zagbeet bejn. <sup>27</sup> Ni canin lëjt naguie'ch, gol güjdxan loj ree bejn, guiáad ni canin lëjt ralan, gol güjdxan loj gra ree bejn. <sup>28</sup> Ad rdxebidi bén rën ree gugüjt lëjt. Din zile' gugüjt reeman xcuerpidi, per xsprijtidi ad zile't gugüjt reeman laan. Gol bidxebli Dios din laaman zile' gunijt xcuerpidi abi' guixhiaalaman xsprijtidi gabijl.

<sup>29</sup> 'Lëjt ragbee guial biguijndoo ree ad lasajct reeb wayëjx, per ni'qui tijb reeb ad zëjtt sin xpermis xDadidi Dios. <sup>30</sup> Guiáad lëjt xt guidxguijquidi graczan nayab loj Dios. <sup>31</sup> Zeel ad rdxebidi din mazri lasajquidi guial loj zien da't ree biguijndoo.

*Bén rëb loj ree bejn guial najman xbejn Jesucrist*

(Lc. 12:8-9)

<sup>32</sup> 'Bén guiëb niz loj ree bejn guial da bejnanan, ziangajc naj guië loj da Dadan Dios bén yu' xanyabaa guial da bejnanan. <sup>33</sup> Per bén guiëb niz loj ree bejn guial ad da bejntanan, ziangajc guië loj da Dadan Dios bén yu' xanyabaa guial ad da bejntanan.

*Por Jesús rlia' lasa' ree bejn*

(Lc. 12:51-53; 14:26-27)

<sup>34</sup> Rëb tëë Jesús:

—Ad zialtan par yabecdixen luxdoo bejn, zialan din guial chililadx reeman naj chu' wadijl. <sup>35</sup> Din guial chililadx bejn naj, zadxe'ch xinguaaw xdadix, guiáad biingunaa zadxe'ch xniaam, abi' biinwalidx zadxe'ch xnasuegrim. <sup>36</sup> Abi' laagajc bén zojb ree lënülixidi guidxe'ch lëjt.

<sup>37</sup> 'Bén rën xdad o xniaa mazczi guial lon, ad zajct gacaman da bejnan. Ziangajc bén rën xi'ngaan o xi'ndxa'p mazczi guial lon, ad zajct gacaman da bejnan. <sup>38</sup> Bén rën guidnal naj, abi' ad rëntaman sagdiajman por naj, ad zile't gacaman da bejnan. <sup>39</sup> Bén rniajchi' guialnaban rajpaman loj guidxliuj guie, zadxin dxej gunijtaman laan, per bén guiët por naj, zajpaman guialnaban tiblayaa con Dios.

*Ni tia' ree bejn*

(Mr. 9:41)

<sup>40</sup> 'Bén ridxga' lëjt, najn ridxga'man, guiáad bén ridxga' naj, bén guxhaal najn ridxga'man. <sup>41</sup> Bén ridxga' tijb bén rudëë xtiidx Dios loj ree bejn, guial zëedaman por Dios, zaca'man lasa' ni rayal tia' bén guin loj Dios. Ziangajc bén ridxga' tijb bén naban zi'c rën Dios, zaca'man lasa' ni rayal tia' bén guin loj Dios. <sup>42</sup> Abi' chutëëz bén gudëed majsi tib xijgzi nijs naalyuj loj bejn guial najman da bejnan, naj rni lojdi guial yu' ni gudëed Dios tia' reeman.

## 11

### *Bigneenë ree xbejn Waj Jesús*

*(Lc. 7:18-35)*

<sup>1</sup> Chi gulox rëb Jesús loj guidxiptio'p ree xbejnman con ree nin chiguieen reeman, dxel bazaman yagaj ziglüüman bejn ree xtiidx Dios loj ree guiedx riga' niz yagaj.

<sup>2</sup> Abi' Waj, la'tgaj yu'man ladxguiib, cwa'man ruson gra ree ni cayün Jesús. Dxel guxhaal tio'p choon ree xbejnman, <sup>3</sup> bignabdiidx reeman lojman, rëb reeman:

—¿Lüj naj Cristo ya bén naj gui't, o yalëjzan ben ren ya?

<sup>4</sup> Dxel rëb Jesús loj reeman:

—Gol chej gol güjdx loj Waj ni cuguiaadi në ni cucaagdia-guidi. <sup>5</sup> Gol güjdx lojman guial ma ruguiaa ree bénlutia'p, ma rajc rza ree bencoj, ma bayajc tëë ree bén rajc guialguijdx la lepra, ma rigueijn ree bén nacwa't guiáad ree bengüt ma baban reeman, abi' ree bénprob ma caguieijn reeman xtiidx Dios. <sup>6</sup> Xiquilbaa ree bén ad zucwëëzt chililadx naj.

<sup>7</sup> Chi baza ree bén guxhaal Waj, dxel guzuloj Jesús canee-man loj ree bejn xcwent Waj, rëbaman:

—¿Chu naladxidi naj bén biquiaadi loj yujbidx? ¿Naladxidi ya najman zi'c tijb biqui ni runiib bi? <sup>8</sup> ¿O xhienaag naj bén biquiaadi? ¿Najman tijb bén najcw lajd zagdxe ya? Lëjt ragbee guial bén rajcw ree lajd zagdxe lën palas zobj reeman. <sup>9</sup> ¿Chuz a biquiaadi? ¿Tijb bén rudëë xtiidx Dios loj ree bejn ya? Per naj rni lojdi guial biquiaadi tijb bén mazri zobjloj guial loj bén rudëëd xtiidx Dios loj ree bejn. <sup>10</sup> Wajn din laaman naj ben ruza't loj xtiidx Dios lod rëb:

Naj rxhial tijb bén ned lojl,  
ben güünchaaw xnejzil.

<sup>11</sup> Naj rni lëjt, loj graczi ree bénguidxliuj, ad wayut bén mazri zobjloj guial loj Waj. Per majsi zian, bén ad zobjlojt loj xguialrniabee Dios, laaman mazri zobjloj guial loj Waj.

<sup>12</sup> 'Diizd chi bi't Waj xt yan, zien bejn rüjn da't naguieijn chu' lod rniabee Dios. Abi' ree bén rüjn da't naguieijn laa reeman chu' lod rniabeeman. <sup>13</sup> Diizd ley badëë Dios loj Moisejs con loj ree bén badëë xtiidx Dios loj ree bejn, xt Waj, laa reeman



gunee xcwent xguialrniabee Dios. <sup>14</sup> Abi' bal chililadxidi ni ganin lëjt, naj rni guial Wajn naj Elías bën badëë xtiidx Dios loj ree bejn. <sup>15</sup> Bén rën ree gucaagdiajg, gol bacaagdiajg.

<sup>16</sup> ¿Xhienaag ganin lëjt naj ree bën riga' loj guidxliuj guie yan? Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: <sup>17</sup> “Bacwejdxan bidxa, per ad baya'tidi, badoolan ni naya ree per ad biintidi.” <sup>18</sup> Din bi't Waj bën baroobnijs bejn ree, ad rawtaman ad rë' tëëtaman vin, abi' rëbidi xindxab yu' luxdoodan. <sup>19</sup> Yan, bi't Bén guxhaal Dios, rawaman rë' tëëman vin abi' rëbidi nalaman ruladx tëëman guië'man, ruchajg tëëman bëndol ree con ree bën ruquijx impuest. Per ree bën ma ca' xguialrniabee Dios, por laa reeman rguien guial gra ni rüjn Dios naj zagdxe.

*Bén ad bazoobt ree xtiidx Dios*  
(Lc. 10:13-15)

<sup>20</sup> Dxel guzuloj Jesús cadilëman bën zojb ree guiedx lod beenman mazri zien ree milagr. Din bën guin ree ad bayüjnt reeman xgab por xtol reeman, abi' rëbaman loj reeman:

<sup>21</sup> —¡Probza lëjt bën Corazín! ¡Probza lëjt bën Betsaida! Din bal luguiedx Tiro në luguiedx Sidón niajc ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tëë cobdëj guijc reeman zi'c tijb sen guial ma bayüjn reeman xgab por xtol reeman.

<sup>22</sup> Per rnin lëjt guial dxej yadëëd ree bejn cwent loj Dios, mazri casti narooob yayalidi guial loj ree bën Tiro në ree bën Sidón. <sup>23</sup> Guiáad lëjt bën Capernaum, ad naladxidi yayalidi xanyabaa, lëjt yayal gabijl. Din bal luguiedx Sodoma niajc ree milagr goc ladxidi, xt yan sta yu' guiedx guin. <sup>24</sup> Per rnin lojdi guial dxej yadëëd ree bejn cwent loj Dios, mazri casti narooob yayalidi guial loj ree bën Sodoma.

*Gol guda lon din yaziiladxidi*  
(Lc. 10:21-22)

<sup>25</sup> Lën ree dxejzii rëb Jesús:

—Dad, ruzatan lüj zagdxe, din ni baquie'chil loj ree bën rajc në loj ree bën rignia', laan ma balüül loj ree bën ad rajct.

<sup>26</sup> Zian gojc Dad, din zian guyën.

<sup>27</sup> 'Da Dadan banee gra lon. Abi' achut nünbee Jesucrist xi'n Dios, tijbzi Dios, achu tëët nünbee Dios, tijbzi Jesucrist xi'nman, con ree bën rënman güünbee Dios. <sup>28</sup> Gradi, bën ma badxag rüjn xhienin din yaya'ndi zagdxe loj Dios, ma badxag tëëdi nüü xtolidi. Gol guda lon, naj gune guialraziiladx lojdi. <sup>29</sup> Gol bazoob da diidxan, gol basiid tëë gaquidi benza'c në bën chaawladx zi'c naj, din yabedxe luxdoodi loj Dios. <sup>30</sup> Din ad nawëëgt guial guzoobidi da diidxan, ad nawëëg tëët guial güündi zi'c rënan.

## 12

*Rgui'ch ree xbejn Jesús trigo dxej raziiladx ree bén Israel  
(Mr: 2:23-28; Lc. 6:1-5)*

<sup>1</sup> Tijb dxej raziiladx ree bejn, chi cadöd Jesús con ree xbejnman loj tijb guiniaa lod yu' trigo, dxel calaan ree xbejnman abi' guzuloj cagui'ch reeman trigo persi cayaw reeman laan. <sup>2</sup> Abi' chi baguiaa ree bénfarisew ni cayüjn reeman, rëb reeman loj Jesús:

—Baguiaa ree xbejnl nial cayüjn reeman ni ad rayalt güün reeman dxej raziiladx ree bejn.

<sup>3</sup> Dxel rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman? <sup>4</sup> Guyu Davi lën xyadoo Dios abi' cwa'man guiadxtil ma nagle' ree gudawaman con ree xcompniaraman, ni ad rayalt niajw reeman, bixhiosi ree rayal gaw laa reen. <sup>5</sup> ¿O gadidi gool loj xley Moisejs ya guial achet dol rüjn ree bixhioz chi rüjn reeman dxiin lën yadoo majsi ad raziiladxt reeman dxej raziiladx ree bejn? <sup>6</sup> Abi' naj rni lëjt guial naj, bén za'në lëjt mazri lasajcan guial loj yadoo. <sup>7</sup> Bal rignia'di xhie rën guiëb loj xtiidx Dios lod rëb: “Ni rënan naj guial yaya lasa'di, ad guial gunetidi gon lon.” Bal rignia'di diidx guin ree ad zudxiibtidi guiyc ree bén ad rajpt dol. <sup>8</sup> Abi' Bén guxhaal Dios rajpaman guialrniabee dxej raziiladx ree bejn.

*Rayajc tijb bén nëjt tibladyaa  
(Mr: 3:1-6; Lc. 6:6-11)*

<sup>9</sup> Chi gudöd gojc zian, dxel baza Jesús abi' guyuman lën tijb yadoo naj niz yagaj. <sup>10</sup> Lën yadoo guin za' tijb bén nëjt tibladyaa. Abi' guial ree bénfarisew raguiil reeman mod xhie gudxiib reeman guiyc Jesús, dxel gunabdiidx reeman lojman, rëb reeman:

—¿Zile' yayüjn bejn tijb bénragxuu dxej raziiladx bejn ya?

<sup>11</sup> Badxi' Jesúsán rëbaman:

—Bal tijb lëjt rajp tijb xiil, abi' yabib lën bala' dxej raziiladx bejn. ¿Nid zabëëdi laab dxej guin ya? <sup>12</sup> ¿Wen id mazri lasajc tijb bejn guial loj tijb xiil ya? Zeel achet güünan zajc güün bejn ni naj zagdxe dxej raziiladx bejn.

<sup>13</sup> Dxel rëb Jesús loj bénragxuu yaa guin:

—Basli yaal.

Abi' basli yaa bén guin, loj hor ziigajc bayajc yaaman zi'c naj stibladan. <sup>14</sup> Per chi barii ree bénfarisew guin lën yadoo guin, guzuloj cayü reeman diidx xhienaag güün reeman din gugüjt reeman Jesús.

*Bén gule Dios*

15 Chi gogbee Jesús zian, laa zia gajcaman, abi' zien ree bejn binal laaman. Dxel bayüjnman gra ree bénragxuu, <sup>16</sup> abi' gunabeeman laa reeman chitëë guitie'ch reeman diidx chu bayüjn laa reeman. <sup>17</sup> Zian guzobj xtiidx Isaías, bén badëë xtiidx Dios loj ree bejn, chi rëbaman:

18 Gol baguiaa, bén guie naj bén gulen  
din güünman naj sirv,  
laaman naj bén rën da'tan,  
rabaanë' tēen laaman.

Gudë da Sprijtan lojman  
abi' guiëbaman loj ree bénguidxliuj  
xhienaag naj da guialrniabeen.

19 Achut tilnëman,  
ad zabixdiaj tēëtaman  
achut tēët guien cha'man niz lunejz.

20 Ad zudëëdtaman casti bén ad za'dxi'cht  
ree loj da nejzan, në ree bén ad ridxga'za'ct naj,  
xt chi ma beenman gan gac guialguxtis.

21 Abi' xt ree bén ad najt bén Israel  
cwëz reeman yabëëman laa reeman loj dol.

*Rëb ree bejn ca' Jesús xguialrniabee Beelzebú*

*(Mr. 3:19-30; Lc. 11:14-23; 12:10)*

22 Binë ree bejn tijb xinguaaw lod za' Jesús, yu' xindxab luxdoox, natia'p lojx naj tēëx gop. Dxel bayüjn Jesús laax abi' guzuloj rnieex ruguiaa tēëx. <sup>23</sup> Graczi ree bejn dád badxaloj reeman, abi' rëb reeman:

—¿Id bén guinan zëëd loj xdiaa Davi ya?

24 Chi biguiejn ree bénfarisew zian, dxel rëb reeman:

—Bén guin rabëë xindxab luxdoo ree bejn por xguialrniabee Beelzebú xin rniabee ree xindxab.

25 Per Jesús gogbee gajcaman xgab cayüjn reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, ziangajc tijb famil bal id nadxag riga' reeman, rlia' lasa' reeman. <sup>26</sup> Ziangajc bal xindxab su contr laagajquix, nayob nitix. <sup>27</sup> Lëjt na guial naj rabë xindxab luxdoo ree bejn por xguialrniabee Beelzebú, per bal zianan, ¿chuza rudëë guialrniabee loj xbejndi din yabëë reeman xindxab? Zeel laagajc reeman rulüü guial ad laat rnieedi. <sup>28</sup> Per naj, bal por xSprijt Dios rabën xindxab luxdoo ree bejn, rën guiëban guial ma za'në xguialrniabee Dios lëjt.

29 'Din ¿xhieza naag chu' tijb bejn lidx tijb bén gojl par cwanman ni rajpaman, bal id zaxhiixgajman laaman? Zian güünman din chile' cwanman ni rajpaman.

30 'Bén ad za't con naj, za'man contr naj. Guiáad bén ad ruto'pt bejn par naj, rtie'chaman laa reeman.

<sup>31</sup> 'Zeel rnin lëjt: Züjn Dios perdon xhietëez dolan, në ree diidxguijdx ni rnieetzi ree bejn, per ad züjntaman perdon Bén rnieeguijdx ree xSprijt Dios. <sup>32</sup> Chutëez Bén guinieeguijdx Bén guxhaal Dios, zajcaman perdon, per Bén guinieeguijdx xSprijt Dios ad zajctaman perdon yan, ni'qui chi yagualan.

*Nünbee bejn tijb yag por ni rtia lojn*  
(Lc. 6:43-45)

<sup>33</sup> 'Lëjt ragbee, bal tijb bejn ruzuj tijb yag zagdxe, rtia ni zagdxe lojn, per bal guzujman tijb yag guiidx, rtia ni guiidx lojn. Din tijb gaj yag nünbee bejnan por ni rtia lojn. <sup>34</sup> ¡Xi'n xindxab! ¿Xoza guinieedi diidx zagdxe ree awa benmal lëjt? Din ni yu' luxdoo bejn laan rnieeman. <sup>35</sup> Benza'c rnieeman diidxa'c, din laan yu' luxdooan. Guiáad benmal rnieeman diidxmal din laan yu' luxdooan. <sup>36</sup> Per naj rni lëjt guial dxej ni güün xguialguxtis Dios, gra ree bejn yadëed cwent lojman por gra ree diidxguijdx ni rniee reeman. <sup>37</sup> Din por xtiidx gajc bejn guiguien bal rayalaman xcasti Dios o ad rayaltaman laan ya.

*Rniab ree Bénfarisew tijb milagr*  
(Mr. 8:12; Lc. 11:29-32)

<sup>38</sup> Yu' ree Bénfarisew con ree mextr ni rajc ley, rëb loj Jesús:  
—Mextr, rayënan yaguaan güünl tijb milagr.

<sup>39</sup> Badxi' Jesúsán rëbaman:

—Lëjt benmal, Bén ad rüjnt ni rën Dios abi' rëndi günan tijb milagr. Per achetri guguaadi, tijbzi zi'c guzac Jonás Bén badëe xtiidx Dios loj ree bejn. <sup>40</sup> Din zi'c guyu Jonás lën bëjl narooob choon dxej choon guaial, ziangajc Bén guxhaal Dios, choon dxej choon guaial chu'man lën baa. <sup>41</sup> Abi' chi yadëed ree bejn cwent loj Dios, Bén guban ree Nínive zaban reeman abi' guiëb reeman guial ree Bén riga' yan, yayal reeman xcasti Dios. Din Bén Nínive ree bayejc reeman loj Dios chi bacaagdiajg reeman xtiidx Dios ni gunee Jonás. Abi' yan, Bén za'në lëjt mazri lasajcaman guial loj Jonás. <sup>42</sup> Ziangajc Bén goc reina niz sur, zabanman chi yadëed ree bejn cwent loj Dios, dxel guiëbaman guial ree Bén riga' yan, yayal reeman xcasti Dios. Din laaman dád zijt guzaman persi bicaagdiajgaman xguialrajc rey Salomón. Abi' yan, Bén za'në lëjt mazri lasajcan guial loj Salomón.

*Xindxab ni rayejc*  
(Lc. 11:24-26)

<sup>43</sup> 'Chi rarii tijb xindxab luxdoo tijb bejn, abi' rzax niz loj yujbidx rguuilix lod yaziiladxix. Abi' chi ad rdxejlt lod yaziiladxix, dxel rüjnx xgab naladxix: <sup>44</sup> “Zagdxeli yaye'can lod guzaan.” Abi' chi rayejquix ruguaiax luxdoo Bén guin

najn zi'c tijb lénü lod achut zobj, lod bilioob lod najcchaaw tée. <sup>45</sup> Dxel rica'x za gajdx xindxab naj ree mazri xinmal guial lojx. Abi' ru gra reex luxdoo bén guin. Dxel mazri benmal gacaman guial loj ni gocaman yaloj. Ziangajc sac ree benmal riga' loj guidxliuj yan.

*Xniaa Jesús con ree bijchaman*

*(Mr. 3:31-35; Lc. 8:19-21)*

<sup>46</sup> Sta canee Jesús loj ree bejn, bidxin xniaaman con ree bijchaman, za' reeman lule', rën reeman guinieenë reeman laaman. <sup>47</sup> Abi' yu' tijb bén rëb lojman:

—Laa xniaal con ree bijchil za' lule' guin, rën reeman guinieenë reeman lüj.

<sup>48</sup> Per Jesús badxi'man xtiidx bén guin rëbaman:

—¿Chu naj da nan chu tée ree nin naj da bichan?

<sup>49</sup> Dxel con yaaman balüü ree xbejnman rëbaman:

—Bén guie ree naj da nan në ree da bichan. <sup>50</sup> Din chutëöz bén rüjn zi'c rën da Dadan bén yu' xanyabaa, laaman naj da bichan, da zanan, në da nan.

## 13

*Xcwent bén rtie'ch bin*

*(Mr. 4:1-9; Lc. 8:4-8)*

<sup>1</sup> Dxejzii brii Jesús yu lod zobjaman, bisobaman ro' nijs Galilea. <sup>2</sup> Abi' guial dád zien ree bejn bido'p yagaj, beenan naguiejn wë'p Jesús loj tijb barcw dxel gurejman lojn, guiáad ree bén guin za' reeman ro' nijs guin. <sup>3</sup> Zien ree ni guzuloj culüüman laa reeman, per con ganax zi'c cwent ree, rëbaman loj reeman:

—Tijb bejn, briiman bigtie'chaman bin loj xguiniaaman.

<sup>4</sup> Chi catie'chaman bin guin, ta'n nan biajb loj nejz, abi' bi't ree biguijn gudaw reeb laan. <sup>5</sup> Sta'n nan biajb loj ree guiaj lod ad riga't zien yuj, cari gulejnan guial ad zient yuj riga'. <sup>6</sup> Per chi brii gubijdx, baze'can laan, abi' guial ad yu't liujn gubidxan.

<sup>7</sup> Dxel sta'n nan biajb loj ree yaquiëjch, chi guni's ree yaquiëjch guin banidloj reen laan. <sup>8</sup> Per sta'n nan biajb loj yuj za'c, abi' dád gojcan. Yu'n cwa tibgayuu bin loj, yu'n cwa gayojn yu' tëen cwa gajlbichii. <sup>9</sup> Bén rën gucaagdiajg, gol bacaagdiajg.

*Chexc zeel rulüü Jesús con ni naj ree zi'c cwent*

*(Mr. 4:10-12; Lc. 8:9-10)*

<sup>10</sup> Dxel gubig ree xbejn Jesús lojman rëb reeman:

—¿Chexquiza zeel rulüül bejn ree con ganax zi'c cwent ree?

<sup>11</sup> Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xgualrniabeeman, per bén guin ree ad basa'nt Dios laa reeman chignia' reeman laan. <sup>12</sup> Din Bén ma rignia', gusnuu

chignia'man mazri, abi' zignia' da'taman. Per b́en ad rignia'za'ct ad rŭjn t́eetaman naguiejn chignia'man mazri, xt ta'n ni rignia'man zayanladxaman. <sup>13</sup> Zeel rnienë'n laa reeman con ganaxzi zi'c cwent ree. Din majsi rani loj reeman per rŭjn reeman zi'c b́en ad ruguiaat, abi' majsi rigueiejn reeman per rŭjn reeman zi'c b́en ad rigueijnt, b́en ad rignia' t́eet. <sup>14</sup> Zian rzojb xtiidx Isaías, b́en badëë xtiidx Dios loj ree bejn, chi rëbaman:

Majsi rigueiejn reeman, per achetczy chignia' reeman.

Abi' majsi rani loj reeman, per ad ruguiaat reeman.

<sup>15</sup> Din ma been luxdoo reeman gojl,

nayaaw guidiajg reeman,

nayaaw t́eë guiaaloj reeman.

Chitëë guguaa reeman,

guigueiejn reeman,

chignia' t́eë reeman.

Din ad rënt reeman gui't reeman lon din gŭnan laa reeman perdon.

<sup>16</sup> 'Per xiquilbaadi cuguaadi caguiejn t́eedi. <sup>17</sup> Din naj rni lojdi guial dád zien ree b́en badëë xtiidx Dios loj ree bejn, në ree b́en guban zi'c rayal, guyën reeman nuguaa reeman ni cuguaadi per ad baguiaat reeman laan. Guyën reeman niguiejn reeman ni caguiejndi per ad bigueijnt reeman laan.

*Rusignia' Jesús xcwent b́en rtie'ch bin*

*(Mr. 4:13-20; Lc. 8:11-15)*

<sup>18</sup> 'Yan gol bacaagdiajg xhie rën guiëb ni rnin lojdi xcwent b́en bigtie'ch bin. <sup>19</sup> B́en rigueiejn xtiidx Dios abi' ad rignia'taman laan, laaman naj zi'c bin biajb loj nejz, guial laa ri't gajc xindxab rquiedix ni bacaagdiajgaman. <sup>20</sup> Guiáad bin biajb loj ree guiaj naj zi'c b́en rigueiejn xtiidx Dios, abi' dád nix ru luxdooan rigueijnman laan, <sup>21</sup> per guial najman zi'c cwaan ni ad yu't xliuj, ad rzudxi'chtaman. Chi rzagdiajman o rdxe'ch ree bejn laaman por xtiidx Dios, laa rusa'n gajcaman ni rliladxaman. <sup>22</sup> Abi' bin biajb loj ree yaquiëjch naj zi'c b́en rigueiejn xtiidx Dios, per guial mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwëëz rucaagdiajgaman xtiidx Dios achet sirv been ni bacaagdiajgaman. <sup>23</sup> Per bin biajb loj yuj za'c naj zi'c b́en rigueiejn xtiidx Dios abi' rignia'man laan rŭjn t́eëman zi'c rën Dios, zi'c ni cwa tibgayuu bin loj o zi'c ni cwa gayojn o ni cwa gajlbichii.

*Trigo con gui'xhguijdx*

<sup>24</sup> Be Jesús stijb ni naj zi'c cwent loj reeman, rëbaman:

—Xgualrniabee Dios naj zi'c tijb b́en badxe' ganax bin za-gdxe loj xguiniaa. <sup>25</sup> Per la'tgaj naga'yëjs gra reeman, bidxin

bén rdxe'ch laaman guxübinman gui'xhguijdx ree loj trigo guin dxel ziaman. <sup>26</sup> Abi' chi gulen trigo guin brii tée dojn lojn në ree gui'xh guin ma yu' lojn. <sup>27</sup> Dxel bicojn ree xmojs bén naj xguiniaa laan laaman, rëb reeman: “Dad çnid ganax bin zagdxé badxe' loj xguiniaal ya? yan, çbanza guza gui'xh yu' lojn?” <sup>28</sup> Badxi'man laan rëbaman: “Wed tijb bén rdxe'ch naj bidgadxe' laan.” Dxel gunabdiix ree mojs guin lojman rëb reeman: “çXhie nal zudojxhan gui'xh guin ree ya?” <sup>29</sup> Dxel rëbaman loj reeman: “Yajqui, chitëë guial gaxhidi gui'xh guin gaxhidi në trigo guin. <sup>30</sup> Zagdxeli gol basa'nan din ni'snën trigo guin xt chi ma gojcan. Abi' chi guidxin dxej yado'p trigo guin guiën loj ree bén guto'p laan din yalojxgaj gui'xh guin yato'p reeman din guixhii reeman lënan zianz che'can. Dxelri yato'p reeman trigo guin din cu'chaaw reeman laa reen lod ruchaaw reen.”

*Xcwent xhaj moxtajs*

(Mr. 4:30-32; Lc. 13:18-19)

<sup>31</sup> Be Jesús stijb ni naj zi'c cwent loj reeman, rëbaman:

—Xgualrniabee Dios naj zi'c xhaj moxtajs, ni rudxe' tijb bejn loj xguiniaaman. <sup>32</sup> Abi' bin guin naj mazri ni wit loj gra ree bin, per chi rni'san laan rajc mazri ni naroo loj gra ree cwaan. Abi' guial naroo da't rajcan, xt rüjn xguixbitia's ree biguijn xidxan.

*Xcwent levadur*

(Lc. 13:20-21)

<sup>33</sup> Be tée Jesús stijb ni naj zi'c cwent loj reeman, rëbaman:

—Xgualrniabee Dios naj zi'c levadur ni rugo'ch tijb béngunaa choon midid harin, abi' laan rusaaguij gra cob guin.

*Chexc zeel ruliüü Jesús con ni naj ree zi'c cwent*

(Mr. 4:33-34)

<sup>34</sup> Gra ree ni balüü Jesús bejn ree, balüüman laa reeman con

ganax ree ni naj zi'c cwent, achet balüüman laa reeman con ni ad najt ree zi'c cwent. <sup>35</sup> Zian gojc persi guzojb xtiidx bén badëë xtiidx Dios loj ree bejn, chi rëbaman:

Con ganaxzi ni naj ree zi'c cwent gulün bejn ree, guiën loj reeman ni gad reeman gagbee diizd chi gocchaaw guidxliuj.

*Rusignia' Jesús xcwent gui'xhguijdx*

<sup>36</sup> Chi ma bazaadiidxnë Jesús benzien guin ree, dxel bayuman lënü con ree xbejnman, abi' gunabdiidx reeman lojman, rëb reeman:

—Basignia' dunujn xcwent gui'xhguijdx ni gulen loj guiniaa guin.

<sup>37</sup> Badxi' Jesús san rëbaman:

—Bén rudxe' bin zagdxe guin naj Bén guxhaal Dios, <sup>38</sup> abi' guiniaa guin naj guidxliuj. Guiáad bin zagdxe guin naj ree bén naj par loj xgualrniabee Dios. Abi' ree gui'xh guin naj bén naj ree par xindxab. <sup>39</sup> Guiáad bén rdxe'ch, bén guxübin trigo guin naj xindxab. Abi' guial rado'p guialnaza'c guin rën guiëb chi nit guidxliuj, guiáad ree bén yato'p guialnaza'c guin naj ree xianjl Dios. <sup>40</sup> Zian zi'c rado'p ree gui'xhguijdx guin par che'c reen, zian gac chi nit guidxliuj. <sup>41</sup> Bén guxhaal Dios guixhiaal ree xianjlaman din yabëë reeman bén rayal ree yarii loj xgualrniabeeman, bén ruzaalguiiw bejn ree din güün reeman dol në gra ree bén cayüjn dol. <sup>42</sup> Abi' guzaal reeman laa reeman loj bajl lod goon reeman xt gaw lay reeman. <sup>43</sup> Dxel bén naban ree zi'c rën Dios, guidiin reeman bacha' loj xgualrniabee xDad reeman Dios, zi'c rdiin gubijdx bacha'. Bén rën gucaagdiajg, gol bacaagdiajg.

### *Xcwent ni lasajc*

<sup>44</sup> 'Xgualrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulëëman laan. Abi' dád rabaaman ruto' gra ni rajpaman persi rsiiman guidxliuj guin.

### *Xcwent perl*

<sup>45</sup> 'Rni tëen lëjt: Xgualrniabee Dios naj zi'c tijb bén rguuil perl zagdxe din siiman laan. <sup>46</sup> Chi rdxejlaman tijb perl lasajc, ruto' gra ni rajpaman abi' rsiiman laan.

### *Xcwent guijxh rniaaz bëjl*

<sup>47</sup> 'Abi' tëë xgualrniabee Dios naj zi'c tijb guijxh ni ruzaal reeman loj nijs abi' rniaazan graloj bëjl. <sup>48</sup> Dxel chi ma gudxa guijxh guin rabëë reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lën dxüm guiáad be ad najt zagdxe rusëëb reeman. <sup>49</sup> Zian gac dxej nit guidxliuj, gui't ree xianjl Dios yabe reeman benmal loj ree benza'c. <sup>50</sup> Abi' guzaal reeman benmal guin ree loj bajl lod goon reeman abi' xt gaw lay reeman.

### *Bén rbe nicüb në ni yojx*

<sup>51</sup> Dxel gunabdiidx Jesús loj ree xbejnman, rëbaman:

—¿Rignia'di gra ni canin lëjt ya?

Badxi' reeman laan rëb reeman:

—Rayignia'nan, Dad.

<sup>52</sup> Dxel rëb Jesús loj reeman:

—Gra ree mextr ni rajc ley, abi' cusiid reeman xhienaag naj xgualrniabee Dios, laa reeman naj zi'c tijb bén rbe nicüb në ni yojx loj gra ni rajpaman.



*Badxin Jesús Nazaret**(Mr. 6:1-6; Lc. 4:16-30)*

<sup>53</sup> Chi gulox gunee Jesús loj reeman zian, zianz bazaman.

<sup>54</sup> Dxel badxin ladxaman, ni guzuloj culüüman bejn ree lën xyadoo reeman. Abi' dád badxalox ree bén guin, rëb reeman:

—¿Ban guin basiidaman gra ree ni rajcaman? ¿Chexquiza zeel rajc rüjnman milagr ree? <sup>55</sup> ¿Nid laaman naj xi'n carpinter ya, abi' xniaaman naj Li, guiáad ree bijchaman naj Jacob, Xiëb, Simón, në Judas? <sup>56</sup> ¿Nid luguiedx guie zojb ree bizanman ya? ¿Banza guin basiidaman gra ree ni rajcaman?

<sup>57</sup> Abi' ad bidxga't reeman Jesús. Per rëbaman loj reeman:

—Bantëez guin rajp ree bejn respejt tijb bén rudëe xtiidx Dios loj ree bejn, per ladxaman achut rajp laaman respejt ni'qui lidxaman.

<sup>58</sup> Abi' ad zient milagr beenman yagaj guial ad bililadxt reeman laaman.

**14***Güjt Waj Bén baroobnijs bejn ree**(Mr. 6:14-29; Lc. 9:7-9)*

<sup>1</sup> Tiampzii Herodes bén canabee niz Galilea, biguiejnman ni cayüjn Jesús. <sup>2</sup> Abi' rëbaman loj ree xbejnman:

—Waj bén baroobnijs bejn ree, laaman baban zatijb, zeel rajpaman guialrniabee rüjnman milagr ree.

<sup>3</sup> Rëb Herodes zian guial laaman gunabee biniaaz Waj, abi' bixiiman con caden dxel badxe' reeman laaman ladxguuib. Been Herodes guin zian por Herodías lacheel bijchaman bén la Felip, <sup>4</sup> guial rëb Waj guin loj Herodes:

—Ad laat guial zojbnël laagajc lacheel bijchil.

<sup>5</sup> Guyën Herodes nugüjtaman Waj, per bidxebaman xhie nüjn ree bejn laaman guial graczi reeman rëb Waj naj tijb bén rudëe xtiidx Dios loj ree bejn. <sup>6</sup> Per chi baza' Herodes ijz, brii xi'n Herodías baya'm loj ree xbioozaman. Abi' dád bayuladx Herodes zi'c baya'm, <sup>7</sup> dxel rëb Herodes gudëedaman xhietëez ni guiniabim. <sup>8</sup> Abi' xniaam rëb lojm xhie guiniabim, dxel rëbim loj Herodes:

—Banee guijc Waj bén ruroobnijs bejn ree, baneen loj tijb pliajt.

<sup>9</sup> Dád gyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuldadaman gudëed reeman ni gunabim. <sup>10</sup> Dxel gunabeeman guitü' reeman guijc Waj lën ladxguuib guin, <sup>11</sup> abi' bidxinnë reeman laan loj tijb pliajt badëed reeman laan lojm, dxel bayümin loj xniaam.

<sup>12</sup> Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

*Ruyaan Jesús gaay mil bejn*

(Mr. 6:30-44; Lc. 9:10-17; Jn.6 :1-14)

<sup>13</sup> Chi gogbee Jesús zian, guyuman loj tijb barcw zëman niz lod achutczi zojb din su laazaman. Chi gogbee ree bejn, dxel brii ladx reeman zë guia'zi reeman lod guidxinman. <sup>14</sup> Chi barii Jesús loj barcw guin baguiaaman bën guixiuj ree riga' yagaj, bayaman laa reeman abi' bayünman bënragxuu zinë reeman. <sup>15</sup> Chi ma gudxe, gubig ree xbejnman lojman rëb reeman:

—Ma gudxe yan, abi' achut bejn zojb niz guie. Gùjdx loj ree bën guin ma gojl yaguaiaj reeman, din che reeman guiedx lod sii ni gaw reeman.

<sup>16</sup> Per badxi' Jesús an rëbaman:

—Ad rüjnt naguiejn yaguaiaj reeman, lëjt gol badëë ni gaw reeman.

<sup>17</sup> Badxi' reeman laan rëb reeman:

—Per gaayzi guiadxtil naca'n con zatio'p bëjl.

<sup>18</sup> Dxel rëb Jesús loj reeman:

—Gol tanë reen guie.

<sup>19</sup> Dxel gunabeeman gurej gra ree bën guin loj guixya'. Abi' cwa'man guigaay guiadxtil guin con grop bëjl guin. Dxel gules lojman xanyabaa badëëman quixtëë loj Dios, abi' gula'man guiadxtil guin badëëman laan loj ree xbejnman persi gudi's reeman laan loj gra ree bën guin. <sup>20</sup> Gra reeman gudaw xt bigdxinladx reeman, abi' staczi bacha reeman za chiptio'p dxüm ni baya'n. <sup>21</sup> Bën gudaw guin ree naj reeman cost gaay mil xinguaaw garenqui ree bëngunaa con ree xindoo.

*Riza Jesús loj nijs*

(Mr. 6:45-52; Jn.6 :16-21)

<sup>22</sup> Dxel gunabee Jesús xbejnman guyu reeman loj barcw din ned reeman täd gaj reeman stiblad ro' nijs guin, la'tgaj cuzaadiidx nëman benzien guin ree. <sup>23</sup> Chi ma gulox bazaadiidx nëman laa reeman, dxel zë xtijbaman guijc tijb guia' din cwedx guiniabaman Dios. Chi gure guiaal xtijbzaman za' guijc guia' guin. <sup>24</sup> Guiáad barcw guin zijt ma zën loj nijs, dád rliaro' xtüjp nijs guin laan guial rliaj bi niz loj barcw guin. <sup>25</sup> Chi ma cayreguiaal, zibig Jesús loj ree xbejnman rzaman loj nijs guin. <sup>26</sup> Dxel baguiaa ree xbejnman laaman rzaman loj nijs guin, dád bidxeb reeman abi' gurixdiaj reeman rëb reeman:

—¡Tijb anman!

<sup>27</sup> Per guneenë Jesús laa reeman rëbaman:

—¡Gol bagu' luxdoodi! ¡Najn, ad rdxebidi!

<sup>28</sup> Badxi' Bëdan rëbaman:

—Dad, bal lüjn, gunabee gazan loj nijs guin guialan lojl.

<sup>29</sup> Abi' rëb Jesús lojman:

—Guda.

Dxel baguiajt Bëd loj barcw guin, rzaman loj nijs guin zëman loj Jesús. <sup>30</sup> Per chi baguiaaman bidoxhan cabi' dxel bidxebaman, abi' guial guzuloj cazëëbaman xan nijs guin guridxa'man rëbaman:

—jGognë naj, Dad!

<sup>31</sup> Loj hor ziigajc basli yaa Jesús gunaazaman yaa Bëd, rëbaman lojman:

—¿Chexc zeel ad rlliladxza'ctil, chexc zeel yu' nawëëguil?

<sup>32</sup> Abi' chi bayë'p reeman loj barcw guin, laa bacwëëz gajc bi guin. <sup>33</sup> Guiáad ree bën yu' loj barcw guin bazuxib reeman loj Jesús, rëb reeman:

—Diidxliczi lüjn naj xi'n Dios.

*Rayüjn Jesús bënragxuu ree Genesaret*

(Mr. 6:53-56)

<sup>34</sup> Chi gudëd reeman loj nijs guin dxel bidxin reeman xyuj ree bën Genesaret. <sup>35</sup> Abi' ree bën niz ni bayünbee reeman Jesús, abi' guidibczi niz yagaj gutie'ch reeman diidx guial za'man ni. Dxel binë ree bejn bënragxuu ree lojman, <sup>36</sup> guzajc reeman liaadx lojman din tiëbaman gugaal reeman majsi guia'zi xabaman. Abi' gra ree bën bagaal xabaman bayajc.

## 15

*Ni rüjn persi rajc bejn bëndol*

(Mr. 7:1-23)

<sup>1</sup> Bénfarisew ree con ree mextr rajc ley, bën za ree Jerusalén, gubig reeman loj Jesús abi' gunabdiidx reeman lojman, rëb reeman

<sup>2</sup> —¿Chexc zeel ad zinalt ree xbejnl costumbr ni basa'n dux béngulal ree? ¿Chexc zeel ad zinalt reeman costumbr zi'c rayal gunaa reeman chi gad reeman gaw?

<sup>3</sup> Dxel rëb Jesús loj reeman:

—Laadx lëjt, ¿chexc zeel rüjndi xtiidx Dios tiblاد persi zinal xcostumbridi? <sup>4</sup> Din Dios rëb: “Gojp respejt xDadil con xniaaal”, abi’ “Bën rniee diidxguijdx loj xdadaman o xniaaman ya, rayal guiëtaman.” <sup>5</sup> Per lëjt rëb zile' guiëb bejn loj xdadaman o xniaaman: “Ad zile't günan lüj yudar, din gra ni ra'pan naj par Dios.” <sup>6</sup> Rëbidi guial bën guiniee zian, ad zile't güün yudar xdadaman con xniaaman, abi' zian rbëëladxidi xtiidx Dios persi zinal xcostumbridi. <sup>7</sup> jBën rusquiee! jRüjnzidi guial nabandi xnejz! Waliqúi ni gunee Isaías, bën badëë xtiidx Dios loj ree bejn, chi rëbaman:

<sup>8</sup> Bén guie ree rëbzi reeman rniajchi' reeman naj,

per ad rënt reeman naj con guidib luxdoo reeman.

<sup>9</sup> Xlia'czi rnajchi' reeman naj,  
abi' rulüü reeman bejn ree ganaxzi ni rbëëgujic ree  
bénguidxliuj.

<sup>10</sup> Dxel gurejdx Jesús ben zien riga' ree yagaj, abi' rëbaman  
loj reeman:

—Gol bacaagdiajg, gol bignia' tëë ni ganin lojdi. <sup>11</sup> Ad ni  
rawt bejn rüjn laaman béndol, ni ririi ro'man laan rüjn laaman  
béndol.

<sup>12</sup> Dxel gubig ree xbejn Jesús lojman, rëb reeman:

—¿Gogbeel ya bidxe'ch ree bénfarisew chi biguiejn reeman ni  
guneel?

<sup>13</sup> Badxi' Jesús laan rëbaman:

—Gra ni ad zëéd't por da Dadan Dios bén yu' xanyabaa, yu'  
dxej nitan. <sup>14</sup> Zeel gol basa'n reeman din laa reeman naj zi'c  
tijb bénlutia'p rulüü stijb bénlutia'p ban niz cheman. Abi' bal  
tijb bénlutia'p gulüü stijb bénlutia'p guin, zayajb grop reeman  
ro' bala'.

<sup>15</sup> Dxel rëb Bëd loj Jesús:

—¿Basignia' dunujn xhie rën guiëb ni guneel?

<sup>16</sup> Badxi' Jesús an rëbaman:

—¿Wen, ni'qui lëjt ad rignia'tan ya? <sup>17</sup> ¿Id rignia'di ya  
guial gra ni raw bejn rej lënman abi' rariin? <sup>18</sup> Per diidx  
ririi ro' bejn, luxdoozan, abi' laan rüjn laaman béndol.  
<sup>19</sup> Din luxdoo bejn za graløj ree xgabmal, guialrugüjt bejn,  
guial rüjn nidxuudx, guialr zunë lacheel ben ren, guialrban,  
guialrusquiee në guialrniee diidxguijdx loj lasa'. <sup>20</sup> Gra ree ni  
guie naj ni rüjn bejn béndol. Per guial ad zunaat bejn zi'c naj  
costumbr ni rayal güün bejn chi gadaman gaw, ad laatan naj  
ni rüjn laaman béndol.

### *Tijb béngunaa Canaán bililadx Jesús*

*(Mr: 7:24-30)*

<sup>21</sup> Chi baza Jesús yagaj zëman niz Tiro në niz Sidón. <sup>22</sup> Abi'  
yagaj zojb tijb béngunaa za niz Canaán, briiman, rbixdiajman  
rëbaman loj Jesús:

—¡Dad, xdiaa Davi, baya naj! Da xi'ndxa'pan yu' bendxab  
luxdoo, dád rusagziman laam.

<sup>23</sup> Abi' Jesús ad badxi'taman xtiidx béngunaa guin. Dxel  
gubig ree xbejnman lojman, rëb reeman:

—Bidxga' béngunaa guin, din yaguiajman, din rbixdiajman  
nalaman dunuj ree.

<sup>24</sup> Dxel rëb Jesús:

—Dios guxhaal naj din günan yudar ganaxzi ree bén Israel  
zë loj nejz mal.

<sup>25</sup> Per béngunaa guin bigzuxibaman loj Jesús, rëbaman:

—¡Dad, gognë naj!

<sup>26</sup> Badxi' Jesúsán, rëbaman:

—Ad zagdxet naj chiquied bejn guiadxtil loj xi'nman din gudëëdaman laan loj ree bë'cw.

<sup>27</sup> Badxi' béngunaa guinan, rëbaman:

—Waliquil, Dad, per në ree bë'cw ruto'p guiadxtil laay ni ryajb xan xmex bén naj xbë'cw laa reeb.

<sup>28</sup> Dxel rëb Jesús lojman:

—¡Na, waliquil rliadxil con guidib luxdool! Gac zi'c rënl.

Loj hor guin gajc bayajc xi'n bén guin.

*Rayüjn Jesüs zien ree bénragxuu*

<sup>29</sup> Baza Jesús yagaj, bidxinman ro' nijs Galilea, dxel wë'paman guijc tijb guia' abi' gurejman yagaj. <sup>30</sup> Dád zien bejn bido'p lod za'man. Binë reeman bencoj ree, në ree bénlutia'p, në ree bén ad rüjnt xu'c dxiin, con ree bengop në zien ree bénragxuu ren ree, badxig reeman laa reeman loj Jesús, abi' bayünman laa reeman. <sup>31</sup> Dád badxa loj ree bejn chi baguiaa reeman ma rniee ree bengop, ma bayajc xu'c ree bén ad rüjnt dxiin xu'c, guiáad ree bencoj ma rza reeman abi' ree bénlutia'p ruguiaa reeman. Zianz guzuloj cuza't reeman zagdxë xDios ree bén Israel.

*Rayaan Jesús tajp mil bejn*

*(Mr. 8:1-10)*

<sup>32</sup> Abi' gurejdx Jesús bén naj ree xbejnman, rëbaman loj reeman:

—Rayan bén guin ree, din ma gojc choon dxëj za' reeman con naj, abi' achet ni gaw reeman. Ad rëntan yagu'nejzan laa reeman sin guialraw ad nial yadaj reeman niz lunejz.

<sup>33</sup> Dxel rëb ree xbejnman lojman:

—Per ¿ban guin yuca'n ni gaw ree benzien guin, zi'c naj guie lod achutczi bejn zojb?

<sup>34</sup> Gunabdiidx Jesús loj reeman, rëbaman:

—¿Bël guiadxtil ca'dí?

Badxi' reeman laan rëb reeman:

—Gajdx guiadxtil con zatio'p choon bëjl.

<sup>35</sup> Dxel gunabee Jesús gurej gra ree bén guin luyuj. <sup>36</sup> Abi' cwa'man guigajdx ree guiadxtil guin con ree bëjl guin, badëëman quixtëë loj Dios. Dxel gula'man laa reen, badëëman laa reen loj ree xbejnman persi gudi's reeman laa reen loj gra ree bén guin. <sup>37</sup> Gra reeman gudaw xt bigdxinladx reeman. Abi' staczi bacha reeman gajdx dxüm ni baya'n. <sup>38</sup> Bén gudaw ree naj reeman tajp mil xinguaaw, garenqui ree béngunaa con ree xindoo. <sup>39</sup> Dxel bazaadiidxné Jesús laa reeman, abi' guyuman loj barcw ziaman niz Magadán.

## 16

### *Rniab reeman güün Jesús tijb milagr*

(Mr: 8:11-13; Lc. 12:54-56)

<sup>1</sup> Bénfarisew ree con ree bénsaducew bidxin reeman lod za' Jesús, abi' par güün reeman laaman prueb gunab reeman loj-man din güünman tijb milagr din guiguien guial Dios guxhaal laaman. <sup>2</sup> Per badxi' Jesús laan rëbaman:

—Wadxe ree chi ruguiaadi naxnia xanyabaa, rëbidi: “Za-gdxe gac guixie din naxnia xanyabaa.” <sup>3</sup> Guiáad rsil chi naxnia xanyabaa yu' tée zaj, rëbidi: “Ad laat gac yandxej.” ¡Bén rusquiee!, bal ragbeedi xhie rën guiëb sen yu' xanyabaa, ¿chexc ad rignia'tidi xhie rën guiëb gra ni cuguiaadi yan? <sup>4</sup> Bén mal, ad rliladxtidi abi' rniabidi günan tijb milagr, per achet gugiaaadi, tijbzi zi'c guzac Jonás.

Dxel basa'n Jesús laa reeman, ziataman.

### *Xlevadur ree bénfarisew*

(Mr: 8:14-21)

<sup>5</sup> Dxel gudëdnë ree xbejnman stiblad ro' nijs guin, per bayanladx ree xbejnman ninë reeman guiadxtil. <sup>6</sup> Abi' rëb Jesús loj reeman:

—Gol gojp cudad con xlevadur ree bénfarisew në ree bénsaducew.

<sup>7</sup> Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

<sup>8</sup> Gogbee Jesús ni canee reeman abi' rëbaman loj reeman:

—¿Chexc zeel rëbidi guial ad ca'tidi guiadxtil? Ta'nnijt rliladxidi naj. <sup>9</sup> ¿Staczi ad rignia'tidi ya? ¿Nid rusaaladxidi ya chi gudi'san gaay guiadxtil loj gaay mil bejn, abi' zabël dxüm ni baya'n bato'pidi? <sup>10</sup> ¿Nid zaladx téeedi ya chi gudi'san gajdx guiadxtil loj tajp mil bejn, abi' zabël dxüman bato'pidi?

<sup>11</sup> ¿Chexc zeel ad rignia'tidi guial ad guiadxtiltan cuzatan lojdi, chi rnin lojdi gapidi cudad con xlevadur ree bénfarisew në ree bénsadusew?

<sup>12</sup> Dxel bignia' ree xbejnman guial ad xlevadurt guiadxtilan cuza'taman loj reeman, rëbaman zian din gap reeman cudad con ni rulüü ree bénfarisew në ree bénsaducew.

### *Rëb Bëd guial Jesús naj Cristo*

(Mr: 8:27-30; Lc. 9:18-21)

<sup>13</sup> Chi bidxin Jesús niz Cesarea de Filipino, gunabdiidxaman loj ree xbejnman, rëbaman:

—¿Chu rëb ree bejn, naj Bén guxhaal Dios?

<sup>14</sup> Badxi' reeman laan, rëb reeman:

—Yu' reeman rëb guial Wajn, bén baroobnijs bejn ree. Yu'za reeman rëb guial Eliásan, bén badëë xtiidx Dios loj ree bejn, yu' tée reeman rëb guial Jeremíasan, bén badëëd xtiidx

Dios loj ree bejn o stijb ben ren ya, b n bad ed xtiidx Dios loj ree bejn.

15 Dxel r baman loj reeman:

—Laadx l jt,  xhie nadi, chu naj?

16 Badxi' Sim n B dan, r baman:

—L jn naj Cristo. L jn naj Xi'n Dios naban.

17 Dxel r b Jes s lojman:

—Xiquilbaal, Sim n, xi'n Jon s, din ad b nguidxliujt guna lojl ni guinieel, da Dadan b n yu' xanyabaa laaman naj b n guna lojl. 18 Abi' naj rni lojl, B d, (r n gui ban “guiaj”) l j naj zi'c tijb guiaj ni gacn  lidxan, din por l j grii ree b n gac da bejnan abi' ni'qui guialg jt ad zunijtt laa reeman. 19 Naj gune l j guialrniabee ni za xanyabaa, abi' gra ni ti bil gac loj guidxliuj guie ma naj gacan xanyabaa, gui ad ni ad zati jbtill gac loj guidxliuj guie ad najt gacan xanyabaa.

20 Dxel gunabee Jes s loj gra ree xbejnman guial achu loj gui b reeman guial laaman naj Cristo.

### *Rugojn Jes s gui taman*

(Mr. 8:31-9:1; Lc. 9:22-27)

21 Diisd naxel guzuloj Jes s bagojn ree xbejnman guial naj cheman Jerusal n, abi' ree guxtis Israel con ree bixhioz rniabee ree bixhioz n  ree mextr rajc ley, laa reeman naj b n gusagzi laaman, gug jt reeman laaman, per ni yayon dxej yabanman. 22 Dxel gul eacan B d laaman, r baman lojman:

—jDios ad zab eladxt l j, Dad! jLaaman ad zati jbt saquil zian!

23 Per badxi' loj Jes s, r baman:

—jBasa'n naj, xindxab!, ad r jn naw eguil lon. Din ad por Diost z ed ree xgab ni r jnl, xixgab b nguidxliujn r jnl.

24 Dxel r b Jes s loj ree xbejnman:

—Bal yu' b n r n gac da bejnan ad zajct g unman zi'c naj xixgabaman, siibnejzaman guialzi ni t dzaman abi' guidnalaman naj. 25 Din b n mazri r n xguialnaban ni rajpaman loj guidxliuj guie zaxin dxej gunijtaman laan. Per b n gui t por naj, zajpaman guialnaban tiblayaa con Dios. 26 Xhieczy gan gap bejn gra ni yu' loj guidxliuj, abi' nitaman loj Dios. Din ad zile't sii bejn xguialnabanman xanyabaa. 27 Abi' B n guxhaal Dios, gui'taman con xguialrniabee xDadaman Dios n  ree xianjl Dios din gud eman ni rayal tijbgaj bejn, bal gonin been bejn. 28 Diidxliczi rnin lojdi guial yu' ree b n riga' guie ad z jtt reeman chi gad reeman guguaa B n guxhaal Dios, gui'taman con xguialrniabeeman din nabeeman.

## 17

*Bidxaa Jesús loj choon ree xbejnman**(Mr. 9:2-13; Lc. 9:28-36)*

<sup>1</sup> Chi gudëd xho'p dxej, binë Jesús Bëd, në Jacob con Waj bijch Jacob, binëman laa reeman guijc tijb guia' ya. <sup>2</sup> Ni bidxaa Jesús niz loj reeman. Dád balaa bacha' lojman zi'c rulaa gubijdx bacha', guiáad xabaman bayajcan naquich, balaa tëën bacha' zi'c guij. <sup>3</sup> Abi' loj hor guin baguiaa reeman Moisejs con Elías cayünë reeman Jesús diidx. <sup>4</sup> Dxel rëb Bëd loj Jesús:

—Dad, įzagdxe naj nadxu' ree guie! Bal rënł, gūnan choon ranch, tijban par lūj, tijban par Moisejs, stijban par Elías.

<sup>5</sup> La'tgaj canee Bëd zian, biguiajt tijb zaj xt guijc reeman ridiinan bacha', loj zaj guin brii cha' bejn rëbaman:

—Bén guie naj da Xi'nān, bēn rēn da'tān, bēn rabaanē' tëën, gol bacaagdiajg xtiidxaman.

<sup>6</sup> Chi biguiejn ree xbejn Jesús diidx guin ree, bazuxib reeman basajb loj reeman xt luyuj, dád bidxeb reeman. <sup>7</sup> Dxel gubig Jesús lod za' reeman, baqui'mān laa reeman, rëbaman:

—Gol guzuli, ad ridxebidi.

<sup>8</sup> Abi' chi gules loj reeman achutri baguiaa reeman, tijbzi Jesús za' yagaj.

<sup>9</sup> La'tgaj cayguiajt reeman ruguia' guin, rëb Jesús loj reeman:

—Achuczi loj guiëbidi ni baguiaadi, xt chi yaban Bén guxhaal Dios.

<sup>10</sup> Dxel gunabdiidx ree xbejnman lojman, rëb reeman:

—¿Chexquiza zeel rëb ree mextr rajc ley guial yaloj Elías gui't?

<sup>11</sup> Badxi' Jesúsān, rëbaman:

—Walican guial yaloj Elías gui't, laaman guzuxnejz gra.

<sup>12</sup> Per naj rni lëjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bén guxhaal Dios.

<sup>13</sup> Dxel gogbee ree xbejnman guial Wajn bēn baroobnijs bejn ree cuza'taman.

*Rayūjn Jesús tijb xin rëjtya'**(Mr. 9:14-29; Lc. 9:37-43)*

<sup>14</sup> Chi badxin Jesús con guiyon ree xbejnman, lod cabëz ree ben zien laaman bibig tijb xinguaaaw lojman, bazuxibix lojman rëbix:

<sup>15</sup> —Dad, baya da xi'nān, din dād rzagdiajx rëjtya'x. Bëlczi volt riyajbix lojguij o lojnijs ya. <sup>16</sup> Bidnë'n laax loj ree xbejnł, per ad rajct rayūjn reeman laax.

<sup>17</sup> Badxi' Jesúsān, rëbaman:



—¿Benguijdx, bèn ad rliladxt! ¿Xt goc gazunë'n lëjt? ¿Xt goc gadaanan lëjt? Gol tanë xinzii guie.

<sup>18</sup> Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

<sup>19</sup> Abi' gunabdiidx ree xbejn Jesús lojman lood ren, rëb reeman:

—¿Chexc zeel ad gojct nalëen xindxab guin luxdoo xin guin?

<sup>20</sup> Dxel rëb Jesús loj reeman:

—Guial ta'nzi rliladxidi. Naj rni lojdi bal naj xguialrliladxiidi majsi zi'ctzi naj xhaj moxhtajs, zile' guiëbidi loj guia' guin: “Bisüd guie, bisob lood ren”, zucaagdiajgan xtiidxidi. Achetczi gac nawëëg par lëjt. <sup>21</sup> Per par yarii lasa' ree xindxab guie ryaadx chu cwedx guiniab Dios guiba'n tëë.

*Rugojn Jesús zatijb guial guiëtaman*

(Mr. 9:30-32; Lc. 9:43-45)

<sup>22</sup> La'tgaj za' Jesús niz Galilea con ree xbejnman, rëbaman loj reeman guial yayü reeman Bën guxhaal Dios loj ree bejn,

<sup>23</sup> abi' gugüjt reeman laaman, per ni yayon dxej yabanman. Chi biguiejn ree xbejnman zian, dád guyu naya reeman.

*Ni rajx par yadoo*

<sup>24</sup> Chi badxin Jesús con ree xbejnman guiedx Capernaum, bèn ruquijx ree impuest par yadoo wej reeman loj Bëd bignabdiidx reeman, rëb reeman:

—¿Rguijx xmextril impuest par yadoo ya?

<sup>25</sup> Badxi' Bëdan, rëbaman:

—Rguijxcaman laan.

Dxel chi bayu Bëd lënü lod za' Jesús, yalojli Jesús gunabdiidx lojman, rëbaman:

—¿Xhie naladxil, Simón? ¿Chu rguijx impuest loj ree rey yu' loj guidxliuj guie? ¿Xi'n reeman ya o benzit ree?

<sup>26</sup> Badxi' Bëd laan rëbaman:

—Benzit ree.

Dxel rëb Jesús:

—Abi' ree bën ladx reeman ad rguijxt reeman laan. <sup>27</sup> Per chitëë guidxe'ch reeman, wej ro' nijs, bazaal xiansuelil, dxel bëjl yaloj ni guiniaazil babëëb. Ro' bëjl guin guidxelil tijb cintabl, con laan bitijx dux impuest.

## 18

*¿Chu mazri zojbloj?*

(Mr. 9:33-37; Lc. 9:46-48)

<sup>1</sup> Lën ree dxejzii bidxin ree xbejn Jesús lod za'man, abi' gunabdiidx reeman lojman, rëb reeman:

—¿Chu mazri zojbloj lod rniabee Dios?

<sup>2</sup> Dxel gurejdx Jesús tijb xindoo, bazujman laax galay reeman, <sup>3</sup> abi' rëbaman:

—Diidxliczi rnin lojdi bal id zayüjndi xgab por xtolidi, bal id zajc tëedi zi'c tijb xindoo, ad zutidi lod rniabee Dios. <sup>4</sup> Bén güün naya loj Dios, gac tëeman zi'c xindo guie, laaman gac bén mazri zojbloj lod rniabee Dios. <sup>5</sup> Abi' bén yaca' tijb xindoo, por naj, najn raca'man.

*Bén rüjn persi ryajb ree bejn loj dol*

*(Mr: 9:42-48; Lc. 17:1-2)*

<sup>6</sup> 'Bal chu gusajb tijb bén qui rliladxri naj loj dol, zagdxeli guixhii reeman tijb guiajro' yëjnman guzaal reeman laaman xt xan nijs. <sup>7</sup> ¡Probza bénguidxliuj guial yu' da't ni rusajb laaman loj dol! Zianczi yu' ni mal guin loj guidxliuj, per ¡probza bén gusajb bejn ree loj dol!

<sup>8</sup> 'Zeel, bal laagajc yaal o guia'l rusajb lüj loj dol, zagdxeli gutü'n bazaalan zijt, din zagdxeli chu'l xanyabaa con tiblodzi yaal o con tiblodzi guia'l, luar chu'l con groplad yaal o groplad guia'l loj bajl ni ad yu't dxej yayü'. <sup>9</sup> Abi' bal laagajc guiaaløj rusajb lüj loj dol, gulëen bazaalan zijt, zagdxeli chu'l con tiblodzi guiaaløj xanyabaa, luar chu'l con gropladan loj bajl yu' gabijl.

*Xcwent xiil gunit*

*(Lc. 15:3-7)*

<sup>10</sup> 'Ad guiniajgaadi loj ree bén qui rliladxri naj. Din diidxliczi rnin lëjt guial xanyabaa yu' ree anjl rniaj laa reeman zianczi za' reeman loj da Dadan Dios bén yu' xanyabaa. <sup>11</sup> Guiáad Bén guxhaal Dios zëedaman par ree bén ad zinalt xnejz Dios din laa reeman loj dol.

<sup>12</sup> '¿Xhie naladxidi? Bal tijb bejn rajp tibgayuu xiil, abi' rizëeb tijbib, ¿nid zusa'nman zatajpgajlchiinbitapib dajn ya din chigdiilaman be bizëeb guin? <sup>13</sup> Abi' bal yadxejlaman laab, diidxliczi rnin mazri yabaanëman laab guial loj tajpgajlchiinbitap be ad bizëeb guint. <sup>14</sup> Ziangajc dux Dad ree Dios bén yu' xanyabaa ad rëntaman nit ni'czi tijb ree bén qui rliladxri laaman.

*Xhienaag yaguieen perdon du lasa' ree*

*(Lc. 17:3)*

<sup>15</sup> 'Bal xhie tijb ni mal güün lasa'l lüj, guneenëman lüjzi din gagbeeman xhie falt badxe'man. Bal guidxga'man xtiidxil, ma beenl gan yaneenël laaman zagdxë. <sup>16</sup> Bal id ridxga'man lüj, binë zatijb o zatio'p bejn, din chigneenëdi laaman din con xtiidx tio'p o choon bejn guiguien guial ma bigneenël laaman. <sup>17</sup> Dxel bal ni'qui xtiidx reeman ad ridxga'taman, bagojn ree bén zinal xnejz Dios, abi' bal ni'qui xtiidx reeman

ad ridxga'taman, dxel ma guguaadi laaman zi'c tijb Bén ad riladxt Dios o zi'c tijb Bén ruquijx impuest par Rom.

<sup>18</sup> Diidxliczi rnin, gra ni ad zatiëjbtidi gac loj guidxliuj guie ad rajctan xanyabaa, guiáad ni tiëbidi gac loj guidxliuj guie mal rajcan xanyabaa.

<sup>19</sup> Rni tëen lëjt: Bal yaya'n tio'pidi diidx loj guidxliuj guie, par guiniabidi xhienin loj da Dadan Bén yu' xanyabaa, laaman gunee laan. <sup>20</sup> Din lod rado'p tio'p o choon bejn por naj, laa naj za' galay reeman.

<sup>21</sup> Dxel gubig Béd gunabdiidxaman loj Jesús, rëbaman:

—Dad, ¿bël volt rayal günan perdon lasa'n, bal güünman naj xhienin? ¿Xt gajdx volt ya?

<sup>22</sup> Badxi' Jesúsán rëbaman:

—Ad gajdx voltizi rayal güün lasa'l perdon, rayal güünl perdon gajdx volt gayojnchii.

*Xcwent Bén ad rüjnt perdon lasa'*

<sup>23</sup> Xgualrniabee Dios naj zi'c tijb rey ni been xgab guial ma gojl yaguijx ree xmojsaman lojman. <sup>24</sup> Chi guzulojman caybëëman cwent guin, bidxin tijb xmojsaman lojman Bén ral zro' da't. <sup>25</sup> Abi' guial achet rajp Bén guin din yaguijxaman ni ralaman, gunabee rey guin to'man loj ree bejn në lacheelaman con ree xi'nman nëtëë gra ni rajpaman din chile' yaguijxaman di'n guin. <sup>26</sup> Dxel bazuxibaman loj rey guin, beenman naya rëbaman: “Dad, gojp naj pacens zaguixcan graczi ni ralan lojl.” <sup>27</sup> Zianz baya rey guin laaman, beenman laaman perdon gra ni ralaman, abi' baslaaman laaman ziaman. <sup>28</sup> Per chi barii mojs guin yagaj, badxajgaman tijb Bén rüjnnëman dxiin, ralaman ta'nzi milia lojman. Dxel gunaazaman laaman guzuloj caguiajman yëjnman, rëbaman: “¡Baguijx ni ralil lon!” <sup>29</sup> Dxel bazuxib Bén guin lojman beenman naya rëbaman: “Gojp naj pacens zaguixcan graczi ni ralan lojl.” <sup>30</sup> Per ad guyënt Bén guin, badxe'man laaman ladxguiib xt lodzi yaguijxaman di'n guin. <sup>31</sup> Chi baguiaa ree los demazri ree xmojs rey guin, dád gognaa luxdoo reeman, abi' wej reeman biguiedx reeman lojman gra ni goc. <sup>32</sup> Dxel gurejdx rey guin mojs guin, zianz rëbaman lojman: “¡Mojs guiidx! Benan perdon gra ni ralil lon guial beenl naya. <sup>33</sup> ¿Nid nëgajc lüj rayal naya xcompniaril ya, zi'cgajc bayan lüj?” <sup>34</sup> Abi' guial tant balen rey guin, gunabee-man badxe' reeman laaman ladxguiib xt lodzi baguijx gra ni ralaman.

<sup>35</sup> Basnuu Jesús rëbaman:

—Ziangajc güünnë da Dadan lëjt, Bén yu' xanyabaa, bal id züjn perdon lasa'di con guidib luxdoodi ni rüjnnë reeman lëjt.

## 19

*Ruliü Jesús xcwent guial rala' lasa'*  
(Mr. 10:1-12; Lc. 16:18)

<sup>1</sup> Chi gulox gunee Jesús zian, bazaman niz Galilea, zëman niz Judea, niz stiblad ro' guiiw Jordán. <sup>2</sup> Zien ree bejn binal laaman, yagaj bayüjnman bënragxuu ree.

<sup>3</sup> Abi' tio'p choon ree bënfarisew bibig loj Jesús, dxel par güün reeman laaman prueb, gunabdiidx reeman lojman rëb reeman:

—¿Zile' yala' bejn lacheelaman por xhiedxitzinin ya?

<sup>4</sup> Badxi' Jesúsán rëbaman:

—¿Nid wayoolidi loj xtiidx Dios ya, guial diizd guia'xchej Dios “been xinguaaw në béngunaa”? <sup>5</sup> Rëb tēëman: “Zeel xinguaaw gusa'n xdad xniaax din guibannë lacheelix, dxel grop reex ma gac zi'c tijbzi bejn.” <sup>6</sup> Zianan zeel ad najtri reex tio'p, ma naj reex tijbzi. Zeel bénguidxliuj ad rayalt yala'man lasa' ni ma bachajg Dios.

<sup>7</sup> Dxel rëb ree bënfarisew guin loj Jesús:

—¿Chexquiza zeel rëb Moisejs guial zile' yala' lacheel bejn, con gudëëdaman gui'ch guial ma bala' lasa' reeman?

<sup>8</sup> Badxi' Jesúsán, rëbaman:

—Cwëjb Moisejs gojc zian guial ad rëntidi guzoobidi diidx, per ad ziant gojc diizd guia'xchej. <sup>9</sup> Naj rni lojdi. Xin yala' lacheel, bal id za'në lacheelix xin ren, abi' tia'x ben ren dolan cayüjnx. Ziangajc xin tia' bën qui bala'ri lasa' guin dolan cayüjnx.

<sup>10</sup> Dxel rëb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

<sup>11</sup> Badxi' Jesúsán rëbaman:

—Ad grat bejn zile' chignia' ni canin, bën ca'zi ree quiar-guiejn par chignia' reeman laan. <sup>12</sup> Yu' bejn diizd rajlaman ad zëëdtaman loj guidxliuj par guxhliaaman, yu'za reeman, bejn rüjn laa reeman zian. Abi' yu' reeman rüjn xgab guial zagdxeli guitie'ch reeman xtiidx Dios luar guxhliaa reeman. Bën rën chignia', gol bignia'.

*Rüjnle' Jesús xindoo ree*  
(Mr. 10:13-16; Lc. 18:15-17)

<sup>13</sup> Binë ree bejn xindoo ree lod za' Jesús, din guixhioob yaaman guijc reex cwedx guiniab tēëman Dios por laa reex, per ree xbejnman guzuloj cadilë reeman bën zinë ree laa reex. <sup>14</sup> Dxel rëb Jesús loj reeman:

—Gol baslaa gui't reex lon, ad bal rudxoondi, din lod rni-abee Dios naj par ree bën naj zi'c laa reex.

<sup>15</sup> Abi' guxhoob yaa Jesús guijc ree xindo guin, dxel ziaman.

*Tijb xinrijcw**(Mr. 10:17-31; Lc. 18:18-30)*

<sup>16</sup> Bidxin tijb xin guin loj Jesús, abi' gunabdiidxix lojman, rëbix:

—Mextr, ¿xhie ni zagdxe günan din ga'pan guialnaban tiblyaa con Dios?

<sup>17</sup> Dxel rëb Jesús lojx:

—¿Chexc zeel rniabdiidxil lon conin naj ni zagdxe? Achut naj benza'c, tijbzi Dios. Per bal rënl gapil guialnaban tiblyaa con Dios, been zi'c rëb ree mandamient.

<sup>18</sup> Dxel gunabdiidxix loj Jesús rëbix:

—¿Con ree mandamientan?

Badxi' Jesúsán, rëbaman:

—Ad gugüjtil bejn, ad sunël lacheel ben ren, ad cwanl, ad cwëel xtiidx bejn, <sup>19</sup> gojp respejt xdad xniaal, guyën tée ree lasa'l zi'c rën lüj gajc.

<sup>20</sup> Dxel rëbix:

—Gra ree ni guin cayünan diizd najn xindoo, ¿xhieri ryaadx günan yan?

<sup>21</sup> Badxi' Jesúsán, rëbaman:

—Bal rënl gaquil benza'c loj Dios, bigto' gra ni rajpil dxel gudëel milia guin loj ree bënprob. Zian gapil guialnaza'c xanyabaa. Zianz guidnalil naj.

<sup>22</sup> Chi biguiejn xin guin zian, dád guyu nayax ziax, guial dád xinrijcwan.

<sup>23</sup> Dxel rëb Jesús loj ree xbejnman:

—Diidxliczi rnin lojdi: Dád nawëëg chu' benrijcw lod rniabee Dios. <sup>24</sup> Naj rni lëjt. Adli nawëëgt téd tijb camell xan gagux, guial chu' tijb benrijcw lod rniabee Dios.

<sup>25</sup> Chi biguiejn ree xbejn Jesús zian, dád badxaloj reeman, abi' rëb reeman:

—¿Chuza zajc gac perdon loj Dios?

<sup>26</sup> Dxel baguiaa Jesús loj reeman, rëbaman:

—Nawëëg gac zian par bénguidxliuj, per par Dios achet ni nawëëg yu'.

<sup>27</sup> Abi' rëb Bëd lojman:

—Ma basa'nan graczi ni raya'pan, persi zudnaalan lüj. Abi' ¿xhieza yayalan?

<sup>28</sup> Badxi' Jesúsán, rëbaman:

—Diidxliczi rnin lojdi chi guidxin dxej yacüb gra, guidxin tée dxej cwe Bén guxhaal Dios luar lod nabeeman, në lëjt, guial zidnalidi naj, cwedi loj chiptio'p ree luar lod nabeedi, din güün xguialguxtisidi loj guidxiptio'p ree xdiaa Israel.

<sup>29</sup> Abi' gra ree bën basa'n lidx, bijch, bizan, xdad, xniaa, xi'n, o guidxliuj ree por naj, zaca' reeman tibgayuu volt mazri guial loj ni basa'n reeman, zajp tée reeman guialnaban tiblyaa

con Dios. <sup>30</sup> Per zien ree bén naj bén yaloj, gac reeman bén bigra, abi' zienza ree bén naj bén bigra, gac reeman bén yaloj.

## 20

### *Xcwent ree bén rüjn dxiin*

<sup>1</sup> Rëb tëë Jesús:

—Xgualrniabee Dios naj zi'c tijb bén rajp tijb guiniaaro', rsildoo briiman zitiilaman mojs güün dxiin loj xguiniaaman. <sup>2</sup> Baya'nnëman laa reeman diidx plac quixaman tijb gaj reeman tibdxej, dxel guxhaalaman laa reeman loj xguiniaaman. <sup>3</sup> Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman. <sup>4</sup> Zianz rëbaman loj reeman: “Gol biguieen dxiin loj da guiniaan, naj gaguix lëjt zi'c rayal.” Dxel zë reeman. <sup>5</sup> Cost garol dxej briiman stijb, abi' briei gajman cost raca choon wadxe ziangajc rëbaman loj ree bén riga' yagaj, bén achet xchiin. <sup>6</sup> Cost raca gaay wadxe wejman galay luguiedx guin stijb, abi' bidxaaglojman ben ren ree, bén achet ree xchiin, gunabdiidxaman loj reeman, rëbaman: “¿Chexc zeel za'di guin gudëdchej ad cayüjntidi dxiin?” <sup>7</sup> Badxi' reeman laan rëb reeman: “Achut wanee dxiin yaguieenan.” Dxel rëbaman loj reeman: “Në lëjt gol biguieen dxiin loj da guiniaan naj gaguix lëjt zi'c rayal.” <sup>8</sup> Chi ma gurej guiaal, rëb bén naj xguiniaan loj bén naaz dxiin guin: “Gurejdx ree mojs guin din quixil laa reeman, per yalojxgaj gudijx ree bén bigra guyu, zianz quixil bén guyu ree yaloj.” <sup>9</sup> Chi bidxin ree bén guyu loj dxiin guin raca gaay wadxe, gojx tijbgaj reeman xieen tibdxej. <sup>10</sup> Dxel chi bidxin ree bén guyu loj dxiin diizd rsil, gunaladx reeman niajx reeman mazri, per nëgajc reeman gojx xieen tibdxej. <sup>11</sup> Abi' chi cayajx reeman, guzuloj cadxe'ch reeman bén naj xguiniaa laan, <sup>12</sup> rëb reeman lojman: “Bén bigra guyu ree, been reeman dxiin tib horzi abi' zi'cgajc caguixil dunujn gudijxil laa reeman, abi' dunujn badaanan baguieenan dxiin dëchej loj guialnalaa.” <sup>13</sup> Per rëb bén guin loj tijb reeman: “Achet ni mal cayünan lüj. ¿Nid baya'n diidx ya plac gunen tia'l tibdxej? <sup>14</sup> Cwa' ni bayalil baguiaj. Din naj rënan gaguixan bén bigratë guyu zi'c gudixan lüj, <sup>15</sup> zajc günnë' da milian ni rëntzan. ¿O nadëdloj ya guial najn benza'c?” <sup>16</sup> Zianan zeel bén naj ree bén bigra gac reeman bén yaloj, guiáad ree bén yaloj gac reeman bén bigra.

### *Bayon volt bagojn Jesús guial guiëtaman*

(Mr. 10:32-34; Lc. 18:31-34)

<sup>17</sup> Chi zë Jesús Jerusalén, gurejdx guidxiptio'p ree xbejnman tiblax, rëbaman loj reeman:

18 —Ganin lëjt, ziyo' ree Jerusalén, lod yayü reeman Bén guxhaal Dios, loj ree bixhioz rniabee ree bixhioz në loj ree mextr rajc ley, abi' laa reeman nabee guiëtamán, <sup>19</sup> yayü reeman laaman loj ree benzit, din guze' reeman laaman quin tää reeman laaman, abi' gucaa reeman laaman loj crüz, per yayon dxej yabanman.

*Ni gunab xniaa Jacob con Waj*

*(Mr. 10:35-45)*

<sup>20</sup> Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rënman.

<sup>21</sup> Gunabdiidx Jesús lojman, rëbaman:

—¿Xhie rën!

Badxi' bën guinan, rëbaman:

—Rënan nabeel cwe tijb da xi'nan xladbeel, stijbim xladruvejsil, chi ma canabeel.

<sup>22</sup> Dxel rëb Jesús:

—Ad ragbeetidi ni rniabidi. ¿Wen zajc tädidi gualzi zi'c naj ni gadëëdan ya?

Badxi' reeman laan, rëb reeman:

—Zayajcan.

<sup>23</sup> Abi' rëbaman:

—Diidxliczi rnin zajc tädidi gualzi zi'c naj ni gadëëdan, per gual cwedi da ladbeen o da ladruvejsan ya ad najt rayal ganabee, din ma najn par ree bën bacaabee da Dadan.

<sup>24</sup> Chi biguiejn zachii ree xbejn Jesús zian dád balen reeman grop bijch reeman. <sup>25</sup> Per gurejdx Jesús laa reeman, rëbaman:

—Lëjt ragbee, bën rniabee ree loj guidxliuj, rniabee reeman bejn ree zi'ctzi rën reeman, guiáad ree bën zojbloy rüjnnë reeman bejn ree zi'ctzi rën reeman por gualrniabee ni rajp reeman. <sup>26</sup> Per con lëjt ad rayalt gac zian. Bal chu rën gac bën rniabee lojdi, rayal güünman sirv lojdi. <sup>27</sup> Ziangajc bën rën gac bën zojbloy lojdi, rayal güünman sirv lojdi zi'c bën nado!. <sup>28</sup> Zi'c Bén guxhaal Dios ad bi'ttaman par güün reeman sirv lojman, bi'ttaman par güünman sirv gudëë tää xgualnabanman din laa zien bejn loj dol.

*Rayüjn Jesús tio'p ree bënlutia'p*

*(Mr. 10:46-52; Lc. 18:35-43)*

<sup>29</sup> Chi bazaman luguiedx Jericó con ree xbejnman, dád zien ree bejn binal laaman. <sup>30</sup> Dxel tio'p ree bënlutia'p zojb cwë' nejz chi biguiejn reeman cadëd Jesús niz yagaj, gurixdiaj reeman rëb reeman:

—¡Dad, xdiaa Davi, baya dunujn!

<sup>31</sup> Abi' rdilë ree ben guin laa reeman din yacwëëz ro' reeman, per mazri ribixdiaj reeman rëb reeman:

—¡Dad, xdiaa Davi, baya dunujn!

<sup>32</sup> Dxel guzudxe Jesús, gurejdxaman laa reeman, gunabdi-  
idxaman loj reeman, rëbaman:

—¿Xhie rëndi günan por lëjt?

<sup>33</sup> Badxi' reeman laan, rëb reeman:

—Dad, rayënan yaxal du lojn.

<sup>34</sup> Dxel baya Jesús laa reeman, abi' baqui'man loj reeman.  
Loj hor zii baxal loj reeman, dxel binal reeman Jesús.

## 21

### *Ru Jesús Jerusalén*

(Mr 11:1-11; Lc. 19:28-40; Jn.12 :12-19)

<sup>1</sup> Chi ma cadxin Jesús con ree xbejnman Jerusalén, niz  
guiedx la Betfagé, gajxh ruguia' Olivos, guxhaal Jesús tio'p ree  
xbejnman, <sup>2</sup> rëbaman loj reeman:

—Golchej guiedx riga' lad ni, ni guidxaaglojdi tijb bur,  
caduunë xi'nb. Gol guxhiec reeb gol tanë reeb guie. <sup>3</sup> Abi' bal  
chu xhie na lojdi, gol güjdx guial Dad Jesús cayaadx laa reeb,  
gandoo yaxhaalaman laa reeb.

<sup>4</sup> Zian gojc persi gojc cumplid ni gunee bén badëë xtiidx  
Dios loj ree bejn, chi rëbaman:

<sup>5</sup> Gol güjdx loj ree bén Sión:

“Gol baguiaa laa xreydi zëed lojdi,  
ad zëedtaman nabë, dxiibaman tijb bur,  
tijb burdoo xi'n tijb be rüü.”

<sup>6</sup> Dxel wej ree xbejn Jesús abi' been reeman zi'c rëbaman  
loj reeman, <sup>7</sup> binë reeman bur guin con xi'nb, abi' badxiib  
xab reeman xijch reeb zianz gudxib Jesús burdo guin. <sup>8</sup> Abi'  
guial zien ree bejn, yu' reeman rguijxh xab lunejz, zien tëë  
reeman ritü' xidx ree yag persi rguijxh reeman laa reen lod  
cadëdaman. <sup>9</sup> Abi' zi'c ree bén ned zi'c ree bén zidnal laaman,  
rbixdiaj reeman, rëb reeman:

—¡Benza'c bendxoon naj xdiaa rey Davi! ¡Nüjnle' Dios bén  
guxhaalaman! ¡Benza'c bendxoon naj Dios bén yu' xanyabaa!

<sup>10</sup> Chi guyu Jesús luguiedx Jerusalén, gra ree bén luguiedx  
guin badxaloj, abi' riniabdiidx loj lasa' reeman, rëb reeman:

—¿Chu bén guin?

<sup>11</sup> Dxel rëb ree benzien guin:

—Laaman naj Jesús, bén rudëë xtiidx Dios loj ree bejn, bén  
Nazaret guiedx riga' niz Galilea.

### *Rabëë Jesús bén ruto' ree lën yadoo Jerusalén*

(Mr 11:15-19; Lc. 19:45-48; Jn.2 :13-22)

<sup>12</sup> Chi bidxin Jesús ro' yadooro' Jerusalén, guzuloj cay-  
bëëman bén cuto' ree në ree bén cazii. Barexguiataman xmex  
ree bén cuchaa milia në xmex ree bén cuto' palom. <sup>13</sup> Dxel rëb  
Jesús loj reeman:



—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nünjdan zi'c lidx ree xingubaan.

<sup>14</sup> Dxel bénlutia'p ree con ree bencoj bibig reeman loj Jesús lën yadoo guin abi' bayünman laa reeman. <sup>15</sup> Per chi baguiaa ree bixhioz rniabee ree bixhioz con ree mextr rajc ley milagr cayün Jesús, biguiejn tëë reeman rëb ree xindoo lën yadoo guin: “Benza'c bendxoon naj xdiaa rey Davi”, dxel dád bidxe'ch reeman. <sup>16</sup> Abi' rëb reeman loj Jesús:

—¿Rguiejnl ni canee ree xindo guin ya?

Badxi' Jesúsán, rëbaman:

—Rguiejncan. Per ¿gadidi gool loj xtiidx Dios ya? Lod rëb: Lúj badëéd ni gool ree xindoo në ree xindobëz sta rë' dud, din guilies reex xvaloril.

<sup>17</sup> Dxel basa'n Jesús laa reeman, zëman Betania ni baya'nman guixin guin.

*Tijb yag higo ni gubidx*

(Mr. 11:12-14, 20-26)

<sup>18</sup> Chi bareguiaal rsil la'tgaj zë Jesús Jerusalén stijb, guzuloj gulaanman. <sup>19</sup> Abi' baguiaaman zobj tijb yag higo cwë' nejz, dxel gubigaman cwë'n, per ganaxzi balag ca lojn. Zianz rëbaman loj yag higo guin:

—¡Ad yu'tri dxej tial higo!

Loj hor guin gajc gubidx yag guin. <sup>20</sup> Chi baguiaa ree xbenjman zian, dád badxaloj reeman abi' gunabdiidx reeman loj Jesús, rëb reeman:

—¿Xhienaag gojc zeel laa gubidx gajc yag higo guin?

<sup>21</sup> Badxi' Jesúsán, rëbaman:

—Naj rni lojdi, bal rliladxidi Dios abi' ad zunawëégtidi, ad ni bentzan con yag higo guin zajc güündi, zajc guiëbidi loj guia' guie: “Biquied guie, bisob loj nijsdoo”, abi' zajc gajc zian.

<sup>22</sup> Gra ni guiniabidi loj Dios, bal rliladxidi laaman, zuneeman laan.

*Xgualrniabee Jesús*

(Mr. 11:27-33; Lc. 20:1-8)

<sup>23</sup> Chi guyu Jesús lën yadooro' Jerusalén, la'tgaj culüüman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rëb reeman:

—¿Chu na güünl ni guin ree? ¿Chu banee gualrniabee lojl?

<sup>24</sup> Badxi' Jesúsán, rëbaman:

—Ziangajc naj yu' tijb ni ganabdiidxan lojdi, bal yadxi'dan dxel ganin lëjt chu banee gualrniabee günan ni guin ree. <sup>25</sup> ¿Chu guxhaal Waj chigroobnijsaman bejn ree, Dios ya o bénguidxliuj?

Dxel guzuloj cayü reeman diidx, rëb reeman:

—Bal yaguie'ch ree, “Dios guxhaal laaman”, zanaman: “¿Chexza zeel ad bililadxtidi laaman?” <sup>26</sup> Abi'za bal yaguie'ch ree: “bénguidxliuj guxhaal laaman”, radxeb ree yalen ree bejn din gra reeman rililadx guial Waj naj bén badëéd xtiidx Dios loj ree bejn.

<sup>27</sup> Dxel rëb reeman loj Jesús:

—Ad rayagbeetan.

Badxi' Jesúsán, rëbaman:

—Ni'qui naj ad zanitan lojdi chu banee guialrniabee günan ni guin ree.

*Tijb bén guyu tio'p xi'n*

<sup>28</sup> Basnuu Jesús rëbaman loj ree bixhioz rniabee ree bixhioz në loj ree guxtis Israel.

—¿Xhie nadi ni ganin lëjt? Tijb bejn guyu tio'p xi'nman, dxel rëbaman loj tijbix: “Xi'n, wej yandxej biguieen dxiin loj guiniaa yu' uv.” <sup>29</sup> Badxi'xan, rëbix: “Ad zatan.” Per dxelri bayüjnx xgab zianz wejx. <sup>30</sup> Abi' rëbaman loj stijb xi'nman din chex, badxi'xan, rëbix: “Yo dad, gazacan.” Per ad wejtix. <sup>31</sup> Yan, ¿chu loj grop reex been ni rën xdad reex?

Badxi' reeman laan, rëb reeman:

—Xin rëbaman loj yaløj guin.

Dxel rëb Jesús loj reeman:

—Diidxliczi rnin, bén ruquijx ree impuest con ree béngunaa naban nadxuudx, yaløj laa reeman chu' lod rniabee Dios guial lojdi. <sup>32</sup> Din bi't Waj, bén baroobnijs bejn ree par gulüüman lëjt xhienaag guibandi, per ad bililadxtidi xtiidxaman. Guiáad ree bén ruquijx impuest con ree béngunaa naban nadxuudx, bililadx reeman xtiidxaman. Per lëjt majsi baguiaadi gra ree ni guin, ad bayüjntidi xgab por xtolidi din nililadxidi laaman.

*Xcwent ree mojs guijdx*

*(Mr. 12:1-12; Lc. 20:9-19)*

<sup>33</sup> Rëb tëë Jesús loj reeman:

—Yan, gol bacaagdiajg ganin lëjt stijb ni naj zi'c cwent. Guyu tijb bejn guxübinman uv ree loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' bazoobaman tijb yu ya da't din guiya'p guidib guiniaa guin.

'Zianz badëëdaman laan garol loj ree bén güün dxiin lojn, zëtamán zijt. <sup>34</sup> Chi bidxin dxej yaru' ree uv guin, guxhaalaman tio'p choon ree xmojsaman chigxii reeman ni rayalaman. <sup>35</sup> Per ree bén rüjn dxiin loj guiniaa guin gunaaz reeman mojs guin ree. Tijbaman gudijn reeman, stijbaman bagüjt reeman, stijbaman bacaaguaaj reeman. <sup>36</sup> Dxel bén naj

xguiniaan guxhaalaman mazri ree mojs guial loj ree bén we yaloj, per ziangajc beennë ree bén guin laa reeman.

<sup>37</sup> 'Ni bigra, guxhaal xi'nman guial gunaladxaman: "Zajpqui reeman da xi'nman respejt." <sup>38</sup> Per chi baguiaa ree bén guin xi'nman, rëb loj lasa' reeman: "Xin guinan naj xin tia' guidxliuj guin, yagüjt reex din gacan du xieen ree." <sup>39</sup> Abi' gunaaz reeman laax, babëë reeman laax loj guiniaa guin dxel bagüjt reeman laax.

<sup>40</sup> Dxel gunabdiidx Jesús loj ree bén caneenëman, rëbaman:

—Chi yadxin bén naj xguidxliuj laan, ¿xhie naladxidi güünnëman bén guin ree?

<sup>41</sup> Abi' rëb reeman loj Jesús:

—Ad zayataman gugüjtaman bén guin ree, dxel gudëëman guidxliuj guin garol loj ree ben ren, bén yayü ni rayalaman chi guidxin dxej yaru' ree uv guin.

<sup>42</sup> Dxel rëb Jesús loj reeman:

—¿Id wayolczidi loj xtiidx Dios ya? Lod rëb:

Guiaj ni gulëëgo'n ree bén rüjn yu.

Laan goc ni mazri been sirv gojcnë yu guin.

Laan naj ni been Dios,

abi' dád radxa du loj ree.

<sup>43</sup> Zeel rnin lojdi, zariicadi loj xguialrniabee Dios abi' ben ren ree yayu xluaridi, bén wali ree güün zi'c rënman. <sup>44</sup> Abi' chutëöz bén yab guiyc guiaj guin, zarooxaman, guiáad bal yab guiaj guin guiycaman zanidlojman.

<sup>45</sup> Chi biguiejn ree bixhioz rniabee ree bixhioz con ree bénfarisew guin ni cayü Jesús zi'c cwent, dxel gogbee reeman guial laa reeman cuza'taman. <sup>46</sup> Abi' guyën reeman niniaaz reeman laaman, per bidxeb reeman bejn ree guial rliladx reeman laaman naj bén rudëëd xtiidx Dios loj ree bejn.

## 22

### *Xcwent guialruxhliaa*

<sup>1</sup> Basnuu Jesús beman zi'c cwent loj reeman rëbaman:

<sup>2</sup> —Xguialrniabee Dios naj zi'c tijb rey bén been lanijro' chi baxhliaa xi'nman. <sup>3</sup> Abi' guxhaalaman mojs ree bignee reeman biooz ree, per biooz guin ree ad guyënt reeman nej reeman. <sup>4</sup> Dxel guxhaalaman mojs ren ree, rëbaman loj reeman: "Gol güjdx loj ree biooz guin ma naj guialraw, ma gunabeen güjt ree da go'nan në ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliaa guin." <sup>5</sup> Per biooz guin ree ad bidxga't reeman xtiidx rey guin, yu' reeman zë loj xguiniaa, yu' reeman zë xmandad, <sup>6</sup> yu' tëë reeman gunaaz mojs guin ree gudijn reeman laa reeman abi' bagüjt reeman laa reeman. <sup>7</sup> Chi

gogbee rey guin zian, dád bidxe'chaman. Guxhaalaman Bén naj ree xsuldadaman persi bagüjt reeman Bén guin ree baze'c tée reeman lidx reeman. <sup>8</sup> Dxel rëbaman loj ree xmojsaman: “Graczi ma najcchaaw par loj guialruxhliaa guin, per ree Bén gunen ad najt guial ni't reeman. <sup>9</sup> Yan, gol wej lod radxaag lasa' ree nejz, gol güjdx loj ree Bén guidxaalojtzidi din gui't reeman loj guialruxhliaa guin.” <sup>10</sup> Abi' brii ree mojs guin wej reeman lunejz guin ree, bato'p reeman gra ree Bén bidxaalojtzidi reeman, zi'c ree benmal zi'c ree benza'c, zian gudxa ree biooz lidx rey guin.

<sup>11</sup> 'Per chi guyu rey guin din guguaaaman biooz guin ree, baguaaaman tijb Bén ad najcwt xab ni rayal gacwaman loj guialruxhliaa guin. <sup>12</sup> Abi' rëb rey guin lojman: “Laadx lüj, ¿xhienaag beenl guyul guie abi' ad najcwt xabil ni rayal gacwil loj guialruxhliaa?” Dxel achet badxejl niëjb Bén guin. <sup>13</sup> Zianz rëb rey guin loj ree Bén cagui's guialraw: “Gol guxhii guia'x në yaax, gol bazaal tée xchu lod nacay da't lod goonx gaw tée layix.” <sup>14</sup> Din zien ree bejn rdxejl, per ad grataman chu'.

*¿Rayal gax impuest ya?*

*(Mr. 12:13-17; Lc. 20:19-26)*

<sup>15</sup> Dxel baza ree Bénfarisew yagaj, abi' baya'n reeman di-idx xhie guiniabdiidx reeman loj Jesús din guidoon xhie guiëbaman, zian chile' gutedia' reeman laaman. <sup>16</sup> Abi' guxhaal ree xbejn reeman con ree xbejn Herodes, rëb reeman lojman:

—Mextr, dunujn rayagbee guial lüj rniece diidxli, abi' walil rulüül guial xhienaag rën Dios guiban bejn, ad ridxga' tée til chu naj bejn. Din lojl tiblojzi naj bejn. <sup>17</sup> Guna du lojn: ¿Zagdxen ya yadijxan impuest loj César o ad zagdxetan ya?

<sup>18</sup> Per gogbee gajc Jesús xgabmal ni cayüjn reeman, abi' rëbaman loj reeman:

—Bén rusquiee, ¿chexc zeel raguiilidi mod xhienaag gutidia'di naj? <sup>19</sup> Gol balüü tijb cintabl lon ni rguijxnëdi impuest.

Dxel badëed reeman tijban lojman, <sup>20</sup> abi' gunabdiidx Jesús loj reeman, rëbaman:

—¿Chu loj ca lojn chu tée laj ca lojn?

<sup>21</sup> Badxi' reeman laan, rëb reeman:

—Laj César në lojman.

Dxel rëbaman:

—Gol badëed loj César ni naj xieen César, guiáad loj Dios gol badëed ni naj xieen Dios.

<sup>22</sup> Chi biguiejn reeman zian, dád badxaloj reeman, dxel basa'n reeman laaman, zianz zia reeman.

*Gunabdiidx reeman xcwent guial yaban ree bengüt*

*(Mr. 12:18-27; Lc. 20:27-40)*

<sup>23</sup> Dxejzii gajc tio'p choon ree bénsadusew wej reeman bignaj reeman Jesús, bénsadusew guin ree ad riladxt reeman guial yaban ree bengüt, zeel rëb reeman loj Jesús:

<sup>24</sup> —Mextr, Moisejs rëb guial bal guiët tijb xinguaaw abi' achut xi'n reex guyu con lacheelix, bijch xingüt guin guxhlianë béngunaa bizëjb guin din chu' xi'n reex luar bijchix.

<sup>25</sup> Du lojn guyu tijb famil lod gojc reex gajdx bijch. Baxhliaa xin yaløj guin, per güjtix abi' guial ad guyut xi'nx, dxel bijch barojpax baxhlianë béngunaa guin. <sup>26</sup> Per ziangajc guzajc xin barojp guin abi' ziangajc guzajc xin bayon guin, xt bagajdx reex guzajc zian. <sup>27</sup> Chi bara reex güjt dxel güjt béngunaa guin. <sup>28</sup> Yan, chi yaban ree bengüt, loj guigajdx reex, ¿chu gac xbéngunaa laaman guial gra reex baxhlianë laaman?

<sup>29</sup> Badxi' Jesúsán, rëbaman:

—¡Ragdxadi guial ad nünbeetidi xtiidx Dios ad nünbee tëetidi xhienaag naj xguialrniabeeman! <sup>30</sup> Din chi yaban ree bengüt, ad zuxhliaatri reeman ad zudëed tëetri xi'n reeman guxhliaa, ma gac reeman zi'c ree anjl yu' xanyabaa. <sup>31</sup> Abi' xcwent ni yaban ree bengüt, ¿gadidi gool ya lod ca guial Dios gajc rëb: <sup>32</sup> “Naj naj xDios Abraham, xDios Isaac në xDios Jacob”? Abi' Dios ad najtaman xDios ree bengüt, najman xDios ree bën naban.

<sup>33</sup> Chi biguiejn ree bejn zian, dád badxaløj reeman zi'c rulüüman laa reeman.

### *Mandamient mazri zøjbloj*

(Mr. 12:28-34)

<sup>34</sup> Chi gogbee ree bénfarisew guial achet badxejl niëjb ree bénsadusew loj Jesús, dxel baya'n reeman diidx badxaag lasa' reeman. <sup>35</sup> Abi' tijb ree bénfarisew guin, bën naj mextr rajc ley, gunabdiidxaman loj Jesús din guidoon xhie guiëbaman, rëbaman:

<sup>36</sup> —Mextr, ¿con mandamientan mazri zøjbloj loj gra ree mandamient ni zëed loj ley?

<sup>37</sup> Badxi' Jesúsán rëbaman:

—“Guyën xDadil Dios guidiblagaa guidib guiyc guidib ladxil.” <sup>38</sup> Laan naj mandamient mazri zøjbloj. <sup>39</sup> Ziangajc naj mandamient rarojp ni rëb: “Guyën ree bejn zi'c rën lüj gajc.”

<sup>40</sup> Con grop ree mandamient guie, ma cayüjn bejn cumplid gra ley bacaa Moisejs në ree ni bacaa ree bën badëe xtiidx Dios loj ree bejn.

### *Chu loj xdiaa za Cristo*

(Mr. 12:35-37; Lc. 20:41-44)

<sup>41</sup> La'tgaj nadxag lasa' ree bénfarisew guin, gunabdiidx Jesús loj reeman, rëbaman:

<sup>42</sup> —¿Xhie xgab rüjndi por Cristo? ¿Chu loj xdiaa zaman?

Badxi' reeman laan rëb reeman:

—Loj xdiaa Davi.

<sup>43</sup> Dxel rëb Jesús loj reeman:

—Per, ¿chexquiza zeel por xSprijt Dios rëb Davi lojman, Dad?

Din Davi rëb:

<sup>44</sup> Dios rëb loj bén rniabee naj:

“Gurej da ladbeen, xt gabecan

xin rdxe'ch ree lüj guia'l.”

<sup>45</sup> Yan, bal xi'n Davi naj Cristo, ¿chexquiza zeel rëb Davi lojman Dad?

<sup>46</sup> Achutczi gojc nadxi' xtiidx Jesús, ni'czi tijb diidx. Abi' diizd dxejzii achutczi bayax niniabdiidx xhienin lojman.

## 23

*Ni rüjn ree mextr rajc ley në ree bénfarisew*

*(Mr. 12:38-40; Lc. 11:37-54; 20:45-47)*

<sup>1</sup> Rëb Jesús loj ree bejn në loj ree xbejnman:

<sup>2</sup> —Mextr rajc ree ley con ree bénfarisew rulüü reeman xhie rën guiëb ni ca loj xley Moisejs. <sup>3</sup> Zeel gol bazoob xtiidx reeman, gol been tëë gra ni na reeman lojdi, per ad güüнди zi'c rüjn reeman, din laa reeman ni ren na reeman abi' ni ren rüjn reeman. <sup>4</sup> Rniabee reeman güün bejn ni nawëëg da't, per rniabeezi reeman güün bejn zian, guiáad laa reeman ni'qui ta'n ad rüjnt reeman bejn yudar din güün reeman zi'c rën reeman. <sup>5</sup> Gra ni rüjn reeman, rüjn reeman laan din yadxaloj bejn laa reeman. Ruladx reeman guixhii lucwaj reeman në xu'c reeman tijb cint ni ca xtiidx Dios loj, ruladx tëë reeman gacw reeman lajd zagdxe. <sup>6</sup> Ruladx reeman cwe reeman lod rayal rbej ree bén zojbloj, loj tijb guialraw, abi' ziangajc rüjn reeman lën ree yadoo. <sup>7</sup> Ruladx tëë reeman gugajpdioz bejn laa reeman zagdxe niz lunejz guiëb tëë reeman loj reeman mextr.

<sup>8</sup> Per lëjt ad sëëbladxidi guiniee bejn lëjt mextr, din tijbzi naj gradi, tijbzi mextr rajpidi abi' laaman naj Cristo. <sup>9</sup> Ni'qui tijb loj bénguidxliuj, bén ad najt xdadidi, ad guiëbidi dad, din tijbzi xdadidi yu', laaman yu' xanyabaa. <sup>10</sup> Ad güün tëëdi naguiejn yayagbee ree bejn lëjt zi'c bén rniabee, din tijbzi bén rniabee yu', laaman naj Cristo. <sup>11</sup> Bén mazri zojbloj lojdi, laaman rayal güün sirv lojdi. <sup>12</sup> Din bén rlies xvalor gajc achet lasajcaman. Guiáad bén rüjn naya, zajs xvaloraman.

<sup>13</sup> ¡Probza lëjt mextr rajc ley në lëjt bénfarisew, bén rusquiee!, ad rtiëjbtidi gagbee ree bejn xhienaag din gac reeman xbejn Dios, ni'quiza lëjt ad rüjntidi naguiejn gaquidi xbejn Dios, abi' rudxoondi gac xbejn Dios bén rën ree gac xbejnman.

<sup>14</sup> ¡Probza lëjt mextr rajc ley në lëjt bénfarisew, bén rusquiee!, din raca'di lidx ree béngunaa bizëjb, abi' din guiëb bejn guial

benza'c lëjt dád xchej rbejdx rniabidi Dios. Zeel mazri castiro' yayalidi.

<sup>15</sup> ¡Probza lëjt mextr rajc ley në lëjt bénfarisew, bén rusquiee!, zizadi guidibdoo rguilidi bén gac ree xbejndi, abi' chi ma beendi gan tijbaman al mazri xi'n xindxab rüjndi laaman guial lojdi.

<sup>16</sup> ¡Probza lëjt, bénlutia'p!, rëbidi: “Achet güünan bal id züjn bejn ni guneeman, majsi ma baza'taman yadooro' Jerusalén, per bal guza'taman ni or yu' ree lën yadoo guin, dxel ma rüjn naguiejn güünman ni guneeman.” <sup>17</sup> ¡Natontidi, wed natia'p lojdi! ¿Conin mazri lasajc: Or guin ya o yadoo beenle' or guin? <sup>18</sup> Rëb tëëdi: “Achet güünan bal id züjn bejn ni guneeman majsi ma baza'taman xialtar yadoo guin, per bal guza'taman gon dxiib loj altar guin, rüjn naguiejn güünman ni guneeman.” <sup>19</sup> ¡Bénlutia'p! ¿Conin mazri lasajc par lëjt: Gon guin ya o altar beenle' gon guin? <sup>20</sup> Bén ruza't altar guin ad altar guintzan ruza'taman, nëgajc gra ni dxiib lojn ruza'taman. <sup>21</sup> Guiáad bén ruza't yadoo guin, ad yadoo guintzan ruza'taman, Diosan ruza'taman din lidxaman naj yadoo guin. <sup>22</sup> Abi' bén ruza't xanyabaa, Diosan ruza'taman në lod zojbaman.

<sup>23</sup> ¡Probza lëjt mextr rajc ley në lëjt bénfarisew, bén rusquiee!, rbëëcadi bidxtil, anís nëtëë comin ni rayal gudëëdi loj Dios, abi' ad ruzoobtidi xley Moisejs ni mazri zojbloj, ad rüjntidi zi'c rayal, ad rayat lasa'di, ad za'dxi'ch tëëtidi loj xnejz Dios. Laa reen rayal güündi, per ad cwëëladxidi gudëëdi ni rayal loj Dios. <sup>24</sup> ¡Bénlutia'p, rajpidi cudad chitëë guiëbidi tijb bizëdlajs, abi' rgujëbidi tijb camell!

<sup>25</sup> ¡Probza lëjt mextr rajc ley në lëjt bénfarisew, bén rusquiee!, rusiadi xijch ree vajs në xijch ree pliajt naj nadxuudx, guiáad luxdoodi guidxa ni dxuudx, në guialgubaan nëtëë guialrdxe'ch lasa'. <sup>26</sup> ¡Bénfarisew lutia'p: Yalojxgaj gol basia, zian guiguien waliquidi nayadi loj Dios!

<sup>27</sup> ¡Probza lëjt mextr rajc ley në lëjt bénfarisew, bén rusquiee!, najdi zi'c baa nayë' culor naquich, guijcan rguien nix da't, per lënan guidxa ree xdxijt bengüt në graloj ree ni dxuudx. <sup>28</sup> Zian najdi, niz loj ree bejn, rulüüdi benza'c, per luxdoodi guidxa guialrusquiee në guialnaladx.

<sup>29</sup> ¡Probza lëjt mextr rajc ley në lëjt bénfarisew, bén rusquiee!, rüjndi xbaa ree bén badëë xtiidx Dios loj ree bejn, abi' rüjnchaawidi xbaa ree bén goc benza'c, <sup>30</sup> dxel rëbidi: “Bal nabajnan xtiamper ree dux bégulalan, ad nët dunujn nagüjt bén badëë ree xtiidx Dios loj ree bejn.” <sup>31</sup> Abi' con ni guin ree, rayünbeegajquidi guial loj xdiaa bén bagüjt ree bén badëë xtiidx Dios loj ree bejn zëëdidi. <sup>32</sup> ¡Gol balooxa ni guzuloj been xbégulalidi!

<sup>33</sup> ¡Béndol, xi'n xindxab! ¿Xhienaag laadi loj castiro' ni yu' gabijl? <sup>34</sup> Zeel gaxhalan lojdi bén gudëe ree xtiidx Dios, bén rajc ree në ree mextr. Per yu' reeman gugüjtidi, yu' reeman gucaadi loj crüzj, yu' tée reeman quindi lën ree xyadoodi abi' sunalidi laa reeman guiedx por guiedx din güündi laa reeman xhienin. <sup>35</sup> Zianan zeel guijquidi yab xtol gra ree bén bagüjt bén goc ree benza'c diizd Abel bén guban xnejz loj Dios xt Zacarías xi'n Berequías, bén bagüjt reeman lule' yadooro' Jerusalén. <sup>36</sup> Diidxliczi rnin lëjt, xcasti gra ree ni guin yab guijc ree bén riga' loj guidxliuj yan.

### *Roon Jesús por Jerusalén*

*(Lc. 13:34-35)*

<sup>37</sup> Rëb tée Jesús:

—¡Bén Jerusalén, bén Jerusalén, rugüjtidi bén rudëe ree xtiidx Dios loj ree bejn abi' rucaaguiajdi bén rxhiaal Dios lojdi! ¡Bëlczi volt guyënan nuchagan lasa'di, zi'c rüjn tijb guid ruchajg lasa' ree xi'nb lën xhiilib, per ad gutiëjbtidi! <sup>38</sup> Zianan zeel yaya'n ladxidi zi'c tijb guiedx lod achut zojb. <sup>39</sup> Abi' rnin lëjt diizd yan ad zuguaatrudi naj, xt chi guidxin dxej guiëbidi: “¡Nünle! Dios bén guxhaalaman!”

## 24

### *Rëb Jesús guial yaze'n yadooro'*

*(Mr. 13:1-2; Lc. 21:5-6)*

<sup>1</sup> Chi barii Jesús lën yadooro' Jerusalén, ziaman, bibig ree xbejnman lojman balüü reeman gra ree xyu yadoo guin lojman. <sup>2</sup> Abi' rëb Jesús loj reeman:

—Diidxliczi rnin, gra ni cuguaadi yu' dxej ni'qui tijb guiaj guin ad zaya'nt guijc stijban, gran yaze'n.

### *Ni gac chi gad guidxliuj nit*

*(Mr. 13:3-23; Lc. 21:7-24; 17:22-24)*

<sup>3</sup> La'tgaj zojb Jesús guijc guia' la Olivos, gubig ree xbejnman lojman, rëb reeman:

—Rayënan nal goc gac zian. ¿Xhie ree sen gac chi ma zidyob gui'til stijb, në chi ma zidyob nit guidxliuj?

<sup>4</sup> Dxel rëb Jesús loj reeman:

—Gol gojp cudad achu gusquiee lëjt. <sup>5</sup> Din zien ree bejn gui't guiëb reeman guial por naj zëed reeman, guiëb tée reeman: “Naj naj Cristo”, abi' zien bejn gusquiee reeman. <sup>6</sup> Per lëjt chi guiguiejndi cayajc wadijl o zëeb diidx guial gac wadijl, ad guidxebidi din zian naj gac. Per ad wadxint dxej nit guidxliuj. <sup>7</sup> Din til nacion con stijb nacion, në bén rajp guialrniabee con stijb bén rajp guialrniabee. Abi' gui't xudoxh në gubijn niz ni niz guie. <sup>8</sup> Gra ree nine ree gac chi ma suloj guialzi guin.



<sup>9</sup> 'Dxel yayü ree bejn lëjt loj ree bén gusagzi lëjt, gugüjt reeman lëjt, abi' gra ree bénguidxliuj guidxe'ch lëjt guial najdi da bejnan. <sup>10</sup> Chi gac zian zien ree bejn gusa'n guialrliladx reeman naj, guidxe'ch lasa' reeman abi' yayü lasa' reeman loj ree bén ralen laa reeman. <sup>11</sup> Gui't tée zien ree bén gusquiee, guiëb reeman guial rudëed reeman xtiidx Dios, abi' zien bejn gusquiee reeman. <sup>12</sup> Abi' guial dád zien ni mal gac, zien da't bén ad zëntri ree lasa'. <sup>13</sup> Per bén sudxi'ch loj guialrliladxa-man naj, xt dxej chigra guibanman, laaman yayal xanyabaa. <sup>14</sup> Abi' xtiidx Dios ni canin lëjt yan guire'chan guidibczi guidxliuj din gagbee gra bejnan, dxelri nit guidxliuj.

<sup>15</sup> 'Zianan zeel chi guguaaadi zojb tijb ni dxuudx, ni ad rüjnt sirv lën yadooro' Jerusalén, zi'c gunee Daniel bén badëe xtiidx Dios loj ree bejn (bén gool gui'ch guie ree, gol bignia'), <sup>16</sup> guial bén zojb ree Judea rayal guxüün reeman che reeman dajn. <sup>17</sup> Guiáad ree bén yë'p guijc yulidx dxejzii, ad yayu lënülix reeman par tia' xhie xieen reeman. <sup>18</sup> Abi' ree bén za' dajn, ad yajejc reeman chigxii xab reeman. <sup>19</sup> ¡Probza ree béngunaa nüü xi'n o bén ca' ree xindobëz lën ree dxejzii! <sup>20</sup> Gol gurejdx gunab Dios chitëe gac zian tiamp nayaag o dxej raziiladx ree bejn ya. <sup>21</sup> Din naxel dád guialziro' chu', zi'c ad wayajctczi diizd guia'xchej chi gad guidxliuj gacchaaw ad yu' tëët dxej gac zian. <sup>22</sup> Abi' bal id Dios gucwëez guialzi chu' lën ree dxej guin, ni'qui tijb bejn ad zalaat, per gucwëezaman laa reen por ree bén guleman.

<sup>23</sup> 'Lën ree dxejzii bal chu na lojdi: “Gol baguiaa, laa Cristo za' guie”, o “Gol baguiaa laaman za' ni”, ad bal chililadxidi. <sup>24</sup> Din zi't zien ree bén gusquiee na guial laa reeman naj bén guxhaal Dios o na reeman guial laa reeman naj bén rudëed xtiidx Dios. Abi' züjn reeman milagr ree në graloj ni yadxaloj bejn din gusquiee reeman laa reeman, abi' bal zile'n xt në ree bén gulej Dios gusquiee reeman. <sup>25</sup> Ma rni xgajn lojdi ni gac. <sup>26</sup> Zeel bal chu na lojdi: “Gol baguiaa laa Cristo za' niz loj yujbidx”, ad bal chedi o na reeman lojdi: “Laa Cristo yu' lënü ni”, ad bal chililadxidi. <sup>27</sup> Din zi'c chi rë'p nijs, abi' rulaan bacha' niz lod rliejn gubijdx xt lod rëëzan, ziangajc gac dxej gui't Bén guxhaal Dios stijb. <sup>28</sup> Bén rliladx ree naj gui't reeman lon, zi'c chi rado'p ree golbich lod naga' tijb begüt.

### *Gui't Bén guxhaal Dios stijb*

*(Mr. 13:24-37; Lc. 21:25-33; 17:26-30, 34-36)*

<sup>29</sup> 'Chi ma gudëd ree dxej ni gac ree guialzi guin, guicajy loj gubijdx, ad zusnit bëew, guiyajb ree bajl xanyabaa abi' gra ree ni yu' xanyabaa guiniib. <sup>30</sup> Dxel guiguien tijb sen xanyabaa guial ma gui't Bén guxhaal Dios. Abi' gra ree bénguidxliuj goon da't chi guguaa reeman Bén guxhaal Dios, rdiinman bacha'

zëedaman loj zaj con xgualrniabeeman. <sup>31</sup> Dxel guixhiaal ree xianjlaman, abi' rejs da't gucwejdx reeman trompejt, din yadxajg lasa' ree bën guleman, bën za' ree gralad guidiblagaa guidxliuj.

<sup>32</sup> 'Yan, gol baguiaa xhienaag rajc con tijb yag higo. Chi ma naquie'n xidxan, chi ma caydxib ree xbalagan, lëjt ragbee guial ma zëed tiamp nalaa. <sup>33</sup> Ziangajc chi guguaadi ma cayajc ree ni guin, gagbeedi guial ma zidyob gac zi'c rnin lëjt. <sup>34</sup> Diidxliczi rnin lëjt guial gra ree ni guin gac chi gad ree bën naban yan guiët. <sup>35</sup> Guidxliuj në xanyabaa zanijt reen, per da diidxan ad zanijtтан.

<sup>36</sup> 'Per achut ragbee xhie dxejn në xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.

<sup>37</sup> 'Zi'c goc gulal chi guban Noé, zian gac chi yaguaaad Bén guxhaal Dios. <sup>38</sup> Din chi gad Dios guixhiaal guiadoxh loj guidxliuj, bejn ree, raw reeman, rë' reeman, ruxhliaa reeman, rudëë tëë xi'n reeman ruxhliaa, xt chi bidxin dxej guyu Noé lën barcwro' ni beenman. <sup>39</sup> Abi' ad bidxgatczi reeman, dxejlczi gol guiadoxh abi' zinë nijs laa reeman, ziangajc gac chi yaguaaad Bén guxhaal Dios. <sup>40</sup> Dxej guin, lod za' tio'p ree xinguaaaw dajn, tijbix yaza, stijbix yaya'n. <sup>41</sup> Guiáad lod cayojt tio'p ree bëngunaa, tijbaman yaza, stijbaman yaya'n.

<sup>42</sup> 'Zeel gol guzujsin din ad ragbeetidi xhie dxej yaguaaad xDadidi. <sup>43</sup> Gol been xgab, bal tijb bejn ragbee xhie guxhin xhie tëë horan chu' xingubaan lidxaman cwanx, zabejnaanman abi' ad zatiëjbtaman chu' xingubaan guin lidxaman. <sup>44</sup> Zianan zeel gol guzujsin, din ad ragbeetidi dxejlczi yaguaaad Bén guxhaal Dios.

*Mojs za'c në mojs guijdx  
(Lc. 12:41-48)*

<sup>45</sup> '¿Chu lëjt naj zi'c tijb mojs rusa'n xpatronx lidxaman din gulenx gra ree mojs, gudëë tëëx ni gaw reeman chi gal hor? <sup>46</sup> Xiquilbaa mojs cayüjn dxiin zi'c rayal chi yadxin xpatronx. <sup>47</sup> Din diidxliczi rnin lëjt, patron guin zusa'n gra xieenman loj mojs guin. <sup>48</sup> Per bal naj mojs guin mojs dxuudx, naladxix: "Zaglaari da patronan." <sup>49</sup> Zianz suloj gusagzix los demazri ree mojs guin, suloj gawix, guië'në tëëx xingu' ree. <sup>50</sup> Abi' yadxin xpatronx tijb dxej ni ad ragbeetix ad rbëz tëëtix laaman. <sup>51</sup> Dxel dád castiro' gudëed patron guin laax, guixhiaal tëëman laax lod rayal ree bën rusquiee, lod goonx gaw tëë layix.

## 25

*Xcwent chii biinxdüb*

<sup>1</sup> Basnuu Jesús rëbaman:

—Loj xguialrniabee Dios gac zi'c guzac ree chii biinxdüb we loj tijb guialruxhliaa cwa' tijbgaj xguij reem bilëz reem xin cuxhliaa guin. <sup>2</sup> Gaay reem been xgab xhie güün reem, per za gaay reem ad beent xgab. <sup>3</sup> Biin ad beent ree xgab guin binë xguij reem per ad binët reem mazri sejt ni che'cnë ree guij guin. <sup>4</sup> Guiáad ree biin been xgab guin xhie güün reem, binë reem za tib lumejtgaj sejt con xguij reem. <sup>5</sup> Abi' guial goglaa badxin xinruxhliaa guin, bi't bacaal loj gra reem, abi' goodyëjs reem. <sup>6</sup> Cost garol guiaal, biguien cha' tijb bejn rëbaman: “¡Laa xinruxhliaa guin ma ziaad, gol tagchaaglojx!” <sup>7</sup> Dxel bixche gra ree biinxdüb guin, abi' beenchaaw xguij reem. <sup>8</sup> Abi' gaay ree biin ad beent xgab guin xhie güün reem, rëb reem loj za gaay biin been xgab guin: “Gol baneesii tibda'n xsejtidi, din dux guiyn ma cayü' reen.” <sup>9</sup> Per badxi' reemin rëb reem: “Yajqui, din dool ad zadaantan par lëjt ni'qui par dunujn. Zagdxeli gol wëj lod rdo'n din siidan par lëjt gajc.” <sup>10</sup> Abi' la'tgaj zë reem zisii reem sejt, bidxin xinruxhliaa guin, abi' za gaay ree biin been xgab guin guyunë reem laax loj guialruxhliaa guin dxel bida'cw ro' port. <sup>11</sup> Dxel chi badxin za gaay biin bisii ree sejt guin, rëb reem: “¡Dad, dad, guxhal din yadxu'n!” <sup>12</sup> Per badxi'xan rëbix: “Diidxliczi rnin, ad nünbeetan lëjt.”

<sup>13</sup> Dxel basnuu Jesús rëbaman:

—Zeel gol guzusin din ad ragbeetidi goc yaguaad Bén guxhaal Dios.

*Xcwent bën badëéd milia*

<sup>14</sup> Dxel rëb tëë Jesús:

—Xguialrniabee Dios naj zi'c tijb bën ma grii cheman zijt, abi' gurejdx ree xmojsaman, basa'n xmiliaman loj reeman. <sup>15</sup> 'Loj tijbaman badëëman gaay mil cintabl, loj zatijbaman badëëman zatio'p milan, guiáad loj zatijbaman badëëman za timilan. Loj tijbgaj reeman badëëdaman ni naladxaman zajc güünnë reeman dxiin, dxel briitaman zëman zijt. <sup>16</sup> Abi' mojs cwa' gaay mil cintabl guin beennëman laan dxiin abi' beenman gan za ziant gajcan. <sup>17</sup> Ziangajc been mojs cwa' tio'p milan, beenman gan za tio'p mil gajcan. <sup>18</sup> Per mojs cwa' timil cintabl guin bitëënman luyuj persi baquie'chaman cintabl guin ni badëéd xpatronman.

<sup>19</sup> 'Gojc xchej da't dxel badxin patron guin abi' babëëman cwent con la reeman. <sup>20</sup> Yaløj bidxin mojs cwa' gaay mil cintabl guin abi' bayüman zagaay milan, rëbaman: “Dad, lüj baneë gaay milan lon, yan, laa za gaay milan guie ni benan

gan.” <sup>21</sup> Dxel rëb patron guin lojman: “Zagdxen, mojsza'c, zagdxen beenl, guial zagdxen beenl con tibda'n ni banen, yan, gunen mazri guial loj ni banen. Guyu, babaa con naj.” <sup>22</sup> Zianz bidxin mojs cwa' zatio'p mil cintabl guin rëbaman: “Dad, lüj banee tio'p milan lon, yan, laa zatio'p milan guie ni benan gan.” <sup>23</sup> Dxel rëb patron guin lojman: “Zagdxen, mojsza'c, zagdxen beenl, guial zagdxen beenl con tibda'n ni banen, yan, gunen mazri guial loj ni banen. Guyu, babaa con naj.”

<sup>24</sup> 'Per chi bidxin mojs cwa' timil cintabl guin, rëb loj xpatronman: “Dad, naj ragbee guial ad rayatil bejn, rabëël guialnaza'c lod ad rgu'til bin, rato'p tëël guialnaza'c lod ad rtie'chtil bin. <sup>25</sup> Zeel bidxeban abi' biquiechan xmilial lën liuj, yan, laa xmilial guie.” <sup>26</sup> Badxi' patron guinan, rëbaman: “Mojs mal, mojs ploj, bal ragbeel rabën guialnaza'c lod ad rgu'tan bin, ratop tëën guialnaza'c lod ad rtiechtan bin. <sup>27</sup> Adil nilu' da milian lën bancw, din chi naguialan naca'n'an con xi'n'an ni beenan gan.” <sup>28</sup> Dxel rëb patron guin loj ree bën za' yagaj: “Gol biquied timil cintabl guin lojx, gol badëëdan loj xin rajp chii milan. <sup>29</sup> Din bën rajp zaca'man mazri, abi' gapaman zro' da't, per bën rajp ta'nzi, xt ni rajpaman chiquied lojman. <sup>30</sup> Abi' mojs ad rünjt sirv guin gol bazaalix xchuni lod nacay, lod goonx, lod gaw tëë layix.”

### *Xguialguxtis Jesús*

<sup>31</sup> 'Chi gui't Bén guxhaal Dios, gui'taman con xguialrniabee-man, në con gra ree xianjlaman din cweman lod nabeeman. <sup>32</sup> Dxel gra ree bénguidxliuj yado'p lojman, abi' cweman laa reeman zi'c rünj tijb bën rajp xiil chi rabëëcaman xiil ree loj ree dxib. <sup>33</sup> Abi' guzujman bën naj ree xbejnman xladbeeman, guiáad ree bën ad najt xbejnman guzujman xladruvejsaman. <sup>34</sup> Dxel guiëb rey guin loj ree bën za' xladbeeman: “Gol guda bën ma nünle' da Dadan. Gol guyu loj guialrniabee najcchaaw par lëjt, diizd chi go'tchaaw guidxliuj. <sup>35</sup> Din chi gulaanan, baneedi ni gudawan, chi we'can nijs, baneedi ni gu'n, chi bizaan zi'c tijb benzit, baneedi lod baya'n'an. <sup>36</sup> Chi byaadx da xaban, lëjt banee ni go'tan, chi gogxuun, bidgatixlojdi naj, abi' chi guyu'n ladxguiib, bidganajdi naj.” <sup>37</sup> Dxel guiëb ree bën za' ladbee guin: “Dad, ¿goc baguiaan lüj rliaanl, abi' baneen ni gudawil?, ¿o goc baguiaan lüj we'quil nijs, abi' baneen nijs gu'l? <sup>38</sup> ¿Goc baguiaan lüj zizal zi'c tijb benzit, abi' baneen lod baya'n'l, o goc biyaadx xabil, abi' baneen ni gotil? <sup>39</sup> ¿Abi' goc baguiaan lüj ragxuul, o guyul ladxguiib, abi' budganajn lüj?” <sup>40</sup> Dxel guiëb rey guin loj

reeman: “Diidxliczi rnin lojdi, gra yudar beendi da bejn reen majsi ad najt reeman b́en lasajc, najn beendi yudar.”

<sup>41</sup> 'Dxel guiébaman loj ree b́en za' xladruvejsaman: “Gol biquied lon, benmal gol chej loj bajl ni ad yu't dxej yayü' ni ma naj par xindxab nē ree xbejn. <sup>42</sup> Din chi gulaanan, ad baneetidi ni niawan, chi we'can nijs, ad baneetidi ni niē'n. <sup>43</sup> Chi bizaan zi'c benzit, ad baneetidi lod naya'nan, chi biyaadx da xaban, ad baneetidi ni nia'cwan. Abi' chi gogxuun nē chi guyu'n ladxguiib, ad bidganajtidi naj.” <sup>44</sup> Dxel guiéb reeman lojman: “Dad, ¿goc baguiaan lüj rliaanl o re'quil nijs, o zizal zi'c tijb benzit, o goc baguiaan lüj ryaadx xabil, o ragxuul, o yu'l ladxguiib, abi' ad bayidxga'tan lüj?” <sup>45</sup> Abi' yadxi'man laan guiébaman: “Diidxliczi rnin lējt, gra ni ad beentidi din nūjndi yudar da bejn reen majsi ad najt reeman b́en lasajc, najn ad beentidi yudar.” <sup>46</sup> Laa reeman yayal loj casti tiblyaaa, guiáad ree b́en been zi'c rayal, laa reeman rayal guialnaban tiblyaaa con Dios.

## 26

*Baya'n reeman diidx xhienaag guiniaaz reeman Jesús  
(Mr. 14:1-2; Lc. 22:1-2; Jn.11 :45-53)*

<sup>1</sup> Chi gulox gunee Jesús diidx guin ree, dxel rēb loj ree xbejnman:

<sup>2</sup> —Lējt ragbee guial ryaadx zatio'p dxejzi guial guidxin lanij pascw, abi' B́en guxhaal Dios yayü ree bejn laaman din tiaman loj crūjz.

<sup>3</sup> Lēn ree dxejzii badxaag lasa' ree bixhioz rniabee ree bixhioz, con xguxtis ree b́en Israel, lidx Caifás quijb bixhioz zojbloj. <sup>4</sup> Ni baya'n reeman diidx xhienaag gusquiee reeman Jesús din guiniaaz reeman laaman, abi' gugüjt reeman laaman. <sup>5</sup> Per rēb reeman:

—Ad zaguieent ree zian loj lanij guin chitēe gac naquie' luguiedx guin.

*Ruroob tijb béngunaa perfum guijc Jesús  
(Mr. 14:3-9; Jn.12 :1-8)*

<sup>6</sup> Chi za' Jesús luguiedx Betania lidx Simón, b́en rniee reeman Leproso, <sup>7</sup> bidxin tijb béngunaa ca'man tijb lumejt guidxan perfum ni lasajc wayējx. Abi' la'tgaj zojb Jesús xan mex, baroobaman perfum guin guijc Jesús. <sup>8</sup> Chi baguiaa ree xbejn Jesús ni been béngunaa guin, dád bidxe'ch reeman, abi' rēb reeman:

—¿Chexc zeel bixie' perfum guin? <sup>9</sup> Zile' nido'n zro' da't din nūjnan yudar b́enprob ree.

<sup>10</sup> Chi biguiejn Jesús ni canee reeman, rēbaman loj reeman:

—¿Chexc zeel rdxe'chidi béngunaa guin? Zagdxe naj ni beenman naj. <sup>11</sup> Din bénprob guin ree zianczi za'në reeman lëjt, sa'n naj ad ziantczi gazunë'n lëjt. <sup>12</sup> Abi' ni baroobaman perfum guin guican, rën guiëban guial ma beenchaaw xgajman naj par chi guiguie'chan. <sup>13</sup> Diidxliczi rnin, bantëëz guin guire'ch xtiidxza'c Dios loj guidxliuj, zü ree bejn gra ni been béngunaa guin por naj, din gusaaladx reeman laaman.

*Rayü Judas Jesús*

*(Mr. 14:10-11; Lc. 22:3-6)*

<sup>14</sup> Loj guidxiptio'p ree xbejn Jesús, bén la Judas Iscariote, bigneenëman bixhioz rniabee ree bixhioz, <sup>15</sup> rëbaman loj reeman:

—¿Plac guneedi din yanen Jesús lojdi?

Abi' badëed reeman gajlbichii milia plajt lojman. <sup>16</sup> Diizd dxejzii guzulojman raguuilaman mod xhienaag yayüman Jesús.

*Gudawnë ree xbejn Jesús xche*

*(Mr. 14:12-25; Lc. 22:7-23; Jn.13 :21-30; 1Co.11 :23-26)*

<sup>17</sup> Dxej ni guzuloj lanij ni raw ree bejn guiadxtil ni ad yu't levadur, gubig ree xbejn Jesús lojman, rëb reeman:

—¿Ban guin rënl yaguieenchaawan ni yadaaw ree guxhin lanij pascw?

<sup>18</sup> Badxi' Jesúsán rëbaman:

—Gol chej Jerusalén lidx bén guin, gol biguiedx lojman: “Na Mextr: Ma bidxin xihoraman abi' rënman tëdaman pascw lidxil con ree xbejnman.”

<sup>19</sup> Dxel been ree xbejnman zi'c rëbaman, been tëë reeman ni gaw reeman guxhin lanij pascw.

<sup>20</sup> Chi gure guiaal, zojb Jesús xan mex con guidxiptio'p ree xbejnman. <sup>21</sup> Abi' la'tgaj cayaw reeman, rëbaman loj reeman:

—Diidxliczi rnin, tijb gajc lëjt yayü naj.

<sup>22</sup> Abi' dád guyunaya reeman, zianz guzuloj rniabdiidx tijbgaj reeman loj Jesús, rëb reeman:

—¿Najn ya, Dad?

<sup>23</sup> Badxi' Jesúsán, rëbaman:

—Bén cayaw loj pliajt ni cayaw gajcan, laaman yayü naj. <sup>24</sup> Walican, Bén guxhaal Dios naj guial sacaman zi'c rëb loj xtiidx Dios. Per ¡probza bén yayü laaman!, zagdxeli naj par laaman ad niutaman loj guidxliuj.

<sup>25</sup> Dxel Judas bén yayü Jesús, gunabdiidxaman rëbaman:

—Mextr, ¿wen najn ya?

Badxi' Jesúsán, rëbaman:

—Lüjn.

<sup>26</sup> La'tgaj cayaw reeman, cwa' Jesús guiadxtil, badëédaman quixtëe loj Dios. Dxel gula'man guiadxtil guin gudi'saman laan loj ree xbejnman, rëbgajman:

—Gol gudaw guiadxtil guie, laan naj da cuerpan.

<sup>27</sup> Dxel cwa'man tib cojp vin, chi gulox badëédaman quixtëe loj Dios, badëédaman cojp guin loj reeman, rëbgajman:

—Gol gu' gradi loj cojp guie. <sup>28</sup> Din laan naj da rejnan ni gaxhie'n chi guiëtan por zien ree bénguidxliuj. Din por da guialgüjtan guixal tijb nejz cüb xhienaag gap ree bejn perdon loj Dios por xtol reeman. <sup>29</sup> Abi' diidxiczi rnin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

*Rëb Jesús guial guiëb Bëd ad nünbeetaman laaman*

*(Mr. 14:26-31; Lc. 22:31-34; Jn.13 :36-38)*

<sup>30</sup> Chi gulox biil reeman tijb cant par Dios, dxel zë reeman guijc guia' Olivos. <sup>31</sup> Abi' rëb Jesús loj reeman:

—Gradi zabëëladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, dxel guire'ch ree xiil guin.”

<sup>32</sup> Per chi yabanan, yaløj naj ganeed ga gajn Galilea dxelri gui'tidi.

<sup>33</sup> Dxel rëb Bëd lojman:

—Majsi gra reeman cwëëladx lüj per naj ad yu't dxej gabëladxan lüj.

<sup>34</sup> Per rëb Jesús lojman:

—Diidxiczi rnin lojl, yan guxhin gajc chi gad guid cwidxa', mal rëbil choon volt guial ad nünbeetil naj.

<sup>35</sup> Abi' rëb Bëd lojman:

—Majsi guiëtnë'n lüj, per ad yu't dxej guiën guial ad nünbeetan lüj.

Abi' gra ree xbejn Jesús ziangajc rëb reeman.

*Gurejdx gunab Jesús Dios lod la Getsemaní*

*(Mr. 14:32-42; Lc. 22:39-46)*

<sup>36</sup> Chi bidxin Jesús con ree xbejnman tijb luar la Getsemaní, rëbaman loj reeman:

—Gol gurejsii guie, la'tgaj gan ni din gabledx ganaaban Dios.

<sup>37</sup> Dxel zinëman Bëd con grop ree xi'n Zebedeo, zianz guzu-loj cayunayaman abi' ad nixtri yu' luxdooman. <sup>38</sup> Zianz rëbaman loj reeman:

—Dád yu'naya luxdoon, rulüü ma gugüjt guialyu'naya guin naj. Gol baya'n guie ad gaayëjsidi.

<sup>39</sup> Dxel zë Jesús mazri delant abi' gurerulojman gurejdx gunabaman Dios, rëbaman:

—Dad, bal zile' yabëël naj loj guialzi ni gadëëdan, per ad gac zi'c rënan, gac zi'c rënl.

<sup>40</sup> Dxel baguiajman lod za' ree xbejnman, abi' baguiaaman naga'yëjs reeman, zianz rëbaman loj Bëd:

—¿Wen ni'qui tib hor ad bile't natie'ch xbacaalidi ya, din sunëdi naj? <sup>41</sup> Gol batie'ch xbacaalidi gol gurejdx gunab tëë Dios, chitëë güün xindxab lëjt gan, din rënquidi güüندی zi'c rayal, per xcuerpidi ad rtiëjbtan.

<sup>42</sup> Ni barojp volt wejman gurejdx gunabaman Dios, rëbaman:

—Dad, bal id zile' tëd gualzi ni naj gadëëdan, bal rüjn naguiejn gadëëdanan gacri zi'c rën.

<sup>43</sup> Chi badxinman lod za' ree xbejnman stijb, laa reeman naayëjs gual dád guidxa bacaal loj reeman. <sup>44</sup> Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree. <sup>45</sup> Chi badxinman lod za' ree xbejnman, rëbaman loj reeman:

—¿Sta naga'yëjsidi ya, cayziladx tëëdi? Guiáad Bén guxhaal Dios ma bidxin hor yayü reeman laaman loj ree bëndol. <sup>46</sup> Gol bixche, yo' ree, gol baguiaa laa bén yayü naj ma zëed gajxh.

### *Gunaaz reeman Jesús*

*(Mr. 14:43-50; Lc. 22:47-53; Jn. 18 :2-11)*

<sup>47</sup> Sta caneenë Jesús bén naj ree xbejnman, chi bidxin Judas bén naj gajc tijb xbejn Jesús. Bidxinnëman zien ree bejn, ca' reeman espad në yag. Guxhaal ree bixhioz rniabee ree bixhioz con ree xguxtis ree bén Israel laa reeman. <sup>48</sup> Abi' Judas bén bayü laaman mal rëbxgajman loj ree bén guin: “Bén gawan xid xhajg, laaman raguilidi, gol gunaazaman.” <sup>49</sup> Chi bidxin Judas bibigaman loj Jesús, dxel rëbaman:

—¡Xchan, Mextr!

Laa gudaw gajcaman xid xhajgaman.

<sup>50</sup> Abi' rëb Jesús lojman:

—Judas, been ni zidguieenl.

Dxel gubig ree bén guin, gunaaz reeman Jesús persi zinë reeman laaman.

<sup>51</sup> Per tijb ree bén za'në Jesús yagaj, gulëë xiespadaman dxel gutü'man guidiajg xmojs quijb bixhioz zojbloj. <sup>52</sup> Dxel rëb Jesús lojman:

—Bagu'chaaw xiespadil xluaran. Din bén rdil con espad, con espad rëjtaman. <sup>53</sup> ¿Wen, id ragbeel ya gual zajc gabedx ganaab da Dadan, abi' laa guixhiaal gajcaman por mil ree xianjlaman din gagnë reeman naj? <sup>54</sup> Per ¿xoza gac cumplid zi'c ca loj xtiidx Dios ni rëb gual rüjn naguiejn gac ree ni cayajc?

<sup>55</sup> Loj hor guin gajc rëb Jesús loj ree benzien guin:

—¿Chexc zeel zëëdidi con espad në con yag din guiniaazidi naj zi'c tijb xingubaan? Guixie guixie guzunë'n lëjt lën



yadooro' Jerusalén balün lëjt xtiidx Dios, abi' ad gunaaztidi naj. <sup>56</sup> Per gra ree ni guie cayajc din gac cumplid ni bacaa ree bën badëe xtiidx Dios loj ree bejn.

Loj hor guin gajc baxüün ree xbejn Jesús, guro'nladx reeman laaman.

*Za' Jesús loj ree guxtis Israel*

*(Mr. 14:53-65; Lc. 22:54-55, 63-71; Jn.18 :12-14, 19-24)*

<sup>57</sup> Bën gunaaz ree Jesús binë reeman laaman lidx Caifás, quijb bixhioz zojbloj, yagaj badxaag lasa' ree mextr rajc ley con ree xguxtis ree bën Israel. <sup>58</sup> Abi' Bëd zijt zijt nalaman Jesús, xt lule' lidx bixhioz guin. Dxel guyuman abi' gurejnëman bën rajp ree lidx bixhioz guin, din guguaaman xhie güünnë ree bën guin Jesús.

<sup>59</sup> Guiáad ree bixhioz rniabee ree bixhioz con gra ree guxtis guin raguuil reeman xhie gusquiee reeman din gutedia' reeman Jesús din nabee reeman guiëtaman. <sup>60</sup> Per ad radxejlt xhienaag gutedia' reeman laaman majsi zien ree bën basquiee. Dxel bibig zatio'p reeman, <sup>61</sup> rëb reeman:

—Bën guie rëb: “Zile' yase'nán xyadoo Dios abi' loj choon dxejzi yayünanan.”

<sup>62</sup> Dxel guzuli quijb bixhioz zojbloj guin, rëbaman loj Jesús:  
—¿Nid zadxi'lan ya? ¿Waliqui ni canee ree bën guin contr lüj ya?

<sup>63</sup> Per achet rëb Jesús. Dxel rëb bixhioz guin lojman:  
—Por Dios bën naban, rniabeen lüj guna diidxli. Guna bal lüjn naj Cristo, Xi'n Dios.

<sup>64</sup> Badxi' Jesúsán rëbaman:  
—Waliquil. Rni tëen lëjt, zuguaadi Bën guxhaal Dios zobjaman xladbee Dios bën rajp gualrniabee abi' zuguaa tëedi gui'taman loj zaj xanyabaa.

<sup>65</sup> Chi biguiejn bixhioz guin zian, gudixya' xabaman, rëbaman:

—Diosán canee guijdx bën guin. ¿Xhie mazri rüjn naguiejn yadiil ree testiw? Lëjt gajc ma biguiejn gual rnieeguijdxaman Dios. <sup>66</sup> Yan, ¿xhie nadi?

Badxi' ree bën guinan rëb reeman:  
—Rayal guiëtix.

<sup>67</sup> Dxel bacojp xhiejn reeman lojman, gudijn reeman laaman, yu' tëe reeman wëez ro'man, <sup>68</sup> rëb reeman lojman:

—Bal lüjn naj Cristo, guneeya' chu gudin lüj.

*Rëb Bëd ad nünbeetaman Jesús*

*(Mr. 14:66-72; Lc. 22:56-62; Jn.18 :15-18, 25-27)*

<sup>69</sup> La'tgaj zojb Bëd lule' lidx bixhioz guin, gubig tijb biin rüjn dxiin yagaj, rëbim lojman:

—Në lüj nal Jesús, bën Galilea.

<sup>70</sup> Per Béd gurexuuman, rëbaman niz loj gra reeman:

—Ad ragbeetan xhienin rnieel.

<sup>71</sup> Chi zëman niz ro' port baguiaa stijb biin rüjn dxiin yagaj laaman, abi' rëbim loj ree bën riga' yagaj:

—Në bën guin nal Jesús bën Nazaret.

<sup>72</sup> Per Béd gurexuuman stijb, xt baza'taman Dios, rëbaman:

—Ad nünbeetan bën guin.

<sup>73</sup> Dxel ad gojct xchej, gubig ree bën riga' yagaj loj Béd, rëb reeman lojman:

—Laa rguien gajc në lüj naj xbejn reeman, din zi'cgajc rniee reeman rnieel.

<sup>74</sup> Per Béd baza'taman Dios, rëbaman loj reeman:

—Dios gudëed naj casti bal rusquieen, per ad nünbeetan bën guin.

Hor guin gajc guridxa' tijb guïd. <sup>75</sup> Abi' basaaladxaman guial rëb Jesús lojman: “Chi gad guïd cwidxa', mal rëbil choon volt ad nünbeetil naj.” Dxel barii Béd yagaj abi' dád naya biinman.

## 27

### *Binë reeman Jesús loj Pilato*

(Mr. 15:1; Lc. 23:1-2; Jn. 18 :28-32)

<sup>1</sup> Chi bani luyuj, gra ree bixhioz rniabee ree bixhioz con ree guxtis Israel baya'n reeman diidx xhienaag güün reeman din guiët Jesús. <sup>2</sup> Dxel guxhii reeman laaman abi' binë reeman laaman loj gobernador Pilato.

### *Güjt Judas*

<sup>3</sup> Dxel Judas, bën bayü Jesús, chi baguiaaman guial ma naj guiët Jesús, gyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel, <sup>4</sup> rëbaman loj reeman:

—Ma benan dol guial banen tijb bën achet dol rajp.

Badxi' reeman laan rëb reeman:

—Xhieczi yaguieenan, ¡lüt gunaj!

<sup>5</sup> Abi' bazaal Judas milia guin lën yadooro' Jerusalén zianz bariiman wejman bigxhii yëjnman.

<sup>6</sup> Dxel bato'p ree bixhioz rniabee guin milia guin, abi' rëb reeman:

—Ad rayalt yadxe' ree milia guin lën lod ru gon, din con laan bio' bën guiët.

<sup>7</sup> Dxel be reeman diidx, abi' con milia guin guzii reeman xguidxliuj bën rüjn trast bajn ree, din gacan lod guiguie'ch ree benzit. <sup>8</sup> Zeel xt yan la guidxliuj guin Yuj Rejn. <sup>9</sup> Zian gojc cumplid ni gunee Jeremías, bën badëë xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb

ree b́en Israel lasajcaman, <sup>10</sup> abi' con milia guin guzii reeman  
 xguidxliuj b́en rŷjn trast bajn ree, zi'c gunabee Dios naj.”

*Rniabdiidx Pilato loj Jesús*

(Mr. 15:2-5; Lc. 23:3-5; Jn.18 :33-38)

<sup>11</sup> Dxel badxig reeman Jesús loj gobernador Pilato, abi'  
 gunabdiidxaman loj Jesús, rēbaman:

—¿Lŷjn naj xrey ree b́en Israel ya?

Badxi' Jesúsán, rēbaman:

—Najcan.

<sup>12</sup> Abi' chi cutedia' ree bixhioz rniabee ree bixhioz con ree  
 guxtis Israel laaman, achetzi radxi'man. <sup>13</sup> Dxel rēb Pilato  
 lojman:

—¿Nid riguiejnl gra ni canee reeman contr lŷj ya?

<sup>14</sup> Per Jesús ni'quí tijb diidx ad badxi'taman, zeel dád badxa  
 loj gobernador guin.

*Gunabee reeman guiēt Jesús*

(Mr. 15:6-20; Lc. 23:13-25; Jn.18 :38-19:16)

<sup>15</sup> Lēn ree dxej lanij, ruslaa gobernador Pilato tijb b́en yu'  
 ladxguiib b́en guiēb ree bénguiedx guin laa, zi'c naj xcostumbr  
 reeman. <sup>16</sup> Lēn ree dxejzii yu' Barrabás ladxguiib, tijb b́en  
 nŷnbee ree bejn niz ni niz guie. <sup>17</sup> Abi' chi badxaag lasa' gra  
 ree bejn, gunabdiidx Pilato loj reeman, rēbaman:

—¿Chu rēndi guslaan? ¿Barrabás ya, o Jesús, b́en rēb ree bejn  
 naj Cristo?

<sup>18</sup> Rēbaman zian gual gogbeeman ganaxzi gualnadēdlojn  
 zeel bayŷ reeman Jesús.

<sup>19</sup> La'tgaj zojb Pilato lod rŷjnman gualguxtis, bidxin xruson  
 lacheelaman, rēbaman lojman: “Adxhie gŷŷnnēl b́en guin  
 achet dol rajpaman, din dád nadxuudx gune'xchalan laaman  
 nuche.”

<sup>20</sup> Per bixhioz rniabee ree bixhioz con ree guxtis Israel,  
 badxe' reeman diidx gra ree bejn persi gunab reeman guslaa-  
 man Barrabás, guiáad Jesús guiētaman. <sup>21</sup> Gunabdiidx Pilato  
 loj reeman stijb, rēbaman:

—¿Chu loj grop reeman rēndi guslaan?

Badxi' reeman laan rēb reeman:

—Barrabás.

<sup>22</sup> Abi' rēb Pilato loj reeman:

—¿Xhieza gŷŷnnē'n Jesús, b́en rēb ree bejn naj Cristo?

Badxi' gra reeman laan rēb reeman:

—¡Bacaaman loj crŷjz!

<sup>23</sup> Abi' rēb Pilato loj reeman:

—¿Xhieza ni mal beenman?

Per laa reeman mazri rejs rbixdiaj reeman, rēb reeman:

—¡Bacaaman loj crŷjz!

<sup>24</sup> Chi baguiaa Pilato guial achet rile' güünman, al mazri naquie' cayüjn ree bën guin, dxel cwa'man nijs abi' banaaman delant loj gra reeman, rëbaman:

—Achet dol ra'pan guial guiët bën guie, xcwentidan.

<sup>25</sup> Badxi' gra ree bën guinan rëb reeman:

—iDu guijcan, në guijc du xi'nan cwiban guial guiëtaman!

<sup>26</sup> Dxel baslaa Pilato Barrabás, zianz gunabeeman gudijn reeman Jesús abi' bayüman laaman din gucaa reeman laaman loj crüjz.

<sup>27</sup> Zianz xsuldad ree gobernador guin binë reeman Jesús lën palas lod bado'p gra ree suldad, gadëd lod za'man. <sup>28</sup> Dxel gulëe reeman xabaman bascajcw reeman laaman tijb lajd xnia. <sup>29</sup> Abi' beenchaaw reeman tijb coron guiëjch badxe' reeman laan guijcaman, zianz бага's reeman tijb yag ladxaaman ladbee. Dxel bazuxib reeman lojman, ruze' reeman laaman, rëb reeman:

—iGuibanri xrey ree bën Israel!

<sup>30</sup> Abi' rucojp xhiejn reeman lojman, laagajc tëe yag ni ca'man rugaz reeman guijcaman. <sup>31</sup> Chi gulox baze' reeman laaman, dxel babëe reeman lajd xnia guin ladaman, bascajcw reeman xabaman, zianz zinë reeman laaman din gucaa reeman laaman loj crüjz.

*Cwa Jesús loj crüjz*

*(Mr. 15:21-32; Lc. 23:26-43; Jn. 19:17-27)*

<sup>32</sup> Chi zinë reeman Jesús, badxaagloj reeman tijb bën Cirene, laman Simón, abi' been reeman laaman naguiejn byaaman xcrüjz Jesús.

<sup>33</sup> Chi bidxin reeman tijb luar la Gólgota (rën guiëban Xluar Calaver), <sup>34</sup> ni badëed reeman vin, no'chan nijs nala da't guië' Jesús. Per chi beenman laan prueb, ad cwëjbtaman nië'man laan.

<sup>35</sup> Chi gulox bacaa reeman laaman loj crüjz, dxel gudxijt reeman suert guijc xabaman din yala' reeman laan. <sup>36</sup> Dxel gurej reeman yagaj din gap reeman laaman. <sup>37</sup> Abi' guijc crüjz guin bacaa reeman lejtr ni rëb, chexc zeel cwaman loj crüjz. Rëb lëjtr guin: “BEN GUIE NAJ JESÚS XREY REE BEN ISRAEL.”

<sup>38</sup> Në tio'p xin gubaan bacaa reeman loj crüjz, tijbix xladbee Jesús stijbix xladruvejsaman. <sup>39</sup> Abi' ree bën rdëd, rnieeguijdx reeman Jesús, runij guijc reeman, <sup>40</sup> rëbgaj reeman:

—Lüj rëb, nuse'nl yadooro' abi' loj choon dxejzi nayüjnlan, baslaa lüj gajc. Bal walil najl Xi'n Dios baguiajt loj crüjz guin.

<sup>41</sup> Ziangajc ree bixhioz rniabee ree bixhioz në ree mextr rajc ley con ree guxtis Israel, ruze' reeman Jesús, rëb reeman:

<sup>42</sup> —Baslaax ben ren ree, abi' ad rajct ruslaa laagajquix. Bal wali najx xrey ree bën Israel, yaguaajtix loj crüjz guin, din

yaliladx reex. <sup>43</sup> Rililadxix Dios. ¡Yan, guslaaza Dios laax, bal wali rënman laax, din rëbix: “Xi'n Dios najx”!

<sup>44</sup> Abi' nëgajc ree xingubaan ca cwë'man ruze' laaman.

### *Güjt Jesús*

(Mr. 15:33-41; Lc. 23:44-49; Jn. 19 :28-30)

<sup>45</sup> Dxel diisd garol dxej bicajy loj guidib guidxliuj, xt raca choon wadxe. <sup>46</sup> Loj horzii gurixdiajman rejs da't, rëbaman:

—Elí, Elí, ¿lama sabactani? —rën guiëban: Dios, Dios, ¿chexc zeel gulëladxil naj?

<sup>47</sup> Yu' ree bën za' yagaj, chi biguiejn reeman, rëb reeman:

—Laaman cabejdx Elías, bën badëë xtiidx Dios loj ree bejn.

<sup>48</sup> Laa baxüün gajc tijbaman bicajdxaman tijb xiil loj vinagr, abi' bacaaman laan loj tijb yag zianz badxigaman laan ro' Jesús din guië'man laan. <sup>49</sup> Per rëb los demazri reeman:

—Basa'nx, din yaguaa ree don zidgaslaa Elías laax ya.

<sup>50</sup> Zianz gurixdiaj Jesús rejs da't stijb, dxel güjtaman. <sup>51</sup> Loj hor zii goxya' lajd nal lën yadooro' Jerusalén gojcan tio'p lala', diisd guijc guin xt guia' guin goxya'. Abi' guxu, gula' tëë ree guiajro'. <sup>52</sup> Guiáad ree baa bixal reen, abi' zien ree bejn bën naj xbejn Dios, bën ma güjt ree baban. <sup>53</sup> Dxel chi baban Jesús, barii lën xbaa reeman, abi' guyu reeman Jerusalén, lod baguiaa zien ree bejn laa reeman.

<sup>54</sup> Dxel suldad rniabee ree suldad në gra ree suldad za'nëman yagaj canaj reeman Jesús, chi baguiaa reeman caxu në gra ni cayajc, dád bidxeb reeman abi' rëb reeman:

—Walican Xi'n Dios bën guin.

<sup>55</sup> Zien ree béngunaa guzanal Jesús diisd Galilea, bën been tëë ree laaman yudar, za' reeman zijt ruguiaa reeman ni cayajc. <sup>56</sup> Loj reeman no'ch María Magdalena, në Li xniaa Santiaaw con Xiëb nëtëë xniaa ree xi'ngaan Zebedeo.

### *Biguie'ch Jesús*

(Mr. 15:42-47; Lc. 23:50-56; Jn. 19 :38-42)

<sup>57</sup> Chi gure guiaal, bidxin tijb benrijcw laman Xiëb, bën Arimatea, në laaman binal Jesús. <sup>58</sup> Wejman loj Pilato, bignabaman xcuerp Jesús. Dxel gunabee Pilato bayü reeman cuerp guin lojman. <sup>59</sup> Abi' cwa'man cuerp guin batüübaman tijb lajd naya. <sup>60</sup> Dxel biquie'chaman laaman lën tijb baa cüb ni gudëenman par laagajcaman lën tijb guiaj. Zianz basiaawaman ro' baa guin con tijb guiajro', ziataman. <sup>61</sup> Abi' zojb María Magdalena con stijb bën la gajc Li, ro' baa guin.

*Rajp ree suldad ro' xbaa Jesús*

<sup>62</sup> Chi bareguiaal, dxej raziiladx ree bejn, wej ree bixhioz rniabee ree bixhioz nē ree bénfarisew, bigneenē reeman Pilato, <sup>63</sup> rēb reeman lojman:

—Dad, rasaaduladxan, chi ziz naban bén rusquiee ni, rēbaman guial chi gac choon dxej yabanman. <sup>64</sup> Zeel gunabee guiyaawdx'i'ch ro' baa guin xt chi gac choon dxej, chitēē gui't ree xbejnman guxin cwan reeman xcuerpaman. Abi' guiēb reeman loj ree bejn guial ma babanman. Abi' mazri gusquiee reeman bejn guial loj ni yaloj.

<sup>65</sup> Dxel rēb Pilato loj reeman:

—Laa ree suldad za' yagaj. Gol chinē reeman, gol basi-aawdx'i'ch ro' baa guin zi'c rēndi.

<sup>66</sup> Abi' zē reeman, dxel basiaawdx'i'ch reeman ro' baa guin. Zianz basa'n reeman suldad guin ree cayajp reeman laan.

## 28

### *Raban Jesús*

(Mr. 16:1-8; Lc. 24:1-12; Jn. 20 :1-10)

<sup>1</sup> Chi gudēd dxej raziiladx ree bejn, bareguiaal chidum-ingw, María Magdalena con stijb bén la gajc Li biquiaa reeman ro' baa guin. <sup>2</sup> Dxel bi't tijb xudoxh, guial biguiajt tijb xianjl Dios diizd xanyabaa, dxel bibig anjl guin ro' baa guin biquiedaman guiaj nayaaw ro'n, zianz gurejman guijcan. <sup>3</sup> Dád rliajman bacha' zi'c chi rē'p nijs, guiáad xabaman naquichbējn. <sup>4</sup> Chi baguiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj. <sup>5</sup> Dxel rēb anjl guin loj ree béngunaa guin:

—Ad rdxebidi, ragbeen cayguilidi Jesús bén cwa loj crūjz.

<sup>6</sup> Per achutri laaman guie, ma babanman zi'c naman. Gol guida nial din guguaadi lod gudixh reeman laaman. <sup>7</sup> Yan, gol baxüün gol bicojn ree xbejnman guial ma babanman, ma nedaman lojdi zēgajman Galilea, ni guguaadi laaman. Ni nezan naj ni rugojnan lējt.

<sup>8</sup> Dxel cari da't baza reeman ro' baa guin rdxeb reeman rabaa tēē reeman, ruxüün reeman zia reeman zicojn reeman xbejn Jesús. <sup>9</sup> La'tgaj zia reeman, balüüloj Jesús loj reeman, bagajpdiozaman laa reeman. Abi' bibig reeman lojman, bazuxib reeman, gudiidx reeman guia'man, <sup>10</sup> abi' rēbaman loj reeman:

—Ad rdxebidi. Gol chej, gol biguiedx loj ree da bejnan din che reeman Galilea, ni guguaa reeman naj.

### *Ni rēb ree suldad*

<sup>11</sup> La'tgaj zia ree béngunaa guin, nē tio'p choon ree suldad cayajp ro' baa guin zē luguiedx guin zicojn reeman bixhioz rniabee ree bixhioz gra ni goc. <sup>12</sup> Dxel wej ree bixhioz rniabee

guin bigneenë reeman guxtis Israel ree persi baya'n reeman diidx xhie güün reeman. Abi' dad zro' milia badëed reeman loj ree suldad guin, <sup>13</sup> rëb reeman:

—Con gol güjdx loj ree bejn: “Guxhin la'tgaj nadoodyëjsan, bi't ree xbejn Jesús abi' gulan reeman xcuerpaman.” <sup>14</sup> Abi' bal gagbee gobernador, dunujn yaneenë' laaman chitëe xhie güünnëman lëjt.

<sup>15</sup> Dxel cwa' ree suldad guin milia guin abi' been reeman zi'c rëb reeman. Laan naj diidx ni nare'ch loj ree bën Israel xt yan.

*Rxhiaal Jesús bën naj ree apóstoles*

*(Mr. 16:14-18; Lc. 24:36-49; Jn.20 :19-23)*

<sup>16</sup> Guidxiptib ree xi apóstoles Jesús, wej reeman Galilea, guiyc tijb guia' lod rëb Jesús che reeman. <sup>17</sup> Abi' chi baguiaa reeman Jesús, bazuxib reeman lojman, majsi yu' reeman ad bililadxza'ct. <sup>18</sup> Dxel bibig Jesús loj reeman, rëbaman:

—Dios ma banee gra guialrniabee din ganabeen xanyabaa në loj guidxliuj. <sup>19</sup> Zeel, gol chej guidib guidxliuj, gol biglüü ree bejn din gac reeman da bejnan. Gol baroobnijs reeman por dux Dad ree, por Xi'nman në por xSprijtaman, <sup>20</sup> gol balüü tëe reeman din guzoob reeman diidx gra ni ma rnin lëjt. Abi' naj gazunë' lëjt gradxejczy xt chi nit guidxliuj. Amén.

## **Xtiidxza'c Jesucrist ni bacaa San Marcw**

*Rzuloj Waj ruliüüman xtiidxza'c Jesucrist  
(Mt. 3:1-12; Lc. 3:1-9, 15-17; Jn.1 :19-28)*

<sup>1</sup> Ze guzuloj xtiidxza'c Jesucrist, Xi'n Dios.

<sup>2</sup> Guyu tijb bén badëë xtiidx Dios loj ree bejn brii lajman Isaías, bacaaman xtiidx Dios, rëbaman:

Naj rxhial tijb bén ned lojl,  
bén güünchaaw xnejzil.

<sup>3</sup> Rguien cha' tijb bén rbidxa' loj yujbidx, rëbaman:

“Gol beenchaaw xnejz dux Dad ree, gol guxhal tijb nejb nali.”

<sup>4</sup> Zian bi't Waj bén baroobnijs bejn ree, guzujman niz loj yujbidx, abi' rëbaman loj ree bejn guial rayal yayüjn xgab por xtol reeman, yayejc reeman con Dios din gac reeman perdon tiobnijs tëë reeman. <sup>5</sup> Gra ree bén zobj niz Judea, në ree bén Jerusalén brii reeman zicaagdiajg reeman ni rniee Waj, abi' rxhioobdol reeman. Zianz ruroobnijs Waj laa reeman loj guiw Jordán.

<sup>6</sup> Guidxlad camell gojcnë xabaman, abi' lënman bixii tijb cinch guid. Gudawaman bi'tsu con dxijn dajn. <sup>7</sup> Chi guneenëman bejn ree, rëbaman:

—Xichan zëed tijb bén mazri zobjloj guial lon, ni'qui xgurëchaman ad zajt gaxhiecan guial mazri zobjlojman guial lon. <sup>8</sup> Naj curoobnijs lëjt con nijs, per laaman guroobnijs lëjt con xSprijt Dios.

*Riobnijs Jesús*

*(Mt. 3:13-17; Lc. 3:21-22)*

<sup>9</sup> Lën ree dxejzii guza Jesús luguiedx Nazaret ni riga' niz Galilea, abi' baroobnijs Waj laaman loj guiw Jordán. <sup>10</sup> Chi bariiman loj nijs guin, laa baguiaa gajcaman bixal xanyabaa, zidguiajt xSprijt Dios zi'c tijb palom xt guijcaman. <sup>11</sup> Dxel biguien cha' bejn xanyabaa, rëbaman:

—Lüj naj da Xi'nan, rënan lüj rabaanë' tëën lüj.

*Been xindxab Jesús prueb*

*(Mt. 4:1-11; Lc. 4:1-13)*

<sup>12</sup> Dxel binë xSprijt Dios Jesús loj yujbidx. <sup>13</sup> Ni guzuman tiuu dxej tiuu guiaal, loj ree bedoxh. Abi' been xindxab laaman prueb chitëë nuzoobaman xtiidx Dios, guiáad ree xianjl Dios gunaj laaman.



*Rzuloj Jesús rulüüman bejn ree niz Galilea**(Mt. 4:12-17; Lc. 4:14-15)*

<sup>14</sup> Chi mal guyu Waj ladxguuib, wej Jesús niz Galilea bigneeman xtiidxza'c Dios, <sup>15</sup> rëbaman:

—Ma bidxin dxej zëed xguialrniabee Dios gajxh, zeel gol bayünj xgab por xtolidi, gol bililadx tëe xtiidxza'caman.

*Rbejdx Jesús tajp ree bén gac xbejnman**(Mt. 4:18-22; Lc.5:1-11)*

<sup>16</sup> La'tgaj caza Jesús ro'nijsdoo Galilea, baguiaaman Simón në bijchaman Andrejs, cuzaal xguijxh reeman lojnijs din guiniaaz reeman bëjl. <sup>17</sup> Abi' rëb Jesús loj reeman:

—Gol tanal naj din gulün lëjt xhienaag guto'pidi bejn par Dios, luar rniaazidi bëjl.

<sup>18</sup> Loj hor guin gajc basa'n guijxh rniaaznë reeman bëjl persi zinal reeman Jesús.

<sup>19</sup> Guzaman zatibda'n, dxel baguiaaman Jacob con Waj bén naj ree xi'n Zebedeo, yu' reeman loj barcw rayünjchaaw xguijxh reeman. <sup>20</sup> Dxel gurejdx Jesús laa reeman, abi' basa'n reeman Zebedeo loj barcw guin, bén naj xdad reeman con ree xmojsaman, guiáad laa reeman zinal reeman Jesús.

*Rabëe Jesús xinxab luxdoo tijb bejn**(Lc. 4:31-37)*

<sup>21</sup> Chi bidxin Jesús luguiedx Capernaum. Abi' dxej raziladx ree bejn guyuman lën xyadoo ree bén Israel culüüman laa reeman. <sup>22</sup> Dád radxa loj reeman zi'c rnieenëman laa reeman guial rulüüman laa reeman zi'c tijb bén rniabee, ad rulütaman zi'c rulüü ree mextr rajc ley. <sup>23</sup> Lën yadoo guin yu' tijb xin yu' xinxab luxdoo, dxejczy guridxa'x rëbix:

<sup>24</sup> —¿Xhie rënl con dunujn, Jesús bén Nazaret? ¿Zëëdil ya zidganijtil dunujn? Nünbeen lüj, ragbeen guial naya nalil najl xi'n Dios.

<sup>25</sup> Dxel gudilë Jesús xinxab guin, rëbaman:

—¡Bacwëez ro'l, barii luxdoo xin guin!

<sup>26</sup> Abi' been xinxab guin xin guin zi'c bén rëjtya', zianz gurixdiajx rejs, bariix luxdoo xin guin. <sup>27</sup> Graczi ree bén riga' dád badxaloj reeman, riniabdiidx loj lasa' reeman rëb reeman:

—¿Xhie ree nicüban rulüü bén guin? ¡Con guialrniabee ni rajpaman xt ree xinxab ruzoob xtiidxaman!

<sup>28</sup> Tibrajtzi bire'ch xtiidx Jesús guidib niz Galilea.

*Rayünj Jesús xnasuegr Bëd**(Mt. 8:14-15; Lc. 4:38-39)*

<sup>29</sup> Bariiz reeman lën yadoo guin, binë Jesús Jacob con Waj lidx Simón con Andrejs. <sup>30</sup> Abi' naga' xnasuegr Simón,

yu'man xliaadoxh. Dxel bagojn reeman Jesús guial ragxuman. <sup>31</sup> Abi' gubigaman cwè'man gunaazaman yaaman, gulesaman laaman. Loj hor guin gajc bariiman xliaa guin dxel guzuloj cudëëdaman ni gaw reeman.

*Rayüjn Jesús zien ree bénragxuu*

*(Mt. 8:16-17; Lc. 4:40-41)*

<sup>32</sup> Chi ma gurej guiaal, binë reeman bénragxuu ree lod za' Jesús, në ree bén yu' xindxab luxdoo. <sup>33</sup> Graczi ree bén luguiedx guin bido'p ruyu lod za' Jesús. <sup>34</sup> Bayüjn Jesús zien ree bén rajc ree gadxagayaa guialguijdx, babëë tëëman zien ree xindxab luxdoo ree bejn. Per ad rudëëtaman mod guiniee ree xindxab guin guial nünbee reex laaman.

*Rulüü Jesús xtiidx Dios niz Galilea*

*(Lc. 4: 42-44)*

<sup>35</sup> Bixche Jesús rsildoo, chi ziiz nacay, briiman luguiedx guin wejman tijb luar lod achutci bejn zojb, persi gurejdx gunabaman Dios. <sup>36</sup> Abi' Simón con ree xcompniaraman bigdiil reeman laaman. <sup>37</sup> Chi badxejl reeman laaman, rëb reeman lojman:

—Gra ree bejn cayguiil lüj.

<sup>38</sup> Per rëbaman loj reeman:

—Yo' ree guiedx ni riga' ree gajxh din gulün xtiidxza'c Dios, din par zian zialan.

<sup>39</sup> Abi' balüü Jesús xtiidx Dios lën ree xyadoo ree bén Israel guidib niz Galilea babëë tëëman xindxab luxdoo ree bejn.

*Rayüjn Jesús tijb bén rajc guialguijdx la lepra*

*(Mt. 8:1-4; Lc. 5:12-16)*

<sup>40</sup> Tijb bén rajc guialguijdx la lepra, gubigaman lod za' Jesús, bazuxibaman lojman rëbaman

—Bal guiënl, zajc yayüjnl naj.

<sup>41</sup> Baya Jesús laaman, baqui'man laaman, rëbgajman:

—Rënan, bayajc.

<sup>42</sup> Chi gunee Jesús zian, hor guin gajc bayajc bén guin abi' baya xcuerpaman. <sup>43</sup> Dxel bagu'nejz Jesús laaman, rëbaman lojman:

<sup>44</sup> —Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël loj Dios zi'c gunabee Moisejs, din gagbee gra ree bejn guial ma bayajquil.

<sup>45</sup> Per bén guin chi ziaman guzuloj catie'chaman diidx loj gra bejn xhienaag bayajcaman. Zeel ad bile't contzi niu Jesús luguiedx ree, ganax dajn ree raya'nman lod achut bejn zojb. Per gra lad rza ree bejn rej reeman lod za'man.

## 2

*Rayüjn Jesús xin nëjt xcuerp*  
(Mt. 9:1-8; Lc. 5:17-26)

<sup>1</sup> Chi goc tio'p choon dxej, badxin Jesús luguiedx Capernaum, abi' chi gogbee ree bejn, guial za'man yagaj, <sup>2</sup> tibrajtzi bido'p zien da't reeman lod za'man, xt ni'quid rdaant ro' port chu' reeman, guiáad laaman culüüman laa reeman xtiidx Dios. <sup>3</sup> Dxel bidxin tajp ree bejn yagaj lejn reeman tijb xin nëjt xcuerp. <sup>4</sup> Per ad gojct niunë reeman laax lod za' Jesús guial bén guixiuj guidxa. Abi' guxhal reeman guijc yu lod za'man persi gulet reeman xinragxuu guin guidib ni naga'x loj xt lod za' Jesús. <sup>5</sup> Chi baguiaa Jesús guial rliladx reeman laaman, rëbaman loj xinragxuu guin:

—Xi'n, ma benan xtolil perdon.

<sup>6</sup> Per yagaj zobj tio'p choon ree mextr rajc ley, been reeman xgab naladx reeman: <sup>7</sup> “¿Chexc zeel rníee xin guin zian? ¿Chexc zeel rüjnx mazri xin zobjloj guial loj Dios? Achutctzi rajc rüjn perdon dol tijbzi Dios.” <sup>8</sup> Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian? <sup>9</sup> ¿Conin ad nawëëgt gac, guial guiën loj bénragxuu guin ya: “Ma benan xtolil perdon”, o guiën ya: “Bixche, gules ni go'til loj, baguiaj”? <sup>10</sup> Per yan gulün lëjt guial Bén guxhaal Dios rajpaman guialrniabee loj guidxliuj guie din güünman dol ree perdon. Dxel rëbaman loj xinragxuu guin:

<sup>11</sup> —Lüj rnin, bixche, baca' ni go'til loj baguiaj lidxil.

<sup>12</sup> Loj hor guin gajc bayajc xin guin, bixchex baca' ni go'tix loj, bariix lënü guin guidib loj gra ree bén riga' yagaj. Abi' gra reeman badxaloj, ruza't reeman Dios zagdx, rëb reeman:

—Ni'qui tijb ad waguiaat ree zi'c naj ni cayguiaa ree yan.

*Rbejdx Jesús Leví*  
(Mt. 9:9-13; Lc. 5:27-32)

<sup>13</sup> Dxel wej Jesús ro'nijsdoo Galilea zatijb. Dád zien ree bejn rdxin lod za'man persi rulüüman laa reeman xtiidx Dios. <sup>14</sup> Chi cadëdaman, baguiaaman Leví xi'ngaan Alfeo, zobjbaman lod ruquixaman impuest. Dxel rëb Jesús lojman:

—Tanal naj.

Laa bisu gajc Leví binalaman laaman.

<sup>15</sup> Dxel chi cayaw Jesús lidx Leví con zien ree bén ruquix impuest në ree bén ad nabant zi'c rën Dios, gra reeman zobjbnë Jesús xan mex con ree xbejnman, guial zinal zien ree bejn laaman. <sup>16</sup> Chi baguiaa ree bénfarisew con ree mextr rajc ley guial cayawnë Jesús bén guin ree, rëb reeman loj ree xbejnman:

—¿Chexc zeel rawnë xmextridi bën ruquijx ree impuest në ree bëndol?

<sup>17</sup> Chi biguiejn Jesús ni rëb reeman, zeel rëbaman:

—Bénnadaan ree ad riaadxt reeman doctor, bënragxuu ree, laa reeman riaadx doctor. Ad zialtan par ree benza'c, zialan par ree bëndol din yayüjn reeman xgab por xtol reeman.

*Rniabdiidx reeman loj Jesús xcwent guialrba'n*

*(Mt. 9:14-17; Lc. 5:33-39)*

<sup>18</sup> Lën ree dxej zii guba'n ree xbejn Waj bën ruuroobnijs bejn ree, në ree bënfarisew. Abi' yu' ree bën gunabdiidx loj Jesús, rëb reeman:

—¿Chexc zeel ad rba'nt ree xbejnl zi'c rba'n ree xbejn Waj con ree bënfarisew?

<sup>19</sup> Badxi' Jesús laan rëbaman:

—Wen, ¿zajc guiba'n ree biooz za' loj guialruxhliaa ya la'tgaj za'në xin cuxhliaa guin laa reeman? La'tgaj za'nëx laa reeman ad zajct guiba'n reeman. <sup>20</sup> Per guidxin dxej chiquiedix loj reeman, abi' chi guidxin dxej guin dxel guiba'n reeman.

<sup>21</sup> Achut bën rata' lajd cüb loj lajd yojx, din zaxü'n lajd cüb guin abi' mazri quixya'n lajd yojx guin. <sup>22</sup> Ad rgu' tëet bejn vin cüb lën anfr yojx, din zaguixya' vin cüb guin anfr guin, abi' zi'c anfr guin zi'c vin guin zaxin reen. Zeel vin cüb rayal chu'n lën anfr cüb.

*Rgui'ch ree xbejn Jesús trigo dxej raziiladx ree bën Israel*

*(Mt. 12:1-8; Lc. 6:1-5)*

<sup>23</sup> Tijb dxej raziiladx ree bën Israel, cadëd Jesús con ree xbejnman loj guiniaa lod yu' trigo, abi' ree xbejnman guzuloj cagui'ch reeman trigo guin chi cadëd reeman. <sup>24</sup> Dxel rëb ree bënfarisew loj Jesús:

—¿Chexc zeel rüjn ree xbejnl ni ad rayalt gac dxej raziiladx ree bejn?

<sup>25</sup> Per rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman? <sup>26</sup> Tiamp ni goc Abiatar bixhioz rniabee gra ree bixhioz, guyu Davi lën xyadooro' Dios, gudawnë ree xcompniaraman guidahtil ma nagle' abi' bixhiosi ree rayal gaw laa reen.

<sup>27</sup> Rëb tëe Jesús:

—Dios badxe' dxej raziiladx bejn, per ad badxe'taman dxej guin par sagdiaj bejn. <sup>28</sup> Abi' naj, guial najn Bén guxhaal Dios, ra'pan guialrniabee dxej raziiladx ree bejn.

### 3

*Rayajc tijb xin naxü'n tibladyaa*

*(Mt. 12:9-14; Lc. 6:6-11)*

<sup>1</sup> Tíjb dxej guyu Jesús lèn tíjb yadoo. Lèn yadoo guin za' tíjb xin naxü'n tibladd yaa. <sup>2</sup> Abi' ree bèn yu' lèn yadoo guin rula'ch reeman Jesús din guidoon zayüjnman laax dxej raziiladx reeman ya, din gac gutedia' reeman Jesús. <sup>3</sup> Dxel rëb Jesús loj xin naxü'n yaa guin:

—Bisu, guzuj galay guin.

<sup>4</sup> Abi' rëbaman loj ree bèn guin:

—¿Xhie rayal güün bejn dxej raziiladx reeman? ¿Ni zagdxe ya o ni mal? ¿Guslaaman xguialnaban bejn ya o gugüjtaman laaman?

Per ad badxi't reeman xtiidxaman. <sup>5</sup> Dxel rdxe'ch Jesús ruguiaaman loj gra reeman, dád gyunaya luxdooman guial ad guyënt reeman naya lasa' reeman. Zianz rëbaman loj xin guin:

—Basli yaal.

Abi' basli yaax, loj hor guin gajc bayajcan. <sup>6</sup> Chi baza ree bénfarisew guin, zianz baya'n reeman diidx con ree xbejn Herodes din gugüjt reeman Jesús.

### *Zien ree bejn riga' ro'nijsdoo*

<sup>7</sup> Per Jesús zë gajcaman ro'nijsdoo Galilea con ree xbejnman. Zien da't ree bèn Galilea con ree bèn Judea binal laaman, <sup>8</sup> në ree bèn Jerusalén con ree bèn Idumea, në ree bèn zojb zatiblad ro' guiwro' Jordán, në ree bèn Tiro con ree bèn zojb niz Sidón. Dád zien ree bejn wej lod za' Jesús guial gogbee reeman ni rüjnman. <sup>9</sup> Zeel rëbaman loj ree xbejnman din guzujsin reeman tíjb barcw par laaman chitëë gutëë ree bèn guin laaman. <sup>10</sup> Guial ma bayüjnman zien ree bejn, zeel rbig gra ree bënragxuu lojman din guqui' reeman laaman. <sup>11</sup> Guiáad ree bèn yu' xindxab luxdoo chi ruguiaa reeman Jesús, ruzuxib reeman lojman, rbidxa' reeman rëb reeman:

—¡Lüj naj Xi'n Dios!

<sup>12</sup> Per gunabeeman xindxab guin ree chitëë guiëb reex chu laaman.

### *Rbe Jesús chiptio'p ree apóstoles*

*(Mt. 10:1-4; Lc. 6:12-16)*

<sup>13</sup> Dxel wë'p Jesús tíjb ruguia', abi' gurejdxaman gra ree bèn guleman. Zianz wej reeman, <sup>14</sup> loj gra reeman gulejman chiptio'p reeman din su reeman con laaman zianczi guixhiaal tëëman laa reeman chigtie'ch reeman xtiidx Dios. <sup>15</sup> Abi' badëëman guialrniabee din yayüjn reeman bënragxuu ree yabëë tëë reeman xindxab luxdoo ree bejn. <sup>16</sup> Bèn guie ree naj guidxiptio'p ree bèn gule Jesús: Simón bèn gulëëljman Bëd, <sup>17</sup> Jacob con Waj, bèn naj ree xi'n Zebedeo, gunee Jesús laa reeman Boanerges (rën guiëban, xi'n guziaaw); <sup>18</sup> në Andrejs, Felip, Tol, Matew, Tumajs con Jacob xi'n Alfeo, në Tadeo,

nētëe Simón bén bi'ch loj ree bén Cananistas, <sup>19</sup> con Judas Iscariote bén bayü Jesús.

*Rëb ree bejn ca' Jesús xguialrniabee Beelzebú*

*(Mt. 12:22-32; Lc. 11:14-23; 12:10)*

Chi gulox bacaabeeman laa reeman dxel badxinnëman laa reeman lod zojbaman. <sup>20</sup> Dád zien ree bejn bido'p yagaj stijb, xt ni'quid bile't niajw Jesús con ree xbejnman. <sup>21</sup> Chi gogbee ree xfamil Jesús, dxel bidxin reeman din yaca' reeman laaman guial rëb reeman guijcaman rajc.

<sup>22</sup> Abi' ree mextr rajc ley bén zëed ree Jerusalén rëb reeman:

—Bén guin rabëe xindxab luxdoo ree bejn por xguialrniabee Beelzebú, xin rniabee ree xindxab.

<sup>23</sup> Dxel gurejdx Jesús laa reeman, rëbaman:

—¿Xhienaag yabëe satanás lasa' xindxab gajquix? <sup>24</sup> Bal tijb nacion, ad nadxagt riga' ree gobiarn, zadijl reeman abi' ad zanuut xguialrniabee reeman, <sup>25</sup> ziangajc tijb famil, bal rdilnë lasa' reeman, nayob la' lasa' reeman. <sup>26</sup> Yan, ziangajc bal satanás su contr lasa' xindxabgajquix, zala' lasa' reex abi' wed yagaj lox xguialrniabee reex.

<sup>27</sup> 'Abi' achut zajc chu' lidx tijb béngojl da't din cwanman gra xieenman bal id zaxhii xgajman laaman. Zian zile' cwanman ni rajpaman.

<sup>28</sup> 'Naj rni lojdi guial yu' perdon par gra dol ni rüjn bejn, yu' tëe perdon par gra diidxguijdx ni rniee bejn chutëez. <sup>29</sup> Per bén guinieeguijdx xSprijt Dios, ad yu't dxej gacaman perdon, ma banijtaman loj Dios.

<sup>30</sup> Rëb Jesús zian guial rëb reeman yu' xsprijt xindxab luxdooman.

*Xniaa Jesús con ree bijchaman*

*(Mt. 12:46-50; Lc. 8:19-21)*

<sup>31</sup> Hor guin bidxin xniaa Jesús con ree bijchaman yu lod za'man, per ad bile't niu reeman zeel guxhaal reeman bén chignee laaman. <sup>32</sup> Dxel ree bén zojbnë laaman yagaj bagojn reeman laaman, rëb reeman:

—Laa xniaal con ree bijchil za' lule' guin cayguiil reeman lüj.

<sup>33</sup> Badxi' Jesús xtiidx reeman rëbaman:

—¿Chunin naj da nan con ree da bichan?

<sup>34</sup> Dxel baguiaaman bén zojb ree gadëd lod zojbaman, rëbaman:

—Bén guie ree naj da nan con ree da bichan, <sup>35</sup> din graczi ree bén rüjn ni rën Dios, laa reeman naj da bichan, da zanan në da nan.

## 4

*Xcwent bén rtie'ch bin*  
(Mt. 13:1-9; Lc. 8:4-8)

<sup>1</sup> Zatiĵb dxej culüü Jesús xtiidx Dios ro'nijsdoo Galilea. Abi' guial dád benzien bido'p lod za'man zeel wè'paman loj tiĵb barcw yu' lojnijs guin, abi' gurejman lojn guiáad ree bén guin riga' reeman ro' nijs guin. <sup>2</sup> Zien ree ni balüüman laa reeman, rüman laan loj reeman zi'c cwent, loj ree ni culüüman laa reeman rëbaman:

<sup>3</sup> —Gol bacaagdiajg ni ganin lojdi: Tiĵb bejn briiman bigtie'chaman bin loj xguiniaaman. <sup>4</sup> Chi catie'chaman laan, ta'nan biaĵb lunejz abi' bidxin ree biguijn gudaw reeb laan. <sup>5</sup> Zata'nan biaĵb loj ree guiaj lod ad riga't zien yuj, abi' cari gulejnan guial ad zient yuj riga'. <sup>6</sup> Per chi gunan gubijdx, bigoolan abi' guial ad zro't liujn yu', gubidxan. <sup>7</sup> Zata'nan biaĵb loj ree yaquiëjch. Abi' chi guni'san, banidloj yaquiëjch guin laan, abi' ad cwat ladan. <sup>8</sup> Per zata'nan biaĵb loj yuj za'c, abi' dád gojcan, yu' ni cwa gajlbichii, yu' ni cwa gayojn yu' tée ni cwa tibgayuu.

<sup>9</sup> Rëb tée Jesús loj reeman:

—Bén rën gucaagdiajg, gol bacaagdiajg.

*Chexc zeel ruliüü Jesús con cwent ree*  
(Mt. 13:10-17; Lc. 8:9-10)

<sup>10</sup> Chi ma baya'nnë Jesús zata'nz ree bejn con guidxiptio'p ree xbejnman, dxel gunabdiidx reeman xhie rën guiëb cwent guin. <sup>11</sup> Badxi'man laan rëbaman:

—Dios ma basa'n lëjt din chignia'di xhienaag naj xguialrniabeeman ni goc naguie'ch par lëjt, sa'n ree bén ad rililadxt xguialrniabeeman, con ganaxzi ree cwent naj guial gulün laa reeman. <sup>12</sup> Din majsi rani loj reeman, per ad zuguaat reeman, majsi riguejn reeman, per ad zignia't reeman chitëë yayejc reeman loj Dios abi' güünman perdon xtol reeman.

*Rusignia' Jesús xcwent bén rtie'ch bin*  
(Mt. 13:18-23; Lc. 8:11-15)

<sup>13</sup> Abi' rëb Jesús loj reeman:

—¿Nid rignia'di ya xhie rën guiëb cwent guin? ¿Xhieza naag chignia'di gra ni ganin lojdi? <sup>14</sup> Bén gutie'ch bin guin, laaman naj zi'c bén rtie'ch xtiidx Dios. <sup>15</sup> Bin biaĵb lunejz, naj zi'c ree bén riguejn xtiidx Dios, per rdxin gajc xindxab rquiedix laan luxdoo reeman. <sup>16</sup> Yu' ree bén naj zi'c bin biaĵb loj ree guiaj. Riguejn reeman xtiidx Dios abi' dád nix ru luxdoo reeman riguejn reeman laan. <sup>17</sup> Per guial naj reeman zi'c tiĵb cwaan ni ad yu't zro' liuj, chi rzagdiaj reeman o chi rzunal ree bejn laa reeman din güün reeman laa reeman ni mal por xtiidx Dios, laa rusa'n gajc reeman ni rililadx reeman.

<sup>18</sup> Yu' tēē ree bēn naj zi'c bin ni biajb loj yaquiējch. Riguiejn reeman xtiidx Dios, <sup>19</sup> per ru reeman xgab por ree ni riga' loj guidxliuj guie. Rusquiee guialnaza'c laa reeman rēn reeman gap reeman graløj. Abi' guial yu' xgab guin guijc reeman, zianz rucwēēz rucaagdiajg reeman xtiidx Dios, abi' achet sirv rŭjn ni rucaagdiajg reeman. <sup>20</sup> Per yu' ree bēn naj zi'c bin biajb loj yuj zagdx, ridxga' reeman laan con guidib luxdoo reeman. Rŭjn reeman zi'c rēn Dios, laa reeman naj zi'c ni cwa gajlbichii o ni cwa gayojn o ni cwa tibgayuu.

*Achet ni naguie'ch yu'*  
(Lc. 8:16-18)

<sup>21</sup> Abi' rēb Jesús loj reeman:

—Achut bēn ruze'c tijb guij par guta'cwaman laan con tijb caj, o gudxe'man laan xan loon, ruzujman laan ya din gusnin guidib. <sup>22</sup> Din achet ni naguie'ch yu' ni ad zaguiet ad yu' tēēt ni ralan ni ad zagbeet bejn. <sup>23</sup> Bēn rēn gucaagdiajg, gol bacaagdiajg.

<sup>24</sup> Rēb tēē Jesús:

—Gol been xgab por ree diidx ni caguiejndi. Bal ridxga'di xtiidx Dios, mazri gustēdguienman lējt. <sup>25</sup> Din bēn ma rignia' xtiidx Dios, chignia'man mazri. Per bēn ad rignia't, xt ta'n ni rignia'man ad zignia'traman.

*Xcwent guial rni's bin*

<sup>26</sup> Rēb tēē Jesús loj reeman:

—Xgualrniabee Dios naj zi'c rzajc bēn rxübin loj xguiniaaman. <sup>27</sup> Din majsi naga'yējsaman o naga'naaman, majsi radxe o guiaal ya, rliejn bin guin abi' rni'san, ni'quid ragbeetaman xhienaag rajcan. <sup>28</sup> Din yuj guin gajc rusni's laan, yaloj rliejnan najn tijb gui'xhdoo, dxel ririin dojn, zianz rtia ladan. <sup>29</sup> Chi ma gojc reen dxel raru' reen guial ma bidxin tiamp yado'p reen.

*Xcwent xhaj moxtajs*

(Mt. 13:31-32; Lc. 13:18-19)

<sup>30</sup> Rēb tēē Jesús:

—¿Xhienaag ganin naj xgualrniabee Dios, o xhienaag gŭn diidx lojdi din chignia'di xhienaag naj xgualrniabeeman? <sup>31</sup> Rnin lojdi guial xgualrniabee Dios naj zi'c naj xhaj moxtajs. Chi rxübin reeman laan. Laan naj ni mazri ni dobēz loj gra ree bin yu' loj guidxliuj. <sup>32</sup> Per chi ma guxübin reeman laan, rni'san rajcan mazri naroo loj gra ree cwaan, xt rajc rŭjn gxuixbitia's ree biguijn xidxan.

*Baliüü Jesús con ganax cwent*  
(Mt. 13:34-35)



<sup>33</sup> Balüü Jesús laa reeman xtiidx Dios con ganaxczi cwent zi'c naj ree ni ma beman, xt lodzi bignia' reeman. <sup>34</sup> Ad rulüütaman laa reeman zezi, bal id zulüüman con cwent. Per chi ma za'man con ree xbejnman dxel rusignia'man laa reeman zagdx xhie rën guiëb ree ni rëbaman.

*Racwëëz Jesús bidoxh*

(Mt. 8:23-27; Lc. 8:22-25)

<sup>35</sup> Dxej zii, chi gure guiaal, rëb Jesús loj ree xbejnman:

—Yo' ree zatiblad ro' nijs guin.

<sup>36</sup> Dxel basa'n reeman bën riga' ree yagaj, wë'p reeman loj barcw ni yu' Jesús zinë reeman laaman con ree barcw ren.

<sup>37</sup> Dxel brii bidoxh loj nijs guin, xt guzuloj cadxa nijs loj barcw guin. <sup>38</sup> Per Jesús naga'yëjsaman loj barcw guin tijb luar naj xijchan, nucuugaman tijb almoad. Dxel bacwëën reeman laaman rëb reeman:

—¡Mextr! ¿Nid yu'! xgab ya? ¡Ma cayzëëb ree xan nijs!

<sup>39</sup> Abi' bixche Jesús, bacwëëzaman bidoxh guin rëb tëëman loj nijs guin:

—¡Bacwëëz, bayajcdxe!

Dxel bayajcdxe bi guin con nijs guin. <sup>40</sup> Zianz rëb Jesús loj reeman:

—¿Chexc zeel rdxebidi? ¿Gadzidi chililadx naj ya?

<sup>41</sup> Per laa reeman dád bidxeb reeman abi' rniabdiidx loj lasa' reeman:

—¿Chu bën guin zeel xt bi con nijs ruzoob xtiidxaman?

## 5

*Rayüjn Jesús tijb xin yu' xindxab luxdoo*

(Mt. 8:28-34; Lc. 8:26-39)

<sup>1</sup> Chi badxin Jesús con ree xbejnman zatiblad ro' nijsdoo guin, xdajn ree bën Gadara, <sup>2</sup> baguiajtzi Jesús loj barcw guin, tijb xin yu' xindxab luxdoo bigchaaglojx Jesús. Bariix ro' ree baa, <sup>3</sup> guial nabanx ni. Achutczi rajc rixhii laax ni'qui con caden. <sup>4</sup> Zien volt ma guxhii reeman yaax në guia'x con caden, per rüjngajquix gan rurooxix laan. Achut rüjn laax gan. <sup>5</sup> Dxejz guiaal rizax niz dajn con lad ree baa, rbixdiajx rguilguijdx laagajquix con guiaj. <sup>6</sup> Zijtri baguiaax Jesús, baxüünx bigchaaglojx laaman abi' bazuxibix lojman. <sup>7</sup> Zianz guneex rejs rëbix:

—¿Xhie rënl con naj Jesús, Xi'n Dios yu' xanyabaa? Rniaaban lojl ad gusagzil naj.

<sup>8</sup> Rëbix zian, guial cayëb Jesús lojx:

—¡Xindxab, barii luxdoo xin guin!

<sup>9</sup> Dxel gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan din zien nayajcan.

<sup>10</sup> Abi' rëbix lojman chitëë guixhiaalaman xindxab guin ree lood ren.

<sup>11</sup> Abi' gajxh yagaj riga' zien ree cüch cayaw reeb. <sup>12</sup> Zianz rëb ree xindxab guin loj Jesús:

—Guxhaal dunujn lod za' ree cüch guin din yadxu'n lën reeb.

<sup>13</sup> Dxel cwëjb Jesús barii ree xindxab guin luxdoo xin guin persi bayu reex lën ree cüch guin. Cost tio'p mil naj reeb. Dxel guzuloj cuxüün reeb, zianz bitidya' reeb ro' bala' xt lojnijs, lod gu' reeb nijs zianz güjt reeb. <sup>14</sup> Guiáad ree bën cayajp laa reeb, baxüün reeman bicojn reeman luguiedx në ree dajn abi' zien ree bejn wej biquiaa ni goc. <sup>15</sup> Chi bidxin reeman lod za' Jesús, baguiaa reeman xin barii xindxab guin ree luxdoo, zobjix najcw xabix, ma badëdguienx. Abi' bidxeb reeman. <sup>16</sup> Guiáad ree bën baguiaa gra ni goc con xin guin, në con ree cüch guin, be reeman diidx loj ree bën bidxin. <sup>17</sup> Dxel guzuloj rëb reeman loj Jesús din yazaman niz ladx reeman.

<sup>18</sup> Chi bayu Jesús loj barcw guin, naguiejn rüjn xin barii xindxab guin ree luxdoo din chinalix laaman. <sup>19</sup> Per ad cwëjbt Jesús, rëbaman:

—Baguij lidxil, bignaj xfamilil, biguie diidx loj reeman gra ni ma been Dios por lüj, xhie tëë naag bayaman lüj.

<sup>20</sup> Dxel ziax, guzuloj rëbix loj ree bën zobj niz Decápolis gra ni been Dios por laax, abi' graczi reeman badxaloj.

*Rayajc xi'n Jairo në béngunaa bagaal xab Jesús*  
(Mt. 9:18-26; Lc. 8:40-56)

<sup>21</sup> Chi badxin Jesús loj barcw stiblad ro' nijs guin, dád zien ree bejn bido'p, persi ro'zi nijs guin baya'nman. <sup>22</sup> Dxel bidxin tijb bën rniabee lën tijb xyadoo ree bën Israel, laman Jairo. Chi baguiaaman Jesús, bazuxibaman lojman, <sup>23</sup> abi' guzajcaman laaman liaadx, rëbaman:

—Ma cayëjt da xi'nan. Yo'sii din gudxiib yaal guijquim din yayajquim din guibanm.

<sup>24</sup> Zinët Jesús bën guin, dád zien bejn zinal laaman xt rixa't reeman laaman. <sup>25</sup> Loj graczi reeman no'ch tijb béngunaa, ma gojc chiptio'p ijz ragxuuman ryajbaman rejn. <sup>26</sup> Dád ma guzagdiajman, ma banijt graczi ni rajpaman guial wejman loj ree doctor, per ad bayajctaman, aal mazri zro' rajcaman. <sup>27</sup> Chi biguiejnman gra ni rüjn Jesús, gudëdaman lad ree bën guin, gubigaman niz xijchaman dxel bagaalaman xabaman. <sup>28</sup> Guial gunaladxaman: “Gugalzan xabaman, ma bayajc gajcan.” <sup>29</sup> Loj hor zii gajc gulëjz biajbaman rejn, abi' gogbeeman ma bayajcaman. <sup>30</sup> Laa gogbee gajc Jesús guial yu' chu ma

bayajc por xgualrniabeeman, abi' badxi' lojman loj ree bén guin dxel gunabdiidxaman, rëbaman:

—¿Chu baqui' da xaban?

<sup>31</sup> Abi' rëb ree xbejnman lojman:

—Awa ruguiaal xt rixa't reeman lüj guiáad lüj rniabdiidxil chu baqui' xabil. <sup>32</sup> Per Jesús ruguiaaman gra lad din guguaaman chu baqui' laaman.

<sup>33</sup> Abi' guidib rnij béngunaa guin guial rdxebaman, guial gogbeeman ma bayajcaman, bigzuxibaman loj Jesús, beman diidxli ni beenman. <sup>34</sup> Dxel rëb Jesús lojman:

—Xi'n, guial bililadxil naj zeel ma bayajquil. Baguiaj zagdx. Ma bayajquil guialguijdx ni goquil.

<sup>35</sup> Sta canee Jesús zian, chi bidxin ree bén guza lidx Jairo, rëb reeman loj Jairo:

—Ma güjt xi'n! Ad ruslenril mextr guin mazri.

<sup>36</sup> Per chi biguiejn Jesús ni rëb reeman, rëbaman loj Jairo:

—Ad rdxebil, bililadxzi naj.

<sup>37</sup> Ad cwëjbt Jesús ninal gra ree bén riga' laaman, Bëdzi, con Jacob, con Waj bijch Jacob. <sup>38</sup> Chi bidxin reeman lidxaman, baguiaa Jesús cayajc naquie' guial roon rbixdiaj reeman.

<sup>39</sup> Dxel guyuman lënü abi' rëbaman loj reeman:

—¿Chexc zeel roon rbixdiajdi? Ad güjttim, naga'yëjsim.

<sup>40</sup> Per baze' reeman laaman. Dxel gunabeeman barij gra reeman, zianz binëman xdadim con xniaam con ree bén zinëman, lod naga' bindo guin. <sup>41</sup> Dxel gunaazaman yaam rëbaman:

—Talita, cumi —Rën guiëban: Lüj rnin, bindoo, bixche.

<sup>42</sup> Loj hor ziigajc bixchem guzuloj cazam. Yu'm chiptio'p ijz. Abi' dád badxa loj ree bén riga'. <sup>43</sup> Per gunabee Jesús laa reeman chitëe chu loj guiëb reeman ni goc, gunabee tëëman gudëed reeman ni gawim.

## 6

### *Radxin Jesús Nazaret*

(Mt. 13:53-58; Lc. 4:16-30)

<sup>1</sup> Baza Jesús yagaj, badxin ladxaman con ree xbejnman.

<sup>2</sup> Chi bidxin dxej raziiladx ree bejn, guzuloj culüüman bejn ree lën yadoo. Abi' gra ree bén cucaagdiajg dád badxa loj reeman ni rnieeman, abi' rëb reeman:

—¿Ban basiid bén guin gra ni rnieeman? ¿Ban gulëëman guialrignia' guin abi' chu badëë guialrniabee zeel rüjnman milagr guin ree?

<sup>3</sup> ¿Nid laaman naj bén carpinter ya, xi'n Li abi' ree bijchaman naj Jacob, Xiëb, Judas, në Simón? Guiáad ree bizanman zobjb luguiedx guie.

Abi' ad bidxga't reeman Jesús. <sup>4</sup>Per rëbaman loj reeman:

—Guidibczi rajp reeman respejt tijb bén rudëe xtiidx Dios loj ree bejn. Per ladxaman achut rajp laaman respejt, ni'qui lidxaman, ni'qui ree xfamilaman ad rajpt laaman respejt.

<sup>5</sup> Ad bile't nüjn Jesús zien ree milagr yagaj. Bëlzi ree bénragxuu bayüjnman, badxiib yaaman guijs reeman. <sup>6</sup> Dád badxalojman guial ad bililadxt reeman laaman. Dxel zëman guiedx naj ree gajxh, ziglüüman bejn ree.

*Rxhiaal Jesús guidixptio'p ree xbejnman chigliüü reeman xtiidx Dios*

*(Mt. 10:5-15; Lc. 9:1-6)*

<sup>7</sup> Dxel gurejdx Jesús guidixptio'p ree xbejnman, abi' guxhaalaman tio'p gaj reeman. Badëëman guialrniabee loj reeman din yabëë reeman xindxab ree luxdoo ree bejn. <sup>8</sup> Dxel gunabeeman din achetczi chinë reeman par runejz, ni'qui guijs, ni'qui guialraw, ni'qui milia, tijbzi yagriadx reeman, <sup>9</sup> con xgurëch reeman, con tijbzi lajd najcw reeman. <sup>10</sup> Dxel rëbaman loj reeman:

—Yu lod guidxindi, tijbzi yagaj yaya'ndi xt guidxin dxej yazadi luguiedx guin. <sup>11</sup> Bal yu' guiedx lod ad rënt reeman lëjt o ad rënt reeman gucaagdiajg reeman ni rnieedi, gol barii yagaj, gol gudxijp guxyuj guia'di zi'c sen guial ad rënt reeman guzoob reeman diidx. Din naj rni lojdi, guial dxej ni yadëëd ree bejn cwent loj Dios mazri casti narooob yayal reeman guial loj ree bén Sodoma në Gomorra.

<sup>12</sup> Zianz brii reeman zigüiedx reeman loj ree bejn guial rayal yayüjn reeman xgab por xtol reeman. <sup>13</sup> Abi' rabëë reeman zien ree xindxab luxdoo ree bejn, zien tëë ree bénragxuu gudëëb reeman sejt, abi' bayüjn reeman laa reeman.

*Güjt Waj bén baroobnijs bejn ree*

*(Mt. 14:1-12; Lc. 9:7-9)*

<sup>14</sup> Chi biguiejn rey Herodes ni rüjn Jesús guial ruza't ree bejn laaman guidibczi, rëb reeman:

—Waj, bén baroobnijs bejn ree ma baban, zeel rajpaman guialrniabee rüjnman milagr ree.

<sup>15</sup> Per yu' reeman rëb:

—Elíasan, bén rudëë xtiidx Dios loj ree bejn.

Yu'za reeman rëb:

—Tijb bén rudëë xtiidx Dios loj ree bejnan lasa' ree bén gocli.

<sup>16</sup> Chi biguiejn Herodes rëb reeman zian, rëbaman:

—Wajn, xin gunabeen biru' yëjn, laaxan ma baban yan.

<sup>17</sup> Rëb Herodes guin zian din laagajcaman gunabee gunaaz reeman Waj, abi' badxe'man laaman ladxguib por Herodías.

Herodías naj xbéngunaa Felip bijch Herodes. Per Herodes cwa'man Herodías. <sup>18</sup> Abi' guial rëb Waj loj Herodes:

—Ad laat tia' xbéngunaa bijchil.

<sup>19</sup> Zeel bidxe'ch Herodías Waj, guyënman nugÿjtaman laaman. Per ad riletan, <sup>20</sup> din rdxeb Herodes guial ragbeeman rÿjn Waj ni rën Dios, rÿjn tÿëman zi'c rayal, zeel ad cwëjbtaman xhie nÿjnnë Herodías Waj. Majsi ad ragbeet Herodes xhie güünman por ni rëb Waj lojman, per ruladxaman gucaagdi-ajgaman ni rnieeman.

<sup>21</sup> Per bidxin dxej been Herodías ni rënman. Chi baza' Herodes ijz, abi' beenman lanij, badxe'man tijb guialraw par bën rniabee ree në par ree bën rniabee ree suldad nëtëë ree bën zojbloj niz Galilea. <sup>22</sup> Dxel guyu xi'n Herodías lod cayajc lanij guin zianz baya'm. Abi' Herodes con ree xbioozaman dád bayuladx reeman zi'c baya'm. Zeel rëb rey guin lojman:

—Gunab ni rëntzil, naj gune laan.

<sup>23</sup> Xt badëë xtiidxaman gudëëman ni guiniabtzim, majsi garol ni rajpaman. <sup>24</sup> Dxel bariim bignabdiidx loj xniam, rëbim:

—¿Xhie ganaaban?

Badxi'man laan rëbaman:

—Gunab guijc Waj bën ruroobnijs bejn ree.

<sup>25</sup> Laa bayugajquim lod za' rey Herodes, rëbim lojman:

—Yan gajc rënan guneel guijc Waj, bën ruroobnijs bejn ree, guneelan loj tijb pliajt.

<sup>26</sup> Dád guyu naya Herodes, per mal badëëd xtiidxaman guidib loj ree bën riga', zeel ad bile't nibexuuman nudëëman ni gunabim. <sup>27</sup> Dxel gunabee Herodes tijb suldad din chica'x guijc Waj. <sup>28</sup> Zianz wej suldad guin lën ladxguiib guin, gutü'x guijc Waj badxe'xan loj pliajt binëxan lojman. Dxel bayü loj xniamin.

<sup>29</sup> Chi gogbee ree xbejn Waj guial ma güjtaman, baca' reeman xcuerpaman persi biquie'ch reeman laaman.

*Rayaan Jesús gaay mil bejn*

(Mt. 14:13-21; Lc. 9:10-17; Jn. 6:1-14)

<sup>30</sup> Chi bayejc ree xi apóstoles Jesús, be reeman diidx lojman gra ni been reeman në ni balüü reeman. <sup>31</sup> Dxel rëb Jesús loj reeman:

—Gol guda, yo' dunujz ree niz lod achut bejn zojb din yaziiladx ree ta'n.

Rëbaman zian guial dád zien ree bën zia zien tÿë ree bën zëëd, xt ni'qui guial gaw reeman ad riletan.

<sup>32</sup> Dxel Jesús con ree bën naj ree apóstoles zë reeman loj barcw tijb luar lod achut zojb. <sup>33</sup> Per dád zien ree bejn baguiaa guial zë reeman, abi' bayünbee reeman laa reeman zeel zien

ree bejn brii luguiedx guin ree ruxüün reeman, abi' yalojl laa reeman bidxin lod zë Jesús con ree xbejnman.

<sup>34</sup> Chi baguiajt Jesús loj barcw guin, baguiaaman bén guix-  
iuj riga' yagaj, abi' bayaman laa reeman guial za' reeman zi'c  
xiil achut rajp. Dxel guzuloj balüüman laa reeman, zien ree ni  
balüüman laa reeman. <sup>35</sup> Chi ma gudxe, gubig ree xbejnman,  
rëb reeman lojman:

—Ma gudxe yan, abi' achut bejn zojb niz guie. <sup>36</sup> Gūjdx loj  
ree bén guin din che reeman ranch ree në ree guiedx ni riga'  
gajxh chisii xhienin gaw reeman.

<sup>37</sup> Per rëb Jesús loj reeman:

—Lëjt gol badëed ni gaw reeman.

Dxel rëb reeman lojman:

—Per zro' da't milia ryaadx din yo' ni gaw ree bén guin, zi'ct  
ni rüjn bejn gan loj tio'p gayuu dxej.

<sup>38</sup> Abi' rëb Jesús loj reeman:

—¿Bël guiadxtil ca'di? Gol baguiaa don.

Chi baguiaa reeman, dxel rëb reeman:

—Gaay guiadxtil con zatio'p bëjl.

<sup>39</sup> Dxel gunabeeman din cwe tibcwaa gaj reeman loj  
guixya'. <sup>40</sup> Zianz gurej reeman zian, yu' lod gure tibgayuu  
reeman, yu' lod gure tü'pchii reeman. <sup>41</sup> Abi' cwa' Jesús  
guigaay guiadxtil guin con grop bëjl guin. Dxel gules lojman  
xanyabaa, badëeman quixtëe loj Dios, gula'man guiadxtil  
guin badëeman loj ree xbejnman persi gudi's reeman laan  
loj ree bén riga', gudi's tëeman grop bëjl guin loj gra ree-  
man. <sup>42</sup> Graczi reeman gudaw xt bigdxinladx reeman, <sup>43</sup> abi'  
staczi bacha reeman chiptio'p dxüm guiadxtil laay con bëjl ni  
baya'n. <sup>44</sup> Loj ree bén gudaw no'ch cost gaay mil xinguaaw.

### *Rza Jesús loj nijs*

*(Mt. 14:22-27; Jn. 6:16-21)*

<sup>45</sup> Dxel gunabee Jesús guyu ree xbejnman loj barcw din  
tëdgaj reeman stiblad ro' nijs par guidxin reeman Betsaida,  
la'tgaj cuzaadiidxnëman benzien guin ree. <sup>46</sup> Chi gulox  
bazaadiidxnëman laa reeman, wejman guiic tijb guia', persi  
gurejdx gunabaman Dios. <sup>47</sup> Chi ma cabej guiaal, ma yu'  
barcw guin galay nijs guiáad Jesús baya'n xtijbzaman guiic  
guia' guin. <sup>48</sup> Dxel baguiaaman dád cazagdiaj ree xbejnman  
cusa reeman barcw guin guial rliaj bi niz loj barcw guin.  
Abi' chi ma cayreguiaal zibig Jesús loj reeman cazaman loj  
nijs guin, beenman zi'c bén tédnejz. <sup>49</sup> Chi baguiaa reeman  
cazaman loj nijs guin gunaladx reeman sprijt malan, abi'  
gurixdiaj reeman. <sup>50</sup> Dád cadxeb reeman por ni cuguaiaa  
reeman. Per guneenë Jesús laa reeman rëbaman:

—¡Gol bagu' luxdoodi, ad bal rdxebidi, najn!

<sup>51</sup> Dxel guyuman loj barcw guin, zianz gulëjz bi guin. Guiáad laa reeman dád badxa loj reeman, <sup>52</sup> din nayaaw xquiar-guiejn reeman, abi' ad bignia't reeman milagr ni beenman con guiadxtil guin ree.

*Rayüjn Jesús bénragxuu ree Genesaret*  
(Mt. 14:34-36)

<sup>53</sup> Chi ma gudëd reeman lojnijs guin bidxin reeman xdajn ree bén Genesaret, yagaj guxhii reeman barcw guin ro' nijs. <sup>54</sup> Naabzi baguiajt reeman loj barcw guin, laa bayünbee gajc ree bejn Jesús. <sup>55</sup> Abi' gutie'ch reeman diidx guidib niz yagaj. Dxel guzuloj zinë ree bejn bénragxuu ree lod riguiejntzi reeman za' Jesús. <sup>56</sup> Bantëez zëman, majsi guiedx narooob o guiedx dobëz o ranch ree, rguijxh reeman bénragxuu guin ree niz lod tëdaman. Dxel rzajc reeman laaman liaadx din tiëbaman gugaal reeman majsi guia'z xabaman. Abi' graczi ree bén bagaal xabaman bayajc.

## 7

*Ni rüjn persi rüjn bejn dol*  
(Mt. 15:1-20)

<sup>1</sup> Tijb dxej, tio'p choon ree bénfarisew con ree mextr rajc ley, bén guza ree Jerusalén, bibig reeman loj Jesús. <sup>2</sup> Abi' chi baguiaa reeman guial yu' ree xbejn Jesús cayaw, ad banaat reeman zi'c naj costumbr. Dxel caneeguijdx reeman laa reeman. <sup>3</sup> (Din bénfarisew në gra ree bén Israel zinaldxi'ch reeman xcostumbr xbéngulal reeman guial ad zajct gaw reeman bal id reeman gunaa zi'c naj costumbr guin. <sup>4</sup> Në chi raza reeman luguia', ad rawt reeman bal id zunaa reeman zi'c naj costumbr guin. Dád zien ni zinal reeman güün reeman zi'c xhienaag quiib reeman re, con vajs, con ree trast guuib, në xloon reeman riguib reeman.) <sup>5</sup> Zeel bénfarisew ree con ree mextr guin, gunabdiidx reeman loj Jesús, rëb reeman:

—¿Chexc zeel ad runaat ree xbejnl zi'c naj xcostumbr dux béngulal ree? ¿Chexc zeel raw reeman zianzi?

<sup>6</sup> Dxel rëb Jesús loj reeman:

—¡Bén rusquiee!, waliqui ni gunee Isaías por lëjt, bén badëë xtiidx Dios loj ree bejn, chi bacaaman:

Bén guie ree, rëbzi reeman guial rën da't reeman naj, per ad rënt reeman naj con guidib luxdoo reeman.

<sup>7</sup> Xlia'czi rën da't reeman naj,

abi' rulüü reeman bejn ree ganaxzi ni rbëëguijc ree bénguidxliuj.

<sup>8</sup> Yan, rusa'ndi xtiidx Dios tiblad persi zinalidi xcostumbr ree bénguidxliuj.

<sup>9</sup> Rëb tëë Jesús loj reeman:

—Par chitëe nit xcostumbridi zeel rusa'ndi xtiidx Dios tibladi. <sup>10</sup> Rëb Moisejs: “Gojp respejt xdadil con xniaal”, abi’ “Bén guzaal diidxmal guijc xdad o xniaa, rayal guiëtaman.” <sup>11</sup> Per lëjt rëbidi guial zile' guiëb bejn loj xDadaman o xniaaman: “Ad zajct gūnan lūj yudar, din gra ni ra'pan naj Corbán” (Corbán rën guiëb gran naj par Dios). <sup>12</sup> Rëbidi, bén guiëb zian, ad zile'tri gūn xdad xniaaman yudar. <sup>13</sup> Abi' rbëeladixidi xtiidx Dios persi zinal xcostumbridi ni rulüü lasa'di, në zien ree ni ren rüjndi lasa' ree ni guin.

<sup>14</sup> Dxel gurejdx Jesús bén zien guin ree, rëbaman:

—Gol bacaagdiajg gradi gol bignia' tēe ni ganin: <sup>15</sup> Ad ni rawt bejn rüjn persi rüjnman dol. Ni ririi ro'man në ni rüjnman, laan rüjn persi rüjnman dol. <sup>16</sup> ¡Bén rën gucaagdiajg, gol bacaagdiajg!

<sup>17</sup> Chi baza Jesús lod za' ree bén guin bayuman lēnū, dxel gunabdiidx ree xbejnman xhie rën guiëb ni rëbaman. <sup>18</sup> Dxel rëbaman loj reeman:

—¿Në lëjt ad rignia't ni canin ya? ¿Nid ragbeedi ya guial ad ni rawt bejn rüjn persi rüjnman dol, <sup>19</sup> din ni raw bejn ad rejtan luxdooan, rejn lēnman, abi' rariin?

Zian basignia'man guial ad rüjnt bejn dol por ni rawzaman. <sup>20</sup> Rëbaman:

—Ni ririi ro' bejn në ni rüjnman, laan rüjn persi rüjnman dol. <sup>21</sup> Din guijc bejn zëed graloj xgab mal, guial rüjn ni dxuudx, guialgubaan, guialrugūjt lasa', <sup>22</sup> guial rzunë béngunaa ren o xinguaaw ren, guialrzëëbladix xieen ben ren, guial rüjn ni mal, guialrusquiee, guialrajp vijs, guialnadēdloj, guialrbëe xtiidx bejn, guialrüjn benro', në guial rüjn ni ad rayalt. <sup>23</sup> Graczi ree ni guin zëed guijc bejn, abi' laan rüjn persi rüjnman dol.

*Rayajc xi'n tijb bén Sirofenicia*  
(Mt. 15:21-28)

<sup>24</sup> Chi baza Jesús niz yagaj, zēman niz Tiro në Sidón. Dxel guyuman tijb lēnū guial ad guyētaman niagbee ree bejn, per ad gojct nuquie'ch lojman. <sup>25</sup> Din gogbee gajc xniaa tijb bindoo yu' xinxab luxdoo. Abi' wej xniaam lod za' Jesús zianz bazuxibaman lojman. <sup>26</sup> Ad najtaman bén Israel, najman bén Sirofenicia. Dxel guzajcaman liaadx loj Jesús din yabëeman xinxab guin luxdoo bindoo guin. <sup>27</sup> Per rëb Jesús lojman:

—Badëëdxgaj mod gaw yaloj ree xindoo, din ad rayalt chiquied bejn guiadxtil loj xi'nman din gudëeman laan gaw ree bë'cw.

<sup>28</sup> Badxi' bén guinan rëbaman:



—Waliquil, Dad, per në ree bë'cw raw xguiadxtil laay reem ni ryajb xan mex.

<sup>29</sup> Dxel rëb Jesús:

—Laaqui guneel. Ma zajc yaguaajl, ma barri xindxab guin luxdoo xi'nl.

<sup>30</sup> Chi badxin lidx bén guin, baguiaaman laa bindo guin naga' loj loon, ma barri xindxab guin luxdoom.

*Bayajc tijb bén nacwa't ad rniee tēētaman zagdxe*

<sup>31</sup> Baza Jesús niz Tiro, gudēdaman niz Sidón, në loj ree guiedx riga' Decápolis abi' bidxinman ro'nijsdoo Galilea. <sup>32</sup> Ni bidxinnë reeman tijb xinguaaw nacwa'tix ad rajc tēēt rnieex zagdxe. Abi' rëb reeman loj Jesús din gudxiib yaaman gui-jquix. <sup>33</sup> Zianz binë Jesús laax tibladd, badxe' xbacwënman lën guidiajguix, abi' con xhiejnman bagaalaman lüdxix. <sup>34</sup> Dxel gules lojman xanyabaa, banajladxaman, rëbaman:

—¡Efata! —rën guiëban: ¡Baxall!

<sup>35</sup> Loj hor zii gajc baxal ree guidiajg xin guin, baban lüdxix dxel guzuloj caneex zagdxe. <sup>36</sup> Dxel gunabee Jesús laa reeman chitëe chu loj guiëb reeman ni goc. Per guial rëbaman zian, mazri rü reeman laan loj ree bejn. <sup>37</sup> Dád badxa loj reeman rëb reeman:

—Xi zagdxe naj gra ree ni rüjnman, xt rüjnman persi riguejn ree bén nacwa't, abi' ree bengop rniee reeman.

## 8

*Ruyaan Jesús tajp mil bejn*

*(Mt. 15:32-39)*

<sup>1</sup> Tijb dxej bido'p zien ree bejn abi' achet ni gaw reeman. Dxel gurejdx ree xbejn Jesús rëbaman loj reeman:

<sup>2</sup> —Rayan bén guin ree din ma gojc choon dxej nadxu'në' reeman guie, abi' ad ca't ni gaw reeman. <sup>3</sup> Abi' bal yaxhalan laa reeman lidx reeman sin guialraw, dool yadaj reeman lunejz, din yu' reeman zëed zijt.

<sup>4</sup> Dxel rëb ree xbejnman:

—Per, ¿ban guin yuca'n ni gaw ree bén guin, achutczu bejn zojb niz guie?

<sup>5</sup> Dxel gunabdiidxaman loj reeman rëbaman:

—¿Bël guiadxtil ca'di?

Abi' rëb reeman:

—Gajdxan.

<sup>6</sup> Dxel gunabeeman gurej ree bén guin luyuj. Zianz cwa'man guigajdx guiadxtil guin, badëeman quixtëe loj Dios, abi' gula'man laa reen badëed loj ree xbejnman persi gudi's reeman laa reen loj gra ree bén guin. <sup>7</sup> Nëgajc tio'p choon ree bëjldoo ca' reeman, abi' badëeman quixtëe loj Dios dxel

gunabeeman gudi's reeman në laa reeb loj ree bën guin.  
<sup>8</sup> Graczi reeman gudaw xt bigdxinladx reeman, abi' staczi  
 bacha reeman gajdx dxüm guiadxtil laay në bëjl ni baya'n.  
<sup>9</sup> Bën gudaw ree naj reeman cost tajp mil. Chi gulox gudaw  
 reeman, dxel bazaadiidxnë Jesús laa reeman. <sup>10</sup> Zianz guyu-  
 man loj barcw con ree xbejnman zë reeman niz Dalmanuta.

*Rniab ree bénfarisew tijb milagr loj Jesús*

(Mt. 16:1-4; Lc. 12:54-56)

<sup>11</sup> Dxel bidxin ree bénfarisew, guzuloj cadildiidxnë reeman  
 Jesús, abi' par güün reeman laaman prueb, gunab reeman  
 güünman tijb milagr zi'c tijb sen guial por Dios zëédaman.

<sup>12</sup> Dxel banajladx Jesús, rëbaman:

—¿Chexc zeel rëndi günan tijb milagr? Diidxli ganin, achetctzi  
 milagr günan guguaadi.

<sup>13</sup> Dxel basa'nman laa reeman, bayuman loj barcw zatijb,  
 zignë ree xbejnman stiblad ro' nijs guin.

*Xlevadur ree bénfarisew*

(Mt. 16: 5-12)

<sup>14</sup> Bayanladx ree xbejn Jesús ninë reeman guialraw, tijbzi  
 guiadxtil ca' reeman loj barcw guin. <sup>15</sup> Abi' chi rëbaman loj  
 reeman:

—Gol gojp cudad con xlevadur ree bénfarisew në xlevadur  
 Herodes.

<sup>16</sup> Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

<sup>17</sup> Abi' gogbee Jesús ni canee reeman, zianz rëbaman:

—¿Chexc zeel rëbidi guial ad ca'tidi guiadxtil? ¿Staczi ad  
 rignia'tidi ya? ¿Sta nayaaw xquiarguejndi ya? <sup>18</sup> Yu' guialo-  
 jdi per rulüü ad ruguiaatidi, yu' guidiajguidi per rulüü ad  
 riguejntidi. ¿Nid rusaaladxidi ya? <sup>19</sup> Chi gudi'san gaay  
 guiadxtil loj gaay mil bejn, ¿bël dxüm ni laay bato'pidi?

Badxi' reeman laan rëb reeman:

—Chiptio'pan.

<sup>20</sup> Dxel rëbaman:

—Laadx chi gudi'san gajdx guiadxtil loj tajp mil bejn, ¿bël  
 dxüm guidxa baca'di?

Badxi' reeman laan rëb reeman:

—Gajdxan.

<sup>21</sup> Dxel rëbaman:

—¿Staczi ad waygnia'tidi ya?

*Rayüjn Jesús tijb bën ad ranit loj*

<sup>22</sup> Chi bidxin Jesús guiedx Betsaida con ree xbejnman. Binë  
 ree bejn tijb bën ad ranit loj, rëb reeman loj Jesús din gugaala-  
 man guialojman. <sup>23</sup> Dxel gunaaz Jesús yaaman gulëeman

laaman luguiedx guin, abi' gudëeb xhiejnman guiaalojman, baqui'man guiaalojman. Zianz gunabdiidxaman rëbaman:

—¿Rajc ruguiaal ta'n ya?

<sup>24</sup> Dxel guzuloj cuguaaman, abi' rëbaman:

—Ruguian bejn ree, per rulüü naj reeman zi'c yag ni caza.

<sup>25</sup> Dxel bagaal Jesús guiaalojman stijb, abi' rëbaman lojman din guguaadxijchaman, dxel guzuloj cuguaaman zagdxe, naynidxuj ma ruguiaaman gra. <sup>26</sup> Abi' baxhaal Jesús laaman lidxaman, rëbaman:

—Ad yayul luguiedx guin achu tää loj guiëbil xhienaag bayajc lojl.

*Rëb Bëd guial Jesús naj Cristo*

*(Mt. 16:13-20; Lc. 9:18-21)*

<sup>27</sup> Bazanë ree xbejn Jesús niz Galilea, wej reeman guiedx riga' ree Cesarea de Filipo. Chi zë reeman lunejz gunabdiidx Jesús loj ree xbejnman, rëbaman:

—¿Chu rëb ree bejn najn?

<sup>28</sup> Badxi' reeman laan rëb reeman:

—Yu' reeman rëb lüj naj Waj bën baroobnijs bejn ree, yu'za reeman rëb lüj naj Elías, yu' tää reeman rëb lüj naj tijb ree bën badëed xtiidx Dios loj ree bejn gocli.

<sup>29</sup> Dxel gunabdiidxaman rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo.

<sup>30</sup> Per rëb Jesús loj reeman achu loj guiëb reeman zian.

*Rugojn Jesús guiëtaman*

*(Mt. 16:21-28; Lc. 9:22-27)*

<sup>31</sup> Guzuloj Jesús rëb loj ree xbejnman:

—Rayal sagdiaj da't Bën guxhaal Dios. Ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

<sup>32</sup> Zagdxe basignia'man laa reeman. Dxel gulëëcaan Bëd laaman, rëbaman lojman chitëë rëbraman zian. <sup>33</sup> Per badxi' lojman baguiaa ree xbejnman, dxel gudilëman Bëd rëbaman:

—¿Bisüd lon, Satanás!, din ad por Diost zëed ree xgab ni rüjnl, rüjnl zi'c naj xixgab bénguidxliuj.

<sup>34</sup> Dxel gurejdx ree xbejn Jesús con ree bën riga' yagaj, abi' rëbaman loj reeman:

—Bal chu rën gac da bejnan, ad rayalt güünman zi'c naj xixgabaman. Siibnejzaman guialzi ni tédzaman abi' guidnalaman naj. <sup>35</sup> Din bën mazri rën guialnaban ni rajpaman loj guidxliuj guie, zadxin dxej gusëëbaman laan, per bën guiët por naj në por da diidxan, zajpaman guialnaban tiblayaa con

Dios. <sup>36</sup> ¿Xhie gan güün bejn gapaman gra ni yu' loj guidxliuj bal canijtaman loj Dios? <sup>37</sup> Din ad zile't sii bejn xgualnabanman xanyabaa. <sup>38</sup> Din Bén yatunë naj në da diidxan niz loj ree béndol Bén ad zinalt ree xnejz Dios, Bén riga' ree yan, ziangajc naj, najn Bén guxhaal Dios, yatunë'n laaman chi guialan con xgualrniabee da Dadan con ree xianjlaman.

## 9

<sup>1</sup> Rëb tëë Jesús loj reeman:

—Diidxliczi ganin, yu' ree Bén za' guie, ad zëjtt xt guguiaa reeman gui't xgualrniabee Dios.

*Bidxaa Jesús loj choon ree xbejnman*  
(Mt. 17:1-13; Lc. 9:28-36)

<sup>2</sup> Chi goc xho'p dxej, wej Jesús tijb ruguia'ya, binëman Bëd, Jacob con Waj. Yagaj bidxaa Jesús niz loj reeman. <sup>3</sup> Balaa xabaman bacha', gojcan naquichbëj, achutczi rguuib lajd zian loj guidxliuj guie. <sup>4</sup> Dxel baguiaa reeman Elías në Moisejs cayünë reeman Jesús diidx. <sup>5</sup> Abi' rëb Bëd lojman:

—Mextr, ¡zagdxen nadxu'n guie! Yaguieenan choon ranch, tijban par lüj, tijban par Moisejs, zatijban par Elías.

<sup>6</sup> Per ad ragbeet Bëd xhienin caneeman guial dád bidxeb reeman. <sup>7</sup> Loj hor guin biguiajt tijb zaj beenan bala guijc reeman, abi' loj zaj guin biguien cha' bejn rëbaman:

—Bén guie naj da Xi'nan, Bén rën da'tan, gol bazoob xtiidxaman.

<sup>8</sup> Abi' chi baguiaa reeman gadëd lod za' reeman achutri za'në Jesús, tijbzi laaman za' yagaj. <sup>9</sup> La'tgaj cayguiajt reeman ruguia' guin, rëb Jesús loj reeman chitëë chu loj guiëb reeman ni baguiaa reeman, xt yaban Bén guxhaal Dios. <sup>10</sup> Abi' laaz reeman ragbee ni baguiaa reeman, rniabdiidx tëë loj lasa' reeman xhie rën guiëb guial yabanman loj ree bengüt. <sup>11</sup> Dxel gunabdiidx reeman loj Jesús, rëb reeman:

—¿Chexc zeel rëb ree mextr rajc ley guial yaloj Elías gui't?

<sup>12</sup> Badxi'man laan rëbaman:

—Walican yaloj Elías gui't, laaman guzuxnejz gra. Per, ¿chexc zeel ca loj xtiidx Dios guial Bén guxhaal Dios sagdiaj da'taman ad zën tëët reeman laaman? <sup>13</sup> Naj rni lojdi guial mal bi't Elías, abi' beennë reeman laaman ni guyëntzi reeman zi'c ca loj xtiidx Dios ni rayal sacaman.

*Rayüjn Jesús tijb xin yu' xinxab luxdoo*  
(Mt. 17:14-21; Lc. 9:37-43)

<sup>14</sup> Chi badxin Jesús lod za' sta'n ree xbejnman, baguiaaman dád zien bejn riga', në ree mextr rajc ley za' yagaj cadildiidx reeman con ree xbejnman. <sup>15</sup> Chi baguiaa reeman zëëd Jesús,

dád badxa loj reeman abi' baxüün reeman bicajpdioz reeman laaman. <sup>16</sup> Dxel gunabdiidxaman loj reeman rëbaman:

—¿Chexc zeel cadildiidxidi?

<sup>17</sup> Abi' rëb tijb bën za' yagaj:

—Mextr, zidnë' da xi'n'an lojl guial yu' xindxab luxdoox abi' nusa'nx laax gop. <sup>18</sup> Bantëz guin za'x, chi ru xindxab guin luxdoox rureeyujx laax, abi' rbëëx bichijn ro'x, raw tëë ree layix, dxel ratiaguix. Ma gunaaban loj ree xbejnl din nabëë reeman xindxab guin, per ad gojct reeman.

<sup>19</sup> Zeel rëb Jesús:

—¡Bén ad rliladxt! ¿Xt goc gazunë'n lëjt gadaan tëen lëjt? Gol tanë xinzii guie.

<sup>20</sup> Dxel binë reeman laax lojman. Per chi baguiaa xindxab guin laaman, laa bagüjtya'gajquix xin guin, bareeyujx laax abi' rbixtüjpix ririi tëë bichijn ro'x. <sup>21</sup> Dxel gunabdiidx Jesús loj xdadix rëbaman:

—¿Goc guzuloj rajquix zian?

Badxi'man laan rëbaman:

—Diizd xindobëzix. <sup>22</sup> Dád zien volt ruzaalix laax loj guij në loj nijs din guiëtix. Zeel bal zajc güünl xhienin por dunujn, gognë dunujn, baya dunujn.

<sup>23</sup> Dxel rëb Jesús lojman:

—¿Chexc zeel nal, “bal zajcan”? Graczan zajc bal chu rliladx naj.

<sup>24</sup> Dxel gurixdiaj xdadix rëbaman:

—¡Rliladxan lüj, gognë naj din chililadxan mazri!

<sup>25</sup> Chi baguiaa Jesús cado'p zien bejn dxel gudilëman xindxab yu' luxdoo xin guin, rëbaman:

—Xindxab gop nacwa't tëë, rniabeen lüj din yariil luxdoo xin guin. Ad bal yajejcril luxdoox zatijb.

<sup>26</sup> Dxel gurixdiaj xindxab guin, abi' bagüjtya'x laax zatijb abi' bariix luxdoo, basa'nx laax zi'c xingüt zeel rëb ree bejn guial ma güjtix. <sup>27</sup> Per gunaaz Jesús yaax gulesaman laax, dxel guzulix.

<sup>28</sup> Dxel bayu Jesús lënü con ree xbejnman, abi' gunabdiidx reeman lojman, rëb reeman:

—¿Chexc zeel ad gojct nalëen xindxab guin luxdoo xin guin?

<sup>29</sup> Badxi' Jesúsán rëbaman:

—Par yarii lasa' ree xindxab guin, rayal cwedx guiniabidi Dios guiba'n tëëdi.

*Rugojn Jesús zatijb guial guiëtaman*

*(Mt. 17:22-23; Lc. 9:43-45)*

<sup>30</sup> Chi baza reeman yagaj, gudëd reeman niz Galilea, per ad guyënt Jesús chu niagbee guial cadëdaman niz yagaj, <sup>31</sup> guial culüü ree xbejnman, rëbaman:

—Yayü reeman Bén guxhaal Dios loj ree bén gugüjt laaman, per ni gac choon dxej yabanman.

<sup>32</sup> Per laa reeman ad bignia't reeman ni rëbaman, abi' bidxeb reeman niniabdiidx reeman lojman.

*¿Chu mazri zojbloj?*

*(Mt. 18:1-5; Lc. 9:46-48)*

<sup>33</sup> Dxel badxin Jesús Capernaum con ree xbejnman, abi' badxin reeman yu lod zojb reeman. Dxel gunabdiidxaman loj reeman rëbaman:

—¿Xhie diidxan rüdi lunejz chi zio'p ree?

<sup>34</sup> Per achet rëb reeman guial cadildiidx reeman lunejz chu reeman mazri zojbloj. <sup>35</sup> Dxel gurej Jesús, gurejdxaman guidxiptio'p reeman, rëbaman:

—Bal chu bén rën gac mazri bén zojbloj lojdi, rayal güün laagajcaman zi'c tijb bén ad zojblojt güün tēeman sirv loj gradi.

<sup>36</sup> Dxel cwa'man tijb xindoo, bazujman laax galay reeman, zianz gudiidxaman laax, rëbaman:

<sup>37</sup> —Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man.

*Bén ad za't contr dunuj ree za'man con dunuj ree*

*(Lc. 9:49-50; Mt. 10 :42)*

<sup>38</sup> Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

<sup>39</sup> Badxi' Jesúsán rëbaman:

—Ad rudxoondi, din bén rüjn milagr por da guialrniabeen, ad zile't guinieeguijdxaman naj. <sup>40</sup> Bén ad za't contr dunuj ree, za'man con dunuj ree. <sup>41</sup> Chutëéz bén gunee majsi tibxijgzi nijs lojdi guial najdi xbejn Cristo, diidxli rnin guial ziangajc yu' ni gudëed Dios lojman.

*Bén ruzaalguiiw bejn din güünman dol*

*(Mt. 18:6-9; Lc. 17:1-2)*

<sup>42</sup> 'Chutëéz bén guzaalguiiw tijb bén qui rliidxri naj din güünman dol, par laaman zagdxeli naj guixhii reeman tijb guiaj mulin yëjnman guzaal reeman laaman loj nijsdoo. <sup>43</sup> Bal laagajc yaal rusajb lüj loj dol, zagdxeli gutü'n. Mazri zagdxé chu' con tiblodzi yaal xanyabaa, guial che con grop yaal gabijl loj bajl ni ad yu't dxej yayü', <sup>44</sup> lod ad rëjtt ree bizog lod ad rayü' tēet bajl. <sup>45</sup> Abi' bal laagajc guia'l rusajb lüj loj dol, zagdxeli gutü'n. Mazri zagdxé chu' con tiblodzi guia'l xanyabaa guial che con groplad guia'l gabijl lod yu' bajl ni ad yu't dxej yayü', <sup>46</sup> lod ad rëjtt ree bizog lod ad rayü' tēet bajl. <sup>47</sup> Bal laagajc guiaalohl rusajb lüj loj dol, zagdxeli gulëen.

Mazri zagdxé chu' con tiblodzi guiaalojl xanyabaa guial che con groplad guiaalojl gabijl lod yu' bajl ni ad yu't dxej yayü',<sup>48</sup> lod ad rëjtt ree bizog lod ad rayü' tëët bajl.

<sup>49</sup> 'Zi'c ru zëd guijc guialraw, ziangajc ree bën rlliladx naj sagdiaj reeman din gac reeman naya.

<sup>50</sup> 'Ni zagdxé naj zëd, per bal id zajcran naxij, ¿xhieza naag yayajcan naxij zatijb? Gol been zi'c rayal chitëë saquidi zi'c zëd ni ad rüjnt sirv, gol gubajnnë tëë lasa'di zagdxé.

## 10

*Ruliüü Jesús xcwent guial rala' lasa'*

*(Mt. 19:1-12; Lc. 16:18)*

<sup>1</sup> Chi baza Jesús Capernaum, dxel wejman niz Judea në stiblad ro' guiiw Jordán. Abi' lod za'man bido'p ree bejn zatijb, dxel guzuloj culüüman laa reeman zi'c goc xcostumbraman. <sup>2</sup> Yu' ree bënfarisew gubig lod za'man. Abi' par güün reeman laaman prueb, gunabdiidx reeman lojman rëb reeman:

—¿Zajc yala' xinguaaw lacheelix ya?

<sup>3</sup> Badxi'man laan rëbaman:

—¿Xhie gunabee Moisejs güündi?

<sup>4</sup> Abi' rëb reeman:

—Cwëjb Moisejs yala' xinguaaw lacheelix, per gudëëdix gui'ch tia'man guial ma bala' reex.

<sup>5</sup> Dxel rëb Jesús:

—Rëb Moisejs gac zian guial nadidi. <sup>6</sup> Per guia'xchej chi gule'cchaaw Dios guidxliuj, “beenman xinguaaw con béngunaa”. <sup>7</sup> “Zeel xinguaaw gusa'n xdad xniaax din guibannë lacheelix, <sup>8</sup> dxel grop reex ma gac zi'c tijbzi bejn.” Zianan zeel ad najtri reex tio'p, ma naj reex tijbzi. <sup>9</sup> Zeel, bénguidxliuj ad rayalt yala'man lasa' ni ma bachajc Dios.

<sup>10</sup> Chi bayu reeman lënü, gunabdiidx ree xbejnman lojman zatijb, xcwent ni guneeman. <sup>11</sup> Abi' rëbaman loj reeman:

—Xin rala' lacheel, abi' rtia'x ben ren dolan cayüjnx, <sup>12</sup> ziangajc bal tijb béngunaa yala' lacheelaman abi' tia' xin ren laaman, dolan cayüjnxman.

*Rüjnle' Jesús xindoo ree*

*(Mt. 19:13-15; Lc. 18:15-17)*

<sup>13</sup> Binë ree bejn xindoo ree lod za' Jesús din gudxiib yaaman guijc reex. Per ree xbejnman guzuloj cadilë reeman bën binë ree laa reex. <sup>14</sup> Chi baguiaa Jesús zian, balenman zeel rëbaman:

—Gol badëëd mod gui't reex lon, ad bal rudxoondi. Din lod rniabee Dios naj par ree bën naj zi'c laa reex. <sup>15</sup> Diidxliczi rnin, bën ad rlliladxt xguialrniabee Dios zi'c tijb xindoo, ad zile't chu'man lod rniabee Dios.

16 Dxel gudiidx Jesús laa reex, badxiib yaaman guijc reex, beenle'man laa reex.

*Xcwent tijb xinrijcw*  
(Mt. 19:16-30; Lc. 18:18-30)

17 Chi ma gusnuu xnejz Jesús, ruxüün tijb xinguaaaw bidx-inx abi' bazuxibix lojman, dxel gunabdiidxix rëbix:

—Mextr za'c, ¿xhie rayal günan din ga'pan guialnaban tiblayaa con Dios?

18 Badxi' Jesús laan rëbaman:

—¿Chexc zeel nal lon benza'c? Achut naj benza'c, tijbzi Dios. 19 Lüy rajc ree mandamient, “Ad gugüjtil bejn, ad sunël béngunaa ren, ad cwanl, ad cwëël xtiidx bejn ad gusquiee tëel, gojp respejt xdad xniaal.”

20 Dxel rëbix loj Jesús:

—Mextr, gra ree ni guin cayünan diizd xindoon.

21 Baguiaa Jesús lojx, bayaman laax, rëbaman:

—Per yu' zatijb ni riaadx güünl: bigto' gra ni rajpil, badëed milia guin loj ree bénprob, zian gapil guialnaza'c xanyabaa dxel guidnalil naj majsi xhietëez saquil.

22 Chi biguiejn xin guin zian, ad nixt guyu luxdoox abi' dád yu'nayax ziax guial dád xinrijcwan.

23 Dxel baguiaa Jesús loj gra reeman, abi' rëbaman loj ree xbejnman:

—¡Dád nawëëg naj chu' benrijcw loj xguialrniabee Dios!

24 Dád badxa loj ree xbejnman ni rëbaman. Per rëbaman loj reeman zatijb:

—Xi'n, ¡bén yu'guijc mazri ni rajpaman, dád nawëëg naj chu'man loj xguialrniabee Dios! 25 Adli nawëëgt téd tijb camell xan gagux guial chu' tijb benrijcw loj xguialrniabee Dios.

26 Chi biguien reeman diidx guin ree, mazri badxa loj reeman, dxel rniabddiidx loj lasa' reeman, rëb reeman:

—¿Chu zajc laa loj xcasti Dios?

27 Baguiaa Jesús loj reeman, abi' rëbaman:

—Par bejn nawëëgan, per par Dios ad nawëëgtan din par Dios graczan zile' gac.

28 Dxel guzuloj rëb Bëd loj Jesús:

—Dunujn basa'nan graczi ni raya'pan persi zudnaalan lüy.

29 Badxi' Jesúsán rëbaman:

—Diidxliczi ganin lëjt, chutëez bén rusa'n lidx, o bijch, o bizan, o xdad xniaa, o lacheel o xi'n, o guidxliuj ree por naj në por xtiidxza'c Dios, 30 loj guidxliuj guie tia'man tibgayuu volt mazri guial loj ni basa'nman, bal najn lidxaman, bi-jchaman, bizanman, xniaaman, xi'nman, në xguidxliujman,



majsi guidib wazagdiaj, abi' guidxin dxej gapaman guialnaban tiblayaa con Dios. <sup>31</sup> Per dád zien ree bén naj bén yaloj yan, gac reeman bén bigra, guiáad ree bén naj bén bigra yan, gac reeman bén yaloj.

*Rugojn Jesús zatijb guial guiëtaman*  
(Mt. 20:17-19; Lc. 18:31-34)

<sup>32</sup> Chi zë reeman Jerusalén, ned Jesús loj ree xbejnman, abi' dád radxaloj reeman guial zëman Jerusalén, guiáad ree bén nal laaman rdxeb reeman. Dxel gurejdx guidxiptio'p ree xbejnman lood ren, zianz guzuloj rëbaman ni sacaman:

<sup>33</sup> —Rëbaman loj reeman: Lëjt ragbee guial ziyo' ree Jerusalén, abi' naj najn Bén guxhaal Dios, yayü reeman naj loj ree bixhioz rniabee ree bixhioz, në loj ree mextr rajc ley. Abi' nabee reeman guiëtan, yayü tëe reeman naj loj ree bén ad najt bén Israel. <sup>34</sup> Guze' reeman naj, gucojp xhiejn reeman lon, quin reeman gugÿjt tëe reeman naj, per yayon dxej yaban.

*Ni gunab ree Jacob con Waj*  
(Mt. 20:20-28)

<sup>35</sup> Dxel Jacob con Waj xi'n Zebedeo, gubig reeman loj Jesús rëb reeman:

—Mextr, rayënan güünl tijb favor ni yanaaban lojl.

<sup>36</sup> Abi' gunabdiidxaman rëbaman:

—¿Xhie rëndi günan?

<sup>37</sup> Badxi' reeman laan rëb reeman:

—Rayënan guial chi ma canabeel, yadxu'n cwë'l, tijb dunujn yadxu' xladbeel, zatijb dunujn yadxu' xladruvejsil.

<sup>38</sup> Badxi'man laan rëbaman:

—Ni'quid ragbeetidi xhie ni guin rniabidi. ¿Wen zajc sagdiajdi zi'c gazaagdiajn ya? ¿Zajc guiëtidi zi'c guiëtan ya?

<sup>39</sup> Badxi' reeman laan rëb reeman:

—Zayajcan.

Dxel rëb Jesús:

—Waliquididi sagdiajdi zi'c naj guiët tëedi zi'c naj, <sup>40</sup> per guial cwedi da ladbeen o da ladruvejsan, ad najt rayal gune laan, din ma najn par ree bén rayal laan.

<sup>41</sup> Chi biguien zachii xbejn Jesús ni rëb reeman, dád balen reeman Jacob con Waj, <sup>42</sup> per gurejdx Jesús laa reeman rëbaman:

—Lëjt ragbee guial ree bén rniabee loj guidxliuj guie, rniabee reeman bejn ree zi'ctzi rën reeman, guiáad ree bén zojbloj rÿjnnë reeman bejn ree zi'ctzi rën reeman por guialrniabee ni rajp reeman. <sup>43</sup> Per con lëjt ad rayalt gac zian. Din bal chu rën gac bën rniabee lojdi, rayal güünman sirv lojdi, <sup>44</sup> guiáad bën rën gac bën zojbloj, rayal güünman sirv loj gradi zi'c bën nado'. <sup>45</sup> Din ni'qui naj najn Bén guxhaal Dios, ad

ziantan loj guidxliuj par güün ree bejn sirv lon, zialan din günan laa reeman sirv, abi' con da guialnabanan gaguixan por xtol zien ree bénguidxliuj.

*Rayajc guiaaloj tijb xin ad ranit loj la Bartimeo*  
(Mt. 20:29-34; Lc. 18:35-43)

46 Bidxin reeman guiedx Jericó, abi' chi ma cayrii Jesús luguiedx guin, con ree xbejnman në ree benzien. Tijb xin ad ranit loj lax Bartimeo, xi'n bén la Timeo, zojbix cwë' nejz rniabix carda. 47 Chi biguiejnx cadëd Jesús bén Nazaret niz yagaj, guzuloj cabidxa'x rëbix:

—¡Jesús, xdiaa Davi, baya naj!

48 Dád zien ree bejn ridilë laax din yacwëëz ro'x. Per mazri rejs rbidxa'x rëbix:

—¡Xdiaa Davi, baya naj!

49 Dxel guzudxe Jesús rëbaman:

—Gol gurejdxix.

Dxel gurejdx reeman laax, rëb reeman:

—Bagu' luxdool, bisu, lüj caneeman.

50 Dxel laa badxe'bi gajc xin guin lajd najcwix luya, xt gutiajsix guzulix bibiguix loj Jesús. 51 Gunabdiidx Jesús lojx rëbaman:

—¿Xhie rënl günan por lüj?

Badxi'xan rëbix:

—Mextr, rënan yani lon.

52 Dxel rëb Jesús:

—Ma zajc yaguiajl, ma bayajquil guial bililadxil naj.

Loj hor zii gajc bani lojx dxel zinalix Jesús niz yagaj.

## 11

*Ru Jesús Jerusalén*

(Mt. 21:1-11; Lc. 19:28-40; Jn.12 :12-19)

1 Chi ma zë reeman gajxh Jerusalén, niz lod riga' guiedx Betfagé con Betania, gajxh guia' la Olivos, dxel guxhaal Jesús tio'p ree xbejnman, 2 rëbaman:

—Gol chej guiedxdo riga' delant guin. Chi guidxindi guidx-aaglojdi tijb burquie'n, caduub achut wabib laab. Gol guxhiequib gol tanëb. 3 Abi' bal chu guiniabdiidx lojdi: “Chexc zeel caxhiequidi laab”, gol güjdx: “Dad Jesús cayaadx laab, doo yaxhaal gajcaman laab.”

4 Dxel wej reeman, bidxaagloj gajc reeman burdo guin, caduub runejz ro' tijb port, abi' guxhiec reeman laab.

5 Bén baguiaa ree zian gunabdiidx reeman loj reeman, rëb reeman:

—¿Xhie rüjndi? ¿Chexc zeel caxhiequidi burdo guin?

<sup>6</sup> Badxi' reeman laan zi'c rëb Jesús, abi' cwëjb ree bën guin zinë reeman laab. <sup>7</sup> Bidxinnë reeman laab lojman, badxiib xab reeman xijchib, persi gudxibaman laab. <sup>8</sup> Zien ree bejn riguijxh xab niz lod rdëdaman, yu' tëë reeman rutüüg zijn persi rguijxh reeman laan niz lod rdëdaman.

<sup>9</sup> Abi' zi'c ree bën ned, në ree bën nal rbixdiaj reeman, rëb reeman:

—¡Gagnëman dunuj ree yan! ¡Nagle' bën zëed por Dios!

<sup>10</sup> ¡Nagle' bën zëed nabee zi'c dux béngulal ree rey Davi! ¡Quixtëë dux Dad ree Dios Bén yu' xanyabaa!

<sup>11</sup> Zian guyu Jesús Jerusalén abi' guyuman lën yadooro' Jerusalén. Chi gulox baguiaaman graczi, dxel zinë guidxip-tio'p ree xbejnman Betania guial ma gudxe.

*Bazaal Jesús diidx guijc yag higo*

*(Mt. 21:18-19)*

<sup>12</sup> Chi bareguiaal, barii reeman Betania. Dxel guzuloj calaan Jesús. <sup>13</sup> Zijtri baguiaaman tijb yag higo ca ree balag lojn. Abi' wejman biquiaaman bal ca higo lojn. Per achet bidxaaglojman, balagzi ree ca lojn din ad xtiampntanan.

<sup>14</sup> Dxel rëbaman loj yag higo guin:

—¡Ad yu'tri dxej gaw bejn ninejxh tia lojl!

Abi' biguiejn ree xbejnman ni rëbaman.

*Rabëë Jesús bën ruto' ree ro' yadooro' Jerusalén*

*(Mt. 21:12-17; Lc. 19:45-48; Jn. 2:13-22)*

<sup>15</sup> Chi bidxin reeman Jerusalén. Dxel guyu Jesús ro' yadooro' Jerusalén guin, abi' guzuloj caybëëman bën cuto' ree në ree bën cazii. Barexguiataman xmex ree bën ruchaa milia con xyagxhil ree bën ruto' ree palom, <sup>16</sup> ad rtiëjbtaman xhie chu'në ree bejn ro' yadoo guin. <sup>17</sup> Abi' guzuloj culüüman laa reeman, rëbaman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

<sup>18</sup> Bixhioz rniabee ree bixhioz con ree mextr rajc ley, chi biguiejn reeman ni rëb Jesús, guzuloj raguuil reeman mod xhienaag gugüjt reeman Jesús, guial rdxeb reeman laaman din gra bejn radxaloj ni rulüüman. <sup>19</sup> Chi ma caxhin, bazanë ree xbejn Jesús Jerusalén.

*Tijb yag higo ni gubidx*

*(Mt. 21:20-22)*

<sup>20</sup> Chi bareguiaal rsildoo, badëd reeman niz lod zojb yag higo guin, abi' baguiaa reeman ma gubidx diizd liujn. <sup>21</sup> Dxel basaaladx Bëd ni rëb Jesús, abi' rëbaman lojman:

—Mextr, ¡baguiaa yag higo ni bazaalil diidx guijc ma gubidxan!

<sup>22</sup> Badxi' Jesúsán rëbaman:

—Gol bililadx Dios. <sup>23</sup> Din diidxiczi ganin, bal chu guiëb loj guia' guin: “Bisüd guie biajb loj nijsdoo”, bal id yu' nawëëg luxdooan, bal rliladxaman, gac ni guneeman. Zian gacan. <sup>24</sup> Zeel rnin lojdi, gra ni rniabidi loj Dios, gol bililadx guial ma cwa'di laan, abi' zaca'dan. <sup>25</sup> Guiáad chi ribejdx rniabidi Dios, bal yu' bén rdx'e'chidi, gol beenman perdon din ziangajc xDadidi bén yu' xanyabaa güünman perdon xtolidi. <sup>26</sup> Din bal id züjndi perdon, ziangajc xDadidi Bén yu' xanyabaa ad züjntaman perdon xtolidi.

### *Xgualrniabee Jesús*

(Mt. 21:23-27; Lc. 20:1-8)

<sup>27</sup> Chi badxin reeman Jerusalén. Chi caza Jesús niz lën yadooro' Jerusalén guin, dxel gubig bixhioz rniabee ree bixhioz con ree mextr rajc ley con ree xguxtis ree bén Israel, <sup>28</sup> gunabdiidx reeman loj Jesús, rëb reeman:

—¿Xhie gualrniabee rajpil zeel rüjnl ni guin ree? ¿Chu banee gualrniabee lojl güünl zian?

<sup>29</sup> Badxi' Jesúsán rëbaman:

—Ziangajc naj yu' ni ganabdiidxan lojdi, bal yadxi'dan dxel ganin chu banee gualrniabee günan ni guin ree. <sup>30</sup> ¿Chu guxhaal Waj bidgaroobnijsaman bejn ree? ¿Dios ya o bénguidxliuj? Gol badxi'n.

<sup>31</sup> Dxel guzuloj rëb loj lasa' reeman:

—Bal yaguie'ch ree, Dios guxhaal laaman, zanaman: “¿Chexquiza zeel ad bililadxtidi laaman?” <sup>32</sup> Ad zajc tëët yaguie'ch ree, bénguidxliuj guxhaal laaman.

Rëb reeman zian guial rdxeb reeman bejn ree, din graczi reeman rliladx guial gojc Waj tijb bén badëë xtiidx Dios loj ree bejn, bén wali gunee xtiidx Dios. <sup>33</sup> Abi' badxi' reeman laan rëb reeman:

—Ad rayagbeetan.

Zeel rëb Jesús loj reeman:

—Ni'qui naj ad zanitan lojdi chu banee gualrniabee günan ni guin ree.

## 12

### *Xcwent ree mojs guiidx*

(Mt. 21:33-46; Lc. 20:9-19)

<sup>1</sup> Dxel guzuloj caneenë Jesús laa reeman con ganax ree cwent, rëbaman:

—Tijb bejn guxübinman uv loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' beenman tijb yu ya da't lod guiya'p guiniaa guin.

'Zianz badëëman laan garol loj ree bén güün laan dxiin, briitaman zëman zijt. <sup>2</sup> Chi bidxin dxej yala' reeman uv guin,

guxhaal tijb xmojsaman din chigxiiman ni rayalaman. <sup>3</sup> Per ree bën rüjn dxiin loj guiniaa guin gunaaz reeman laaman, gudijn reeman laaman abi' badxi' reeman laaman zezi. <sup>4</sup> Dxel guxhaal bën naj xguidxliuj laan zatijb xmojsaman, per zian-gajc, bacaaguiaj reeman laaman, gula' reeman guijcaman abi' guneeguidx reeman laaman. <sup>5</sup> Guxhaalaman ben ren, per bagüjt reeman laaman. Zien ree ben guxhaalaman, yu' reeman gudijn reeman yu' tëë reeman bagüjt reeman.

<sup>6</sup> Dxel bën naj xguidxliuj laan stijbzi xi'ngaanman ryaadx guixhiaalaman, xin rën da'taman. Dxel guxhaalaman laax guial gunaladxaman: "Zajp reeman da xi'nän respejt." <sup>7</sup> Per ree bën guin, rëb loj lasa' reeman: "Xin guin naj xin yaya'nne guidxliuj guin, yagüjt reex din gacan du xieen ree." <sup>8</sup> Dxel gunaaz reeman laax, bagüjt reeman laax abi' babëë reeman laax loj guidxliuj guin.

<sup>9</sup> Dxel gunabdiidx Jesús loj ree bën caneenëman, rëbaman: —Yan, ¿xhie naladxidi güün bën naj xguidxliuj laan? Zi'taman din gugüjtaman bën guin ree, dxel gudëëman guidxliuj guin loj ree ben ren.

<sup>10</sup> ¿Nid wayoolidi loj xtiidx Dios ya?, lod rëb: Guiaj ni gulëëgo'n ree bën rüjn yu, laan goc ni mazri been sirv gojcnë yu guin.

<sup>11</sup> Zian been dux Dad ree Dios, zeel radxaduloj ree.

<sup>12</sup> Chi biguiejn ree bën rniabee guin ni guneë Jesús, guyën reeman niniaaz reeman laaman guial gogbee reeman laa reeman cuza'taman, per guial rdxeb reeman bejn ree, basa'n reeman laaman, ziat reeman.

### *Xcwent Impuest*

(Mt. 22:15-22; Lc. 20:20-26)

<sup>13</sup> Guxhaal reeman tio'p choon ree bënfarisew në tio'p choon ree xbejn Herodes lod za' Jesús, din yaguuil reeman mod guinieë Jesús diidx ni gudxiib reeman guijc din gac cwe'c reeman xguialquiaman. <sup>14</sup> Abi' rëb reeman:

—Mextr, dunujn rayagbee guial lüj rniece diidxli ad ridxga' tëëtil chu naj bejn. Din par lüj tiblojzi naj bejn, abi' walil rulüül guial xhienaag rën Dios guiban bejn. Zeel ranabdiidxan lojl: ¿Zagdxen ya radijxan impuest loj César o ad zagdxetan? ¿Zadijxanan ya o ad zadijxtanan?

<sup>15</sup> Per gogbee gajc Jesús guial wed rüjnz reeman, zeel rëbaman:

—¿Chexc zeel rüjndi naj prueb? Gol tanë cintabl din guguianan.

<sup>16</sup> Dxel badëëd reeman cintabl guin lojman, abi' rëbaman:

—¿Chu loj ca lojn, chu tëë laj ca lojn?

Badxi' reeman laan rëb reeman:

—Loj César ca lojn në lajman.

<sup>17</sup> Dxel rëb Jesús loj reeman:

—Gol badëcliza loj César ni naj xieen César, guiáad loj Dios gol badëed ni naj xieen Dios.

Dád badxa loj reeman ni rëbaman.

*Xcwent guial yaban ree bengüt*

(Mt. 22:23-33; Lc. 20:27-40)

<sup>18</sup> Tio'p choon ree bénsaducew bignaj Jesús, laa reeman ad riladxt guial yaban ree bengüt. Zeel gunabdiidx reeman loj Jesús rëb reeman:

<sup>19</sup> —Mextr, loj xley Moisejs rëb guial bal guiët tijb xinguaaw abi' achut xi'nx guyu con lacheelix, bijch xin güt guin guxhlianë béngunaa bizëjb guin din chu' xi'n reex zi'c gulüü xi'n xingüt guinan. <sup>20</sup> Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix. <sup>21</sup> Dxel bijch barojpix baxhlianë béngunaa guin, per güjt gajquix, ad guyu gajct xi'n reex. Abi' ziangajc guzajc xin bayon guin, <sup>22</sup> abi' zianz baxhlianëman guigajdx reex, zianz bara reex güjt achut xi'n reex guyu con laaman. Ni bigra tëë në béngunaa guin güjt. <sup>23</sup> Yan, chi yaban ree bengüt, loj guigajdx reex, ¿chu loj gra reex gac xbéngunaa laaman guial gra reex baxhlianë laaman?

<sup>24</sup> Badxi' Jesúsán rëbaman:

—Ad laat naj xgab rüjndi guial ad nünbeetidi xtiidx Dios ad ragbee tëëtidi xhienaag naj xguialrniabeeman. <sup>25</sup> Din chi yaban ree bengüt, ad zuxhliaatri reeman, ad zudëë tëëtri xi'n reeman guxhliaa, ma gac reeman zi'c ree anjl yu' xanyabaa. <sup>26</sup> Abi' xcwent ni yaban ree bengüt, ¿nid wayoolidi loj xlibr Moisejs ya, lod rëb guial baguiaaman yag ni cayë'c? Yagaj biguien cha' Dios, rëbaman lojman: “Naj naj xDios Abraham, xDios Isaac në xDios Jacob.” <sup>27</sup> Din Dios ad najtaman xDios ree bengüt, najman xDios ree bën naban. Zeel ad laat naj xgab rüjndi.

*Mandamient mazri zojbloj*

(Mt. 22:34-40)

<sup>28</sup> Chi biguiejn tijb mextr rajc ley badxi' Jesús xtiidx reeman zagdx guial bacaagdiajgaman diidx ni cayü reeman, gubigaman lojman, abi' gunabdiidxaman rëbaman:

—¿Con mandamientan mazri zojbloj loj gra ree mandamient?

<sup>29</sup> Badxi'man laan rëbaman:

—Mandamient mazri zojbloj rëban: “Gol bacaagdiajg, bën Israel, dux Dad ree Dios, tijbzi laaman naj Dios. <sup>30</sup> Guyën xDadil Dios guidiblagaa guidib guijc guidib ladxil.” Laan naj mandamient mazri zojbloj. <sup>31</sup> Mandamient rarojp, rëban:

“Guyën ree ben ren zi'c rën lüj gajc.” Achet mandamient mazri zobjloj guial loj grop ree mandamient guie.

<sup>32</sup> Dxel rëb mextr guin loj Jesús:

—Zagdxequi guneel, Mextr. Waliquil tijbzi Dios yu', achutri ben ren yu'. <sup>33</sup> Abi' guidib guijc guidib ladx bejn guiënman laaman guidiblagaa, guiën tëëman ben ren ree zi'c rën laagajcaman. Laan naj ni mazri zobjloj guial loj gra gon ni rudëed bejn loj Dios.

<sup>34</sup> Chi biguien Jesús badxi' mextr guinan zagdxë, rëbaman:

—Ad zijtt za'l par chu'l loj xguialrniabee Dios.

Dxel achutri bayax xhie niniabdiidx lojman.

*Chu loj xdiaa za Cristo*

*(Mt. 22:41-46; Lc. 20:41-44)*

<sup>35</sup> Chi culüü Jesús bejn ree lën yadooro' Jerusalén, gunabdiidxaman loj reeman rëbaman:

—¿Chexc zeel rëb ree mextr rajc ley guial za Cristo loj xdiaa rey Davi? <sup>36</sup> Awa Davi guin gajc gunee por xSprijt Dios, rëbaman:

Dios rëb loj da Dadan:

“Gurej da ladbeen,

xt gabecan xin rdxe'ch ree lüj guia'l.”

<sup>37</sup> Yan bal xi'n Davi naj Cristo, ¿chexquiza zeel rëb Davi guin lojman Dad?

Graczi ree bën riga' lën yadoo guin dád nix yu' luxdoo reeman rucaagdiajg reeman xtiidxaman.

*Ni rüjn ree mextr rajc ley*

*(Mt. 23:1-36; Lc. 11:37-54; 20: 45-47)*

<sup>38</sup> Chi culüü Jesús bejn ree, rëbaman loj reeman:

—Gol gojp cudad con ree mextr rajc ley, din ruladx reeman sa reeman gacw reeman lajd zagdxë, ruladx tëë reeman gugajpdioz ree bejn laa reeman con respejt niz lunejz. <sup>39</sup> Abi' lën ree yadoo ruladx reeman cwe reeman lod rbej ree bën zobjloj, ziangajc rüjn reeman lod ritaw reeman. <sup>40</sup> Raca' tëë reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

*Gon badëed tijb béngunaa bizëjb*

*(Lc. 21:1-4)*

<sup>41</sup> Tijb dxej zobj Jesús lën yadooro' Jerusalén niz lod za' alcancia ni ru gon, abi' ruguiaaman rgu' ree bejn milia lën alcancia guin, në zien ree benrijcw rgu' zro' milia. <sup>42</sup> Dxel bidxin tijb béngunaa bizëjb prob, badxe'man tio'p zintabldoo ni lasajc ta'nzi. <sup>43</sup> Abi' gurejdx Jesús bën naj ree xbejnman, rëbaman:

—Diidxli rnin lojdi guial bén bizëjb prob guin mazri lasajc gon badxe'man guial loj gon badxe' gra ree bén guin. <sup>44</sup> Din graczi reeman rudxe' ni rüjn laa reeman sobr, per laaman majsi najman bénprob, badxe'man graczi ni rajpaman par guibannëman.

## 13

*Rëb Jesús guial yaze'n yadooro' Jerusalén*

*(Mt. 24:1-2; Lc. 21:5-6)*

<sup>1</sup> Chi barii Jesús lën yadooro' Jerusalén, rëb tijb ree xbejnman lojman:

—Mextr, jbaguiaa xi nix naj ree guiaj guin nix tëe naj ree yu guin!

<sup>2</sup> Badxi' Jesúsän rëbaman:

—Zi'c ruguiaal yu narooob guin ree, zadxin dxej, ni'czi tijb guiaj guin ad zaya'nt guijc stijban, gran yaze'n.

*Ni gac chi gad guidxliuj nit*

*(Mt. 24:3-28; Lc. 21:7-24; 17:22-24)*

<sup>3</sup> Chi zojb Jesús ruguia' la Olivos, ni naj niz lod nudxi' loj yadooro' Jerusalén. Dxel gubig Bëd lojman con Jacob, Waj con Andrejs, laaz reeman za'në laaman yagaj, abi' gunabdiidx reeman lojman, rëb reeman:

<sup>4</sup> —Guna, ¿goc gac zian? ¿Xhie sen gac chi ma zidyob gac zian?

<sup>5</sup> Badxi' Jesús laan rëbaman:

—Gol gojp cudad chitëe chu gusquiee lëjt. <sup>6</sup> Din zien ree bén gui't guiëb reeman guial por naj zëed reeman, guiëb tëe reeman: “Naj naj Cristo”, abi' gusquiee reeman zien bejn.

<sup>7</sup> Per lëjt chi guiguiejndi cayajc wadijl o zëeb diidx gac wadijl, ad guidxebidi; din najczi gac zian, per ad por laatan ma bidxin dxej nit guidxliuj. <sup>8</sup> Din til nacion con stijb nacion, til tëe bén rajp gualrniabee con stijb bén rajp gualrniabee, gui't tëe ree xudoxh në gubijn niz ni niz guie. Zian gac chi ma suloj ree guialzi ni naj gac.

<sup>9</sup> Gol gojp cudad, din zadxin dxej yayü ree bejn lëjt loj ree guxtis, abi' quin reeman lëjt lën ree yadoo. Chinë reeman lëjt loj ree gobernador në loj ree rey guial najdi da bejnan, zian gac din chile' güdi da diidxan loj reeman. <sup>10</sup> Per yalojxgaj rüjn naguiejn guire'ch xtiidxza'c Dios loj gra ree nacion, dxelri nit guidxliuj. <sup>11</sup> Chi chinë reeman lëjt loj ree guxtis, ad bal chu'di xgab, ad bal güün tëedi xgab xhie guiëbidi loj reeman. Gol guneë diidx guneë Dios lëjt loj hor guin. Din ad lëjtän guinieë, xSprijt Diosan guinieë. <sup>12</sup> Abi' guidxin dxej yayü bejn laagajc bijchaman din guiëtix, ziangajc ree bén naj dad yayü



laagajc xi'n reeman, abi' ree bejn yayü xdad xniaa reeman par guiët reeman. <sup>13</sup> Gra bénguidxliuj guidxe'ch lëjt guial najdi da bejnan, per bën sudxi'ch loj ni rliadxaman naj xt dxej chigra guibanman, laaman yayal xanyabaa.

<sup>14</sup> Chi guguaadi zojb tijb ni dxuudx lën yadooro' Jerusalén, zi'c bacaa Daniel, bën badëë xtiidx Dios loj ree bejn diizd gulal (bën gool ree gui'ch guie, gol bignia'n), guial bën zojb ree niz Judea chigxüün reeman niz dajn. <sup>15</sup> Guiáad bën yë'p guiic yu lidx dxejzii, ad yayu lëñü lidxaman tia' xhie xieenman. <sup>16</sup> Guiáad bën za' dajn, ad yayejc lidxaman chigxii xabaman. <sup>17</sup> ¡Probza ree béngunaa nüü xi'n o bën ca' ree xindobëz lën ree dxej zii! <sup>18</sup> Gol gurejdx gunab Dios chitëë yayal gac zian tiamp nayaag, <sup>19</sup> din dád gualziro' chu' dxejzii ree, zi'c ad wayajctczi diizd chi beenchaaw Dios guidxliuj, ad yu' tëëtri dxej gac zian. <sup>20</sup> Bal id zasdop Dios dxej zii ree, ni'czi tijb bejn ad zalaat, per gusdopaman laa reen, por ree bën rënman, bën gulejman par laaman.

<sup>21</sup> 'Bal chu na lojdi: "Gol baguiaa, laa Cristo za' guie", o "laaman za' ni", ad bal chililadxidi. <sup>22</sup> Din gui't zien ree bejn, na reeman guial laa reeman naj Cristo o na reeman laa reeman naj bën rudëë xtiidx Dios loj ree bejn, abi' güün reeman milagr ree në ree graloj ni yadxaloj ree bejn, din gusquiee reeman laa reeman, abi' bal zile'n xt zajc në ree bën gulej Dios gusquiee reeman. <sup>23</sup> Zeel gol gojp cudad, ma bagojnxgajn lëjt gra ni gac.

### *Gui't Bén guxhaal Dios zatijb*

(Mt. 24:29-35, 42-44; Lc. 21:25-36)

<sup>24</sup> 'Per lën ree dxej ni ma gudëd gra ree gualzi guin, zacyj loj gubijdx abi' ad zusnitri bëëw, <sup>25</sup> zayajb ree bajl yu' xanyabaa guiáad gra ree ni yu' xanyabaa guiniib reen. <sup>26</sup> Dxel guguaa ree bejn Bén guxhaal Dios rdiinman bacha' zëëdaman loj zaj con xgualrniabee narooberman. <sup>27</sup> Abi' guixhiaal ree xianjlaman guidiblagaa guidxliuj din guchajg reeman lasa' ree bën ma naj par Dios.

<sup>28</sup> 'Gol badxe'guiic ni ganin lëjt: Chi ma naquie'n xidx yag higo abi' ma caydxib ree xbalagan, lëjt ragbee guial ma zidyob tiamp nalaa. <sup>29</sup> Ziangajc chi guguaadi ma cayajc ree ni guin, gol gogbee guial ma zidyob dxej gac zi'c ma rnin. <sup>30</sup> Diidxli rnin lëjt guial gra ree ni guin gac chi gad ree bën naban lën ree dxej guie guiët. <sup>31</sup> Guidxliuj në xanyabaa zanijt reen, per da diidxan ad zadëdt gacan cumplid.

<sup>32</sup> 'Per achut ragbee xhie dxejn xhie tëë horan gac ree ni guin, ni'qui ree anjl yu' xanyabaa, ni'qui Xi'n Dios ad ragbeet, tijbzi dux Dad ree Dios ragbee.

<sup>33</sup> Zeel gol gojp cudad, gol guzujsin tëë, gol gurejdx gunab Dios din ad ragbeetidi goc gac zian. <sup>34</sup> Ni guin ree naj zi'c chi ririi tijb bejn rejman zijt. Abi' chi gadaman grii rudëëman dxiin loj tijbgaj ree xmojsaman, rniabee tëëman susin bën rajp ro' port. <sup>35</sup> Yan ziangajc lëjt gol guzujsin, din ad ragbeetidi goc o xhie horan guialan bal chi ma ribej guiaal ya, o garol guiaal, o chi ma rbidxa' guid, o rsildoo. <sup>36</sup> Zeel gol guzusun din bal dxejczy guialan ad guidxaaglojn lëjt ad cayüjntidi zi'c rayal. <sup>37</sup> Abi' ni canin lojdi, loj gradi caninan: Gol guzujsin.

## 14

*Baya'n reeman diidx xhienaag guiniaaz Jesús*

(Mt. 26:1-5; Lc. 22:1-2; Jn.11 :45-53)

<sup>1</sup> Zatio'p dxej riaadx gal lanij pascw, lanij raw ree bejn guiadxtil ni ad yu't levadur. Abi' ree bixhioz rniabee ree bixhioz con ree mext rajc ley, raguuil reeman mod xhienaag gusquiee reeman Jesús, din guiniaaz reeman laaman gugüjt reeman laaman. <sup>2</sup> Per rëb reeman:

—Ad zaguieent ree zian loj ree dxej lanij guin, chitëë gac naquie'.

*Baroob tijb béngunaa perfum guiyc Jesús*

(Mt. 26:6-13; Jn.12 :1-8)

<sup>3</sup> Dxel chi za' Jesús luguiedx Betania lidx Simón, bën gunee reeman leproso, abi' chi zojbaman xan mex cayawaman, bidxin tijb béngunaa ca'man lumejt yu'n perfum ni lasajc wayëjx guial gojchaawnën ganax nardo, zianz guxhalaman ro' lumejt guin persi baroobaman perfum guin guiyc Jesús. <sup>4</sup> Abi' yu' ree bën za' yagaj bidxe'ch, rëb loj lasa' reeman:

—¿Chexc zeel guxhie'man perfum guin? <sup>5</sup> Awa zajc nido'n choon gayuu denario din nüjnan yudar bënprob ree.

Abi' caneeguijdx reeman béngunaa guin.

<sup>6</sup> Per rëb Jesús loj reeman:

—Gol basa'nman. ¿Chexc zeel ruslendi laaman? Zagdxenaj ni beenman con naj. <sup>7</sup> Zianczi sunëdi bënprob ree, abi' zajc güündi laa reeman yudar chi guiëndi, sa'n naj ad ziantczi sunëdi naj. <sup>8</sup> Béngunaa guie beenman ni golguzujman, ma beenchaawxgajman da cuerpan par chi guidxin dxej guiguie'chan. <sup>9</sup> Diidxliczi rnin lëjt, guial guidib loj guidxliuj bantëöz guin guiniee reeman xtiidxza'c Dios, zü ree bejn diidx ni been béngunaa guin con naj din gusaaladx reeman laaman.

*Baguuil Judas mod xhienaag yayüman Jesús*

(Mt. 26:14-16; Lc. 22:3-6)

<sup>10</sup> Judas Iscariote, tijb ree xbejn Jesús, wejman bigneenëman bixhioz rniabee ree bixhioz din yayüman Jesús loj reeman.

11 Chi biguiejn ree bixhioz guin zian, dád babaa reeman. Abi' rëb reeman gudëed reeman milia lojman. Dxel guzuloj raguiilaman mod xhienaag yayüman Jesús.

*Gudawnë ree xbejn Jesús xche*

*(Mt. 26:17-29; Lc. 22:7-23; Jn.13 :21-30; 1Co.11 :23-26)*

12 Dxej ni guzuloj lanij raw ree bén Israel guiadxtil ni ad yu't levdur, chi rugüjt reeman tijb xiildoo par lanij pascw, gunabdiidx ree xbejn Jesús lojman, rëb reeman:

—¿Ban guin rën! yuguieenan ni yadaaw ree guxhin pascw?

13 Dxel guxhaal Jesús tio'p ree xbejnman, rëbaman:

—Gol chej Jerusalén. Ni guguaadi tijb xinguaaw ca' re yu' nijs. Gol chinalix. 14 Abi' lod yayux, gol güjdx loj bén naj lidxan: “Na mextr: ¿Ban lënü gawnë ree xbejnman yan guxhin pascw?” 15 Dxel gulüüman lëjt tijb lënü narooob ni rarojp cwaa, ma najcchaaw lënü guin. Yagaj gol been ni yadaaw ree xche.

16 Dxel brii ree xbejnman wej reeman luguiedx guin, abi' bidxaagloj gajc reeman zi'cgajczi rëbaman, zianz been reeman ni gaw reeman guxhin pascw.

17 Chi gure guiaal, bidxin Jesús con guidxiptio'p ree xbejnman. 18 Dxel chi zojb reeman xan mex cayaw reeman, rëb Jesús loj reeman:

—Diidxliczi rnin lojdi guial tijb lëjt, bén cayawnë naj, laaman yayü naj.

19 Dád guyunaya reeman, abi' guzuloj canabdiidx tijb gaj reeman, rëb reeman lojman:

—¿Najn ya?

Abi' rëb stijbaman:

—¿Wa najn ya?

20 Badxi'man laan rëbaman:

—Loj guidxiptio'pidi, tijb lëjtän, bén cugajdx xguiadxtil loj gajc pliajt lod cugajdx da guiadxtilan, laaman. 21 Walican guial Bén guxhaal Dios naj sacaman zi'c ca loj xtiidx Dios. Per, jprob bén yayü laaman! Zagdxeli naj par laaman ad niutaman loj guidxliuj

22 La'tgaj cayaw reeman, cwa' Jesús guiadxtil abi' badëëman quixtëe loj Dios, dxel gula'man laan badëëman loj reeman, rëbaman:

—Gol gudaw guiadxtil guie, laan naj da cuerpan.

23 Dxel cwa'man tijb cojp yu' vin, chi gulox badëëman quixtëe loj Dios, badëëman cojp guin loj reeman, abi' gra reeman gu' vin yu' lojn. 24 Zianz rëbaman loj reeman:

—Vin guie naj da rejnan ni gaxhie'n chi guiëtan por zien ree bénguidxliuj, din guixal tijb nejz cüb xhienaag gap ree

bejn perdon loj Dios. <sup>25</sup> Naj rni lëjt, ad yu'tri dxej guië'n vin rajcchaawnë uv, xt dxej ni guië'n vin cüb lod rniabee Dios.

*Rëb Jesús guial guiëb Bëd ad nünbeetaman laaman*  
(Mt. 26:30-35; Lc. 22:31-34; Jn.13 :36-38)

<sup>26</sup> Chi gulox biil reeman tijb cant par Dios. Dxel zë reeman ruguia' Olivos. <sup>27</sup> Dxel rëb Jesús loj reeman:

—Graczidi tio'nladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, abi' guire'ch reeb.” <sup>28</sup> Per chi yabanan, yaloj naj ganeed lojdi gan Galilea.

<sup>29</sup> Dxel rëb Bëd lojman:

—Majsi gra reeman tio'nladx lüj, per naj ad zaro'nladxtan lüj.

<sup>30</sup> Badxi' Jesúsán rëbaman:

—Naj rni lüj Bëd, yan guxhin gajc chi gad guid cwidxa' tio'p volt, choon volt mal rëbil guial ad nünbeetil naj.

<sup>31</sup> Per naguiejn rüjn Bëd rëbaman:

—Majsi guiëtnë'n lüj, per ad zëtan guial ad nünbeetan lüj. Abi' graczi reeman rëb zian.

*Rbejdx rniab Jesús Dios lod la Getsemaní*  
(Mt. 26:36-46; Lc. 22:39-46)

<sup>32</sup> Chi bidxin reeman tijb luar la Getsemaní, dxel rëb Jesús loj ree xbejnman:

—Gol gurejsii guie, la'tgaj gabledx ganaaban Dios.

<sup>33</sup> Abi' binëman Bëd, Jacob con Waj, dxel guzuloj guyunayaman abi' ad nixtri yu' luxdooman. <sup>34</sup> Zianz rëbaman loj reeman:

—Yu' naya da't luxdon, rulüü ma gugüjtan naj. Gol baya'n guie ad gaayëjsidi.

<sup>35</sup> Abi' guzaman zata'n, zianz gurerulojman, gunabaman loj Dios, bal zile' téd ni naj sagdiajman. <sup>36</sup> Chi cabejdx canabaman Dios, rëbaman:

—Dad, graczi zajc güünl. Babëë naj loj ni gazaagdiajn. Per ad gac zi'c rënan, rayal gac zi'c rënl.

<sup>37</sup> Dxel ziaman lod baya'n ree xbejnman, chi badxinman cwë' reeman laa reeman naga'yëjs, zianz rëbaman loj Bëd:

—Simón, ¿naga'yëjsil ya? ¿Ni'qui tib hor ad gojct nibejnaal ya? <sup>38</sup> Gol gurenaa, gol gurejdx gunab Dios chitëë güün xindxab lëjt gan. Din rëndi güündi zi'c rayal, per xcuerpidi ad rtiëjbtan.

<sup>39</sup> Dxel zëman zatijb persi gurejdx gunabaman Dios con didix guin gajc ree. <sup>40</sup> Chi badxinman lod riga' reeman, laagajc reeman naga'yëjs zatijb, guial yu' da't bacaal loj reeman, abi' ni'quid radxejlt xhie guiëb reeman lojman. <sup>41</sup> Ni bayon volt badxinman, rëbaman:

—¿Sta naga'yëjsidi ya? ¿Sta cayziiladxidi ya? Gol batie'ch xbaaalidi din naj, najn Bén guxhaal Dios ma bidxin hor yayü reeman naj loj ree béndol. <sup>42</sup> Gol bixche, yo' ree, laa bén yayü naj ma zëéd gajxh.

### *Gunaaz reeman Jesús*

(Mt. 26:47-56; Lc. 22:47-53; Jn.18 :2-11)

<sup>43</sup> Sta caneenë Jesús laa reeman chi bidxin Judas, bén goc tijb ree xbejnman. Bidxinnëman zien ree bejn ca' reeman espad con yag, guxhaal ree bixhioz rniabee ree bixhioz laa reeman con ree mextr rajc ley con ree guxtis Israel. <sup>44</sup> Abi' Judas bén bayü laaman ma bagojnxgajman bén guin ree rëbaman:

—Bén gawan xid, laaman naj bén raguuilidi, gol gunaazaman gol chinëman, gol gojpaman ad guslaadi laaman.

<sup>45</sup> Chi bidxin Judas dxel gubigaman loj Jesús, rëbaman:

—Mextr, Mextr.

Dxel gudawaman laaman xid. <sup>46</sup> Zianz gunaaz ree bén guin laaman din chinë reeman laaman. <sup>47</sup> Per tijb bén za' yagaj gulëë xiespadaman, gutü'man guidiajg xmojs bixhioz rniabee gra ree bixhioz. <sup>48</sup> Dxel rëb Jesús loj ree bén guin:

—¿Chexc zeel zëédidi con espad con yag din chinëdi naj zi'c tijb xingubaan? <sup>49</sup> Zianczi guzunë'n lëjt lën yadooro' Jerusalén rulün lëjt xtiidx Dios, abi' ad gunaaztidi naj. Per gra ree ni guie cayajc din gac cumplid ni ca loj xtiidx Dios.

<sup>50</sup> Dxel graczi ree xbejn Jesús baxüün, guro'nladx reeman laaman.

### *Tijb xin binal Jesús*

<sup>51</sup> Per guyu tijb xinguiag binalix Jesús, nadüübix tijbzi lajd. Abi' chi gunaaz ree bén guin laax, <sup>52</sup> baslaagajquix lajd guin, zigxüünt ziladix.

### *Za' Jesús loj ree guxtis*

(Mt. 26:57-68; Lc. 22:54-55, 63-71; Jn.18 :12-14, 19-24)

<sup>53</sup> Dxel binë reeman Jesús loj bixhioz rniabee gra ree bixhioz, abi' badxaag lasa' ree bixhioz rniabee ree bixhioz con ree guxtis Israel con ree mextr rajc ley. <sup>54</sup> Abi' zijt zijt binal Bëd Jesús xt rule' lidx bixhioz guin, dxel gurejman rudëj con ree bén rajp rulidx bixhioz guin,

<sup>55</sup> Abi' ree bixhioz rniabee ree bixhioz con gra ree guxtis, baguüil reeman mod xhienaag gutedia' reeman Jesús din chile' gugüjt reeman laaman, per ad badxejlt xhienaag nutedia' reeman laaman, <sup>56</sup> majsi zien reeman rudxiib diidx rusquiee guijcaman, per garent garen rëb tijb gaj reeman. <sup>57</sup> Dxel guzuli tio'p choon reeman gunee reeman diidx rusquiee ree contr laaman, rëb reeman:

58 —Dunuyn baguiejn rëbix: “Naj guse'n yadooro' Jerusalén ni been ree bejn, abi' choon dxejzi yayünanan sin xyudar ree bejn.”

59 Per ni'qui zian ad guneet reeman tibloj, garent garen gunee reeman.

60 Dxel bixhioz rniabee gra ree bixhioz guzuliman galay ree bén riga' yagaj, abi' gunabdiidxaman loj Jesús, rëbaman:

—¿Nid xhie diidx yadxi'l ya? ¿Wali ni canee reeman contr lüj ya?

61 Per achetczi rëb Jesús, ad badxi'taman diidx, dxel gunabdiidx bixhioz rniabee guin lojman zatijb, rëbaman:

—¿Lüj naj Cristo ya, Xi'n Dios Bén nagle'?

62 Badxi' Jesúsán rëbaman:

—Walican, najcan. Abi' lëjt zuguaadi naj najn Bén guxhaal Dios zooban xladbee Dios Bén ca' gra guialrniabee guguaa tëedi naj guialan loj zaj xanyabaa.

63 Chi biguiejn bixhioz guin zian, gudixya' xabaman, dxel rëbaman:

—Ad rüjntri naguiejn yadiil ree testiw. 64 Lëjt ma biguiejn caneeguijdxix Dios. Yan, ¿xhie nadi?

Abi' graczi reeman rëb, guiëtamán.

65 Yu' reeman rucojp xhiejn lojman, ruta'cw tëe reeman lojman, dxel riguin reeman laaman, rëb reeman:

—¡Guneeya' chu gudin lüj!

Guiáad ree bén rajp yagaj wëez reeman lojman.

*Rëb Bëd ad nünbeetaman Jesús*

*(Mt. 26:69-75; Lc. 22:56-62; Jn.18 :15-18, 25-29)*

66 Chi za' Bëd rule' guin, dxel bidxin tijb béngunaa rüjn dxiin lidx bixhioz rniabee guin. 67 Chi baguaaaman zojb Bëd rudëj guin cucha'man, baguaaaman lojman, dxel rëbaman:

—Në lüj za'në Jesús bén Nazaret.

68 Per gurexuu Bëd rëbaman:

—Ad nünbeetan laaman, ad ragbeetan xhienin rnieel.

Chi bariiman ro' port guin, dxel guridxa' gujd. 69 Dxel baguaa béngunaa guin Bëd zatijb, zianz guzuloj rëbaman loj ree bén riga' yagaj:

—Në bén guin naj xbejn Jesús.

70 Per gurexuu Bëd zatijb. Gojc xchejdoo rëb ree bén riga' yagaj loj Bëd:

—Walican në lüj naj xbejnx din xin Galilea lüj, abi' zi'cgajc rniee reeman rnieel.

71 Per guzudxi'ch Bëd con ni rëbaman, zianz rëbaman:

—Gudëed Dios naj casti bal rusquieen, ad nünbeetan bén nadi.

<sup>72</sup> Loj hor zii gajc barojp volt guridxa' guïd. Dxel basaaladx Bëd guial rëb Jesús lojman: “Chi gad guïd cwidxa' tio'p volt, mal gojc choon volt rëbil ad nünbeetil naj.” Chi basaaladxman zian, dxel guzuloj cayoonman.

## 15

### *Binë reeman Jesús loj Pilato*

(Mt. 27:1-2, 11-14; Lc. 23:1-5; Jn.18 :28-38)

<sup>1</sup> Chi bareguiaal rsildoo, badxajg lasa' ree bixhioz rniabee ree bixhioz con ree guxtis Israel në ree mextr rajc ley con gra ree guxtis, abi' baya'n reeman diidx xhienaag güün reeman. Dxel guxhii reeman Jesús binë reeman laaman loj Pilato.

<sup>2</sup> Abi' gunabdiidx Pilato loj Jesús rëbaman:

—¿Lüjn naj xrey ree bën Israel ya?

Badxi' Jesús laan rëbaman:

—Najcan.

<sup>3</sup> Abi' ree bixhioz rniabee ree bixhioz zien ni rudxiib reeman guijcaman, <sup>4</sup> zeel gunabdiidx Pilato lojman zatijb, rëbaman:

—¿Nid xhie diidx yadxi'l ya? Baguiaa dád zien ni rudxiib reeman guijquil.

<sup>5</sup> Per achetczi badxi' Jesús, zeel dád badxa loj Pilato

### *Gunabee reeman guiët Jesús*

(Mt. 27:15-31; Lc. 23:13-25; Jn.18 :38-19:16)

<sup>6</sup> Loj ree dxej lanij pascw, ruslaa Pilato tijb bën yu' ladxguiib, bën rëb ree bën guiedx guin guslaaman. <sup>7</sup> Lën ree dxej zii yu' bën la Barrabás ladxguiib con ree ben ren, bën bagüjt ree bejn loj tijb wadijl ni been reeman contr gobiarn.

<sup>8</sup> Dxel chi bido'p ree bejn, rëb reeman loj Pilato din güünman zi'c naj costumbr, <sup>9</sup> Abi' rëb Pilato loj reeman:

—¿Rëndi ya guslaan xreydi?

<sup>10</sup> Rëbaman zian guial ragbeeman bayü ree bixhioz guin laaman por guial rdédlojzi reeman laaman. <sup>11</sup> Per ree bixhioz rniabee guin badxe' reeman bejn ree diidx din guiëb reeman loj Pilato guslaaman Barrabás. <sup>12</sup> Abi' gunabdiidx Pilato loj reeman rëbaman:

—¿Xhie rëndi günnë'n bën nadi naj xreydi?

<sup>13</sup> Dxel gurixdiaj reeman rëb reeman:

—¡Bacaax loj crüjz!

<sup>14</sup> Zianz rëb Pilato loj reeman:

—Per ¿xhieza ni mal beenx?

Guiáad laa reeman mazri rbixdiaj reeman, rëb reeman:

—¡Bacaax loj crüjz!

<sup>15</sup> Abi' guial rën Pilato yaya'nman zagdxe loj reeman, zeel baslaaman Barrabás, gunabeeman a Jesús, dxel bayüman laaman loj reeman din tiaman loj crüjz.

<sup>16</sup> Abi' binë ree xin suldad guin Jesús xlule' palas, yagaj badxaag lasa' gra reex. <sup>17</sup> Abi' bascajcw reex laaman tijb lajd murad, dxel been reex tijb coron guiëjch badxe' reex guijcaman. <sup>18</sup> Dxel guzuloj rbixdiaj reex rëb reex:

—¡Guibanri xrey ree bën Israel!

<sup>19</sup> Zianz rugaz reex var guijcaman, rulaa xhiejn reex lojman, abi' ruzuxib reex lojman. <sup>20</sup> Chi gulox baze' reex laaman, babëë reex lajd murad guin ladaman, bascajcw reex xabczaman, dxel zinë reex laaman din gucaa reex laaman loj crüjz.

*Bacaa reeman Jesús loj crüjz*

(Mt. 27:32-44; Lc. 23:26-43; Jn.19 :17-27)

<sup>21</sup> Chi zinë reex Jesús, badxaagloj reeman tijb bën Cirene, laman Simón, xdad Lejandr con Rufo, ziaadaman bazaman dajn. Abi' been ree suldad guin naguiejn biaaman xcrüjz Jesús.

<sup>22</sup> Abi' binë reex Jesús luar la Gólgota, rën guiëban Calaver. <sup>23</sup> Yagaj badëed reex vin no'ch ni la mirra lojman din guië'man laan, per ad gu'taman laan. <sup>24</sup> Chi ma bacaa reex laaman loj crüjz, dxel gudxijt reex suert guijc xabaman din guidoon xhie yayal tijbgaj reex

<sup>25</sup> Raca gaa rsil bacaa reex laaman loj crüjz. <sup>26</sup> Guijc crüjz guin bacaa reex lejtr ni rëb chexc zeel bacaa reex laaman loj crüjz, rëban: “Xrey ree bën Israel.” <sup>27</sup> Chi bacaa reex laaman loj crüjz, në zatio'p ree xin gubaan bacaa reex loj crüjz, tijbix cwa xladbeeman, zatijbix cwa xladruvejsaman. <sup>28</sup> Zian gojc cumplid ni ca loj xtiidx Dios, lod rëb: “Nayabaman loj ree benmal.”

<sup>29</sup> Abi' ree bën ridëd yagaj ruze' reeman laaman runij guijc reeman, rëb reeman:

—Conza ni rnieel guial rëbil, yase'nl yadooro' Jerusalén abi' loj choon dxejzi ma bayüjnlan zatijb, <sup>30</sup> yan baslaa lüj gajc baguiajt tëë loj crüjz zii.

<sup>31</sup> Ziangajc ruze' ree bixhioz rniabee laaman con ree mextr rajc ley, rëb reeman:

—Gognëx ben ren ree, guiáad laax ad rajct ruslaa laagajquix. <sup>32</sup> Yaguiajtix loj crüjz guin, bal laax naj Cristo, xrey ree bën Israel, din yaguaiaa ree, dxel yaliduladx ree.

Xt në ree xingubaan canëman loj crüjz guneeguijdx laaman.

*Güjt Jesús*

(Mt. 27:45-56; Lc. 23:44-49; Jn.19 :28-30)



<sup>33</sup> Chi gol garol dxej, bicajy guidib guidxliuj xt raca choon wadxe. <sup>34</sup> Dxel raca choon guin gurixdiaj Jesús rejs, rëbaman: —Eloi, Eloi, ¿lama sabactani? —rën guiëban: Diosan, Diosan, ¿chexc zeel gulëëladxil naj? <sup>35</sup> Yu' ree bën za' yagaj biguiejn, abi' rëb reeman:

—Gol bacaagdiajg niad. Laax cabejdx Elías bën badëë xtiidx Dios loj ree bejn.

<sup>36</sup> Dxel ruxüün tijbaman, bicajdxaman tijb xiil loj vinagr, bacaaman laan loj tijb yag, abi' bacaaman laan ro' Jesús din guië'man laan, rëbaman:

—Gol basa'nx, yaguaiaa ree don zi't Elías yalet laax loj crüzj guin ya.

<sup>37</sup> Per Jesús dád rejs gurixdiajman, dxel güjtaman. <sup>38</sup> Loj hor zii goxya' lajd nal lën yadooro' Jerusalén, gojcan tio'p lala', diizd guijc guin xt guia' guin goxya'. <sup>39</sup> Dxel suldad rniabee ree suldad guial za'x niz loj Jesús. Chi baguiaax xhienaag güjtaman, rëbix:

—Walican, Xi'n Dios bën guin.

<sup>40</sup> Në tio'p choon ree béngunaa za' zijt ruguiaa ni cayajc. Loj ree béngunaa guin no'ch María Magdalena, në Salomé në Li xniaa Xiëb con Jacob bën naj benguiag loj Xiëb. <sup>41</sup> Béngunaa guin ree binal Jesús, been tëë reeman laaman yudar chi guzuman Galilea, në zien ree béngunaa ren binal laaman diizd Galilea xt Jerusalén.

### *Biguie'ch Jesús*

*(Mt. 27:57-61; Lc. 23:50-56; Jn.19 :38-42)*

<sup>42</sup> Chi bidxin dxej rüjn ree bën Israel gra, chi guixiezi naj dxej raziiladx reeman, ma cabej guiaal, <sup>43</sup> bidxin Xiëb bën za guiedx Arimatea. Gojcaman tijb xguxtis ree bën Israel, abi' gojp ree bejn laaman respejt, në laaman rbëz xguialrniabee Dios, abi' guyuman valor wejman loj Pilato, persi banabaman xcuerp Jesús. <sup>44</sup> Dád badxa loj Pilato guial ma güjt Jesús, dxel gurejdxaman xin suldad rniabee ree suldad persi gunabdiidxaman bal walin. <sup>45</sup> Abi' rëb suldad guin guial walican ma güjtaman, dxel cwëjb Pilato baca' Xiëb cuerp guin. <sup>46</sup> Guzii Xiëb tijb lajd, abi' chi baletaman xcuerp Jesús loj crüzj guin dxel batüübaman laaman lajd guin, biquie'chaman laaman lën tijb baa ni bidëën lën tijb guiaj, dxel basiaawaman ro' baa guin con tijb guiajro'. <sup>47</sup> María Magdalena con Li xniaa Xiëb, baguiaa reeman lod baquie'ch reeman Jesús.

## 16

### *Raban Jesús*

*(Mt. 28:1-10; Lc. 24:1-12; Jn.20 :1-10)*

<sup>1</sup> Chi gudëd dxej raziiladx ree bejn, María Magdalena, në Salomé, në Li xniaa Jacob, bisii reeman perfum din chitëeb reeman laan xcuerp Jesús. <sup>2</sup> Bareguiaal chidumingw, rsildoo brii reeman wej reeman ro' xbaa Jesús, naabzi rliejn gubijdx. <sup>3</sup> Chi zë reeman lunejz, rëb loj lasa' reeman:

—¿Chuza chisüd guiaj nayaaw ro' baa guin?

<sup>4</sup> Per chi bidxin reeman baguiaa reeman ma biniib guiaj za' ro' baa guin ad za'tri loj xluaran. <sup>5</sup> Chi guyu reeman lën baa guin, baguiaa reeman tijb xinguiag zobjix ladbee, najcwix lajd naquich yool, abi' bidxeb reeman. <sup>6</sup> Per rëbix loj reeman:

—Ad rdxebidi, raguiilidi Jesús bën Nazaret bën cwa loj crüjz. Per ma babanman, achutri laaman guie, gol baguiaa lod gudixh reeman laaman. <sup>7</sup> Yan, gol chej gol chiguiedx loj Bëd në loj los demazri ree xbejnman guial yaloj Jesús ned cheman Galilea dxel chedi, ni guguiaadi laaman zi'c ma naman lojdi.

<sup>8</sup> Dxel cari da't barii ree bégunaa guin lën baa guin, dád canij reeman cadxeb reeman, abi' achut loj rëb reeman guial rdxeb reeman.

*Balüüloj Jesús loj María Magdalena  
(Jn. 20:11-18)*

<sup>9</sup> Chi ma baban Jesús, chidumingw rsildoo, yaloj loj María Magdalena balüülojman, bën babëëman gajdx xindxab luxdoo. <sup>10</sup> María Magdalena guin bicojn ree xbejn Jesús, bën yu'naya ree roon tëë reeman por laaman. <sup>11</sup> Chi biguiejn reeman guial naban Jesús baguiaa tëë María Magdalena laaman, ad bililadxt reeman.

*Balüüloj Jesús loj tio'p ree xbejnman  
(Lc. 24:13-35)*

<sup>12</sup> Chi gudëd gojc zian, garen balüüloj Jesús loj tio'p ree xbejnman lunejz chi zë reeman niz dajn. <sup>13</sup> Dxel bën guin ree bicojn lasa' reeman, per ni'qui laa reeman ad bililadxt reeman.

*Rucaabee Jesús bën naj ree apóstoles  
(Mt. 28:16-20; Lc. 24:36-49; Jn. 20 :19-23)*

<sup>14</sup> Ni bigratë balüüloj Jesús loj za chiptib ree xbejnman, chi zobj reeman xan mex cayaw reeman, gudilëman laa reeman guial nad reeman, ad rliladxt reeman bën baguiaa ree laaman guial ma babanman. <sup>15</sup> Dxel rëbaman loj reeman:

—Gol chej guidib guidxliuj, gol chigtie'ch xtiidxza'c Dios loj gra ree bejn. <sup>16</sup> Bën chililadx tiobnijs tëë zajcaman perdon loj Dios. Per bën ad zaliladxt xtiidxza'c Dios, laaman yayal casti. <sup>17</sup> Sen guie ree gap ree bën chililadx naj: Por da guialrniabeen zabëë reeman xindxab luxdoo ree bejn, zanee tëë reeman diidx ren ree, <sup>18</sup> zanaaz reeman bëël ree, abi' majsi guië'

reeman ni yu' venen guijc achet gac reeman, chi gudxiib yaa reeman guijc ree bénragxuu, zayajc reeman.

*Bayë'p Jesús xanyabaa*

*(Lc. 24:50-53)*

<sup>19</sup> Chi gulox guneenë Dad Jesús laa reeman, dxel bayë'paman xanyabaa, gurejman xladbee Dios. <sup>20</sup> Guiáad laa reeman brii reeman zigtie'ch reeman xtiidxza'c Dios guidibczi. Abi' Dad Jesús gognë laa reeman, been reeman milagr ree, persi gogbee ree bejn guial xtiidxqui Dios naj ni rníee reeman. Amén.

## Xtiidxza'c Jesucrist ni bacaa San Lujc

### *Rxhiaal Lujc gui'ch loj Teófilo*

<sup>1</sup> Zien ree bèn ma been naguiejn gucaa ni goc con dunuj ree, <sup>2</sup> zi'cgajczi balüü ree bejn dunuj ree, bèn baguiaa ree diizd guia'xchej ni been Jesús nē ni guzacaman, gutie'ch tēē ree-man xtiidxaman. <sup>3</sup> Naj baguilxnejzchaaw diizd guia'xchejn, dad Teófilo, zeel naladxan zagdxen gucanan xnejz par lüj, <sup>4</sup> din chignia'l zagdxē diidxli balüü reeman lüj.

### *Rugojn tijb anjl gal Waj*

<sup>5</sup> Tiamp gunabee rey Herodes guidib niz Judea, guyu tijb bixhioz brii laj Zacarías, bachajgaman tib cwaa ree bixhioz brii laj xbejn Abías. Xbéngunaa Zacarías brii laj Elisabet, zaman loj xdiaa bixhioz brii laj Aarón. <sup>6</sup> Grop reeman gubajn xnejz loj Dios bazooob tēē reeman diidx graczi ni rniabee Dios, abi' achut rile' guiēb guial rajp reeman dol. <sup>7</sup> Per achut xi'n reeman guyu guial ad gojct niu xi'n Elisabet, grop reeman ma naj bengol.

<sup>8</sup> Tijb dxej ni bayal ree bixhioz no'ch Zacarías loj, been reeman sirv loj Dios, <sup>9</sup> zi'c naj xcostumbr ree bixhioz guin, gudxijt reeman suert din guidoon chu yayal gudxe' goxyaal lēn yadooro' Jerusalén, abi' bayal Zacarías cu'man goxyaal guin. <sup>10</sup> La'tgaj cagu'man goxyaal guin, gra ree bejn riga' lule' cabejdx canab reeman Dios. <sup>11</sup> Dxel balüüloj tijb xianjl Dios loj Zacarías, za'liman xladbee altar lod cayu goxyaal guin. <sup>12</sup> Chi baguiaa Zacarías anjl guin, ad badxejlt xhie nünman, dád bidxebaman. <sup>13</sup> Per rēb anjl guin:

—Zacarías, ad rdxebil ma bacaagdiajg Dios ni gunabil. Chu' xi'n xbéngunaa Elisabet, gaquix xinguaaaw abi' yagu'l lajx Waj. <sup>14</sup> Yabaa da'til, nē zien ree bejn yabaa chi galix, <sup>15</sup> guial gaquix xin lasajc loj Dios. Ad zē'tix vīn ni'qui ni gusüdx laax. Abi' diizd chi gadix gal mal za'nē xSprijt Dios laax. <sup>16</sup> Por laax zien ree bèn Israel yayejc loj xDad reeman Dios. <sup>17</sup> Laax ned lojman, chu' xSprijt Dios luxdoox gap tēēx guialrniabee zi'c Elías, bèn badēē xtiidx Dios loj ree bejn, yabe'cdxex bèn naj ree dad con xi'n reeman, guliü tēēx bèn ad ruzoobt ree diidx din guzuxnejzix bejn ree guidxga' reeman laaman chi gui'taman.

<sup>18</sup> Dxel rēb Zacarías loj anjl guin:

—¿Xhienaag gagbeen guial gac cumplid ni nal? Din naj con da béngunaan ma nayajcan bengol.

<sup>19</sup> Badxi' anjl guinan rēbaman:

—Naj naj Gabriel, rünan sirv loj Dios, laaman guxhaal naj zidnë'n diidxza'c guie lojl. <sup>20</sup> Per yan guial ad bililadxtil da diidxan, yaya'nl gop ad zajct guinieel xt guidxin dxej gal xindo guin.

<sup>21</sup> Guiáad ree ben riga' lule' guin cabëz reeman Zacarías yu' nawëëg reeman guial cayaglaaman lën yadoo guin. <sup>22</sup> Chi bariiman ad rajctri rnieeman, gaz sen rüjnman guial ma baya'nman gop. Dxel gogbee reeman guial yu' xhie baguiaaman lën yadoo guin.

<sup>23</sup> Zianz baza' ree dxej ni been Zacarías sirv lën yadoo guin, dxel zia lidxaman. <sup>24</sup> Chi gudëd ree dxej guin, guyu xi'n xbéngunaaman Elisabet. Gaay bëëw tib guyuzaman lëñü, rëbaman: <sup>25</sup> “Ze naj ni beennë Dios naj lën ree dxej guie chitëë guze'ri ree bejn naj.”

### *Rugojn tijb anjl Li gal Jesús*

<sup>26</sup> Ni goc xho'p bëëw, guxhaal Dios anjl la Gabriel luguiedx Nazaret ni riga' niz Galilea, <sup>27</sup> din chignajman tijb biinxdüb lam Li. Ma naj tia' tijb xin la Xiëb laam, xin zëed loj xdiaa rey Davi.

<sup>28</sup> Guyu anjl guin lod yu' Li abi' rëbaman:

—iXchan Li, Dios ma gulej lüj! Dios za'në lüj, ma beenle' tëëman lüj loj gra ree béngunaa.

<sup>29</sup> Chi baguiaa Li anjl guin dád badxa lojm guial rëbaman zian, abi' gunabdiidxim xhie rën guiëb ree diidx guin. <sup>30</sup> Dxel rëb anjl guin:

—Li, ad rdxebil din lüj gule Dios beenle' tëëman lüj. <sup>31</sup> Chu' xi'nl, abi' chi galaman yagu'l lajman JESÚS. <sup>32</sup> Laaman gac bën zojbloj, guiniee ree bejn laaman Xi'n Dios bën yu' xanyabaa. Güün dux Dad ree Dios laaman rey zi'c goc xdiaagulalaman Davi, <sup>33</sup> din nabeeman bën Israel ree xt goctëëz, abi' xguialrniabeeman ad yu't dxej loxan.

<sup>34</sup> Dxel rëb Li loj anjl guin:

—¿Xhienaag chu' da xi'n nan awa achut bénguiaaw nabannë'n?

<sup>35</sup> Badxi' anjl guinan rëbaman:

—Por xSprijt Dios chu' xi'nl, abi' xguialrniabee Dios bën yu' xanyabaa gusiaawan guijquil con xbalan. Zeel xi'nl bën gal, gacaman naya nali abi' guiniee ree bejn laaman Xi'n Dios. <sup>36</sup> Ziangajc lasa'l Elisabet ma yu' xi'nman, majsi ma najman bengol, bën rëb ree bejn ad zajct chu' xi'n, per yan ma gojc xho'p bëëw yu' xi'nman. <sup>37</sup> Din Dios graczi zajc güünman.

<sup>38</sup> Dxel rëb Li loj anjl guin:

—Dios naj bën rniabee naj, gacza zi'c rënman.

Ziat anjl guin.

### *Rignaj Li Elisabet*

<sup>39</sup> Lën ree dxej guin wej Li cari da't tijb guiedx ni riga' laḁ ree guia' niz Judea, <sup>40</sup> dxel guyum lëñü lidx Zacarías, bagajpdiozim Elisabet. <sup>41</sup> Chi biguiejn Elisabet cha'm cugajpdiozim laaman, laa baniib gajc xindobëz yu' lënman, dxel guyu xSprijt Dios luxdooman guidiblagaa. <sup>42</sup> Abi' gunee Elisabet rejs, rëbaman:

—¡Dios ma beenle' lüj loj gra ree béngunaa, beenle' tēeman bejndobëz yu' lën! <sup>43</sup> ¿Chuzá najn zeel zidganaj xniaa da Diosan naj, bën rniabee? <sup>44</sup> Din biguiejnzan cha'l bagajpdiozil naj, laa baniib gajc da bindoon lënan guial babaam. <sup>45</sup> Xiquilbaal guial bililadxil, din gac zi'c bagojn Dios lüj.

<sup>46</sup> Dxel rëb Li:

Ruzatan Dios zagdxe,

<sup>47</sup> rabaanë' tēen laaman, guial ragnëman naj.

<sup>48</sup> Guial baguiaaman naj, majsi biin rüjnzi sirv lojman naj.

Abi' diizd yan xt goctëez guza't ree bejn naj, guiëb reeman xiquilbaam.

<sup>49</sup> Din Dios, bën rniabee, dád zro' naj ni ma beennëman naj.

Naya naliman.

<sup>50</sup> Ad rbëzt rayaman graczi ree bën ruzoob xtiidxaman.

<sup>51</sup> Zro' naj ni ma beenman con xguialrniabeeman.

Base'nman xixgab ree bën rüjn benro',

<sup>52</sup> biquiedaman guialrniabee loj ree bën rniabee,

guiáad loj ree bën ad zojblojt badëëman guialrniabee loj reeman.

<sup>53</sup> Badëëman guialnaza'c loj ree bën biaadx guialraw,

guiáad ree benrijcw basa'nman laa reeman zezi.

<sup>54</sup> Gognëman bën Israel ree, xbejnman,

abi' ad bayanladxtaman nayaman laa reeman,

<sup>55</sup> zi'c rëbaman loj dux béngulal ree,

Abraham në loj ree xdiaaman.

<sup>56</sup> Abi' baya'nnë Li Elisabet cost choon bëëw, dxel baguiaj lidxim.

### *Rajl Waj*

<sup>57</sup> Chi bidxin dxej gojl xi'n Elisabet najx xinguaaw. <sup>58</sup> Abi' gogbee ree lasa'man në ree bën zojb gajxh guial baya Dios laaman, dád babaa reeman bignaj reeman laaman. <sup>59</sup> Chi ma gojc xindobëz guin toxman, dxel binë reeman laax guyux sen ni ru ree bën Israel. Abi' guyën reeman nagu' reeman lajdoox Zacarías zi'c la xdadix, <sup>60</sup> per gunee xniaax, rëbaman:

—Ad zayutan zian. Rayal gaquim Waj.

<sup>61</sup> Dxel rëb reeman lojman:

—¿Chexquiza zeel gaquix Waj? Achut ree lasa'l la zian.

<sup>62</sup> Abi' con sen gunabdiidx reeman loj xdad xindobëz guin chu rënman grii lajx. <sup>63</sup> Zianz gunabaman tiblia' tabl abi'

bacaaman lojn: “Waj grii lajx.” Dád badxaløj gra ree b́en guin.  
 64 Loj hor ziigajc gojc banee Zacarías, abi' guzuløj cuza'taman  
 Dios zagdx. 65 Gra ree b́en zøjbnëman gajxh dád badxa loj  
 reeman, xt gra ree guiedx riga' lađ ree guia' niz Judea gogbee  
 reeman graczi ni goc. 66 Guiáad graczi ree b́en gogbee zian,  
 rniabdiidx loj lasa' reeman, rëb reeman:

—¿Chu gac xindo guin ya'n chi ni'six?

Rëb reeman zian guial laa rguien gajc ma beenle' Dios laax.

### *Ni gunee Zacarías*

67 Zacarías, b́en naj xdad xindo guin guyu xSprijt Dios  
 luxdooman guidiblagaa, zianz guzuløj caneeman, rëbaman:

68 Benza'c bendxoon naj Dios, dux Dad ree nayajc ree b́en  
 Israel,

guial bi'taman bidganajman dunuj ree nayajc ree xbejnman,  
 bidgalëë tëëman dunuj ree loj ni cayza'c ree.

69 Guxhaalaman tijb b́en rajp guialrniabee din yabëëman  
 dunuj ree loj ni cayza'c ree,

zëëdaman loj xdiaa rey Davi, b́en naj xbejn Dios.

70 Zi'c been Dios promejs diizd gocli, zian gunee ree b́en badëë  
 xtiidxaman loj ree bejn, b́en guban ree zi'c rënman:

71 guial yabëëman dunuj ree loj ree b́en ralen dunuj ree, në loj  
 gra ree b́en yu'xyajn dunuj ree,

72 yaya tëëman dux béngulal ree,

abi' ad zayanladxtaman promejs ni beenman.

73 Ni ne naj promejs ni beenman loj dux béngulal ree Abra-  
 ham:

74 guial yabëëman dunuj ree loj ree b́en ralen dunuj ree,

din chile' yaguieen ree sirv lojman sin guialrdxeb,

75 yabajn ree yaguieen tëë ree zi'c rënman, guidib tiamp ni  
 yabajn ree.

76 Guiáad lüj xi'n, guiniee ree bejn lüj b́en rudëë xtiidx Dios loj  
 ree bejn, Dios yu' xanyabaa.

Din nedil chiguieenchaawil xnejz b́en naj Dad,

77 gulüü tëël xbejnman din gagbee reeman xhienaag gac xtol  
 reeman perdon,

laa tëë reeman loj casti.

78 Guial raya da't dux Dad ree dunuj ree,

zeel guxhaal xi'nman, b́en naj zi'c xbacha' gubijdx din gusni-  
 man du loj ree,

79 guixhial tëëman xquiarguejñ ree b́en zë loj nejzmal, b́en ad  
 nabant ree xnejz zi'c rën Dios,

gulüü tëëman dunuj ree yadxoo ree loj xnejzaman din yabajn  
 ree zagdx sin wadijl.

<sup>80</sup> Guiáad xindo guin guni'six guyu tëë xquiarguiejnx mazri por Dios. Guzujx loj yujbidx, xt bidxin dxej gunee xtiidx Dios loj ree bén Israel.

## 2

### *Rajl Jesús*

*(Mt. 1:18-25)*

<sup>1</sup> Lën ree dxejzii gunabee rey César Augusto guiyab gra ree bejn guidib lod rniabeeman. <sup>2</sup> Laan naj ni yaloj biyab ree bejn chi goc Cirenio gobernador Siria. <sup>3</sup> Graczi ree bejn naj yaguij ladx ladx din guiyab reeman. <sup>4</sup> Zianan zeel brii Xiëb luguiedx Nazaret ni riga' niz Galilea, wejman Belén, ni riga' niz Judea, lod gol rey Davi din loj xdiaa rey Davi zëed Xiëb. <sup>5</sup> Wejman binëman Li, lacheelaman din guiyab reeman. Ma yu' xi'n Li. <sup>6</sup> Abi' la'tgaj za' reeman Belén, bidxin dxej gojl bejndobëz guin. <sup>7</sup> Yagaj gol xi'n yaloj Li, dxel batüübaman bejndobëz guin lajd, gudijxhaman laaman lod ru ni raw ree be, guial ad bidxejlt lënü naya'n reeman.

### *Bidxin ree xianjl Dios lod za' ree bén rajp xiil*

<sup>8</sup> Gajxh Belén guin za' ree bén rajp xiil, abi' dajn guin gajc rdëd reeman guiaal rajp reeman laa reeb. <sup>9</sup> Dxejczy balüüloj tijb xianjl Dios loj reeman, naynidxuj basni xbiani Dios lod riga' reeman abi' dád bidxeb reeman. <sup>10</sup> Per rëb anjl guin loj reeman:

—Ad rdxebidi din zidnë'n diidxza'c lojdi, por laan yabaa gra ree bejn. <sup>11</sup> Yan, ladx rey Davi ma gojl bén yabëë lëjt loj ni cazajquidi, laaman naj Cristo, laaman naj Dad. <sup>12</sup> Abi' din yayünbeedi laaman; nadüübaman lajd, naga'man lod ru ni raw ree be.

<sup>13</sup> Dxejczy balüüloj zien da't ree anjl cwë' anjl yaloj guin, ruza't reeman Dios zagdxë, rëb reeman:

<sup>14</sup> ¡Benza'c bendxoon naj Dios bén yu' xanyabaa, abi' loj guidxliuj yabe'cdxëman luxdoo bén rüjn ree zi'c rënman!

<sup>15</sup> Chi ma zia ree anjl guin xanyabaa, dxel rëb loj lasa' ree bén rajp ree xiil guin:

—Yo' ree Belén yuquiaa ree ni goc ni, zi'c ma bagojn dux Dad ree Dios dunuj ree.

<sup>16</sup> Dxel cari da't zë reeman, abi' bidxaagloj reeman Li në Xiëb, nëtëë bejndobëz guin naga'man lod ru ni raw ree be. <sup>17</sup> Chi baguiaa reeman laaman, be reeman diidx ni rëb anjl guin loj reeman xcwent bejndobëz guin, <sup>18</sup> abi' graczi ree bén biguiejn dád badxa loj reeman ni rëb ree bén rajp ree xiil guin. <sup>19</sup> Per Li, rgu'chaaw luxdooan gra ni rucaagdiajgaman, rüjn tëëman laan xgab. <sup>20</sup> Dxel zia ree bén rajp ree xiil guin, rabaa



reeman rudëe tëe reeman quixtëe loj Dios por gra ni baguiaa reeman biguiejn tëe reeman, guial gojc zi'c rëb anjl guin loj reeman.

*Binë reeman Jesús lën yadooro' Jerusalén*

<sup>21</sup> Chi ma gojc toxman gojl bejndobëz guin, badxe' reeman laaman sen ni ru ree bën Israel, bagu' tëe reeman lajman Jesús zi'c rëb anjl guin loj Li chi gad Jesús gacxhiey lënman.

<sup>22</sup> Chi bayaaloj ree dxej ni been Li zi'c rüjn ree béngunaa rajl xi'n, dxel binë reeman bejndobëz guin loj Dios lën yadooro' Jerusalén. <sup>23</sup> Been reeman zian din loj ley guin ca: "Gra ree xindoniguiaaw rajl yaloj ma naj reex par Dios." <sup>24</sup> Abi' binë reeman gon par Dios zi'c rniabee ley: rayal chinë reeman tio'p gugdoo o tio'p palomdoo.

<sup>25</sup> Tiamp zii zojb bën la Simeón Jerusalén. Najman benza'c rën tëeman Dios, rbëzaman bën gagnë bën Israel ree za'në tëe xSprijt Dios laaman. <sup>26</sup> Abi' por Sprijt guin gogbeeman guial ad zëjttaman xt guguaaman Cristo, bën guixhiaalaman. <sup>27</sup> Dxel por xSprijt Dios wejman lën yadooro' Jerusalén. La'tgaj yu'man lën yadoo guin, Xiëb con Li bidxinnë reeman Jesús din güün reeman zi'c rniabee ley, <sup>28</sup> zianz gudiidx Simeón bejndobëz guin baza'taman Dios zagdxe, rëbaman:

<sup>29</sup> Dad, yanri ma babedxe luxdon.

Ma zajc guslaal naj guiëtan

najn xmojsil, ma gojc zi'c nal.

<sup>30</sup> Din con quijb guiaalon ma baguian bën gagnë dunujn.

<sup>31</sup> Guial ma bazujl laaman loj gra ree bénguidxliuj.

<sup>32</sup> Laaman naj biani par ree bën ad najt bën Israel, naj tëeman bacha' par ree xbën Israelil.

<sup>33</sup> Guiáad Xiëb con xniaa Jesús dád badxa loj reeman ni biguiejn reeman rëb Simeón xcwent bejndobëz guin. <sup>34</sup> Dxel beenle'man laa reeman, zianz rëbaman loj Li xniaa Jesús:

—Li, Dios bacaabee bejndobëz guie din por laaman zien da't ree bën Israel laa loj dol, per zien reeman yaya'n loj xtol. Zidgalüüman bejn ree conin naj ni ruladx Dios, per zien reeman ad zënt laaman. <sup>35</sup> Abi' zian gagbeeman xhienaag naj xixgab tijbgaj bejn, guiáad lüj zi'c tijb espad chëez luxdool chi gac ree ni guin.

<sup>36</sup> Yagaj gajc za' tijb béngunaa yo'xh laman Ana, rudëeman xtiidx Dios loj ree bejn, xdadaman brii laj Fanuel, xdiaagualalaman gojc Aser. Benguiagan chi cwa' xinguaaw laaman, abi' gajdx ijsi gubajnnë lacheelaman. <sup>37</sup> Ma gojc tajpgajlbitap ijz baya'nman bizëjb. Zianczi yu'man lën yadooro', rba'nman rbejdx rniab tëeman Dios. <sup>38</sup> Loj hor ziigajc bibigaman lod za'në Xiëb Li con Jesús, guzuloj cudëedaman quixtëe loj Dios

cuza't tēēman bejndobēz guin loj gra ree bēn cabēz guixhiaal Dios bēn gagnē bēn Jerusalén ree.

### *Zia reeman Nazaret*

<sup>39</sup> Chi ma been reeman graczi ni rniabee xley Dios, dxel zia ladx reeman Nazaret ni riga' niz Galilea. <sup>40</sup> Cani's bejndobēz guin, cayuman gojl, cayajcaman nasin, cayūjnle' tēē Dios laaman.

### *Yu' Jesús lēn yadooro' Jerusalén*

<sup>41</sup> Gazob ijz rej ree xdad Jesús Jerusalén lanij pascw. <sup>42</sup> Chi baza' Jesús chiptio'p ijz, binē ree xdadaman laaman lanij zii zi'c naj xcostumbr reeman. <sup>43</sup> Chi ma gudēd lanij guin, baza ree xdad Jesús ma zia ladx reeman. Ad gogbeet reeman baya'n Jesús Jerusalén. <sup>44</sup> Gunaladx reeman ma no'chaman loj ree bēn zia. Zian guza reeman tibdxej. Per chi baguiil reeman laaman loj lasa' reeman nē loj ree bēn nūnbee reeman, <sup>45</sup> achut laaman naguiee. Dxel bayejc reeman zia reeman Jerusalén zatijb zigdiil reeman laaman.

<sup>46</sup> Xt ni gocri choon dxej badxejl reeman laaman lēn yadooro' Jerusalén, zojbaman galay ree mextr rajc ley, cu-caagdiajgaman canabdiidx tēēman laa reeman. <sup>47</sup> Gra ree bēn caguiejn ni rnieeman caydxalox reeman guial rajcaman nē ree diidx radxi'man. <sup>48</sup> Chi baguiaa ree xdadaman laaman, dád badxalox reeman, dxel rēb xniaaman:

—Xi'n, ¿chexc zeel basajquil dunujn zian? Xdadil con naj dád nadxu'n xgab caydiilan lūj.

<sup>49</sup> Badxi' Jesús laan rēbaman:

—¿Chexc zeel raguiilidi naj? ¿Nid ragbeedi ya rayal gūnan xchiin da Dadan?

<sup>50</sup> Per ad bignia't reeman xhie rēn guiēb ni rēbaman.

<sup>51</sup> Dxel bayejcnēman laa reeman zia reeman Nazaret, graczi xtiidx ree xdadaman ruzoobaman, guiáad xniaaman graczan rgu'chaaw luxdooman. <sup>52</sup> Zi'cri cani's Jesús cayu tēē mazri xquiarguiejnman. Rabaanē Dios laaman rabaanē tēē ree bejn laaman.

## 3

### *Rzuloj Waj ruliūman xtiidx Dios*

(Mt. 3:1-12; Mr. 1:1-8; Jn. 1:19-28)

<sup>1</sup> Chi goc chiin ijz rniabee rey Tiberio, abi' Poncio Pilato najman gobernador Judea, Herodes najman gobernador Galilea, bijchaman Felip najman gobernador Iturea nē Traconite, guiáad Lisania najman gobernador Abilinia. <sup>2</sup> Anás nē Caifás naj reeman bixhioz rniabee gra ree bixhioz. Lēn ree dxej zii gunee Dios Waj, xi'n Zacarías lod naj yujbidx. <sup>3</sup> Dxel gudēd Waj graczi ree guiedx riga' ro' guiiw Jordán, rēbaman

loj ree bejn din yayüjn reeman xgab por xtol reeman tiobnijs tëë reeman, din güün Dios xtol reeman perdon. <sup>4</sup> Zian gojc cumplid ni bacaa Isaías bén badëë xtiidx Dios loj ree bejn, lod rëbaman:

Rguien cha' tijb bén rbidxa' loj yujbidx, rëbaman:

“Gol beenchaaw xnejz dux Dad ree Dios,

gol guxhal tijb neyz nali.

<sup>5</sup> Gra ree la'ch yadxa reen guiáad ree guia' con

ree lom yayajc reen tibloj,

në ree neyz volt yayaali

yadxa tëë ree lunejz ni ad najt tibloj.

<sup>6</sup> Gra ree bénguidxliuj guguaiaa bén

guixhiaal Dios gagnë dunuj ree.”

<sup>7</sup> Chi brii zien ree bejn din guroobnijs Waj laa reeman,

rëbaman loj reeman:

—¡Xi'n xindxab lëjt! ¿Chu bagojn lëjt guial laadi loj castiro'

ni zëëd? <sup>8</sup> Gol gubajn zagdxë din guiguien guial waliqui ma

bayüjndi xgab por xtolidi, ad guiëb tëë loj lasa'di: “Dunuyn

zio'p loj xdiaa Abraham”, din naj rni lëjt xt guiaj guie ree zajc

yayüjn Dios xdiaa Abraham. <sup>9</sup> Abi' ree bén ad zinalt xnejz

Dios zi'c rayal, ma zidyob dxej ni güünnë Dios laa reeman

zi'c rüjnnë bejn tijb yag chi ad rtiatan, rütüügaman laan din

che'can.

<sup>10</sup> Dxel gunabdiidx reeman, rëb reeman:

—¿Xhie rayal yaguieenan?

<sup>11</sup> Badxi' Wajn rëbaman:

—Bén yu' tio'p xab, rayal gudëëman tijban loj bén achet

rajp. Guiáad bén yu' ni raw, rayal gudëëman ta'nän loj bén

ryaadxan.

<sup>12</sup> Në tio'p choon ree bén ruquijx impuest bidxin din tiob-

nijs reeman. Abi' gunabdiidx reeman loj Waj, rëb reeman:

—Mextr, laadx dunujn, ¿xhie rayal yaguieenan?

<sup>13</sup> Badxi' Wajn, rëbaman:

—Ad guquijxidi mazri guial loj ni rayal guquijxidi.

<sup>14</sup> Yu' tëë ree suldad gunabdiidx lojman rëb reex:

—Laadxza dunujn, ¿xhie rayal yaguieenan?

Badxi'män laan rëbaman:

—Ad cwëëxuudi xhie xieen bejn, guial guchejbidi laa ree-

man o gudxiibidi guijc reeman ni ad beent reeman, gol

guziibnejz tëë ni rajxidi.

<sup>15</sup> Guiáad ree bejn gagbeenejzdoos reeman bal Wajn naj

Cristo, <sup>16</sup> per rëbaman loj gra reeman:

—Naj curobnijs lëjt con nijs. Per zëëd tijb bén guroobnijs

lëjt con xSprijt Dios në bajl. Laaman rajp mazri guialrniabee

guial lon, ni'qui xgurëchaman ad zajct gaxhiecan. <sup>17</sup> Abi' zi'c

raya trigo zian güünnëman bejn. Din bén zinal ree xnejz Dios

yayal reeman lod rniabeeman, guiáad ree bén ad zinalt xnejz Dios guixhiaalaman laa reeman loj bajl ni ad yu't dxej yayü'.

<sup>18</sup> Zian guneenë Waj laa reeman, në ree con diidx ren guneenëman laa reeman rulüüman laa reeman xtiidxza'c Dios. <sup>19</sup> Gudilë tēēman rey Herodes guial cwa'man Herodías xbéngunaa bijchaman Felip, në por graczi ni mal ni ma beenman. <sup>20</sup> Per luar nidxga' Herodes xtiidx Waj aal beenman zatijb ni mal: badxe'man Waj ladxguiib.

### *Rirobnijs Jesús*

*(Mt. 3:13-17; Mr. 1:9-11)*

<sup>21</sup> Chi curoobnijs Waj bejn ree nëgajc Jesús gurobnijis. Abi' la'tgaj cabejdx canabaman Dios, bixal xanyabaa <sup>22</sup> zianz biguiajt xSprijt Dios zi'c tijb palom xt guijcaman. Dxel biguien cha' tijb bejn xanyabaa, rëbaman:

—Lüj naj da xi'nan, rënan lüj rabaanë' tēen lüj.

### *Bén goc ree xdiaagulal Jesús*

*(Mt. 1:1-17)*

<sup>23</sup> Cost gajlbichii ijz yu' Jesús chi guzuloj beenman xchiin Dios. Naladx ree bejn xi'n Xiëb najman, Xiëb guin gojc xi'n Elí. <sup>24</sup> Elí gojc xi'n Matat, Matat gojc xi'n Leví, Leví gojc xi'n Melqui, Melqui gojc xi'n Jana, Jana gojc xi'n Xiëb, <sup>25</sup> Xiëb gojc xi'n Matatías, Matatías gojc xi'n Amós, Amós gojc xi'n Nahum, Nahum gojc xi'n Esli, Esli gojc xi'n Nagai, <sup>26</sup> Nagai gojc xi'n Maat, Maat gojc xi'n Matatías, Matatías gojc xi'n Semei, Semei gojc xi'n Xiëb, Xiëb gojc xi'n Judá, <sup>27</sup> Judá gojc xi'n Joana, Joana gojc xi'n Resa, Resa gojc xi'n Zorobabel, Zorobabel gojc xi'n Salatíel, Salatíel gojc xi'n Neri, <sup>28</sup> Neri gojc xi'n Melqui, Melqui gojc xi'n Adi, Adi gojc xi'n Cosam, Cosam gojc xi'n Elmodam, Elmodam gojc xi'n Er, <sup>29</sup> Er gojc xi'n Josué, Josué gojc xi'n Eliezer, Eliezer gojc xi'n Jorim, Jorim gojc xi'n Matat, <sup>30</sup> Matat gojc xi'n Leví, Leví gojc xi'n Simeón, Simeón gojc xi'n Judá, Judá gojc xi'n Xiëb, Xiëb gojc xi'n Jonán, Jonán gojc xi'n Eliaquim, <sup>31</sup> Eliaquim gojc xi'n Melea, Melea gojc xi'n Mainán, Mainán gojc xi'n Matata, Matata gojc xi'n Natán, <sup>32</sup> Natán gojc xi'n Davi, Davi gojc xi'n Isaí, Isaí gojc xi'n Obed, Obed gojc xi'n Booz, Booz gojc xi'n Salmón, Salmón gojc xi'n Naasón, <sup>33</sup> Naasón gojc xi'n Aminadab, Aminadab gojc xi'n Aram, Aram gojc xi'n Esrom, Esrom gojc xi'n Fares, Fares gojc xi'n Judá, <sup>34</sup> Judá gojc xi'n Jacob, Jacob gojc xi'n Isaac, Isaac gojc xi'n Abraham, Abraham gojc xi'n Taré, Taré gojc xi'n Nacor, <sup>35</sup> Nacor gojc xi'n Serug, Serug gojc xi'n Ragau, Ragau gojc xi'n Peleg, Peleg gojc xi'n Heber, Heber gojc xi'n Sala, <sup>36</sup> Sala gojc xi'n Cainán, Cainán gojc xi'n Arfaxad, Arfaxad gojc xi'n Sem, Sem gojc xi'n Noé, Noé gojc xi'n Lamec, <sup>37</sup> Lamec

gojc xi'n Matusalén, Matusalén gojc xi'n Enoc, Enoc gojc xi'n Jared, Jared gojc xi'n Mahalaleel, Mahalaleel gojc xi'n Cainán, <sup>38</sup> Cainán gojc xi'n Enós, Enós gojc xi'n Set, Set gojc xi'n Adán, guiáad Adán gojc xi'n Dios.

## 4

### *Been xindxab Jesús prueb*

*(Mt. 4:1-11; Mr. 1:12-13)*

<sup>1</sup> Yu' xSprijt Dios luxdoo Jesús guidiblagaa. Chi bazaman guiwro' Jordán dxel binë xSprijt Dios laaman lod naj yujbidx.

<sup>2</sup> Ni guzuman tiuu dxej tiuu guiaal, abi' been xindxab laaman prueb. Achetczi gudawaman dxej zii ree, zianz gulaanman.

<sup>3</sup> Dxel rëb xindxab guin lojman:

—Bal wali najl Xi'n Dios, gunabee yayajc guiaj guie guiadx-til.

<sup>4</sup> Badxi' Jesús laan rëbaman:

—Loj xtiidx Dios rëb: “Ad ganaxtizi guiadxtil guiban bejn, nëgajc gra diidx rníee Dios.”

<sup>5</sup> Dxel binë xindxab guin laaman tijb guiyc guia' ya da't, lod balüüx laaman gra ree nacion riga' loj guidxliuj. <sup>6</sup> Abi' rëb xindxab guin lojman:

—Gunen graczi gualrniabee në gualnaza'c ni yu' loj ree nacion guie. Din naj ca' laa reen, zajc gudëdan laa reen loj chutëez bën rënan. <sup>7</sup> Bal guzuxibil lon abi' guiën da'til naj, graczan gac xieenl.

<sup>8</sup> Badxi' Jesús laan, rëbaman:

—Loj xtiidx Dios rëb: “Tijbzi loj xDadil Dios guzuxibil guiën tëel laaman, abi' tijbzi laaman been sirv.”

<sup>9</sup> Dxel binë xindxab guin laaman Jerusalén, abi' gulë'pix laaman guiyc yadooro' zojb luguiedx guin. Zianz rëbix lojman:

—Bal wali najl Xi'n Dios, gudidya' diizd guie xt luyuj, <sup>10</sup> din loj xtiidx Dios rëb:

Dios guixhiaal ree xianjlaman din guinia reeman lüj.

<sup>11</sup> Yales reeman lüj con yaa reeman, chitëë quiilguijdx guiaj guia'l.

<sup>12</sup> Badxi' Jesús laan rëbaman:

—Rëb tëe loj xtiidx Dios: “Ad güünl prueb xDadil Dios.”

<sup>13</sup> Chi ad badxejltri xhienaag güün xindxab guin Jesús prueb, dxel biquiedix tiblädëd.

### *Rzuloj Jesús rulüüman bejn ree niz Galilea*

*(Mt. 4:12-17; Mr. 1:14-15)*

<sup>14</sup> Badxin Jesús niz Galilea, yu' xSprijt Dios luxdooan guidiblagaa, abi' guidibczi niz yagaj bire'ch xtiidxaman.

15 Rulüüman bejn ree lën ree yadoo guidib niz yagaj, abi' graczi reeman ruza't laaman zagdxe.

*Radxin Jesús Nazaret*

(Mt. 13:53-58; Mr. 6:1-6)

16 Badxin Jesús Nazaret luguedx lod guni'saman. Abi' dxej raziiladx ree bejn guyuman lën yadoo zi'c naj xcostumbraman. Dxel guzuliman persi biilaman xtiidx Dios. 17 Badëd reeman gui'ch ni bacaa Isaías bën badëe xtiidx Dios loj ree bejn. Chi bachijlaman loj gui'ch guin, badxejlaman lod rëb:

18 XSprijt dux Dad ree Dios za'në naj, din laaman ma beenle' naj din ganen xtiidxza'caman loj ree bënprob.

Guxhaalaman naj din gugojnan bejn ree xhienaag laa reeman loj ni rzajc reeman, yaxhal tëen loj ree bënlutia'p.

Gün tëen yudar bën rusagzi reeman,

19 din gugojnan guial ma bidxin dxej za'cdxoon ni güünle' Dios bejn ree.

20 Dxel batüüb Jesús gui'ch guin bayüman laan loj bën rüjn yudar lën yadoo guin, zianz gurejman. Graczi ree bën riga' yagaj ruguiaadxijch laaman. 21 Dxel guzuloj caneenëman laa reeman, rëbaman:

—Yan dxej gajc ma gojc cumplid zi'c ca loj xtiidx Dios ni ma biguiejndi.

22 Graczi reeman cuza't laaman zagdxe caydxa tëë loj reeman diidxza'cdxoon ni caneeman. Dxel canabdiidx loj lasa' reeman rëb reeman:

—¿Nid laaman naj xi'n Xiëb ya?

23 Dxel rëb Jesús loj reeman:

—Ma ragbeen guial nadi tijb diidx ni rëb: “Doctor, bayüjn lüj gajc”, na tëëdi: “Ni ma baguiejnan beenl Capernaum nëgajc guie beenan najn ladxil.”

24 Rëb tëë Jesús:

—Diidxliczi rnin, ni'czi tijb bën rudëe xtiidx Dios loj ree bejn, ad rënt reeman laaman ladx gajcaman. 25 Gol basaaladx dád zien ree bëgunaa bizëjb zojb Israel lën ree dxej guban Elías bën badëe xtiidx Dios loj ree bejn, chi ad golt guia choon ijz garol, abi' guyu gubijn guidibczi. 26 Per ad guxhaalt Dios Elías guin loj tijb ree bën bizëjb zojb Israel, guxhaalaman laaman loj tijb bën bizëjb zojb guiedx la Sarepta, gajxh Sidón.

27 Në lën ree dxej guban Eliseo bën badëe xtiidx Dios loj ree bejn, dád zien ree bejn rajc guialguijdx la lepra, per ni'czi tijb reeman ad bayüjntaman, tijbzi bën Siria bayüjnman laman Naamán.

<sup>28</sup> Chi biguiejn gra ree bën yu' lën yadoo guin ni rëb Jesús, dád balen reeman. <sup>29</sup> Bisu reeman babëë reeman Jesús luguiedx guin, dxel binë reeman laaman ro' tijb bala' ya guial naj guiedx guin guijc tijb guia', din gutedia' reeman laaman. <sup>30</sup> Per gudëd Jesús galay reeman, ziataman.

*Rabëë Jesús xindxab luxdoo tijb bejn*

(Mr. 1:21-28)

<sup>31</sup> Wej Jesús guiedx Capernaum ni riga' niz Galilea, yagaj rulüüman bejn ree dxej ni raziiladx reeman. <sup>32</sup> Abi' dád badxaloj reeman ni rulüüman guial rnieenëman laa reeman con guialrniabee.

<sup>33</sup> Lën yadoo guin yu' tijb xin yu' xindxab luxdoo, abi' guridxa' xindxab guin rëbix:

<sup>34</sup> —Basa'n dunujn, ¿xhie rën! con dunujn, Jesús bën Nazaret? ¿Zëëdil ya zidganijtil dunujn? Nünbeen lüj, naya nalil najl xi'n Dios.

<sup>35</sup> Dxel gudilë Jesús xindxab guin, rëbaman lojx:

—¡Bacwëëz ro'l, barii luxdoo xin guin!

Zianz badxe'bi xindxab guin xin guin luyuj guidib niz loj reeman, bariitix luxdoox achetzi goquix. <sup>36</sup> Graczi reeman badxaloj, rëb loj lasa' reeman:

—¿Xhie ree diidx guin rnieeman? ¡Con guialrniabee ni rajpaman, rniabeeman rarii ree xindxab luxdoo ree bejn!

<sup>37</sup> Abi' guidibczi niz yagaj bire'ch xtiidxaman.

*Rayüjn Jesús xnasuegr Bëd*

(Mt. 8:14-15; Mr. 1:29-31)

<sup>38</sup> Dxel barii Jesús lën yadoo guin, abi' wejman lidx Simón. Ragxuu xnasuegr Simón guin yu'man xliaadoxh zeel guzajc reeman Jesús liaadx din yayüjnman laaman. <sup>39</sup> Zianz basajb loj Jesús lod naga'man gunabeeman yarii xliaa guin, abi' bariin. Loj hor ziigajc bixchewan guzuloj cudëëman ni gaw reeman.

*Rayüjn Jesús zien ree bënragxuu*

(Mt. 8:16-17; Mr. 1:32-34)

<sup>40</sup> Chi ma wëëz gubijdx, graczi ree bën rajp bënragxuu bën rajc ree gadxagayaa guialguijdx binë reeman laa reeman loj Jesús, persi badxiib yaaman guijc tijb gaj reeman, bayüjnman laa reeman. <sup>41</sup> Në zien ree bënragxuu guin rarii xindxab luxdoo, rbidxa' reex rëb reex:

—¡Lüj najl Xi'n Dios!

Per gudilëman xindxab guin ree, ad cwëjbtaman niniee reex, guial ragbee reex laaman najl Cristo.

*Rulüü Jesús xtiidx Dios niz Galilea*

(Mr. 1:35-39)

<sup>42</sup> Chi bareguiaal, barii Jesús luguiedx guin zëman lod achut bejn zojb. Per raguuil ree bénguiedx guin laaman, bidxin reeman lod za'man abi' rëb reeman lojman din yaya'nnëman laa reeman. <sup>43</sup> Per rëbaman loj reeman:

—Në ree luguiedx ren rayal chinë'n xtiidxza'c Dios guial xhienaag naj xguialrniabeeman, din par zian guxhaalaman naj.

<sup>44</sup> Zian basnuu guneeaman xtiidx Dios lën ree yadoo niz Galilea.

## 5

*Rniaaz reeman zien bëjl*  
(Mt. 4:18-22; Mr. 1:16-20)

<sup>1</sup> Tijb dxej chi za' Jesús ro' nijs Genesaret, bidxin ree benzien. Xt rxa't reeman laaman guial rën reeman gucaagdiajg reeman xtiidx Dios. <sup>2</sup> Dxel baguiaa Jesús tio'p barcw ro' nijs guin; ni basa'n ree bén rniaaz bëjl la'tgaj caguiib xguijxh reeman ni rniaaznë reeman bëjl. <sup>3</sup> Zianz wë'paman loj tijb barcw ni naj xbarcw Simón, abi' rëbaman lojman din gudxigaman laan niz galay nijs guin. Dxel gurejman, guzuloj culüüman bejn ree. <sup>4</sup> Chi gulox guneenëman laa reeman, dxel rëbaman loj Simón:

—Binë barcw guin lod mazri naxhit, gol bazaal xguijxhidi din guiniaazidi bëjl.

<sup>5</sup> Badxi' Simón laan rëbaman:

—Mextr, gudëd guiaalczi baguieenan dxiin, achutczi bëjl wanaazan. Per bal lüj na, yazaalan guijxh guin ree.

<sup>6</sup> Chi bazaal reeman guijxh guin ree loj nijs guin, bëjl zien da't gunaaz reeman xt guzuloj cayaxya' ree guijxh guin. <sup>7</sup> Abi' been reeman sen loj ree xcompniar reeman bén yu' ree loj stijb barcw guin, din chiguieen reeman laa reeman yudar. Dxel wej reeman, abi' bacha reeman bëjl guin ree loj grop barcw guin xt ma nizëëb reen xan nijs. <sup>8</sup> Chi baguiaa Simón Bëd ni goc, bazuxibaman loj Jesús rëbaman:

—Biquied lod za'n, Dad, din bëndol naj.

<sup>9</sup> Guial Simón con ree bén za'nëman badxa loj reeman guial dád zien bëjl gunaaz reeman. <sup>10</sup> Ziangajc badxaloj ree Jacob con Waj, bén naj ree xi'n Zebedeo, naj tëë reeman xcompniar Simón. Per rëb Jesús loj Simón:

—Ad rdxebil, din diizd yan guto'pil bejn ree par Dios luar guiniaazil bëjl.

<sup>11</sup> Dxel babëë reeman barcw guin ree loj nijs guin, basa'n reeman laa reen, zinalt reeman Jesús.

*Rayüjn Jesús tijb bén rajc guialguijdx la lepra*  
(Mt. 8:1-4; Mr. 1:40-45)



12 Chi za' Jesús tijb luguiedx, bidxin tijb bén rajc guial-guijdx la lepra, guidibczaman ma yu' guialguijdx guin. Chi baguiaaman Jesús laa bazuxib gajcaman, basajb lojman luyuj, rëbaman:

—Dad, bal rënl, zajc yayüjn naj.

13 Zianz basli yaa Jesús baqui'man laaman, rëbaman:

—Rënan. Bayajc.

Loj hor ziigajc bayajc bén guin. 14 Dxel rëb Jesús lojman:

—Achuczi loj guiëbil guial ma bayajquil. Lojzi bixhioz wej din guguaaman lüj. Binë gon ni rayal chinël zi'c gunabee Moisejs din gagbee gra bejn guial ma bayajquil.

15 Per guixie guixie mazri bire'ch xtiidx Jesús por gra ree ni zagdxë rüjnman. Abi' dád benzien rdo'p din gucaagdiajg reeman ni rnieeman yayüjn tëëman laa reeman guialguijdx ni rajc reeman. 16 Guiáad laaman rejman niz lod achut bejn zojb, persi rbejdx rniabaman Dios.

*Rayüjn Jesús bén nëjt xcuerp*

*(Mt. 9:1-8; Mr. 2:1-12)*

17 Tijb dxej culüü Jesús bejn ree, abi' zojb tio'p choon ree bénfarisew në ree mextr rajc ley, zëëd reeman guiedxdo ni riga' ree niz Galilea në niz Judea, në Jerusalén. Za'në xguialrniabee Dios laaman persi rayüjnman bénragxuu ree.

18 Dxel bidxin tio'p choon ree bejn, bidxinnë reeman tijb xin nëjt xcuerp, naga'x loj da. Abi' guyën reeman niunë reeman laax lënü guin din niguijxh reeman laax lod za' Jesús. 19 Per ad badxejlt ban niz niunë reeman laax guial bén guixiuj riga' yagaj. Dxel wë'p reeman guiyc yu guin, abi' biquied reeman tex dxiib guiycan, zianz gulet reeman xinragxuu guin guidib naga'x loj da guin, gudijxh reeman laax galay ree bén guin lod za' Jesús. 20 Chi baguiaa Jesús guial rliladx reeman laaman; rëbaman loj xinragxuu guin:

—Xi'n, ma benan xtolil perdon.

21 Per ree mextr rajc ley con ree bénfarisew guzuloj cayüjn reeman xgab: “¿Chu xin guin zeel rüjnx mazri xin zojbloj guial loj Dios? Achutczaj rajc rüjn perdon dol, tijbzi Dios.”

22 Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian? 23 ¿Conin ad nawëëgt gac, guial guiën ya: “Ma naj xtolil perdon”, o guiën: “Bixche guza tëë”? 24 Per yan, gulün lëjt guial Bén guxhaal Dios rajpaman guialrniabee loj guidxliuj guie din güünman perdon dol ree.

Dxel rëb Jesús loj xinragxuu guin:

—¡Bixche, baca' ni go'til loj! Baguiaj lidxil.

25 Loj hor guin gajc bixchex guidibloj gra ree bén riga' yagaj balesix ni go'tix loj, zianz zia lidxix ruza'tix Dios zagdxë.

<sup>26</sup> Graczi reeman badxaløj ruza't tää reeman Dios zagdxē abi' dád bidxeb reeman, rēb reeman:

—iNi'qui tijb ad waguiaat ree zi'ct naj ni cayguiaa ree yan!

*Rbejdx Jesús Leví*

*(Mt. 9:9-13; Mr. 2:13-17)*

<sup>27</sup> Chi gudēd gojc zian, baguiaa Jesús tijb bēn ruquijx impuest, laman Leví, zojbaman lod ruquijxaman. Abi' rēbaman lojman:

—Tanal naj.

<sup>28</sup> Dxel bisu Leví, guro'nladxaman gran zinaltaman Jesús.

<sup>29</sup> Abi' been Leví lanijro' lidxaman par Jesús, nē zien ree bēn ruquijx impuest zojb nētēē ree ben ren zojbnē reeman xan mex. <sup>30</sup> Per ree bēnfarisew ree nē ree mextr rajc ley, bēn nuchajg gajc ree bēnfarisew guin, guzuløj caneeguijdx reeman xbejn ree Jesús, rēb reeman:

—¿Chexc zeel rē' rawnēdi bēn ruquijx ree impuest nē ree bēndol?

<sup>31</sup> Badxi' Jesús laan rēbaman:

—Bénnaadan ree ad riaadxt reeman doctor, bēnragxuu ree laa reeman riaadx Doctor. <sup>32</sup> Ad zialtan par ree benza'c, zialan par ree bēndol din yayūjn reeman xgab por xtol reeman.

*Rniabdiidx reeman loj Jesús xcwent guialrba'n*

*(Mt. 9:14-17; Mr. 2:18-22)*

<sup>33</sup> Bēnfarisew ree nē ree mextr rajc ley, rēb reeman loj Jesús:

—Xbejn Waj, nē ree xbejn ree bēnfarisew dád zien volt rba'n reeman rbejdx rniab tää reeman Dios, guiáad ree xbejnl ganax rē' raw reeman.

<sup>34</sup> Badxi' Jesús laan rēbaman:

—¿Wen zajc güüнди nagueijn ya guiba'n ree biooz za' loj guialruxhliaa, la'tgaj za'nē xin cuxhliaa guin laa reeman?

<sup>35</sup> Per guidxin dxej chiquiedix, dxel guiba'n reeman.

<sup>36</sup> Rēb tēēman loj reeman:

—Achut bēn rutüüg ta'n lajd cüb din yata'man laan loj lajd vojx. Bal güünman zian, zaguixya' lajd cüb guin lajdyojx guin, nētēē yan ad zuguiaatan zagdxē loj lajdyojx guin. <sup>37</sup> Ad rgu' tēēt bejn vin cüb lēn anfr vojx, din bal güünman zian, zaguixya' vin cüb guin anfr guin, abi' zi'c anfr guin zi'c vin guin zaxin reen. <sup>38</sup> Zeel vin cüb rayal chu'n lēn anfr cüb din ni'qui tijb reen ad zaxint. <sup>39</sup> Abi' tijb bēn ma gu' vin yu' gocli ad rē'taman vin cüb, din rēbaman: “Vin yu' gocli mazri ni zagdxen.”

## 6

*Rgui'ch ree xbejn Jesús trigo dxej raziiladx ree bēn Israel*

*(Mt. 12:1-8; Mr. 2:23-28)*

<sup>1</sup> Tijb dxej raziiladx ree b́en Israel, la'tgaj cadéd Jesús con ree xbejnman loj tijb guiniaa lod yu' trigo. Guzuloj cagui'ch reeman trigo guin, dxel cuxho'p reeman laan cayaw reeman.

<sup>2</sup> Abi' yu' ree b́enfarisew rēb loj reeman:

—¿Chexc zeel rǔjndi ni ad rayalt güündi dxej raziiladx ree bejn?

<sup>3</sup> Badxi' Jesús laan, rēbaman:

—¿Gadidi gool loj xtiidx Dios ya ni been Davi chi gulaanman con ree xcompniaraman? <sup>4</sup> Guyuman lēn xyadoo Dios, cwa'man guiadxtil ma nagle' ree gudawaman con ree xcompniaraman, ni ad rayalt niajw reeman bixhiosi ree rayal gaw laa reen.

<sup>5</sup> Rēb tēē Jesús loj reeman:

—B́en guxhaal Dios rajpaman gualrniabee dxej raziiladx ree bejn.

*Rayajc tijb xin naxü'n tibladya*

*(Mt. 12:9-14; Mr. 3:1-6)*

<sup>6</sup> Zatiyb dxej raziiladx reeman, guyu Jesús lēn tijb yadoo abi' guzuloj culüüman bejn ree. Yagaj za' tijb xin naxü'n yaa ladbee. <sup>7</sup> Abi' ree mextr rajc ley nē ree b́enfarisew rzunal reeman din guidoon zayüjn Jesús laax dxej raziiladx reeman ya, din gac gutedia' reeman Jesús. <sup>8</sup> Per laaman ragbee gajcaman xhie xgab cayüjn reeman, zeel rēbaman loj xin naxü'n yaa guin:

—Bisu, guzuli galay guin.

Dxel guzulix, guzujx galay guin. <sup>9</sup> Dxel rēb Jesús loj reeman:

—Ganabdiidxan lējt: ¿Xhie rayal güün bejn dxej raziiladx reeman, ni zagdxe ya o ni mal? ¿Guslaaman xgualnaban bejn ya o gugǔjtaman laaman?

<sup>10</sup> Dxel baguiaa Jesús gra ree b́en riga' yagaj, abi' rēbaman loj xin guin:

—Basli yaal.

Dxel beenx zi'c rēbaman, abi' bayajc yaax. <sup>11</sup> Per laa reeman dád bidxe'ch reeman, guzuloj rēb loj lasa' reeman xhienaag güünnē reeman Jesús.

*Rbe Jesús chiptio'p ree apóstoles*

*(Mt. 10:1-4; Mr. 3:13-19)*

<sup>12</sup> Lēn ree dxej zii wej Jesús tijb ruguia' persi gurejdx gunabaman Dios, abi' gudéd guiaalczi gurejdx gunabaman Dios yagaj. <sup>13</sup> Chi bareguiaal, gurejdxaman b́en nal ree laaman, dxel gulejman chiptio'p reeman loj reeman, abi' guneeman laa reeman apóstoles. <sup>14</sup> La reeman: Simón, b́en gulēlajman Béd, Andrejs bijch Simón, Jacob, Waj, Felip, Tol, <sup>15</sup> Matew, Tumajs, Jacob xi'n Alfeo, Simón, b́en bi'ch loj ree b́en cananistas, <sup>16</sup> Judas xi'n Jacob, nē Judas Iscariote b́en bayü Jesús.

*Rulüü Jesús zien ree bejn**(Mt. 4:23-25)*

17 Baguiajt Jesús ruguia' guin con guidxiptio'p ree xbejnman, badxin reeman lod naj tijb la'ch. Yagaj bado'p zien ree xbejnman në ree ben ren, bén zëed ree niz Judea në Jerusalén në ree bén zëed Tiro con Sidón, guiedx riga' ree gajxh ro' nijsdoo. Bidxin reeman din gucaagdiajg reeman xtiidx Jesús din yayüjn tēēman laa reeman guialguijdx ni rajc reeman. 18 Në ree bén yu' xindxab luxdoo bayajc. 19 Zeel graczi ree bejn rēn guqui' laaman, guial rayüjnman laa reeman con xguialrniabeeman.

*Xiquilbaa ree bejn**(Mt. 5:1-12)*

20 Dxel baguiaa Jesús loj ree xbejnman, abi' rēbaman:

—Xiquilbaadi bénprob, din lējt rayal loj xguialrniabee Dios.

21 'Xiquilbaadi bén rliian ree yan, din Dios gunee ni gawidi xt chigdxinlaxidi.

'Xiquilbaadi bén roon ree yan, din zadxin dxej guxijdxidi.

22 'Xiquilbaadi chi rdxe'ch bejn lējt, chi rabēēca reeman lējt, rnieeguijdx tēē reeman lējt, naladx reeman najdi bendxuudx guial riladxidi Bén guxhaal Dios. 23 Gol babaa gol badxe' tēē luxdoodi zagdx chi güünnē reeman lējt zian, din zro' ni tia'di yu' xanyabaa, din ziangajc beennē xbēngulal reeman bén badēē ree xtiidx Dios loj ree bejn.

24 'Per probza lējt benrijcw, din ma guyuxgaj luxdoodi nix.

25 'Probza lējt bén raw xt rigdxinlax yan, din zadxin dxej guiliaandi.

'Probza lējt bén ruxijdx yan, din zadxin dxej goondi guial chu'nayadi.

26 'Probza lējt, bén ruladx ree guilies bejn xvalor, din zian beennē ree xbēngulal reeman bén goc ree bén rusquiee, rēb reeman rudēē reeman xtiidx Dios loj ree bejn.

*Guyēn bén rdxe'ch lüj**(Mt. 5:38-48; 7:12)*

27 'Per ganin lējt bén rucaagdiajg ree da diidxan: Gol guyēn bén ralen lējt, gol gojc benza'c con ree bén yu'xyajñ lējt, 28 gol bazaal diidxza'c guiyc ree bén ruzaal diidxmal guijquidi, gol gurejdx gunab Dios por ree bén rnieeguijdx lējt. 29 Bal chu chēēz tiblax hajguil, badēēd zatibladan, bal chu cwēēxuu xchamarril, ad cwexuul chinēman në xmanguil. 30 Chutēēz bén rniab xhienin lojl, badēēdan. Bal chu rquied xhie xieenl, ad bal yanabilan. 31 Gol beennē ree bejn zi'c rēndi güünnē reeman lējt.

<sup>32</sup> 'Bal rëndi ganaxzi bën rën lëjt, ¿xhieza ni zagdxen cayüjndi? Din xt bëndol ree rüjn zian, rën reeman bën rën laa reeman. <sup>33</sup> Abi' bal rüjndi wen ganaxzi bën rüjn lëjt wen, ¿xhieza ni zagdxen cayüjndi? Din xt bëndol ree rüjn zian. <sup>34</sup> Ziangajc bal rudëedidi ni rguin ganaxzi bën naladxidi zajc yaguijx lojdi, ¿xhieza ni zagdxen cayüjndi? Din xt në ree bëndol rudëed rguin ree bën naladx reeman zajc yaguijx loj reeman. <sup>35</sup> Per lëjt gol guyën bën ralen lëjt, gol been reeman wen. Gol badëed qui'n reeman, ad cwëzidi xhie tia'di guijcan. Zian tia'di zro' gualnaza'c ni gunee Dios bën yu' xanyabaa, gac tëedi xi'nman, din laaman naj benza'c con ree bën ad rudëet quixtëe lojman në con ree benmal. <sup>36</sup> Gol baya bejn zi'c raya dux Dad ree Dios bejn.

*Xcwent gualrula'ch*

(Mt. 7:1-5)

<sup>37</sup> 'Ad gula'chidi, ad gudxiib tëedi ni mal guijc ree bejn chitëe saquidi zian, gol been perdon din gaquidi perdon. <sup>38</sup> Gol badëed ni riaadx ree bejn, Dios mazri zro' naj ni gunee man zi'c tijb bols guidxadi. Din zi'c rudëedidi loj ree bejn, ziant gajc naj ni gunee Dios lojdi.

<sup>39</sup> Rëb Jesús loj reeman zatijb diidx:

—¿Wen zajc chinë bën lutia'p zatijb bën lutia'p ya? ¿Nid zayajb grop reeman ro' bala' ya? <sup>40</sup> Tijb bën cusiid, ad mazt rajcaman gual loj xmextraman. Guiáad chi ma gulox basiidaman rajcaman zi'ctgajc rajc xmextraman.

<sup>41</sup> 'Ad gula'chil ben ren por faltdobëz ni rajpaman, zagdxeli guyu xgab por falt narooob ni rajpil. <sup>42</sup> Abi' bal mazri falt narooob rajpil, ¿xoza guiëbil loj zatijb bejn: “Ad laat naj ni rüjnl”? ¿Bën rusquiee! yalojxgaj been zi'c rayal, chi ma beenl zian dxel ma zile' guiëbil loj zatijb bejn: “Ad laat naj ni rüjnl”.

*Por ni rtia loj yag rayünbee bejn xhie yagan*

(Mt. 7:17-20; 12:33-35)

<sup>43</sup> 'Ad yu't yag zagdxre rtia ni guijdx loj, ad yu' tëet yag guijdx rtia ni zagdxre loj. <sup>44</sup> Din tijbgaj yag rayünbee bejn xhie yagan por ni rtia lojn. Ad raru't higo loj yaquie'jch, ad raru' tëet uv loj gui'xh. <sup>45</sup> Benza'c rnieeman diidxza'c din laan yu' luxdoooman, guiáad benmal rnieeman diidxmal din laan yu' luxdoooman. Din ni yu' luxdoo bejn laan rnieeman.

*Tio'ploj cimiant*

(Mt. 7:24-27)

<sup>46</sup> '¿Chexc zeel rnieedi naj, “Dad, Dad”, abi' adza rüjntidi ni rnin? <sup>47</sup> Ganin lojdi chu naj zi'c bën ri't lon, riguijman ni rën, abi' rüjnman laan: <sup>48</sup> laaman naj zi'c tijb bën been yu, yaloj xgaj gudëenman naxhit xt chi bila loj guiaj, dxel gulesaman

xcimiantan guijc guiaj guin. Abi' chi bi't nijsro' majsi gulajn lad yu guin, per ni'quid baniibtan laan guial naj cimiant guin guijc guiaj. <sup>49</sup> Per b́en riguiejn da diidxan abi' ad rüjntaman laan, najman zi'c tijb b́en been yu ni ad yu't xcimiant. Abi' chi bi't nijsro' gulajn lad yu guin, balenxanan laan, tiblayaazi base'nan laan.

## 7

### *Rayajc xmojs tijb suldad rom xin rniabee ree suldad (Mt. 8:5-13)*

<sup>1</sup> Chi gulox guneenë Jesús bejn ree, dxel zëman Capernaum.  
<sup>2</sup> Yagaj zobj tijb suldad Rom xin rniabee ree suldad. Yu' tijb xmojsix xin rën da'tix, ragxuu mojs guin ma rulüüczí guiëtix. <sup>3</sup> Chi biguiejn suldad rniabee guin ruza't ree bejn Jesús, guxhaalix tio'p choon ree b́en rniabee Israel lojman din chisajc reeman liaadx yayüjnman xmojsix. <sup>4</sup> Abi' bidxin reeman loj Jesús guzajc reeman liaadx, rëb reeman:

—Gagnësiil suldad rniabee guin, <sup>5</sup> din rënx b́en duladx ree, në yan por laax gojc dux yadoo ree.

<sup>6</sup> Dxel binë Jesús laa reeman. Per chi ma cadxin reeman gajxh lidxix, guxhaal tio'p choon ree xmiwix loj Jesús biguiedx reex lojman:

—Dad, ad chu'l xgab, din ad rayaltan chu'l lënü lidxan, <sup>7</sup> zeel ad bayaxtan nial quijb naj nidgadilan lüj. Per con gunee diizd lod za'l din yayajc da mojsan. <sup>8</sup> Din zi'c naj yu' ree b́en rniabee naj, ziangajc naj yu' ree da suldadan xin rniabeen. Chi rën loj tijb reex: “Wej”, rejx. Chi rën loj zatijbix: “Guda”, ri'tix. Abi' chi rën loj da mojsan: Been ni guin, rüjngajquixan.

<sup>9</sup> Chi biguiejn Jesús zian, dád badxa lojman ni rëb suldad guin, abi' badxi' lojman loj gra ree b́en zinal laaman, rëbaman:

—Diidxliczi rnin, ni'qui Israel ad wadxaaglojtan tijb b́en rliladx da't Dios zi'c rliladx xin guin Dios.

<sup>10</sup> Chi badxin ree xin guxhaal suldad rniabee guin lidxix, baguiaa reex ma bayajc mojs guin.

### *Rasban Jesús xi'n tijb bégunaa bizëjb*

<sup>11</sup> Chi gudëd gojc zian, wej Jesús tijb luguiedx la Naín binë ree xbejnman, në zien ree ben ren. <sup>12</sup> Chi bidxinman gajxh ro' guiedx guin, baguiaaman ziquie'ch reeman tijb xingüt, tijbzi laax naj xi'n xniaax, najman b́en bizëjb. Zien da't ree bénluguiedx guin zinal laaman. <sup>13</sup> Chi baguiaa Dad Jesús laaman, bayaman laaman, dxel rëbaman lojman:

—Ad roonl.

<sup>14</sup> Abi' bibig Jesús baqui'man xcaj xingüt guin, dxel guzudxe ree b́en zinë laax. Zianz rëbaman lojx:

—Xi'n, naj rni lojl: ¡Bixche!

<sup>15</sup> Dxel gureli xin guin, guzuloj caneex, zianz bayü Jesús laax loj xniaax. <sup>16</sup> Chi baguiaa reeman zian, graczi reeman bidxeb guzuloj cuza't reeman Dios zagdxe, rëb reeman:

—Du loj ree ma gules Dios tijb bén zojbloj, bén rudëë xtiidx Dios loj ree bejn.

Rëb tää reeman:

—Ma bi't Dios din gagnë ree xbejnman.

<sup>17</sup> Abi' guidib niz Judea në ree guiedx riga' niz yagaj gogbee ree bejn ni been Jesús.

*Bigneenë ree xbejn Waj Jesús*

*(Mt. 11:2-19)*

<sup>18</sup> Gogbee Waj gra ree ni cayüjn Jesús, guial bagojn ree xbejnman laaman. Abi' guneeaman tio'p reeman, <sup>19</sup> dxel guxhaalaman laa reeman loj Jesús din chignabdiidx reeman bal laacaman naj Cristo bén naj diidx gui't, bén cabëz reeman, o cwëz reeman ben ren ya. <sup>20</sup> Abi' bibig reeman, guneeenë reeman laaman, rëb reeman lojman:

—Waj bén ruroobnijs bejn ree guxhaal dunujn lojl zudgan-abdiidxan bal lüjcan naj Cristo bén naj diidx gui't, bén caylëjzan o yalëjzan ben ren ya.

<sup>21</sup> Hor ziigajc bayüjn Jesús zien da't ree bénragxuu, në ree bén rdoob, nëtëë ree bén yu' xindxab luxdoo, baxhal tääman loj ree bénlutia'p. <sup>22</sup> Dxel badxi' Jesús xtiidx ree bén guxhaal Waj, rëbaman:

—Gol chej, gol chiguiedx loj Waj ni cuguiaadi në ni caguiejndi. Gol güjdx lojman guial ma ruguiaa ree bénlutia'p, ma rajc rza ree bencoj, ma rayajc tää ree bén goc guialguijdx la lepra, ma rigueijn ree bén nacwa't, guiáad ree bengüt ma baban reeman, abi' ree bénprob ma caguiejn reeman xtiidxza'c Dios. <sup>23</sup> ¡Xiquilbaa ree bén ad zucwëët chililadx naj!

<sup>24</sup> Chi baza ree bén guxhaal Waj, guzuloj Jesús caneeman xcwent Waj loj ree bejn, rëbaman:

—¿Chu naladxidi naj bén biquiaadi loj yujbidx? ¿Naladxidi ya najman zi'c tijb biqui runiib bi? <sup>25</sup> ¿O chu biquiaadi? ¿Tijb bén najcw lajd zagdxe ya? Lëjt ragbee guial bén rajcw ree lajd zagdxe, në ree bén naban zagdxe, lën palas zojb reeman. <sup>26</sup> ¿Chu biquiaadi? ¿Tijb bén rudëë xtiidx Dios loj ree bejn ya? Per diidxliczi rnin lojdi, biquiaadi tijb bén mazri zojbloj guial loj tijb bén rudëë xtiidx Dios loj ree bejn. <sup>27</sup> Wajn naj bén ruza't xtiidx Dios, lod rëb:

Naj rxhial tijb bén ned lojl,

bén güünchaaw xnejzil.

<sup>28</sup> Rnin lëjt, loj graczi ree bénguidxliuj ad wayut bén rudëë xtiidx Dios loj ree bejn, bén mazri zojbloj guial loj Waj. Per

majsi zian, bén ad zobjlojt loj xguialrniabee Dios, laaman mazri zobjloj guial loj Waj.

<sup>29</sup> Gra ree bejn, në ree bén ruquijx impuest bén baroobnijs Waj, chi biguiejn reeman ni rëb Jesús bignia' reeman guial rüjn Dios zi'c rayal. <sup>30</sup> Per ree bénfarisew con ree mextr rajc ley ad cwëjbt reeman nuroobnijs Waj laa reeman, zian ad guyënt reeman ni rën Dios par laa reeman.

<sup>31</sup> Rëb tëë Jesús:

—¿Xhienaag ganin lëjt naj ree bén riga' loj guidxliuj guie yan? ¿Chu naj zi'c laa reeman? <sup>32</sup> Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: “Bacwejdxan par nuya'di, per ad baya'tidi, badoolan ni naya ree, per ad biintidi.” <sup>33</sup> Din bi't Waj bén baroobnijs bejn ree, ad rawtaman ad rë' tëëtaman vin, abi' rëbidi xindxab yu' luxdooman. <sup>34</sup> Yan bi't Bén guxhaal Dios, rawaman rë' tëëman vin, abi' rëbidi guial dád nalaman ruladxaman guië'man, ruchajg tëëman bëndol ree con ree bén ruquijx impuest. <sup>35</sup> Per xguialrignia' Dios, rguienan por ree xbejnman.

*Rej Jesús lidx tijb bénfarisew la Simón*

<sup>36</sup> Tijb bénfarisew rëb loj Jesús din chitaw Jesús guin lidxaman. Abi' bidxinman lidxaman gurejman xan mex. <sup>37</sup> Dxel tijb béngunaa dxuudx zobj gajc luguiedx guin. Chi gogbeeman cayaw Jesús lidx bénfarisew guin, bidxinnëman tijb lumejt yu' perfum. <sup>38</sup> Dxel roonman gurejman lod nuzuj guia' Jesús, guzuloj caxhie' nijs carii lojman guia' Jesús. Abi' cucwiidxnë guidxguijcaman laan, cayawaman xid guia'man curoob tëëman laan perfum guin. <sup>39</sup> Chi baguiaa bénfarisew guin zian, beenman xgab: “Balgui zian wali bén guin najman bén rudëë xtiidx Dios loj ree bejn, zagbeeman chunin cuqui' laaman xhie tëë naag naban béngunaa guin, najman bendxudx.” <sup>40</sup> Dxel rëb Jesús loj bénfarisew guin:

—Simón, yu' tijb ni ganin lüj.

Badxi' bénfarisew guinan rëbaman:

—Gunan, mextr.

<sup>41</sup> Abi' rëb Jesús lojman:

—Tijb bén rudëëd milia rgui'n ree bejn, ral tio'p ree bejn lojman. Tijbaman nuzëëb gaaygayuu denario, zatijbaman nuzëëb tü'pchiin. <sup>42</sup> Grop reeman ad beent gan naguijx lojman, per bén badëëd milia guin rëbaman loj reeman guial ad zaguijxt reeman ni nuzëëb reeman. Yan guna, ¿chu loj grop reeman mazt guiën laaman?

<sup>43</sup> Badxi' Simón laan, rëbaman:

—Par naj, bén bazëëb mazri zro' guin.

Dxel rëb Jesús:

—Waliquil.



<sup>44</sup> Zianz baguiaa Jesús loj béngunaa guin, abi' rëbaman loj Simón:

—¿Ruguaaal béngunaa guie ya? Chi guyu'n lidxil ad baneetil nijs niëd guia'n. Guiáad laaman gudiibaman guia'n con nijs brii lojman, abi' bacwiidxaman laan con guidxguijcaman.

<sup>45</sup> Ad gudawtil naj xid, guiáad laaman diizd chi guyu'n ad rbëzt rawaman xid guia'n. <sup>46</sup> Achet sejt badxe'l guican, per laaman ma badxe'man perfum guia'n. <sup>47</sup> Zeel rnin lüj, gra ree xtolaman ma gojc perdon guial rën da'taman naj. Per bén yu' ta'nz xtol abi' rajcaman perdon, ta'nz rënman naj.

<sup>48</sup> Dxel rëb Jesús loj béngunaa guin:

—Ma naj gra xtolil perdon.

<sup>49</sup> Guiáad ree bén zojbnëman yagaj guzuloj canabdiidx loj lasa' reeman, rëb reeman:

—¿Chu bén guin zeel xt në ree dol rüjnman perdon?

<sup>50</sup> Per rëb Jesús loj béngunaa guin:

—Ma najl perdon guial rliladxil naj, baguiaj zagdxe ad ruril xgab.

## 8

### *Béngunaa been ree Jesús yudar*

<sup>1</sup> Chi gudëd gojc zian, wej Jesús gra ree guiedx naroob në ree guiedx dobëz bicojnman biglüü tëëman xhienaag naj xguialrniabee Dios. Në guidxiptio'p ree apóstoles binëman, <sup>2</sup> nëtëë tio'p choon ree béngunaa, bén babëëman xindxab luxdoo, në ree bén bayünman guialguijdx ni rajc reeman. Loj reeman no'ch María Magdalena, bén babëë Jesús gajdx xindxab luxdoo. <sup>3</sup> Në Xuan, lacheel Cuza, Cuza guin goc bén nulen xchiin Herodes. Në Susan nëtëë zien ree béngunaa ren, been reeman yudar Jesús con ni rajp reeman.

### *Xcwent bén rtie'ch bin*

*(Mt. 13:1-9; Mr. 4:1-9)*

<sup>4</sup> Zien ree bejn brii loj ree guiedx ziquiaa reeman Jesús. Chi bido'p ree benzien, beman tijb cwent loj reeman rëbaman:

<sup>5</sup> —Tijb bejn zëman zigtie'chaman bin. Chi catie'chaman laan, ta'n nan biajb lunejz abi' balëë ree bejn guiican gudaw tëë ree biguijn laan. <sup>6</sup> Zata'n nan biajb loj ree guiaj, chi gulejn reen gubidx reen guial ad yu' xcojpt loj ree guiaj guin. <sup>7</sup> Zata'n nan biajb loj ree yaquiëjch. Abi' chi guni's reen tijbzi, banidloj yaquiëjch guin laa reen. <sup>8</sup> Zata'n nan biajb loj yujza'c abi' dád gojcan, cwa xt tibgayuu bin loj tijbgajn.

Chi gulox guneë Jesús zian, dxel guneeman rejs rëbaman:

—Bén rën gucaagdiajg, gol bacaagdiajg.

### *Chexc zeel rulüü Jesús con cwent ree*

*(Mt. 13:10-17; Mr. 4:10-12)*

<sup>9</sup> Dxel gunabdiidx ree xbejn Jesús lojman, rëb reeman:

—¿Xhie rën guiëb cwent guin?

<sup>10</sup> Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xgualrniabeeman. Per loj gra reeman rünan zi'c cwent din majsi rani loj reeman, per ad zuguaat reeman, majsi rigueijn reeman, per ad zignia't reeman.

*Rusignia' Jesús xcwent bén rtie'ch bin*

*(Mt. 13:18-23; Mr. 4:13-20)*

<sup>11</sup> 'Ni ne rën guiëb xcwent bén rtie'ch bin: Bin guin naj zi'c xtiidx Dios, <sup>12</sup> guiáad bin biajb runejz naj zi'c ree bén rigueijn xtiidx Dios; per rdxin gajc xindxab rquiedix laan luxdoo reeman chitëë chililadx reeman laan abi' gac reeman perdon. <sup>13</sup> Guiáad bin biajb loj ree guiaj, naj zi'c ree bén rigueijn xtiidx Dios, abi' dád nix ru luxdoo reeman rigueijn reeman laan, per guial naj reeman zi'c cwaan ni ad yu't liuj, rliladx reeman laan tiblädëd abi' chi rzagdiaj reeman laa rusa'n gajc reeman ni rliladx reeman. <sup>14</sup> Guiáadza bin biajb loj ree yaquiëjch, naj zi'c ree bén rigueijn xtiidx Dios; per ru reeman xgab por gra ree gualnaza'c riga' loj guidxliuj guie rüjn tëë reeman ni rëntzi reeman, abi' zianz rucwëëz rucaagdiajg reeman xtiidx Dios ad rüjn tëët reeman ni rënman. <sup>15</sup> Guiáad bin biajb loj yujza'c, laan naj zi'c ree bén rucaagdiajg xtiidx Dios, rucaagdiajg reeman laan con guidib luxdoo reeman za'dxi'ch tëë reeman loj xnejzaman, zianczi rüjn reeman ni rënman.

*Achet ni naguie'ch yu'*

*(Mr. 4:21-25)*

<sup>16</sup> 'Achut bén ruze'c tijb guij dxel ruta'cwaman laan, ad rudxe' tëëtaman laan xan lon, ruzujman laan ya din gusnin loj ree bén chu' lënü. <sup>17</sup> Achet ni naguie'ch yu' ni ad zaguiënt ad yu' tëët ni ralan ni ad zagbeet bejn, zadxin dxej gagbee bejn laan.

<sup>18</sup> 'Zeel gol bacaagdiajg zagdxe, bén ma rignia' gusnuu chignia'man mazri, per bén ad rignia't, xt ta'n ni naladxaman rignia'man ad zignia'traman.

*Xniaa Jesús con ree bijchaman*

*(Mt. 12:46-50; Mr. 3:31-35)*

<sup>19</sup> Xniaa Jesús con ree bijchaman bidxin reeman lod za'man, per ad gojct nibig reeman lojman guial dád zien bejn riga'. <sup>20</sup> Abi' yu' bén bagojn Jesús rëbaman:

—Laa xniaal con ree bijchil za' lule' guin rën reeman guinieenë reeman lüj.

<sup>21</sup> Badxi' Jesús laan rëbaman:

—Bén rucaagdiajg ree xtiidx Dios rüjn tëë reeman zi'c rënman, laa reeman naj da nan laa tëë reeman naj da bichan.

*Racwëez Jesús bidoxh*

(Mt. 8:23-27; Mr. 4:35-41)

<sup>22</sup> Tijb dxej guyu Jesús loj barcw con ree xbejnman, abi' rëbaman loj reeman:

—Yo' ree zatiblad ro' nijs guin.

Zianz zë reeman. <sup>23</sup> La'tgaj cadëd reeman loj nijs guin, goodyëjs Jesús. Dxel guzuloj cabi' bidoxh loj nijs guin, abi' cadxa nijs loj barcw guin, ma cazëëbczi barcw guin xan nijs.

<sup>24</sup> Dxel bacwëën reeman Jesús, rëb reeman:

—¡Mextr! ¡Mextr! ¡Ma cayzëëb ree xan nijs!

Abi' bixche Jesús gunabeeman bacwëez bidoxh guin në xtüjp nijs guin, zianz gulëjz reen dxel bayajcdxe. <sup>25</sup> Abi' rëbaman loj reeman:

—¿Conza xguialrliladxidi?

Per laa reeman dád bidxeb reeman badxa tëë loj reeman, abi' canabdiidx loj lasa' reeman rëb reeman:

—¿Chu Bén guin zeel rniabeeman bi në nijs, abi' ruzoob reen xtiidxaman?

*Rayüjn Jesús tijb xin yu' xinxab luxdoo*

(Mt. 8:28-34; Mr. 5:1-20)

<sup>26</sup> Dxel badxin Jesús con ree xbejnman xdajn ree Bén Gadara, ni riga' zatiblad ro' nijs Galilea. <sup>27</sup> Chi barii Jesús loj barcw guin, bibig tijb xin luguiedx guin lojman. Ma gojc xchej da't yu' xinxab luxdoox. Ad rajcwt xabix, ad nabantix lëñü, ganaxzi ro' ree baa nabanx. <sup>28</sup> Chi baguiaax Jesús bazuxibix lojman, guneex rejs rëbix:

—¿Xhie rënl con naj, Jesús, Xi'n Dios yu' xanyabaa? Rniaa-ban lojl ad gusagzil naj.

<sup>29</sup> Rëbix zian guial ma canabee Jesús din yarii xinxab guin luxdoox. Ma gojc xchej naaz xinxab guin laax. Abi' ma guxhii ree bejn yaax në guia'x con caden chitëë ban chex, per rutüguia'gajquix caden guin abi' rulaagdxa xinxab guin laax niz lod achut bejn zojb.

<sup>30</sup> Gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan.

Rëbix zian guial zien da't ree xinxab yu' luxdoox. <sup>31</sup> Rëb ree xinxab guin loj Jesús chitëë guixhiaalaman laa reex gabijl. <sup>32</sup> Dajn guin riga' zien ree cüch cayaw reeb. Zeel rëb ree xinxab guin lojman din gudëëman mod chu' reex lën ree cüch guin, dxel cwëjbaman. <sup>33</sup> Zianz barii reex luxdoox bayu

reex lën ree cüch guin, abi' guzuloj cuxüün reeb zianz bitidia' reeb ro' bala' xt loj nijs, lod gu' reeb nijs abi' güjt reeb.

<sup>34</sup> Chi baguiaa ree bén cayajp ree cüch guin ni goc, baxüün reeman bicojn reeman bejn ree luguiedx në ree dajn. <sup>35</sup> Dxel wej reeman biquiaa reeman ni goc. Chi bidxin reeman lod za' Jesús, baguiaa reeman xin barri xindxab guin ree luxdoo, zobjix guia'man ma najcw xabix, ma badëdguienx abi' bidxeb reeman. <sup>36</sup> Guiáad ree bén baguiaa ni goc, be reeman diidx loj reeman xhienaag bayajquix. <sup>37</sup> Graczi ree bén zobj Gadara gunab loj Jesús din yazaman yagaj guial dád rdxeb reeman. Dxel bayë'paman loj tijb barcw, ziataman. <sup>38</sup> Guiáad xin barri xindxab guin ree luxdoo rëbix lojman din chinalix laaman, per ad cwëjbtaman, rëbaman lojx:

<sup>39</sup> —Baguiaj lidxil, biguiedx graczi ni been Dios por lüj.

Dxel ziax luguiedx guin abi' bex diidx loj gra ree bejn ni been Jesús por laax.

*Rayajc xi'n Jairo në béngunaa bagaal xab Jesús*  
(Mt. 9:18-26; Mr. 5:21-43)

<sup>40</sup> Chi badxin Jesús zatiblad ro' nijs guin, dád rabaa gra ree bén za' yagaj guial badxinman din mal cabëz reeman laaman.

<sup>41</sup> Dxel bidxin bén la Jairo, laaman rniabee lën tijb xyadoo ree bén Israel. Bazuxibaman loj Jesús, rëbaman lojman din cheman lidxaman, <sup>42</sup> guial yu' tijb xi'nman biin chiptio'p ijz, ma guiëtczim. Chi zë Jesús dád zien ree bejn zinal laaman xt rixa't reeman laaman.

<sup>43</sup> Abi' tijb béngunaa no'ch loj reeman, ma gojc chiptio'p ijz ragxuuman ryajbaman rejn. Ma banijtaman graczi ni rajpaman guial wejman loj ree doctor, per ni'qui tijbaman ad gojct nayüjn laaman. <sup>44</sup> Bibigaman niz xijch Jesús abi' bagaalaman guia' xabaman. Loj hor ziigajc bayajcaman.

<sup>45</sup> Dxel gunabdiidx Jesús rëbaman:

—¿Chu baqui' naj?

Abi' graczi reeman rëb guial ad laat reeman baqui' laaman. Zianz rëb Bëd loj Jesús:

—Mextr, graczi ree bejn xt rixa't reeman lüj cucadxaä tëë reeman lüj, abi' rniabdiidxil chu baqui' lüj.

<sup>46</sup> Per rëb Jesús zatijb:

—Yu' chu baqui' naj din gogbeen yu' tijb bén ma bayajc con da guialrniabeen.

<sup>47</sup> Chi gogbee béngunaa guin guial ma gogbee gajc Jesús ni beenman, guidib rnijman bigzuxibaman loj Jesús. Dxel rëbaman lojman guidibloj ree bén guin chexc zeel baqui'man xabaman abi' loj hor guin gajc bayajcaman. <sup>48</sup> Dxel rëb Jesús lojman:

—Xi'n, ma bayajquil guial bililadxil naj, baguiaj zagdxe.

<sup>49</sup> Sta caneenë Jesús béngunaa guin, chi bidxin tijb Bén guza lidx Jairo, Bén rniabee lën xyadoo ree Bén Israel, rëbaman loj Jairo:

—Mal güjt xi'nl, ad ruslenril Mextr guin.

<sup>50</sup> Per chi biguiejn Jesús zian, rëbaman loj Jairo:

—Ad rdxebil, bililadxzi, zayajcqui xi'nl.

<sup>51</sup> Chi bidxin reeman lidxaman, ad cwëjbt Jesús niu ree ben ren, Bëdзи con Waj, con Jacob, con ree xdad xniaa bindo guin.

<sup>52</sup> Graczi ree Bén riga' yagaj cayoon, yu'naya tëë reeman por laam. Per rëb Jesús loj reeman:

—Ad roondi, ad güjttim, naga'yëjszim.

<sup>53</sup> Graczi reeman baze' laaman guial ma ragbee reeman güjtim. <sup>54</sup> Dxel gunaaz Jesús yaam, guneeman rejs, rëbaman:

—Bindoo, bixche.

<sup>55</sup> Loj hor ziigajc babanm, bixchem. Dxel gunabee Jesús badëëd reeman ni gudawim. <sup>56</sup> Dád badxa loj ree xdadim, per rëb Jesús loj reeman achu loj guiëb reeman ni goc.

## 9

*Rxhiaal Jesús guidxiptio'p ree xbejnman chigliüü reeman xtiidx Dios*

*(Mt. 10:5-15; Mr. 6:7-13)*

<sup>1</sup> Gurejdx Jesús guidxiptio'p ree xbejnman, abi' badëëman guialrniabee loj reeman din yabëë reeman graloj xindxab luxdoo ree bejn yayüjn tëë reeman Bénragxuu ree.

<sup>2</sup> Guxhaalaman laa reeman chigliüü reeman xhienaag naj xguialrniabee Dios, yayüjn tëë reeman Bénragxuu ree.

<sup>3</sup> Rëbaman:

—Ad chinëdi xhienin par runejz: ni'qui yagrliadxidi, ni'qui guijxh, ni'qui guialraw, ni'qui milia, ni'qui stibnejz xabidi.

<sup>4</sup> Chutëëz lidx guidxindi, tib gol baya'nzi xt chi yazadi luguiedx guin. <sup>5</sup> Bal yu' guiedx lod ad rënt reeman lëjt, gol baza yagaj, gol gudxijp guxyuj guia'di zi'c tijb sen guial ad rënt reeman guzoob reeman xtiidx Dios.

<sup>6</sup> Dxel brii reeman zë reeman tijbgaj guiedx zigtie'ch reeman xtiidxza'c Dios, rayüjn tëë reeman Bénragxuu ree.

*Riguiejn Herodes ni cayüjn Jesús*

*(Mt. 14:1-12; Mr. 6:14-29)*

<sup>7</sup> Chi gogbee rey Herodes graczi ni cayüjn Jesús. Guyu-nawëëgaman guial yu' ree bejn rëb, Waj Bén baroobnijs bejn ree ma baban, <sup>8</sup> yu' tëë reeman rëb Elíasan Bén badëë xtiidx Dios loj ree bejn ma balüüloj, yu'za reeman rëb, tijb ree Bén badëë xtiidx Dios loj ree bejn gocli ma baban. <sup>9</sup> Per rëb Herodes:

—Naj gajc gunabee biru' yëjn Waj. ¿Chuza bėnan rigueijnan ruza't ree bejn xcwent ni cayũjnman?

Zianan zeel rũjn Herodes naguiejn guguaaman Jesús.

*Ruyaan Jesús gaay mil bejn*

(Mt. 14:13-21; Mr. 6:30-44; Jn. 6 :1-14)

<sup>10</sup> Chi badxin ree xi apóstoles Jesús, be reeman graczi ni biguieen reeman. Dxel binėman laa reeman lod achutczu bejn zobj, gajxh guiedx Betsaida. <sup>11</sup> Per chi gogbee ree bejn, dxel zinal reeman laaman lod zėman. Abi' balũũman laa reeman xcwent xguialrniabee Dios bayũjn tėėman bėnragxuu ree.

<sup>12</sup> Chi ma cadxe, bibig guidxiptio'p ree apóstoles lojman rėb reeman:

—Gũjdx loj gra ree bėn guin din yaguiaj reeman chitiil lod yaya'n reeman luguiedx doo ree nė ree ranch, chitiil tėė ni gaw reeman din lod nadxu' ree achetczu yu'.

<sup>13</sup> Dxel rėbaman loj reeman:

—Lėjt gajc gol badėėd ni gaw reeman.

Abi' rėb reeman:

—Per gaayzi guiadxtil naca'n con zatio'p bėjl, bajtėė bal yo'n yusiin ni gaw gra reeman.

<sup>14</sup> Abi' cost gaay mil ree xinguaaw riga' yagaj. Per rėb Jesús loj ree xbejnman:

—Gol gũjdx loj reeman din cwe tũ'pchii gaj reeman.

<sup>15</sup> Abi' bagojn reeman laa reeman persi gurej gra reeman zian. <sup>16</sup> Dxel cwa'man guigaay guiadxtil guin con zatio'p bėjl guin. Gules lojman xanyabaa, badėėman quixtėė loj Dios, zianz gula'man laa reen badėėman loj ree xbejnman din qui's reeman laan loj ree bėn guin. <sup>17</sup> Graczi reeman gudaw xt bigdxinladx reeman. Abi' bato'p reeman chiptio'p dxũm nilaay baya'n.

*Rėb Bėd guial Jesús naj Cristo*

(Mt. 16:13-19; Mr. 8:27-29)

<sup>18</sup> Tijb dxej cabejdx canab Jesús Dios, za'nė ganaxzi ree xbejnman. Gunabdiidxaman loj reeman, rėbaman:

—¿Chu rėb ree bejn najn?

<sup>19</sup> Badxi' reeman laan rėb reeman:

—Yu' reeman rėb lũj naj Waj bėn baroobnijs bejn ree, yu'za reeman rėb lũj naj Elías bėn badėė xtiidx Dios loj ree bejn, yu' tėė reeman rėb lũj naj tijb ree bėn badėė xtiidx Dios loj ree bejn gocli, bėn ma baban.

<sup>20</sup> Dxel gunabdiidx Jesús zatijb, rėbaman:

—Laadx lėjt, ¿xhie nadi chu najn?

Badxi' Bėdan rėbaman:

—Lũj naj Cristo. Lũj naj Xi'n Dios.

*Rugojn Jesús guiëtaman*  
(Mt. 16:20-28; Mr. 8:30-9:1)

<sup>21</sup> Rëb Jesús loj reeman achuczi loj guiëb reeman zian, <sup>22</sup> rëb tëëman:

—Rayal sagdiaj Bén guxhaal Dios: ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

<sup>23</sup> Dxel rëbaman loj gra reeman:

—Bal chu rën gac da bejnan ad rayalt güünman zi'c naj xixgabaman, siibnejzaman guialzi ni tédzaman guixie guixie abi' guidnalaman naj. <sup>24</sup> Din bén mazri rën guialnaban ni rajpaman loj guidxliuj guie, zadxin dxej gusëëbaman laan, per bén guiët por naj, zajpaman guialnaban tiblyaa con Dios. <sup>25</sup> ¿Xhie gan güün bejn gapaman gra ni yu' loj guidxliuj abi' nitaman loj Dios? <sup>26</sup> Bal chu ratu guza't naj në da diidxan, ziangajc naj najn Bén guxhaal Dios, yatunë'n laaman chi guialan con da guialrniabeen loj xbiani da Dadan nëtëë loj xbiani ree xianjlanan. <sup>27</sup> Per diidxliczi rnin lojdi, yu' ree bén za' guie ad zëjt xt guguaa reeman xguialrniabee Dios.

*Bidxaa Jesús loj choon ree xbejnman*  
(Mt. 17:1-8; Mr. 9:2-8)

<sup>28</sup> Chi gudëd cost xhujn dxej ni guneé Jesús diidx guin ree, wejman persi gurejdx gunabaman Dios tijb guiyc guia', binëman Bëd con Waj con Jacob. <sup>29</sup> La'tgaj cabejdx canabaman Dios, bidxaa lojman guiáad xabaman gojcan naquichbëj bidiin tëën bacha'. <sup>30</sup> Dxejczy gulentie tio'p ree bejn, caneenë reeman laaman. Tijbaman naj Moisejs zatijbaman naj Elías. <sup>31</sup> Yu' reeman galay biani cayü reeman diidx guial guiët Jesús Jerusalén. <sup>32</sup> Majsí yu' bacaal loj Bëd në loj ree xcompniaraman, batie'ch xbaaal reeman persi baguaa reeman xbiani Jesús con zatio'p ree bén za'nëman. <sup>33</sup> Chi ma baza ree bén caneenë Jesús, rëb Bëd lojman:

—Mextr, jzagdxen nadxu' ree guie! Zajc yaguieenan choon ranch, tijban par lüj, tijban par Moisejs zatijban par Elías.

Per ad ragbeet Bëd xhienin caneeman. <sup>34</sup> La'tgaj caneeman zian, biguiajt tijb zaj xt guiyc reeman, chi ma yu' reeman lën zaj guin dád bidxeb reeman. <sup>35</sup> Dxel loj zaj guin biguien cha' bejn, rëbaman:

—Bén guie naj da Xi'nan bén rën da'tan. Gol bacaagdiajg xtiidxaman.

<sup>36</sup> Chi gulox biguien cha'man loj zaj guin, baguaa reeman xtijbzi Jesús za'man. Abi' ad gutie'cht reeman diidx. Lën ree dxej zii achutczi loj rëb reeman ni baguaa reeman.

*Rayüjn Jesús tijb xin yu' xindxab luxdoo**(Mt. 17:14-21; Mr. 9:14-29)*

<sup>37</sup> Bareguiaal, chi baguiajt reeman guijc guia' guin, dád benzien brii bigchaagloj Jesús. <sup>38</sup> Abi' tijb bén no'ch loj reeman guridxa', rëbaman lojman:

—¡Mextr!, been wen baguiaa da xi'nan din tijbzi laax ra'pan.

<sup>39</sup> Tijb xindxab ru luxdoox abi' rucwixdiajx laax, rugüjtya'x laax rbëë tëëx bichijn ro'x. Dád rusagdiajx laax ad rëntix guslaax laax. <sup>40</sup> Ma gunaaban loj ree xbejnl din nabëë reeman xindxab guin, per ad gojct reeman.

<sup>41</sup> Badxi' Jesús laan rëbaman:

—¡Benguijdx, bén ad riladxt! ¿Xt goc gazunë'n lëjt gadaan tëen lëjt? Tanë xi'nl guie.

<sup>42</sup> Chi cabig xin guin basajb xindxab guin laax luyuj, bagüjtya'x laax zatijb. Per gunabee Jesús barii xindxab guin, bayüjnman laax dxel bayüman laax loj xdadix. <sup>43</sup> Graczi reeman badxaløj guialrniabee ni rajp Dios.

*Rugojn Jesús zatijb guial guiëtaman**(Mt. 17:22-23; Mr. 9:30-32)*

La'tgaj caydxa loj reeman ni cayüjn Jesús, rëbaman loj ree xbejnman:

<sup>44</sup> —Gol bacaagdiajgchaaw ni ganin lëjt: yayü reeman Bén guxhaal Dios loj ree bejn.

<sup>45</sup> Per laa reeman ad bignia't reeman ni rnieeman guial ad badëëtaman mod nignia' reeman, abi' bidxeb reeman niniab-diidx reeman lojman xhie rën guiëb ni rëbaman.

*¿Chu mazri zojbloj?**(Mt. 18:1-5; Mr. 9:33-37)*

<sup>46</sup> Dxel guzuløj ree xbejnman rëb loj lasa' reeman chu loj gra reeman mazri zojbloj. <sup>47</sup> Per gogbee Jesús xgab ni cayüjn reeman abi' cwa'man tijb xindoo, bazujman laax cwë'man, <sup>48</sup> dxel rëbaman loj reeman:

—Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man. Din bén rüjn sirv lojdi, laaman mazri zojbloj lojdi.

*Bén ad za't contr dunuj ree za'man con dunuj ree**(Mr. 9:38-40)*

<sup>49</sup> Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

<sup>50</sup> Per rëb Jesús lojman:

—Ad rudxoondi, din bén ad za't contr dunuj ree, za'man con dunuj ree.



*Gudilë Jesús Jacob con Waj*

<sup>51</sup> Chi ma cadxin dxej yayë'p Jesús xanyabaa, dxel beenman xgab guial rüjn naguiejn cheman Jerusalén. <sup>52</sup> Guxhaalaman bën guned ree, wej reeman tijb guiedxdo nulen Samaria bitiil reeman lod yaya'n reeman. <sup>53</sup> Per ad cwëjbt ree bën Samaria guin nudëed reeman lod naya'nman guial gogbee reeman cheman Jerusalén. <sup>54</sup> Chi baguiaa Waj con Jacob zian, rëb reeman lojman:

—Dad, ¿rënl ya yanabeen guiat bajl xanyabaa din gunijtan bën guin ree zi'c been Elías bën badëë xtiidx Dios loj ree bejn?

<sup>55</sup> Dxel badxi' loj Jesús loj reeman, abi' gudilëman laa reeman rëbaman:

—¿Nid ragbeedi ya guial loj xindxab zëed ni rnieedi? <sup>56</sup> Naj, Bén guxhaal Dios, ad zialtan din gunijtan xguialnaban bejn loj Dios, zialan din yabën laa reeman loj dol.

Dxel zë reeman zatijb guiedx.

*Bën rën chinal Jesús*

(Mt. 8:19-22)

<sup>57</sup> Chi zë reeman lunejz, tijb bejn rëb loj Jesús:

—Dad, rënan guidnaalan lüj bantëez guin chel.

<sup>58</sup> Badxi' Jesús laan rëbaman:

—Cuyojt ree yu' xguiajbiliaa reeb guiáad ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

<sup>59</sup> Rëb Jesús loj ben ren:

—Tanal naj.

Per badxi'man laan rëbaman:

—Dad, banee mod gabenë' da Dadan xt chi guiëtaman.

<sup>60</sup> Abi' rëb Jesús lojman:

—Basa'n xdadil con ree bën ad rënt guidnal naj, laa reeman guquie'ch laaman. Sa'n lüj bigtie'ch diidx xhienaag naj xguialrniabee Dios.

<sup>61</sup> Dxel rëb zatijb bën guin:

—Dad, rënan guidnaalan lüj, per yalojxgaj banee mod chigzadiidxnë' ree da familan.

<sup>62</sup> Per rëb Jesús:

—Bën guiniaaz guia' garad abi' gudxi' lojman niz xi-chaman, ad zile't guilia'man yuj zagdxe. Ziangajc bën rën guidnal naj, bal id zusa'nman graczi tiblad ad zile't chu'man loj xguialrniabee Dios.

**10***Rxhiaal Jesús gayojnchii bejn*

<sup>1</sup> Chi gudëd gojc ree ni guin, gulej Dad Jesús gayojnchii bejn, abi' guxhaalaman tio'p gaj reeman luguiedx ree në ree ranch

din ned reeman che gaj reeman lod naj cheman. <sup>2</sup> Rëbaman loj reeman:

—Diidxliczi, zien bejn rën gucaagdiajg xtiidx Dios, per ad zient bën gulüü laa reeman yu'. Zeel gol gurejdx gunab Dios din guixhiaalaman mazri zien bën gulüü laa reeman. <sup>3</sup> Gol chej, naj rxhial lëjt zi'c rej ree xiil galay ree cuyojt. <sup>4</sup> Ad chinëdi guijxh, ni'qui milia, ni'qui zatib nejk xgurëchidi, ad sudxedi guinieenëdi bejn ree runejk. <sup>5</sup> Bantëez lënü chu'di, yalojxgaj gol güjdx: “Dios yabe'cdxe luxdoodi.” <sup>6</sup> Abi' bal lënüzii yu' ree bën rayal guialnaza'c guin, zaya'n nan yagaj. Guiáad bal id rayal reeman laan zayejcan con lëjt. <sup>7</sup> Yagaj gol baya'n, gol gudaw, gol gu' ni guneek reeman. Din bën rüjn dxiin rayal gaxaman. Yagajzi gol baya'n ad bal yaya'ndi lood ren. <sup>8</sup> Chi guidxindi tijb guiedx lod yaca' reeman lëjt, gol gudaw ni guneek reeman. <sup>9</sup> Gol bayüjn ree bënragxuu yu' ree luguiedx guin, gol güjdx tää loj reeman: “Ma zëed xguialrniabee Dios gajxh par lëjt.” <sup>10</sup> Per bal guidxindi tijb guiedx lod ad rënt reeman yaca' reeman lëjt, gol brii lunejk, gol güjdx loj reeman: <sup>11</sup> “Xt xgoxyuj ladxidi ni cwa du guia'n, radxijpan zi'c tijb sen guial ad bidxga'tidi dux tiidxan. Per gol gogbee, guial ma zëed xguialrniabee Dios gajxh par lëjt.” <sup>12</sup> Naj rni lëjt guial dxej yadëed ree bejn cwent loj Dios, mazri casti narooob yayal reeman guial loj ree bën gure guiedx Sodoma.

*Bën ad bazoobt ree xtiidx Dios  
(Mt. 11:20-24)*

<sup>13</sup> Rëb tää Jesús:

—¡Probza lëjt bën Corazín! ¡Probza lëjt bën Betsaida! Din bal guiedx Tiro në guiedx Sidón niajc gra ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tää cobdëj guijc reeman zi'c tijb sen guial ma bayüjn reeman xgab por xtol reeman. <sup>14</sup> Per rnin lojdi guial dxej yadëed ree bejn cwent loj Dios, mazri casti narooob yayalidi guial loj ree bën Tiro në ree bën Sidón. <sup>15</sup> Guiáad lëjt, bën Capernaum, ad naladxidi yayalidi xanyabaa, lëjt yayal gabijl.

<sup>16</sup> Dxel rëb Jesús loj ree xbejnman:

—Bën ridxga' lëjt, najn ridxga'man, per bën ad ridxga't lëjt, najn ad ridxga'taman. Guiáad bën ad ridxga't naj, bën guxhaal najn ad ridxga'taman.

*Badxin ree bën gayojnchii guxhaal Jesús*

<sup>17</sup> Chi badxin ree bën gayojnchii guxhaal Jesús, dád rabaa reeman rëb reeman lojman:

—Dad, xt ree xindxab ruzoob dux tiidxan chi raza'tan lajl.

<sup>18</sup> Abi' rëb Jesús loj reeman:

—Waliquidi, naj baguia, zi'czi rë'p nijs basëëb xguialrniabee xindxab. <sup>19</sup> Naj banee lëjt guialrniabee din gulëedi guiyc ree bëel në guiyc ree nixüb, në par güündi gan loj xguialrniabee xindxab sin guial güünx lëjt xhienin. <sup>20</sup> Per ad rabaadi guial ruzoob ree xindxab guin xtiidxidi, gol babaa guial ca lajdi loj libr yu' xanyabaa.

### *Rabaa Jesús*

(Mt. 11:25-27; 13:16-17)

<sup>21</sup> Loj hor ziigajc babaa da't Jesús por xSprijt Dios, abi' rëbaman:

—Ruzatan lüj zagdxe, Dad, lüj rniabee xanyabaa në loj guidxliuj, din ni baquie'chil loj ree bén rajc në loj ree bén rignia', laan ma balüül loj ree bén ad rajcza'ct. Zian gojcan Dad, din zian guyën.

<sup>22</sup> 'Da Dadan banee gra lon. Abi' achut nünbee Jesucrist Xi'n Dios, tijbzi Dios, achu tëet nünbee Dios, tijbzi Jesucrist xi'nman con ree bén rënman güünbee Dios.

<sup>23</sup> Dxel baguiaaman loj ree xbejnman, abi' rëbaman lojzi reeman:

—Xiquilbaa ree bén guguaiaa ni cuguaiaadi. <sup>24</sup> Din naj rni lojdi, zien ree bén badëë xtiidx Dios loj ree bejn në ree rey guyën nuguaiaa ni cuguaiaadi, per ad baguiaat reeman laan. Guyën reeman nucaagdiajg reeman ni cucaagdiajguidi, per ad bacaagdiajgt reeman laan.

### *Xcwent tijb bén Samaria*

<sup>25</sup> Tijb mextr rajc ley guzuliman guneenëman Jesús. Abi' din güünman laaman prueb, gunabdiidxaman lojman rëbaman:

—Mextr, ¿xhie rayal günan din ga'pan guialnaban tiblayaa con Dios?

<sup>26</sup> Badxi' Jesús laan rëbaman:

—¿Xhie ca loj ley badëë Dios loj Moisejs? ¿Xhienaag rignia'lan?

<sup>27</sup> Abi' rëb mextr guin:

—“Guyën xDadil Dios guidib guiyc guidib ladxil guyën tëë ben ren zi'c rën lüj gajc.”

<sup>28</sup> Badxi' Jesús laan, rëbaman:

—Zagdxequi badxi'lan. Bal güünl zian zajpil guialnaban tiblayaa con Dios.

<sup>29</sup> Per guyën mextr guin naya'nman zagdxe, gunabdiidxaman loj Jesús, rëbaman:

—¿Chu bénan guiënan zi'c rën naj gajc?

<sup>30</sup> Dxel be Jesús tijb cwent lojman, rëbaman:

—Tijb bén Israel briiman Jerusalén zëman guiedx Jericó. Abi' gunaaz ree xingubaan laaman, gudijn reex laaman gulan tëë reex gra ni ca'man xt në xabaman, basa'n reex laaman

ma güjtczaman. <sup>31</sup> Dxel gudöd tijb bixhioz niz yagaj, per chi baguiaaman bén guin, zijt bicaaman volt, zëtaman. <sup>32</sup> Nè tijb bén Levita bén rüjn yudar bixhioz ree, gudöd niz yagaj, chi baguiaaman bén guin, zijt bicaaman volt, zëtaman. <sup>33</sup> Per tijb bén Samaria gudöd niz yagaj, chi baguiaaman bén guin, bayaman laaman, <sup>34</sup> dxel gubigaman lod naga'man, badxe'man sejt con vin lod nadxeelguijdxaman dxel guxhiiman laan con lajd. Zianz badxiibaman laaman xburaman binëman laaman lënü lod raya'n ree bejn. Yagaj gunajman laaman. <sup>35</sup> Chi bareguiaal, chi ma yaguij bén Samaria guin, gulëëman milia xieen tio'p dxej dxiin badëëman laan loj bén naj lidxan, rëbaman lojman: “Gunaj bén guie, bal gunijtil mazri, naj yaguix laan chi yaye'can.”

<sup>36</sup> Dxel rëb Jesús loj mextr guin:

—Yan, loj guiyon ree bén guin, ¿chu bénan guyën bén gudin ree xingubaan guin?

<sup>37</sup> Badxi' mextr guinan rëbaman:

—Bén baya laaman.

Dxel rëb Jesús lojman:

—Baguiaj, been ziangajc con ben ren.

### *Rignaj Jesús Mart në Li*

<sup>38</sup> Basnuu Jesús zëman abi' bidxinman tijb guiedxdoo, yagaj wejman lidx tijb biin la Mart. <sup>39</sup> Yu' tijb xbëlim lam Li. Gurej Li guin guia' Jesús cucaagdiajguim ni caneeman. <sup>40</sup> Per Mart guin mazri ruquiejnë gra xmandadim, abi' bibiguim loj Jesús rëbim:

—Dad, ¿nid rul xgab ya guial rusa'n da bëlan naj con gra mandad guin? Güjdx lojm dïn güünm naj yudar.

<sup>41</sup> Badxi' Jesús laan rëbaman:

—Mart, Mart, dád rul xgab guial yu' da't xmandadil. <sup>42</sup> Per tijbzi ni mazri zojbloj yu'. Li gulejm ni mazri zojbloj, abi' achut zajc chiquiedan lojm.

## 11

### *Rülüü Jesús xhienaag cwedx guiniab bejn Dios* (Mt. 6:9-15; 7:7-11)

<sup>1</sup> Tijb dxej cabejdx canab Jesús Dios. Abi' chi gulox gurejdx gunabaman Dios, rëb tijb xbejnman lojman:

—Dad, balüü dunujn yarejdx yanaaban Dios, zi'c balüü ree xbejn Waj bén baroobnijs bejn ree.

<sup>2</sup> Abi' rëb Jesús loj reeman:

—Chi cwedx guiniabidi Dios, gol güjdx:

Dad, lüj yu' xanyabaa,  
rayal yaya'p da'tan lajl respejt.

Gac zi'c rniabeel.

Gac zi'c rēnl loj guidxliuj, zi'c rajc xanyabaa.

<sup>3</sup> Bazaladx ni yadaawan guixie guixie.

<sup>4</sup> Been dunujn perdon gra ree ni mal ma baguieenan, zi'c raguieenan perdon bēn rūjn ree dunujn ni mal.

Ad tiēbil güün xindxab dunujn gan yaguieenan dol, babēē dunujn loj gra ni mal.

<sup>5</sup> Abi' rēb Jesús loj reeman:

—Yaguie'ch ree, tijb lējt yu' xmiw abi' garol guiaal chedi lidxix, guiēbidi: “Miw, baneesii choon guiadxtil gagui'nān, <sup>6</sup> din bi't tijb da miwan abi' achet ra'pan gudēdan lojx.” <sup>7</sup> Dxel nax diisd lēnū guin: “Ad ruslenl naj. Ma nayaaw ro' da portan. Ma naga'yē'snē' ree da xi'nān. Ad zile't chixchejn gunen laa reen.” <sup>8</sup> Per rnin lējt, majsi bal id zixchex din guneex ni ryaadxidi guial rajc xmiwidi laax. Per zūjnx nagueijn chixchex din guneex ni ryaadxidi chitēē guslenridi laax. <sup>9</sup> Zeel rnin lējt: Gol gunab loj Dios, laaman guneē ni rniabidi. Gol baguiilaman, zadxejlidi laaman. Gol gurejdx gunabaman, zidxga'man lējt. <sup>10</sup> Din bēn rniab, zaca'man. Abi' bēn rguil, zadxejlaman guiaad bēn rbejdx rniab laaman zidxga'man laaman.

<sup>11</sup> ¿Lējt najdi dad, wen zudēēdi tijb guiaj loj xi'ndi ya chi guiniabix guiadxtil?, ¿o zudēēdi tijb bēēl ya chi guiniabix bējl? <sup>12</sup> ¿o zudēēdi nixüb ya chi guiniabix dxij? <sup>13</sup> Nacli lējt najdi bēndol rajc rudēēdi ni zagdxe loj xi'ndi. ¡Diidxgui xDadidi bēn yu' xanyabaa, nid zudēē xSprijtaman loj ree bēn rniab laaman ya!

*Rēb ree bejn ca' Jesús xguialrniabee Beelzebú*

*(Mt. 12:22-30; Mr. 3:19-27)*

<sup>14</sup> Caybēē Jesús tijb xindxab basa'n tijb bejn gop. Abi' chi barii xindxab guin guzuloj canee bēn guin. Dxel dād badxaloj ree bejn. <sup>15</sup> Per yu' reeman rēb:

—Bēn guin rabēē xindxab luxdoo ree bejn por xguialrniabee Beelzebú, xin rniabee ree xindxab.

<sup>16</sup> Yu'za reeman par güün reeman laaman prueb, rēb reeman lojman din güünman milagr zēēd xanyabaa. <sup>17</sup> Per Jesús ragbee gajcaman xgab cayūjn reeman, abi' rēbaman:

—Gra nacion bal id nadxag riga' bejn por wadijl, rlia' lasa' reeman, ziangajc tijb famil bal id nadxag riga' reeman por wadijl, rlia' lasa' reeman. <sup>18</sup> Ziangajc bal Satanás xin rniabee ree xindxab su contr lasa' xindxab gajquix, nayob nit xguialrniabee. Canin zian guial rēbidi por xguialrniabee Beelzebú rabēn xindxab luxdoo ree bejn. <sup>19</sup> Per bal rabēn xindxab luxdoo ree bejn por xguialrniabee Beelzebú, ¿chuza rudēēd guialrniabee loj ree xbejn di din yabēē reeman xindxab? Zeel laagajc reeman rulūü guial ad laat rniēdi. <sup>20</sup> Per por

xgualrniabee Dios rabën xindxab luxdoo ree bejn, laan rën guiëb guial ma za'në xgualrniabee Dios lëjt.

<sup>21</sup> 'Bal tijb béngojl da't ca' xguiibaman, rajp lidxaman. Ad zajct cwan bejn ni rajpaman. <sup>22</sup> Per bal guidxin bén mazri gojl guial lojman güünman laaman gan abi' chisüdaman guiib ni ca'man tia' tēēman gra ni rajpaman.

<sup>23</sup> 'Bén ad za't con naj, za'man contr naj, guiáad bén ad ruto'pt bejn par naj rtie'chaman laa reeman.

### *Xindxab rayejc*

(Mt. 12:43-45)

<sup>24</sup> 'Chi rarii tijb xindxab luxdoo tijb bejn, abi' rza xindxab guin niz loj yujbidx rguuilix lod yaziiladxix. Chi ad rdxejlt lod yaziiladxix, dxel rüjnx xgab naladxix: "Zagdxeli yaye'can lod bariin." <sup>25</sup> Abi' chi rayejquix ruguiaax luxdoo bén guin, najn zi'c tijb lēnü lod bilioob lod najcchaaw tēē. <sup>26</sup> Dxel rica'x zagajdx ree xindxab naj mazri xinmal guial lojx. Abi' ru gra reex luxdoo bén guin. Dxel piorli raya'nman guial zi'c gocaman yaloj.

### *Xiquilbaa ree bén ruzoob xtiidx Dios*

<sup>27</sup> La'tgaj canee Jesús diidx guin ree, gurixdiaj tijb béngunaa no'ch loj ree benzien guin, rēbaman:

—iXiquilbaa béngunaa bazuj lüj loj guidxliuj, bén baslaa tēē lüj!

<sup>28</sup> Per badxi' Jesús laan rēbaman:

—iMazri xiquilbaa ree bén rucaagdiajg xtiidx Dios ruzoob tēē reeman xtiidxaman!

### *Rniab ree bejn güün Jesús tijb milagr*

(Mt. 12:38-42; Mr. 8:12)

<sup>29</sup> Zi'cri cado'p ree bejn lod za' Jesús, abi' guzuloj rēbaman loj reeman:

—Bén riga' ree loj guidxliuj yan, naj reeman benmal. Abi' rniab reeman tijb milagr, per achet guguaa reeman, tijbzi zi'c guzac Jonás bén badēē xtiidx Dios loj ree bejn. <sup>30</sup> Zi'c goc Jonás tijb sen par ree bén gure guiedx Nínive, ziangajc Bén guxhaal Dios najman tijb sen par ree bén naban yan. <sup>31</sup> Abi' bén goc reina guiedx Sabá, zabanman chi yadēēd ree bejn cwent loj Dios dxel guiëbaman guial ree bén riga' yan, yayal reeman xcasti Dios. Din laaman dád zijt guzaman bi-caagdiajgaman xgualrajc rey Salomón. Abi' yan, naj za'nē'n lëjt, mazri lasajcan guial loj rey Salomón. <sup>32</sup> Ziangajc ree bén guban guiedx Nínive, zaban reeman chi yadēēd ree bejn cwent loj Dios abi' guiëb reeman guial ree bén riga' yan, yayal reeman xcasti Dios. Din bén Nínive ree bayejc reeman loj Dios chi bacaagdiajg reeman xtiidxaman ni guneē Jonás. Abi' yan, naj za'nē'n lëjt mazri lasajcan guial loj Jonás.

*Guiaaloj bejn naj zi'c biani**(Mt. 5:15; 6:22-23)*

<sup>33</sup> 'Achut rucaaguij tijb guij par sun lod naguie'ch, achu tēet ruta'cw laan lēn tijb yagalm. Rayal sun lod guiguienan din gusnin loj bēn chu' lēnū. <sup>34</sup> Guiaaloj bejn naj zi'c tijb biani par xcuerpaman. Bal por ni ruguiaal rŭjnł ni zagdxē, guidib xcuerpil naj biani. Per bal por ni ruguiaal rŭjnł ni mal, guidib xcuerpil naj zi'c lod nacay. <sup>35</sup> Gojp cudad chitēē chinē guiaalojł lŭj loj nejz mal luar loj nejz zagdxē. <sup>36</sup> Abi' bal ni'qui tibda'n xcuerpil ad rŭjnt ni mal, guidibczan gac nayni zi'c chi rusni guij con xbacha'n.

*Ni rŭjn ree mextr rajc ley nē ree bēnfarisew**(Mt. 23:1-36; Mr. 12:38-40; Lc. 20:45-47)*

<sup>37</sup> Chi gulox guneenē Jesús laa reeman, tijb bēnfarisew rēb loj Jesús din chitaw Jesús lidxaman. Chi guyuman, zianz gurejman xan mex. <sup>38</sup> Abi' bēnfarisew guin badxalojman chi baguiaaman ad banaat Jesús chi ma gawaman zi'c naj xcostumbr reeman. <sup>39</sup> Per rēbaman loj reeman:

—Najdi zi'c tijb vajs con pliajt ni naya xijch, rguiendi benza'c, per luxdoodi yu' da't guialgubaan nē ni mal. <sup>40</sup> ¡Bennad! ¿Nid bēn been gajc xcuerpidi been luxdoodi ya? <sup>41</sup> Zeel gol been yudar bēn achet rajp din guiguien guial najquidi benza'c.

<sup>42</sup> '¡Probza lējt bēnfarisew! Rbēēcadi ni naj par Dios, rŭjnđi chii lala' ni rajpidi zi'c bidxtil nē rud nē graloj ni rxŭbindi abi' rudēēdi tijban loj Dios. Per ad rŭjntidi zi'c rayal ad rēn tēētidi Dios. Gol bidxga' Dios ad gucwēēz tēē gudēēdi ni rudēēdi lojman.

<sup>43</sup> '¡Probza lējt, bēnfarisew! guial ruladxidi cwedi lod rbej ree bēn zojbloj lēn ree yadoo, ruladx tēēdi gugajpdioz ree bejn lējt zagdxē niz lunejz.

<sup>44</sup> '¡Probza lējt, mextr rajc ley nē lējt bēnfarisew, bēn rusquiee!, din najdi zi'c baa ni ad rguient, abi' ad ragbeet ree bejn rē'p reeman guijcan.

<sup>45</sup> Dxel gunee tijb mextr rajc ley, rēbaman loj Jesús:

—Mextr, nē dunujn caneeguijdxil guial rēbil zian.

<sup>46</sup> Badxi' Jesús laan rēbaman:

—¡Ziangajc lējt mextr rajc ley, probza lējt!, guial rniabeedi bejn ree gŭŭn reeman ni nawēēgda't abi' rniabeezidi gŭŭn bejn zian guiáad lējt ni'qui ta'n ad rŭjntidi laa reeman yudar din gŭŭn reeman zi'c rēndi.

<sup>47</sup> '¡Probza lējt!, guial rŭjnchaawidi xbaa ree bēn badēē xtiidx Dios loj ree bejn, bēn bagŭjt gajc ree xbēngulalidi. <sup>48</sup> Zian ragbee ree bejn guial ruladxidi ni been ree xbēngulalidi. Laa

reeman bagüjt ree bén badëë ree xtiidx Dios loj ree bejn, guiáad lëjt rayüjnchaawidi xbaa reeman.

<sup>49</sup> 'Zeel Dios guial ragbeeman gra ni gac, rëbaman: "Gaxhalaan bén rudëë ree xtiidx Dios loj ree bejn, në ree apóstoles, yu' reeman gugüjtidi yu' tëë reeman sunalidi din güündi laa reeman xhienin." <sup>50</sup> Abi' bén naban ree yan, laa reeman yadëed cwent loj Dios por rejn ni guxhie' ree bén badëë xtiidx Dios loj ree bejn, bén güt ree diizd chi go'tchaaw guidxliuj, <sup>51</sup> diizd xrejn Abel xt xrejn Zacarías bén bagüjt reeman ro' yadooro' Jerusalén. Zeel rnin lëjt guial ree bén naban yan, laa reeman quix por gra reeman.

<sup>52</sup> 'i'Probza lëjt, mextr rajc ley!, guial ad rtiëjbtidi chu' ree bejn loj xnejz Dios, ni'quiza lëjt ad rüjnt naguiejn chu'di loj xnejz Dios abi' rudxoondi chu' ree bejn loj xnejzaman.

<sup>53</sup> Chi gunee Jesús zian, dád bidxe'ch ree bénfarisew guin në ree mextr rajc ley. Abi' guzuloj zien ree ni rniabdiidx reeman lojman, <sup>54</sup> din guidoon xhie guiëbaman din chile' gutedia' reeman laaman.

## 12

### *Xlevadur ree bénfarisew*

<sup>1</sup> La'tgaj canee Jesús zian, guzuloj cado'p por mil bejn, abi' guial zien da't reeman xt rxa't lasa' reeman. Dxel guzuloj Jesús rëbaman yaloy loj ree xbejnman:

—Gol gojp cudad con xlevadur ree bénfarisew, rën guiëban gapidi cudad con ni rusquiee reeman. <sup>2</sup> Din achet ni naguie'ch yu' ni ad zaguiet, ad yu' tëët ni ralan ni ad zagbeet bejn. <sup>3</sup> Zeel gra diidx ni ma guneedi lod nacay, zaguiejn ree bejn laan lod nayni. Guiáad ree diidx ni ma guneedi ralan lëñü, yu' chi cwidxa' reeman guiniee reeman diidx guin ree diizd guijc ree yu.

### *Chu rayal guidxeb bejn*

*(Mt. 10:28-31)*

<sup>4</sup> 'Rnin lëjt, ad ridxebidi bén rën ree gugüjt lëjt din zile' gugüjt reeman xcuerpidi, sa'n xsprijtidi ad zile't gugaal reeman laan. <sup>5</sup> Ganin lëjt chu rayal guidxebidi: gol bidxeb Dios bén rajp guialrniabee guial chi ma biquiedaman xguialnabandi zajc guzaalaman lëjt gabijl. Zeel gol bidxebaman.

<sup>6</sup> 'Lëjt ragbee guial biguijndoo ree ad lasajct reeb wayëjx, per Dios ad rayanladxtaman ni'qui tijb reeb. <sup>7</sup> Guiáad lëjt xt guidxguijquidi, graczan nayab loj Dios. Zeel ad rdxebidi din mazri lasajquidi guial loj zien da't ree biguijndoo.

### *Bén rëb loj ree bejn guial najman xbejn Jesucrist*

*(Mt. 10:32-33; 12:32; 10:19-20)*



<sup>8</sup> 'Rnin lëjt, chutëez Bén guiëb loj ree bejn guial najman da bejnan, ziangajc naj najn Bén guxhaal Dios guiën loj ree xianjl Dios guial da bejnan najman. <sup>9</sup> Per Bén guiëb loj ree bejn guial ad najtaman da bejnan, ziangajc guiën loj ree xianjl Dios guial ad najtaman da bejnan.

<sup>10</sup> 'Chutëez Bén guinieeguijdx Bén guxhaal Dios zajcaman perdon, sa'n Bén guinieeguijdx xSprijt Dios, ad zajctaman perdon.

<sup>11</sup> 'Chi chinë reeman lëjt lën ree yadoo o loj ree juejs në loj ree guxtis, ad aal chu'di xgab xhienaag yadxi'di xtiidx reeman. <sup>12</sup> Din chi guidxin hor ni guinieedi, xSprijt Dios gunee diidx guinieedi.

*Xcwent tijb xinrijcw*

<sup>13</sup> Tijb Bén no'ch loj ree benzien guin rëb loj Jesús:

—Mextr, güjdx loj da bichan din guneex ni rayalan.

<sup>14</sup> Per rëb Jesús lojx:

—¿Chu bazuj naj günan guialguxtis o gagui'san ni tia'di?

<sup>15</sup> Rëb tēeman loj reeman:

—Gol gojp cudad; ad sēēbladixidi gapidi ni rajp ree ben ren, din ad ni rajpt bejn runee guialnaban.

<sup>16</sup> Dxel beman tijb cwent loj reeman, rëbaman:

—Guyu tijb xinrijcw, dád gojc xguiniaax. <sup>17</sup> Dxel beenx xgab naladxix: “¿Xhienaag günan? Ad ra'ptan lod gagu'chaawan guialnaza'c guin ree.” <sup>18</sup> Abi' gunaladxix: “Ma ragbeen xhienaag günan. Guse'nan yu lod rgu'chaawan da guialnaza'can din günan mazri yu narooob ree lod gagu'chaawan laa reen, në graczi ni ra'pan. <sup>19</sup> Dxel guiën, dád zien guialnaza'c ra'pan par zien ijz, yaziiladxan, gawan, guiën'n yabaa tēen.” <sup>20</sup> Per rëb Dios lojx: “Xin tont, yanguxhin gajc guiëtil, laadx ni nagu'chaawil, ¿chu yaya'nnë laan?”

<sup>21</sup> Zian rzajc Bén rgu'chaaw ni za'c par laagajcaman, per loj Dios achet rajpaman.

*Achetczi rayal chu' bejn xgab*

*(Mt. 6:25-34)*

<sup>22</sup> Dxel rëb Jesús loj ree xbejnman:

—Naj rni lëjt: Ad chu'di xgab por ni gawidi par guibandi ni'qui por lajd ni gacwidi. <sup>23</sup> Guialnaban mazri lasajcan guial loj guialraw, guiáad xcuerp bejn mazri lasajcan guial loj xabaman. <sup>24</sup> ¡Gol baguiaa balo ree! Ad rxübint reeb ad rato'p tēet reeb guialnaza'c, ad rajp tēet reeb lod yagu'chaaw reeb guialnaza'c guin, per Dios rudëed ni raw reeb. ¡Abi' mazri lasajquidi guial loj reeb! <sup>25</sup> ¿Wen guial ru da'tidi xgab ma güün lëjt gajc mazri ziool ya? <sup>26</sup> Abi' bal ni'qui zian ad zile't güündi, ¿xhieczi gan rudi xgab por ni ren ree?

<sup>27</sup> ¡Gol baguiaa xhienaag rini's ree guiaa dajn! Ad rüjnt reen dxiin ad rguib tēet reen. Per ni'qui rey Salomón ad guzujchaawt zi'c za'chaaw ree guiaa guin, majsi mast guzujchaawaman. <sup>28</sup> Abi' bal gui'xh dajn ruzujchaaw Dios yan, majsi guixiezi che'can. ¡Diidxgui lējt, bēn ad rliladxza'ct ree laaman nid zuneeman ni gacwidi ya! <sup>29</sup> Zeel ad rudi xgab xhie gawidi o xhie gui'ē'di, ad bal tib yu'zidi laan xgab. <sup>30</sup> Din bēn ad nünbeet ree Dios rüjn zian. Laa reeman ru xgab por gra ree ni guin. Per lējt yu' xDadidi, laaman ragbeechaaw xhienin riaadxidi. <sup>31</sup> Per yalojxgaj gol baguüil güündi zi'c rniabee Dios, laaman gunee gra ni ryaadxidi.

*Guialnaza'c yu' xanyabaa*  
(Mt. 6:19-21)

<sup>32</sup> Lējt najdi da bejnan, ad rdxebidi. Ta'nzi najdi, per xDadidi Dios ma beenman xgab nabeenēdi laaman. <sup>33</sup> Gol bato' ni rajpidi din gudēēdan loj ree bēnprob. Gol been naguiejn güündi gan guialnaza'c ni ad rarar ni yu' xanyabaa, lod ad zut xingubaan cwan laa reen lod ad zacabe tēet reen. <sup>34</sup> Din lod rajpidi guialnaza'c guin, yagaj za' xquiarguejndi.

*Gol guzujsin*

<sup>35</sup> Gol guzujsin zi'c bēn ma najcw xab ca' tēē xguijman par griiman. <sup>36</sup> Gol been zi'c ree mojs cabēz yadxin xpatron reex, bēn zē loj guialruxhliaa, din diob guixhial reex ro' port yayuman chi gucaaman. <sup>37</sup> ¡Xiquilbaa ree mojs naga'naa cabēz xpatron reex! Naj rni lējt, laagajc patron guin cwe'c laa reex xan mex, dxel chicchaa xabaman din gudēēman ni gaw reex. <sup>38</sup> Xiquilbaa reex bal guidxaagloj xpatron reex laa reex naga'naa reex, majsi yadxinman garol guiaal o chi ma cayreguiaal ya. <sup>39</sup> Gol been xgab, bal tijb bejn ragbeeman xhie hor chu' xingubaan lidxaman cwanx, ad zatiējbtaman chu'x lidxaman. <sup>40</sup> Zianan zeel gol guzujsin din ad ragbeetidi dxejczy gui't Bēn guxhaal Dios.

*Mojs za'c nē mojs guijdx*  
(Mt. 24:45-51)

<sup>41</sup> Dxel gunabdiidx Bēd loj Jesús, rēbaman:

—Dad, ¿par dunujzan bel cwent guin ya o par gra ree bejn?

<sup>42</sup> Badxi' Jesús laan, rēbaman:

—¿Chu lējt naj zi'c tijb mojs za'c, nazobdiidx, rusa'n xpatronx laax lidxaman persi rulenx gra ree mojs rudēē tēēx ni raw reex chi rajl hor? <sup>43</sup> Xiquilbaa mojs cayüjn dxiin zagdx chi yadxin xpatronx. <sup>44</sup> Din diidxliczi rnin lējt, zusa'n gra xieen patron guin loj mojs guin. <sup>45</sup> Per bal naladx mojs guin: “Zaglaari yaguaad da patronan”, zianz sulojx gusagzix gra ree bēn rüjn dxiin yagaj, zi'c bēgunaa zi'c xinguaaw, dxel

suloj gawix, guië'x südx tëëx, <sup>46</sup>abi' yadxin xpatronx tijb dxej ni ad rbëztix në tijb hor ni ad ragbeetix. Dxel dád casti narooob gudëed patron guin laax, guixhiaalaman laax lod rayal ree bën ad ruzoobt diidx.

<sup>47</sup>'Din tijb mojs ragbee ni rën xpatronx güünx, abi' ad za'tix porvinid ad ruzoob tëëtix diidx, dád casti narooob tëdix. <sup>48</sup>Per mojs ad ragbeet ni rën xpatronx güünx abi' güünx ni rayal casti, ta'nz tëdix casti. Din bën badëed Dios quiarguejn, mazri zien ni rayal güünman por quiarguejn ni badëed Dios lojman. Ziangajc bën badëed Dios gualrniabee, mazri zien ni rayal güünman por gualrniabee ni badëed Dios lojman.

*Por Jesús rlia' lasa' ree bejn*

*(Mt. 10:34-36)*

<sup>49</sup>'Zialan loj guidxliuj zi'c tijb bën zidgacaaguij xhienin, abi' jma rën nejzdoon tiaguijn! <sup>50</sup>Gazaagdiajn guiët tëën, abi' jdád yu'nayan diizd yan xt chi gacan cumplid! <sup>51</sup>Ad naladxidi zialan loj guidxliuj par yabecdxen luxdoo bejn, zialan din guial guililadx reeman naj chu' wadijl. <sup>52</sup>Din diizd yan, lod naj reeman gaay loj tijb famil, til choonman contr tio'paman, tio'paman contr choonaman. <sup>53</sup>Dad su contr xi'nman guiáad xi'nman su contr laaman; na su contr xi'ndxa'paman guiáad laam su contr laaman; abi' nasuegr su contr xwalidxaman guiáad laam su contr laaman.

*Sen rguien xanyabaa*

*(Mt. 16:1-4; Mr. 8:11-13)*

<sup>54</sup>Rëb tëë Jesús loj ree benzien guin:

—Chi ruguiaadi ririi zaj niz lod rëéz gubijdx, rëbidi: zal guia, abi' rajc gajc zian. <sup>55</sup>Abi' chi ririi bi niz sur, rëbidi: gac nalaa, abi' rajc gajc zian. <sup>56</sup>jBën rusquiee! Ragbeedi xhie rën guiëb sen rguien xanyabaa në loj guidxliuj, ¿chexquiza zeel ad ragbeetidi xhie rën guiëb ni cayajc loj guidxliuj yan?

*Babej zagdxe con bën rdxe'ch lüj*

*(Mt. 5:25-26)*

<sup>57</sup>'¿Chexc ad rüjnt lëjt gajc xgab conin naj ni zagdxe? <sup>58</sup>Bal chu bën rudëed lüj loj guxtis, been naguiejn baya'nnëman diidx zagdxe la'tgaj yu' tiamp, chitëë yayüman lüj loj guxtis, abi' guxtis guin yayü lüj loj ree bën cu' lüj ladxguiib. <sup>59</sup>Naj rni lüj, ad zariitil ladxguiib guin xtczi quixil gra ni na guxtis guin.

## 13

*Gol bayüjn xgab por xtolidi*

<sup>1</sup>Lën gajc ree dxejzii wej tio'p choon ree bejn biguie reeman diidx loj Jesús guial bagüjt Pilato tio'p choon ree bën Galilea,

abi' bago'chaman xrejn reeman con xrejn ree be bagüjt reeman par gudëed reeman loj Dios zi'c gon. <sup>2</sup> Dxel rëb Jesús:

—Ad bal naladxidi guzajc ree bën Galilea guin zian guial naj reeman mazri bëndol guial loj gra ree bën Galilea. <sup>3</sup> Din naj rni lëjt guial ad ziantan. Abi' bal id zayüjndi xgab por xtolidi ziangajc saquidi. <sup>4</sup> Ad bal naladxidi bën chiinbichoon güt ree chi guxa't torre ni la Siloé laa reeman, naj reeman mazri bëndol guial loj gra ree bën zobj Jerusalén. <sup>5</sup> Naj rni lëjt guial ad ziantan. Abi' bal id zayüjndi xgab por xtolidi ziangajc saquidi.

*Xcwent yag higo ni ad rtiat*

<sup>6</sup> Dxel be Jesús tijb cwent loj reeman, rëbaman:

—Tijb bejn gojpaman yag higo lod nagu'man uv, abi' biquiaaman bal ca higo lojn, per achetzi bidxaaglojman.

<sup>7</sup> Dxel rëbaman loj bën rajp guidxliuj guin: “Baguiaa, ma gojc choon ijz rialan rguilan higo loj yag guin, abi' achetzi rdxaaglojn. Batüügan din nawëëgzi rüjnan loj guidxliuj guie.”

<sup>8</sup> Per rëb bën rajp guidxliuj guin: “Dad, basa'nsiin zatib ijz, yabeciaan yuj xanan gagu' tëënan abon. <sup>9</sup> Rupent zian tian, per bal id zacan dxel tügan.”

*Bayüjn Jesús tijb béngunaa ca bëw xijch*

<sup>10</sup> Tijb dxej raziiladx ree bejn, culüü Jesús bejn ree lën tijb yadoo, <sup>11</sup> yagaj za' tijb béngunaa ma gojc chiinbichoon ijz ragxuuman, tijb xindxab basa'n laaman con tijb bëw xijchaman, ad rila'tczi yaliman. <sup>12</sup> Chi baguiaa Jesús laaman, gurejdxaman laaman, rëbaman:

—Na, ma bayajquil guialguijdx ni goquil.

<sup>13</sup> Dxel badxiib yaaman guijcaman; abi' loj hor guin gajc baliman, zianz guzuloj cuza'taman Dios zagdxe. <sup>14</sup> Per bën rniabee lën yadoo guin dád bidxe'chaman guial bayüjn Jesús bën guin dxej raziiladx ree bejn, dxel rëbaman loj ree bejn:

—Xho'p dxej yu' guial güün bejn dxiin, loj ree dxej guin gol guida din yayajquidi, per ad dxej raziiladxt bejn.

<sup>15</sup> Badxi' Dad Jesús laan rëbaman:

—Bën rusquiee, ¿nid rxhiec xgo'ndi o xburidi dxej raziiladx ree bejn ya par chiquië'di laa reeb nijs? <sup>16</sup> Béngunaa guie zëëdaman loj xdiaa Abraham, ma gojc chiinbichoon ijz naxhii xindxab laaman con guialguijdx guie. ¿Wen id zajc yayajcaman dxej raziiladx ree bejn ya?

<sup>17</sup> Chi rëb Jesús zian, gra ree bën rdxe'ch laaman baya'n xtu; per graczi ree bejn rabaa guial ruguiaa reeman gra ree ni zagdxe ni rüjnman.

*Xcwent xhaj moxtajs*

(Mt. 13:31-32; Mr. 4:30-32)

18 Rëb tëë Jesús:

—¿Xhienaag ganin naj xguialrniabee Dios o xhie gulün lojdi din chignia'di xhienaag naj xguialrniabeeman? 19 Laan naj zi'c xhaj moxtajs ni rxübin bejn loj xguiniaaman, rni'san xt rajcan yag narooob. Abi' guial narooob da't rajcan xt rüjn xguixbitia's ree biguijn xidxan.

*Xcwent levadur*  
(Mt. 13:33)

20 Rëb Jesús zatijb:

—¿Xhienaag ganin naj xguialrniabee Dios? 21 Laan naj zi'c levadur ni rugo'ch tijb béngunaa choon midid harin persi rusaaguijn gra cob guin.

*Port nadëë*  
(Mt. 7:13-14, 21-23)

22 Chi zë Jesús Jerusalén, rulüüman bejn ree luguiedx narooob ree në ree luguiedx dobëz niz lod rdëdaman. 23 Abi' tijb bejn gunabdiidx lojman rëbaman:

—Dad, ¿ta'nz ree bën gac perdon ya?

Badxi' Jesús laan rëbaman:

24 —Gol been naguiejn din chu'di niz ro' port nadëë, din naj rni lëjt, zien ree bën rën chu', per ad zile't chu' reeman. 25 Din chi chisu bën naj lidxan gusiaawaman ro' port guin, lëjt guial yaya'ndi xchu, gucaadi ro' port guin guiëbidi: “Dad, guxhal.” Per yadxi'man xtiidxidi naman: “Ad ragbeetan ban zadi.” 26 Dxel suloj guiëbidi: “Tijbzi badaaw ree, tijbzi badü' ree, niz lad dux nejzan balüül dunujn.” 27 Per naman lojdi: “Ma rnin, ad ragbeetan ban guzadi. Gol biquied lon bëndol.” 28 Ni goondi gaw tëë layidi chi guguaadi Abraham, Isaac, Jacob, në gra ree bën badëë xtiidx Dios loj ree bejn, za' reeman lod rniabee Dios, guiáad lëjt yariicadi. 29 Din gui't ree bën sa gra lad guidiblagaa guidxliuj din cwe reeman gaw reeman lod rniabee Dios. 30 Abi' zien ree bën bigra yan, laa reeman gac bën yaløj nadxel. Guiáad ree bën naj bën yaløj yan, laa reeman gac bën bigra.

*Roon Jesús por Jerusalén*  
(Mt. 23:37-39)

31 Hor guin gajc bidxin tio'p choon ree bënfarisew, abi' rëb reeman loj Jesús:

—Baguiaj, baza niz guie, din rën rey Herodes gugüjtaman lüj.

32 Badxi' Jesús laan rëbaman:

—Gol chej gol chiguiedx loj bën rusquiee zii: “Yan, në guixie yabën xindxab yayün tëën bënragxuu ree, abi' widx gulooxan.”

33 Per naj rayal gusnuu da nejzan yan në guixie në widx,

din ad najt guial guiët tijb bén rudëë xtiidx Dios loj ree bejn luguedx ren bal id najn Jerusalén.

<sup>34</sup> ¡Bén Jerusalén, bén Jerusalén, rugüjtidi bén rudëë ree xtiidx Dios loj ree bejn rucaaguaiaj tëedi gra ree bén rxhiaal Dios lojdi! ¡Bëlczi volt guyënan nuchagan lasa'di zi'c rüjn tijb guid ruchajg lasa' ree xi'nb lën xhiilib, per ad cwëjbtidi!  
<sup>35</sup> Zianan zeel yaya'n ladxidi zi'c tijb guiedx lod achut zobj. Abi' rnin lëjt, diizd yan ad zuguaatridi naj xt chi guidxin dxej guiëbidi: “¡Nüjnle' Dios bén zëed por laaman!”

## 14

### *Rayüjn Jesús tijb bén rzaaguij*

<sup>1</sup> Tijb dxej raziiladx ree bejn wej Jesús bitawaman lidx tijb bénfarisew rniabee. Yu' ree bénfarisew guin cula'ch laaman xhie güünman, <sup>2</sup> guial za' tijb xinragxuu lojman rzaaguijx. <sup>3</sup> Dxel gunabdiidx Jesús loj ree mextr rajc ley në loj ree bénfarisew guin, rëbaman:

—¿Zajc yayüjn bejn bénragxuu dxej raziiladx ree bejn ya o ad zajctan?

<sup>4</sup> Per laa reeman achetdzi rëb reeman. Dxel gunaaz Jesús xinragxuu guin bayüjnman laax, abi' rëbaman lojx din yaguaiajx. <sup>5</sup> Dxel rëbaman loj ree bénfarisew guin:

—¿Bal tijb xburidi o tijb xgo'ndi yab lën tijb bizë, nid zabëedi laab ya, majsi naj dxej raziiladx bejn?

<sup>6</sup> Abi' achet gojc nadxi' reeman.

### *Bén rej ree loj guialruxhliaa*

<sup>7</sup> Chi baguiaa Jesús rbe ree biooz luar lod rbej ree bén mazri zobjloj, rëbaman loj reeman:

<sup>8</sup> —Bal chu guinee lüj chel loj tijb guialruxhliaa, ad cwel luar rbej ree bén mazri zobjloj. Din zajc guidxin zatijb biooz mazri zobjloj guial lojl, <sup>9</sup> abi' gui't bén gunee gropidi naman lojl: “Badëed lod zobjil cwe bén guie.” Dxel rayal chel guidib ratul chisobil loj yagxhil bigra. <sup>10</sup> Zeel chi guinee reeman lüj, zagdxeli bisob loj yagxhil bigra, din chi gui't bén gunee lüj naman lojl: “Miw, badëd loj tijb luar mazri zobjloj.” Zian, gra ree bén zobjnël xan mex guza't lüj zagdxë. <sup>11</sup> Din bén rlies xvalor gajc, yaya'nxtuman. Guiáad bén rüjn naya zajs xvaloraman.

<sup>12</sup> Dxel rëb Jesús loj bén gunee laaman:

—Bal goc cu'l guialraw, ad guinee xmiwil, ni'qui lasa'l, ni'qui bijchil, ni'qui benrijcw zobjnël gajxh. Din laa reeman yu' dxej guinee reeman lüj, abi' zian yanee reeman ni gudaw reeman lidxil. <sup>13</sup> Zagdxeli naj, chi güünl tijb lanij, gunee bénprob ree, në ree bén ad nadaant yaa, në ree bencoj con ree bénlutia'p. <sup>14</sup> Xiquilbaal bal güünl zian, din laa reeman ad

zajct yanee ni badëëdil. Per chi guidxin dxej yaban ree bén bazoob xtiidx Dios, Dios yaguijx laan lojl.

*Xcwent bén been tijb lanij*

<sup>15</sup> Chi biguiejn tijb bén zojbnë Jesús xan mex ni rëbaman, rëbaman loj Jesús:

—¡Xiquilbaa ree bén yayal gaw lod rniabee Dios!

<sup>16</sup> Dxel rëb Jesús lojman:

—Tijb bejn badxe' guialraw par xche, abi' guneeman zien da't ree bejn. <sup>17</sup> Chi ma gojl hor gaw reeman xche, guxhaal xmojsaman din chex chiguiedxix loj ree biooz guin: “Gol guda din graczi ma najcchaaw.” <sup>18</sup> Per graczi reeman guzuloj caynab perdon. Bén yaløj guin, rëbaman: “Yan gajczi guzin tijb guidxliuj, rayal chiquianan; been wen güjdx lojman din güünman naj perdon.” <sup>19</sup> Zatijbaman rëb: “Guzin gaay nejz go'n, yan chiguienan laa reeb prueb guidoondon rajc rüjn reeb dxiin ya; been wen güjdx lojman din güünman naj perdon.” <sup>20</sup> Zatijbaman rëb: “Yan gajczi baxhlian zeel ad zile't guialan.” <sup>21</sup> Chi badxin mojs guin bagojn xpatronx gra ni rëb ree bén guin, dád balenman, dxel rëbaman lojx: “Baquiejn wej niz galay ni, në niz lad ree nejz, tanë gra ree bénprob në ree bén ad nadaant yaa, në ree bencoj con ree bénlutia'p.” <sup>22</sup> Chi ma been mojs guin zian, dxel rëbix lojman: “Dad, ma benan ni nal, per sta yu' gajc luar lidxil.” <sup>23</sup> Dxel rëbaman lojx: “Wej niz loj carreter në niz loj ree nejz la's, been naguiejn ben ren ree din gui't reeman din cha lënü lidxan. <sup>24</sup> Din naj rni lojdi, ni'czi tijb ree bén gunen yaløj ad zajwt guialraw benchaawan par xche.”

*Ni rayal güün ree bén rën gac xbejn Jesús*

<sup>25</sup> Dád zien ree bejn zinal Jesús; abi' badxi' lojman loj reeman rëbaman:

<sup>26</sup> —Bal chudi rën guidnal naj, rayal guiëndi naj mazri guial loj xdadidi, guial loj xniaadi, guial loj lacheelidi, në guial loj xi'ndi, o bijchidi o bizandi, rayal tëë guiëndi naj mazri guial loj xguialnabandi, din bal id züjndi zian ad zajct gaquidi da bejnan. <sup>27</sup> Bén ad rënt sagdiaj guidnal tëëman naj, ad zajct gacaman da bejnan.

<sup>28</sup> Bal chu rën güün tijb yu narooob, ¿nid yaløjxgaj cweman ya din cwëëman cwent zadaan xmiliaman ya din gulooxaman laan? <sup>29</sup> Din bal sulojman xcimiantan abi' ad zulooxtaman laan, graczi ree bén guguaa laan guze' laaman, <sup>30</sup> guiëb reeman: “Guzuloj cayüjn bén guin yu abi' ad gojct nulooxaman laan.”

<sup>31</sup> O bal tijb rey güün wadijl contr zatijb rey, ¿nid yaløjxgaj cweman ya güünman xgab züjn chii mil xsuldadaman gan loj stijb rey zidnë gajl mil suldad ya? <sup>32</sup> Per bal naladxaman

ad züjntaman gan loj rey guin, la'tgaj sta za' rey guin zijt, guixhiaalaman bën chinë ree xrusonman din yaya'n reeman diidx ad zut wadijl. <sup>33</sup> Yan, ziangajc rnin lojdi, chutëez lëjt bal id zusa'n gra ni rajpadi din guidnalidi naj, ad zajct gaquidi da bejnan.

*Bal id zajcri zëd naxij*

(Mt. 5:13; Mr. 9:50)

<sup>34</sup> Dxel rëb Jesús:

—Ni zagdxe naj zëd. Per bal id zajcran naxij, ¿xhieza naag yayajcan naxij zatijb? <sup>35</sup> Ad rüjntan sirv par luyuj ni'qui par loj abon, rzëëbzan. ¡Bën rën ree gucaagdiajg, gol bacaagdiajg!

## 15

*Xcwent xiil gunit*

(Mt. 18:10-14)

<sup>1</sup> Gra ree bën ruquijx impuest në gra ree bëndol, bibig reeman lod za' Jesús din gucaagdiajg reeman ni rnieeman.

<sup>2</sup> Guiáad ree bënfarisew con ree mextr rajc ley rnieeguijdx reeman laaman, rëb reeman:

—Ruchajg bën guin bëndol ree rawnë tēëman laa reeman.

<sup>3</sup> Dxel rëb Jesús loj reeman:

<sup>4</sup> —Bal tijb bejn rajp tibgayuu xiil abi' rnijt tijbib, ¿nid rusa'nman zatajpgajlchiinbitapib dajn ya abi' rigdiilaman xiil gunit guin xt lodzi radxejlaman laab? <sup>5</sup> Abi' chi radxejlan laab rabaaman, rudxiibaman laab dxidyëjman. <sup>6</sup> Dxel chi radxin lidxaman, ruto'p ree xmiwaman në ree bën zojbnëman gajxh abi' rëbaman loj reeman: “Gol babaa zi'c rabaan, din ma badxejlan da xiilan be gunit.” <sup>7</sup> Yan, rnin lëjt, ziangajc rabaanë Dios tijb bën rayüjn xgab por xtol guial loj tajpgajlchiinbitap benza'c ad ryaadxt yayüjn xgab por xtol.

*Xcwent milia ni bizëëb*

<sup>8</sup> 'O bal tijb béngunaa rajpaman chii milia plajt abi' rusëëbaman tijban, ¿nid ruze'caman guij ya ruloob tēëman lënü abi' raguiilaman laan zagdxe da't xt lodzi radxejlan?

<sup>9</sup> Abi' chi radxejlan laan, ruto'p ree xmiwaman në ree bën zojbnëman gajxh, abi' rëbaman loj reeman: “Gol babaa zi'c rabaan din ma badxejlan milia basëban.” <sup>10</sup> Yan, naj rni lojdi, ziangajc rabaan ree xianjl Dios por tijb bëndol rayüjn xgab por xtol.

*Xcwent bën rüjn perdon xi'n*

<sup>11</sup> Rëb tēë Jesús loj reeman:

—Tijb bejn yu' tio'p xi'nman. <sup>12</sup> Abi' xin naj mazri xinguiag, rëb loj xdadix: “Dad, banee ni rayal gaca'n.” Dxel badëëman ni rayal tijbgaj reex. <sup>13</sup> Ad gojct xchej ni cwa' reex ni rayal reex,



xin naj xinguiag guin bato'gajquix graczi ni badëed xdadix lojx, abi' con milia guin wejx zijt bignijt xlia'x graczi xmiliax guial beenx ni rëntzix. <sup>14</sup> Per chi ma banijtix gran, dxel guyu gubijn niz lod za'x abi' guzuloj biaadx ni gawix. <sup>15</sup> Dxel wejx bignabix dxiin loj tijb bén zobj yagaj, abi' guxhaalaman laax chigajpix cüch ree dajn. <sup>16</sup> Guial tant rliaanx xt guyënx niajwix ni raw ree cüch guin, per achut rudëe laan. <sup>17</sup> Dxel beenx xgab naladxix: “iZien ree xin rüjn dxiin lidx da Dadan xt sobr rüjn ni raw reex, guiáad naj guie ma guiëtan bëjz! <sup>18</sup> Yan, yazaan yaya' lidx da dadan din guiën lojman: Dad, ma benan dol loj Dios në lojl. <sup>19</sup> Ad rayaltri guinieel naj xi'n; been naj cwent zi'c tijb ree xmojsil.” <sup>20</sup> Dxel bayunejzix zia lidx xdadix.

'Per zijtri ziaadix chi baguiaa xdadix laax dxel bayaman laax, zianz ruxüünman bigchaaglojman laax, abi' gudiidxaman laax gudaw tëëman laax xid. <sup>21</sup> Dxel rëbix lojman: “Dad, ma benan dol loj Dios në lojl, ad rayaltri guinieel naj xi'n.” <sup>22</sup> Per rëb xdadix loj ree xmojsaman: “Gol baquiejn gol tanë lajd zagdex, gol bascajcwixan, gol badxe' tijb guibnil yaax gol baslëe tëëx gurëch, <sup>23</sup> gol chica' go'n mazri nadaan, gol bagüjtib din yadaaw ree yaguieen ree lanij. <sup>24</sup> Din par naj ma güjt da xi'nan abi' yan ma babanx, gunijtix abi' ma badxejliz.” Dxel guzuloj cayüjn reeman lanij.

<sup>25</sup> La'tgaj xi'nman xingol guin cayüjnx dxiin dajn. Chi badxinx gajxh lidx xdadix, biguiejnx cucwejdx reeman cuya' tëë reeman. <sup>26</sup> Dxel gurejdxix tijb xmojs xdadix, gunabdiidxix xhienin cayajc lidxix. <sup>27</sup> Badxi' mojs guinan rëbix: “Guial baguiaad bijchil zeel gunabee xdadil güjt tijb go'n mazri nadaan guial nadaanx baguiaadix.” <sup>28</sup> Per dád bidxe'ch xingol guin, abi' ad guyëntix nayux. Zeel wej xdadix biguiedxaman lojx din yayux. <sup>29</sup> Dxel rëb loj xdadix: “Lüj ragbee ma gojc xchej cayünan xchiinl, zianczi ruzoban xtiidzil; per ni'czi tijb ad waneetil tijb dxibdobëz din günnë' ree da miwan lanij. <sup>30</sup> Guiáad yan baguiaad xi'nl, xin ma bignijt xlia' xmilial con ree béngunaa dxuudx, abi' gunabeel güjt go'n mazri nadaan par laax.”

<sup>31</sup> Dxel badxi' xdadix laan rëbaman: “Xi'n, zianczi za'l con naj, graczi ni ra'pan naj xieenl. <sup>32</sup> Per yan rayal yaguieen ree lanij yabaa tëë ree, din bijchil xin ma güjt par naj, ma babanx, gunijtix abi' ma badxejliz.”

## 16

*Xcwent tijb mojs rniabee ree mojs*

<sup>1</sup> Rëb tëë Jesús loj ree xbejnman:

—Guyu tijb benrijcw, nuzujman tijb mojs guinia graczi ni rajpaman. Abi' biguiedx ree ben ren lojman guial cunijt xlia' mojs guin ni naj xieenman. <sup>2</sup> Dxel gurejdxaman laax rëbaman lojx: “¿Xhie rën guiëb ni riguejnan cayüjn!? Banee cwent lon xcwent xchiinl, din achetri dxiin gunen lojl.” <sup>3</sup> Dxel guzuloj beenx xgab gunaladxix: “¿Xhienaag günan yan ma gusa'n da patronan naj sin dxiin? Ad yu'tan gojl günan dxiin dajn, ratu tēen ganaaban carda. <sup>4</sup> Ma ragbeen xhienaag günan din guiën ree bejn naj chi ad züntran dxiin.” <sup>5</sup> Dxel gurejdxix tijb gaj ree bën ral loj xpatronx, rëbix loj bën bidxin yaloj: “¿Plac ralil loj da patronan?” <sup>6</sup> Abi' rëbaman: “Ralan tibgayuu barril sejt lojman.” Dxel rëbix: “Cwa' gui'ch guie lod ca ni ralil lojman, been zatijban bacaa lojn ralil tü'pchiizan.” <sup>7</sup> Dxel gunabdiidxix loj zatijbaman rëbix: “Laadx lüj, ¿plac ralil?” Abi' rëbaman: “Tib gayuu ingujch trigo.” Zianz rëbix: “Cwa' gui'ch guie lod ca ni ralil lojman, been zatijban bacaa lojn ralil tajpgajlzan.” <sup>8</sup> Dád badxaløj patron guin guial nasin mojs mal guin por ni beenx. Din mazri nasin ree bën ad zinalt xnejz Dios con lasa' reeman guial loj ree bën zinal xnejz Dios.

<sup>9</sup> Rnin lojdi, gol beennë dxiin ni rajpidi loj guidxliuj guie par gagnëdi bejn din chu' xmiwidi, din chi yaran ma yu' bën yaca' lëjt lod gapidi guialnaban tiblayaa.

<sup>10</sup> 'Bal chu rüjn zi'c rayal con ta'n ni rudëed bejn lojman, zünman zi'c rayal con zro'n. Ziangajc bën ad rüjnt zi'c rayal con ta'n ni rudëed bejn lojman, ad zün gajctaman zi'c rayal con zro'n. <sup>11</sup> Yan, ziangajc bal id zünndi zi'c rayal con ni za'c yu' loj guidxliuj guie, ¿chu gap lëjt confianz con guialnaza'c yu' xanyabaa? <sup>12</sup> Bal id zünndi zi'c rayal con ni ad najt xieendi, ¿chu gunee lëjt ni rayalidi?

<sup>13</sup> Ni'qui tijb mojs ad zajct güünx sirv loj tio'p patron; din zadxe'chix tijbaman abi' zën x zatijbaman; o zajquix xinza'c con tijbaman abi' zün x tiblad zatijbaman. Zeel ad zajct güündi sirv loj Dios, në loj milia.

<sup>14</sup> Abi' ree bënfarisew guial mazri rën reeman milia, chi biguejnan reeman ni rëb Jesús guzuloj cuze' reeman laaman. <sup>15</sup> Dxel rëb Jesús loj reeman:

—Rüjndi benza'c niz loj ree bejn, per Dios nünbee luxdoodi; abi' majsi loj bejn lasajc da'tidi, per loj Dios achet lasajquidi.

### *Xley Moisejs con xguialrniabee Dios*

<sup>16</sup> Xley Moisejs në ni bacaa ree bën badëe xtiidx Dios loj ree bejn, naga'loj been reen dxiin xt chi bi't Waj bën baroobnijs bejn ree. Abi' diizd nadxel guzuloj rire'ch xtiidxza'c Dios xhienaag naj xguialrniabeeman, abi' zien ree bejn rün guiejn chu' loj xguialrniabeeman.

17 'Adli nawëëgt nit xanyabaa në guidxliuj, guial yaya'n tijb diidx zëed loj ley guin guial ad zajctan cumplid.

*Rulüü Jesús xcwent guial rala' lasa'*

*(Mt. 19:1-12; Mr. 10:1-12)*

18 'Bal tijb xinguaaaw rala' lacheelix abi' rtia'x ben ren, dolan cayüjnx. Ziangajc xin rtia' tijb béngunaa bala' lacheel, dolan cayüjnx.

*Xinrijcw con Lazr*

19 Basnuu Jesús, rëbaman:

—Guyu tijb xinrijcw, guzujchaawix con ganaxczi lajd zagdx, abi' guixie guixieczü rüjnx lanijro'.<sup>20</sup> Guyu tëë tijb xinprob brii lajx Lazr, rbejx ro' xport xinrijcw guin abi' guidibлагаax ca guiadx.<sup>21</sup> Rën nejzdoo Lazr guin gawix ni riajb xan xmex xinrijcw guin. Abi' xt ree bë'cw rbig rlie' reeb loj ree guiadx ni cax.

<sup>22</sup> 'Chi bidxin dxej güjt Lazr dxel bignë ree xianjl Dios laax lod naj nix da't, lod za' Abraham. Në xin rijcw guin güjt, abi' biguie'chix.<sup>23</sup> Chi ma cazagdiaj xin rijcw guin gabijl, gules lojx abi' zijtri baguiaax za' Lazr cwë' Abraham.<sup>24</sup> Dxel gurixdiajx rëbix: "Dad Abraham, baya naj, guxhaal Lazr din gugajdx lupunt xbacwënx din gui'tix yasiaalyujx lüdxan, din dád cazaagdiajn loj bajl guie."<sup>25</sup> Per badxi' Abraham xtiidx rëbaman: "Xi'n, basaaladx guial dád nix guyu luxdool chi gubanl loj guidxliuj, guiáad Lazr dád naya gubajnx. Yan, rayalix lod yabaax guiáad lüj rayalil lod sagdiajl.<sup>26</sup> Nëtëë yan bën za' ree guie ad zajct tëd reeman yagaj, ni'qui ree bën za' yagaj ad zajct tëd reeman guie, din za' bala'ro' du galay ree."

<sup>27</sup> 'Dxel rëb xinrijcw guin lojman: "Rniaaban lojl dad, been wen guxhaal Lazr lidx da dadan,<sup>28</sup> lod zobj gaay ree da bichan din chicojnx laa reex chitëë në laa reex gui't luar guie, lod yu' zro' casti."<sup>29</sup> Per rëb Abraham lojx: "Ma rajp reex gui'ch ni bacaa Moisejs con ree bën badëë xtiidx Dios loj ree bejn, laan rayal guidxga' reex."<sup>30</sup> Abi' rëb xinrijcw guin: "Walil, dad Abraham, per ad zaliladxt reex, sa'n bal yaban tijb bën ma güjt chigneenëman laa reex, zayüjn reex xgab por xtol reex."<sup>31</sup> Per rëb Abraham lojx: "Bal id ridxga' reex xtiidx Moisejs në xtiidx ree bën badëë xtiidx Dios loj ree bejn, ad zaliladxt reex majsi yaban tijb bën ma güjt."

## 17

*Bén ruzaalguiiw bejn din güünman dol*

*(Mt. 18:6-7, 21-22; Mr. 9:42)*

<sup>1</sup> Rëb Jesús loj ree xbejnman:

—Zianczi yu' ree ni ruzaalguiiw bejn din güünman dol, per ¡probza naj bén ruzaalguiiw zatijb bejn guial güünman dol! <sup>2</sup> Par laaman zagdxeli naj guixhii reeman tijb guiaj mulin yějman din guzaal reeman laaman loj nijsdoo, luar guzaalguiiwaman tijb bén qui rliadxri naj din güünman dol. <sup>3</sup> ¡Gol gojpcudad!

'Bal xhie tijb ni mal güün tijb lasa'l, guneenëman. Abi' bal bayünman xgab por ni beenman, beenman perdon. <sup>4</sup> Majsij gajdx volt loj tibdxej güünman xhienin contr lüj, abi' bal gui'taman lojl gajdx volt naman: “Been naj perdon ad züntran zian”, rayal güünl laaman perdon.

### *Guialrniabee në guialrliladx*

<sup>5</sup> Dxel rëb ree xi apóstoles Jesús lojman:

—Banee dunujn mazri guialrliladx.

<sup>6</sup> Abi' rëb Jesús loj reeman:

—Bal naj xguialrliladxidi majsij zi'czi naj xhaj moxtajs, zile' guiëbidi loj yagro' guin: “Bia'xh guie, bisob loj nijsdoo”, zuzooban xtiidxidi.

### *Ni rayal güün tijb mojs*

<sup>7</sup> 'Bal tijb lëjt rajp tijb mojs, abi' chi yaguaaad mojs guin bigla'x yuj o bigajpax begui'xh ree ya, ¿wen zëjbidi lojx ya: “Guyu, gurej din gawil”? <sup>8</sup> Ad zëjbtidi zian, guiëblidi: “Bachaa xabil, been ni gawan, guda'n. Chi lox gawan guië' tëen dxel ma zajc gawil guië' tëel.” <sup>9</sup> Abi' wed ni'qui quixtëe ad zudëetidi lojx din cayünzix ni rayal güünx. <sup>10</sup> Ziangajc lëjt chi loox güündi gra ni gunabee Dios dxel guiëbidi: “Nayajcan mojs ni ad rüjnt sirv, din baguieenzan ni rayal yaguieenan.”

### *Rayün Jesús chii ree bén rajc guialguijdx la lepra*

<sup>11</sup> Chi ma cadxin Jesús Jerusalén, gudëdaman guiedx riga' ree niz Samaria në niz Galilea. <sup>12</sup> Abi' chi cayuman tijb luguiedx dobëz, bigchaagloj chii ree bén rajc guialguijdx la lepra laaman. Per zijt guzuj reeman, <sup>13</sup> rbixdiaj reeman, rëb reeman:

—¡Jesús, Mextr, baya dunujn!

<sup>14</sup> Chi baguiaa Jesús laa reeman, rëbaman loj reeman:

—Gol chej loj ree bixhioz din guguiaa reeman lëjt.

Abi' la'tgaj zë reeman, baya xcuerp reeman guialguijdx ni rajc reeman. <sup>15</sup> Dxel tijbaman chi gogbeeman ma bayajcaman, bayejcaman, rbixdiajman rudëeman quixtëe loj Dios. <sup>16</sup> Abi' bazuxibaman loj Jesús, basajb lojman xt luyuj persi badëeman quixtëe lojman. Abi' najman bén Samaria. <sup>17</sup> Dxel rëb Jesús:

—¿Nid chii naj ree bén bayajc ya? ¿Con zagaa reeman?

<sup>18</sup> ¿Tijbzi benzit guie bayejc ya rudëeman quixtëe loj Dios?

<sup>19</sup> Dxel rëbaman loj bén guin:

—Bisu. Baguiaj, ma bayajquil guial bililadxil naj.

*Xhienaag gui't xguialrniabee Dios*

*(Mt. 24:23-28, 36-41)*

<sup>20</sup> Gunabdiidx ree bénfarisew loj Jesús goc gui't xguialrniabee Dios, abi' rëbaman:

—Xguialrniabee Dios ad najtan ni guguaa bejn. <sup>21</sup> Abi' achut guiëb: “Laan za' guie”, o “Laan za' ni” ya, din xguialrniabee Dios mal za'n galaydi.

<sup>22</sup> Dxel rëbaman loj ree xbejnman:

—Zadxin dxej guiëndi guguaadi Bén guxhaal Dios majsi tibdxejzi, per ad zuguaatidi laaman. <sup>23</sup> Abi' yu' reeman na lëjt: “Laaman za' guie”, o “Laaman za' ni” ya, ad bal chinalidi laa reeman. <sup>24</sup> Din zi'c chi rë'p nijs rulaan bacha' guidib xanyabaa, zian gac chi gui't Bén guxhaal Dios loj guidxliuj. <sup>25</sup> Per yalojxgaj sagdiajman abi' ad zënt ree bén riga' yan laaman. <sup>26</sup> Zi'c goc gulal chi guban Noé, zian gac chi gui't Bén guxhaal Dios. <sup>27</sup> Din nadxel gudaw ree bejn, gu' reeman, baxhliaa reeman badëë tëë xi'n reeman baxhliaa xt chi bidxin dxej guyu Noé lën barcwro' ni beenman, abi' guzuloj guiadoxh ni bagüjt gra reeman. <sup>28</sup> Ziangajc gojc chi guban bén brii laj Lot, gudaw ree bejn, gu' reeman, bato' reeman, guzii reeman, guxübin reeman been tëë reeman yu ree. <sup>29</sup> Per chi brii Lot luguiedx Sodoma, guzuloj biyajb gui xanyabaa në azufre, abi' güjt gra reeman. <sup>30</sup> Ziangajc gac dxej ni gui't Bén guxhaal Dios.

<sup>31</sup> 'Dxej ni gac zian, bén yë'p guijc yu ad zaguiajtaman chiglëë ni nagu'man lënü. Abi' bén za' dajn, ad zayejct lidxaman. <sup>32</sup> Gol basaaladx ni guzac lacheel bén brii laj Lot. <sup>33</sup> Bén mazri rën guialnaban rajpaman loj guidxliuj guie, zadxin dxej gunijtaman laan, per bén guiët por naj, zajpaman guialnaban tiblayaa con Dios.

<sup>34</sup> 'Naj rni lëjt, guxhinzii lod naga' tio'p bejn tijbzi loj loon, tijbaman sa zatijbaman yaya'n. <sup>35</sup> Guiáad lod cayojt tio'p ree béngunaa, tijbaman sa zatijbaman yaya'n. <sup>36</sup> Abi' lod za' tio'p ree xinguaaw dajn, tijbix sa zatijbix yaya'n.

<sup>37</sup> Chi biguiejn ree xbejnman zian, rëb reeman:

—¿Ban guin, Dad?

Badxi'man laan rëbaman:

—Laa guiguien gajc ban guinan, zi'c chi rado'p ree golbich laa rguien gajc naga' tijb begüt.

<sup>1</sup> Be Jesús tijb cwent loj ree xbejnman, persi balüüman laa reeman guial zianczi rayal cwedx guiniab reeman Dios ad zadxagtczi reeman. <sup>2</sup> Abi' rëbaman loj reeman:

—Guyu tijb guiedx lod guyu tijb juejs, ad rdxebtaman Dios ad ridxga' tëëtaman bejn ree. <sup>3</sup> Luguiedx ziigajc zobj tijb béngunaa bizëjb, rniabaman loj juejs guin din güünman guialguxtis gagnëman laaman loj bén rdxe'ch laaman. <sup>4</sup> Xchej ad bidxga't juejs guin béngunaa bizëjb guin, per zianz laagajcaman been xgab naladxaman: “Majsi ad rdxebtan Dios ad ridxga' tëëtan bejn ree, <sup>5</sup> per béngunaa guie ad rucwëëzt ruslenman naj. Zagdxeli naj günan laaman yudar chitëë ri'traman naga gad da pacensan chigra.”

<sup>6</sup> Dxel rëb Jesús loj reeman:

—Zian gunee juejs mal guin. <sup>7</sup> Diidxgui Dios, ¿nid zagnëman bén guleman ya bén rbejdx rniab ree laaman dxej guiaal? ¿Wen zaglaa gagnëman laa reeman ya? <sup>8</sup> Naj rni lëjt guial ad zaglaat gagnëman laa reeman. Per chi gui't Bén guxhaal Dios, ¿chuj ni zadxaaglojraman bén rliladx Dios loj guidxliuj ya?

### *Xcwent bénfarisew con bén ruquijx impuest*

<sup>9</sup> Be Jesús zatijb cwent par ree bén naladx tijbzi laa reeman naj benza'c guial loj ree ben ren, rëbaman:

<sup>10</sup> —Tio'p ree xinguaaaw wej lën yadooro' Jerusalén persi gurejdx gunab reex Dios, tijbix naj xinfarisew, zatijbix naj xin ruquijx impuest. <sup>11</sup> Xin farisew guin, za'lix cabejdx canabix Dios, rëbix: “Quixtëë runen lojl, Dad, guial ad najtan zi'c ree ben ren, naj reeman béngubaan, benmal, bén za'në béngunaa ren, ni'qui zi'c naj bén ruquijx impuest guin. <sup>12</sup> Rba'nán tio'p volt lën xuman, abi' gra ni rünan gan rünanan chii lala' persi runen tijban lojl.” <sup>13</sup> Per xin ruquijx impuest guin, zijt za'x abi' ni'quid rayaxtix guilies lojx, rga'p luxdoox rëbgajx: “¡Dios, baya naj najn tijb xindol!” <sup>14</sup> Naj rni lëjt guial xin ruquijx impuest guin ma been Dios laax perdon chi bayejc lidxix, per xin farisew guin ad beentaman laax perdon. Din bén rlies xvalor gajc achet lasajcaman loj Dios, guiáad bén rüjn naya laaman mazri lasajc loj Dios.

### *Rüjnle' Jesús xindoo ree*

*(Mt. 19:13-15; Mr. 10:13-16)*

<sup>15</sup> Binë ree bejn xindoo ree lod za' Jesús din gudxiib yaaman guijc reex, per chi baguiaa ree xbejnman guzuloj cadilë reeman bén zinë ree laa reex. <sup>16</sup> Per gurejdx Jesús laa reeman, rëbaman loj reeman:

—Gol badëë mod gui't reex lon, ad bal rudxoondi, din lod rniabee Dios naj par ree bén naj zi'c laa reex. <sup>17</sup> Din naj rni

lèjt, bèn ad rliadxt xguialrniabee Dios zi'c tijb xindoo, ad zile't chu'man loj xguialrniabee Dios.

*Xcwent tijb xin rijcw*

*(Mt. 19:16-30; Mr. 10:17-31)*

<sup>18</sup> Tijb xin rniabee, gunabdiidx loj Jesús rëbix:

—Mextrza'c, ¿xhie rayal günan din ga'pan guialnaban tiblayaa con Dios?

<sup>19</sup> Badxi' Jesús laan, rëbaman:

—¿Chexc zeel nal lon benza'c? Achut naj benza'c, tijbzi Dios. <sup>20</sup> Lüy rajc ree mandamient: “Ad sunël béngunaa ren, ad gugüjtil bejn, ad cwanl, ad cwëël xtiidx bejn, gojp respejt xdad xniaal.”

<sup>21</sup> Dxel rëbix loj Jesús:

—Gra ree ni guin cayünan diizd xindoon.

<sup>22</sup> Chi biguiejn Jesús zian, rëbaman:

—Yu' zatijb ni ryaadx güünl: bigto' gra ni rajpil dxel gudëël milia guin loj ree bënprob. Zian gapil guialnaza'c xanyabaa, dxel gui'til guidnalil naj.

<sup>23</sup> Chi biguiejn xin guin zian, dád guyunayax guial dád xinrijcwan. <sup>24</sup> Chi baguüaa Jesús guial dád yu'nayax, rëbaman:

—¡Dád nawëëg naj chu' benrijcw loj xguialrniabee Dios!

<sup>25</sup> Adli nawëëgt téd tijb camell xan gagux, guial chu' tijb bën rijcw loj xguialrniabee Dios.

<sup>26</sup> Abi' ree bën biguiejn ni rëb Jesús, rëb reeman:

—¿Chu za zajc laa loj xcasti Dios?

<sup>27</sup> Dxel rëbaman loj reeman:

—Yu' ni ad zajct güün bénguidxliuj, per Dios graczan zajc güünman.

<sup>28</sup> Dxel rëb Béd lojman:

—Dad, ma basa'nan graczi ni raya'pan persi zudnaalan lüj.

<sup>29</sup> Zianz rëb Jesús:

—Diidxliczi rnin lojdi, chutëëz bën rusa'n lidx, lacheel, bijch, o xdad, o xniaa, o xi'n guial rüjnman zi'c rniabee Dios,

<sup>30</sup> mazri zien ni tia'man loj guidxliuj guie. Abi' zajpaman guialnaban tiblayaa con Dios.

*Rugojn Jesús zatijb guial guiëtaman*

*(Mt. 20:17-19; Mr. 10:32-34)*

<sup>31</sup> Gurejdx Jesús guidxiptio'p ree xbejnman tiblad, abi' rëbaman loj reeman:

—Yan, ziyo' ree Jerusalén lod gac zi'c bacaa ree bën badëë xtiidx Dios loj ree bejn xcwent Bén guxhaal Dios. <sup>32</sup> Yayü reeman laaman loj ree benzit, guze' reeman laaman, guiniee reeman laaman ni rëntzi reeman, abi' gucojp xhiejn reeman lojman. <sup>33</sup> Quin reeman laaman dxel gugüjt reeman laaman, per ni yayon dxej yabanman.

<sup>34</sup> Per laa reeman ad bignia'tczi reeman ni rëbaman, ad ragbee tëët reeman chexc zeel rëbaman zian din ad bile't nignia' reeman xhie rën guiëb ni guneeman.

*Rayajc guiaaloj tijb bénlutia'p*  
(Mt. 20:29-34; Mr. 10:46-52)

<sup>35</sup> Chi ma cadxin Jesús gajxh guiedx Jericó, tijb bénlutia'p, zojbaman cwë' nejz rniabaman carda. <sup>36</sup> Chi gogbeeman cadëd zien ree bejn, gunabdiidxaman xhie cayajc. <sup>37</sup> Abi' rëb reeman lojman guial Jesús bén Nazaret cadëd niz yagaj. <sup>38</sup> Dxel gurixdiajman rëbaman:

—¡Jesús, xdiaa Davi, baya naj!

<sup>39</sup> Bén ned ree rdilë reeman laaman din gucwëöz ro'man, per mazri rbixdiajman, rëbaman:

—¡Xdiaa Davi, baya naj!

<sup>40</sup> Dxel guzudxe Jesús abi' gunabeeman bica' reeman laaman. Chi bidxinman gajxh lojman, gunabdiidxaman lojman, rëbaman:

<sup>41</sup> —¿Xhie rën! günan por lüj?

Badxi'man laan rëbaman:

—Dad, rënan yani lon.

<sup>42</sup> Dxel rëb Jesús lojman:

—¡Ma zile' guguaal! Ma bayajquil guial bililadxil naj.

<sup>43</sup> Hor guin gajc bani loj bén guin, abi' binalaman Jesús rudëëman quixtëë loj Dios. Në gra ree bén baguiaa ni goc rudëë quixtëë loj Dios.

## 19

### *Wej Jesús lidx Zaqueo*

<sup>1</sup> Guyu Jesús luguiedx Jericó abi' guzuloj cadëdaman luguiedx guin. <sup>2</sup> Yagaj zojb tijb benrijcw laman Zaqueo. Laaman rniabee ree bén ruquiix impuest. <sup>3</sup> Rën Zaqueo guin güünbeeman Jesús, per ad rile't guguaaman laaman guial dád zien ree bejn abi' laaman najman bendop. <sup>4</sup> Zeel ruxüünman gunedaman, abi' din chile' guguaaman Jesús, wë'paman loj tijb yagro' zojb gajxh lod tëd Jesús. <sup>5</sup> Chi gudëd Jesús yagaj, gules lojman abi' rëbaman lojman:

—Zaqueo, cari baguiajt, din yandxej naj yaya'nan lidxil.

<sup>6</sup> Dxel cari da't baguiajt Zaqueo, abi' dád rabaaman zignëman Jesús. <sup>7</sup> Chi baguiaa ree bejn zian, gra reeman guzuloj caneeguidx Jesús rëb reeman zigya'nman lidx tijb béndol. <sup>8</sup> Dxel guzuli Zaqueo, abi' rëbaman loj Jesús:

—Dad, gagui's garol ni ra'pan loj ree bénprob. Abi' bal yu' bén baquijxan mazri guial loj ni naj quixaman, yayünan tajp volt mazri guial loj ni gulaanan.

<sup>9</sup> Dxel rëb Jesús lojman:



—Yandxej ma been Dios perdon gra ree bén zojb lidx Zaqueo guial rliadxaman Dios zi'cgajc Abraham. <sup>10</sup> Din Bén guxhaal Dios zëedaman zidgadiilaman bén ad zët ree loj xnejc Dios din laa reeman loj xcasti Dios.

### *Xcwent milia*

<sup>11</sup> Bén cucaagdiajg ree ni canee Jesús, beman tijb cwent loj reeman guial ma zë reeman gajxh Jerusalén abi' laa reeman naladx reeman guial hor guin guidxin xguialrniabee Dios. <sup>12</sup> Dxel rëbaman loj reeman:

—Guyu tijb bejn, zëedaman loj tijb famil zojbloj. Zëman zijt lod tia'man guialrniabee din gacaman rey dxel yayejcaman nabee ladxaman. <sup>13</sup> Chi gadaman grii gurejdxaman chii xmojsaman abi' loj tijbgaj reex badëëman zro' milia, zianz rëbaman loj reex: “Gol beennë milia guin dxiin xt chi guidxin dxey yagualan.” <sup>14</sup> Per ree bén ladxaman guial rdxe'ch reeman laaman, guxhaal reeman tibcwaa ree bén zinal laaman persi biguiedx reeman guial ad rënt reeman gac bén guin xrey reeman. <sup>15</sup> Per laaman bazuj reeman gacaman rey, abi' bayejc ladxaman. Chi badxinman dxel gunabeeman bignee reeman mojs badëëman milia guin din gagbeeman plac ma been tijbgaj reex gan. <sup>16</sup> Mojs bidxin yaloj rëbix: “Dad, milia ni baneel ma beenan gan chii volt mazri.” <sup>17</sup> Dxel rëb rey guin lojx: “Zagdxen mojsza'c, ma beenl zi'c rayal. Abi' guial beenl zi'c rayal con ta'nzi ni banen, yan guzun lüj nabeel chii guiedx.” <sup>18</sup> Chi bidxin mojs barojp guin, rëbix: “Dad, milia ni baneel lon ma beenan gan gaay volt mazri.” <sup>19</sup> Ziangajc rëb rey guin loj mojs guin: “Lüj nabee gaay guiedx.” <sup>20</sup> Dxel bidxin zatijb mojs guin abi' rëbix: “Dad, laa xmilial guie, badxe'chaawanan lën tijb baydoo, <sup>21</sup> din bidxeban lüj guial ad rayatil bejn. Raca'l ni ad najt xieenl abi' rato'pil guialnaza'c lod ad guxübintil.” <sup>22</sup> Dxel rëb rey guin: “Mojs guiidx por xtiidxgajquil rayalil casti. Bal ragbeel guial ad rayatan bejn, abi' raca'n ni ad najt da xieenan ratop tëen guialnaza'c lod ad guxübintan. <sup>23</sup> ¿Chexc ad badëëtil da milian nigui'n bejn din chi nagualan naca'nan con guidib xi'nan?” <sup>24</sup> Dxel rëb rey guin loj ree bén za' yagaj: “Gol baca' milia zii lojx, gol badëëdan loj xin ca' mazran.” <sup>25</sup> Abi' rëb reeman loj rey guin: “Dad, per ma ca'x zro'n.” <sup>26</sup> Badxi'man laan rëbaman: “Bén rajp zro', zaca'man mazri, per bén rajp ta'nzi, xt ta'n ni rajpaman chiquied lojman. <sup>27</sup> Abi' ree bén rdxe'ch naj bén ad guyënt ree niajcan rey, gol tanë reeman guie, gol bagüjt reeman lon.”

### *Ru Jesús Jerusalén*

(Mt. 21:1-11; Mr. 11:1-11; Jn.12 :12-19)

28 Chi gulox rëb Jesús zian, dxel basnuu zëman Jerusalén.

29 Chi bidxinman gajxh guiedx Betfagé con Betania, në gajxh guia' la Olivos, dxel guxhaal tio'p ree xbejnman, <sup>30</sup> rëbaman loj reeman:

—Gol chej guiedxdo riga' guin, chi guidxindi guidxaaglojdi tijb burquie'n, caduub, achut wabib laab. Gol guxhiequib gol tanëb. <sup>31</sup> Abi' bal chu guiniabdiidx lojdi chexc zeel rxhiequidi laab, gol güjdx Dad Jesús cayaadx laab.

<sup>32</sup> Wej ree bën guxhaalaman bidxaagloj gajc reeman zi'cgajczi rëb Jesús loj reeman. <sup>33</sup> Abi' chi caxhiec reeman bur guin, gunabdiidx ree bën naj xbur laab, rëb reeman:

—¿Chexc zeel caxhiequidi bur guin?

<sup>34</sup> Badxi' reeman laan, rëb reeman:

—Din Dad Jesús cayaadx laab.

<sup>35</sup> Dxel binë reeman bur guin lod za' Jesús, zianz badxiib xab reeman xijchib abi' been reeman laaman yudar persi gudxibaman laab. <sup>36</sup> Abi' ree bejn rguijxh xab reeman lunejz lod zë Jesús. <sup>37</sup> Chi ma zë reeman gajxh laguiajt ni naj guia' la Olivos, gra ree bën zinal Jesús guzuloj rbixdiaj reeman gual dád rabaa reeman abi' ruza't reeman Dios zagdxé por gra ree milagr ni ma baguiaa reeman. <sup>38</sup> Rëb reeman:

—¡Nüjnle' Dios bën zëed por laaman! ¡Yu' gualrabaa xanyabaa! ¡Benza'c bendxoon naj Dios bën yu' xanyabaa!

<sup>39</sup> Dxel ree bënfarisew no'ch loj ree bën zinal laaman, rëb reeman lojman:

—Mextr, gudilë ree bën guin chitëë rniee reeman zian.

<sup>40</sup> Per badxi'man laan rëbaman:

—Naj rni lëjt, bal yacwëez ro' reeman, guiaj ree cwixdiaj zian.

<sup>41</sup> Chi bidxinman gajxh Jerusalén, dxel baguiaaman guiedx guin, zianz biinman por laan. <sup>42</sup> Rëbaman:

—¡Bën Jerusalén, xi nix majsi yandxejzi yayagbeedi chu yabe'cdxe luxdoodi! Per yan naguie'ch najn par lëjt, ad zile't chignia'di laan. <sup>43</sup> Din guidxin dxej ni güün ree bën rdxe'ch lëjt tijb ze' gadëd ladxidi, abi' gra lad gusiaaw reeman lëjt, <sup>44</sup> gugüjt reeman lëjt. Dxel gunijt reeman ladxidi, ni'qui tijb guiaj ad zaya'nt guijc stijb guiaj, din ad bidxga'tidi hor ni bidganaj Dios lëjt.

*Rabëë Jesús bën ruto' ree ro' yadooro' Jerusalén  
(Mt. 21:12-17; Mr. 11:15-19; Jn.2 :13-22)*

<sup>45</sup> Chi bidxin Jesús ro' yadooro' Jerusalén, guzuloj cay-bëëman bën cuto' ree në ree bën cazii, <sup>46</sup> rëbaman loj reeman:

—Loj xtiidx Dios rëb: “Lidxan naj yu lod rbejdx rniab bejn Dios.” Per lëjt nüjndan zi'c lidx ree xingubaan.

<sup>47</sup> Guixie guixie rulüü Jesús bejn ree lën yadooro' Jerusalén, per ree bixhioz rniabee ree bixhioz con ree mextr rajc ley, në ree guxtis luguiedx guin raguuil reeman mod din gugüjt reeman laaman. <sup>48</sup> Per ad radxejlt xhienaag güün reeman, din graczi ree bejn rucaagdiajg chaaw ni rulüüman laa reeman.

## 20

### *Xgualrniabee Jesús*

(Mt. 21:23-27; Mr. 11:27-33)

<sup>1</sup> Lën ree dxej ni za' Jesús lën yadooro' Jerusalén, culüüman bejn ree xtiidx Dios, bidxin ree bixhioz rniabee ree bixhioz, con ree mextr rajc ley, në ree guxtis Israel, <sup>2</sup> abi' rëb reeman lojman:

—Guna, ¿chu na güünl ni guin ree? ¿Chu banee gualrniabee lojl?

<sup>3</sup> Badxi' Jesús laan, rëbaman:

—Ziangajc naj yu' tijb ni ganabdiidxan lojdi. Gol badxi'n: <sup>4</sup> ¿chu guxhaal Waj bidgaroobnijsaman bejn ree, Dios ya o bénguidxliuj?

<sup>5</sup> Dxel guzuloj rëb loj lasa' reeman:

—Bal yaguie'ch ree Dios guxhaal laaman, zanaman. “¿Chexquiiza zeel ad bililadxtidi laaman?” <sup>6</sup> Abi'za bal yaguie'ch ree bénguidxliuj guxhaal laaman, zugüjt ree bejn dunuj ree con guiaj din gra reeman rliladx gual Waj gojc bën badëë xtiidx Dios loj ree bejn.

<sup>7</sup> Abi' badxi' reeman laan rëb reeman gual ad ragbeet reeman chu guxhaal Waj bidgaroobnijsaman bejn ree. <sup>8</sup> Dxel rëb Jesús loj reeman:

—Ni'qui naj ad zanitan lojdi chu banee gualrniabee günan ni guin ree.

### *Xcwent ree mojs guiidx*

(Mt. 21:33-44; Mr. 12:1-11)

<sup>9</sup> Dxel guzuloj cayü Jesús tijb cwent loj ree bejn, rëbaman:

—Guyu tijb bejn guxübinman uv ree loj xguiniaaman, dxel badëëman laan garol loj ree bën güün dxiin lojn, zëtaman zijt.

<sup>10</sup> Chi bidxin dxej yala' reeman uv guin, guxhaalaman tijb xmojsaman chigxiix ni rayalaman, per ree bën rüjn dxiin loj guiniaa guin gudijn reeman mojs guin abi' badxi' reeman laax zezi. <sup>11</sup> Dxel guxhaalaman mojs ren, per nëgajc mojs guin gunee reeman ni rëntzi reeman, gudijn reeman laax abi' badxi' reeman laax zezi. <sup>12</sup> Zianz guxhaalaman zatijbix, per gudiilguiidx reeman laax abi' babëë reeman laax loj guiniaa guin.

<sup>13</sup> Dxel rëb bén naj xguidxliuj laan: “¿Xhienaag gūnan yan? Gaxhal da xi'nan xin rën da'tan, wed zajp reeman laax re-spejt.” <sup>14</sup> Per chi baguiaa ree bén guin laax, rëb loj lasa' reeman: “Xin guinan naj xin yaya'nnë guidxliuj guin. Yagüjt reex din gacan du xieen ree.” <sup>15</sup> Dxel babëë reeman laax loj guidxliuj guin, bagüjt reeman laax.

Zianz gunabdiidx Jesús loj ree bén caneenëman, rëbaman:

—Yan, ¿xhie naladxidi güünnë bén naj xguidxliuj laan bén guin ree? <sup>16</sup> Naj rni lojdi guial zi'taman din gugüjtaman bén guin ree dxel gudëëman guidxliuj guin loj ree ben ren.

Chi biguiejn reeman zian dxel rëb reeman:

—¡Gagnë Dios ad zajct zian!

<sup>17</sup> Per Jesús baguiaaman loj reeman, abi' rëbaman:

—Bal id zajc zian ¿xhieza rën guiëb ni ca loj xtiidx Dios? Lod rëb:

Guiaj ni gulëëgo'n ree bén rüjn yu,  
laan naj ni mazri been sirv gojcnë yu guin.

<sup>18</sup> Chutëëz bén yab guiyc guiaj guin, gacaman zi'c tijb ni riroox, guiáad bal yab guiaj guin guiycaman, gacaman zi'c tijb ni ryüüdëj.

### *Xcwent impuest*

(Mt. 21:45-46; 22:15-22; Mr. 12:12-17)

<sup>19</sup> Bixhioz rniabee ree bixhioz con ree mextr rajc ley, hor guin gajc guyën reeman niniaaz reeman Jesús guial gogbee reeman cuza'taman laa reeman, per bidxeb reeman bejn ree. <sup>20</sup> Abi' guxhaal reeman bén zigla'ch ree laaman din güünzi reeman guial gulüü naj reeman benza'c, din yaguuil reeman mod guinee Jesús diidx ni gudxiib reeman guiyc, din chile' yayü reeman laaman loj gobernador Rom. <sup>21</sup> Dxel gunabdiidx reeman lojman, rëb reeman:

—Mextr, dunujn rayagbee guial rnieel rulüü tëël zi'c rayal, din par lüj tiblojzi naj bejn, abi' walil rulüül guial xhienaag rën Dios guiban bejn. <sup>22</sup> ¿Zagdxen ya radijxan impuest loj rey César, o ad zagdxetan?

<sup>23</sup> Per gogbee gajc Jesús xgab mal ni cayüjn reeman abi' rëbaman loj reeman:

<sup>24</sup> —Gol balüü tijb cintabl lon. ¿Chu loj ca lojn chu tëë laj ca lojn?

Badxi' reeman laan, rëb reeman:

—Loj rey César ca lojn në lajman.

<sup>25</sup> Dxel rëbaman loj reeman:

—Gol badëëcliza loj rey César ni naj xieen César, guiáad loj Dios gol badëë ni naj xieen Dios.

<sup>26</sup> Abi' gra ni guneeman niz loj ree bejn, achetri badxejl nudxiib reeman guijc din niniaaz reeman laaman. Badxali loj reeman ni guneeman abi' achetri rëb reeman.

*Xcwent guial yaban ree bengüt*  
(Mt. 22:23-33; Mr. 12:18-27)

<sup>27</sup> Tio'p choon ree bénsaducew bignaj Jesús, bénsadusew guin ree ad rliladxt reeman guial yaban ree bengüt, zeel rëb reeman loj Jesús:

<sup>28</sup> —Mextr, loj xley Moisejs rëb guial bal guiët tijb xinguaaw abi' achut xi'nx guyu con lacheelix, bijch xingüt guin guxhlianë béngunaa bizëjb guin din chu' xi'n reex zi'c gulüü xi'n xin güt guinan. <sup>29</sup> Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix. <sup>30</sup> Dxel bijch barojpix baxhlianë béngunaa guin, per güjtgajquix ad guyu gajct xi'n reex. <sup>31</sup> Zianz baxhlianë xin bayon guin béngunaa bizëjb guin, zianz baxhlianëman guigajdx reex abi' gra reex güjt achut xi'n reex guyu con laaman. <sup>32</sup> Ni bigratë në béngunaa guin güjt. <sup>33</sup> Yan, chi yaban ree bengüt, ¿chu loj guigajdx reex gac xbéngunaa laaman guial gra reex baxhlianë laaman?

<sup>34</sup> Dxel rëb Jesús loj reeman:

—Loj guidxliuj guie ruxhliaa ree bejn abi' rudëed xi'n reeman ruxhliaa. <sup>35</sup> Per ree bën yaban zatijb, bën rayal ree gap guialnaban tiblyaa con Dios, ad zuxhliaatri reeman ad zudëe tēetri xi'n reeman guxhliaa, <sup>36</sup> din ad zējtrri reeman, gac reeman zi'c ree xianjl Dios. Gac tēe reeman xi'n Dios guial ma baban reeman. <sup>37</sup> Abi' xcwent ni yaban ree bengüt, xt Moisejs rëb zian tiblajt loj xtiidx Dios lod rëbaman guial baguaaman yag ni caye'c. Yagaj rëb Dios lojman guial Dios naj xDios Abraham, xDios Isaac, në xDios Jacob. <sup>38</sup> Din Dios ad najtaman xDios ree bengüt, najman xDios ree bën naban, din par laaman gra ree bejn naban.

<sup>39</sup> Dxel yu' ree mextr rajc ley, rëb lojman:

—Mextr, zagdxequi guneel.

<sup>40</sup> Abi' achetri bayax reeman niniabdiidx reeman lojman.

*Chu loj xdiaa zëed Cristo*  
(Mt. 22:41-46; Mr. 12:35-37)

<sup>41</sup> Rëb Jesús loj ree bejn:

—¿Chexc zeel rëb ree bejn guial zëed Cristo loj xdiaa rey Davi? <sup>42</sup> Awa Davi guin gajc gunee loj libr Salmos, rëbaman: Dios rëb loj dux Dad ree:

“Gurej da ladbeen,

<sup>43</sup> xt gabecan xin rdxe'ch ree lüj guia'l.”

<sup>44</sup> Yan, bal xi'n Davi naj Cristo. ¿Chexquiza zeel rëb Davi guin lojman Dad?

*Ni rüjn ree mextr rajc ley*

*(Mt. 23:1-36; Mr. 12:38-40; Lc. 11:37-54)*

<sup>45</sup> La'tgaj cucaagdiajg gra ree bejn ni rëb Jesús, rëb loj ree xbejnman:

<sup>46</sup> —Gol gojp cudad con ree mextr rajc ley. Din ruladx reeman sa reeman gacw reeman lajd zagdxe ruladx tëë reeman gugajpdioz ree bejn laa reeman con respejt niz lunejz, abi' lën ree yadoo ruladx reeman cwe reeman lod rbej ree bén zojbloj, ziangajc rüjn reeman lod ritaw reeman. <sup>47</sup> Raca' tëë reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yalay reeman.

## 21

*Gon badëed tijb béngunaa bizëjb*

*(Mr. 12:41-44)*

<sup>1</sup> Chi culüü Jesús bejn ree lën yadooro' Jerusalén, dxel gules lojman baguiaaman cagu' ree benrijcw gon lën alcancia.

<sup>2</sup> Baguiaa tëëman tijb béngunaa bizëjb prob, cagu'man tio'p cintabldoo lën alcancia guin. <sup>3</sup> Dxel rëb Jesús loj ree xbejnman:

—Diidxli rnin lojdi guial bén bizëjb prob guin mazri lasajc gon badxe'man guial loj gon badxe' gra ree bén guin. <sup>4</sup> Din graczi reeman rudxe' ni rüjn laa reeman sobr, per laaman majsi najman bénprob, badxe'man graczi ni rajpaman par guibannëman.

*Rëb Jesús guial yaze'n yadooro' Jerusalén*

*(Mt. 24:1-2; Mr. 13:1-2)*

<sup>5</sup> Tio'p choon ree xbejn Jesús cayü reeman diidx xcwent ree guiaj zagdxe najcchaawnë yadooro' Jerusalén, në ree ni lasajc ni rudëed ree bejn par suchaaw yadoo guin. Dxel rëb Jesús loj reeman:

<sup>6</sup> —Gra ni cuguaadi yan, zadxin dxej ni'qui tijb guiaj ad zaya'nt guijc stijban, gran yaze'n.

*Ni gac chi gad guidxliuj nit*

*(Mt. 24:3-28; Mr. 13:3-23)*

<sup>7</sup> Dxel gunabdiidx reeman lojman rëb reeman:

—Mextr, ¿goc gac zian? ¿Xhie ree sen gac chi ma zidyob gac zian?

<sup>8</sup> Zianz rëb Jesús loj reeman:

—Gol gojp cudad achu gusquiee lëjt. Din zien ree bén gui't guiëb reeman guial por naj zëed reeman guiëb tëë reeman: “Naj naj Cristo”; o “Ma zidyob dxej gui'taman.” Per ad

chililadxidi laa reeman. <sup>9</sup> Abi' chi guiguiejndi cayajc wadijl o chas ree bejn contr xguxtis reeman, ad guidxebidi din yaloj gac zian. Per ad por laatan ma bidxin dxej nit guidxliuj.

<sup>10</sup> Rëb tëë Jesús loj reeman:

—Til nacion con stijb nacion, til tëë bën rajp gualrniabee con stijb bën rajp gualrniabee, <sup>11</sup> gui't tëë xudoxh, në gubijn, në gualguijdxdoxh niz ni niz guie abi' xanyabaa guiguien ree ni nadxeb.

<sup>12</sup> 'Per chi gad gra ree ni guin gac, guiniaaz ree bejn lëjt din gusagzi reeman lëjt, chinë reeman lëjt lën ree yadoo din gudëed reeman lëjt casti, cu' reeman lëjt ladxguiib chinë tëë reeman lëjt loj ree rey në loj ree gobernador gual najdi da bejnan. <sup>13</sup> Zian gac din chile' güdi da diidxan loj reeman.

<sup>14</sup> Ad aal chu'di xgab xhie guiëbidi loj reeman. <sup>15</sup> Din naj gune diidx ni guinieedi gune tëën quiarguejn. Abi' ni'qui tijb bën rdxe'ch lëjt ad züjnt gan loj xtiidxidi ad zanee tëët reeman contr lëjt. <sup>16</sup> Per lëjt xt xdadidi o xniaadi, o bijchidi o xfamilidi o xmiwidi yayü reeman lëjt, abi' yu'di gugüjt reeman. <sup>17</sup> Gra bénguidxliuj guidxe'ch lëjt gual najdi da bejnan. <sup>18</sup> Per ni'qui tijb guidxguijquidi ad zanijtt por zian. <sup>19</sup> Abi' bal sudxi'chidi loj xnejz Dios, zajpidi gualnaban tiblayaa con Dios.

<sup>20</sup> 'Chi guguaaadi nayaw ree suldad Jerusalén, ma qui nit guiedx guin. <sup>21</sup> Dxejzii ree, bën za' ree niz Judea, gol bigxüün niz dajn ree, abi' ree bën za' guiedx Jerusalén gol brii luguiedx guin, guiáad ree bën za' dajn ad bal yayudi luguiedx guin.

<sup>22</sup> Din dxej guin ree gudëed Dios bejn ree casti din gac cumplid zi'c ca loj xtiidxaman. <sup>23</sup> ¡Probza ree béngunaa nüü xi'n o béngunaa ca' ree xindobëz lën ree dxejzii! Din dád sagdiaj ree bejn abi' dád casti narooob yayal ree bënluquiedx guin. <sup>24</sup> Yu' ree bën guiët loj wadijl yu' tëë reeman guiniaaz reeman chinë naguiejn reeman laa reeman nacion rent nacion ren ree. Abi' ree benzit zanabee reeman Jerusalén xt yayaaloj dxej ni tiëb Dios nabee reeman yagaj.

*Gui't Bén guxhaal Dios zatijb*

*(Mt. 24:29-35, 42-44; Mr. 13:24-37)*

<sup>25</sup> 'Dxel gac sen loj gubijdx, con loj bëëw, con loj ree bajl xanyabaa. Abi' loj guidxliuj gagdxa ree bejn guidxeb tëë reeman gual gac naquie' loj nijsdoo gac tëë naquie' por xtüjp nijs. <sup>26</sup> Abi' ree bejn xt yadaj reeman gual guidxeb reeman chi güün reeman xgab ni gac loj guidxliuj, guiáad ree ni rguien xanyabaa guiniib reen. <sup>27</sup> Abi' guguaa reeman Bén guxhaal Dios, rdiinman bacha' zëedaman loj zaj con xgualrniabee-man. <sup>28</sup> Chi suloj gac ree ni guin, gol bagu' luxdoodi zagdxe gol gules tëë lojdi din ma zidyob dxej ni laadi loj casti.

<sup>29</sup> Rëb tëë Jesús loj reeman:

—Gol baguiaa yag higo o xhietëez zatiyb yagan. <sup>30</sup> Chi ma caydxib ree xbalagan, lëjt ragbee guial ma zëed tiamp nalaa. <sup>31</sup> Ziangajc chi guguaadi ma cayajc ree ni guin, zagbeedi guial ma zëed xgualrniabee Dios gajxh.

<sup>32</sup> 'Diidxli rnin lojdi guial gra ree ni guin gac chi gad gra ree bén naban yan guiët. <sup>33</sup> Guidxliuj në xanyabaa zaniyt reen, per da diidxan ad zadëdt gacan cumplid.

<sup>34</sup> 'Gol gojp cudad ad güün graloy ni riga' loj guidxliuj guie lëjt gan, zi'c guial rzüdx, në guial ru xgab por ni ryaadxidi par guibandi din chi gualan zatiyb, ad gac dxej guin par lëjt <sup>35</sup> zi'c tityb tramp. Din zian gac dxej guin par gra ree bénguidxliuj. <sup>36</sup> Gol guzujsin, guixie guixie gol gurejdx gunab Dios din gac laadi loj gra ree ni gac loj guidxliuj din chile' tëe sudi loj Bén guxhaal Dios.

<sup>37</sup> Radxe rulüü Jesús bejn ree lën yadooro' Jerusalén guiáad guxhin raya'nman ruguia' la Olivos. <sup>38</sup> Abi' rsildoo rej gra ree bejn lën yadoo guin ricaagdiajg reeman ni rnieeman.

## 22

*Bayan reeman diidx xhienaag guiniaaz reeman Jesús  
(Mt. 26:1-5, 14-16; Mr. 14:1-2, 10-11; Jn.11 :45-53)*

<sup>1</sup> Chi ma zidyob lanij pascw, chi raw reeman guiadxtil ni ad yu't levadur. <sup>2</sup> Bixhioz rniabee ree bixhioz con ree mextr rajc ley, raguuil reeman mod xhienaag gugüjt reeman Jesús guial rdxeb reeman bejn ree.

<sup>3</sup> Dxel guyu xindxab luxdoo tijb ree xi apóstoles Jesús, bén la Judas Iscariote. <sup>4</sup> Judas guin bigneenë bixhioz rniabee ree bixhioz con ree bén rniabee bén rajp ree yadooro' Jerusalén, abi' benëman laa reeman diidx xhienaag yayüman Jesús loj reeman. <sup>5</sup> Dád babaa reeman abi' rëb reeman guial gudëed reeman milia lojman. <sup>6</sup> Zianz cwëjbaman, dxel guzuloy raguuil-aman mod xhienaag yayüman Jesús, guial ad zagbeet ree bejn.

*Gudawnë ree xbejn Jesús xche  
(Mt. 26:17-29; Mr. 14:12-25; Jn.13 :21-30; 1Co.11 :23-26)*

<sup>7</sup> Chi bidxin lanij pascw, titybgaj yu raw ree bejn guiadxtil ni ad yu't levadur rugüjt tëe reeman tijb xiil, <sup>8</sup> dxel guxhaal Jesús Bëd con Waj, rëbaman loj reeman:

—Gol biguieen ni yadaaw ree guxhin pascw.

<sup>9</sup> Abi' gunabdiidx reeman lojman rëb reeman:

—¿Ban guin rënl yuguieenan laan?

<sup>10</sup> Zianz rëb Jesús loj reeman:

—Chi chu'di luguiedx guin, guguaadi tijb xinguaaaw ca'x tijb re yu' nijs. Gol chinalix xt lod yayux, <sup>11</sup> gol güjdx loj bén naj lidxan: “Na mextr: ¿Con lënü gawnë ree xbejnman guxhin



pascw?" <sup>12</sup> Dxel gulüüman lëjt tijb lënü ni rarojp pijs, ma najcchaaw lënü guin. Yagaj gol been ni yadaaw ree xche.

<sup>13</sup> Zianz wej reeman abi' bidxaagloj reeman gra zi'cgajczi rëb Jesús loj reeman. Dxel been reeman gualraw guin ni gaw reeman guxhin pascw.

<sup>14</sup> Chi bidxin hor, Jesús con ree bën naj apóstoles gurej reeman xan mex. <sup>15</sup> Dxel rëbaman loj reeman:

—iDiisd gocli rënan gawnë'n lëjt pascw guie, chi gad dxej guidxin gazaagdiajn abi' guiëtan! <sup>16</sup> Din naj rni lëjt gual ad yu'tri dxej gawnë'n lëjt, xt chi ma canabee Dios guidiblagaa.

<sup>17</sup> Dxel cwa'man tijb cojp yu' vin, chi gulox badëëman quixtëë loj Dios, rëbaman loj reeman:

—Gol cwa' vin guie, gol gudi'san loj gradi. <sup>18</sup> Din diidxli rnin lëjt, ad yu'tri dxej guië'n vin xt chi ma canabee Dios guidiblagaa.

<sup>19</sup> Dxel cwa'man guiadxtil badëëman quixtëë loj Dios, zianz gula'man laan, gudi'saman laan loj reeman, rëbgajman:

—Guiadxtil guie naj da cuerpan ni ma bayün din guiëtan por lëjt. Chi güüнди zian, gol been zian gual rusaaladxidi naj.

<sup>20</sup> Abi' ziangajc beenman con cojp ni yu' vin guin, chi gulox gudawaman xche, rëbaman:

—Vin guie naj da rejnan ni gaxhie'n chi guiëtan din guixal tijb nejz cüb xhienaag gap ree bejn perdon loj Dios.

<sup>21</sup> 'Per yan bën yayü naj, laa yaaman xoob loj mex lod xoob gajc yan. <sup>22</sup> Per Bén guxhaal Dios, naj sagdiajman abi' guiëtaman. Per i'probza bën yayü laaman!

<sup>23</sup> Dxel guzuloj rniabdiidx loj lasa' reeman chu reeman yayü laaman.

### *Chu mazri zojbloj*

<sup>24</sup> Dxel guzuloj reeman cadildiidx reeman chu loj gra reeman naj mazri bën zojbloj. <sup>25</sup> Per rëb Jesús loj reeman:

—Bén naj ree rey loj guidxliuj guie rniabee reeman bën ladx reeman zi'ctzi rën reeman, abi' ree bën rniabee, rëb reeman gual rüjn reeman ni zagdxe. <sup>26</sup> Per lëjt ad rayalt güüнди zian, bën mazri zojbloj lojdi rayal güün laagajcaman zi'c tijb bën ad zojblojt. Guiáad bën rniabee lojdi rayal güün laagajcaman zi'c tijb mojs. <sup>27</sup> ¿Chu naj mazri bën zojbloj loj guidxliuj guie? ¿Bén rbej xan mex par gaw ya o bën rbe'c gualraw? ¿Nid bën rbej xan mex guin naj mazri bën zojbloj ya? Guiáad naj za'n lojdi zi'c tijb bën rbe'c gualraw.

<sup>28</sup> 'Lëjtci za'në naj loj ree dxej cazaagdiajn. <sup>29</sup> Zeel gunen gualrniabee lojdi zi'c banee da Dadanan lon, <sup>30</sup> abi' gawidi loj da mexan lod ganabeen cwe tëëdi loj ree yagxhil lod güüнди gualguxtis loj gra ree bën za loj guidxiptio'p xdiaa Israel.

*Rëb Jesús guial guiëb Bëd ad nünbeetaman laaman*  
(Mt. 26:31-35; Mr. 14:27-31; Jn.13 :36-38)

<sup>31</sup> Rëb tëë Jesús:

—Simón, Simón, ma gunab xindxab lëjt din güünx lëjt prueb zi'c rbijb bejn trigo. <sup>32</sup> Per naj ma guredx gunaaban Dios por lüj chitëë cwëz chililadxil naj. Guiáad lüj chi yazudxi'chil loj ni rililadxil naj zatijb, gognë ree lasa'l din sudxi'ch reeman loj ni rililadx reeman naj. <sup>33</sup> Dxel rëb Bëd lojman:

—Dad, ad zaro'nladxtan lüj majsi gayu'në'n lüj ladxguiib o xt guiëtnë'n lüj.

<sup>34</sup> Abi' rëb Jesús:

—Naj rni lüj Bëd, yan guxhin gajc chi gad guid cwidxa', choon volt mal rëbil ad nünbeetil naj.

*Zidyob dxej sagdiaj Jesús*

<sup>35</sup> Dxel gunabdiidx Jesús loj ree xbejnman rëbaman:

—Chi guxhalan lëjt sin bols, sin milia, në sin gurëch, ¿yu' ni biaadxidi ya?

Badxi' reeman laan rëb reeman:

—Achet.

<sup>36</sup> Dxel rëbaman loj reeman:

—Sa'n yan bën rajp milia në bols, gol cwa'n. Guiáad bën ad rajpt espad, gol bato' xabidi din siidi tijban. <sup>37</sup> Din naj rni guial rüjn naguiejn gac zi'c rëb loj xtiidx Dios por naj, lod rëb: “Abi' nayabaman loj ree benmal.” Gra ni ca loj xtiidx Dios por naj, naj gacan cumplid.

<sup>38</sup> Dxel rëb reeman lojman:

—Dad, guie naca'n tio'p espad.

Badxi'man laan rëbaman:

—Zajquican.

*Rbejdx rniab Jesús Dios lod la Getsemaní*

(Mt. 26:36-46; Mr. 14:32-42)

<sup>39</sup> Dxel brier Jesús zi'c naj xcostumbraman zëman ruguia' Olivos, abi' binal ree xbejnman laaman. <sup>40</sup> Chi bidxin reeman yagaj, rëbaman loj reeman:

—Gol gurejdx gunab Dios, chitëë güün xindxab lëjt gan.

<sup>41</sup> Abi' wejman zijt zi'ct lod rucaa bejn tijb guiaj, zianz bazuxibaman gurejdx gunabaman Dios, <sup>42</sup> rëbaman:

—Dad, bal tiëbil, babëë naj loj ni gazaagdiajn per ad gac zi'c rënan, rayal gac zi'c rënl.

<sup>43</sup> Dxel balüüloj tijb anjl guza xanyabaa lojman persi badëëman laaman gojl. <sup>44</sup> Abi' chi cazagdiaj da'taman, mazri con gan cabejdx canabaman Dios ryajb tëë ree xnijs rag-neeyaman luyuj zi'c rejn.

<sup>45</sup> Chi bisuman lod cabejdx canabaman Dios, bignaj ree xbejnman abi' chi badxinman cwè' reeman laa reeman naga'yëjs, guial yu'naya reeman. <sup>46</sup> Zianz rëbaman loj reeman:  
—¿Chexc zeel naga'yëjsidi? Gol bixche, gol gurejdx gunab Dios chitëë güün xindxab lëjt gan.

*Gunaaz reeman Jesús*

(Mt. 26:47-56; Mr. 14:43-50; Jn.18 :2-11)

<sup>47</sup> Sta caneenë Jesús bën naj ree xbejnman chi bidxin ree benzien. Në bën brii laj Judas, bën goc tijb ree xbejn Jesús, nedaman loj ree bën guin abi' bibigaman loj Jesús gudawaman laaman xid. <sup>48</sup> Dxel rëb Jesús lojman:

—Judas, ¿wen con tijb xid rayül Bén guxhaal Dios ya?

<sup>49</sup> Chi baguiaa ree bën za'në Jesús ni cayajc, rëb reeman lojman:

—Dad, ¿zalëë dux espadan ya?

<sup>50</sup> Abi' tijb xbejnman gudiilguijdxaman xmojs bixhioz rniabee gra ree bixhioz, gutü'man guidiajg ladbeeman. <sup>51</sup> Per rëb Jesús loj reeman:

—Guzujr ree bénan. Ma gojczy.

Dxel baqui' Jesús guidiajg mojs guin abi' bayünman laan. <sup>52</sup> Zianz rëb Jesús loj ree bixhioz rniabee ree bixhioz, con ree bën rniabee ree bën rajp yadooro' Jerusalén con xguxtis ree bën Israel, bën bidxin ree par chinë laaman:

—¿Chexc zeel zëëdidi con espad con yag din chinëdi naj zi'c tijb xingubaan? <sup>53</sup> Guixie guixie guzunë'n lëjt lën yadooro' Jerusalén abi' ad gunaaztidi naj. Per yan ma bidxin xihoridi, hor ni nabee xindxab.

*Rëb Bëd ad nünbeetaman Jesús*

(Mt. 26:57-58, 69-75; Mr. 14:53-54, 66-72; Jn.18 :12-18, 25-27)

<sup>54</sup> Dxel gunaaz reeman Jesús zinë reeman laaman lidx bixhioz rniabee gra ree bixhioz, binal Bëd laaman zijt zijt. <sup>55</sup> Yagaj gule'c ree bën guin guij galay lule', abi' gurej reeman rudëj guin. Në Bëd gurejnë laa reeman. <sup>56</sup> Per tijb béngunaa rünj dxiin yagaj, chi baguiaaman Bëd zojbaman rudëj guin, baguiaaman lojman, abi' rëbaman:

—Në bën guin za'në Jesús.

<sup>57</sup> Per gurexuu Bëd, abi' rëbaman loj bën guin:

—Ad nünbeetan laax.

<sup>58</sup> Ad gojct xchej chi baguiaa zatijb bejn laaman, rëbaman lojman:

—Në lüj naj xbejn Jesús.

Badxi' Bëdan rëbaman:

—Yajqui dad, ad xbejntix naj.

<sup>59</sup> Gudëd cost tib hor, dxel rëb zatijb bejn:

—Nēczi bėn guie za'nė laaman din nėman naj bėn Galilea.

<sup>60</sup> Zianz rėb Bėd:

—Ad ragbeetan xhienin rnieel.

Hor ni canee gajc Bėd zian guridxa' tijb guid. <sup>61</sup> Dxel badxi' loj Jesús baguiaaman loj Bėd, abi' basaaladx Bėd guial rėb Jesús lojman: “Yan guxhin gajc chi gad guid cwidxa', choon volt mal rėbil ad núnbeetil naj.” <sup>62</sup> Dxel barii Bėd yagaj, abi' dád naya biinman.

*Baze' reeman Jesús gudijn tēē reeman laaman*

(Mt. 26:67-68; Mr. 14:65)

<sup>63</sup> Bėn cayajp ree Jesús, baze' reeman laaman gudijn tēē reeman laaman. <sup>64</sup> Guxhii reeman lojman abi' gudijn reeman laaman, dxel rėb reeman lojman:

—iGuneeya' chu gudin lűj!

<sup>65</sup> Abi' zien ree diidxguijdx rėb reeman lojman.

*Za' Jesús loj ree guxtis Israel*

(Mt. 26:59-66; Mr. 14:55-64; Jn.18 :19-24)

<sup>66</sup> Chi bareguiaal, badxajg lasa' ree guxtis Israel, nė ree bixhioz rniabee ree bixhioz con ree mextr rajc ley, abi' binė reeman Jesús lod radxaag lasa' gra ree xguxtis reeman, dxel rėb reeman lojman:

<sup>67</sup> —Guna du lojn, ħlűj naj Cristo ya?

Badxi'man laan rėbaman:

—Bal ganinan ad zaliladxtidi. <sup>68</sup> Abi' bal xhie ganabdiidxan lojdi, ad zadxi'tidan. <sup>69</sup> Per diizd yan, Bėn guxhaal Dios cweman xladbee Dios, bėn ca' gra guialrniabee.

<sup>70</sup> Dxel rėb gra reeman lojman:

—ħLűjn naj Xi'n Dios ya?

Badxi'man laan, rėbaman:

—Waliquidi najcan.

<sup>71</sup> Zianz rėb reeman:

—ħXhie mazri rűjn naguiejn yadiil ree testiw? Dunuj gajc ree ma baguiejn ni nax con quijb xtiidxix.

## 23

*Binė reeman Jesús loj Pilato*

(Mt. 27:1-2, 11-14; Mr. 15:1-5; Jn.18 :28-38)

<sup>1</sup> Dxel wajs gra reeman binė reeman Jesús loj Pilato. <sup>2</sup> Yagaj guzuloj cutedia' reeman Jesús lojman, rėb reeman:

—Badxaaglojn xin guie cusquieex bėn du ladx ree, rėbix guial ad rayalt yadijx ree impuest loj rey César, rėb tēēx guial laax naj Cristo, naj tēēx rey.

<sup>3</sup> Dxel gunabdiidx Pilato lojman rėbaman:

—ħLűjn naj xrey ree bėn Israel ya?

Badxi' Jesús laan, rėbaman:

—Waliquil, najcan.

<sup>4</sup> Dxel rëb Pilato loj ree bixhioz rniabee ree bixhioz në loj gra ree bën riga' yagaj:

—Achet xfalt xin guie radxejlan.

<sup>5</sup> Per laa reeman naguiejnczi rüjn reeman, rëb reeman:

—Cusquieex bejn ree guidib niz Judea con ree ni rulüux laa reeman. Guzulojx niz Galilea abi' yan cayüjnx zian niz guie.

### *Binë reeman Jesús loj Herodes*

<sup>6</sup> Chi biguiejn Pilato baza't reeman Galilea, gunabdiidxaman loj reeman bal niz Galilea naj ladx Jesús. <sup>7</sup> Abi' chi rëb reeman guial najman bën Galilea, guxhaalaman laaman loj Herodes bën rniabee Galilea, guial lën ree dxej guin në Herodes za' Jerusalén. <sup>8</sup> Chi baguiaa Herodes Jesús dád babaaman guial diidz gocli rënman guguaaman laaman guial bacaagdiajgaman ruza't ree bejn laaman, abi' rbëzaman guguaaman güünman tijb milagr. <sup>9</sup> Zien ree ni gunabdiidxaman lojman, per Jesús achetdzi badxi'man. <sup>10</sup> Në ree bixhioz rniabee ree bixhioz za' yagaj con ree mextr rajc ley, ad rucwëëzt rutedia' reeman laaman. <sup>11</sup> Dxel Herodes con ree xsuldadaman xhiernarajc beennë reeman laaman, baze' reeman laaman, bascajcw reeman laaman lajd zagdxe lasa' ni rajcw ree rey. Zianz baxhaal Herodes guin laaman loj Pilato zatijb. <sup>12</sup> Abi' dxejzii bazuloj baneenë Herodes Pilato zagdxe, din gocli rdxe'ch lasa' reeman.

### *Gunabee reeman guiët Jesús*

*(Mt. 27:15-26; Mr. 15:6-15; Jn.18 :39-19 :16)*

<sup>13</sup> Dxel bachajg Pilato lasa' ree bixhioz rniabee ree bixhioz con ree guxtis, con ree bën luguiedx guin, <sup>14</sup> abi' rëbaman loj reeman:

—Bidnëdi xin guie nadi cusquieex bejn ree. Per niz lojdi ma gunabdiidxan lojx abi' achet xfaltix radxejlan zi'c nadi.

<sup>15</sup> Ni'qui Herodes ad badxejlt xfaltix, zeel baxhaalaman laax lon zatijb. Ma baguiaalojdi achet ni mal beenx din guiëtix.

<sup>16</sup> Yan, gudëdan laax casti dxel guslaan laax.

<sup>17</sup> Lën ree dxej lanij guin ruslaa Pilato tijb bën yu' ladxguiib zi'c goc xcostumbr reeman. <sup>18</sup> Per graczi reeman guzuloj rbixdiaj, rëb reeman:

—¡Bagüjt xin guin! ¡Baslaa Barrabás!

<sup>19</sup> Badxe' reeman Barrabás guin ladxguiib guial beenman tijb wadijl Jerusalén, guial guzujman contr ree suldad rom, në guial bagüjtaman bejn. <sup>20</sup> Guneenë Pilato laa reeman zatijb guial guyënman nuslaaman Jesús, <sup>21</sup> per laa reeman gurixdiaj reeman mazri rejs, rëb reeman:

—¡Bacaax loj crüjz! ¡Bacaax loj crüjz!

<sup>22</sup> Ni bayon volt rëb Pilato loj reeman:

—¿Xhieza ni mal been xin guin? Achet xfaltix radxejlan din guiëtix. Gudëdan laax casti dxel guslaan laax.

<sup>23</sup> Per laa reeman mazri rbixdiaj reeman, rëb reeman loj Pilato din gucaaman laaman loj crüjz. Abi' guial tant rbixdiaj reeman con ree bixhioz rniabee ree bixhioz, been reeman gan gojc zi'c rën reeman. <sup>24</sup> Dxel cwëjb Pilato beenman zi'c rën reeman. <sup>25</sup> Abi' baslaaman Barrabás bën guyu ladxguiib por wadijl në guial bagüjtaman bejn, guiáad Jesús bayüman laaman loj reeman persi beennë reeman laaman zi'ctzi rën reeman.

*Bacaa reeman Jesús loj crüjz*

(Mt. 27:32-44; Mr. 15:21-32; Jn.19 :17-27)

<sup>26</sup> Chi zinë reeman Jesús din gucaa reeman laaman loj crüjz, gunaaz reeman tijb bën za Cirene laaman Simón. Ziaadaman bazaman dajn, gunabee reeman laaman güüman xcrüjz Jesús din chinalaman laaman.

<sup>27</sup> Zien da't bejn zinal laaman, abi' zien ree béngunaa roon rbixdiaj guial raya reeman laaman. <sup>28</sup> Per baguiaa Jesús loj reeman abi' rëbaman:

—Béngunaa Jerusalén ad roondi por naj, gol biin por lëjt gajc në por xi'ndi. <sup>29</sup> Din zadxin dxej guiëbidi: “Xiquilbaa ree béngunaa ad rajct ru xi'n, në ree béngunaa ad gojlt xi'n con ree béngunaa ad ca't bindobëz.” <sup>30</sup> Dxel suloj guiëb ree bejn loj ree guia': “Gol guxa't du guijcan”, guiáad loj ree lom guiëb reeman: “Gol baquie'ch dunujn.” <sup>31</sup> Yan, nacli naj rüjnnë reeman zian, diidxgui lëjt, wed xhieczinin güünnë reeman lëjt.

<sup>32</sup> Abi' në tio'p ree xingubaan zinë reeman din tia reex loj crüjz con Jesús. <sup>33</sup> Chi bidxin reeman lod la Calaver, bacaa reeman Jesús loj crüjz, con grop ree xingubaan guin: tijbix cwa ladbee zatijbix cwa ladruvejs. <sup>34</sup> Abi' chi cucaa reeman Jesús loj crüjz, rëbaman:

—Dad, been reeman perdon, din ad ragbeet reeman xhienin rüjn reeman.

Dxel gudxijt ree suldad suert guijc xabaman din yala' reex laan. <sup>35</sup> Zien ree bejn riga' yagaj cuguaa reeman, abi' xt ree guxtis ruze' laaman, rëb reeman:

—Baslaax ben ren ree, yan guslaa laagajquix bal walix laax naj Cristo.

<sup>36</sup> Në ree xin suldad ruze' laaman, rbig reex rudëed reex vinagr guië'man, <sup>37</sup> rëb reex lojman:

—Bal lüj naj xrey ree bën Israel, baslaa lüj gajc.

<sup>38</sup> Abi' guijc crüjz guin bacaa reex lëjtr con diidx grieg, diidx latin, në diidx hebreo, rëban: “Bën guie naj xrey ree bën Israel.”

<sup>39</sup> Tijb xingubaan ni ca loj crüjz guin guneex diidxguijdx loj Jesús, rëbix:

—Bal lüj naj Cristo, baslaa lüj gajc, baslaa tää dunujn.

<sup>40</sup> Per zatijbix gudilë xcompniarix, rëbix lojx:

—¿Staczi ad rdxehtil Dios ya majsi lasa'gajc casti guin cadëdil? <sup>41</sup> Dunuj rayalczi cayzaagdiaj din zian caydijx ni baguieen. Per bën guie achetczi ni mal wayüjnman.

<sup>42</sup> Dxel rëbix loj Jesús:

—Basaaladx naj chi ma canabeel.

<sup>43</sup> Abi' rëb Jesús lojx:

—Diidxli rnin lojl guial yandxej gajc sunël naj lod naj nix, lod gan.

### *Güjt Jesús*

(Mt. 27:45-56; Mr. 15:33-41; Jn.19 :28-30)

<sup>44</sup> Chi gol garol dxej, bicajy guidibczi guidxliuj xt raca choon wadxe. <sup>45</sup> Bicajy logbijdx guiáad lajd nal lën yadooro' Jerusalén goxya'n, gojcan tio'p lala'. <sup>46</sup> Dxel gurixdiaj Jesús, rëbaman:

—Dad, lojl rusa'n da sprijtan.

Chi gulox guneeman zian, dxel güjtaman.

<sup>47</sup> Chi baguiaa suldad rniabee ree suldad ni goc, baza'tix Dios zagdxe, rëbix:

—Walican achet xtol bën guin yu'.

<sup>48</sup> Chi baguiaa gra ree bën za' yagaj ni goc, dá d gyyunaya reeman zia reeman riga'pgaj luxdoo reeman. <sup>49</sup> Per gra ree bën nünbee Jesús, con ree béngunaa nal laaman diizd Galilea, zijt guzuj reeman baguiaa reeman gra ree ni goc.

### *Biguie'ch Jesús*

(Mt. 27:57-61; Mr. 15:42-47; Jn.19 :38-42)

<sup>50</sup> Guyu tijb bejn, brii lajman Xiëb, gojcaman benza'c, beenman zi'c rayal. Gojc ladxaman guiedx Arimatea tijb guiedx naaz Judea. Gojc tääman tijb xguxtis ree bën Israel. <sup>51</sup> Nëman rbëz nabee Dios, abi' ad nëtaman bachajg xixgab ree bën bagüjt Jesús. <sup>52</sup> Wejman loj Pilato bignabaman xcuerp Jesús. <sup>53</sup> Chi gulox baletaman xcuerp Jesús loj crüjz guin, cwa'man laaman batüübaman tijb lajd, dxel biquie'chaman laaman lën tijb baa ni bidëen lën guiaj lod achutczi waguie'ch. <sup>54</sup> Dxej guin rüjn reeman porvinid gra par dxej raziiladx ree bejn. Zamer suloj dxej guin chi biquie'ch reeman Jesús.

<sup>55</sup> Abi' ree béngunaa zidnë Jesús diizd Galilea, në reeman binal abi' baguiaa reeman xbaa Jesús baguiaa tää reeman xhienaag gudijxh reeman xcuerpaman. <sup>56</sup> Chi bayejc reeman, zianz beenchaaw reeman perfum në zaj ni rliaa nejxh

ni guidëëbaman. Dxel baziiladx reeman dxej raziiladx ree bejn zi'c rniabee ley.

## 24

### *Raban Jesús*

(Mt. 28:1-10; Mr. 16:1-8; Jn.20 :1-10)

<sup>1</sup> Chi dumingw rsildoo, wej ree béngunaa guin ro' xbaa Jesús binë reeman perfum ni beenchaaw reeman. <sup>2</sup> Chi bidxin reeman yagaj, baguiaa reeman guiaj ni bida'cw ro' baa guin ad naga'tri xluaran. <sup>3</sup> Abi' guyu reeman, per ad bidxaaglojtri reeman xcuerp Dad Jesús. <sup>4</sup> La'tzi cadxeb reeman ni'quid radxejlt xhie güün reeman, dxejczy baguiaa reeman tio'p ree bejn za'li reeman gajxh lod za' reeman, najcw reeman lajd bacha'. <sup>5</sup> Abi' guial tant bidxeb reeman, basajb loj reeman xt luyuj, dxel rëb ree bén guin loj reeman;

—¿Chexc zeel raguuilidi tijb bén naban loj ree bengüt?

<sup>6</sup> Achutri laaman guie din ma babanman. Gol basaaladx ni naman lojdi chi guzuman niz Galilea. <sup>7</sup> Naman lojdi guial yayü reeman Bén guxhaal Dios loj ree bëndol din gucaa reeman laaman loj crüjz, abi' ni yayon dxej yabanman.

<sup>8</sup> Dxel basaaladx reeman diidx ni rëb Jesús loj reeman, <sup>9</sup> abi' chi baza reeman ro' baa guin, bicojn reeman guidxiptib ree xi apóstoles Jesús në los demazri ree xcompniar reeman gra ni baguiaa reeman. <sup>10</sup> María Magdalena, con Xuan, con Li xniaa Jacob con ree béngunaa ren, laa reeman bignë ruson guin loj ree xi apóstoles Jesús. <sup>11</sup> Per laa reeman ad bililadxt reeman ni rëb ree béngunaa guin, gunaladx reeman wed rëbzi reeman.

<sup>12</sup> Per Bëd baxüünman biquiaaman lën baa guin, abi' chi baguiaaman lën baa guin, lajd ni bidüübzi Jesús baguiaaman, zianz ziaman dád radxalojman por ni goc.

### *Balüüloj Jesús loj tio'p ree xbejnman*

(Mr. 16:12-13)

<sup>13</sup> Dxej guin gajc, tio'p ree xbejn Jesús zë tijb guiedx la Emaús, raya'nan zi'ct chiptib kilometro par Jerusalén. <sup>14</sup> Chi zë reeman lunejz cayü reeman diidx xcwent gra ree ni goc. <sup>15</sup> La'tgaj cayü reeman diidx, gubig Jesús cwë' reeman abi' guzuloj cazanëman laa reeman. <sup>16</sup> Per majsi cuguaa reeman laaman, yu' ni badxoon nayünbee reeman laaman. <sup>17</sup> Dxel gunabdiidx Jesús loj reeman, rëbaman:

—¿Xhie diidxan rüdi la'tgaj cazadi? ¿Chexc zeel yu'nayadi?

<sup>18</sup> Badxi' tijb bén la Cleofas laan, rëbaman:

—Gra ree bejn ragbee ni goc Jerusalén lën ree dxej guie. ¿Wen tijbzi lüj naj Bén guzu Jerusalén ad gogbeetil ni goc ya?

<sup>19</sup> Dxel rëbaman loj reeman:



—¿Xhie goc?

Abi' rëb reeman:

—Ni beennë reeman Jesús bën Nazaret, laaman goc tijb bën badëë xtiidx Dios loj ree bejn, bën gop guialrniabee zi'c ni beenman në ree diidx ni guneeman niz loj Dios në niz loj ree bejn. <sup>20</sup> Në guial bayü ree bixhioz rniabee ree bixhioz laaman në ree dux guxtis ree din guiëtaman, abi' bacaa reeman laaman loj crüzj. <sup>21</sup> Par dunujn laaman naj bën yabëë ree bën Israel loj ree bën rom, per yan gojc choon dxej ni goc ree ni guin. <sup>22</sup> Majsí tio'p choon ree béngunaa no'ch du lojn bachejb reeman dunujn, guial rsildoo wej reeman ro' baa guin, <sup>23</sup> abi' guial ad baguiaat reeman xcuerpaman, bayejc reeman rü reeman diidx guial balüüloj ree anjl loj reeman, rëb ree anjl guin loj reeman guial naban Jesús. <sup>24</sup> Laa biquiaa gajc ree tio'p choon ree dux compniaran ro' baa guin abi' baguiaa reeman zi'cgajczi rëb ree béngunaa guin, per ad baguiaat reeman Jesús.

<sup>25</sup> Dxel rëb Jesús loj reeman:

—iXi nawëëg naj chignia'di abi' xi raglaa par chililadixidi gra ni gunee ree bën badëë xtiidx Dios loj ree bejn! <sup>26</sup> ¿Wen id naj ya guial sagdiaj Cristo, dxelri yayë'paman xanyabaa?

<sup>27</sup> Dxel guzuloj cusignia'man laa reeman ni rën guiëb ni ca loj xtiidx Dios xcwentaman. Guzulojman con ree xlibr Moisejs abi' basnuman con gra ree libr ni bacaa ree bën badëë xtiidx Dios loj ree bejn.

<sup>28</sup> Chi bidxin reeman guiedx lod zë reeman, been Jesús zi'c bën che mazri zijt. <sup>29</sup> Per laa reeman been reeman naguiejn din yaya'nnëman laa reeman, rëb reeman lojman:

—Baya'n con dunujn, din ma gudxe yan abi' ma cabej guiaal.

Dxel guyu Jesús persi baya'nnëman laa reeman. <sup>30</sup> Abi' chi zojbnëman laa reeman xan mex, cwa'man guiadxtil abi' chi gulox badëëman quixtëë loj Dios, gula'man laan persi badëëman laan loj reeman. <sup>31</sup> Hor guin gajc guzajc reeman zi'c bën baxal guiaaløj, abi' bayünbee reeman laaman. Per laa gunidloj gajcaman, <sup>32</sup> zianz rëb loj lasa' reeman:

—iZe'cliza dád nix yu' du luxdoo chi zudnë'man lunejz, chi cusignia'man dunuj ni rëb loj xtiidx Dios!

<sup>33</sup> Abi' ni'quid gulëjzt reeman, laa bayunejz gajc reeman zia reeman Jerusalén lod riga' guidxiptib ree xi apóstoles Jesús con ree xcompniar reeman. <sup>34</sup> Rëb reeman loj grop ree bën guin:

—Walican ma baban Dad Jesús, ma balüülojman loj Simón.

<sup>35</sup> Zianz be reeman diidx ni guzac reeman chi zë reeman lunejz xhie tëë naag bayünbee reeman Jesús chi gula'man guiadxtil.

*Balüüloj Jesús loj ree xbejnman*

(Mt. 28:16-20; Mr. 16:14-18; Jn.20 :19-23)

<sup>36</sup> Sta cayü reeman diidx xcwent ree ni guin, chi balüüloj Jesús galay reeman, rëbaman:

—Yabe'cdxe Dios luxdoodi.

<sup>37</sup> Dád badxaløj reeman abi' bidxeb reeman guial gunaladx reeman anman cuguaa reeman. <sup>38</sup> Per rëb Jesús loj reeman:

—¿Chexc zeel rdxebidi? ¿Chexc zeel yu'nawëëg luxdoodi?

<sup>39</sup> Gol baguaa yan në guia'n. Naj gajcan, gol baqui' naj gol baguaa tëë naj, din tijb anm ad yu'taman dxijt ad ca tëëtaman bëël zi'c ruguaadi naj.

<sup>40</sup> Chi rëbaman zian, balüü yaaman në guia'man. <sup>41</sup> Per laa reeman staczi ad rliładxt reeman guial tant rabaa reeman radxa tëë loj reeman, abi' rëbaman loj reeman:

—¿Rajpidi ta'n guialraw ya?

<sup>42</sup> Dxel badëë reeman tibia' bëjl biguie', <sup>43</sup> abi' cwa'man laab gudawaman niz loj reeman. <sup>44</sup> Zianz rëbaman loj reeman:

—Ni ma guza'can naj ni rnin lojdi chi sta za'n con lëjt: Guial naj gac gra ree ni ca loj xlibr Moisejs ni gaza'can, në xlibr ree bën badëë xtiidx Dios loj ree bejn, në loj libr salmos.

<sup>45</sup> Dxel guxhalaman xquiarguiejn reeman persi bignia' reeman ni ca loj xtiidx Dios, <sup>46</sup> abi' rëbaman loj reeman:

—Loj xtiidx Dios rëb guial Cristo, naj guial guiëtaman, abi' ni yayon dxej yabanman. <sup>47</sup> Abi' diizd Jerusalén suløj guire'ch xtiidxaman xt guidib loj guidxliuj guial yu' perdon par gra ree bën yayüjn xgab por xtol guililadx tëë reeman naj. <sup>48</sup> Lëjt naj testiw xcwent gra ree ni guin. <sup>49</sup> Naj gaxhal par lëjt ni ma na da Dadan. Per gol guzujsii luguiedx Jerusalén xt tia'di guialrniabee ni gui't diizd xanyabaa.

*Bayë'p Jesús xanyabaa*

(Mr. 16:19-20)

<sup>50</sup> Dxel briinë Jesús laa reeman luguiedx Jerusalén binëman laa reeman gajxh Betania, zianz gules yaaman beenle'man laa reeman. <sup>51</sup> Abi' la'tgaj cayüjnle'man laa reeman, wajsaman ziaman xanyabaa. <sup>52</sup> Chi gulox bazuxib reeman badëë reeman quixtëë lojman, dxel zia reeman Jerusalén, dád rabaa reeman. <sup>53</sup> Abi' guixie guixie yu' reeman lën yadooro' Jerusalén ruza't reeman Dios zagdxë rudëëd tëë reeman quixtëë lojman.

## Xtiidxza'c Jesucrist ni bacaa San Juan

### *Bi't Xi'n Dios loj guidxliuj*

<sup>1</sup> Diisd guia'xchej chi gad guidxliuj gacchaaw, mal yu' b́en naj xtiidx Dios. Laaman za'ně Dios abi' laagajcaman naj Dios.

<sup>2</sup> Laaman mal za'ně Dios diisd guia'xchej. <sup>3</sup> Laaman been graczi ni yu'. Achetczi ni yu' niajc bal id laaman. <sup>4</sup> Laaman rajp guialnaban, guiáad guialnaban guin naj bajl par gra bénguidxliuj. <sup>5</sup> Bajl guin rusni b́en nacay xquiarguejn, abi' ad rajct rutěe guialnacay guin loj bajl guin.

<sup>6</sup> Guyu tijb b́en brii laj Waj, Dios guxhaal laaman, <sup>7</sup> bidgaguieman diidx xcwent b́en naj xbajl Dios, din gac chililadx gra ree bejn laaman. <sup>8</sup> Per ad Wajt goc bajl guin, bi'tzaman bidgaguieman diidx xcwent bajl guin. <sup>9</sup> Din b́en naj quijb bajl guin, laaman rusni xquiarguejn gra bénguidxliuj, abi' ma bi'taman loj guidxliuj.

<sup>10</sup> Laaman guzu loj guidxliuj, abi' majsi laaman been guidxliuj, per ree bénguidxliuj ad bayagbeet reeman laaman.

<sup>11</sup> Bi'taman loj ree b́en Israel, abi' majsi gojcaman b́en Israel, per ad bidxga't reeman laaman. <sup>12</sup> Per, gra ree b́en bidxga' laaman bililadx t́e reeman laaman, beenman laa reeman xi'n Dios. <sup>13</sup> Abi' naj reeman xi'n Dios, ad zi'c rut xi'n bejn loj guidxliuj por xixgab bejn o guial rěn bejn chu' xi'nman, por guial rililadx reeman ma naj reeman xi'n Dios.

<sup>14</sup> Jesús, b́en naj xtiidx Dios, laaman goc bejn abi' gubajman loj guidxliuj con dunuj ree, abi' dád guyenman bejn ree gunee t́eman ganax diidxli. Dunujn baguiaa xguialrniabeeman, guialrniabee ni ca'man guial tijbzi laaman naj Xi'n Dios. <sup>15</sup> Chi be Waj xtiidxaman loj ree bejn, gunee man rejs, rēbaman:

—Jesús guie naj b́en ruzatan, chi rnin guial b́en zěed xichan mazri lasajcaman guial lon, din diisd gocli mal yu'man guial lon.

<sup>16</sup> Dád rěnman dunuj ree, gra dxejci raci' dugra ree xguialnaza'caman. <sup>17</sup> Por Moisejs banee Dios xleyaman duloj ree, per por Jesucrist bayagbee ree xhienaag rěn Dios dunuj ree xhie t́e naag naj xtiidxliman. <sup>18</sup> Ad yu't dxej waguiaa bejn Dios. B́en naj tijbzi xi'nman. B́en nabanně laaman balüü duloj ree xhienaag naj Dios.

*Waj b́en baroobnijs rēbaman chu naj Jesús  
(Mt. 3:11-12; Mr. 1:7-8; Lc. 3:15-17)*

<sup>19</sup> Diizd Jerusalén guxhaal ree xguxtis ree b́en Israel bixhioz ree con ree b́en naj ree levitas persi bignabdiidx reeman loj Waj chu najman.

<sup>20</sup> Dxel be Waj diidxli loj reeman, ŕebaman:

—Ad najtan naj Cristo.

<sup>21</sup> Abi' gunabdiidx reeman lojman stijb ŕeb reeman:

—¿Chuza najl? ¿Lüjn naj Elías ya, b́en badëë xtiidx Dios loj ree bejn?

Badxi' Wajn ŕebaman:

—Ad najtan.

Dxel gunabdiidx reeman stijb ŕeb reeman:

—O, ¿lüjn naj b́en naj diidx gui't ya, b́en gudëë xtiidx Dios loj ree bejn?

Badxi'man laan ŕebaman:

—Ad najtan.

<sup>22</sup> Abi' ŕeb reeman:

—¿Chuza najl? Din rayal yugnë'n ruson loj ree b́en guxhaal dunujn. Guna chu najl.

<sup>23</sup> Dxel ŕeb Waj loj reeman:

—Naj naj tijb b́en rbidxa' loj yujbidx: “Gol guxhal tijb nejz nali par b́en ca' guialrniabee” —zi'c ŕeb Isaías b́en badëë xtiidx Dios loj ree bejn.

<sup>24</sup> Abi' ree b́en guxhaal ree b́enfarisew din guinieenë reeman Waj, <sup>25</sup> gunabdiidx reeman lojman, ŕeb reeman:

—Bal id lüjn naj Cristo, ni'qui Elías, ni'qui b́en naj diidx gui't, b́en gudëë xtiidx Dios loj ree bejn, ¿chexquiza zeel ruroobnijsil bejn?

<sup>26</sup> Badxi' Waj laan ŕebaman:

—Naj ruroobnijs con nijs, per lojdi no'ch tijb b́en ad wayünbeetidi. <sup>27</sup> Laaman naj b́en zëed xichan, ni'qui xgurëchaman ad rayalt gaxhiecan guial najman b́en mazri lasajc guial lon.

<sup>28</sup> Gra niguie gojc lod la Betábara, ni naj stiblad ro' guiiw Jordán, lod baroobnijs Waj bejn ree.

### *Jesús naj Xi'n Dios*

<sup>29</sup> Chi bareguiaal, baguiaa Waj zibig Jesús lod za'man, dxel ŕebaman:

—Gol baguiaa, b́en guin naj b́en bacaabee Dios din guiëtaman zi'c xiildoo por xtol ree b́enguidxliuj. <sup>30</sup> Laaman bazatan lojdi chi rnin: “Xichan zidnal b́en mazri lasajc guial lon, din laaman mal yu' diizd gocli guial lon.” <sup>31</sup> Ni'qui naj ad gogbeetan guial laaman naj b́en gui't, per naj zialan din guroobnijsan bejn ree con nijs din chile' güünbee ree b́en Israel laaman.

<sup>32</sup> Ŕeb t́ëë Waj loj reeman:

—Naj baguia biguiajt xSprijt Dios diizd xanyabaa zi'c tijb palom xt guijcaman. <sup>33</sup> Majsí ad nünbeetan laaman, per bèn guxhaal naj barobnijsan con nijs, laaman na lon: “Chi guguaal guiat xSprijt Dios xt guijc tijb bejn, laaman naj bèn runee xSprijt Dios.” <sup>34</sup> Naj ma baguia laaman, abi' ragbeechaawan guial laaman naj Xi'n Dios.

### *Bén binal ree Jesús yaloj*

<sup>35</sup> Chi bareguiaal, za' Waj yagaj stijb, za'në tio'p ree xbejnman. <sup>36</sup> Abi' chi baguiaaman cadëd Jesús, dxel rëbaman loj reeman:

—Gol baguiaa, bèn guinan naj zi'c xi xiildoo Dios din guiëtaman por xtol bénguidxliuj.

<sup>37</sup> Chi biguiejn reeman rëb Waj zian, dxel binal reeman Jesús. <sup>38</sup> Chi badxi' lojman, baguiaaman zinal reeman laaman, abi' rëbaman loj reeman:

—¿Xhie rguillidi?

Badxi' reeman laan rëb reeman:

—Mextr, ¿ban zojbil?

<sup>39</sup> Dxel rëb Jesús loj reeman:

—Gol guda din guguaadi.

Dxel wej reeman biquiaa reeman lod zojbaman, abi' baya'nnë reeman laaman dxej guin, guial ma gojl cost raca tajp wadxe.

<sup>40</sup> Tijb ree xbejn Waj bèn binal Jesús, bèn bacaagdiajg ni rëb Waj, laaman brii laj Andrejs, bijch Simón Bëd. <sup>41</sup> Andrejs guin, yalojxgaj bijchaman Simón bigdiilaman, abi' rëbaman lojman:

—Ma badxaaglojn bèn naj Mesías —rën guiëban Cristo.

<sup>42</sup> Dxel binë Andrejs Simón lod za' Jesús, chi baguiaa Jesús laaman, rëbaman:

—Lüj naj Simón, xi'n Jonás, per yan grii lajl Cefas —rën guiëban Bëd.

### *Gurejdx Jesús Felip në Natanael*

<sup>43</sup> Chi bareguiaal been Jesús xgab cheman niz Galilea, abi' badxaagaman Felip, zianz rëbaman:

—Tanal naj.

<sup>44</sup> Ladx Felip guin naj guiedx Betsaida, ni gajc naj ladx Andrejs con Bëd. <sup>45</sup> Dxel bigdiil Felip Natanael, abi' rëbaman lojman:

—Ma badxaaglojn bèn ruza't Moisejs loj xlibr xleyaman, bèn ruza't ree bèn badëë xtiidx Dios loj ree bejn loj ni bacaa reeman. Laaman naj Jesús, xi'n Xiëb, bèn Nazaret.

<sup>46</sup> Dxel rëb Natanael lojman:

—¿Wen yu' benza'c Nazaret ya?

Badxi' Felipan rëbaman:

—Yo' din guguaal.

<sup>47</sup> Chi baguiaa Jesús zëed Natanael, rëbaman:

—Guie zëed tijb bén naj quijb bén Israel, abi' ad rusquieetaman.

<sup>48</sup> Dxel gunabdiidx Natanael lojman, rëbaman:

—¿Xoza nünbeel naj?

Badxi' Jesúsán rëbaman:

—Chi gad Felip cwedx lüj, chi za'l xan yag higo, dxel baguian lüj.

<sup>49</sup> Zianz rëb Natanael lojman:

—Mextr, lüj naj Xi'n Dios, lüj naj rey Israel.

<sup>50</sup> Badxi' Jesús laan rëbaman:

—¿Riladxil naj ya guialzi rnin baguian lüj xan yag higo? Per mazri naj ree ni guguaal guial loj ni ma baguiaal.

<sup>51</sup> Rëb tëëman:

—Naj ragbeechaaw, zuguaadi zojbyal xanyabaa, abi' zuguaadi xianjl ree Dios yayë'p reeman xanyabaa yaguiajt tëë reeman xt guijc Bén guxhaal Dios loj guidxliuj.

## 2

### *Wej Jesús loj tijb guialruxhliaa*

<sup>1</sup> Ni goc choon dxej guyu tijb guialruxhliaa luguiedx Caná, ni riga' niz Galilea. Dxel në xniaa Jesús za' yagaj, <sup>2</sup> abi' në Jesús con ree xbejnman guneer reeman persi wej reeman loj lanij guin. <sup>3</sup> Chi babidx vin, dxel rëb xniaa Jesús lojman:

—Achetri vin rajp reeman.

<sup>4</sup> Badxi' Jesúsán rëbaman:

—Na, ¿chexquiza zeel nal lon zian? Ad wadxint da horan günan ni rayal günan.

<sup>5</sup> Per xniaaman rëb gajcaman loj ree bén cayüjn mandad yagaj:

—Gol been gra ni naman.

<sup>6</sup> Yagaj za' xho'p ree guiajs guiaj, ni ru nijs ni rüjnnë ree bén Israel dxiin chi rusia laa reeman zi'c naj xcostumbr reeman. Abi' lën tijbgaj reen ru cost tibgayuu lijtr. <sup>7</sup> Abi' rëb Jesús loj ree bén rüjn mandad guin:

—Gol bacha ree guiajs guie nijs.

Dxel bachadi reeman laa reen, <sup>8</sup> abi' rëbaman loj reeman:

—Yan gol gulëë ta'nan, gol bigdëen loj bén canabee loj lanij guie.

Dxel bigdëë reeman laan lojman, <sup>9</sup> abi' bén canabee loj lanij guin beenman prueb nijs bayajc vin guin, sin guial niagbeeman ban guzan, bén cayüjnz ree mandad guin ragbee, din laa reeman bica' nijs guin. Dxel gurejdxaman xin cuxhliaa guin, <sup>10</sup> rëbaman lojx:

—Graczi bejn rguis yaloj vin zagdxe, abi' chi ma gu' reeman zilan, dxel rguisaman vin corrient. Per lüj badxe'chaawil vin zagdxe guin persi cagui'silan yan.

<sup>11</sup> Ni guin naj milagr yaloj been Jesús, beenman milagr guin Caná, guiedx riga' niz Galilea. Zian balüü guialrniabee ni rajpaman abi' bililadx ree xbejnman laaman.

<sup>12</sup> Chi gulox gojc zian dxel zë reeman guiedx Capernaum, con xniaaman, con ree bijchaman con në ree xbejnman. Ni guzu reeman tio'p choon dxej.

*Babëë Jesús bén ruto' ree ro' yadooro'*  
(Mt. 21:12-13; Mr. 11:15-18; Lc. 19:45-46)

<sup>13</sup> Chi ma zidyob pascw xlanij ree bén Israel, wej Jesús Jerusalén. <sup>14</sup> Abi' ro' yadooro' bidxaaglojman bén cuto' ree go'n, con ree xiil con ree palom, në ree bén zojb xan mex ruchaa reeman xmilia ree bén ziaad lood ren. <sup>15</sup> Chi baguiaa Jesús zian, dxel beenchaawaman tijb duu persi babëëman gra reeman, con gra ree xgo'n reeman në ree xiil. Gutie'chaman xmilia ree bén ruchaa milia guin barexguiat tëëman xmex reeman. <sup>16</sup> Dxel rëbaman loj ree bén cuto' palom:

—¡Gol babëë reeb guie! ¡Ad rüjnnëdi lidx da Dadan zi'c luguia'!

<sup>17</sup> Dxel basaaladx ree xbejnman ni ca loj xtiidx Dios lod rëb: “Dád ralenan ruguian ni rüjn reeman lidxil.”

<sup>18</sup> Zianz rëb ree bén Israel lojman:

—¿Xhie milagr gulüül du lojn din yayagbeen guial rajpil guialrniabee güünl zian?

<sup>19</sup> Badxi' Jesús laan rëbaman:

—Gol base'n yadoo guie, naj yayün laan loj choon dxejzi.

<sup>20</sup> Dxel rëb ree bén Israel guin lojman:

—Tiuubixho'p ijz goglaa reeman been reeman yadoo guie, ¿güiáad lüj ya yayüjnlan choon dxejzi?

<sup>21</sup> Per Jesús xcuerp gajcaman ruza'taman chi ruza'taman yadoo guin. <sup>22</sup> Zeel chi babanman loj ree bengüt, basaaladx ree xbejnman ni rëbaman, abi' bililadx reeman xtiidxaman bililadx tëë reeman ni ca loj xtiidx Dios.

*Jesús nünbee xixgab gra bejn*

<sup>23</sup> Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman. <sup>24</sup> Per laaman ad rëbtaman loj reeman chu najman, din laaman nünbee chaaw xhienaag naj xixgab reeman. <sup>25</sup> Ad biaadxtaman chu niëjb lojman xhienaag naj bejn, din laaman ragbee chaaw xhienaag naj xixgab tijbgaj bejn.

## 3

*Bigneenë Nicodemo Jesús*

<sup>1</sup> Guyu tijb bénfarisew brii lajman Nicodemo, gojcaman tijb guxtis loj ree bén Israel. <sup>2</sup> Abi' wejman bignajman Jesús tijb guxhin, dxel rëbaman lojman:

—Mextr, rayagbeen guial Dios guxhaal lüj din gulüül dunujn, din achutczi zajc güün lasa' ree milagr ni rüjnl bal id za'në Dios laaman.

<sup>3</sup> Dxel rëb Jesús:

—Diidxiczi rnin lüj, bén ad zajlt stijb, ad zajct guguaaaman xguialrniabee Dios.

<sup>4</sup> Abi' rëb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lën xnuaaman ya abi' galaman stijb?

<sup>5</sup> Badxi' Jesús laan rëbaman:

—Diidxiczi rnin, bén ad riobnijst ad nabannë tëetaman xSprijt Dios ad zile't yayuman loj xguialrniabee Dios. <sup>6</sup> Bén naban zi'c naj xixgabaman, lojzi guidxliuj guie rajpaman guialnaban, per bén nabannë xSprijt Dios, por Sprijt guin rajpaman stijb guialnaban. <sup>7</sup> Ad bal radxa lojl guial rnin: “Rüjn naguiejn gal bejn stijb.” <sup>8</sup> Din zi'c rbi' bi gralad abi' majsi rigujnl chi rbi'n, per ni'quid ragbeetil ban zëedan o ban zën. Ziangajc naj xSprijt Dios con gra ree bén nabannë laaman.

<sup>9</sup> Dxel rëb Nicodemo lojman:

—¿Xhienaag rajc zian?

<sup>10</sup> Badxi' Jesúsán rëbaman:

—¿Lüj, naj mextr loj ree bén Israel, ad rignia'til gra ree ni guin ya? <sup>11</sup> Diidxiczi rnin lojl, raneen ni rayagbeen ni baguiaa tëen, per lëjt ad rliladxtidi ni ranan. <sup>12</sup> Bal id rliladxidi chi rnin xcwent ree ni loj guidxliuj guie, ¿xhienaag chililadxidi bal ganin xcwent ree ni xanyabaa?

<sup>13</sup> Achut wayej xanyabaa, tijbzi bén biguiat diizd xanyabaa, Bén guxhaal Dios loj guidxliuj. <sup>14</sup> Abi' zi'c bacaa Moisejs bëel guiib loj yag niz loj yujbidx, ziangajc Bén guxhaal Dios loj guidxliuj, gucaa reeman laaman loj crüjz, <sup>15</sup> din gra bén chililadx laaman ad zanijt reeman loj Dios, gap reeman guialnaban tiblyaaa con laaman.

*Rën Dios bejn*

<sup>16</sup> Guial tant rën Dios bénguidxliuj, majsi tijbzi xi'nman, per guxhaalaman laaman loj guidxliuj, din graczi bén chililadx laaman ad zanijt reeman loj Dios, gap reeman guialnaban tiblyaaa con laaman. <sup>17</sup> Din Dios ad guxhaalt xi'nman loj guidxliuj din gudëedaman bejn casti, guxhaalaman laaman din gap ree bejn perdon loj Dios.



18 'Bén rliadx Xi'n Dios ad rayaltaman xcasti Dios. Per bén ad rliadx, laaman ma rayal casti guial ad rliadx-taman Xi'n Dios, bén naj tijbzi xi'nman. 19 Bén ad rliadx ree rayal reeman casti, din yan ni bi't bén naj xbajl Dios, mazri bayuladx reeman nejz mal, guial rüjn reeman ganax ni mal. 20 Graczi ree bén rüjn ni mal ad ruladxtczi reeman bajl guin, ad rbigt reeman lojn, chitëë guiguien ni mal cayüjn reeman. 21 Per ree bén naban zi'c rayal loj Dios, laa reeman rbig loj xbajlaman din guiguien guial graczi ni cayüjn reeman naj ni rën Dios.

### *Waj bén baroobnijs ruza'taman Jesús stijb*

22 Chi gudëd gojc zian, Jesús con ree xbejnman wej reeman niz Judea, lod guzunëman laa reeman tio'p choon dxej, ni baroobnijs reeman bejn ree. 23 Nëgajc Waj curoobnijs bejn ree luguiedx la Enón, ni riga' gajx guiedx Salim, guial yu' zil nijs ni. Abi' rej ree bejn persi rirobnijs reeman. 24 Laan goc chi gad Waj chu' ladxguiib.

25 Per bëlzi ree xbejn Waj, con za tio'p choon gajc ree bén Israel guzuloj cadildiidx reeman por xcostumbr reeman guial xhienaag gac reeman naya. 26 Dxel biguiedx reeman loj Waj:

—Mextr, bén guzunël stiblad ro' guiw Jordán, bén bel xtiidx du lojn, në laaman curoobnijs bejn ree abi' gra reeman zinal laaman.

27 Badxi' Waj laan rëbaman:

—Achut zajc gap gualrniabee bal id Dios gudëë laan. 28 Lëjt ragbee guial biguiejndi rën guial ad najtan naj Cristo, naj guneed lojman zidgagojnan por laaman. 29 Dunuj ree rayagbee guial loj gualruxhliaa, xin za'në biingunaa guin, laaxan cuxhliaa, guiáad xmiwix xin za' con laax rabaanë da'tix laax chi riguijnx rnieex. Ziangajc naj dád rabaanë'n laaman. 30 Abi' laaman gusnuu gacaman mazri bén zojbloj, guiáad naj gusnuu gacan bén ad lasajct guial lojman.

### *Bén zëëd xanyabaa*

31 'Din bén zëëd diizd xanyabaa, laaman naj bén rniabee loj gra. Per bénguidxliuj, bénguidxliujzi najman abi' ganax ni yu' loj guidxliuj ruza'taman. Per Bén zëëd diizd xanyabaa laaman rniabee gra, 32 abi' rüman ni ma baguiaaman ni ma biguiejn tëëman, per achut rliadx ni rnieeman. 33 Bal yu' bén rliadx xtiidxaman, zian rguien guial ni diidxli naj xtiidx Dios. 34 Abi' bén zëëd por Dios, laaman rü xtiidx Dios guial guidiblagaa badëëd Dios xSprijtaman lojman. 35 Dios rën Xi'nman abi' basa'nman gra lojman. 36 Abi' chutëëz bén rliadx Xi'nman, laaman rajp gualnaban tiblayaa loj Dios. Per bén ad rtiëjbt

chililadx, ad rajptaman guialnaban guin, laaman rayal xcasti Dios.

## 4

### *Jesús con béngunaa Samaria*

<sup>1</sup> Gogbee ree bénfarisew guial mazri zien bejn ma zinal Dad Jesús mazri zien tëë bejn ruroobnijsaman guial loj Waj, <sup>2</sup> majsi diidxliczi ad Jesústan ruroobnijs bejn ree, bén naj ree xbejnman ruroobnijs. <sup>3</sup> Chi gogbeeman zian dxel briiman niz Judea zëman niz Galilea stijb.

<sup>4</sup> Per chi zëman niz Galilea been naguiejn gudëdaman niz Samaria. <sup>5</sup> Abi' bidxinman tijb guiedx la Sicar, ni nulen Samaria, gajxh lod naga' yuj ni badëë Jacob loj xi'nman Xiëb. <sup>6</sup> Yagaj naj tijb bizëduu rniee reeman laan xbizë Jacob. Abi' guial ma badxag Jesús cazaman, dxel gurejman ro' bizë guin. Ma zidyob garol dxej. <sup>7-8</sup> Guiáad ree xbejnman zë reeman luguiedx guin zisii ni gaw reeman. Hor guin bidxin tijb béngunaa Samaria ro' bizë guin din tia'man nijs, dxel rëb Jesús lojman:

—Bazaladx ta'n xnijsil guië'n.

<sup>9</sup> Per guial ad rnieenët lasa' ree bén Israel zagdxe con ree bén Samaria, badxi' béngunaa guinan rëbaman:

—¿Chexquiza zeel rniabil nijs lon najl bén Israel awa bén Samaria naj?

(Din bén Israel ree ad rnieenët reeman bén Samaria ree zagdxe.) <sup>10</sup> Badxi' Jesús laan rëbaman:

—Bal zian ragbeel ni rën Dios guneeman lüj, chutëë bénan canab nijs lojl, zanabil nijs lon abi' naj zunen nijs runee guialnaban.

<sup>11</sup> Dxel rëb béngunaa guin loj Jesús:

—Dad, ni'quid ca'til ni cwëenël nijs, abi' bizë guin dád naxhitan. ¿Ban chica'l nijs runee guialnaban? <sup>12</sup> Dux béngulalan Jacob basa'nnë dunujn bizë guie, lod gu'man nijs con ree xi'nman con ree xbegui'xhaman. ¿Wen mazri najl guial lojman ya?

<sup>13</sup> Badxi' Jesús laan rëbaman:

—Graczi ree bén rë' nijs guie re'c reeman nijs stijb. <sup>14</sup> Per bén guië' nijs gudëdan, ad yu'tri dxej che'caman nijs. Din nijs gudëdan gacan luxdooman zi'c lod ad rbëzt rajch nijs, abi' nijs guin gudëë guialnaban tiblayaa.

<sup>15</sup> Dxel rëb béngunaa guin lojman:

—Dad, banee nijs guin lon, chitëë che'cran nijs ad zial tëëtran guidca'n nijs guie.

<sup>16</sup> Rëb Jesús lojman:

—Bignee lacheelil, dxel yaguaaadil guie.

17 Badxi' béngunaa guinan rëbaman:

—Achut da bénguiaawan yu'.

Dxel rëb Jesús:

—Waliquil achut lacheelil yu', 18 din ma gojc gaay xinguaaw rtia' lüj, abi' yan xin zojbnël ad lacheeltan. Zeel waliqui ni nal.

19 Chi biguiejnman ni rëb Jesús, dxel rëbaman:

—Dad, ma ragbeen guial lüj naj Bén rudëë xtiidx Dios loj ree bejn. 20 Dux béngulalan gunajchi' reeman Dios ruguia' guie, per lëjt najdi Bén Israel rëbidi guial Jerusalén naj lod guiniajchi' bejn laaman.

21 Badxi' Jesúsán rëbaman:

—Na, zagdxe rnin guial guidxin dxej guiniajchi'di dux Dad ree Dios, ad zi'ttridi ruguia' guie ad zej tëtëtridi Jerusalén.

22 Lëjt ni'quid ragbeetidi chunin rniajchi'di, per dunujn rayagbeen chunin ranajchi'n, din loj ree Bén Israel grii Bén güün bejn ree perdon. 23 Abi' ma bidxin dxej ni gra ree Bén diidxli rniajchi' Dios, guiniajchi' reeman laaman zi'c rayal por xSprijtaman. Din zian rën dux Dad ree Dios güün ree Bén rniajchi' laaman. 24 Dios naj Sprijt, abi' Bén rniajchi' ree laaman rayal guiniajchi' reeman laaman con guidib luxdoo reeman por xSprijtaman.

25 Dxel rëb béngunaa guin lojman:

—Naj ragbee gui't Bén naj Mesías, Bén la gajc, Cristo. Abi' chi gui'taman, laaman gusignia' dunuj ree gran.

26 Abi' rëb Jesús:

—Najn naj Bén zii, laaman caneenë lüj.

27 Loj hor guin badxin ree xbejn Jesús, abi' dád badxaloj reeman guial cayünëman tijb béngunaa diidx. Per ni'qui tijb reeman ad gunabdiidx lojman xhie rënman o xhie diidxan cayü reeman. 28 Guiáad béngunaa guin basa'n xreman ro' bizë guin, dxel ziaman luguiedx guin, abi' rëbaman loj ree bejn:

29 —Gol taquiaa tijb Bén ma na graczi ni ma benan. ¿Nid laaman naj Cristo ya?

30 Dxel brii reeman luguiedx guin zë reeman lod za' Jesús.

31 Per la'tgaj zia béngunaa guin luguiedx guin, rëb ree xbejn Jesús lojman:

—Mextr, gudaw.

32 Per rëbaman loj reeman:

—Laa da guialrawan yu', ni ad nünbeetidi.

33 Dxel guzuloj canabdiidx loj lasa' reeman rëb reeman:

—¿Ni yu' chu bidnë ni gudawaman ya'n?

34 Dxel rëb Jesús loj reeman:

—Da guialrawan naj günan zi'c rën Dios, Bén guxhaal naj abi' guloox günan ni naman. 35 Lëjt rëb: “Ryaadx zatajp bëëw

din gac ni yu' loj guiniaa.” Per naj rni lëjt: Gol gules lojdi, gol baguiaa loj ree guiniaa, ma naj reen din yado'p reen.  
<sup>36</sup> Abi' bën rato'p loj guiniaa guin, rtia'man ni rayalaman por dxiin ni rünman. Guiáad ni rato'paman naj par lod yu' guialnaban tiblyaa. Dxel zi'c bën rxübin zi'c bën rato'p, rabaa reeman tiblojzi. <sup>37</sup> Waliqui ni rëb ree bejn: “Ben ren rxübin, ben ren rato'p guialnaza'c.” <sup>38</sup> Naj guxhal lëjt din chigto'pidi guialnaza'c lod ad beentidi dxiin. Ben ren ree been dxiin, guiáad lëjt gaz bigto'pidi guialnaza'c lod ad beentidi dxiin.

<sup>39</sup> Zien ree bën Samaria bililadx Jesús guial be béngunaa guin diidx loj reeman rëbaman: “Ma gunaman graczi ni benan.”  
<sup>40</sup> Zeel chi bidxin reeman lod za' Jesús, guzajc reeman laaman liaadx din yaya'nnëman laa reeman. Dxel baya'nnëman laa reeman tio'p dxej. <sup>41</sup> Abi' mazri zien reeman bililadx laaman chi biguiejn reeman ni rnieeman, <sup>42</sup> dxel rëb reeman loj béngunaa guin:

—Bajy yan ad por ni natzil raliduladxan laaman, nëgajc dunujn ma baguiejn ni rnieeman, abi' rayagbeen walican laaman naj Cristo, bën yabëë bénguidxliuj loj dol.

### *Bayüjn Jesús xi'n xbejn tijb rey*

<sup>43</sup> Chi goc tio'p dxej guin, baza Jesús niz Samaria abi' zëman niz Galilea, <sup>44</sup> majsi laagajcaman rëb guial ni'qui tijb bën rudëë xtiidx Dios loj ree bejn ad rajpt reeman laaman respejt ladx gajcaman. <sup>45</sup> Per chi badxinman niz Galilea, bën niz ni ree baca' reeman laaman zagdxe. Din në laa reeman wej lanij pascw Jerusalén, abi' baguiaa reeman gra ni beenman ni. <sup>46</sup> Chi za'man niz ni wejman Caná stijb, lod bayüjnman nijs vin. Abi' luguiedx Capernaum guyu tijb xbejn rey ragxuu xi'nman. <sup>47</sup> Chi gogbee bën guin baza Jesús niz Judea badxinman niz Galilea, wejman lod za' Jesús bisajcaman laaman liaadx din cheman yayüjnman xi'nman guial zamer guiëtix.  
<sup>48</sup> Abi' rëb Jesús lojman:

—Lëjt, bal id zuguaadi xhie ree sen o milagr ree, ad zaliladxtidi.

<sup>49</sup> Per rëb bën guin:

—Dad, yo' yan gajc, naga gad da xi'nan guiët.

<sup>50</sup> Dxel rëb Jesús lojman:

—Baguij lidxil, ma bayajc xi'nl.

Bililadx bën guin ni rëb Jesús, abi' zia lidxaman. <sup>51</sup> La'tgaj ziaman, bigchaagloj ree xmojsaman laaman, abi' rëb reeman:

—Ma bayajc xi'nl.

<sup>52</sup> Dxel gunabdiidxaman loj reeman, rëbaman:

—¿Xhie hor guzuloj banaa da xi'nan?

Abi' rëb reeman lojman:

—Nieey cost raca tijb wadxe bariix xliaa.

<sup>53</sup> Dxel basaaladx b́en guin guial hor ziin rēb Jesús lojman: “Ma bayajc xi'nl.” Abi' laaman nē gra b́en zojb lidxaman bililadx reeman Jesús. <sup>54</sup> Ni ne naj milagr barojp ni been Jesús niz Galilea chi bazaman niz Judea.

## 5

### *Bayüjn Jesús tijb b́en ad rajct rza*

<sup>1</sup> Chi gudēd gojc zian, guyu tijb xlanij ree b́en Israel, abi' wej Jesús Jerusalén. <sup>2</sup> Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran. <sup>3</sup> Yagaj riga' zien ree b́enragxuu, zi'c ree b́enlutia'p, nē ree bencoj con ree b́en ad rajctczi rza, cabēz reeman guiniib nijs yu' lēn tanc guin. <sup>4</sup> Din gocli goc rguiajt tijb xianjl Dios runiibaman nijs guin, abi' b́en ru lojnijs guin yaloj chi caniiban, rayajcaman xhietēēz guialguijdxan rajcaman. <sup>5</sup> Dxel loj ree b́en guin no'ch tijb bejn, ma gojc zi'ctiubichoon ijz ragxuuman. <sup>6</sup> Chi baguiaa Jesús laaman naga'man yagaj, abi' gogbeeman guial gocli ragxuuman dxel gunabdiidxaman lojman rēbaman:

—¿Rēnl ya yayajquil?

<sup>7</sup> Badxi' b́enragxuu guinan rēbaman:

—Dad, achut ra'pan gudxe' naj loj nijs guin chi riniiban. Beegaj chi rēnan gayu'n, yalojl ben ren ru.

<sup>8</sup> Dxel rēb Jesús lojman:

—Bixche, baca' ni naal loj, baguiaj.

<sup>9</sup> Loj hor guin gajc bayajc b́en guin, baca' ni naaman loj abi' guzuloj cazaman. Per guial dxej zii naj dxej raziiladx ree b́en Israel, <sup>10</sup> zianz b́en Israel zinal ree ley rēb reeman loj b́en bayajc guin:

—Yandxej naj dxej raziiladx bejn, ad zajct yaca' ni go'til loj.

<sup>11</sup> Badxi' b́en guinan rēbaman:

—B́en bayüjn naj naman: “Baca' ni naal loj, baguiaj.”

<sup>12</sup> Dxel gunabdiidx reeman lojman rēb reeman:

—¿Chu na lojl: “Baca' ni naal loj, baguiaj”?

<sup>13</sup> Per b́en guin ad ragbeetaman chunin bayüjn laaman guial bi'ch Jesús loj ree benzien riga' yagaj. <sup>14</sup> Chi badxaag Jesús laaman lēn yadooro' Jerusalén, abi' rēbaman lojman:

—Baguiaa ma bayajquil, ad güünril dol chitēē gaquil mazri guial loj ni goquil.

<sup>15</sup> Dxel zia b́en guin abi' biguiedxaman loj ree b́en Israel guial Jesús naj b́en bayüjn laaman. <sup>16</sup> Zeel guzunal reeman Jesús din gugüjt reeman laaman, guial rüjnman milagr guin ree dxej raziiladx bejn. <sup>17</sup> Per rēb Jesús loj reeman:

—Da Dadan Dios ad rbëzt rüjnman ni rayal güünman, zeel nëgajc naj rün zi'c rüjnman.

<sup>18</sup> Zianan zeel mazri rejs guzuj reeman din gugüjt reeman laaman, ad guialzi rüjntaman ni ad najt gac dxej raziiladx bejn, në guial rüjn laagajcaman zi'c Dios chi rnieeman guial quijb xDadaman naj Dios.

### *Xguialrniabee Xi'n Dios*

<sup>19</sup> Rëb Jesús loj reeman:

—Diidxliczi rnin, achet zajc güün Xi'n Dios por xixgabzaman, rüjnman ni ruguiaaman rüjn xDadaman. Din graczi ni rüjnman rüjn gajc xi'nman. <sup>20</sup> Din Dios rën xi'nman abi' rulüüman laaman gra ree ni rüjnman. Abi' mazri naj ni gulüü loj xi'nman ni yadxa da't lojdi. <sup>21</sup> Din zi'c rasban Dios bengüt ree rudëë tëëman guialnaban loj reeman, ziangajc rudëë xi'nman guialnaban loj ree bën nüjnman xgab. <sup>22</sup> Abi' ad Diost rüjn guialguxtis, bazuj xi'nman din güünman guialguxtis, <sup>23</sup> din gap gra ree bejn xi'nman respejt zi'cgajc rajp reeman laaman respejt. Bën ad rajpt Xi'n Dios respejt, ad rajp gajctaman respejt xDadaman Dios, bën guxhaal laaman.

<sup>24</sup> 'Diidxliczi rnin: Bën ruzoob da diidxan rliladx tëëman Dios, bën guxhaal naj, laaman ma rajp guialnaban tiblayaa lojman. Abi' ad rayaltraman casti din ad najtraman zi'c bengüt par Dios, rajpaman guialnaban lojman. <sup>25</sup> Diidxliczi rnin ma bidxin hor, abi' yandxej gajcan, bën naj ree zi'c bengüt loj Dios gucaagdiajg reeman cha' xi'nman. Abi' ree bën guzoob xtiidxaman zajp reeman guialnaban tiblayaa con Dios. <sup>26</sup> Din zi'c rajp Dios guialnaban, lasa'gajc guialnaban guin ma badëë loj xi'nman, <sup>27</sup> abi' badëëman guialrniabee lojman din güünman guialguxtis, din laaman naj Bën guxhaal Dios loj guidxliuj. <sup>28</sup> Ad bal radxa lojdi ni rnin, din zadxin dxej guien gra ree bengüt cha' Xi'n Dios, <sup>29</sup> abi' yarii reeman lën baa. Dxel bën been ree ni ruladx Dios, yaban reeman, din gap reeman guialnaban tiblayaa con laaman. Guiáad ree bën been ni mal, yaban reeman din yayal reeman casti ni rayal reeman.

### *Ni rulüü guialrniabee rajp Jesús*

<sup>30</sup> 'Achet zajc güünan por da xgabzan, rünan guialguxtis zi'c rniabee da Dadan. Abi' rünan guialguxtis zi'c rayal, din ad rüntanan zi'c naj da xgaban, rünanan zi'c rën da Dadan bën guxhaal naj. <sup>31</sup> Bal gü da diidx gajcan, achet lasajcan. <sup>32</sup> Per yu' ben ren rü da diidxan, abi' ragbeechaawan guial diidxlin. <sup>33</sup> Lëjt guxhaal bën bignabdiidx ree loj Waj, abi' laaman ganax ni diidxli gunaman. <sup>34</sup> Majsı ad ryaadxt yadxi'n ni gunee ree bejn por naj, per canin lojdi ni guna Waj din chililadxidi gap tëëdi perdon. <sup>35</sup> Waj goc zi'cgajczi tijb bajl

ni re'c abi' rusnin, guiáad lëjt dád babaadi bidxga'di tijb tiamp ni balüüman lëjt. <sup>36</sup> Per naj mazri naj ni gulün lëjt guial loj ni balüü Waj lëjt por naj. Din ni na da Dadan Dios günan, laanan cayünan yan din guiguien guial diidxli laaman guxhaal naj. <sup>37</sup> Nè da Dadan bën guxhaal naj, laagajcaman be da diidxan, majsi ad waguiejtidi cha'man ad waguiaa tēetidi laaman. <sup>38</sup> Ad yu'guijc tēetidi xtiidxaman zeel ad rliladxtidi bën guxhaalaman. <sup>39</sup> Lëjt con cudad da't roolidi loj xtiidx Dios, guial ragbeedi con laan gapidi guialnaban tiblayaa con Dios. Abi' majsi loj xtiidx gajcaman ruza't naj, <sup>40</sup> per ad rēntidi chililadxidi naj din gapidi guialnaban guin.

<sup>41</sup> 'Naj ad raguiltan guilies ree bejn da valoran. <sup>42</sup> Abi' ragbeechaawan guial ad walit rēndi Dios. <sup>43</sup> Naj zial por da Dadan abi' ad ridxga'tidi naj. Per bal stijb bejn gui't por laagajcaman, laaman guidxga'di. <sup>44</sup> ¿Xoza chililadxidi naj? Awa mazri naguiejn rüjndi guilies ree bejn xvaloridi luar yaya'ndi zagdxē loj bën naj tijbzi Dios. <sup>45</sup> Ad bal naladxidi naj gabec xguialquiadi loj Dios, din bën cwe'c xguialquiadi naj Moisejs, bën rbēzidi güün lëjt yudar. <sup>46</sup> Bal bililadxidi ni rēb Moisejs, nè naj zaliladxidi, din Moisejs bacaa loj xtiidx Dios lod ruza't naj. <sup>47</sup> Per bal id rliladxidi ni bacaaman, ¿xoza chililadxidi ni rnin lëjt?

## 6

### *Bayaan Jesús gaay mil bejn*

(Mt. 14:13-21; Mr. 6:30-44; Lc. 9:10-17)

<sup>1</sup> Chi gudēd gojc zian, dxel zē Jesús stiblad ro'nijsdoo riga' niz Galilea, nijsdoo la gajc Tiberias. <sup>2</sup> Bénguixiuj binal laaman, guial ruguiaa reeman milagr ree ni rüjnman rayüjnman bēnragxuu ree. <sup>3</sup> Dxel wē'paman tijb ruguia' abi' gurenē ree xbejnman. <sup>4</sup> Dxejzii ree ma zidyob pascw, xlanij ree bën Israel. <sup>5</sup> Chi gules loj Jesús, abi' baguiaaman zēēd ree bénguixiuj lod za'man, dxel rēbaman loj Felip:

—¿Ban yusii ree ni gaw gra ree bën guin?

<sup>6</sup> Per rēbzaman zian din guidoon xhie guiēb Felip, din Jesús mal ragbeeman xhie güünman. <sup>7</sup> Dxel badxi' Felipan rēbaman:

—Ni'qui ni rüjn bejn gan loj xhujn bēēw ad zadaant yo' guiadxtil din gaw tijbgaj reeman majsi tibia'dogajzan.

<sup>8</sup> Dxel gunee stijb xbejn Jesús, bën la Andrejs bijch Simón Bēd, rēbaman:

<sup>9</sup> —Laa tijb xindo ca' gaay guiadxtil con zatio'p bējl za' guie. Per, ¿tē'czi taan ni guin par gra bën guin?

<sup>10</sup> Dxel rēb Jesús:

—Gol güjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xinguaaw. <sup>11</sup> Dxel cwa' Jesús guiadxtil guin ree. Chi gulox badëëman quixtëë loj Dios, badëëman laa reen loj ree xbejnman persi gudi's reeman laa reen loj gra ree bén zobj yagaj. Ziangajc beenman con ree bëjl guin, badëëman laa reen zi'tctzi guyën reeman. <sup>12</sup> Chi ma bixienladx reeman, dxel rëbaman loj ree xbejnman:

—Gol bato'p gra ree ni laay baya'n, chitëë xhie guizëëb.

<sup>13</sup> Zianz bato'p reeman laa reen, abi' bacha reeman chip-tio'p dxüm nilaay baya'n ree loj gaay guiadxtil guin. <sup>14</sup> Chi baguiaa ree bejn milagr narooob ni been Jesús, rëb reeman:

—Walican bén guin naj bén rudëë xtiidx Dios loj ree bejn, bén naj gui't loj guidxliuj.

<sup>15</sup> Per gogbee Jesús guial rën reeman chinë naguiejn reeman laaman din güün reeman laaman rey, dxel bazaman yagaj, wë'paman mazri ladya guiyc guia' guin, lod su xtijbaman.

### *Rza Jesús lonijsdoo*

(Mt. 14:22-27; Mr. 6:45-52)

<sup>16</sup> Chi ma cabej guiaal, biguiajt ree xbejn Jesús ro'nijsdoo, <sup>17</sup> guyu reeman loj tijb barcw, abi' cadëd reeman loj nijs guin din guidxin reeman Capernaum. Ma bicajy, guiáad Jesús gadaman yadxin. <sup>18</sup> Dxel guzuloj cabi' bidoxh abi' wajs xtüjp nijs guin. <sup>19</sup> Chi ma gojc zi'c gaay o xho'p kilometro zë reeman, baguiaa reeman caza Jesús lojnijs guin cabigaman lod zë barcw guin, dád bidxeb reeman. <sup>20</sup> Per rëbaman loj reeman:

—¡Najn, ad rdxebidi!

<sup>21</sup> Dxel guyën reeman niuman loj barcw guin, per hor guin gajc bidxin reeman lod zë reeman.

### *Bigdiil ree bén bayaan Jesús laaman*

<sup>22</sup> Chi bareguiaal, bén riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zë ree xbejn Jesús per ad nët laaman. <sup>23</sup> Loj hor zii bidxin ree barcw ren za guiedx Tiberias, gajxh lod gudaw reeman guiadxtil chi gulox badëëd Jesús quixtëë loj Dios. <sup>24</sup> Chi baguiaa reeman achutri Jesús za' yagaj ni'qui ree xbejnman, dxel wë'p reeman loj ree barcw guin, zë reeman Capernaum zigdiil reeman laaman.

### *Jesús naj bén rudëëd guialnaban*

<sup>25</sup> Chi bidxin reeman Capernaum, badxejl reeman Jesús, abi' gunabdiidx reeman lojman, rëb reeman:

—Mextr, ¿goc bi'til guie?

<sup>26</sup> Badxi' Jesúsán rëbaman:

—Ragbeechaawan, raguilidi naj guial gudawidi xt bigdxinladxidi, ad guial baguiaatidi milagr ree ni rünan. <sup>27</sup> Ad



chu'di xgab guialraw rara, gol guyu xgab guialraw runee guialnaban tiblayaa con Dios. Din laan naj ni runee Bén guxhaal Dios loj guidxliuj guial ma bacaabee Dios laaman.

<sup>28</sup> Dxel gunabdiidx reeman lojman rëb reeman:

—¿Xhie rayal yaguieenan din chile' yaguieenan ni rën Dios?

<sup>29</sup> Badxi' Jesús laan rëbaman:

—Ni rën Dios güündi naj guial chililadxidi bén guxhaalaman loj guidxliuj.

<sup>30</sup> Dxel rëb reeman lojman:

—¿Xhie guluül dunujn din yaliduladxan lüj? ¿Xhietëe ree milagr rüjnl? <sup>31</sup> Dux béngulal ree gudaw reeman mana chi guzu reeman niz loj yujbidx, zi'c rëb loj xtiidx Dios: “Badëeman guiadxtil biajx xanyabaa loj reeman gudaw reeman.”

<sup>32</sup> Badxi' Jesús laan rëbaman:

—Naj rni lojdi: Ad Moisejst badëed guiadxtil guin, da Dadan naj bén runee quijb guiadxtil za xanyabaa. <sup>33</sup> Guiadxtil runee Dios, laan bi't diizd xanyabaa abi' runeen guialnaban loj bénguidxliuj.

<sup>34</sup> Abi' rëb reeman lojman:

—Dad, banee guiadxtil guin du lojn zianczi.

<sup>35</sup> Rëb Jesús loj reeman:

—Naj naj guiadxtil runee guialnaban guin. Bén gui't lon, ad yu't dxej guiliaanman, ziangajc bén chililadx naj, ad yu't dxej che'caman nijs. <sup>36</sup> Per zi'c rnin lojdi, majsi ma baguiaadi naj, ad riladxtidi naj. <sup>37</sup> Gra ree bén ma banee da Dadan lon, gui't reeman lon, abi' bén gui't lon, ad zasiejctan laaman. <sup>38</sup> Din naj zial diizd xanyabaa, zidgaguienan zi'c rën da Dadan bén guxhaal naj, ad par güntan zi'c rënan. <sup>39</sup> Da Dadan bén guxhaal naj, ni rënman naj guial gra ree bén baneeman lon ni'qui tijb reeman ad zunijttan, rënman yasbanan laa reeman chi nit guidxliuj. <sup>40</sup> Din rënman guial gra ree bén yayagbee Xi'nman chililadx tëe reeman laaman, gap reeman guialnaban tiblayaa con laaman, guiáad naj yasban laa reeman chi nit guidxliuj.

<sup>41</sup> Dxel guzuloj ree bén Israel caneeguijdx reeman Jesús, guial rëbaman: “Naj naj guiadxtil ni biguiajt diizd xanyabaa.”

<sup>42</sup> Abi' rëb reeman:

—¿Nid laaxan naj Jesús ya, xi'n Xiëb? Dunuj ree naguieenbee xdadix con xniaax. Yan, ¿chexc zeel nax xanyabaa biguiajtix?

<sup>43</sup> Dxel rëb Jesús:

—Gol bacwëez rnieeguijdxidi naj loj lasa'di. <sup>44</sup> Dios naj bén guxhaal naj. Achut zile' gui't lon bal id zëedaman por da Dadan, abi' naj yasban laaman chi nit guidxliuj. <sup>45</sup> Loj ree

libr ni bacaa ree bén badëë xtiidx Dios loj ree bejn, rëb: “Dios gulüü gra ree bejn.” Zeel gra ree bén rucaagdiajg xtiidxaman, rusiid tää reeman ni rulüüman laa reeman, laa reeman zëed lon.

<sup>46</sup> 'Achutczi waguiaa da Dadan Dios, tijbzi bén guxhaalaman loj guidxliuj ma baguiaa laaman. <sup>47</sup> Diidxliczi rnin, bén rililadx naj rajpaman guialnaban tiblayaa con Dios. <sup>48</sup> Naj naj guidxtil ni runee guialnaban. <sup>49</sup> Xbéngulalidi gudaw mana loj yujbidx, per ni'czi zian güjt gajc reeman. <sup>50</sup> Per naj canin lojdi xcwent guidxtil za xanyabaa, bén gaw laan gapaman guialnaban tiblayaa con Dios. <sup>51</sup> Naj naj guidxtil naban ni biyajb diizd xanyabaa. Bén gaw guidxtil guie zajpaman guialnaban tiblayaa con Dios. Guidxtil ni rudëdan, laan naj quijb da cuerpan, gudëdanan din gap ree bénguidxliuj guialnaban.

<sup>52</sup> Dxel guzuloj ree bén Israel guin cadildiidx reeman, rëb reeman:

—¿Xhienaag gunee xin guin xcuerpix yadaaw ree?

<sup>53</sup> Abi' rëb Jesús loj reeman:

—Naj rni lëjt, bal id zajwidi xcuerp Bén guxhaal Dios, bal id zë' täädi xrejnman, ad zajptidi guialnaban. <sup>54</sup> Per bén gaw da cuerpan guië' tääman da rejnan, zajpaman guialnaban tiblayaa con Dios, abi' naj yasban laaman chi nit guidxliuj. <sup>55</sup> Din da cuerpan naj quijb guialraw, guiáad da rejnan naj quijb ni guië' bejn. <sup>56</sup> Abi' bén raw da cuerpan rë' tääman da rejnan, laaman nabannë naj, guiáad naj nabannë' laaman. <sup>57</sup> Da Dadan bén guxhaal naj, rajpaman guialnaban, abi' naj naban por laaman. Ziangajc bén gaw da cuerpan, zajpaman guialnaban tiblayaa con Dios por naj. <sup>58</sup> Naj cani xcwent guidxtil ni biguiajt xanyabaa. Abi' guidxtil guie ad najtan zi'c naj mana ni gudaw xbéngulalidi, din laa reeman majsi gudaw reeman mana guin, per güjt gajc reeman. Guiáad bén gaw guidxtil guie zajpaman guialnaban tiblayaa con Dios.

<sup>59</sup> Zian balüü Jesús bejn ree lën yadoo Capernaum.

### *Diidx runee guialnaban tiblayaa*

<sup>60</sup> Chi gulox bacaagdiajg reeman ni balüü Jesús laa reeman, zien ree bén zinal laaman rëb:

—Nawëëg da't naj yayignia' ree ni naman. ¿Chu zajc guidxga' laaman?

<sup>61</sup> Chi gogbee Jesús ni canee reeman, gunabdiidxaman loj reeman, rëbaman:

—¿Rüjnnaa ni rnin lëjt ya? <sup>62</sup> ¿Xhieza güüнди bal guguiaadi Bén guxhaal Dios yayë'paman lod guzuman gocli? <sup>63</sup> Tijbzi por xSprijt Dios rajp bejn guialnaban tiblayaa, bejn ad zile't güün laazaman xhienin. Abi' naj por xSprijt Dios zëed ree

diidx ni gunen lojdi, por ree diidx guin rajp bejn guialnaban.  
<sup>64</sup> Per lëjt yu'di ad waliladxt.

Rëb Jesús zian guial ragbeechaawaman diizd yaløj chu ree ad rliladxt laaman chu tée yayü laaman. <sup>65</sup> Rëb tēman loj reeman:

—Zeel ma rnin lojdi guial achut zile' gui't lon bal id zēedaman por da Dadan Dios.

<sup>66</sup> Diizd nadxel, zien ree bēn zinal Jesús guro'nladx laaman, abi' ad guzanētri reeman laaman. <sup>67</sup> Dxel rëb Jesús loj guidx-iptio'p ree xbejnman:

—¿Në lëjt rēn yaguaiaj ya?

<sup>68</sup> Per badxi' Simón Bēd laan, rëbaman:

—Dad, ¿chu loj yo'n? Awa xtiidxil zidnē guialnaban tiblyaa con Dios. <sup>69</sup> Dunujn ma baliduladx rayagbee tēn guial lūj naj Cristo, Xi'n Dios naban.

<sup>70</sup> Dxel rëb Jesús loj reeman:

—¿Nid naj gule guidxiptio'pιδi ya? Abi' yan tijb gajqui lëjt naj zi'c xindxab.

<sup>71</sup> Rëb Jesús zian por Judas Iscariote, xi'n Simón, din Judas guin naj bēn bayü laaman, majsi tijb gajc xbejnman najman.

## 7

### *Ad rliladxt ree bijch Jesús laaman*

<sup>1</sup> Chi gudēd gojc zian, wej Jesús loj ree guiedx riga' niz Galilea. Ad guyētaman niejman niz Judea, guial cayguiil ree bēn Judea guin laaman din gugūjt reeman laaman. <sup>2</sup> Per guial ma zidyob lanij ni rūjn ree bēn Israel, chi rbej reeman lēn ranch, <sup>3</sup> rëb ree bijch Jesús lojman:

—Brii, wej niz Judea, din në ree xbejnl bēn riga' ree niz ni guguaiaa milagr rūjnl. <sup>4</sup> Din chi chu rēn gagbee bejn ni rūjnman, ad rayalt gūünman laan ralan. Yan zi'c rūjnl milagr ree, beenan loj gra ree bejn.

<sup>5</sup> Gunee ree bijch Jesús zian, guial ni'qui laa reeman ad rliladxt laaman. <sup>6</sup> Dxel rëb Jesús loj reeman:

—Ad wadxint da horan, per par lëjt xhietēz horan naj zagdxē. <sup>7</sup> Ad zajct guidxē'ch bēnguidxliuj lëjt, sa'n naj rdxe'ch reeman naj guial rēn loj reeman ad laat naj ni rūjn reeman. <sup>8</sup> Gol wej lanij guin, sa'n naj ad zazaagajtan, din ad wadxint hor ni gazaan.

<sup>9</sup> Chi gulox rëbaman loj reeman zian, baya'nman Galilea.

### *Wej Jesús xlanij ree bēn Israel*

<sup>10</sup> Chi ma zē ree bijch Jesús, dxel nēman zē lanij guin, per ralanzi zēman chitēē chu gagbee. <sup>11</sup> Per yu' ree bēn Israel raguiil laaman loj lanij guin, rëb reeman:

—¿Con bēn guin ya'n?

<sup>12</sup> Loj gra ree benzien we lanij guin, zienloj ni rniee reeman Jesús. Yu' reeman rëb: “Benza'can”, yu'za reeman rëb: “Ad benza'ctan, rusquieeman bejn ree.”

<sup>13</sup> Per achutczí ruza't laaman loj gra bejn, guial rdxeb reeman guxtis Israel ree.

<sup>14</sup> Chi gurol xuman ni cayajc lanij guin, guyu Jesús lën yadooro' Jerusalén, abi' guzuloj culüüman bejn ree. <sup>15</sup> Guiáad ree bën Israel badxaløj reeman, rëb reeman:

—¿Chexc ya'n contzi gra ragbeex, awa ni'quid basiidtix?

<sup>16-17</sup> Dxel rëb Jesús loj reeman:

—Ad guictan carii ni culün lëjt, zëédan por Dios, bën guxhaal naj. Bal chu rën güün zi'c rënman, zignia'man bal ni carii guicanan culün lëjt o zëédan por Dios ya. <sup>18</sup> Bén rulüü ganaxzi ni rbëëgujcaman, rüjnman laan din guilies ree bejn xvaloraman. Per bën rüjn mazri din guilies bejn xvalor Dios, bën guxhaal laaman, laaman rniee ni diidxli, ad rusquieetaman bejn.

<sup>19</sup> Yan, majsi basa'nnë Moisejs lëjt ley, per ni'qui tijbidi ad rüjnt zi'c rëb ley guin. ¿Chexquiza zeel rëndi gugüjtidi naj?

<sup>20</sup> Badxi' ree bën guinan, rëb reeman:

—Xindxab yu' luxdool. ¿Chuczi rën gugüjt lüj?

<sup>21</sup> Abi' rëb Jesús loj reeman:

—Por tijbzi milagr ni benan radxaløjdi. <sup>22</sup> Abi' lëjt gunabee Moisejs lëjt guial gra ree xinguaaaw chu' sen, (majsi ad por Moisejst ru bejn sen guin, mal rüjn ree dux bengol gulal ree zian), abi' lëjt rgu'di bejn ree sen, majsi dxej raziiladx bejn. <sup>23</sup> Yan, bal chitëë gusaglojdi ley ni basa'nnë Moisejs lëjt, rgu'di sen bejn ree majsi dxej raziiladx bejn. ¿Chexquiza zeel ralendi guial bayünan tijb bënragxuu dxej raziiladx bejn? <sup>24</sup> Ad rüjndi xgabmal por ni ruguiaazidi rüjn bejn, yaløj xgaj gol gogbee zagdx xhie cayünman.

### *Rëb Jesús ban zaman*

<sup>25</sup> Yu' ree bën Jerusalén guzuloj rniabdiidx loj lasa' reeman, rëb reeman:

—¿Nid bën guinan cayguuil reeman ya din gugüjt reeman laaman? <sup>26</sup> Abi' yan laaman canee niz loj ree bejn, abi' ni'qui chut xhie rëb lojman. ¿Ni ma bililadx ree guxtis ya'n guial laaman naj Cristo? <sup>27</sup> Per dunuj ree rayagbeechaaw ban zaman, guiáad chi gui't Cristo, achut gagbee ban saman.

<sup>28</sup> Chi biguiejn Jesús zian, la'tgaj culüüman bejn ree lën yadooro' Jerusalén, dxel guneeaman rejs rëbaman:

—¡Lëjt rëb nünbeedi naj abi' ragbeedi ban guzaan! Per ad zialtan por naj gajc, zialan por quijb bën rniabee bën ad nünbeetidi. <sup>29</sup> Per naj nünbee laaman guial zialan diizd lod za'man, laa tëëman guxhaal naj.

<sup>30</sup> Chi biguiejn reeman zian, guyën reeman niniaaz reeman laaman, per achut gunaaz laaman, guial gad hor gal guiniaazaman. <sup>31</sup> Loj ree bénguixiuj za' yagaj zien reeman bililadx laaman, abi' rëb reeman:

—Chi gui't Cristo, ¿wen mazri zien ree milagr güünman guial loj bén guin ya?

*Guyën reeman niniaaz reeman Jesús*

<sup>32</sup> Biguiejn ree bénfarisew ni rníee ree bejn Jesús. Abi' laa reeman con ree bixhioz rniabee, guxhaal reeman bén rajp ree ro' yadooro' Jerusalén din guiniaaz reeman Jesús. <sup>33</sup> Dxel rëb Jesús:

—Ad xchejtri gazunë'n lëjt, dxel yaya'n lod za' bén guxhaal naj. <sup>34</sup> Yaguilidi naj, per ad zadxejltidi naj, din ad zile't gui'tidi lod gazun.

<sup>35</sup> Abi' ree bén Israel guin guzuloj rniabdiidx loj lasa' reeman, rëb reeman:

—¿Banczi zajc che bén guin din ad zadxejltaman? ¿Ni zejman lod zojb ree bén Israel loj ree benzit ya, chiglüüman laa reeman në ree bén ad najt bén Israel? <sup>36</sup> ¿Xhie rën guiëb guial naman: “Yaguilidi naj per ad zadxejltan, din ad zile't gui'tidi lod gazun”?

*Nijs runee guialnaban*

<sup>37</sup> Dxej rliox lanij guin naj mazri dxej zojbloj, dxejzii guzuli Jesús guneeman rejs, rëbaman:

—Bal chu lëjt re'c nijs, gol guda lon din guië'dan. <sup>38</sup> Din bén rliladx naj zi'c ca loj xtiidx Dios, lën luxdooman gach nijs runee guialnaban.

<sup>39</sup> Chi gunee Jesús zian, rën guiëb xtiidxaman guial gra ree bén chililadx laaman zabajnnë reeman xSprijt Dios. Din nadxel ad wayi'tt xSprijt Dios guial ad waguiajt Jesús lod canabeeman.

*Gula' lasa' ree bejn*

<sup>40</sup> Yu' ree bén no'ch loj ree benzien guin, chi bacaagdiajg reeman ni gunee Jesús, rëb reeman:

—Walican, bén guin naj gui't guidgadëë xtiidx Dios loj ree bejn.

<sup>41</sup> Yu'za reeman rëb:

—Bén guin naj bén bacaabee Dios.

Per yu' reeman rëb:

—Ad laataman naj Cristo, din ad niz Galileat naj griiman.

<sup>42</sup> Loj xtiidx Dios ca guial loj xdiaa rey Davi grii Cristo, abi' Belén galaman ladx gajc rey Davi.

<sup>43</sup> Zian gojc dxel gula' lasa' reeman por Jesús. <sup>44</sup> Zien reeman guyën niniaaz laaman, per achut bayax niniaaz laaman.

*Ad bililadxt ree guxtis Jesús*

<sup>45</sup> Chi bayejc ree bén rajp ro' yadoo guin lod za' ree bénfarisew guin con ree bixhioz rniabee guin. Rëb reeman loj reeman:

—¿Chexc zeel ad bidnëtidi laax?

<sup>46</sup> Dxel rëb ree bén rajp ro' yadoo guin:

—¡Ad goct wayu bén guiniee zi'c rnieex!

<sup>47</sup> Abi' rëb ree bénfarisew guin:

—¿Në lëjt ma cwëjb basquieex lëjt ya? <sup>48</sup> ¿Wen yu' ree dux guxtis ree, o bénfarisew ree ma bililadx laax ya? <sup>49</sup> ¿Nid ragbeedi ya guial zien ree bén guin banijt loj Dios guial ad nünbeet reeman ley?

<sup>50</sup> Per bénfarisew la Nicodemo bén bignaj Jesús tijb guxhin, rëbaman loj reeman:

<sup>51</sup> —Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' yayagbee ree xhie beenman.

<sup>52</sup> Badxi' reeman laan rëb reeman:

—¿Wen në lüj za'në ree bén Galilea ya? Basiid zagdxe loj xtiidx Dios din gagbeel ad goct warii bén rudëë xtiidx Dios loj ree bejn niz Galilea.

<sup>53</sup> Dxel bare'ch reeman zia lidx lidx reeman.

**8***Béngunaa banaaznë xingüiaaw ren*

<sup>1</sup> Per Jesús zëman ruguia' Olivos. <sup>2</sup> Chi bareguiaal, rsil badxinman lën yadooro' Jerusalén stijb. Zien ree bejn bido'p lod za'man, dxel gurejman guzuloj culüüman laa reeman. <sup>3</sup> Abi' mextr rulüü ree ley con ree bénfarisew bidxinnë tijb béngunaa banaaznë tijb xingüiaaw, dxel bazuj reeman laaman galay ree bén guin, <sup>4</sup> zianz rëb reeman loj Jesús:

—Mextr, banaaz béngunaa guie loj mer hor ni yu'nëman xingüiaaw ren. <sup>5</sup> Abi' loj ley basa'nnë Moisejs dunuj ree ca guial lasa' béngunaa guie rayal guiëtaman con guiaj. ¿Laadx lüj xhie nal?

<sup>6</sup> Gunabdiidx reeman zian din guidoon xhie guiëbaman din gac gutedia' reeman laaman. Per con basajb lojman abi' guzulojman cucaaman luyuj con xbacwënman. <sup>7</sup> Per guial laa reeman canabdiidxzi canabdiidx reeman lojman, abi' babejliman, rëbaman loj reeman:

—Chutëëz bén ad wayüjnt dol, yaloj laaman gucaaguaiaj béngunaa guie.

<sup>8</sup> Dxel basajb lojman stijb, basnuu bacaaman luyuj guin. <sup>9</sup> Chi biguiejn reeman ni guneeaman, guzuloj cayza tijbgaj reeman, diizd mazri bengol xt bara reeman baza. Tijbzi

béngunaa guin baya'n con Jesús loj ree bén riga' yagaj. <sup>10</sup> Dxel babejliman, rëbaman loj béngunaa guin:

—¿Con ree bén bidnë lüj? ¿Ni'qui tijb reeman achut xhie been lüj ya?

<sup>11</sup> Dxel rëb béngunaa guin:

—Dad, ni'qui tijbaman.

Abi' rëb Jesús:

—Ni'qui naj achet günan lüj. Baguiaj yan, ad güünril dol.

*Jesús naj bajl par bénguidxliuj*

<sup>12</sup> Dxel gunee Jesús stijb, rëbaman loj ree bén riga' yagaj:

—Naj naj bajl rusni bénguidxliuj. Abi' bén guzoob da diidxan, zani xquiargueijnman xhienaag gapaman guialnaban tiblayaa con Dios, ad yu' tëet dxej guicajy xquiargueijnman.

<sup>13</sup> Abi' ree bënfarisew rëb reeman lojman:

—Lüj gajc ruza't lüj, abi' achet lasajc xtiidxil.

<sup>14</sup> Dxel rëb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tëe gan, sa'n lëjt ad ragbeetidi ban zialan ban tëe gan. <sup>15</sup> Lëjt rnieedi bejn zi'ctizi naj xixgabidi, sa'n naj achut ruzatan. <sup>16</sup> Abi' bal guzatan bejn, ganen diidxli, din ad zanetan zi'c naj da xgaban, në da Dadan bën guxhaal naj ragbee guial diidxli naj ni ganen. <sup>17</sup> Abi' loj xleydi ca guial chi yu' tio'p bën rniee tiblojzi, diidxliqui naj ni rniee reeman. <sup>18</sup> Yan, naj gajc naj tijb bën rniee por naj, abi' da Dadan bën guxhaal naj, naj stijb bën rniee por naj.

<sup>19</sup> Gunabdiidx reeman lojman rëb reeman:

—¿Con xdadil?

Badxi'man laan rëbaman:

—Lëjt ad nünbeetidi naj, ad nünbee tëetidi da Dadan, din bal nünbeedi naj, ziangajc nünbeedi da Dadan.

<sup>20</sup> Zian gunee Jesús la'tgaj rulüüman bejn ree lën yadooro' Jerusalén, niz lod za' ree ni rgu' reeman gon. Per achut gunaaz laaman, din ad wadxint hor guiniaazaman.

*Lod gan ad zile't gui'tidi*

<sup>21</sup> Gunee Jesús stijb, rëbaman:

—Chi ma gan, zaguiilidi naj, per zëjtnë xtolidi, din lod gan ad zile't gui'tidi.

<sup>22</sup> Dxel rëb ree bën Israel guin:

—¿Wen ni laagajcaman gugüjt laaman ya, zeel naman guial ad zajct yo' ree lod cheman?

<sup>23</sup> Abi' rëb Jesús loj reeman:

—Lëjt naj bën ladguiajt guie, sa'n naj ladya ni zialan. Lëjt naj bénguidxliuj, sa'n naj ad bénguidxliujt naj. <sup>24</sup> Zeel rnin,

zëjtnë xtolidi. Din bal id zaliladxidi guial naj naj Bén najn, zëjtnë xtolidi.

<sup>25</sup> Dxel gunabdiidx reeman lojman, rëb reeman:

—¿Chuza lüj?

Badxi'man laan rëbaman:

—Ma rnin lojdi diisd yaloj. <sup>26</sup> Zien ni ra'pan gulün lëjt ni ganenë' tëen lëjt. Per naj, ni canen loj bénguidxliuj naj ni rucagdiagan rniee Bén guxhaal naj, abi' ni rnieeman naj diidxli.

<sup>27</sup> Per laa reeman ad gogbeet guial Diosan ruza'taman.

<sup>28</sup> Zeel rëbaman loj reeman:

—Chi ma beendi zi'ctizi rëndi con Bén guxhaal Dios, dxel gagbeedi najcan, gagbee tëedi guial achetczi rünan por da xgabzan, naj rnie ni ma balüü da Dadan naj. <sup>29</sup> Din laaman guxhaal naj, laaman za' con naj, abi' ad yu't dxej cwëeladxaman naj, guial zianczi rünan ni rayuladxaman.

<sup>30</sup> Chi rëb Jesús zian, zien ree bejn bililadx laaman.

### *Bén wali naj xbejn Dios*

<sup>31</sup> Rëb Jesús loj ree Bén Israel bililadx laaman:

—Bal gusnuu guzoobidi da diidxan, waliqui najdi da bejn, <sup>32</sup> abi' züjnbeedi conin naj diidxli, abi' por diidxli guin zalaadi.

<sup>33</sup> Badxi' reeman laan rëb reeman:

—Dunujn zio'p loj xdiaa Abraham, abi' ad yu't dxej wayajcan zi'c Bén nado'. ¿Chexquiza zeel nal du lojn, guial por diidxli zalaan?

<sup>34</sup> Dxel rëbaman loj reeman:

—Diidxli rnin lojdi, guial graczi Bén rüjn ganaxzi dol, laa reeman naj zi'c Bén nado' loj dol. <sup>35</sup> Abi' tijb Bén nado' loj bejn, ad zile't guiëbaman xfamilaman naj xpatronman, sa'n xi'n patron guin zile' guiëbix xfamilixan. <sup>36</sup> Zeel bal Xi'nman guslaa lëjt, ad najtridi zi'c Bén nado'. <sup>37</sup> Ma qui ragbeen guial loj xdiaa Abraham zëedidi, per lëjt rën gugüjt naj guial ad rayuladxtidi da diidxan. <sup>38</sup> Naj rni ni ma balüü da Dadan naj, sa'n lëjt rüjndi zi'c na xDadidi güündi.

<sup>39</sup> Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal niajquidi xi'n Abraham, züjndi zi'c beenman. <sup>40</sup> Per yan, majsi ma rnin lëjt diidxli zi'c balüü Dios naj, lëjt rëndi gugüjtidi naj. ¡Abi' Abraham ad yu't dxej nüjnman zian! <sup>41</sup> Sa'n lëjt rüjndi zi'cgajc rüjn xDadidi.

Abi' rëb reeman loj Jesús:

—Dunujn achut mazri xi'n nayajcan. Tijbzi Dios naj dux Dadan.

<sup>42</sup> Dxel rëb Jesús loj reeman:



—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bén guxhaal naj. <sup>43</sup> Abi' ad rignia'tidi ni rnin, guial ad réntidi gucaagdiajgudi da diidxan. <sup>44</sup> X Dadidi naj xindxab, abi' rüjndi zi'c rénx güündi, din diizd yaloy ruladx xindxab guin gugüjtix bejn. Ad yu't dxej chinalix ni naj diidxli, din ad rnieetix diidxli. Chi rnieex diidx rusquiee, achet naladxix, din laax naj xin rusquiee naj tēēx xdad gualrusquiee. <sup>45</sup> Per guial naj rni lējt ganax diidxli, ad rliladxtidi naj. <sup>46</sup> ¿Chu lējt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad rliladxtidi naj? <sup>47</sup> Bén naj xbejn Dios rucaagdiajgaman xtiidxaman, per lējt ad xbejntaman najdi, zeel ad rucaagdiajgtidi xtiidxaman.

*Mal yu' Jesús chi gad Abraham gal*

<sup>48</sup> Dxel rēb ree bén Israel guin loj Jesús:

—Waliqui ni ranan guial xindxab yu' luxdool naj tēēl bén Samaria.

<sup>49</sup> Badxi'man laan rēbaman:

—Achut xindxab yu' luxdon, naj cuzob xtiidx da Dadan, per lējt ganax diidxguijdx rnieedi naj. <sup>50</sup> Naj ad raguiltan guilies ree bejn da valoran, majsi yu' bén rēn güün bejn zian, abi' laaman rüjn xgualguxtis. <sup>51</sup> Diidxli rnin lējt, bén guzoob da diidxan, ad yu't dxej guiētaman.

<sup>52</sup> Dxel rēb ree bén Israel guin lojman:

—Yanri ma rayagbeechaawan guial xindxabqui yu' luxdool. Abraham nē gra ree bén badēē xtiidx Dios loj ree bejn, güjt reeman, guiáad lüj nal: “Bén guzoob da diidxan, ad yu't dxej guiētaman.” <sup>53</sup> ¿Wen mazri lasajquil ya guial loj dux béngulal ree Abraham? Güjtaman, güjt tēē ree bén badēē xtiidx Dios loj ree bejn. ¿Laadx lüj chu naladxil najl?

<sup>54</sup> Abi' rēb Jesús loj reeman:

—Bal naj gajc gales da valoran, achet lasajc ni ganen por naj. Per bén rlies da valoran naj da Dadan, bén nagajquidi naj xDiosidi. <sup>55</sup> Lējt ad nünbeetidi laaman, sa'n naj nünbeen laaman. Abi' bal ganin ad nünbeetan laaman, nēgajc naj ma naj bén rusquiee zi'cgajc lējt. Per nünbeen laaman abi' ruzoban xtiidxaman. <sup>56</sup> Xbéngulalidi Abraham, babaaman guial guguaaaman dxej ni guialan. Abi' chi baguaaaman dxej guin, mazri babaaman.

<sup>57</sup> Dxel rēb ree bén Israel guin lojman:

—Ni'qui gadil chu' tü'pchii ijz, ¿guiáad lüj ya nal baguiaal Abraham?

<sup>58</sup> Abi' gunee Jesús rēbaman:

—Diidxli rnin lojdi, mal nabanen chi gad Abraham chu'.

<sup>59</sup> Dxel gules reeman guiaj din nucaa reeman laan Jesús. Per laa guzëëb gajcaman galay ree bejn, abi' gudëdaman galay reeman bariiman lën yadoo guin, laa zia gajcaman.

## 9

### *Rayüjn Jesús tijb xin ad ranit loj*

<sup>1</sup> Chi cadëd Jesús tiblajt, baguiaaman tijb xin ad ranit loj diizd chi golix. <sup>2</sup> Dxel gunabdiidx ree xbejnman lojman, rëb reeman:

—Mextr, ¿chexc zeel ad ranit loj bën guin diizd chi golaman?  
¿Por xtol ree xDadaman ya, o por xtol gajcaman?

<sup>3</sup> Badxi' Jesúsán, rëbaman:

—Najman zian ad por xtoltaman ad por xtol tëët ree xDadaman. Gojlaman zian din chi yayajcaman, guguaa ree bejn xguialrniabee narooB Dios. <sup>4</sup> Yan, la'tgaj yu' tiamp, rüjn naguiejn yaguieen ree ni na bën guxhaal naj, din ma yayaaloj tiamp ni achetri zajc gac. <sup>5</sup> Abi' la'tgaj za'n loj guidxliuj guie, naj naj bajl rusni bénguidxliuj.

<sup>6</sup> Chi gulox guneeman zian, guxhie' xhiejnman luyuj, abi' beennëman laan bajn, persi gudëëbaman laan guiaaloj xin guin. <sup>7</sup> Abi' rëbaman lojx:

—Bitiib lojl ro' tanc Siloé —Siloé rën guiëb ni guxhaalaman.

Dxel bitiib lojx, abi' chi bayejquix, ma rani lojx. <sup>8</sup> Dxel bën zobj ree gajxh lod zobjix con ree bën ragbee guial laax rniab carda, rëb reeman:

—¿Nid xin guinan rbej rniab carda ya?

<sup>9</sup> Yu' reeman rëb:

—Laaquixan.

Yu'za reeman rëb:

—Ad laatixan, rguienzix zian.

Per laax rëb:

—Najcan.

<sup>10</sup> Dxel gunabdiidx reeman lojx, rëb reeman:

—¿Xhieza naag gojc bani lojl?

<sup>11</sup> Badxi'xan, rëbix:

—Bën la Jesús been bajn, gudëëbaman guiaalon abi' naman: “Wej bitiib lojl ro' tanc Siloé.” Dxel wan, chi gulox gudiib lon, max bani lon.

<sup>12</sup> Abi' rëb reeman lojx:

—¿Conzaman yan?

Zeel rëbix:

—Ad ragbeetan.

*Gunabdiidx ree bënfarisew loj xin guin xhienaag guzuloj rani lojx*

<sup>13</sup> Loj hor zii binë reeman xin bayajc guiaaloj guin loj ree bënfarisew, <sup>14</sup> din dxej been Jesús bajn persi bayüjnman

guiaalox xini guini, dxej guini raziiladx ree bejni. <sup>15</sup> Dxel gunabdiidxi ree b nfarisew guini lojxi xhienaag guzulox rani lojxi. Abi' r bix loj reeman:

—Jes s gud  b bajni guiaaloni, dxel bitiibi lon, yan ma ranini.

<sup>16</sup> Yu' ree b nfarisew guini r b:

—B n bay jni guiaaloxi ad xbejni Diosani, dini ad rajptamani respejti dxej raziiladx bejni.

Per yu'za reeman r b:

— Xhienaag g nmani milagru guie ree, bal najmani b ndol?

Garent garenti r b reemani. <sup>17</sup> Abi' gunabdiidxi reemani loj xini bayajci guini zatijbi, r b reemani:

— Laadxi l j xhie nali chu naj b n bay jni guiaaloxi?

Badxi'xani r bix:

—Naj rni guiali laamani naj b n rud   xtiidxi Dios loj ree bejni.

<sup>18</sup> Per b n Israel guini ree ad rliidaxti reemani, dini ad baniti lojxi abi' yan ma ranini, dxel gurejdx reemani xdadix con xniaax, <sup>19</sup> abi' gunabdiidxi reemani loj reemani, r b reemani:

— Xini guieni naj xi'ndi ya, xini r bidi ad raniti loj diidzi gojlix? Yan,  xhienaag gojci zeeli ma ruguiaax?

<sup>20</sup> Badxi' reemani laani r b reemani:

—Dunujni rayagbee guiali du xi'nanani, rayagbee t n guiali diidzi chi golix ad raniti lojxi. <sup>21</sup> Per ad rayagbeetani xhienaag gojci zeeli rani lojxi, ad rayagbee t etan chu bay jni guiaaloxi. Gol gunabdiidxi lojxi, ma najxi xingol, ma zajci na laagajquix lojdi xhienaag gojci.

<sup>22</sup> R b ree xdadix ziani guiali rdxebi reemani xguxtisi ree b n Israel, dini ma baya'n reemani diidxi, chut  z b n guiebi guiali Jes s naj Cristo, ad zati jbtri reemani chu'mani l n yadoo.

<sup>23</sup> Ziani zeeli r b reemani: “Gol gunabdiidxi lojxi, ma najxi xingol.”

<sup>24</sup> Dxel gurejdx reemani laax zatijbi, abi' r b reemani:

—Laa Dios ruguiaa, guna diidxli, dini dunujni rayagbee guiali b ndol naj b n bay jni l j.

<sup>25</sup> Badxi'xani r bix:

—Ad ragbeetani bal b ndolani o ad b ndoltani ya. Tijbzi ni ragbeeni naj guiali ad baniti lon, abi' yan ma ruguiani.

<sup>26</sup> Dxel gunabdiidxi reemani lojxi stijbi, r b reemani:

— Xhienaag beenn mani l j?  Xhienaag beenni mani persi rani lojli?

<sup>27</sup> Badxi'xani r bix:

—Ma rni lojdi, abi' l jti ad rliidaxtidi naj.  Chexci zeeli r ndi ganini zatijbi xhienaag beenni mani?  Weni n  l jti r n gaci xbejni mani ya?

<sup>28</sup> Dxel gudil  reemani laax r b reemani:

—Lüj bal najl xbejnman, sa'n dunujn xbejn Moisejs nayajcan. <sup>29</sup> Din dunujn rayagbee Dios gunee Moisejs, per bén guin ni'quid rayagbeetan ban zaman.

<sup>30</sup> Badxi'xan rëbix:

—ǰhiechalnin zeel ad ragbeetidi ban zaman! Guiáad naj por laaman ma rani lon. <sup>31</sup> Dunuj ree rayagbeechaaw guial ad ridxga't Dios xtiidx ree béndol, ridxga'man xtiidx ree bén ruzoob xtiidxaman rüjn tää reeman zi'c rënman. <sup>32</sup> Ad goct wacaagdiajg ree guial chu' bén yayüjn loj Bén ad ranit loj diizd gojlaman. <sup>33</sup> Yan, bal id por Dios zëed Bén guin, achetdzi nile' nünman.

<sup>34</sup> Dxel rëb reeman lojx:

—Lüj gojl con dol, ¿wed lüj gulüü dunujn?  
Abi' babëë reeman laax yagaj.

### *Bililadx xin bayajc guin Jesús*

<sup>35</sup> Gogbee Jesús ni guzac xin bayünman, dxel chi badxaagan laax, rëbaman lojx:

—ǰRililadxil Bén guxhaal Dios loj guidxliuj ya?

<sup>36</sup> Badxi'xan rëbix:

—Dad, guna chunin, din chililadxan laaman.

<sup>37</sup> Dxel rëbaman lojx:

—Ma baguiaal laaman, laaman naj Bén caneenël.

<sup>38</sup> Abi' bazuxib xin guin lojman, rëbix:

—Rililadxan lüj, Dad.

<sup>39</sup> Zianz rëb Jesús:

—Bialan loj guidxliuj guie din günan guialguxtis, din por naj yani loj ree Bén ad ranit loj, guiáad ree Bén rani loj, ad zanit loj reeman.

<sup>40</sup> Yu' ree Bénfarisew za'në laaman. Chi biguiejn reeman rëbaman zian, rëb reeman:

—ǰWen në dunujn ad ranit duloj ya?

<sup>41</sup> Dxel rëb Jesús loj reeman:

—Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

## 10

### *Bén rniaj xiil*

<sup>1</sup> Rëb tää Jesús:

—Diidxliczi rnin lojdi, Bén ad rut niz ro' xgurajl ree xiil, Bén ru niz lood ren, laaman naj béngubaan. <sup>2</sup> Per Bén ru niz ro' xgurajl reeb, laaman naj Bén rniaj laa reeb. <sup>3</sup> Abi' rxhial Bén rajp ro' xgurajl reeb persi ru Bén rniaj laa reeb, abi' chi rbejdxaman tijbgaj reeb, rayünbee reeb cha'man. Zianz rbëëman laa reeb lën gurajl guin. <sup>4</sup> Abi' chi ma brii gra reeb, dxel rniedaman loj reeb, guiáad laa reeb rnal laaman, guial

nünbee reeb cha'man. <sup>5</sup> Per ad rnalt reeb tijb bén ad nünbeet reeb, ruxüünl reeb lojman, guial ad nünbeet reeb cha'man.

<sup>6</sup> Chi gulox gunee Jesús zian, ad bignia't ree bén riga' yagaj xhie rën guiëb ni guneeman.

*Jesús naj zi'c bén rniaj xiil ree zagdxe*

<sup>7</sup> Rëb Jesús loj reeman zatijb:

—Diidxiczi rnin, naj naj zi'c ro' xgurajl ree xiil, lod ru reeb.

<sup>8</sup> Gra ree bén bi't chi gad naj guial naj reeman zi'c béngubaan, rban reeman rusagzi tëë reeman. Per ree bén naj da bejnan ad bidxga't reeman laa reeman. <sup>9</sup> Naj naj ro' port, abi' bén ru ro' port guie zajpaman perdon, dxel ma zile' chu'man yarii tëëman zi'cgajczi tijb xiil abi' zian rdxejl ni rawib.

<sup>10</sup> 'Béngubaan ri'tzaman din cwanman, gugüjtaman gunijt tëëman, sa'n naj zialan din gapidi guialnaban, gap tëëdi zro' da'tan. <sup>11</sup> Naj naj zi'c tijb bén rniaj xiil ree zagdxe. Abi' bén rniaj xiil ree zagdxe xt xguialnabanman rudëëman por laa reeb. <sup>12</sup> Per bén rniaj laa reeb por milia, chi ruguiaaman zëëd cuyojt, laa ruxüün gajcaman, rbëëladxaman xiil guin ree guial ad najt reeb xi xiilaman në guial ad najtaman bén rniaj ree xiil, dxel rniaaz cuyojt guin laa reeb abi' rtie'chib laa reeb. <sup>13</sup> Laaman rbëëladx laa reeb, din por miliazi rniajman laa reeb abi' achet naladxaman por laa reeb.

<sup>14-15</sup> 'Naj naj zi'c bén rniaj xiil ree zagdxe. Abi' zi'c nünbee da Dadan naj, zian nünbeen laaman, ziangajc nünbee ree da xiilan, guiáad laa reeb nünbee naj. Abi' xt da guialnabanan gudëdan por laa reeb. <sup>16</sup> Ra'p tëën stibcwaa ree xiil ad yu't lën gurajl guie. Në laa reeb ryaadx chigxin, laa reeb guzoob da diidxan, yadxaag grop cwaa reeb gac reeb tijbzi, abi' tijbzi bejn gap laa reeb.

<sup>17</sup> 'Da Dadan Dios rënman naj guial naj gajc rudë naj guiëtan par yabanan stijb. <sup>18</sup> Achut zajc gugüjt naj bal id naj gatiëëb. Naj ra'p guialrniabee par gatiëëban guiëtan në par yabanan stijb, din laan naj guialrniabee ni banee da Dadan lon.

<sup>19</sup> Chi biguiejn ree bén Israel guin ni rëbaman, gojc reeman tio'p lala' stijb. <sup>20</sup> Zien reeman rëb:

—¿Chexc zeel ridxga'di laaman? Awa xindxab yu' luxdooan rajc tëë guijcaman.

<sup>21</sup> Per yu' reeman rëb:

—Ni'qui tijb bén yu' xindxab luxdoo ad rnieet zian. ¿Wen zajc yaxhal xindxab guiaaløj ree bén ad ranit loj ya?

*Jesús con xDadaman Dios naj reeman tijbzi*

<sup>22</sup> Tiamp nayaag, chi cayüjn ree bén Israel lanij ni rüjn reeman gazobijz par yadooro' Jerusalén. <sup>23</sup> Wej Jesús lën yadoo guin. Chi cazaman niz ro' curdur ni rniee reeman

xcurdur Salomón. <sup>24</sup> Dxel biyaw ree b́en Israel laaman, rēb reeman lojman:

—¿Xt goc naga'loj cu'nawēeguil dunujn? Guna du lojn bal lūj naj Cristo.

<sup>25</sup> Badxi' Jesúsán rēbaman:

—Ma rnin lojdi, per lējt ad rliladxtidi naj. Abi' ree ni rúnán con xgualrniabee da Dadan Dios, laa reen rulūü chu najn.

<sup>26</sup> Per ad rliladxtidi, guial ad najtidi da bejnan. <sup>27</sup> B́en naj ree da bejnan, núnbee reeman cha'n, guiáad naj núnbeen laa reeman, abi' laa reeman rzanal naj. <sup>28</sup> Naj rudē guialnaban tiblyaa loj reeman, ad yu't dxej nit reeman. Abi' achut zajc chiquied laa reeman lon. <sup>29</sup> Din da Dadan, b́en banee laa reeman lon, rajpaman mazri guialrniabee guial loj gra. Achut zajc chiquied laa reeman lojman. <sup>30</sup> Da Dadan con naj, nayajcan tijbzi.

<sup>31</sup> Dxel cwa' ree b́en Israel guin guiaj din gucaaguaiaj reeman Jesús. <sup>32</sup> Per rēbaman loj reeman:

—Por xgualrniabee da Dadan, zien ni zagdxe ma benan niz lojdi. ¿Con pornin gucaaguaiajdi naj?

<sup>33</sup> Badxi' reeman laan rēb reeman:

—Ad por ree ni zagdxe ni beentilan yacaaguaiajn lūj, ya-caaguaiajn lūj guial ad rajptil Dios respejt, din b́enguidxliujzi lūj, abi' rúnj lūj gajc zi'c Dios.

<sup>34</sup> Dxel rēb Jesús:

—Loj xleydi rēb: “Naj rni guial lējt naj dios.” <sup>35</sup> Dunuj ree rayagbee guial ad ni rusquieet naj ni ca loj xtiidx Dios. Abi' laaman gulēlaj dios b́en basa'nnē ree xtiidxaman, b́en gojp ree guialrniabee loj ree b́en Israel. <sup>36</sup> Yan, bal da Dadan Dios gulēeca naj persi guxhaalaman naj loj guidxliuj, ¿chexquiza zeel nadi ad ra'ptan laaman respejt guial rnin, xi'nman naj? <sup>37</sup> Bal id cayünán zi'c na da Dadan, ad chililadxidi naj. <sup>38</sup> Per bal cayünán zi'c naman, majsi ad zaliladxtidi naj, per gol bililadx guial por laaman zēed ni rúnán din gagbeedi guial da Dadan za'nē naj, guiáad naj za'nē'n laaman.

<sup>39</sup> Dxel guyēn reeman niniaaz reeman Jesús, per gulaaman loj reeman.

<sup>40</sup> Abi' zēman zatiblad ro' guiiw Jordán, lod baroobnijs Waj bejn ree yaloj, yagaj baya'nman. <sup>41</sup> Abi' zien ree b́en bidxin yagaj rēb:

—Walín, majsi achet milagr been Waj, per gra ni guneeaman xcwent b́en guie naj diidxli.

<sup>42</sup> Dád zien reeman bililadx Jesús yagaj.

<sup>1</sup> Guyu tijb bénragxuu, brii lajman Lazr. Laaman con re bizanman Li con Mart, naj ladx reeman Betania. <sup>2</sup> Abi' Li bizan Lazr, laam baroob perfum guia' Jesús abi' bacwiidximin con guidxguijquim. <sup>3</sup> Dxel grop bël reem guxhaal ruson loj Jesús, rëb reem:

—Dad, ragxuu xmiwil Lazr.

<sup>4</sup> Chi biguiejn Jesús zian, rëbaman:

—Guialguijdx guin ad zëëdtan par gugüjtan, zëëdan din gac guguiaa bejn xguialrniabee Dios nê par guguiaa reeman xguialrniabee Xi'n Dios.

<sup>5</sup> Majsî rën da't Jesús Mart con Li nê Lazr, <sup>6</sup> per chi cwa'man ruson ragxuu Lazr, sta goglaaman zatio'p dxej lod za'man.

<sup>7</sup> Dxel rëbaman loj ree xbejnman:

—Yo' ree niz Judea zatijb.

<sup>8</sup> Abi' rëb reeman lojman:

—Mextr, ad wayajct xchej guyën ree bën zojb niz ni nucaaguiaj reeman lüj. ¿Abi' chel ni zatijb ya?

<sup>9</sup> Dxel rëb Jesús:

—Lëjt ragbee guial chiptio'p hor yu' tibdxej. Abi' bën rza radxe, achet rirejl guia'man, din yu' bajl rusni loj guidxliuj guie. <sup>10</sup> Per bën rza guxhin, yu' ni rirejl guia'man, din achet bajl guin rajpaman.

<sup>11</sup> Rëb tëë Jesús loj reeman:

—Ma naga'yëjs dux miw ree Lazr, per chicwëënan laax.

<sup>12</sup> Dxel rëb ree xbejnman:

—Dad, bal naayëjsix, rën guiëban yayajquix.

<sup>13</sup> Per ni rëb Jesús rën guiëban guial ma güjt Lazr, guiáad ree xbejnman gunaladx reeman rëbaman naga'yëjsix. <sup>14</sup> Dxel bagojn Jesús laa reeman, rëbaman:

—Ma güjt Lazr. <sup>15</sup> Rabaan por lëjt guial ad guzutan ni din chililadxidi naj. Yan, yo' ree yugnaj reex.

<sup>16</sup> Dxel Tumajs, bën rniee reeman cwajch, rëbaman loj los demazri xbejn Jesús:

—Yo' ree yunë' reeman, din lod guiëtaman, yayëjtnë' reeman.

*Jesús naj bën rusban bejn runee tëëman guialnaban*

<sup>17</sup> Chi bidxin Jesús Betania, ma gojc tajp dxej biguie'ch Lazr.

<sup>18</sup> Betania guin raya'nan gajxh Jerusalén, zi'ct choon kilometro. <sup>19</sup> Abi' zien ree bën Israel bignaj Mart con Li din yagu' reeman luxdoo reem guial güjt bizan reem. <sup>20</sup> Chi gogbee Mart ma zëëd Jesús gajxh, briim bigchaaglojm laaman, guiáad Li baya'nm lënü. <sup>21</sup> Dxel rëb Mart loj Jesús:

—Dad, bal nizujl guie, ad ziant niëjt da zanan. <sup>22</sup> Per naj ragbee guial ni'quí yan zunee Dios ni guiniabil lojman.

<sup>23</sup> Dxel rëb Jesús:

—Naj rni yaban bizanl.

<sup>24</sup> Badxi'min rëbim:

—Ma qui ragbeen, yabanm dxej yaban gra ree bengüt. Chi guidxin dxej güün xguialguxtis Dios.

<sup>25</sup> Abi' rëb Jesús:

—Naj naj bën rusban ree bengüt rudë tëen guialnaban loj ree bejn. Bén chililadx naj, majsi guiëtaman, per zajpaman guialnaban loj Dios. <sup>26</sup> Guiáad gra bën naban rliladx tëe naj, zajpaman guialnaban loj Dios. ¿Rliladxil ni canin lüj ya?

<sup>27</sup> Dxel rëbim lojman:

—Rliladxanan Dad. Rliladxan lüj naj Cristo, Xi'n Dios, bën naj gui't loj guidxliuj.

### *Biin Jesús ro' xbaa Lazr*

<sup>28</sup> Chi gulox rëb Mart zian, dxel bignee xbëlim Li, rëbim ralan:

—Ma bi't Jesús, abi' caneeman lüj.

<sup>29</sup> Bigueijnzi Li zian, laa bisugajquim bigchaaglojm Jesús.

<sup>30</sup> Abi' Jesús gadzaman chu' luguiedx guin, sta za'man lod bigchaagloj Mart laaman. <sup>31</sup> Guiáad ree bën Israel zojbnë Li ragu' reeman luxdoo, chi baguiaa reeman cari da't bisum zëm, binal reeman laam. Gunaladx reeman ro' xbaa Lazr ziguiaanm.

<sup>32</sup> Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

<sup>33</sup> Chi baguiaaman roon Li con ree bën Israel nal laam, dád gognaa luxdooan guyu naya tëëman. <sup>34</sup> Dxel gunabdiidxaman rëbaman:

—¿Ban biquie'chidi laax?

Abi' rëb reeman:

—Dad, guda nial din guguaal.

<sup>35</sup> Dxel biinman. <sup>36</sup> Abi' rëb ree bën Israel guin:

—Gol baguiaa nial dád guyënman laax.

<sup>37</sup> Per yu' reeman rëb:

—Bën guinan baxhal guiaaloj tijb bën ad ranit loj. Yan, ¿niche niajc nüjnman ya'n chitëe niëjt Lazr?

### *Basban Jesús Lazr*

<sup>38</sup> Dád guyu naya luxdoo Jesús stijb, chi gubigaman ro' xbaa Lazr. Najn tijb guiajbiliaa, nada'cw tijb guiaj ro'n. <sup>39</sup> Dxel rëbaman:

—Gol biquied guiaj guin.

Per Mart, bizan xingüt guin, rëbim:

—Dad, ma rliaam nadxuudx, din ma gojc tajp dxej ni gütim.

<sup>40</sup> Badxi' Jesús rëbaman:

—¿Nid rnin ya, bal rliladxil, guguaal xguialrniabee Dios?



41 Dxel bisüd reeman guiaj guin. Zianz gules loj Jesús xanyabaa rëbaman:

—Dad, quixtëe lüj guial ma bacaagdiajguil ni rnin. 42 Naj ragbeechaaw guial zianczi rucaagdiajguil ni rnin. Per rnin zian por ree bën riga' guie, din chililadx reeman guial lüj guxhaal naj.

43 Chi gulox rëbaman zian, dxel guridxa'man rëbaman:

—¡Lazr, barii yagaj!

44 Dxel barii Lazr lën baa guin nalüüb vend yaax con guia'x, guiáad lojx nayaaw lajd. Dxel rëb Jesús loj reeman:

—Gol baxhiequix, gol baslaax yaguiajx.

*Baya'n reeman diidx xhienaag guiniaaz Jesús*

(Mt. 26:1-5; Mr. 14:1-2; Lc. 22:1-2)

45 Dád zien ree bën binal Li bililadx Jesús, guial baguiaa reeman milagr beenman. 46 Per yu' reeman bicojn bënfarisew ree ni been Jesús. 47 Dxel bënfarisew ree në ree bixhioz rniabee, bachajg lasa' reeman con los demazri ree guxtis, rëb reeman:

—¿Xhienaag yaguieen ree ya'n, din dád zien milagr cayüjn xin guin? 48 Bal yadëed ree mod, graczi bejn guililadx laax, dxel guxtis Rom ree guidganijt reeman dux yadoo ree në dux nacion ree.

49 Per loj reeman yu' bën la Caifás, bixhioz zojbloj rniabee loj ijzsi, rëbaman loj reeman:

—¿Nid ragbeedi ya, 50 nid rignia' tēedi ya, zagdxé naj guiët tijbzi bejn por gra bën Israel, luar nit dux nacion ree?

51 Per Caifás guin ad ni naladxtzaman rëbaman. Guial najman bixhioz zojbloj rniabee loj ijzsi, zeel badëed Dios ni guneeman, guial guiët Jesús por gra ree bën Israel. 52 Abi' ad por laatzi reeman, par gac reeman tijbzi con gra ree xbejn Dios, bën riga' ree guidib guidxliuj. 53 Zeel diidz dxejzii baya'n reeman diidx gugüjt reeman Jesús.

54 Zianan zeel ad contzi rulüülojtraman loj ree bën Israel, bazaman yagaj ziaman guiedx la Éfraín, najn gajxh yujbidx, yagaj guzunë ree xbejnman.

55 Dxejzii ree ma zidyob pascw, lanij rüjn ree bën Israel, dád zien ree bën guiedx ree zë Jerusalén din güün reeman zi'c naj xcostumbr reeman par gac reeman naya loj Dios chi gad pascw gal. 56 Dxel raguuil reeman Jesús, abi' rniabdiidx loj lasa' reeman lën yadooro' Jerusalén, rëb reeman:

—¿Xhie nadi? ¿Zi'taman lanij ya o ad zi'ttaman?

57 Bënfarisew ree con ree bixhioz rniabee, gunabee reeman bal chutëéz bën ragbee ban za' Jesús, gugojnman din chile' guiniaaz reeman laaman.

## 12

*Baroob Li perfum guia' Jesús*  
(Mt. 26:6-13; Mr. 14:3-9)

<sup>1</sup> Za xho'p dxej riaadx gal pascw, chi we Jesús Betania, lod zojb Lazr, xin basbanman. <sup>2</sup> Ni been reeman tijb guialraw par xche ni gudawnë reeman Jesús. Mart gule'c guialraw guin, guiáad Lazr naj tijb bën gurenë laa reeman xan mex. <sup>3</sup> Dxel cwa' Li cost garol lijtr perfum ni lasajc wayëjx, najccha-awnën ganax nardo, baroobimin guia' Jesús abi' bacwiidxnë guidxguijquimin. Guidibczi lënü guin baree nejxh. <sup>4</sup> Dxel Judas Iscariote, xin naj tijb ree xbejn Jesús, xin bayü laaman, rëbix:

<sup>5</sup> —¿Chexc ad gudo't perfum guin? Zagdxeli nido'n zi'ct rüjn tijb bejn gan tib ijz, din nünjan yudar bënprob ree.

<sup>6</sup> Ad guial yu'tix xgab bënprob guin ree zeel rëbix zian, rëbix zian guial najx xin gubaan. Abi' guial laax naaz bols yu' milia, rbanx ni rudëë reeman rgu'chaawix. <sup>7</sup> Dxel rëb Jesús lojx:

—Guzujr biinan. Ma badxe'xgajm naj perfum guin par chi guidxin dxej guiguie'chan. <sup>8</sup> Din bënprob guin ree zianczi za'në reeman lëjt, per naj ad ziantczi gazunë'n lëjt.

*Baya'n reeman diidx gugüjt reeman Lazr*

<sup>9</sup> Bén guixiuj bën Israel gogbee za' Jesús Betania, abi' wej reeman yagaj, ad par guguaatzi reeman Jesús, në par guguaa reeman Lazr, xin basbanman. <sup>10</sup> Zeel baya'n ree bixhioz rniabee diidx guial në Lazr gugüjt reeman. <sup>11</sup> Din por laax dád zien ree bejn cayrii loj reeman, abi' caliladx reeman Jesús.

*Bagajpdioz ree bejn Jesús zi'c rey*  
(Mt. 21:1-11; Mr. 11:1-11; Lc. 19:28-40)

<sup>12</sup> Chi bareguiaal, zien da't ree bën zë lanij pascw Jerusalén gogbee guidxin Jesús yagaj, <sup>13</sup> dxel cwa' reeman zijn, brii reeman bigchaagloj reeman laaman, rbidxa' reeman rëb reeman:

—¡Benza'c bendxoon naj Dios! ¡Nünjnle'man Bén guxhaalaman! ¡Nünjnle'man bën naj rey Israel!

<sup>14</sup> Bidxaagloj Jesús tijb burdoo, abi' gudxibaman laab, persi gojc zi'c ca loj xtiidx Dios lod rëb:

<sup>15</sup> Bén Sión, ad rdxebidi.  
Gol baguiaa, laa xreydi zëed,  
dxiibaman tijb burdoo.

<sup>16</sup> Yaløj ad bignia't ree xbejn Jesús ni cayajc. Per chi ma bayë'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

<sup>17</sup> Bén guzu ree con Jesús chi guredxaman Lazr din yariix lën baa, basban tëëman laax loj ree bengüt, rusnuu rü reeman

diidx loj ree bejn ni baguiaa reeman. <sup>18</sup> Zeel zien ree bejn brii bigchaagloj laaman, guial gogbee reeman milagr beenman. <sup>19</sup> Dxel rëb loj lasa' ree bénfarisew:

—Gol baguiaa nial graczi bejn zinal laax, achetri zajc yaguieen ree.

*Yu' ree bén grieg raguiil Jesús*

<sup>20</sup> Loj gra ree bén we lanij bignajchi' reeman Dios Jerusalén, no'ch bëlzi ree bén grieg, <sup>21</sup> gubig reeman loj Felip, bén za guiedx Betsaida, ni riga' niz Galilea, guzajc reeman liaadx rëb reeman:

—Dad, rayënan yaneenë'n Jesús.

<sup>22</sup> Abi' wej Felip biguiedxaman loj Andrejs, dxel wej grop reeman bicojn reeman Jesús. <sup>23</sup> Badxi' Jesúsán rëbaman:

—Ma bidxin hor par Bén guxhaal Dios, guiëtaman abi' yabanman. <sup>24</sup> Diidxliczi rnin, zi'c tijb xob bal idan chu' luyuj najz najn tijbzi, per bal chu'n luyuj zajcxhiejn. <sup>25</sup> Bén ru mazri xgab naabzi por guialnaban yu' loj guidxliuj guie, yu' dxej gunijtaman laan, per bén ru mazri xgab güünman zi'c rën Dios, xhietëez sacaman, zajpaman guialnaban tiblyaa con laaman. <sup>26</sup> Bal chu rën güün ni rënan guidnalaman naj, lod gazun, nëgajcaman su. Bén güün ni rënan, guiën da Dadan laaman.

*Rugojn Jesús guial guiëtaman*

<sup>27</sup> Rëb tëë Jesús:

—Dád yu'n xgab. ¿Xhie guiën? ¿Zën ya: “Dad, babëë naj loj ni gazaagdiajn”? Per ad zëtan zian, din par zian zialan. <sup>28</sup> Dad, balüü xguialrniabeel.

Dxel biguien cha' bejn xanyabaa rëbaman:

—¡Ma balü da guialrniabeen, per gulünan stijb!

<sup>29</sup> Riguiejn ree bén riga' yagaj, zeel rëb reeman:

—Guziaawan guridxa'.

Per yu' reeman rëb:

—Tijb anjlan gunee laaman.

<sup>30</sup> Dxel rëb Jesús:

—Ad por najtan biguien cha' bejn, por lëjtan. <sup>31</sup> Ma bidxin dxej gac guialguxtis loj guidxliuj, yan yarii bén rniabee lojn. <sup>32</sup> Per chi guilies reeman naj ya loj guidxliuj guie, dxel gui't graløj bejn lon.

<sup>33</sup> Zian basignia'man xhienaag guiëtaman. <sup>34</sup> Badxi' ree bén guinan rëb reeman:

—Dunujn rayagbee rëb loj ley, Cristo guiban tiblyaa. ¿Chexc zeel nal, rayal guilies reeman Bén zëëd xanyabaa? ¿Chunin naj Bén zëëd xanyabaa?

<sup>35</sup> Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëë guiniaaz guiaal lëjt. Din bén rza loj xcay, ad ragbeetaman ban cheman. <sup>36</sup> Gol bililadx bajl guie, la'tgaj za'nëdan, din gaquidi xbejnman.

Chi gulox gunee Jesús zian, dxel baquie'chlojman loj reeman.

### *Ad bililadxt ree bejn Jesús*

<sup>37</sup> Majsí been Jesús zien da't milagr baguiaa reeman, ad bililadxt reeman. <sup>38</sup> Zian gojc cumplid ni bacaa Isaías bén badëë xtiidx Dios loj ree bejn, rëban:

Dad, ¿chu ma bililadx ruson radëëdan?

¿Chu loj ma balüü Dios xguialrniabeeman?

<sup>39</sup> Zianan zeel ad gojct nililadx reeman, din në ze bacaa Isaías:

<sup>40</sup> Dios basiaaw guiaal loj reeman,

bascajy tëëman xquiarguiejn reeman,

chitëë guguiaa reeman chignia' tëë reeman,

chitëë yadxi' loj reeman lon, abi' ad zayüntan laa reeman.

<sup>41</sup> Rëb Isaías zian guial baguiaaman xbiani Jesús, zeel baza'taman laaman.

<sup>42</sup> Per ni'czi zian, dád zien ree bén zojbloj bililadx Jesús. Per ad rëbt reeman loj ree bejn zian, guial rdxeb reeman yabëë ree bénfarisew laa reeman lod ricaagdiajg reeman xtiidx Dios,

<sup>43</sup> din mazri rën reeman guiën ree bejn laa reeman, guial guiën Dios laa reeman.

### *Rniee Jesús zi'c rniabee xDadaman*

<sup>44</sup> Gunee Jesús rejs rëbaman:

—Bén rliladx naj, ad najtzan rliladxaman, në da Dadan bén guxhaal naj.

<sup>45</sup> Bén ruguiaa naj, në bén guxhaal naj ruguiaaman. <sup>46</sup> Naj naj bajl, bialan loj guidxliuj guie, chitëë yaya'n ree bén rliladx naj loj xcay. <sup>47</sup> Bal chu guien da diidxan

abi' ad zuzoobtaman laan, ad najt gudëd laaman casti, din ad bialtan din gudëdan casti, bialan din yabën laa reeman loj dol.

<sup>48</sup> Bén ad rënt naj ad rucaagdiajg tëëtaman da diidxan, mal yu' ni gudëd laaman casti: diidx ni rën, laan gudëd laaman casti

chi guidxin dxej. <sup>49</sup> Din ad ni rbëguictan rnien. Da Dadan, Bén guxhaal naj rniabee ni ganen ni gulü tëën, <sup>50</sup> zeel ragbeen, ni rniabee da Dadan runee guialnaban tiblyayaa. Zianan zeel ni

rnin rulünan zi'c rniabeeman.

## 13

### *Gudiib Jesús guia' ree xbejnman*

<sup>1</sup> Guixiezi gal lanij pascw. Ma ragbee Jesús guial ma bidxin hor gusa'nman guidxliuj guie din yaguiaj loj xDadaman.

Zianczi guyën ree xbejnman, bén riga' ree loj guidxliuj, rënman laa reeman goctëëz. <sup>2-4</sup> Chi gad reeman gaw xche,

mal badxe' xindxab ni mal luxdoo Judas, xi'n Simón Iscariote, ma rüjnx xgab yayüx Jesús loj ree bën gugüjt laaman. Ragbee Jesús guial badëed xDadaman gra guialrniabee lojman, laa tēeman guxhaal laaman, zeel yaguaajman lod za'man. La'tgaj cayaw reeman, bisuman xan mex, gulēeman tijb lajd najcwan luya, dxel cwa'man tijb tuay guxhii xizaman. <sup>5</sup> Abi' badxe'man nijs loj tijb xijg, guzulojman caguiibaman guia' ree xbejnman, cucwiidx tēeman laan con tuay naxii xizaman. <sup>6</sup> Chi bayal quiibaman guia' Simón, bën rniee reeman Bëd, rëbaman loj Jesús:

—Dad, ¿luj quiib guia'n ya?

<sup>7</sup> Badxi'man laan rëbaman:

—Ad rignia'til ni cayünan yan, per qui chignia'rilan.

<sup>8</sup> Zeel rëb Bëd lojman:

—Ad zatiëëbtan quiibil guia'n.

Abi' rëb Jesús:

—Bal id zaguiiban guia'l, ad zile'tri gaquil da bejnman.

<sup>9</sup> Zeel rëb Bëd lojman:

—Dad, ad bal guia'zan quiibil, gudiib në yan con guican.

<sup>10</sup> Badxi'man laan rëbaman:

Bën goznejz guia'zaman riaadx chëd, din guidibaman naya.

Abi' lëjt ma nayadi, majsi ad gratidi.

<sup>11</sup> Ma ragbeeman chu yayü laaman, zeel rëbaman: “Ad gratidi naya.”

<sup>12</sup> Chi gulox gudiibaman guia' reeman, bayajcw xabaman, gurejman xan mex guin zatijb, dxel rëbaman:

—¿Bignia'di ni benan ya? <sup>13</sup> Rnieedi naj Mextr në Dad, waliquidi najn. <sup>14</sup> Bal najn Mextr në Dad, gudiiban guia'di, ziangajc quiib guia' lasa'di. <sup>15</sup> Ma balün lëjt, din güündi zi'c benan. <sup>16</sup> Diidxliczi ganin, achut mojs naj mazri guial loj bën rniabee laaman, achut bën ri't naj mazri guial loj bën rxhiala laaman. <sup>17</sup> Bal rignia'di nine güün tēedan, yabaanë Dios lëjt.

<sup>18</sup> Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rëban: “Bën rawnë'n tijbzi, bayejcman contr naj.” <sup>19</sup> Ma rugojnan lëjt din gagbeedi chi gac zian, din chilliladxidi chu najn. <sup>20</sup> Diidxliczi ganin, bën rucaagdiajg ni rëb bën rxhialan, najn rucaagdiajgaman, guiáad bën rucaagdiajg da diidxan, xtiidx bën guxhaal najn rucaagdiajgaman.

*Bagojn Jesús chu yayü laaman*

(Mt. 26:20-25; Mr. 14:17-21; Lc. 22:21-23)

<sup>21</sup> Chi gulox gunee Jesús zian, dád guyunayaman, dxel rëbaman loj reeman zagdxé:

—Diidxliczi ganin, tijb lëjt yayü naj loj ree bën gugüjt naj.

<sup>22</sup> Dxel guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman. <sup>23</sup> Tijb Bén guyën da'taman zojb cwè'man, hor zii chi cayaw reeman xche, <sup>24</sup> dxel been Béd sen lojman din guiniabdiidxaman chunin ruza't Jesús. <sup>25</sup> Zeel mazri gubigaman cwè' Jesús gunabdiidxaman, rëbaman:

—Dad, ¿chunin?

<sup>26</sup> Badxi' Jesúsán rëbaman:

—Gugajdxan ta'n guiadxtil, din loj xin gudëdanan, laaxan yayü naj.

Dxel bagajdxaman ta'n guiadxtil badëëman laan loj Judas, xi'n Simón Iscariote. <sup>27</sup> Chi gudawixan, laa guyu gajc xindxab luxdoox. Zeel rëb Jesús lojx:

—Ni güünl, cari beenan.

<sup>28</sup> Per achutczi ree Bén zojb xan mex guin bignia' chexc zeel rëbaman zian. <sup>29</sup> Guial ca' Judas bols ni yu' milia, zeel naladx garol reeman rëb Jesús lojx din chisiix ni gaw reeman lanij guin o gudëëdix ta'n nan loj ree Bén rzagdiaj ya. <sup>30</sup> Chi ma gudawix guiadxtil guin, dxel briix, ma guxhin.

### *Gunabee Jesús tijb nicüb*

<sup>31</sup> Chi ma brii Judas, rëb Jesús loj ree xbejnman:

—Yan guien xguialrniabee Bén guxhaal Dios din gagbee ree bejn xhienaag naj guialrniabee gudëë Dios lojman. <sup>32</sup> Din bal gulüü Bén guxhaal Dios xguialrniabee Dios, ziangajc gulüü Dios xguialrniabeeman, zeel ma gudëëdaman laan. <sup>33</sup> Xi'n, ad zien dxejtri gazunë'n lëjt, yaguilidi naj, per zi'cgajc rën loj ree bejn, ziangajc ganin lojdi yan: Ad zajct chedi lod gan. <sup>34</sup> Ganin tijb nicüb ganabeen: Gol guyën lasa'di zi'c rënan lëjt. <sup>35</sup> Bal guiën lasa'di, zian gagbee gra bejn guial najdi da bejnan.

### *Guiëb Béd ad nünbeetaman Jesús*

(Mt. 26:31-35; Mr. 14:27-31; Lc. 22:31-34)

<sup>36</sup> Gunabdiidx Béd loj Jesús rëbaman:

—Dad, ¿ban chel?

Zeel rëb Jesús:

—Ad zajct guidnalil naj lod gan yan, per zadxin dxej guidnalil naj.

<sup>37</sup> Zeel rëb Béd:

—Dad, ¿chexc zeel ad zajct guidnaan lüj yan? Xt zajc guiëtan por lüj.

<sup>38</sup> Badxi' Jesúsán rëbaman:

—¿Walil ya rënl guiëtil por naj? Diidxiczi ganin, chi gad guid cwidxa', mal rëbil choon volt, ad nünbeetil naj.

## 14

*Jesús naj nejz guidxinnë bejn loj Dios*

<sup>1</sup> Rëb tëë Jesús:

—Ad rudi xgab. Gol bililadx Dios, gol bililadx tëë naj. <sup>2</sup> Lidx da Dadan dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi. <sup>3</sup> Chi ma benchaawan luar guin, dxel yaguialan guidgaxin lëjt din sudi lod gazun. <sup>4</sup> Ma nünbeedi nejz zë lod gan.

<sup>5</sup> Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejz guin?

<sup>6</sup> Badxi'man laan rëbaman:

—Naj naj nejz, najn diidxli, naj tëën guialnaban. Tijbzi naj zajc chinë' bejn ree loj da Dadan. <sup>7</sup> Bal nünbeedi naj, në da Dadan güünbeedi. Per ma nünbeedi laaman diizd yan, din ma baguiaadi laaman.

<sup>8</sup> Dxel rëb Felip:

—Dad, banee mod majsı yaguiaazan bën naj xDadil.

<sup>9</sup> Badxi'man laan rëbaman:

—Felip, ma gojc xchej za'në'n lëjt. ¿Nid wayünbeel naj ya? Din bën ruguiaa naj, da Dadanan ruguiaaman. ¿Chexc zeel nal gunen mod guguaaal da Dadan? <sup>10</sup> ¿Nid rliladxil ya, naj za'në' da Dadan, guiáad laaman za'në' naj? Ni rnin lojdi, ad rbëguictanan. Da Dadan, bën nabannë'n, laaman rüjn dxiin guin. <sup>11</sup> Gol bililadx naj za'në' da Dadan, guiáad laaman za'në' naj. Balgui majsı ni rünzan gol bililadx. <sup>12</sup> Diidxliczi ganin: Bén rliladx naj, nëgajcaman güün ni rünan, güünman ni mazri narooob, din naj yaya' lod za' da Dadan. <sup>13</sup> Graczi ni guini-abidi lojman por naj, günanan din gulün xguialrniabeeman. <sup>14</sup> Günan xhietëez ni guiniabidi.

*Guixhiaal Jesús xSprijtaman*

<sup>15</sup> Bal rëndi naj, gucaagdiajguidi ni balün. <sup>16</sup> Din guië loj da Dadan guixhiaalaman Sprijt sunë lëjt, <sup>17</sup> Sprijt gulüü diidxli, din zianczi sunëman lëjt. Bén ad rliladxt ree Dios ad zajct tia' reeman Sprijt guin, din ad ruguiaat reeman ad nünbee tëët reeman laaman. Per lëjt nünbee laaman, din sunëman lëjt yaya'n tëëman luxdoodi tiblyaa. <sup>18</sup> Ad zusa'ntan xtijbidi, yaguialan stijb guidganan lëjt. <sup>19</sup> Sta'nz riaadx ad zuguaatri ree bënguidxliuj naj, per lëjt guguaadi naj, guibandi din naban. <sup>20</sup> Dxej zii ree, gagbeedi za'në' da Dadan, lëjt za'në' naj, guiáad naj za'në'n lëjt zianczi. <sup>21</sup> Bén rucaagdiajg ni rniabeen rüjn tëëman laan, walicaman rënman naj. Guiën da Dadan bën rën naj, në naj guiën laaman din güünbeeman naj.

<sup>22</sup> Gunabdiidx Judas (ad bën bayüt Jesús) rëbaman:

—Dad, ¿chexc zeel dunujzan yayagbee chu lüj, guiáad ree bénguidxliuj ad zagbeet reeman?

<sup>23</sup> Badxi' Jesúsán rëbaman:

—Bén guiën naj guzoobaman da diidxan, guiën da Dadan laaman, guiáad naj guidnë' da Dadan din yabajnnë'n laaman. <sup>24</sup> Bén ad zënt naj ad zuzoobtaman da diidxan, din diidx cucaagdiajguidi yan ad da diidxtanan, xtiidx da Dadanan bén guxhaal naj.

<sup>25</sup> 'Canin lojdi gra nine, la'tgaj za'në'n lëjt. <sup>26</sup> Per xSprijt Dios, bén sunë lëjt zianczi, bén guixhiaal da Dadan por naj, graczi gulüüman lëjt din gusaaladxidi ni canin.

<sup>27</sup> 'Chi yaya'n, yabecdxen luxdoodi, gunen guialnaza'c lojdi, ad zi'c runeet ree bénguidxliujn, ad bal ru nayadi ad rdxeb tëedi. <sup>28</sup> Ma rnin lojdi, yaya'n, dxel yaguialan zatijb. Bal walidi rëndi naj, chu' luxdoodi zagdxe, guial gagbeedi yaya' loj da Dadan, din mazri zobjlojman guial lon. <sup>29</sup> Ma rugojnan lëjt, din chi gac zian, chililadxidi.

<sup>30</sup> 'Ad zro'tri ganenë'n lëjt, din ma zëed xin rniabee guidxliuj, majsi ad nët naj rniabeex. <sup>31</sup> Per zian gac din gagbee ree bénguidxliuj, rënan da Dadan, zeel rünan ni rniabee-man. Gol bisu, yo' ree yan.

## 15

### *Rën Jesús yadxu'në' reeman zianczi*

<sup>1</sup> Basnuu rëb Jesús:

—Naj naj zi'c yag rtia ni nejxh zagdxe, guiáad da Dadan naj zi'c Bén rxübin laan. <sup>2</sup> Da bejn reen naj zi'c ree xidx yag guin. Bal id rtia reen gutüüg da Dadan laa reen. Per bal rtia reen, gusiaman laa reen din tia reen mazri. <sup>3</sup> Lëjt ma nayadi, guial basia diidx rnin lëjt. <sup>4</sup> Gol gubajnnë naj zi'c nabannë'n lëjt. Ad zajct tia xidx yag, bal id najnën yag guin tijbzi. Ziangajc lëjt ad zajct güündi ni rën Dios bal id za'nëdi naj.

<sup>5</sup> 'Naj naj zi'c yag rtia ni nejxh, guiáad lëjt naj zi'c xidxan. Bén sunë naj zianczi nuchajgaman naj, guiáad naj nuchagan laaman, zeel rüjman ni rën Dios. Din bal ichu naj, achet zajc güündi. <sup>6</sup> Bén ad zazujnët naj guizëebaman zi'c yagbidx ruto'p reeman, din che'can.

Rëb tëë Jesús:

<sup>7</sup> —Bal za'nëdi naj tijbzi ruzoob tëedi da diidxan, gol gunab ni rëntzidi, din tia'dan. <sup>8</sup> Bal güündi ni rën da Dadan, gaquidi quijb da bejnan, din guza't ree bejn laaman zagdxe. <sup>9</sup> Rënan lëjt zi'c rën da Dadan naj, gol basaalex rënan lëjt. <sup>10</sup> Bal guzoobidi da diidxan, gusaaladxidi rënan lëjt, zi'cgajc ruzoban xtiidx da Dadan, ragbeen rënman naj.



<sup>11</sup> 'Rnin lojdi zian din chu' luxdoodi zagdxex zi'c yu' luxdon zagdxex, zagdxex da't chu' luxdoodi. <sup>12</sup> Gol guyën lasa'di zi'c rënan lëjt, laan rniabeen güüdi. <sup>13</sup> Achut rën xmiw mazri guial loj bën rëjt por laa reeman. <sup>14</sup> Lëjt naj da miwan bal güüdi ni rënan. <sup>15</sup> Ad zanetran lëjt mojs, din mojs ad ragbeetaman xhie rüjn bën rniabee laaman. Ganen lëjt miw, din balün lëjt graczi ni na da Dadan lon. <sup>16</sup> Ad lëjtt gule naj, naj gule lëjt. Zeel rnin lojdi, chedi chiglüüdi bejn ree ni rën da Dadan, din gusnuu güün reeman ni rënman, din guneeman graczi ni guiniabidi por naj. <sup>17</sup> Rniabeen: Guiën lasa'di.

*Ralen ree bejn Jesús con ree xbejnman*

<sup>18</sup> Rëb tëë Jesús:

—Bal ralen ree bénguidxliuj lëjt, gol basaaladx, yaloj naj balen reeman. <sup>19</sup> Bal niajquidi bénguidxliuj, niën reeman lëjt zi'c rën lasa' reeman. Per naj gule lëjt loj reeman, zeel ralen reeman guial ad najtidi bénguidxliuj. <sup>20</sup> Gol basaaladx ni rnin: “Achut mojs naj mazri guial loj bën rniabee laaman.” Bal basagzi reeman naj, ziangajc gusagzi reeman lëjt, bal bazoob reeman da diidxan, ziangajc guzoob reeman xtiidxidi. <sup>21</sup> Graczi nine güünnë reeman lëjt por naj, din ad nünbeet reeman bën guxhaal naj.

<sup>22</sup> 'Achet xtol reeman niu, bal idan nial ninienë'n laa reeman, per yan yu' xtol reeman. <sup>23</sup> Bén ralen naj, nëgajc da Dadan ralenman. <sup>24</sup> Achet xtol reeman niu, bal idan nün ree ni benan loj reeman ni achutczzi wayüjn, per ma baguiaa reeman laa reen, majsi zian ralen gajc reeman naj në da Dadan. <sup>25</sup> Per rajc zian din gac cumplid ni ca loj xley reeman, rëban: “Achet rünan ralen reeman naj.”

<sup>26</sup> 'Per chi gui't Sprijt gaxhalan din sunëman lëjt gulüü tëëman diidxli, Sprijt zëed loj da Dadan, laaman gü da diidxan. <sup>27</sup> Nëgajc lëjt gü laan, din diizd yaloj za'nëdi naj.

## 16

<sup>1</sup> 'Rnin zian, din ad zabëjzt chililadxidi naj. <sup>2</sup> Yabëë reeman lëjt lod ricaagdiajg reeman xtiidx Dios, zadxin dxex, chutëez bën gugüjt lëjt naladx reeman Dios cayüjn reeman wen. <sup>3</sup> Güün reeman zian din ad nünbeet reeman naj ni'qui da Dadan. <sup>4</sup> Per ma rnin lëjt, din chi guidxin dxex guin gusaaladxidi guial ma bagojnman lëjt.

*Ni rüjn xSprijt Dios*

'Ad rnitan lojdi zian diizd yaloj, din naj guzunë' lëjt. <sup>5</sup> Per yan yaya'n loj bën guxhaal naj. Achutczzidi rniabdiidx ban gan, <sup>6</sup> aal yu'nayadi guial canin zian. <sup>7</sup> Per diidxliczi rnin: zagdxex najn yaya'n. Din bal idan yaya', ad zi'tt xSprijt Dios

sunë lëjt, per bal yaya'n, naj gaxhal laaman. <sup>8</sup> Chi gui'taman, laaman gulüü ree bénguidxliuj ni naj dol, ni naj ni zagdxe, në xguialguxtis Dios. <sup>9</sup> Gagbee reeman yu' xtol reeman, guial ad riladxt reeman naj. <sup>10</sup> Ni zagdxe guin naj guial yaya' loj da Dadan din ad zuguaatrudi naj. <sup>11</sup> Guiáad Dios ma been xguialguxtisaman con xindxab rniabee guidxliuj.

<sup>12</sup> 'Yu'ri ni rënan ganin, per dád zien gacan par lëjt. <sup>13</sup> Chi gui't Sprijt gulüü lëjt diidxli, din ad züt xtiidx gajcaman, guinieeman graczi ni guienman, laaman gulüü lëjt ni gac. <sup>14</sup> Guza'taman naj zagdxe, din naj gudëd ni gulüüman lëjt. <sup>15</sup> Graczi ni rajp da Dadan naj par naj, zeel rnin, Sprijt guin tia' ni gudëdan din gulüüman laan lëjt.

### *Guguaiaa ree xbejn Jesús laaman zatijb*

<sup>16</sup> 'Ma guidxin dxej ad zuguaatrudi naj, per ad zajct xchej, guguaiaadi naj stijb.

<sup>17</sup> Chi rëb Jesús zian, dxel guzuloj ree xbejnman canabdiidx loj lasa' reeman, rëb reeman:

—¿Chexc zeel naman, ma guidxin dxej ad zuguaatri reeman, per ad zajct xchej, yaguaiaa reeman stijb, din yaguaiaj loj xDadaman? <sup>18</sup> ¿Chexc zeel naman: “Ad zajct xchej”? Ad rayignia't ree ni caneeman.

<sup>19</sup> Gogbee Jesús guial rën reeman guiniabdiidx reeman, zeel rëbaman:

—Ma rnin lojdi, ma guidxin dxej ad zuguaatrudi naj, per ad zajct xchej, guguaiaadi naj stijb. ¿Ni nen canabdiidxidi ya?

<sup>20</sup> Diidxli ganin, goondi chu' tëë luxdoodi naya, guiáad ree bénguidxliuj yabaa reeman. Per majsi chu' luxdoodi naya, guidxin dxej yabaadi. <sup>21</sup> Chi gal xi'n béngunaa, rdëdaman tarbajw, din ma bidxin hor guin. Per chi ma gojl xi'nman, dxel rayanladxaman tarbajw guin, ru luxdoodi zagdxe, guial ma gojl xi'nman. <sup>22</sup> Ziangajc lëjt cadëdidi tarbajw yan, per chi guguaian lëjt zatijb, chu' luxdoodi zagdxe, achutczi zajc yabëë laan luxdoodi.

<sup>23</sup> 'Dxel achetri guiniabdiidxidi lon. Diidxliczi ganin, graczi ni guiniabidi loj da Dadan por naj, guneeman. <sup>24</sup> Guiáad yan achet wanabidi por naj, gol gunaban din tia'dan, din chu' luxdoodi zagdxe tiblayaa.

### *Yaguaiaj Jesús lod guzaman*

<sup>25</sup> Rëb tëë Jesús:

—Rnin nine ree zi'c cwent, per zadxin dxej ad zulütran zian, gusignia'n lëjt zagdxe xcwent da Dadan. <sup>26</sup> Dxej zii ree guiniabidi loj da Dadan por naj, ad rüjnt naguiejn ganaaban por lëjt lojman, <sup>27</sup> din rënman lëjt, rënman lëjt guial rëndi naj riladxt tëëdi guial laaman guxhaal naj. <sup>28</sup> Briin lod za' da

Dadan persi bialan loj guidxliuj guie, yan gusa'n nan laan din yaya'n lojman.

<sup>29</sup> Dxel rēb ree xbejnman:

—Yanri ma cusignia'l zagdxe. <sup>30</sup> Rayagbeen rajquil graczi, ad rüjnt naguiejn chu guiniabdiidx lojl. Zianan zeel raliduladxan guxhaal Dios lüj.

<sup>31</sup> Badxi' Jesús laan rēbaman:

—¿Ma rliiladxidi yan ya? <sup>32</sup> Gol gogbee, ma bidxin hor yare'chidi, tijb gajdi yaguaiaj lidx, gusa'ndi da xtijban. Per ad za't da xtijban, da Dadan za'nē naj. <sup>33</sup> Rnin gra nine din cwedi zagdxe guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

## 17

### *Gurejdx gunab Jesús xDadaman por ree xbejnman*

<sup>1</sup> Chi gulox rēb Jesús zian loj ree xbejnman, dxel baguiaaman xanyabaa rēbaman:

—Dad, ma bidxin hor, balüü da guialrniabeen din gulün xguialrniabeel. <sup>2</sup> Baneel guialrniabee lon din ganabeen gra bejn gudēd tēen guialnaban tiblayaa loj gra bēn baneel.

<sup>3</sup> Guiban reeman tiblayaa bal güünbee reeman lüj, tijbzi lüj naj quijb Dios, güünbee tēē reeman najn guxhaalil.

<sup>4</sup> 'Naj bazat lüj zagdxe loj guidxliuj; yan ma gulox benan ni nal. <sup>5</sup> Yan, Dad, yaguialan lojl, din yaneel guialrniabee ca'n gocli, diizd chi gad guidxliuj gacchaaw.

<sup>6</sup> Rēb tēē Jesús:

—Bēn gulel loj guidxliuj baneel lon, ma balün laa reeman chu lüj. Gojc reeman xbejnl, per baneel laa reeman lon, ma bazoob reeman xtiidxil. <sup>7</sup> Yan ma gogbee reeman guial gra ni benan gra tēē ni balün naj xieenl. <sup>8</sup> Gunen xtiidxil ni baneel, zeel bacaagdiajg reeman laan, gogbee reeman, walican lojl guzaan, bililadx tēē reeman lüj guxhaal naj.

<sup>9</sup> 'Rbedx rniaaban lüj por laa reeman, guial naj reeman xbejnl banee tēēl laa reeman lon, ad rbedx rniaabtan por ree bēnguidxliuj. <sup>10</sup> Gra ni ca'n naj xieenl, guiáad gra ni ca'l naj da xieenan, ma rguien da guialrniabeen por ree bēn baneel.

<sup>11</sup> 'Ad zazutran loj guidxliuj, per laa reeman suri reeman guie, guiáad naj yazaan din yaguialan lod za'l. Dad, lüj naj bēn naya nali, gunaj reeman con gra guialrniabee ca'l ni banee tēēl lon, din gac reeman tijbzi zi'c nayajc. <sup>12</sup> Chi guzunē'n laa reeman loj guidxliuj, gunan laa reeman con xguialrniabeel ni baneel. Achut reeman bizēēb, tijbzi xin ma naj diidx bizēēb, din gac cumplid ni ca loj xtiidxil.

<sup>13</sup> 'Yan yaguialan lod za'l, per canen zian la'tgaj za'n loj guidxliuj guie, din chu' luxdoo reeman zagdxe, zi'c yu' luxdon

zagdxē. <sup>14</sup> Ma balün laa reeman xtiidxil, zeel ralen ree bénguidxliuj laa reeman guial ad najt reeman bénguidxliuj, zi'cgajc ad najtan bénguidxliuj. <sup>15</sup> Ad rniaabtan yabëel laa reeman loj guidxliuj, rënan guinial laa reeman, chitëe güün reeman ni mal. <sup>16</sup> Ad najt reeman bénguidxliuj, zi'cgajc naj. <sup>17</sup> Basia reeman con xtiidxil, din laan naj ni diidxli. <sup>18</sup> Zi'c guxhaalil naj loj ree bénguidxliuj, ziangajc rixhial ree da bejnan loj reeman. <sup>19</sup> Por laa reeman rudëd da guialnabanan din gac reeman xbejnl diidxliczi.

<sup>20</sup> Basnuu Jesús, rëbaman:

—Ad por laatzl reeman rbedx rniaaban lüj, në por ree bén chililadx chi gucaagdiajg reeman ni guiniee reeman. <sup>21</sup> Rniaaban lojl din guchajg lasa' reeman din yayajcnë' reeman tijbzi, Dad, zi'c za'nël naj ziangajc za'në'n lüj, ziangajc sunë lasa' reeman. Din chililadx ree bejn lüj guxhaal naj. <sup>22</sup> Badëdan guialrniabee baneel loj reeman, din gac reeman tijbzi zi'c nayajc, <sup>23</sup> naj za'në' laa reeman, guiáad lüj za'nël naj. Zeel gac reeman tijbzi din gagbee ree bejn, lüj guxhaal naj rën tëel laa reeman zi'c rënl naj.

<sup>24</sup> Dad, lüj baneel laa reeman lon, zeel rënan su reeman lod gazun din guguaa reeman biani baneel lon, din guyënl naj diizd chi gad guidxliuj gacchaaw. <sup>25</sup> Dad, lüj rüjn guialguxtis zagdxē. Ad nünbeet ree bénguidxliuj lüj, sa'n naj nünbeen lüj, në ree da bejnan ragbee lüj guxhaal naj. <sup>26</sup> Balün laa reeman chu najl, gulüran laa reeman mazri, din gagbee reeman rënl laa reeman zi'c rënl naj, gazunë' tëen laa reeman.

## 18

### *Bayü Judas Jesús*

*(Mt. 26:47-56; Mr. 14:43-50; Lc. 22:47-53)*

<sup>1</sup> Chi gulox gunee Jesús zian, dxel briinë ree xbejnman, zë reeman stiblad ro' guiiw la Cedrón, bidxin reeman lod yu' ree yag. <sup>2</sup> Në Judas, xin yayü laaman, nünbee yagaj, guial zien volt binëman laa reeman ni. <sup>3</sup> Zeel bidxinnëx tibcwaa ree suldad në ree bén rajp ro' yadoo, guxhaal quijb ree bixhioz laa reeman në ree bénfarisew, ca' reeman bajl rusni ree, në ree espad con ree lans. <sup>4</sup> Per ma ragbee Jesús gra ni gac, briiman gunabdiidxaman loj reeman, rëbaman:

—¿Chu raguuilidi?

<sup>5</sup> Badxi' reeman laan rëb reeman:

—Jesús bén Nazaret.

Abi' rëbaman loj reeman:

—Najn.

Judas xin bayü laaman bidxinnë laa reeman. <sup>6</sup> Chi rëbaman loj reeman: “Najn”, dxel baguiadruxan reeman biajb reeman luyuj. <sup>7</sup> Gunabdiidxaman zatijb rëbaman:

—¿Chu raguuilidi?

Rëb reeman:

—Jesús bén Nazaret.

<sup>8</sup> Zeel rëbaman:

—Ma rnin, najn. Bal naj raguuilidi, gol baslaa ree bén guie yaguiaj reeman.

<sup>9</sup> Zian gojc cumplid ni rëb loj xDadaman: “Achut ree bén baneel lon bizëeb.” <sup>10</sup> Dxel gulëë Bëd espad, gutü'man guidiajg ladbee xin la Malco, najx xmojs quijb bixhioz zojbloj. <sup>11</sup> Dxel rëb Jesús loj Bëd:

—Bagu'chaaw espad zii. Bal rën da Dadan gazaagdiajn zian, gaza'canan.

### *Biniaaz Jesús*

(Mt. 26:57-58; Mr. 14:53-54; Lc. 22:54)

<sup>12</sup> Suldad guin ree con xin rniabee laa reex con ree bén rajp ro' yadoo gunaaz reeman Jesús, guxhii reeman laaman.

<sup>13</sup> Dxel binë reeman laaman yaloj lidx bén la Anás, din laaman naj xdadsuegr Caifás quijb bixhioz zojbloj loj ijz zii.

<sup>14</sup> Laagajcaman rëb loj gabilt, mazri zagdxe guiët tijbzi bejn por gra ree bén Israel.

### *Rëb Bëd ad najtaman xbejn Jesús*

(Mt. 26:69-70; Mr. 14:66-68; Lc. 22:55-57)

<sup>15</sup> Tio'p ree xbejn Jesús binal laaman. Tijbaman la Simón, bén rniee reeman Bëd, stijbaman naj bén nünbee quijb bixhioz zojbloj, zeel guyunëman Jesús lënü guin, <sup>16</sup> guiáad Bëd baya'nman lule'. Zeel barrii bén nünbee bén rniabee ree bixhioz, guneenëman biin rajp ro' port guin, persi guyu Bëd lënü. <sup>17</sup> Gunabdiidxim lojman rëbim:

—¿Nid lüjn naj tijb xbejn bén guin ya?

Badxi'man laan rëbaman:

—Ad najtan.

<sup>18</sup> Per guial dád nayaag, zeel bén naj ree mojs con ree bén rajp ro' yadoo nabe'c reeman guij rucha' reeman. Nëgajc Bëd cucha'në reeman rudëj guin.

### *Gunabdiidx Anás loj Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Guzuloj bén la Anás canabdiidxaman loj Jesús xcwent ree xbejnman në xcwent ni rulüüman. <sup>20</sup> Zeel rëb Jesús:

—Gunen loj gra ree bejn. Zianczi balün lod rucaagdiajg ree xtiidx Dios në lën dux yadooro' ree, lod rado'p dugra ree. Achet ni gunen ralan. <sup>21</sup> ¿Chexc zeel rniabdiidxil lon?

Gunabdiidx loj ree b́en bacaagdiajg ni ŕen, laa reeman na xhie gunen, laa reeman ragbee.

<sup>22</sup> Chi ŕebaman zian, tijb b́en rajp ro' yadoo guin ẃeéz ro'man, ŕebaman:

—¿Zian yadxi'l xtiidx b́en rniabee guin ya?

<sup>23</sup> Badxi' Jesús laan ŕebaman:

—Bal xhie ni mal ŕen, guna xhienin. Per bal gunen zagdxe, ¿chexc zeel rguinl naj?

<sup>24</sup> Dxel guidib naxiiman guxhaal Anás laaman loj Caifás, b́en naj quijb bixhioz zojbloj.

*Ŕeb Béd stijb ad núnbeetaman Jesús*

(Mt. 26:71-75; Mr. 14:69-72; Lc. 22:58-62)

<sup>25</sup> Per Béd sta za'man cucha'man ruděj guin. Abi' gunabdiidx reeman lojman, ŕeb reeman:

—¿Nid ńe lúj naj tijb ree xbejn b́en guin ya?

Badxi' Béd laan ŕebaman:

—A'n, ad xbejntaman naj.

<sup>26</sup> Dxel tijb xmojs bixhioz zojbloj guin, b́en naj lasa' b́en gutü' Béd guidiajg, ŕebaman loj Béd:

—¿Nid lújñ baguian ya za'nél laaman guia' ree yag olivos?

<sup>27</sup> Ŕeb Béd stijb guial ad núnbeetaman Jesús, loj hor zii gajc guridxa' tijb guíd.

*Biné reeman Jesús loj Pilato*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Chi bani luyuj, bazané reeman Jesús lidx Caifás, ziné reeman laaman lén xpalas gobernador Pilato. Per ree b́en Israel guin ad guyut reeman lén palas guin, din par laa reeman bal niu reeman, ad nayatri reeman loj Dios, abi' ad nile't niajw reeman xche guialraw ni raw reeman pascw.

<sup>29</sup> Zeel brii Pilato persi guneenéman laa reeman, ŕebaman:

—¿Xhie been xin guie zeel zidnédi laax guie?

<sup>30</sup> Badxi' reeman laan ŕeb reeman:

—Bal najman benza'c, ad ziant nudné'n laaman lojl.

<sup>31</sup> Dxel ŕeb Pilato:

—Gol bignëx, gol been guialguxtis zi'c naj xleydi.

Abi' ŕeb reeman:

—Per ad naca'tan guialrniabee yanabeen guiët bejn.

<sup>32</sup> Zian gojc cumplid xtiidx Jesús chi bagojnman xhienaag guiëtaman. <sup>33</sup> Bayu Pilato lén palas guin, dxel gurejdxaman Jesús, gunabdiidxaman lojman ŕebaman:

—¿Lúj naj xrey ree b́en Israel ya?

<sup>34</sup> Badxi' Jesúsán ŕebaman:

—¿Lújczí rniabdiidx lon ya o yu' ree ben ren na lojl zian?

<sup>35</sup> Badxi' Pilato laan, ŕebaman:

—¿Wen b́en Israel naj ya? B́en ladx gajc reel con ree bixhioz rniabee bidnē lūj lon. ¿Xhie beenl?

<sup>36</sup> Badxi' Jeśusan rēbaman:

—Guialrniabee ni ra'pan ad lojt guidxliuj zan, din bal loj guidxliuj zan, nia'pan b́en nidijl ree chitēē niniaaz ree ben Israel naj. Per yan ad lojt guidxliuj guie za da guialrniabeen.

<sup>37</sup> Dxel rēb Pilato lojman:

—¿Zē loj diidxan ya rey najl?

Badxi' Jeśus laan rēbaman:

—Reyqui naj, zi'c nal. Par zian goolan par zian tēē zialan loj guidxliuj guie zidgaguien ni naj diidxli, graczi ree b́en zinal ni diidxli rucaagdiajg reeman ni rnien.

<sup>38</sup> Dxel rēb Pilato:

—¿Xhiezarin naj diidxli?

*Gunabee reeman guiēt Jeśus*

*(Mt. 27:15-31; Mr. 15:6-20; Lc. 23:13-25)*

Chi gulox rēb Pilato zian, dxel briiman bigneenēman b́en Israel ree stijb, rēbaman:

—Achet xguialquia xin guin radxejlan. <sup>39</sup> Per lējt, xcostumbridi naj guial loj lanij pascw laa tijb b́en yu' ladxguiib. Yan, ¿rēndi ya guslaan xreydi?

<sup>40</sup> Dxel gurixdiaj ree b́en Israel guin, rēb reeman:

—¡Ad laataman guslaal! ¡Zagdxeli baslaa Barrabás!

Abi'za Barrabás guin b́engubaanan.

## 19

<sup>1</sup> Dxel gunabee Pilato gudijn ree suldad Jeśus. <sup>2</sup> Abi' beenchaaw reeman coron guiējch, badxe' reeman laan guijcaman, bascajcw reeman laaman tijb lajd xniaya's. <sup>3</sup> Dxel gubig reeman lojman, rēbgaj reeman:

—¡Guibanri xrey ree b́en Israel!

Dxel rēēzgaj reeman lojman.

<sup>4</sup> Brie Pilato stijb, abi' rēbaman loj ree b́en Israel guin:

—Gol baguiaa, gabēn laax din gagbeedi, achet xguialquiax radxejlan.

<sup>5</sup> Dxel brie Jeśus, yu' coron guiējch guin guijcaman, najcw tēēman lajd xnia guin. Abi' rēb Pilato:

—Laax guie.

<sup>6</sup> Dxel bixhioz rniabee ree nē ree b́en rajp ro' yadooro' Jerusalén, chi baguiaa reeman laaman, guzuloj rbixdiaj reeman, rēb reeman:

—¡Bacaax loj crūjz! ¡Bacaax loj crūjz!

Rēb Pilato loj reeman:

—Gol chinēx, lējt gol bacaax loj crūjz, achet xtolix radxejlan.

<sup>7</sup> Badxi' reeman laan rēb reeman:

—Laa tijb dux leyan yu', rëb lojn rayal guiëtix, guial nax najx Xi'n Dios.

<sup>8</sup> Chi biguienman ni rëb reeman, mazri bidxebaman.  
<sup>9</sup> Bayuman lën palas guin zatijb, gunabdiidxaman loj Jesús rëbaman:

—¿Ban xin lüj?

Per ad badxi't Jesús laan. <sup>10</sup> Zeel rëb Pilato:

—¿Nid zadxi'l ni rnin ya? ¿Nid ragbeel ya ca'n guialrniabee din gucan lüj loj crüjz o guslaan lüj ya?

<sup>11</sup> Dxel rëb Jesús:

—Achetczi guialrniabee nitia'l bal id Dios nunee laan. Zianan zeel mazri zien xtol bën bidnë naj guie yu' guial lojl.

<sup>12</sup> Diisd hor zii gajc raguiil Pilato mod, xhienaag guslaaman Jesús, per rbidxa' ree bën riga' yagaj, rëb reeman:

—¡Bal guslaal laax, ad najtil xmiw bën naj César! ¡Din chutëez bën rajc rey rzuj contr César!

<sup>13</sup> Chi biguien Pilato rëb reeman zian, gunabeeman babëë reeman Jesús, dxel gurej lod rniabeeman, lod la Gabata con diidx hebreo, rën guiëban Lod yu' ree guiaj. <sup>14</sup> Chi guixiez gal lanij pascw, cost garol dxej rëb Pilato loj ree bën Israel:

—¡Laa xreydi guie!

<sup>15</sup> Per rbidxa' reeman rëb reeman:

—¡Guiëtix! ¡Guiëtix! ¡Bacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

<sup>16</sup> Dxel bayü Pilato Jesús loj ree suldad din gucaa reex laaman loj crüjz, dxel zinë reex laaman.

*Cwa Jesús loj crüjz*

*(Mt. 27:32-44; Mr. 15:21-32; Lc. 23:26-43)*

<sup>17</sup> Briinë reex Jesús, nüüman crüjz, binë reex laaman lod la Calaver, diidx hebreo lan Gólgota. <sup>18</sup> Ni bacaa reex laaman loj crüjz con zatio'p ree bejn, tijb gaj reeman ca cwë'man.

<sup>19</sup> Gunabee Pilato cwa lejtr guiyc crüjz guin, rëban: “Jesús bën Nazaret, xrey ree bën Israel.” <sup>20</sup> Dád zien ree bën Israel biil lejtr guin, guial naj luar zii gajxh loj ciuda, guiáad lejtr guin can con diidx hebreo, diidx latin në diidx grieg. <sup>21</sup> Rëb ree bixhioz rniabee ree bixhioz loj Pilato:

—Ad rucaal: “Xrey ree bën Israel”, bacaa: “Bën rëb naj xrey ree bën Israel.”

<sup>22</sup> Badxi' Pilato laan rëbaman:

—Ni ma bacan yaya'nan zian.

<sup>23</sup> Chi gulox bacaa ree suldad guin Jesús loj crüjz, baca' reex xabaman, gudixya' reexan tajp la', dxel cwa' reex tib la' gajn.



Në stijb xabaman cwa' reex, ad nadiibtan, najcchaaw diizd yějnan xt guia'n, najn tijbzi lajd. <sup>24</sup> Zeel rëb loj lasa' reex:

—Ad zarooxt reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rëban: “Bala' reeman da xaban, gudxijt tëe reeman suert gujcan.” Zeel been ree xinsuldad guin zian.

<sup>25</sup> Gajxh cwë' crüjz ca Jesús za' xniaaman con xbël xniaaman con Li xbéngunaa Cleofas con Li bën gunee reeman Magdalena. <sup>26</sup> Chi baguiaa Jesús xniaaman, za' tijb ree xbejnman cwë'man, bën rën da'taman, rëb loj xniaaman:

—Na, laa xi'nl yagaj.

<sup>27</sup> Dxel rëb loj xbejnman:

—Laa xniaal yagaj.

Diizd dxej zii bignëman xniaa Jesús lidxaman.

### *Güjt Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Chi gulox rëb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rëbaman:

—Re'can nijs.

<sup>29</sup> Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxel badxig reexan ro'man. <sup>30</sup> Chi ma gu'man laan, dxel rëbaman:

—Ma gojc gran cumplid.

Dxel basajb lojman luyuj, güjtaman.

### *Guliiz tijb suldad guiib cwë'lën Jesús*

<sup>31</sup> Ma cayüjn ree bën Israel porvinid din guixiez gal lanij pascw. Zeel ad guyënt reeman naya'n ree cuerp guin loj crüjz dxej raziiladx reeman, din dád rajp reeman dxej guin respejt. Zeel biguiedx reeman loj Pilato din nabeeman qui'ch ree suldad guin xdxijt ree bën ca loj crüjz din guiët reeman yalet tëe reex laa reeman. <sup>32</sup> Zeel wej reex. Yaloj gudi'ch reex xdxijt bën ca cwë' Jesús, dxel gudi'ch reex xdxijt bën ca stiblad cwë'man. <sup>33</sup> Chi gubig reex lod ca Jesús, baguiaa reex ma güjtaman, zeel ad gudi'cht reex xdxijtaman.

<sup>34</sup> Per tijb suldad guin guxhal ladaman con guiib ca'x, dxel briin rejn con nijs. <sup>35</sup> Bën rü diidx guie baguiaaman, zeel ragbeeman najn diidxli, rüman laan din në lëjt chililadx.

<sup>36</sup> Gra nine gojc din gac cumplid ni ca loj xtiidx Dios, rëban: “Ad rayalt gach xdxijt xiildoo.” <sup>37</sup> Stibljajt rëb: “Guguaiaa reeman bën guxhálnë reeman guiib lad.”

### *Biguie'ch Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Chi gulox gojc zian, wej Xiëb, bén zëed guiedx la Arimatea, bignabaman diidxbee loj Pilato din yaletaman xcuerp Jesús din chiquie'chaman laaman. Në bén la Xiëb bililadx Jesús, per ralanzi, guial bidxebaman bejn ree. Badëed Pilato diidxbee, zeel wej Xiëb bigxiiman xcuerp Jesús. <sup>39</sup> Në Nicodemo wej, bén bigneenë Jesús tijb guxin, bidxinnëman cost gajlbichii quil ni la mirra, no'chan aloe, rureen nejxh. <sup>40</sup> Bagajdxnë reeman laan lajd batüüb reeman laaman, zi'c rüjn ree bén Israel chi ruquie'ch reeman bengüt. <sup>41</sup> Lod cwa Jesús loj crüjz naga' tijb guidxliuj lod yu' ree yag. Yagaj naj tijb baa cüb lod achutczi waguie'ch. <sup>42</sup> Yagaj gudixh reeman xcuerpaman, guial najn gajxh, guial ma suloj tée dxej raziiladx reeman.

## 20

### *Achetri xcuerp Jesús badxejl*

(Mt. 28:1-10; Mr. 16:1-8; Lc. 24:1-12)

<sup>1</sup> Chidumingw chi sta nacayri, wej María Magdalena ro' xbaa Jesús, abi' baguiaaman ma bisüd guiaj nayaaw ro' baa guin. <sup>2</sup> Dxel ruxüünman wejman lod za' Simón Bëd con zatijb xbejn Jesús, bén rën da'taman, abi' rëbaman loj reeman:

—Ma zinë reeman xcuerp Dad Jesús, banczi bigsa'n reeman laaman, achutri laaman yu' lën baa guin.

<sup>3</sup> Abi' brii Bëd con bén guin, zë reeman ro' baa guin. <sup>4</sup> Grop reeman ruxüün zë reeman. Per bén guin mazri ruxüünman guial loj Bëd, abi' yaløj laaman bidxin ro' baa guin. <sup>5</sup> Dxel gudixlojman baguiaaman vend bidüüb Jesús, per ad guyutaman. <sup>6</sup> Dxelri bidxin Simón Bëd, abi' guyuman lën baa guin. Nëgajcaman baguiaa vend guin <sup>7</sup> Baguiaa tëëman lajd bidüüb guijc Jesús, nadüüban naga'n lood ren, ad naga'tan tijbzi con vend guin. <sup>8</sup> Dxel guyu bén bidxin ro' baa guin yaløj, baguiaaman ni goc, zianz bililadxaman, <sup>9</sup> guial gocli ad bignia't reeman ni ca loj xtiidx Dios guial yaban Jesús loj ree bengüt. <sup>10</sup> Dxel zia ree xbejn Jesús lidx reeman.

### *Balüüloj Jesús loj María Magdalena*

(Mr. 16:9-11)

<sup>11</sup> Per Li baya'nman ro' baa guin cayoonman. La'tgaj cayoonman gudixlojman lën baa guin, <sup>12</sup> abi' baguiaaman tio'p ree anjl, najcw reeman lajd naquich, zojb reeman lod go't xcuerp Jesús, tijbaman lod go't guijcaman, zatijbaman lod go't guia'man. <sup>13</sup> Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

<sup>14</sup> Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman. <sup>15</sup> Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguuilil?

Gunaladx Li, bën rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'nl laaman din chigxin laaman.

<sup>16</sup> Zianz rëb Jesús lojman:

—¡Li!

Dxel badxi' loj Li, rëbaman lojman con diidx hebreo:

¡Rabuni! —rën guiëban Mextr.

<sup>17</sup> Rëb Jesús lojman:

—Ad guqui'l naj, din gadan yaya' loj da Dadan. Per baguiaj biguiedx loj ree da bejnan guial yaya' loj da Dadan bën naj gajc xDadidi, loj da Diosan bën naj gajc xDiosidi.

<sup>18</sup> Dxel wej María Magdalena bicojnman xbejn ree Dad Jesús guial baguiaaman laaman, bagojn tëëman laa reeman gra ni rëbaman lojman.

### *Balüüloj Jesús loj ree xbejnman*

(Mt. 28:16-20; Mr. 16:14-18; Lc. 24:36-49)

<sup>19</sup> Chidumingw zii gajc chi ma caxhin, bado'p ree xbejn Jesús, nayaaw ro' port yu' reeman guial rdxeb reeman guxtis Israel ree. Dxel balüüloj Jesús galay reeman, rëbaman loj reeman:

—Yabe'cdxe Dios luxdoodi.

<sup>20</sup> Chi ma gulox rëbaman zian, balüü yaaman loj reeman në cwë'lënman, abi' laa reeman dád babaa reeman baguiaa reeman Dad Jesús. <sup>21</sup> Dxel rëbaman loj reeman zatijb:

—Yabe'cdxe Dios luxdoodi. Zi'c guxhaalaman naj, ziangajc rxhialan lëjt.

<sup>22</sup> Dxel balüjbaman guiic reeman, rëbaman:

—Gol gubajnnë xSprijt Dios. <sup>23</sup> Bën güüнди perdon xtol, chiquied xtol reeman, guiáad bën ad züjntidi perdon xtol, yaya'nnë xtol reeman.

### *Baguiaa Tumajs Jesús*

<sup>24</sup> Tumajs, bën rniee reeman Cwajch, achut laaman za' chi balüüloj Jesús loj ree xbejnman. <sup>25</sup> Chi rëb reeman loj Tumajs:

—Ma baguiaa Dad Jesús.

Dxel rëbaman:

—Bal id zuguián yaaman lod wëëz clav, abi' bal id zagu' da bacwënan lod wëëz clav guin, bal id zagu' tëë yan cwë'lënman lod bidxeelguijdx, ad zaliladxtan.

<sup>26</sup> Chi goc xhujn dxej, badxajg lasa' ree xbejn Jesús zatijb, per dxel në Tumajs za'në laa reeman, nayaaw ruyu yu' reeman. Per balüüloj Jesús galay reeman, rëbaman loj reeman:

—Yabe'cdxe Dios luxdoodi.

<sup>27</sup> Dxel rëbaman loj Tumajs:

—Badxe' xbacwënl guie, baguiaa ree yan, banee yaal guie badxe'n cwë' lënan. Ad runawëëgril, bililadx.

<sup>28</sup> Dxel rëb Tumajs lojman:

—¡Da Dadan, da Diosan!

<sup>29</sup> Abi' rëb Jesús lojman:

—Rliladxil guial ma baguiaal naj. Xiquilbaa ree bën rliladx, majs ad waguiaat reeman naj.

*Chexc zeel cwa gui'ch guie*

<sup>30</sup> Zienri ree milagr been Jesús loj ree xbejnman, ni ad cwat ree loj gui'ch guie. <sup>31</sup> Sa'n nine ree cwa reen din chililadxidi guial Jesús naj Cristo, Xi'n Dios, abi' guial chililadxidi laaman guibandi tiblayaa con Dios.

## 21

*Balüüloj Jesús loj ree xbejnman ro' nijs*

<sup>1</sup> Chi gudëd gojc zian, balüüloj Jesús loj ree xbejnman zatijb, ro' nijs naj gajxh guiedx Tiberias. Ze balüülojman: <sup>2</sup> Chi nadxag lasa' ree Simón Bëd con Tumajs bën rniee reeman Cwajch, në Natanael bën za Caná guiedx riga' niz Galilea, con ree xi'n Zebedeo, nëtëë zatio'p xbejn Jesús, <sup>3</sup> dxel rëb Bëd loj reeman:

—Gan chignaazan bëjl.

Badxi' reeman laan rëb reeman:

—Në dunujn yadxoo.

Abi' wë'p reeman loj barcw zë reeman, per guxhin zii achutczii bëjl gunaaz reeman. <sup>4</sup> Chi ma cayreguiaal, bidxin Jesús ro' nijs guin, per ad bayünbeet reeman laaman. <sup>5</sup> Dxel gunabdiidxaman loj reeman rëbaman:

—Xi'n, ¿nid chu bëjl wanaazidi ya?

Badxi' reeman laan rëb reeman:

—Achutczii.

<sup>6</sup> Abi' rëb Jesús loj reeman:

—Gol bazaal xguijxhidi xladbee barcw guin din guiniaazidi bëjl.

Zian been reeman, abi' ad rajctri rabëë reeman guijxh guin, guial dád zien bëjl yu' lojn. <sup>7</sup> Dxel xbejn Jesús, bën rën da'taman, rëbaman loj Bëd:

—¡Dad Jesúsán!

Biguiejnzi Simón Bëd zian, laa got gajc xabaman ni gulëëman, abi' gutiajsaman lojnijs guin. <sup>8</sup> Guiáad zaxho'p xbejn Jesús loj barcw guin badxin reeman ro' nijs guin,

coobyuj reeman guijxh guin, guidxan bëjl, guial zi'ctzi tibgayuu mejtr ryaadx yadxin reeman ro' nijs guin. <sup>9</sup> Chi baguiajt reeman, baguiaa reeman laa guij ma riga', dxiib tijb bëjl lojn, në guiadxtil riga' yagaj. <sup>10</sup> Dxel rëb Jesús loj reeman:

—Gol tanë tio'p choon bëjl gunaaz nejzidi.

<sup>11</sup> Dxel wë'p Bëd loj barcw guin, guxoobyujman guijxh guin guidxan bëjl narooob ree, xt ro' nijs guin. Tibgayuu tü'pchiibichoon bëjl yu' lojn. Abi' majsi zienb, per ad goxya'tan. <sup>12</sup> Zianz rëb Jesús loj reeman:

—Gol guda din gawidi rsiil.

Abi' ni'qui tijb reeman ad rayaxt guiniabdiidx chu bénan, guial ragbee reeman Dad Jesúsán. <sup>13</sup> Dxel gubigaman cwa'man guiadxtil badëëman loj reeman, ziangajc beenman con bëjl guin. <sup>14</sup> Ni ne bayon volt balüüloj Jesús loj ree xbejnman chi babanman loj ree bengüt.

### *Guneenë Jesús Bëd*

<sup>15</sup> Chi gulox gudaw Jesús con ree xbejnman, gunabdiidxaman loj Simón Bëd, rëbaman:

—Simón, xi'n Waj, ¿walil ya rënl naj mazri guial loj ree bén guie?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiildoon.

<sup>16</sup> Abi' rëb Jesús zatijb:

—Simón, xi'n Waj, ¿walil ya rënl naj?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiilan.

<sup>17</sup> Bayon volt gunabdiidx Jesús rëbaman:

—Simón, xi'n Waj, ¿rënl naj ya?

Dád guyunaya Bëd, guial ma gojc choon volt gunabdiidx Jesús bal rënman laaman. Zianz rëb Bëd:

—Dad, lüj ragbee graczi, ragbeel rënan lüj.

Zeel rëb Jesús:

—Gunaj ree da xiilan. <sup>18</sup> Diidxliczi ganin, chi goquil xinguiag, rajcw xabil persi rejł lod rënl. Per chi ma najł bengol, gusli xu'quil din guscajcw ben ren xabil din chinë reeman lüj lod ad rëntil chel.

<sup>19</sup> Rëb Jesús zian guial basignia'man xhienaag guiët Bëd, din güünbee ree bejn Dios. Dxel rëb Jesús:

—Tanal naj.

*Ni ne bacaa xbejn Jesús bén guyën da'taman*

<sup>20</sup> Chi badxi' loj Bëd, baguiaaman laa bén rën da't Jesús zinal laa reeman. Laaman gure cwë' Jesús chi gudaw reeman xche, gunabdiidx tääman loj Jesús rëbaman: “Dad, ¿chu yayü lüj?” <sup>21</sup> Chi baguiaa Bëd laaman, gunabdiidxaman loj Jesús rëbaman:

—Dad, laadxza xin guin, ¿xhie saquix?

<sup>22</sup> Badxi' Jesúsán rëbaman:

—Bal rënan guibanx xt yaguialan, ¿xhie güünl? Lüj tanal naj.

<sup>23</sup> Zianan zeel bire'ch diidx loj ree xbejnman guial ad zëjtt bén guin. Per ad ziantan rëb Jesús, rëbaman: “Bal rënan guibanx xt yaguialan, ¿xhie güünl?”

<sup>24</sup> Bén guin gajcan rü diidx xcwent ree nine, laa tääman bacaa laan, rayagbee tää ree rüman diidxli. <sup>25</sup> Dád zien ree ni been Jesús, bal nitia tijb gajn, wed ad zadaant loj guidxliuj niu ree libr ni niajc.

## Ni been ree xi Apóstoles Jesucrist

<sup>1</sup> Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēeman chi guzuloj xchiinman <sup>2</sup> xt chi ziaman xanyabaa. Chi gadaman yaguiaj, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman. <sup>3</sup> Chi mal guzagdiaj da'taman loj xguialgüjtaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nabancaman. Dxej zii ree guneenēman laa reeman xcwent xguialrniabee Dios.

<sup>4</sup> Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulējz gac cumplid ni na da Dadan zi'c ma rnin lojdi.

<sup>5</sup> Walican baroobnijs Waj con nijs, per ma zidyob dxej gui't xSprijt Dios guibannē lējt, laan gac zi'c gualrirobnijs par lējt.

### *Zia Jesús xanyabaa*

<sup>6</sup> Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül gualrniabee loj ree bēn Israel ya?

<sup>7</sup> Badxi' Jesúsán rēbaman:

—Ad lējt rayal gagbee xhie dxejn o xhie horan gac zian. Tijbzi da Dadan ragbee laan din laaman ca' gualrniabee.

<sup>8</sup> Per chi ma nabannēdi xSprijt Dios, tia'di gualrniabee. Dxel griidi chiguiedi diidx loj ree bēn Jerusalén chu najn, nē gra ree guiedx riga' niz Judea nē niz Samaria, xt ree guiedx ren ni riga' ree zijt da't.

<sup>9</sup> Gulox guneeman, ruguiaa reeman laaman dxejlczi wajsaman ziaman xanyabaa, abi' biguiajt tijb bēj bata'cwan laaman, dxel ad baguiaatri reeman laaman. <sup>10</sup> La'tgaj ruguiaa reeman ziaman xanyabaa, gulentie tio'p ree bēn najcw lajd naquich lod za' reeman, <sup>11</sup> abi' rēb reeman loj ree apóstoles guin:

—Bēn Galilea, ¿chexc zeel sta ruguiaadi xanyabaa? Jesús, bēn baguiaadi zia xanyabaa, laagajcaman yaguaaad stijb, zi'cgajc baguiaadi ziaman.

<sup>12</sup> Chi baza ree xi apóstoles Jesús ruguia' la Olivos, guza reeman zi'ct rza reeman dxej raziiladx reeman, persi badxin reeman Jerusalén. <sup>13</sup> Chi badxin reeman, wē'p reeman lēnü ladya lod zojb reeman. Brii laj reeman Bēd, Waj, Jacob, Andrejs, Felip, Tumajs, Tol, Matew, Jacob xi'n Alfeo, Simón (bēn guzunē ree bēn cananistas), nē Judas xi'n Jacob. <sup>14</sup> Gra reeman rüjn tijbzi xgab, radxaag lasa' reeman din cwedx

guiniab reeman Dios, con ree bijch Jesús con Li xniaaman, con ree béngunaa ren.

*Gulej reeman bén baya'n xluar Judas*

<sup>15</sup> Lën ree dxej zii bado'p ree bén riladx Jesús, naj reeman cost tibgayuu gajl bejn, dxel guzuli Bëd galay reeman, rëbaman loj reeman:

<sup>16</sup> —Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús loj ree bén gunaaz laaman, <sup>17</sup> gojqnix tijb dux compniaran, në laax been lasa' dxiin raguieenan. <sup>18</sup> Per con milia ni gudix reeman laax por ni mal beenx, bio' guidxliuj lod gudidya'x, bazuj guijqnix, goxya'x abi' brii gra xziix. <sup>19</sup> Chi gogbee gra ree bén Jerusalén ni goc, gunee reeman guidxliuj zii Acéldama, rën guiëban guidxliuj rejn. <sup>20</sup> Din rëb loj libr la Salmos:

Yaya'n dëjch lidix,  
achutziri cwe lënan.

Rëb tëë lojn:

Yayu ben ren guia'x.

<sup>21</sup> 'Zeel loj gra ree bén za'në dunuj ree guidib tiamp ni guzunë Jesús dunuj ree, <sup>22</sup> diizd chi baroobnijs Waj laaman xt chi ziaman xanyabaa. Loj gra reeman rayal grii tijbaman din güünman dunuj ree yudar yaguie'ch ree loj ree bejn guial walican babanman loj ree bengüt.

<sup>23</sup> Dxel gulej reeman tio'p reeman: tijb bén la Xiëb (rniee reeman laaman Barsabás, rniee tëë reeman laaman Justo), gulej tëë reeman bén la Matías. <sup>24</sup> Dxel gurejdx gunab reeman Dios, rëb reeman:

—Dad, lüj nünbee luxdoo gra ree bejn. Balüü chu loj grop reeman gulejl <sup>25</sup> din gacaman apóstol luar Judas, din banijtix delant lojl por dol ni beenx abi' ziax luar ni rayalix.

<sup>26</sup> Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

## 2

*Biguiajt xSprijt Dios diizd xanyabaa*

<sup>1</sup> Chi bidxin dxej gojl lanij la Pentecostés, gra ree bén riladx Jesucrist bado'p tijbzi luar. <sup>2</sup> Dxejlczi gojc naquie' xanyabaa zi'c bidoxx xt bayu bi lënü lod riga' reeman, <sup>3</sup> abi' gulentie zi'c bajl dobëz ree, biguiajt reen guijc tijb gaj reeman. <sup>4</sup> Zianz guyu xSprijt Dios luxdoo graczi reeman, dxel guzuloj canee reeman diidx ren ree zi'c cusnee Sprijt guin laa reeman.

<sup>5</sup> Lën ree dxej zii za' zien ree bén Israel Jerusalén, baza reeman gra ladczi din cwedx guiniab reeman Dios. <sup>6</sup> Chi



biguiejn reeman cayajc naquie', bado'p reeman persi biquiaa reeman. Dxel chi biguiejn reeman rníee gra ree b́en ŕliladx Jesús xtiidx tijb gaj reeman, ad badxejlt xgab ńujn reeman. <sup>7</sup>Dád badxa loj reeman xt ni'quid badxejlt xhie ńujn reeman, abi' gunabdiidx loj lasa' reeman ŕeb reeman:

—¿Nid b́en Galilea gra ree b́en canee guin ya? <sup>8</sup>¿Chexc zeel raguiejn ree rníee reeman dux tiidx ree? <sup>9</sup>Du loj ree no'ch ree b́en źeed guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor, <sup>10</sup>b́en źeed t́ee ree guiedx riga' ree niz Frigia, Panfilia, Egipto, ńe ree guiedx nulen Libia ni riga' ree gajxh Cirene, ńe ree b́en źeed Rom, yu' reeman gojl Israel per naban reeman Rom, yu' t́ee reeman naj quijb ben Rom per ŕliladx reeman ni ŕliladx ree b́en Israel. <sup>11</sup>Ńe ree b́en źeed niz Creta ńet́ee ree b́en źeed guiedx riga' ree niz Arabia no'ch du loj ree. ¡Per dugraczi ree caycaagdiajg con dux tiidx ree niza'cdxoon ŕujn Dios!

<sup>12</sup>Graczi reeman badxa da't loj xt ni'quid badxejlt xgab ńujn reeman, abi' guzuloj canabdiidx loj lasa' reeman ŕeb reeman:

—¿Xhie ŕen guiéb gra ni guie?

<sup>13</sup>Per garol reeman baze' laa reeman, ŕeb reeman:

—Ŕe' reeman.

### *Ni ŕeb Béd loj ree bejn*

<sup>14</sup>Dxel guzuli Béd con zachibtib ree apóstoles guin, gunee-man rejs ŕebaman:

—Ĺejt b́en Judea ńe graczi ree b́en zojb Jerusalén, gol ba-caagdiajg gol bignia' t́ee ni ganin. <sup>15</sup>Ad ŕe't ree b́en guin zi'c naladxidi, din qui gojlri raca gaa rsil. <sup>16</sup>Guie cayajc cumplid ni gunee b́en brii laj Joel, b́en bad́ee xtiidx Dios loj ree bejn, chi ŕebaman:

<sup>17</sup>Na Dios,

guidxin dxej gaxhal da Sprijtan luxdoo gra ree bejn, abi' xi'ndi xinguaaaw con biingunaa gud́eed reex da diidxan, zien ree ni gulúuloj loj ree xinguiag, guiáad ree bengol zien ree ni guinie'xchaal reeman.

<sup>18</sup>Dxej zii ree gaxhal da Sprijtan luxdoo ree b́en ŕujn da dxiinan,

xinguaaaw ree ńe ree béngunaa,

abi' gud́eed reeman da diidxan.

<sup>19</sup>Gulün sen ree xanyabaa ni yadxa lojdi,

guiáad loj guidxliuj gulün sen ree

zi'c rejn ńe bajl ńet́ee go'xh.

<sup>20</sup>Guicajy loj gubijdx, guiáad béew yayajcan zi'c rejn.

Chi ma gojc zian, dxel guidxin quijb dxej guin,

dxej za'cdxoon gui't Dios b́en rniabee,

dxej guiguien guidib xbianiman.

<sup>21</sup> Abi' graczi ree bén cwedx guiniab laaman güünman laa reeman perdon.

<sup>22</sup> Rëb tëë Bëd loj reeman:

—Yan, gol bacaagdiajg ni ganin lëjt bén Israel: Lëjt rag-bee guial Jesús bén Nazaret najman bén guxhaal Dios, been tëëman milagr ree në ree ni radxa loj ree bejn zi'c sen din gagbeedi guial Dios guxhaal laaman. <sup>23</sup> Diisd gocli mal nünj Dios xgab guial zian güünnëdi Jesús, gunaazidi laaman bayüdi laaman loj ree benmal, din gugüjt reeman laaman loj crüjz. <sup>24</sup> Per basban Dios laaman stijb, babëëman laaman loj guialgüjt, din ad gojct nutëë guialgüjt guin laaman. <sup>25</sup> Chi gunee rey Davi xcwent Jesús, rëbaman:

Zianczi baguian dux Dad ree Dios za'nëman naj.

Za'man da ladbeen, achetczi zajc guchejb naj.

<sup>26</sup> Zeel yu' luxdon nix, ruzat tëën Dios zagdxë.

majsi guiëtan ad rdxebtan,

<sup>27</sup> din ad zusa'ntil naj lën baa,

ad zatiëjbtill xhin xcuerp xi'nl bén naya nali.

<sup>28</sup> Balüül naj nejz runee guialnaban,

chu' tëë luxdon zagdxë guial guibannël naj.

<sup>29</sup> Basnuu gunee Bëd, rëbaman:

—Ganin loj gradi compniar, diidxiczi dux béngulal ree Davi güjtaman biguie'ch tëëman, abi' laa xbaaman sta raguiaa ree yan. <sup>30</sup> Per gojcaman bén badëë xtiidx Dios loj ree bejn, abi' gogbeeman been Dios promejs guial loj xdiaaman grii Cristo bén nabee. <sup>31</sup> Rulüü ma cuguiaaman gra ni gac, rëbaman guial yaban Cristo loj ree bengüt, ad zaya'ntaman lën baa ad zaxin tëët xcuerpaman. <sup>32</sup> Yan ma basban Dios Jesús, dugran nayajc testiw guial walican babanman. <sup>33</sup> Zia tëëman xanyabaa zisobaman xladbee Dios, persi badëë xSprijt Dios lojman zi'c ma rëbaman, yan ma guxhaal Jesús Sprijt guin loj guidxliuj, por laaman cayajc ni cuguiaadi caguiejn tëëdi. <sup>34</sup> Ad Davitan zia xanyabaa, din laagajcaman rëb:

Rëb dux Dad ree Dios loj bén rniabee naj:

“Gurej da ladbeen,

<sup>35</sup> xt gabecan xin rdxe'ch ree lüj guia'l.”

<sup>36</sup> 'Gradi bén Israel gol gogbee guial Jesús bén bacaadi loj crüjz, Dios bacaabee laaman din gacaman Dad, bén nabee dunuj ree.

*Bachajg zien ree bejn bén riladx ree Jesús*

<sup>37</sup> Chi biguiejn ree bén riga' yagaj ni rëb Bëd, dád guyu naya luxdoo reeman. Abi' gunabdiidx reeman lojman në loj los demazri ree apóstoles guin, rëb reeman:

—Dad, gol guna, ¿xhie rayal yaguieenan?

<sup>38</sup> Dxel rëb Bëd loj reeman:

—Gol bayagbee xtolidi, gol badxi' tēē lojdi loj Dios, gol gurobnijs por xgualrniabee Jesucrist din gac xtolidi perdon, zian chu' xSprijtaman luxdoodi. <sup>39</sup> Din promejs guin naj par lējt nē par ree xi'ndi nē par gra ree bēn riga' zijt, par gra ree bēn cwe Dios par laaman.

<sup>40</sup> Con ree diidx guie nē mazri ree diidx ren guneenē Bēd laa reeman, rēbaman:

—iGol bariica loj ree bēn rūjn ni mal!

<sup>41</sup> Zian gojc, graczi bēn bazoob diidx ni rēbaman gurobnijs. Dxej zii gajc bachajg cost choon mil bejn bēn rliladx ree Jesús. <sup>42</sup> Graczi reeman binal ni balüü ree xi apóstoles Jesús laa reeman, gubajnnē lasa' reeman zagdxe, gurejdx gunab reeman Dios abi' rado'p reeman persi raw reeman guiadxtil tijbzi zi'c gunabee Jesucrist güün reeman.

### *Ze gubajn ree bēn bililadx Jesús yaloj*

<sup>43</sup> Graczi ree bejn radxa da't loj milagr nē los demazri ree ni been ree apóstoles guin. <sup>44</sup> Graczi ree bēn bililadx Jesucrist gubajnnē lasa' zagdxe, rgui's tēē ni rajp reeman loj lasa' reeman. <sup>45</sup> Ruto' xguidxliuj reeman nē gra ni rajp reeman, persi rgui's reeman milia guin loj lasa' reeman zi'ctzi naj ni riaadx tijb gaj reeman. <sup>46</sup> Guixie guixie rado'p reeman lēn yadooro' Jerusalén, dxel raguiaj reeman lidx xcompniar reeman rtaw reeman, dād nix yu' luxdoo reeman rēn tēē lasa' reeman, <sup>47</sup> ruza't reeman Dios zagdxe, guiáad gra bejn guyēn laa reeman. Guixie guixie ragnē Dios din gacxhiey mazri bēn rliladx Jesucrist, persi gojc xtol reeman perdon.

## 3

### *Bayajc tijb bēn ad rajct rza*

<sup>1</sup> Tijb dxej zē ree Bēd con Waj lēn yadooro' Jerusalén raca choon wadxē, hor zii naj hor ni rbejdx rniab reeman Dios. <sup>2</sup> Ro' xport yadoo guin zojb tijb bēn ad rajct rza diizd gojlan. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree bēn ru lēn yadoo guin. <sup>3</sup> Chi baguiaaman Bēd con Waj ma chu' reeman lēn yadoo guin, gunabaman carda loj reeman. <sup>4</sup> Baguiaa reeman lojman, dxel rēb Bēd lojman:

—Baguiaa du lojn.

<sup>5</sup> Chi biguejnman rēb Bēd zian, dxel baguiaaman loj reeman, naladxaman milia nudēēd reeman lojman. <sup>6</sup> Per rēb Bēd:

—Ad ra'ptan plajt ni'qui or par gunen lojl, per ni zajc günan por lūj günanan: Por xgualrniabee Jesucrist bēn Nazaret, guzuli, guza.

<sup>7</sup> Dxel gunaazaman yaaman ladbee, bazuliman laaman. Loj hor zii gajc guyu ree guia'man gojl, <sup>8</sup> abi' gutiajsaman, guzuliman guzuloj cazaman. Dxel guyunëman laa reeman lën yadoo guin, cazaman, catiajsaman cuza't tëëman Dios zagdxe. <sup>9</sup> Graczi ree bén cuguaa laaman cazaman cuza't tëëman Dios zagdxe, <sup>10</sup> dád badxa loj reeman bidxeb tëë reeman guial gojc zian guial nünbee reeman bén guin, ragbee tëë reeman laaman rbej ro' xport yadoo guin ni la Port Za'cdxoon, rni-abaman carda.

*Gunee Bëd loj ree bejn lod la xcurdur Salomón*

<sup>11</sup> Ad riro'nladxt bén bayajc guin Bëd con Waj. Dád badxa loj ree bejn, abi' baxüün reeman wej reeman lod la xcurdur Salomón lod za' ree Bëd con Waj. <sup>12</sup> Chi baguaa Bëd zian, rëbaman loj reeman:

—Bén Israel, ¿chexc zeel radxa lojdi ni goc? Ad naladxidi por dunujn rza bén guie guial naca'n guialrniabee o guial nayajcan naya delant loj Dios ya. <sup>13</sup> XDios dux béngulal ree Abraham, Isaac në Jacob, laaman badëë guialrniabee loj Jesús, bén bayüdi loj guxtis. Abi' chi guyën Pilato nuslaaman laaman, ad cwëjbtidi. <sup>14</sup> Luar niniabidi nuslaa Pilato bén naya nali, bén rüjn zi'c rayal, gunabidi baslaaman tijb xin bagüjt bejn. <sup>15</sup> Zian bagüjtidi bén runee guialnaban. Per basban Dios laaman stijb, abi' dunujn nayajc testiw guial babanman. <sup>16</sup> Bén guie, bén ruguaaadi nünbee tëëdi, guyu gojl guia'man por xguialrniabee Jesucrist, bayajcaman guial baliduladxan, zi'c ruguaa graczidi.

<sup>17</sup> 'Ganin lëjt compniar, ragbeen guial lëjt con ree bén rniabee lëjt ni'quid gogbeetidi xhienin beendi chi bagüjtidi Jesús. <sup>18</sup> Per zian been Dios persi gojc cumplid ni rëbaman loj ree bén badëë xtiidxaman loj ree bejn diizd gocli guial sagdiaj Cristo. <sup>19</sup> Zeel gol bayagbee xtolidi gol badxi' tëë lojdi loj Dios din güünman xtolidi perdon. Dxel yayaalyuj luxdoodi, <sup>20</sup> guixhiaal tëëman Jesús stijb, bén naj Cristo diizd gocli par lëjt, <sup>21</sup> majsi yan rayalri suman xanyabaa, xt ma bazuxnejz Dios gra, zi'c rëbaman loj ree bén badëë xtiidxaman loj ree bejn diizd gocli, bén gubajn ree naya delant lojman. <sup>22</sup> Abi' rëb Moisejs loj ree dux béngulal ree: “Loj xdiaadi cwëë Dios tijb bén gudëë xtiidxaman loj ree bejn zi'c naj, gol bazoob xtiidxaman graczi ni naman lojdi, <sup>23</sup> din graczi ree bén ad zuzoobt xtiidxaman nit reeman, ad zajc tëetri reeman cwent zi'c xbejn Dios.”

<sup>24</sup> Gra ree bén badëëd xtiidx Dios loj ree bejn, diizd Samuel con los demazri ree bén badëë xtiidx Dios diizd gulal, mal bagojn reeman ni cayajc ree lën ree dxej guie. <sup>25</sup> Lëjt naj xdiaa reeman, lojdi gac cumplid ni cwëb Dios loj ree dux

béngulal ree chi rëbaman loj Abraham: “Por xdiaal günle'n gra ree bénguidxliuj.” <sup>26</sup> Abi' chi basban Dios xi'nman Jesucrist, yaloj lojdi guxhaalaman laaman din güünle'man lëjt din yabëëcaman gradi loj ni mal rüjndi.

## 4

### *Bazuj reeman Bëd con Waj loj ree guxtis*

<sup>1</sup> Sta canee ree Bëd con Waj loj ree bejn, chi bidxin ree xbixhioz ree bën Israel në suldad rniabee suldad rniaj ree ro' yadooro' Jerusalén, nëtëë ree bénsaduGew. <sup>2</sup> Dád ralen reeman guial culüü ree Bëd con Waj bejn ree, rëb reeman guial yaban ree bejn loj ree bengüt, din laan ma baguiaa reeman chi baban Jesucrist. <sup>3</sup> Zeel gunaaz reeman laa reeman, per guial ma gudxe, zeel badxe' reeman laa reeman ladxguüib la'tgaj rareguiaal. <sup>4</sup> Per dád zien ree bën bacaagdiajg ni rëb ree Bëd con Waj bililadx xtiidx Dios, gojc reeman cost gaay mil xinguaaw xcwentqui ree béngunaa.

<sup>5</sup> Chi bareguiaal, guxtis Jerusalén në ree bengol në ree mextr rulüü ley, bado'p reeman loj ciuda guin. <sup>6</sup> Në Anás bidxin yagaj, bën naj bixhioz mazri zobjbloj rniabee graczi ree bixhioz, bidxin tëtëë bixhioz la Caifás në Waj në Lejandr, nëtëë gra ree bën naj lasa' ree bixhioz rniabee guin. <sup>7</sup> Gunabee reeman bica' reeman Bëd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, rëb reeman:

—¿Chu banee diidxbee o chu por rüjndi ni guin?

<sup>8</sup> Per guial yu' xSprijt Dios luxdoo Bëd dád gognëman laaman, zeel rëbaman:

—Gol bacaagdiajg ni ganin lëjt bengol në lëjt guxtis, <sup>9</sup> rniabdiidxidi dunujn xhienaag baguieenan béngogxuu guin yudar, xhie tëtëë naag gojc zeel bayajcaman. <sup>10</sup> Yanan lojdi din gagbeedi gagbee tëtëë gra bën Israel xhienaag bayajc bën za' lojdi. Bayajcaman por xguialrniabee Jesucrist bën Nazaret, bën bacaadi loj crüjz abi' basban Dios laaman stijb. <sup>11</sup> Beennëdi laaman zi'c rüjn ree bën rüjn yu chi rbëëgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacnë yu guin. <sup>12</sup> Achut ben ren rüjn dux tol ree perdon, tijbzi Jesús, din achut mazri guxhaal Dios loj guidxliuj din güünman dunuj ree perdon.

<sup>13</sup> Chi baguiaa ree guxtis guin ad rdxebt ree Bëd con Waj guial rniee reeman, abi' gogbee reeman ad bën basiidt ree mazran achu tëtëë naj reeman, badxa loj reeman bayünbee tëtëë reeman laa reeman guial bën binal ree Jesúsán. <sup>14</sup> Abi' yagaj gajc za' bën bayajc guin, zeel ad bile'tri xhie niëjb reeman contr laa reeman. <sup>15</sup> Dxel gunabee ree guxtis guin barii ree

Béd con Waj din yaya'n laaz reeman din gü reeman diidx.  
 16 Rëb reeman:

—¿Xhienaag yaguieennë' ree xin guin ree? Graczi ree bén Jerusalén ma ragbee milagr been reex. Abi' ad zajct yarexuu ree. 17 Per chitëë guire'ch xtiidx Jesús, yachejb reex din diidx yan achutziri loj guza't reex laax.

18 Dxel gurejdx reeman laa reeman gunabee reeman chitëë churi loj guza't reeman Jesús, ad gulüü tëëri reeman xtiidxaman. 19 Per badxi' Béd con Waj laan, rëb reeman:

—Lëjt gajc gol been xgab: ¿Zagdxë naj yazooban xtiidx-idi luar yazooban xtiidx Dios ya? 20 Per ad zajct yacwëëz yaguie'chan gra ni baguiaan baguiejn tëën.

21 Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxejlt xhienaag nudëëd reeman laa reeman casti, din graczi ree bejn ruza't Dios zagdxë por ni goc. 22 Nadëd tiuu ijz yu' bén bayajc guin.

### *Rbejdx ree bén r'iladx Jesús Dios*

23 Chi baslaa ree guxtis guin Béd con Waj, baguij reeman lod riga' xcompniar reeman bén r'iladx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee. 24 Chi gulox bacaagdiajg reeman diidx ni be reeman, graczi reeman guzuloj cabejdx canab Dios, rëb reeman:

—Dad lüj rniabee gra, lüj naj bén been xanyabaa në guidxliuj nëtëë nijsdoo con gra ni yu' loj reen. 25 Por xSprijt tëël gunee rey Davi diidx guie ree, chi rëbaman:

¿Chexc zeel ridxe'chnë ree bénguidxliuj Dios?

¿Chexc zeel rüjn reeman xgab ni ad rüjnt wen?

26 Bado'p ree rey në gra ree guxtis

din su reeman contr dux Dad ree Dios në contr Cristo.

27 'Abi' zian ma gojc, Herodes con Poncio Pilato con ree bén Israel nëtëë ree bén ad najt bén Israel, badxajg lasa' reeman luguiedx guie persi guzuj reeman contr xi'nl Jesús, bén naya nali, bén bacaabeel. 28 Zian gojc, been reeman zi'c ma beenl xgab diidx gocli. 29 Abi' yan Dad, baguiaa yan ruchejb reeman dunujn. Gognë dunujn nayajcan xbejnl din gac yatie'chan xtiidxil sin gualrdxeb, 30 në con xgualrniabeel yasiajcan bënragxuu ree, yaguieen tëën milagr ree por xgualrniabee xi'nl Jesús, bén naya nali.

31 Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidx Dios sin gualrdxeb.

### *Ragnë lasa' ree bén r'iladx Jesús*

<sup>32</sup> Graczi ree b́en rliiladx Jesucrist bidxajg gubajn reeman, rüjn reeman tijbzi xgab, ni'qui tijb reeman ad rēbt guial xieenzi reeman naj ni rajp reeman, din najn par gra reeman. <sup>33</sup> Gognē Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman. <sup>34</sup> Ni'czi tijb reeman ad biaadxt xhienin, din graczi ree b́en rajp guidxliuj o b́en rajp yu ya ruto' reeman laan, abi' milia guin <sup>35</sup> rayü reeman loj ree apóstoles guin, persi laa reeman rguis laan loj gra reeman zi'ctzi naj ni riaadx tijb gaj reeman. <sup>36</sup> Loj reeman no'ch tijb b́en brii laj Xiëb, najman xdiaa b́en brii laj Leví, zēëdaman yuj la Chipre ni riga' loj nijsdoo. Gunee ree apóstoles guin laaman Bernabé, rēn guiëban B́en ragu' luxdoo ree bejn zagdxe. <sup>37</sup> Gojpaman tijb guidxliuj, abi' bato'man laan persi badëëman milia guin loj ree apóstoles guin din qui's reeman laan.

## 5

### *Dol ni been ree Ananías con Safira*

<sup>1</sup> Per guyu stijb b́en brii laj Ananías, xbéngunaaman brii laj Safira. Bato' tijb xguidxliuj reeman, <sup>2</sup> per baya'nnē xbéngunaaman diidx persi baya'nnëman ta'n milia guin. Sta'nan badëëman loj ree apóstoles guin, rëbaman laan naj gran. <sup>3</sup> Abi' rëb Béd lojman:

—Ananías, ¿chexc zeel cwëjbil gunabee xindxab lüj? ¿Chexc zeel guyënl nusquieel loj xSprijt Dios, din naya'nnël ta'n milia ni bato' xguidxliujl? <sup>4</sup> ¿Wen nid xguidxliujl gojcan ya? Abi' chi bato'lan, ¿nid xmilialan ya? ¿Chexc zeel balabladxil beenl zian? Loj Diosan nuyënl nusquieel, ad lojt bejnan.

<sup>5</sup> Chi biguiejn Ananías ni rëbaman, biajbaman abi' güjtaman. Graczi ree b́en gogbee ni guzacaman dád bidxeb reeman. <sup>6</sup> Dxel bibig bëlzi ree xinguiag, batüüb reex laaman lajd persi biquie'ch reex laaman.

<sup>7</sup> Chi gudëd cost choon hor, dxel bidxin xbéngunaa Ananías, ad ragbeetaman ni goc. <sup>8</sup> Dxel gunabdiidx Béd lojman rëbaman:

—Guna, ¿bato' xguidxliujdi zi'c na lacheelil ya?

Abi' rëbaman:

—An, zianqui bato'nan.

<sup>9</sup> Dxel rëb Béd lojman:

—¿Chexc zeel baya'ndi diidx persi nuyëndi nusquieedi xSprijt Dios? Laa ree xin biquie'ch lacheelil ziaad ni, yan nëgajc lüj chiquie'ch reex.

<sup>10</sup> Loj hor zii gajc biajb Safira lod za' Béd, abi' güjtaman. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwë' lacheelaman. <sup>11</sup> Graczi

ree b́en rliiladx Jesucrist nē gra ree b́en gogbee ni goc, dád bidxeb reeman.

*Zien ree milagr been ree apóstoles*

<sup>12</sup> Zien ree milagr narooob been ree apóstoles guin loj ree bejn. Graczi ree b́en rliiladx Jesucrist radxajg lasa' ro' curdur lod rniee reeman xcurdur Salomón. <sup>13</sup> Zagdx ruza't ree b́en luguiedx guin laa reeman, per ad rayaxt reeman guchajg reeman laa reeman. <sup>14</sup> Abi' guixie guixie cayajcxhiey ree b́en rliiladx Dad Jesús, zi'c xinguaaw zi'c béngunaa. <sup>15</sup> Xt rbēē reeman b́enragxuu ree lunejz, rguijxh reeman laa reeman loj ree loon nē loj ree da, din chi tēd Bēd, majsi xbalazaman tēd guijc reeman. <sup>16</sup> Nē ree b́en zobj guiedx riga' ree gajxh Jerusalén, zien reeman bidxin Jerusalén, bidxinnē reeman b́enragxuu ree nē ree b́en yu' xindxab luxdoo, abi' graczi reeman bayajc.

*Gunaaz ree guxtis Bēd con Waj*

<sup>17</sup> Bixhioz mazri zobjloj rniabee graczi ree bixhioz nē ree bénsaducew za'nē laaman, guyu gualnadēdloj luxdoo reeman, <sup>18</sup> abi' gunabee reeman biniaaz ree apóstoles guin persi badxe' reeman laa reeman ladxguiib. <sup>19</sup> Per guxhin zii tijb xi anjl Dios guxhal ro' ree xport ladxguiib guin, abi' babēēman laa reeman, rēbaman:

<sup>20</sup> —Gol chej lēn yadooro', gol biguiedx loj ree bejn xhie naag gap reeman gualnaban tiblayaa con Dios.

<sup>21</sup> Chi biguiejn reeman ni rēb anjl guin, bareguiaal rsildoo wej reeman lēn yadoo guin, guzuloj culüü reeman bejn ree xtiidx Dios.

Guiáad bixhioz zobjloj guin con ree b́en za'nē laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lēn ladxguiib guin. <sup>22</sup> Per chi bidxin reex ro' ladxguiib guin, achutri ree apóstoles guin ree yu'. Dxel bicojn reex guxtis guin ree, <sup>23</sup> rēb reex:

—Chi badxinan, baguiaan nayaaw ro' ladxguiib guin zagdx, laa ree suldad rajp ro' ladxguiib guin za', per chi baxhalan, achutczi yu' lēnan.

<sup>24</sup> Dxel bixhioz zobjloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rēb loj lasa' reeman, ¿ban xt guin chigdiblagaa ree ni guie?

<sup>25</sup> Loj hor zii gajc bidxin tijb xin rēb loj reeman:

—Laa ree b́en badxe'di ladxguiib yu' lēn yadoo culüü reeman bejn ree.

<sup>26</sup> Dxel wej suldad rniabee guin con ree xsuldadix bica' reex apóstoles guin ree, per ad beennaat reex laa reeman gual



rdxeb reex gucaaguaiaj ree bejn laa reex. <sup>27</sup> Chi badxinnë reex laa reeman, bayü reex laa reeman loj guxtis. Dxel rëb bixhioz zojbloj guin loj reeman:

<sup>28</sup> —¿Nid ranan ya guial ad zajctri gulüüdi bejn ree xtiidx Jesús? Abi' yan graczi loj ree bén Jerusalén ma gutie'chidi xtiidxix, nëtëë yan rëndi gudxiibidi du guijcan guial dunujn bagüjt laax.

<sup>29</sup> Abi' badxi' Bëdan në gra ree apóstoles guin, rëb reeman:

—Rayal yazooban xtiidx Dios luar yazooban xtiidx ree bénguidxliuj. <sup>30</sup> XDios dux béngulal ree basban Jesús, bén bacaadi loj crüjz. <sup>31</sup> Abi' nüjn Dios laaman bén zojbloj, nabe'caman laaman xladbeeman, laaman naj bén rniabee rabëë tëëman bejn ree loj xtol reeman, abi' zian guxhalaman nejz par ree bén Israel din cwëëladx xtol reeman yadxi' tëë loj reeman loj Dios din güünman laa reeman perdon. <sup>32</sup> Dunujn në xSprijt Dios bén rudëëman loj ree bén ruzoob xtiidxaman, rayagbeen guial gra ree ni guin naj diidxli.

<sup>33</sup> Chi biguiejn ree guxtis guin ni rëb reeman, dád balen reeman abi' guyën reeman nugüjt reeman laa reeman. <sup>34</sup> Per loj ree guxtis guin no'ch tijb bénfarisew laman Gamaliel, najman mextr rulüü ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt. <sup>35</sup> Dxel rëbaman loj ree guxtis guin:

—Bén Israel, gol been xgab xhienin güünnëdi bén guin ree. <sup>36</sup> Gol basaaladx, guyu tijb xin brii laj Teudas, rëbix yu' chu najx abi' cost tajp gayuu ree bejn binal laax. Per chi bagüjt ree bejn laax, bire'ch gra ree bén binal laax, yagaj gulox gra ni beenx. <sup>37</sup> Abi' tëë lën ree dxej gunabee gobiarn biab ree bejn, guyu tijb xin brii laj Judas, gojquix xin Galilea, ziangajc dád zien ree bejn binal laax. Per chi bagüjt ree bejn laax, gra ree bén binal laax bire'ch. <sup>38</sup> Zeel rnin lojdi, ad bal chu'ridi con ree bén guin, gol baslaa reeman. Din bal bénguidxliuj rniabee ni rüjn reeman, zadxin dxej loxan. <sup>39</sup> Per bal por Dios cayüjn reeman ni guin ree, ad zajct gutëëdi loj ni cayüjn reeman. Gol gojp cudad ad niad chi gagbeedi contr Diosan za'di.

<sup>40</sup> Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' rëb reeman loj reeman ad gutie'chri reeman xtiidx Jesús, dxel baslaa reeman laa reeman zia reeman. <sup>41</sup> Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús. <sup>42</sup> Abi' ad rucwëëzt rulüü reeman lën yadooro' Jerusalén nëtëë lidx lidx ree bejn.

## 6

*Bibee gajdx ree bén güün yudar*

<sup>1</sup> Lën ree dxej zii chi canuu cayajcxhiey ree bén rliadx Jesús, guzuloj cabe'c ree bén rniee diidx grieg xguialquia ree bén rniee diidx hebreo, rëb reeman guial gra dxejczí chi rië's ni raw ree béngunaa bizëjb, ta'ndoon rtia' ree bén rniee diidx grieg guial loj ree bén rniee diidx hebreo.

<sup>2</sup> Dxel guidxibtio'p ree apóstoles guin bato'p reeman graczi ree bén rliadx Jesucrist, abi' rëb reeman:

—Ad zagdxtet naj guial yacwëez yalüün xtiidx Dios par yadi'san ni gaw ree bejn. <sup>3</sup> Zeel yanan lëjt compniar raliduladx ree Jesucrist, gol gudiil entr lojdi gajdx ree bén ragbeedi naban zi'c rayal, bén yu' xSprijt Dios luxdoo, bén yu' tée ree xquiarguiejn, din yazuj reeman güün reeman dxiin guin.

<sup>4</sup> Guiáad dunujn yasnuu yarejdx yanaaban Dios, yalüü tëen xtiidxaman.

<sup>5</sup> Graczi reeman cwëjb ni rëb reeman, abi' gulej reeman bén la Esteban, laaman rliadx Jesucrist guidib luxdooan, rniabee tée xSprijt Dios luxdooan guidiblagaa. Gulej tée reeman Felip, Prócoro, Nicanor, Timón, Parmenas në Nicolás bén zëed Antioquía, nëman bililadx ni rliadx ree bén Israel chi gadaman chililadx Jesucrist. <sup>6</sup> Dxel binë reeman laa reeman loj ree apóstoles guin, persi gurejdx gunab reeman Dios por laa reeman badxiib tée yaa reeman guijc reeman.

<sup>7</sup> Canuu care'ch xtiidx Dios, abi' Jerusalén cayajcxhiey ree bén rliadx Jesucrist, në zien ree bixhioz Israel bililadx laaman.

*Biniaaz Esteban*

<sup>8</sup> Dád gognë Dios Esteban badëe tëeman guialrniabee persi rijnman zien loj milagr delant loj ree bejn. <sup>9</sup> Abi' bëlzi ree bén yadoo ni la Libertados në ree bén Cirene con ree bén Alejandría con ree bén niz Cilicia nëtëe ree bén zëed niz Asia, guzuloj cadildiidxnë reeman Esteban, <sup>10</sup> per ad gojct nadxi' reeman xtiidxaman guial cayagnë xSprijt Dios laaman. <sup>11</sup> Dxel gudijx reeman bëlzi ree bejn din guiëb reeman, bacaagdiajg reeman rniee Esteban contr Dios në contr Moisejs. <sup>12</sup> Zian been reeman persi bidxe'ch ree bén luguiedx guin, në ree bengol në ree mextr rulüü ley. Dxel gunaaz reeman Esteban, binë reeman laaman loj guxtis. <sup>13</sup> Gudiil tée reeman bén basquiee ree persi rëb reeman loj ree guxtis guin:

—Ad rucwëezt rnieeguijdx xin guie xley Moisejs në xyadoo Dios. <sup>14</sup> Dunujn ma bacaagdiajg rëbix guial Jesús xin Nazaret guse'nx dux yadooro' ree, guchaa tëex costumbr basa'n Moisejs du loj ree.

<sup>15</sup> Abi' guxtis guin ree në gra ree bén riga' yagaj, chi baguiaa reeman loj Esteban, baguiaa reeman najn zi'c tijb loj anjl.

## 7

### *Ni rëb Esteban loj ree guxtis*

<sup>1</sup> Dxel bixhioz mazri zojbloj rniabee graczi ree bixhioz, gunabdiidxaman loj Esteban, rëbaman:

—¿Walin ya rëbil zian?

<sup>2</sup> Badxi' Esteban laan, rëbaman:

—Dad guxtis, në lëjt compniar, gol bacaagdiajg ni ganin. Dios bén yu' xanyabaa balüüloj loj dux béngulal ree Abraham, chi gureman niz Mesopotamia chi gadaman chisob guiedx Harán. <sup>3</sup> Abi' rëb Dios lojman: “Basa'n ladxil në gra ree lasa'l, wej loj yuj ni gulün lüj.” <sup>4</sup> Dxel brii Abraham ladx ree bén Caldea bisobaman Harán. Chi güt xDadaman, dxel bidnë Dios Abraham loj guidxliuj guie lod nadxu' ree yan. <sup>5</sup> Per chi bi't Abraham guie, achetczi guidxliuj badëed Dios lojman, ni'czi tibda'n nan ad badëetaman. Per beenman promejs loj Abraham guial gudëeman guidxliuj guie lojman, dxel chi guiëtaman tia' ree xdiaaman laan, majsi chi rëb Dios zian, ad wayut xi'n Abraham. <sup>6</sup> Rëb tëë Dios lojman guial xdiaaman chisob zi'c ree benzit nacion ren, lod gugüjn da't reeman laa reeman dxiin gusagzi tëë reeman laa reeman loj tajp gayuu ijz. <sup>7</sup> Per rëb tëë Dios lojman: “Gudëdan gra ree bén gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.” <sup>8</sup> Chi guneenë Dios Abraham, baya'n reeman diidx guial rayal chu' gra ree xinguaaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennë Isaac xi'nman Jacob, ziangajc beennë Jacob guidxiptio'p ree xi'nman, bén goc ree dux béngulal ree.

<sup>9</sup> 'Bén goc ree dux béngulal ree gudëdloj reeman Xiëb bén naj bijch reeman, abi' bato' reeman laaman loj ree bén zë Egipto, per ad guro'nldaxt Dios laaman, <sup>10</sup> gognëman laaman loj ni guzagdiajman badëë tëëman xquiarguiejnman, gognë tëëman laaman persi biajb rey guin laaman zagdxe, abi' beenman laaman gobernador Egipto, bazuj tëëman laaman din nabeeman gra ni rajp rey guin.

<sup>11</sup> 'Chi guyu gubijn guidibczi Egipto në niz Canaán, dxel guzagdiaj da't ree dux béngulal ree guial achet ni gaw reeman.

<sup>12</sup> Per chi gogbee Jacob guial yu' trigo Egipto, guxhaal ree xi'nman bén naj dux béngulal ree, dxel wej reeman Egipto.

<sup>13</sup> Chi barojp volt wej reeman, rëb Xiëb guial laaman naj bijch reeman, dxel gogbee rey Egipto xhie diaa zëëdaman. <sup>14</sup> Dxel rëb Xiëb loj ree bijchaman din chigxii reeman xDadaman

në gra ree lasa'man din chisob reeman Egipto. Gojc reeman gayojnchiin bejn. <sup>15</sup> Zianan zeel bisob Jacob Egipto, ni gütaman ni gajc güt ree xi'nman, dux béngulal ree. <sup>16</sup> Gojc xchej dxel bignë reeman xdxijt ree dux béngulal ree guiedx Siquem, persi biguie'ch reen lën baa guzii Abraham loj ree xi'n Hamor.

<sup>17</sup> Chi ma zidyob tiamp gac ni rëb Dios loj Abraham, zien ree bën Israel ma gojcxhiey Egipto. <sup>18</sup> Abi' guzuloy gunabee rey ren Egipto, bën ad beenbeet Xiëb. <sup>19</sup> Rey zii basagzi bën du ladx ree, gunabeeman chigsëëb reeman xindo niguiaaw golnejz ree din guiët reex. <sup>20</sup> Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bëëw. <sup>21</sup> Chi bidxin dxej bigsa'n reeman laax lod bigsëëb reeman laax, xi'n gajc rey guin baca' laax, persi baslaaman laax zi'c xi'nman. <sup>22</sup> Basiid Moisejs gra ni rajc ree bën Egipto, abi' lasajc ni guneex ni been tëëx.

<sup>23</sup> Chi guyu Moisejs tiuu ijz, bidyajb guijcaman bignaj lasa' bën Israelaman. <sup>24</sup> Abi' chi baguiaaman caguin tijb bën Egipto tijb bën Israel, balajman laaman, bagüjtaman bën Egipto guin. <sup>25</sup> Naladx Moisejs niagbee ree bën Israel guial por laaman yabëë Dios laa reeman loj ree bën Egipto, per ad gogbeet reeman. <sup>26</sup> Chi bareguiaal, bidxaagloy Moisejs tio'p ree bën Israel caga'p reeman, abi' guyënman nabe'cdxeman laa reeman, rëbaman: “¿Chexc zeel rdilidi? Awa bën Israel naj gropidi.” <sup>27</sup> Abi' bën caguin bën zatijb guin bacadxaaman Moisejs, rëbaman: “¿Chu bazuj lüj din nabeel dunujn, din na tëël ni rayal yaguieenan? <sup>28</sup> ¿Wen rënl ya gugüjtil naj zi'c bagüjtil bën Egipto ni nieey?” <sup>29</sup> Chi biguiejn Moisejs ni rëb bën guin, baxüünman wejman niz Madián. Ni gureman zi'c benzit, abi' cwa'man béngunaa, zianz guyu tio'p ree xi'ngaanman.

<sup>30</sup> Chi gudëd tiuu ijz, dxel balüüloy tijb xi anjl Dios loj Moisejs loj xbjal tijb yag ni cayazbajl lod naj yujbidx, gajxh guia' la Sinaí. <sup>31</sup> Dád badxa loj Moisejs guial baguiaaman bajl guin. Abi' chi bibigaman din guguiaaman laan mazri zagdxe, biguiejnman cha' Dios rëbaman lojman: <sup>32</sup> “Naj naj xDios xbéngulal reel, Abraham, Isaac në Jacob.” Dxel guzuloy canij Moisejs guial bidxebaman, ad bayaxtaman nuguiaaman bajl guin. <sup>33</sup> Dxel rëb Dios lojman: “Gulëë xgurëchil, din nagle' lod za'l. <sup>34</sup> Naj cuguia xhienaag cazagdiaj ree da bejnan Egipto, rigujenjan roon reeman zeel biguia'tan din yabën laa reeman. Yan, guda din gaxhalan lüj Egipto.”

<sup>35</sup> Abi' majsi ad guyënt ree bën Israel nuzoob reeman xtiidx Moisejs yaloy, rëb reeman lojman: “¿Chu bazuj lüj din nabeel dunujn na tëël ni yaguieenan?” Per por anjl balüüloy loj bajl guin, badëëd Dios guialrniabee lojman, abi' guxhaalaman laaman din güünman laa reeman yudar yarii reeman Egipto,

zi'c rëb anjl balüüloj lojman loj yag caye'c. <sup>36</sup> Moisejs guin naj bën babëë dux béngulal ree Egipto, been tēeman milagr ree niz Egipto, nē niz ro' nijsdoo ni la Nijs Xnia, nē loj yujbidx lod guzu reeman tiu ijz. <sup>37</sup> Laagajc tēeman rëb loj ree bën Israel: "Loj gajquidi cwe Dios tijb bën gudëed xtiidxaman loj ree bejn zi'c guleman naj. Gol bazoob xtiidxaman." <sup>38</sup> Dxel chi guzunë Moisejs dux béngulal ree niz loj yujbidx, laaman naj bën guneenë xi anjl Dios ruguia' la Sinaí, persi badëëman xtiidx Dios loj reeman, abi' diidx guin ree naj ni basa'n reeman duloj ree yan.

<sup>39</sup> 'Per dux béngulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyuguijczy reeman nayejc reeman Egipto. <sup>40</sup> Dxel rëb reeman loj Aarón: "Been dios ree, din ned reeman du loj ree, din ad rayagbeet ree gonczy Moisejs bën babëë dunuj ree Egipto." <sup>41</sup> Dxel been reeman tijb go'ndobëz din gaquib xdios reeman. Bagüjt reeman be ree persi badëed reeman laa reeb zi'c gon loj ni been reeman, been reeman lanij guial babaanë reeman ni been gajc reeman. <sup>42</sup> Dxel guro'nladx Dios laa reeman, baslaaman guyën reeman gubijdx con bëëw con bajl yu' ree xanyabaa. Din zian ca loj xtiidx Dios ni bacaa ree bën badëed xtiidxaman loj ree bejn, lod rëb:

Bën Israel, loj tiu ijz ni guzudi loj yujbidx,

¿wen bagüjtidi be ree ya din guneedi laa reeb lon zi'c gon?

<sup>43</sup> Per mazri guyëndi xdxandi Moloc biaa tēedi lidxan, nē xbajl dxan Refán, dxan been gajquidi din guzuxibidi loj reen.

Zeel gaxhalan lëjt mazri zijt guial Babilonia.

<sup>44</sup> 'Abi' chi guzu ree dux béngulal ree loj yujbidx, gojp reeman tijb yu been laa reeman sirv zi'c yadoo, lod guyuchaaw ree guiaj ni ca xley Dios. Been reeman yadoo guin zi'c gunabee Dios Moisejs, chi rëbaman lojman guial güünman laan zi'c ma baguiaaman. <sup>45</sup> Chi güt Moisejs, baya'nnë ree dux béngulal ree yadoo guin. Chi baya'n Josué xluar Moisejs, dxel bidnë reeman yadoo guin chi gudil reeman guijc guidxliuj con ree bën ren, abi' gognë Dios laa reeman persi been reeman gan baya'nnë reeman guidxliuj guin ree. Zian guzunë reeman yadoo guin xt bidxin dxej guzuloj gunabee rey Davi. <sup>46</sup> Guyën Dios rey Davi, abi' laaman guyënman nüjnman tijb yadoo par Dios, bën naj dux Dios ree nayajc ree bën Israel. <sup>47</sup> Per rey Salomón naj bën been laan, <sup>48</sup> majsi Dios bën yu' xanyabaa ad rbejtaman lën yadoo ni rüjn ree bejn, zi'c rëb bën badëed xtiidx Dios loj ree bejn diizd gocli, chi rëbaman:

49-50 Xanyabaa naj lod zooban par ganabeen,

guiáad loj guidxliuj naj lod ruzu guia'n.

¿Xhienaag gac yu güündi par naj?

¿O xhienaaq naj lod yaziiladxan?

¿Id naj ben graczi ree ni guie ya?, rëb Dios.

<sup>51</sup> Per lëjt —rëb Esteban —dád nadidi, ad rëntidi guzoobidi xtiidx Dios, ad rën tëetidi chignia'di, zianczi za'di contr xSprijt Dios, zi'cgajc been ree xbéngulalidi. <sup>52</sup> ¿Chu bën badëed xtiidx Dios loj ree bejn ad beennaat ree xbéngulalidi? Xt bagüjt reeman bën badëed ree xtiidx Dios bën rëb ree guial gui't tijb bën naya nali. Abi' yan ma bi'taman, bayüdi laaman loj ree bën rniabee, gunabee tëedi güjtaman. <sup>53</sup> Majsi cwa'di xley Dios loj ree xi anjlaman, per ad rüjntidi zi'c rëb loj ley guin.

### *Bagüjt reeman Esteban*

<sup>54</sup> Chi biguiejn reeman ni rëb Esteban, xt raw lay reeman tant balen reeman laaman. <sup>55</sup> Per guial yu' xSprijt Dios luxdoo Esteban, chi gules lojman xanyabaa, dxel baguiaaman xbiani Dios baguiaa tëëman Jesús za'man xladbee Dios. <sup>56</sup> Dxel rëb Esteban:

—¡Gol baguiaa! Ruguian naxal xanyabaa, ruguia tëën Bén guxhaal Dios za'man xladbee Dios.

<sup>57</sup> Per chi biguiejn reeman zian, bata'cw guidiajg reeman, dxel gurixdiaj reeman zignaaq reeman Esteban, <sup>58</sup> babëë reeman laaman loj ciuda guin, bicüjt reeman laaman con guiaj, guiáad xab reeman basa'nsii reeman loj xinguiag la Saulo persi canajxan. <sup>59</sup> La'tgaj cucaaguaiaj reeman Esteban, rëbaman:

—Dad Jesús, baca' da sprijtan.

<sup>60</sup> Dxel bazuxibaman guridxa'man rejs, rëbaman:

—Dad Jesús, ad güüncwentiil dol cayüjn ree bën guin yan.

Naabczi gulox rëbaman zian, laa güt gajcaman.

## 8

### *Guzunal Saulo bën rliladx ree Jesucrist*

<sup>1</sup> Baya'n Saulo conform guial bagüjt reeman Esteban. Abi' dxej zii gajc guzuloj rzunal reeman bën Jerusalén ree bën rliladx ree Jesucrist, dxel bire'ch reeman guidib niz Judea në niz Samaria, bën najzi ree apóstoles baya'n. <sup>2</sup> Guyu bëlzi ree xinza'c, laa reex biquie'ch Esteban, abi' dád biin reex guijcaman. <sup>3</sup> Guiáad Saulo rzunalaman bën rliladx ree Jesucrist, ruman yu yu din cwëë naguiejnman laa reeman, zi'c xinguaaaw zi'c béngunaa, persi rgu'man laa reeman ladxguuib.

### *Bacaagdiajg ree bën Samaria xtiidx Dios*

<sup>4</sup> Per bën brii ree Jerusalén, lod zëtzi reeman rtie'ch reeman xtiidx Dios. <sup>5</sup> Zi'c been Felip, wejman guiedx Samaria, guzuloj caneeman xtiidx Jesucrist loj ree bejn. <sup>6</sup> Dád zien ree bejn rdo'p, graczi reeman rucaagdiajg chaaw ni rëb Felip, ruguiaa

tëe reeman milagr ree ni rüjnman. <sup>7</sup> Zien ree bën nëjt tib lajt xcuerp bayüjn Felip, në ree bën ad rzat zagdx, bayüjn tëeman bën yu' ree xindxab luxdoo abi' rbixdiaj reex rarii reex. <sup>8</sup> Zianan zeel babaa da't ree bën luguiedx zii.

<sup>9</sup> Per luguiedx zii guyu tijb bën brii laj Simón, diisd gocli rüjnman guialbidxaa persi rusquieeman bën Samaria ree, rüjnman bën lasajc. <sup>10</sup> Graczi reeman rucaagdiajg chaaw ni rëbaman, diisd mazri ree xinguiag xt mazri ree bengol, abi' rëb reeman:

—Naroob naj xguialrniabee Dios ni rajp bën guie.

<sup>11</sup> Bidxga' reeman laaman guial ma gojc xchej cusquieeman laa reeman con guialbidxaa ni rüjnman. <sup>12</sup> Per chi bililadx reeman ni rëb Felip xcwent xguialrniabee Dios në xcwent Jesucrist, zi'c ree xinguaaw zi'c ree béngunaa gurobnijs reeman. <sup>13</sup> Xt në Simón bililadx gurobnijs tëeman, abi' ad riro'nladxtaman Felip radxa tëe lojman graloj ree milagr ruguaaman rüjn Felip.

<sup>14</sup> Chi gogbee ree apóstoles riga' Jerusalén guial ma bililadx ree bën Samaria xtiidx Dios, dxel guxhaal reeman Bëd con Waj ni. <sup>15</sup> Chi bidxin reeman, gurejdx gunab reeman Dios por ree bën Samaria bën ma rliladx ree xtiidx Dios din chu' xSprijt Dios luxdoo reeman, <sup>16</sup> din ni'qui tijb reeman ad wayut Sprijt guin luxdoo, gurobnijsi reeman por Dad Jesús. <sup>17</sup> Dxel guxhoob yaa ree Bëd con Waj guiyc reeman, abi' guyu xSprijt Dios luxdoo reeman.

<sup>18</sup> Chi baguiaa Simón cayu xSprijt Dios luxdoo ree bën guin guial caxhoob yaa ree apóstoles guin guiyc reeman, dxel guyënman nudëeman milia loj reeman, <sup>19</sup> rëbaman:

—Në lon gol banee guialrniabee guin din chi gaxhob yan chutëez guiyc bënan, në luxdooman chu' xSprijt Dios.

<sup>20</sup> Dxel badxi' Bëd xtiidxaman rëbaman:

—Nitol con guidib xmilial, din rüjnl xgab guial zajc siil guialrniabee razaladx Dios. <sup>21</sup> Ad rayalt ad zajc tëet güünl zi'c raguieenan, din ni'quid zinartil xnejz Dios. <sup>22</sup> Bayüjn xgab por ni mal beenl, gurejdx gunab tëe Dios, rupent güünman lüj perdon por ree xixgabmalil, <sup>23</sup> din ragbeen ganax guialralen yu' luxdool, abi' dol guin naj ni rniabee lüj.

<sup>24</sup> Dxel badxi' Simón xtiidxaman, rëbaman:

—Gol gurejdx gunab Dios por naj, chitëe gaza'can ni'qui tijb ni ma nadi.

<sup>25</sup> Chi gulox gunee ree apóstoles guin xtiidx Dios loj ree bën guin, dxel badxin reeman Jerusalén, abi' graczi ree guiedx riga' niz Samaria lod gudëd reeman gutie'ch reeman xtiidxza'c Jesucrist.

*Felip con bën Etiopía*

<sup>26</sup> Chi ma gudéd gojc zian, gunee tijb xi anjl Dios Felip rëbaman:

—Wej niz sur nejz ni zë Jerusalén xt lod la Gaza, niz lod naj ganax yujbidx.

<sup>27</sup> Dxel brii Felip zëman. Runejz guin banaazaman tijb bén Etiopía, najman bén zojbloj guial laaman rgu'chaaw xmilia Candace, bén naj reina Etiopía. Wejman Jerusalén bignajchi'man Dios, <sup>28</sup> abi' ma bayunejzaman zia ladxaman, zojb lën xcarrejt zagdxeman, roolaman loj gui'ch ni bacaa Isaías, bén badëéd xtiidx Dios loj ree bejn. <sup>29</sup> Dxel rëb xSprijt Dios loj Felip:

—Bibig gajxh cwë' carrejt guin.

<sup>30</sup> Chi bibigaman, biguejnman cayool bén guin loj gui'ch bacaa Isaías. Dxel gunabdiidxaman lojman rëbaman:

—Dad, ¿rignia'l ni cayoolil ya?

<sup>31</sup> Badxi' bén guinan rëbaman:

—¿Xoza chignia'nán? Awa achut gusignia' naj.

Dxel rëbaman loj Felip din chë'paman loj carrejt guin, cwe-man cwë'man.

<sup>32</sup> Loj xtiidx Dios lod cayool bén guin rëban:

Zi'c rinë reeman tijb xiil,

binë reeman laaman lod gugüjt reeman laaman.

Abi' achet rëbaman,

zi'c tijb xiil ma za' loj ree bén gugaj guidxladib.

<sup>33</sup> Chi beennë reeman laaman zi'ctzi rën reeman, achut been guialguxtis por laaman.

Yan achut guza't xdiaaman,

din ma bisüd reeman laaman loj guidxliuj.

<sup>34</sup> Rëb bén guin loj Felip:

—Guna sii, ¿chu xcwent rniee bén bacaa diidx guie ree? ¿Xcwent gajcaman ya o xcwent ben renan?

<sup>35</sup> Dxel guzuloj Felip cusignia'man laaman xtiidx Dios ni cayoolaman, zian beman xtiidxza'c Jesucrist lojman. <sup>36</sup> Abi' chi gudéd reeman lod yu' nijs, dxel rëb bén guin loj Felip:

—Guie yu' nijs. ¿Nid zajc garobnijsan guie ya?

<sup>37</sup> Zeel rëb Felip lojman:

—Bal riladxil guidib luxdool, zajcan.

Badxi' bén guinan rëbaman:

—Rliladxan guial Jesucrist naj Xi'n Dios.

<sup>38</sup> Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman. <sup>39</sup> Chi barii reeman lojnijs guin, loj hor zii gajc gunidloj Felip binë xSprijt Dios laaman, abi' ad baguiaatri bén guin laaman, per dád rabaaman zinal xnejzaman. <sup>40</sup> Chi gogbee Felip, ma za'man xt guiedx Azoto, dxel zëman guiedx



guiedx zigtie'chaman xtiidxza'c Jesucrist xt bidxinman Cesaarea.

## 9

### *Bililadx Saulo Dad Jesucrist (Hch. 22:6-16; 26:12-18)*

<sup>1</sup> Guiaad Saulo ad rucwëët rdxe'chaman bén rililadx ree Jesucrist, rëbaman gugüjtaman laa reeman. Zeel wejman bigneenëman bixhioz mazri zobjloj rniabee graczi ree bixhioz, <sup>2</sup> din gac tijb gui'ch din gac cheman lën ree yadoo Damasco chigdiilaman bén rililadx ree Jesucrist, zi'c ree xinguaaw zi'c ree béngunaa, din chignëman laa reeman ladxguiib Jerusalén. <sup>3</sup> Per chi ma cadxinman gajxh guiedx Damasco, dxejlczi brii tijb gui xanyabaa balaan bacha' lod zëman. <sup>4</sup> Abi' bireeyujman, chi naga'man luyuj guin biguiejnman cha' bén rëb:

—Saulo, Saulo, ¿chexc zeel rzunalil naj?

<sup>5</sup> Abi' gunabdiidxaman rëbaman:

—¿Chu lüj, Dad?

Badxi'man laan rëbaman:

—Naj naj Jesús bén rzunalil. Per ganin lüj, lüj gajc rguuil xguialnaal zi'c rüjn tijb go'n rudxegua' loj yag ni rulaagnë reeman laab.

<sup>6</sup> Rnij Saulo guial tant bidxebaman, abi' rëbaman:

—Dad, ¿xhie rënl günan?

Dxel rëb Dad Jesucrist lojman:

—Bixche, wej guiedx Damasco, ni na reeman ni rayal güünl.

<sup>7</sup> Abi' ree bén në Saulo dá d bidxeb reeman guial biguiejn reeman cha' bejn, per achutczu baguiaa reeman. <sup>8</sup> Chi bixcherman luyuj guin, baxhal lojman, ad rajctri ruguiaaman. Dxel gunaaz reeman yaaman bignë reeman laaman Damasco. <sup>9</sup> Ni guzuman choon dxej, ad rajct ruguiaaman, achetczi rawaman ache tëëtczu rë'man.

<sup>10</sup> Damasco gure tijb bén rililadx Dad Jesucrist, brii lajman Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

<sup>11</sup> Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëed Tarso, lax Saulo. Din laax cabejdx canab naj, <sup>12</sup> abi' zi'c rulüü cane'xhchaalix, baguiaax guyu tijb bén la Ananías guxhoob yaaman gui quix persi baguiaax stijb.

<sup>13</sup> Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnnëx bén rililadx ree lüj Jerusalén. <sup>14</sup> Yan zëedix guie con

xgualrniabee ree bixhioz rniabee ree bixhioz, din guiniaazix gra ree bén rlliladx lüj.

<sup>15</sup> Dxel rëb Jesucrist lojman:

—Wej, din naj gule laax din chiguix da diidxan loj ree bén ad najt bén Israel, në loj ree rey, con nëgajc loj ree bén Israel.

<sup>16</sup> Guiën lojx guial sagdiaj da'tix guial najx da bejnan.

<sup>17</sup> Dxel zë Ananías lënü lod za' Saulo. Chi guyuman, guxhoob yaaman guijcaman, rëbaman:

—Bijch Saulo, Dad Jesús bén balüüloj lojl runejz lod zëëdil, laaman guxhaal naj din yaguaal, chu' tëë xSprijt Dios luxdool.

<sup>18</sup> Loj hor gajc zi'c rulüü yu' xhie biquied guiaalojman abi' baguiaaman stijb. Dxel guzuliman gurobnijsaman, <sup>19</sup> gudaw tëëman persi bayuman gojl. Dxel guzujman Damasco tio'p choon dxej con ree bén rlliladx Jesucrist.

### *Gunee Saulo xtiidx Dios Damasco*

<sup>20</sup> Dxel guzuloj gunee Saulo xtiidx Dios lën ree yadoo, rëbaman guial Jesucrist naj Xi'n Dios. <sup>21</sup> Graczi ree bén biguien ni rëbaman badxa loj reeman abi' rëb reeman:

—¿Nid bén guien rzunal bén rlliladx ree Jesucrist Jerusalén ya? ¿Nid laagajcaman zëëd guie ya, din guiniaazaman bén rlliladx ree Jesucrist chignë tëëman laa reeman loj ree bixhioz rniabee ree bixhioz?

<sup>22</sup> Per Saulo guixie guixie mazri cariiman guialrdxeb rnieeman xtiidx Dios, rulüüman guial Jesús naj Cristo, din yabëëman bejn ree loj dol. Xt ragdxa ree bén Israel zojb ree Damasco chi rucaagdiajg reeman ni rëbaman.

### *Baxüün Saulo guiedx Damasco*

<sup>23</sup> Ad xchejt gojc, baya'n ree bén Israel diidx din nugüjt reeman Saulo, <sup>24</sup> per laa gogbee gajcaman ni rën reeman güün reeman. Dxej guiaal rbëz reeman laaman ro' ree port ni rarii ro' ciuda guin din nugüjt reeman laaman. <sup>25</sup> Per ree bén rlliladx Jesucrist, guxhin badxe' reeman laaman lën dxüm narooob, abi' gulet reeman laaman niz xijch ze' nusiaaw ciuda guin, zian baxüünman Damasco.

### *Badxin Saulo Jerusalén*

<sup>26</sup> Chi badxin Saulo Jerusalén, guyënman nuchajgaman bén rlliladx ree Jesucrist, per graczi reeman bidxeb laaman guial ad rlliladxt reeman nëman ma rlliladx Jesucrist. <sup>27</sup> Dxel binë Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneenë tëëman laaman chi zëman Damasco, bagojn tëëman guial Damasco gunee Saulo xtiidx Jesucrist sin guialrdxeb. <sup>28</sup> Zian baya'n Saulo Jerusalén abi' nayuman laa reeman. <sup>29</sup> Ad rdxebtaman

ruza'taman Dad Jesús, abi' xt gudijldiidxnëman Bén Israel rniee ree diidx grieg, per guyën reeman nugüjt reeman laaman. <sup>30</sup> Chi gogbee ree Bén rliadx Jesucrist zian, binë reeman laaman guiedx Cesarea. Yagaj baxhaal reeman laaman guiedx Tarso.

<sup>31</sup> Dxel babedxe luxdoo ree Bén rliadx Jesucrist, Bén zojb ree niz Judea në niz Galilea nëtëë niz Samaria, chigagaj beenbee reeman mazri xhienaag naj xnejz Dios, bazoob tëë reeman xtiidxaman, abi' cayagnë xSprijt Dios cayajcxhiey reeman.

### *Bayajc Eneas*

<sup>32</sup> Chi biza Bëd bitixlojman Bén rliadx ree Jesucrist, dxel wej gajcaman bitixlojman Bén rliadx ree Jesucrist guiedx Lida. <sup>33</sup> Ni bidxaaglojman tijb xinguaaaw la Eneas. Ma gojc xhujn ijz naga'x, ragxuux, ad rajct rzax. <sup>34</sup> Abi' rëb Bëd lojx:

—Eneas, ma bayüjn Jesucrist lüj. Bixche, bales ni go'til loj.

Loj hor zii gajc bixchex. <sup>35</sup> Chi baguiaa gra ree Bén zojb guiedx Lida në ree Bén zojb niz Sarón guial ma bayajc Eneas, dxel në reeman bililadx Jesucrist.

### *Baban Dorcas*

<sup>36</sup> Loj tiamp zii guyu tijb béngunaa rliadx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tëëman yudar Bénprob ree. <sup>37</sup> Lën ree dxej zii gogxuu Dorcas abi' güjtaman. Chi gulox bagajz reeman laaman, dxel bitixh reeman laaman lënü ladya. <sup>38</sup> Abi' gajxh guiedx Jope raya'n guiedx Lida lod za' Bëd. Chi gogbee ree Bén rliadx Jesucrist guial za'man ni, guxhaal reeman tio'p ree xinguaaaw bisajc reex Bëd liaadx, rëb reex:

—Been wen yo' ree Jope yan gajczi.

<sup>39</sup> Laa zinë gajcaman laa reex. Chi bidxinman, binë reeman laaman lënü lod naga' xcuerp Dorcas. Ni riga' zien ree béngunaa bizëjb roon reeman, abi' bibig reeman loj Bëd culüü reeman gra lajd ni been Dorcas chi sta nabanman. <sup>40</sup> Dxel gunabee Bëd barii gra reeman, abi' bazuxibaman gurejdx gunabaman Dios. Dxel baguiaaman bengüt guin, rëbaman:

—jTabita, bixche!

Laa guxhal gajc lojman. Chi baguiaaman Bëd, gureliman, <sup>41</sup> dxel gunaaz Bëd yaaman persi guzuliman. Abi' gurejdxaman Bén rliadx ree Jesucrist con ree Bén bizëjb guin, persi baguiaa reeman guial ma baban Dorcas. <sup>42</sup> Guidibczi guiedx Jope gogbee reeman ni goc, abi' zien da't reeman bililadx Jesucrist por zian. <sup>43</sup> Guiáad Bëd baya'nman mazri dxej luguiedx guin, lidx Simón Bén rüjnchaaw guid.

## 10

*Wej Béd lidx Cornel*

<sup>1</sup> Luguiedx Cesarea gurej tijb bén brii laj Cornel. Laaman goc suldad gunabee tibcwaa ree suldad brii laj Italiano.

<sup>2</sup> Gojcaman benza'c, laaman në gra ree bén zojb lidxaman guyën reeman Dios, abi' dád beenman yudar bén Israel ree, bén naj ree bénprob, në zianczi rbejdx rniabaman Dios.

<sup>3</sup> Tijb dxej cost raca choon wadxe, guzajcaman zi'c rulüü cane'xhchaalaman. Zagdexeci baguiaaman guyu tijb xi anjl Dios lënü lod za'man, abi' rëb anjl guin lojman:

—¡Cornel!

<sup>4</sup> Baguiaaman loj anjl guin, abi' dád bidxebaman, rëbaman:

—¿Xhienin, Dad?

Abi' rëb anjl guin:

—Ma bigueijn Dios xtiidxil ma baguiaa tēeman xhienaag rüjn yudar bénprob ree. <sup>5</sup> Guxhaal ree bén che luguiedx Jope din chica' reeman Simón, bén la gajc Béd. <sup>6</sup> Zojbaman lidx tijb bén la gajc Simón, bén rüjnchaaw guid, bén zojb gajxh ro' nijsdoo. Béd guin na ni rayal güünl.

<sup>7</sup> Chi zia anjl guneé Cornel, gurejdxaman tio'p ree xmojsaman, zatijb suldad rajpaman confians rliladx tēeman Dios.

<sup>8</sup> Gulox beman diidx loj reeman ni guzacaman, dxel guxhaalaman laa reeman Jope.

<sup>9</sup> Chi bareguiaal, la'tgaj cadxin reeman gajxh Jope, cost garol dxej wë'p Béd guijc yu lod zojbaman din cwedx guiniabaman Dios. <sup>10</sup> Dád gulaanman, guyënman niajwaman, per la'tgaj cayüjn reeman ni gawaman guzajcaman zi'c rulüü cane'xhchaalaman.

<sup>11</sup> Baguiaaman bixal xanyabaa abi' caguiajt zi'c tijb lajd narooxt lod za'man, naxii guidap xquinan. <sup>12</sup> Loj lajd guin yu' gra loj ree be yu' tajp guia', në ree bëël, nētëë ree be rzuj. <sup>13</sup> Dxel bigueijnman cha' bén rëb:

—Béd, bisu, bagüjt be gawil.

<sup>14</sup> Per badxi' Béd laan rëbaman:

—Yajqui, Dad. Ad wayawtczan nidxuudx ni ad rayalt gaw bejn.

<sup>15</sup> Abi' rëb cha' bén guin zatijb:

—Ni ma basia Dios ad rnieelan nidxuudx.

<sup>16</sup> Choon volt gojc zian, dxel bayë'p lajd guin xanyabaa stijb.

<sup>17</sup> La'tgaj cayüjn Béd xgab xhie rën guiëb ni baguiaaman, loj hor zii gajc bidxin ree bén guxhaal Cornel rulidx Simón, guial ma gunabdiidx reeman banguin naj lidxaman. <sup>18</sup> Chi bidxin reeman, gunabdiidx reeman bal ni zojb Simón bén la gajc Béd.

<sup>19</sup> Guiáad Béd sta cayüjnman xgab ni baguiaaman, chi rëb xSprijt Dios lojman:

—Laa choon ree xinguaaaw raguuil lüj. <sup>20</sup> Bisu, biguiajt binë reex, ad chu' luxdool tio'p, din naj guxhal laa reex.

<sup>21</sup> Dxel baguiajt Bëd lod za' ree bën guxhaal Cornel, abi' rëbaman loj reeman:

—Naj naj bën raguuilidi, ¿chexquiza zeel raguuilidi naj?

<sup>22</sup> Dxel badxi' reeman laan rëb reeman:

—Guxhaal bën la Cornel dunujn, bën rniabee tibcwaa ree suldad, najman benza'c, rdxebaman Dios, abi' graczi ree bën Israel rën laaman. Tijb xi anjl Dios rëb lojman, guial rayal guixhiaalaman dunujn yudca'n lüj din yo' ree lidxaman, din gucaagdiajgaman ni rayal guiëbil.

<sup>23</sup> Dxel badxe' Bëd laa reeman lënü, ni gudëd reeman guiaal. Chi bareguiaal, binëman laa reeman. Në bëlzi ree bën zojb Jope bën rliladx ree Jesucrist binë laaman.

<sup>24</sup> Chi bareguiaal bidxin reeman Cesarea lod zojb Cornel. Abi' bato'p Cornel gra ree lasa'man në ree xmiwaman, din cwëz reeman guidxin reeman. <sup>25</sup> Chi bidxin Bëd lidx Cornel, laa brii gajc Cornel bigchaaglojman laaman, dxel bazuxibaman loj Bëd persi gojpaman laaman respejt. <sup>26</sup> Per bazuli Bëd laaman, rëbaman:

—Guzuli, din lasa' bejn gajcan lüj.

<sup>27</sup> La'tgaj cadxin reeman ruyü guin cayü reeman diidx. Abi' chi guyu reeman, baguiaa Bëd zien da't ree bejn riga' ni. <sup>28</sup> Dxel rëb Bëd loj reeman:

—Ma qui ragbeedi xhienaag naj xley ree bën Israel, guial ad zajct go'ch reeman loj ree bën ad najt bën Israel o chu' reeman lidx reeman. Per ma balüü Dios naj guial achutcz rayal ganen bendxuudx, bën nabixhladx. <sup>29</sup> Zeel chi bidca' reeman naj, laa bial gajcan achet guiyc badxiban. Yan rënan gagbeen, ¿chexquiza zeel gurejdxidi naj?

<sup>30</sup> Badxi' Cornelan rëbaman:

—Ma gojc tajp dxej cost hor guie gajc, chi zoob lidxan, raca choon wadxe, cabedx canaaban Dios, loj hor zii balüüloj tijb bejn lon najcwaman lajd nayni. <sup>31</sup> Abi' naman lon: “Cornel, ma biguiejn Dios xtiidxil, yu'guiyc tëëman xhienaag rüjnl yudar bënprob ree. <sup>32</sup> Zeel guxhaal ree xin che luguiedx la Jope din chica' reex Simón, bën la gajc Bëd. Zojbaman lidx tijb bën la gajc Simón, bën rüjnchaaw guid, bën zojb gajxh ro'nijsdoo. Bëd guin na ni rayal güünl.” <sup>33</sup> Zianan zeel laa guxhal gajcan xin bidgadiil ree lüj. Zagdxe beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios lüj nal du lojn.

*Ni gunee Bëd lidx Cornel*

<sup>34</sup> Dxel guzuloj canee Bëd, rëbaman:

—Ma ragbeen yan guial tiblojzi ruguiaa Dios bejn. <sup>35</sup> Din Dios, chutëez bénguidxliuj ridxga' laaman rüjn tēeman zi'c rayal, nēgajc Dios ridxga' laaman. <sup>36</sup> Dios ma gunee bēn Israel ree, ma bagojnman guial por Jesucrist rabadxe luxdoo bejn, bēn naj Dad par gra ree bénguidxliuj. <sup>37</sup> Lējt ragbee xhienaag baza't reeman Jesús diizd niz Galilea xt guidib niz Judea, chi gulox bagojn Waj bejn ree xcwent guialrirobnijis. <sup>38</sup> Ragbee tēedi guial ma badēe Dios xSprijtaman con xguialrniabeeman loj Jesús bēn Nazaret, abi' bizaman biguieenman ni zagdxe, bayünman gra ree bēn cazagdiaj por xindxab. Gojc beenman zian guial za'nē Dios laaman. <sup>39</sup> Abi' dunujn baguiaa gra ni been Jesús guidib niz Judea, nē niz Jerusalén. Dxelri bagüjt reeman laaman, bacaa reeman laaman loj crüjz. <sup>40</sup> Per Dios basban laaman ni bayon dxej, abi' cwējb Dios bidgalüülojman du lojn. <sup>41</sup> Ad balüülojtaman loj gra ree bejn, tijbzi du lojn nayajcan bēn gule Dios diizd yaloj din yaguaan graczi ni beenman. Abi' dunujn badaawnē' laaman badü'nē' tēen laaman chi babanman stijb. <sup>42</sup> Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman guialguxtis chi guidxin dxej yadēed gra ree bejn cwent loj Dios, zi'c ree bēn naban zi'c ree bēn ma güjt. <sup>43</sup> Nētēe diizd gocli graczi ree bēn badēed xtiidx Dios loj ree bejn, gunee reeman xcwent Jesús, rēb reeman guial graczi ree bēn chililadx laaman, gac xtol reeman perdon.

*Guyu xSprijt Dios luxdoo ree bēn ad najt bēn Israel*

<sup>44</sup> Sta canee Bēd, chi guyu xSprijt Dios luxdoo gra ree bēn cucaagdiajg ni cayēbaman. <sup>45</sup> Dxel bēn Israel rliladx ree Jesucrist, bēn binē ree Bēd, dād badxa loj reeman guial nē ree bēn ad najt ree bēn Israel guyu xSprijt Dios luxdoo, <sup>46</sup> guial riguiejn reeman ma rniee ree bēn guin graloj ree diidx, abi' ruza't reeman Dios zagdxe. <sup>47</sup> Dxel rēb Bēd loj reeman:

—¿Chu zajc gudxoon tiobnijis ree bēn guie, bal ma yu' xSprijt Dios luxdoo reeman zi'cgajc dunuj ree?

<sup>48</sup> Abi' gunabeeman tiobnijis reeman por Jesucrist. Dxelri guzajc reeman liaadx loj Bēd din sunēman laa reeman za tio'p choon dxej mazri.

## 11

*Guyu xSprijt Dios luxdoo ree bēn ad najt bēn Israel*

<sup>1</sup> Bēn naj ree xi apóstoles Jesús con ree bēn Judea, bēn rliladx ree laaman, gogbee reeman guial nē ree bēn ad najt bēn Israel bililadx xtiidx Dios. <sup>2</sup> Abi' chi badxin Bēd Jerusalén, bēn Israel ma rliladx ree Jesucrist, bēn sta zinal ree ley, gudilē reeman Bēd. <sup>3</sup> Rēb reeman lojman:

—¿Chexc zeel bichu'l lidx ree bén ad najt bén Israel abi' gudawnël laa reeman?

<sup>4</sup> Dxel guzuloj cayü Béd diidx diizd guia'xchej xhienaag gojc zeel wejman lidx ree bén guin abi' rëbaman loj reeman:

<sup>5</sup> —Chi za'n luguiedx Jope, la'tgaj cabedx canaaban Dios, guza'can zi'c rulüü cane'xhchalan. Baguian zi'c tijb lajd narooob naxii guidap xquinan caguaajtan diizd xanyabaa xt lod za'n. <sup>6</sup> Chi baguian zagdxe xhie yu' loj lajd guin, baguian bedoxh ree në ree be yu' tajp guia' në ree bëël con ree be rzuj. <sup>7</sup> Dxel biguiejnan cha' bejn, naman: “Béd, guzuli, bagüjt be gawil.” <sup>8</sup> Per badxi'nän rën: “Yajqui, Dad, din ad goctzi wayawan nidxuudx, ni ad rayalt gaw bejn.” <sup>9</sup> Abi' guneeman diizd xanyabaa stijb, naman: “Ni ma basia Dios, ad rnieelan nidxuudx.” <sup>10</sup> Choon volt gojc zian, dxel bayë'p gra ni guin xanyabaa. <sup>11</sup> Loj hor zii gajc bi't choon ree xinguaaaw lod guren, zëéd reex diizd Cesarea, cayguil reex naj. <sup>12</sup> Abi' na xSprijt Dios lon guial chinë'n laa reex, ad chu' luxdon tio'p. Në guixo'p ree bén guie bén naj dux compniar ree binë'n. Abi' dugraczan badxu' lidx bén guin. <sup>13</sup> Dxel beman diidx du lojn xhienaag balüüloj tijb xi anjl Dios lojman lidxaman, rëb anjl guin lojman: “Guxhaal ree bén che luguiedx Jope din chica' reeman Simón, bén la gajc Béd, <sup>14</sup> laaman na xhienaag gac ree xtolil perdon, con gra ree bén zojb lidxil.” <sup>15</sup> Chi guzuloj canenë'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj. <sup>16</sup> Dxel basaaladxan xtiidx Dad Jesucrist chi naman: “Walican baroobnijs Waj con nijs, per lëjt chu' xSprijt Dios luxdoodi.” <sup>17</sup> Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

<sup>18</sup> Chi biguiejn ree bén guin ni rëb Béd, dxel achetri rëb reeman lojman abi' baza't reeman Dios zagdxe, rëb reeman:

—¡Ma rayagbee ree yan guial në ree bén ad najt bén Israel ma balüü Dios guial rayal yayüjn xgab por xtol reeman yadxi' tëë loj reeman lojman din gap reeman guialnaban tiblyaa delant lojman!

### *Bililadx ree bén Antioquía Jesucrist*

<sup>19</sup> Chi mal bagüjt ree bejn Esteban, dxel guzuloj rzunal reeman bén rliladx ree Jesucrist persi bire'ch gra ree bén rliladx guin niz Fenicia, niz Chipre në Antioquía. Abi' gutie'ch reeman xtiidxza'c Jesucrist, per ganaxzi loj ree bén Israel. <sup>20</sup> Per loj reeman no'ch bëlzi ree bén Chipre në ree bén Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree bén ad najt bén Israel. <sup>21</sup> Gognë

Dios laa reeman, dád zien ree bejn bililadx ni rëb reeman abi' bililadx reeman Jesucrist.

<sup>22</sup> Chi gogbee ree bën Jerusalén rlliladx Jesucrist ni goc, guxhaal reeman Bernabé xt guiedx Antioquía. <sup>23</sup> Chi bidxinman ni, dád babaaman chi baguiaaman xhienaag cayagnë Dios bën guin ree. Dxel guneenëman gra reeman din con guidib luxdoo reeman gusnuu chinal reeman xtiidx Jesucrist. <sup>24</sup> Benza'c gojc Bernabé, dád gognë xSprijt Dios laaman abi' bililadxaman Jesucrist con guidib luxdooman. Zeel dád zien ree bejn bililadx Jesucrist.

<sup>25</sup> Dxelri wej Bernabé guiedx Tarso bigdiilaman Saulo. <sup>26</sup> Chi badxejlaman laaman, dxel binëman laaman xt Antioquía. Ni guzunë reeman bën rlliladx ree Jesucrist tibijz, dád zien ree bejn balüü reeman. Abi' luguiedx Antioquía naj lod gulëälaj reeman bën rlliladx ree Jesucrist, cristian.

<sup>27</sup> Lën ree dxej zii bëlzi ree bën badëë xtiidx Dios loj ree bejn, guza Jerusalén wej reeman Antioquía. <sup>28</sup> Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio. <sup>29</sup> Abi' ree bën rlliladx Jesucrist luguiedx Antioquía, baya'n reeman diidx din guido'p reeman zi'tczi ni galguzuj gudëëd tijb gaj reeman, din gagnë lasa' reeman, bën rlliladx ree Jesucrist, bën zobj ree niz Judea. <sup>30</sup> Abi' zian been reeman. Dxel guxhaalnë reeman laan Saulo con Bernabé din gudëëd reeman laan loj ree bën rniabee ree bën rlliladx Jesucrist niz Judea.

## 12

### *Guyu Bëd ladxguiib*

<sup>1</sup> Lën ree dxej zii guzuloj rey Herodes cusagziman bëlzi ree bën rlliladx Jesucrist. <sup>2</sup> Abi' gunabeeman bagüjt reeman Jacob bijch Waj, con espad. <sup>3</sup> Chi baguiaaman bayuladx ree bën Israel ni beenman, dxel gunabeeman gunaaz reeman Bëd. Ni ne goc lën ree dxej lanij pascw chi raw reeman guiadxtil ad yu't levadur. <sup>4</sup> Chi gunaaz reeman Bëd, badxe' reeman laaman ladxguiib abi' gunabee rey Herodes tajp cwaa ree suldad din guinia reeman ro' ladxguiib guin, tib cwaa gaj reeman naj tajp suldad. Din beenman xgab nuzujman Bëd loj ree bën guiedx guin chi nidëd pascw. <sup>5</sup> Zian guyu Bëd ladxguiib, gojp da't reeman laaman. Per gra ree bën rlliladx Jesucrist ad rucwëëzt rbejdx rniab reeman Dios por laaman.

### *Babëë Dios Bëd ladxguiib*



<sup>6</sup> Guxhin zii gajc chi yareguiaal cwëë Herodes Bëd loj ree bën guiedx guin, naga'yëjs Bëd galay tio'p ree suldad, naxi-  
iman con tio'p ree caden, guiáad los demazri ree suldad guin  
cayajp ro' ladxguiib guin. <sup>7</sup> Dxejczy bidxin tijb xi anjl Dios abi'  
basni tijb guij lën ladxguiib guin, dxel baqui' anjl guin cwë'lën  
Bëd persi bacwëënman laaman, rëbaman lojman:

—jCari bixche!

Loj hor zii gajc biajb ree caden naxii yaa Bëd, <sup>8</sup> abi' rëb anjl  
guin lojman:

—Guxhiidxi'ch lën l balëë tëë xgurëchil.

Chi ma been Bëd zian dxel rëb anjl guin:

—jGojt xcajpil, tanal naj!

<sup>9</sup> Laa barii gajc Bëd nalaman anjl guin, per ad ragbee-  
taman bal diidxli naj ni cayüjn anjl guin, gunaladxaman  
cane'xhchaalzaman. <sup>10</sup> Abi' gudëd reeman loj tibcwaa ree  
suldad guin, dxel gudëd reeman loj stibcwaa reeman. Chi  
bidxin reeman ro' portguiib ni rarii runejz guin, dxel xtijbzan  
bixal abi' barii reeman. Abi' chi bidxin reeman tijb xquin,  
yagaj basa'n anjl guin Bëd. <sup>11</sup> Dxel gogbee Bëd guial ni  
diidxliqui naj ni cazajcaman, abi' rëbaman:

—Yanri ma ragbeen guial guxhaal xi anjl Dios persi  
babëëman naj loj Herodes, con loj gra ni nüjnnë ree bën Israel  
naj.

<sup>12</sup> Chi bayagbee Bëd ni guzacaman, dxel baguiajman lidx Li,  
xniaa Waj, bën la gajc Marcw, lod riga' zien ree bejn cabejdx  
canab reeman Dios. <sup>13</sup> Chi gulajw Bëd ro' port, dxel brii tijb  
biin la Rode ziquiaam chunin. <sup>14</sup> Per chi bayünbeem cha'  
Bëd, dád babaam, dxel luar nixhialim ro' port guin, baxüünm  
bicojnm guial za' Bëd ro' port guin. <sup>15</sup> Abi' rëb reeman lojm:

—jRajc guijquil!

Per za'dxi'chczim guial waliqui ni rëbim. Dxel rëb reeman  
lojm:

—Ad laataman, wed xi anjlaman.

<sup>16</sup> Per Bëd cabajwzi cabajwaman ro' port guin. Dxel chi  
guxhal reeman dád bidxeb reeman baguiaa reeman laaman.  
<sup>17</sup> Abi' been Bëd sen loj reeman din yacwëëz ro' reeman, dxel  
beman diidx xhienaag babëë Dios laaman ladxguiib. Abi'  
rëbaman loj reeman:

—Gol be ni guie loj Jacob në loj gra ree bën rliladx Jesucrist.

Dxelri briiman yagaj zëman lood ren.

<sup>18</sup> Chi bareguiaal, ad radxejlt xhie güün ree suldad guin  
guial ad ragbeet reeman xhienaag barii Bëd ladxguiib guin.  
<sup>19</sup> Dxel gunabee Herodes chigdiil reeman Bëd, per ad badxejlt  
reeman laaman. Abi' chi gulox gunabdiidx Herodes loj ree  
suldad guin xhienaag gojc, gunabeeman gugüjt reeman laa

reeman. Dxel brii Herodes Judea abi' bisobaman luguiedx Cesarea.

### *Güjt rey Herodes*

<sup>20</sup> Balen Herodes bën Tiro nē ree bën Sidón, per baya'n ree bën guin diidx din chigneenē reeman laaman. Chi been reeman gan guneenē reeman bën brii laj Blasto zagdxē, tijb bën naj xbejn rey Herodes, dxel gunee Blasto por laa reeman loj rey guin din lox til reeman, din guidibczi lod rniabee rey guin zēēd ni raw reeman. <sup>21</sup> Bazuj Herodes xhie dxej guinieenēman laa reeman abi' dxej zii gojt xab zagdxeman, gurej loj xyagxhilaman lod rniabeeman, zianz guzuloj guneenēman laa reeman. <sup>22</sup> Dxel guzuloj gurixdiaj ree bën guin, rēb reeman:

—jAd bejntan canee, tijb diosan!

<sup>23</sup> Loj hor zii gajc badēē tijb xi anjl Dios tijb guialguijdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdxē luar nuza't reeman Dios zagdxē.

<sup>24</sup> Per xtiidx Dios care'chzi care'chan gra ladczi abi' gra ladczi cayajcxhie j ree bën rliladx laaman.

<sup>25</sup> Chi ma badēēd ree Bernabé con Saulo ni guxhaal ree bën Antioquía, dxel baza reeman Jerusalén, binē reeman Waj, bën la gajc Marcw.

## 13

### *Guzuloj Bernabé con Saulo bigtie'ch reeman xtiidx Dios*

<sup>1</sup> Loj ree bën rliladx Jesucrist, bën zojb ree Antioquía, no'ch ree bën rudēēd xtiidx Dios loj ree bejn nē ree bën rulüü xtiidxaman. La reeman Bernabé, Simón bën rniee reeman Benya's, Lucio bën Cirene, Saulo con Manaén bën guni'snē Herodes tijbzi, bën gunabee Galilea. <sup>2</sup> Tijb dxej chi naba'n reeman, la'tgaj cabejdx canab reeman cuza't tēē reeman Dios zagdxē, rēb xSprijt Dios loj reeman:

—Gol bacaabee Bernabé nē Saulo din güün reeman dxiin rēnan güün reeman.

<sup>3</sup> Chi gulox guba'n reeman gurejdx tēē reeman Dios, dxel guxhoob yaa reeman gui jc Bernabé con Saulo din gagnē Dios laa reeman abi' bazaadiidxnē reeman laa reeman.

### *Bernabé con Saulo wej reeman Chipre*

<sup>4</sup> XSprijt Dios naj bën guxhaal Bernabé con Saulo, zē reeman Seleucia, ni guyu reeman loj barcw, zē reeman yuj la Chipre, ni riga' loj nijsdoo. <sup>5</sup> Chi bidxin reeman niz Chipre, dxel luguiedx Salamina guzuloj gutie'ch reeman xtiidx Dios lēn ree xyadoo ree bën Israel. Nē Waj binē reeman din güünman laa reeman yudar. <sup>6</sup> Chi biza reeman guidib niz

Chipre, dxel bidxin reeman Pafos. Ni bidxaagloj reeman tijb b́en Israel laman Barjesús, rajcaman guialbidxaa, rusquieeman bejn ree, rēbaman guial laaman naj b́en rudēēd xtiidx Dios loj ree bejn. <sup>7</sup> Barjesús guin rnieenēman Sergio Paulo zagdxe, b́en naj gobernador Chipre, rignia' da'taman. Gurejdx gobernador guin Bernabé con Saulo guial rēnman gucaagdiajgaman xtiidx Dios. <sup>8</sup> Per b́enbidxaa guin (con diidx grieg laman Elimas) guyēnman nudxoonman guial nililadx Sergio Paulo xtiidx Dios. <sup>9</sup> Abi' Saulo, b́en la gajc Pab, rniabee xSprijt Dios luxdooman guidiblagaa, baguiaadxijchaman loj b́enbidxaa guin, <sup>10</sup> rēbaman:

—¡Xi'n xindxab lūj, ganax rusquieel, ganax niguijdx rūjnl, ad rēntczil ni zagdxe! ¿Xt goc gudēēl mod chinal ree bejn xnejz nali Dios? <sup>11</sup> Yan gudēēd Dios lūj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexcajy Elimas abi' ad gojctri nuguaaman, dxel raguuilaman chu guiniaaz yaaman guial ad rajctri ruguaaman. <sup>12</sup> Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

### *Bidxin Pab con Bernabé niz Pisidia*

<sup>13</sup> Chi ma gudēd gojc zian, guyu Pab con ree xcompniaraman loj barcw luguiedx Pafos abi' zē reeman luguiedx Perge ni riga' niz Panfilia. Ni basa'n Waj laa reeman bayejcaman Jerusalén. <sup>14</sup> Dxel barii reeman guiedx Perge, zē reeman luguiedx Antioquía ni riga' niz Pisidia. Abi' dxej raziiadx ree b́en Israel, guyu reeman lēn xyadoo ree b́en Israel zianz gurej reeman. <sup>15</sup> Dxel chi gulox biil b́en biil tib lajt loj libr bacaa Moisejs nē loj libr bacaa ree b́en badēē xtiidx Dios loj ree bejn, gunee ree b́en rniabee lēn yadoo guin, rēb reeman loj Pab con Bernabé:

—Bal xhie guiēbidi loj ree b́en riga' guie din gudēēdi consejw loj reeman, zajc guiēbidan yan.

<sup>16</sup> Dxel guzuli Pab, beenman sen loj reeman din yacwēēz ro' reeman, dxel rēbaman:

—B́en Israel, nē gra ree b́en rdxeb Dios, gol bacaagdiajg: <sup>17</sup> Dux Dios ree, nayajc ree b́en Israel, gulejman dux b́engulal ree abi' laaman been persi gojcxhiey reeman, chi sta zojb reeman zi'c benzit niz Egipto. Dxel con xguialrniabeeman babēēman laa reeman Egipto. <sup>18</sup> Abi' baslejnguijcaman laa reeman loj tiuu ijz ni guzu reeman niz lod naj ganax yujbidx, <sup>19</sup> banijt tēēman gajdx ree nacion ni gure Canaán persi badēēman guidxliuj guin ree loj dux b́engulal ree. <sup>20</sup> Zian gojc loj tajp gayuu garol ijz, dxelri bacaabee Dios juejs ree persi gunabee reeman laa reeman. Abi' Samuel b́en badēēd xtiidx

Dios loj ree bejn gojc xjuejs bigra reeman. <sup>21</sup> Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, bén zëed loj xdiaa Benjamín persi gunabeeman laa reeman tiuu ijz. <sup>22</sup> Chi bisüd Dios rey Saúl, dxel bazujman rey Davi. Abi' rëbaman: “Ma baguian guial Davi xi'n Isaí, nabanx zi'c rënan, güün tēex cumplid da diidxan guial güünx gra zi'c rënan.” <sup>23</sup> Abi' yan zi'c gajczi rëb Dios, loj gajc xdiaa rey Davi, brier Jesús bén guxhaalaman din yabëeman bén Israel ree loj dol. <sup>24</sup> Chi gad Jesús gui't, Waj bén baroobnijs bejn ree, bagojnman gra ree bén Israel guial rayal yayüjn reeman xgab por xtol reeman tiobnijs tēe reeman. <sup>25</sup> Chi ma zidyob yadiblagaa xguialnaban Waj, dxel rëbaman: “Ad najtan bén naladxidi, qui gui'traman, laaman mazri lasajc guial lon, ni'quid rayalt gaxhiecan xgurëchaman.”

<sup>26</sup> Yan, dugra ree nayajc ree xdiaa Abraham në gra los demazri ree bén rdxeb Dios, par dunuj ree naj xtiidxaman ni rugojn reeman dunuj ree, xhienaag rabëe Jesucrist dunuj ree loj dol. <sup>27</sup> Per ree bén Jerusalén con ree xguxtis reeman ad bayagbeet reeman Jesús. Ad gogbee tēt reeman xhie rën guiëb xtiidx Dios ni bacaa ree bén badëed ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios. <sup>28</sup> Abi' majsi achetczy xtol Jesús guyu, per ni'czy zian rëb gajc reeman loj Pilato guial nabeeman guiëtaman. <sup>29</sup> Chi gulox been reeman gra zi'c ca loj xtiidx Dios xcwent Jesús, balet reeman laaman loj crüzj abi' baquie'ch reeman laaman. <sup>30</sup> Per Dios basban laaman, <sup>31</sup> dxel loj zien dxej balüülojman loj ree bén binë laaman chi briiman niz Galilea zëman Jerusalén, abi' yan laa reeman naj bén rniee por laaman loj ree bejn.

<sup>32</sup> Zeel caygojnman lëjt diidxza'c guin ree, guial promejs been Dios loj ree dux béngulal ree, <sup>33</sup> ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: “Lüj naj da xi'nan abi' diizd yan ma rajpil guialrniabee zi'cgajc naj.” <sup>34</sup> Dios rëb guial yasbanman Jesús abi' ad zaxint xcuerpaman zi'c gajczi ca loj xtiidx Dios lod rëb: “Naj günle' lëjt zi'c benan promejs loj Davi.” <sup>35</sup> Abi' rëb tēe stib lajt loj xtiidxaman: “Ad zatiëjbtıl xhin xcuerp xi'nl, bén naya nali.” <sup>36</sup> Yan diidxliczi diidx guin ree ad rnieet reen xcwent Davi, din chi gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman. <sup>37</sup> Per xcuerp Jesús bén basban Dios, ad guxintan. <sup>38</sup> Zeel caygojnman lëjt compniar din gagbeedi guial por laaman ma yu' perdon par dux tol ree. <sup>39</sup> Graczi bén rliladx Jesucrist ma

gojc perdon gra xtol reeman ni ad gojct niajc perdon por ley badëë Dios loj Moisejs. <sup>40</sup> Zeel gol gojp cudad chitëë saquidi zi'c bacaa ree bën badëë xtiidx Dios loj ree bejn, lod rëb:

<sup>41</sup> Gol bacaagdiajg, lëjt bën ruze' ree da diidxan, gol badxalojdi gol gunidloj tëë.

Din loj ree dxej nabandi gën reen ni xt ni'quid zaliladxtidi, majsi chu na laa reen lojdi.

<sup>42</sup> Chi barii Pab con Bernabé lën xyadoo ree bën Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zii. <sup>43</sup> Chi barii ree bën guin lën yado guin, zien da't reeman binal Pab con Bernabé, zi'c ree bën Israel zi'c ree bën ad najt bën Israel, bën rën ree Dios zi'cgajc ree bën Israel. Abi' rëb Pab con Bernabé loj reeman din sudxi'ch reeman loj nejz zagdxe guredx Dios laa reeman guial rënman laa reeman.

<sup>44</sup> Chi bidxin dxej ni raziiladx ree bejn, gra bën luguiedx guin bado'p din gucaagdiajg reeman xtiidx Dios. <sup>45</sup> Per chi baguiaa ree bën Israel zien da't ree bejn riga' yagaj, dxel guyu guialnadëdloj luxdoo reeman abi' guzuloj caneeguijdx reeman canee tëë reeman diidxguijdx loj Pab. <sup>46</sup> Dxel sin guialrdxeb badxi' Paban con Bernabé loj reeman, rëb reeman:

—Yaloj lëjt rayal yagojnan xtiidxza'c Dios, lëjt najdi bën Israel, per yan ad rëntidi gucaagdiajguidi laan, dxel lëjt gajc culüü guial ad zajct yayalidi guialnaban tiblayaa con Dios. Yan ma yugtie'chan diidxza'c guin ree loj ree bën ad najt bën Israel. <sup>47</sup> Din zian gunabee dux Dad ree Dios dunujn, chi rëbaman tib lajt loj xtiidxaman:

Nuzun lüj zi'c guij par gra ree nacion, din chel guidibchicniaa loj guidxliuj chicojnl xhienaag gac ree bejn perdon.

<sup>48</sup> Chi biguiejn ree bën ad najt bën Israel zian, dxel babaa reeman, guzuloj rëb reeman guial zagdxe naj xtiidx Dios, abi' graczi bën ma naj yayal guialnaban tiblayaa con Dios, bililadx reeman xtiidxaman. <sup>49</sup> Zianan zeel bire'ch xtiidxza'c Dios guidib niz ni. <sup>50</sup> Per ree bën Israel batiaalguiiw reeman bëgunaa rej ree laydoo zianczi naj tëë reeman bën zojbloj luguiedx zii, në ree xinguaaaw naj gajc xin zojbloj, din sunal reeman Pab con Bernabé xt yabëë reeman laa reeman ni.

<sup>51</sup> Dxel Pab con Bernabé gudxijp guxyuj guia' reeman zi'c tijb sen guial ad bazoobt ree bën guin diidx, dxel zë reeman Iconio. <sup>52</sup> Per ree bën bililadx Jesús niz ni, ma rniabee xSprijt Dios luxdoo reeman guidiblagaa abi' dád rabaa reeman.

## 14

*Bidxin Pab con Bernabé Iconio*

<sup>1</sup> Luguiedx Iconio, Pab con Bernabé guyu reeman lën xyadoo ree bën Israel. Abi' zi'c balüü reeman xtiidxza'c Jesucrist, zien da't reeman bililadx, zi'c ree bën Israel zi'c ree bën ad najt bën Israel. <sup>2</sup> Per ree bën Israel ad bililadxt batiaalguiiw reeman bën ad najt ree bën Israel persi guzuloj been reeman xgab mal por ree bën rliladx Jesucrist. <sup>3</sup> Per ni'czi zian, xchej da't guzuj ree apóstoles guin ni, abi' sin guialrdxeb gunee reeman xtiidx Dios guial rliladx reeman Jesucrist, laaman badëed guialrniabee loj reeman persi been reeman zien da't ree milagr në mazri ree ni ren, persi balüü Jesucrist guial diidxli naj ni rëb reeman xcwent Dios. <sup>4</sup> Per ree bën luguiedx zii gojc reeman tio'p lala', garol reeman guzunë ree bën Israel zagarol reeman guzunë apóstoles guin ree. <sup>5</sup> Dxel zi'c ree bën Israel zi'c ree bën ad najt bën Israel, baya'n reeman diidx con ree guxtis din tilë reeman Pab con Bernabé gucaaguaiaj tëe reeman laa reeman. <sup>6</sup> Abi' chi gogbee Pab con Bernabé zian, laa zia gajc reeman Listra con Derbe, guiedx riga' ree niz Licaonia, në gra ree guiedx riga' niz ni, <sup>7</sup> gunee reeman xtiidxza'c Jesucrist.

### *Bacaaguaiaj reeman Pab Listra*

<sup>8</sup> Luguiedx Listra guyu tijb xinguaaaw ad rajct rza, ad guzatzcix guial naxin guia'x diidz chi golix abi' zobjix <sup>9</sup>cucaagdiajguix ni rëb Pab. Chi baguiaa Pab laax, gogbeeman guial rliladxix par yayajquix. <sup>10</sup> Abi' guneeman rejs, rëbaman: —iBisu, guzuli zagdxel!

Loj hor zii gajc gutiajs xin guin, guzulix abi' guzuloj cazax. <sup>11</sup> Chi baguiaa ree bejn ni been Pab, guzuloj canee reeman rejs diidz Licaonia, rëb reeman:

—Dios naj ree zi'c bejn ma biguiaajt lod nadxu' ree.

<sup>12</sup> Abi' rëb reeman guial Bernabé naj dios Júpiter, guiáad Pab naj dios Mercurio guial laaman naj bën rniee loj reeman. <sup>13</sup> Abi' ro' guiedx guin niz lod ru bejn naj xyadoo Júpiter, dxel bixhioz yu' lën yadoo guin binëman go'n ree con ree guiaa, abi' laaman con ree bën guin guyën reeman nugüjt reeman go'n guin ree din niën reeman apóstoles guin ree zi'c xdios reeman. <sup>14</sup> Per chi gogbee Pab con Bernabé zian, gudixya' xab reeman, guzëeb reeman lad ree bën guin, rbixdiaj reeman rëb reeman:

<sup>15</sup> —Gol bacaagdiajg, ¿chexquiza zeel rüjndi zian, awa bejn gajc dunujn zi'cgajc lëjt? Awa par zianclan zio'pan din yanan lojdi din yasa'ndi ni rüjndi, din achetctzi lasajc reen. Mejorli gol binal xnejz Dios naban, bën been xanyabaa në guidxliuj nëtëe nijsdoo con gra ni yu' loj reen. <sup>16</sup> Tiamp gulal Dios baslaa been ree bejn ni guyëntzi reeman. <sup>17</sup> Per ni'czi zian, zianczi balüüman chu najman por ree ni zagdxel ni rüjnman.

Din laaman naj bèn razaladx guia con guialnaza'c abi' razaladxaman ni radaaw ree din chu' du luxdoo ree zagdx. <sup>18</sup> Chi rëb Pab con Bernabé zian, con ree diidx guin penz been reeman gan badxoon reeman guial nugÿjt ree bèn guin go'n guin ree din niën reeman laa reeman zi'c xdios reeman.

<sup>19</sup> Per bëlzi ree bèn Israel zojb Antioquía në Iconio, chi bidxin reeman luguiedx Litra been reeman gan batiaal-guiiw reeman bèn luguiedx guin ree. Dxel bacaaguiaj reeman Pab abi' gunaladx reeman ma gÿjtaman abi' guxoobyuj reeman laaman, babëë reeman laaman luguiedx guin. <sup>20</sup> Per chi bido'p ree bèn rliladx Jesucrist gadëd lod naga'man, dxel bixchewan, bayuman luguiedx guin stijb. Chi bareguiaal briinëman Bernabé zë reeman luguiedx Derbe.

<sup>21</sup> Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Litra në Iconio nëtëë Antioquía. <sup>22</sup> Luguiedx zii ree badxe' reeman luxdoo ree bèn rliladx Jesucrist. Rëb reeman loj reeman din sudxi'ch reeman loj ni rliladx reeman laaman, din dád sagdiaj reeman din yayu reeman lod rniabee Dios. <sup>23</sup> Abi' tëë loj tijb gaj ree guiedx guin bacaabee reeman bengol nabee ree loj ree bèn rliladx Jesucrist. Zianz chi gulox guba'n reeman gurejdx tëë reeman Dios, dxel basa'n reeman laa reeman con Dad Jesús bèn ma bililadx reeman.

### *Badxin ree Pab con Bernabé Antioquía ni riga' niz Siria*

<sup>24</sup> Chi baza ree Pab con Bernabé niz Pisidia, bidxin reeman niz Panfilia. <sup>25</sup> Abi' gunee reeman xtiidx Dios luguiedx Perge, dxel zë reeman guiedx Atalia. <sup>26</sup> Ni guyu reeman loj barcw zë reeman Antioquía, luguiedx lod basa'n ree los demazri ree bèn rliladx Jesucrist laa reeman con Dios din gagnëman Pab con Bernabé din guitie'ch reeman xtiidxaman. Abi' dxiin guin naj ni ma baloox reeman. <sup>27</sup> Dxel chi bidxin reeman Antioquía, bato'p reeman bèn rliladx ree Jesucrist, persi be reeman diidx loj reeman gra ni been Dios con laa reeman, xhie tëë naag guxhalaman nejz din chililadx ree bèn ad najt bèn Israel Jesucrist. <sup>28</sup> Ni guzu Pab con Bernabé xchej, guzunë reeman bèn Antioquía rliladx ree Jesucrist.

## 15

### *Guyu gabilt Jerusalén*

<sup>1</sup> Lën ree dxej zii bidxin bëlzi ree bèn Judea luguiedx Antioquía. Abi' guzuloj rëb reeman loj ree bèn rliladx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman perdon. <sup>2</sup> Dxel Pab con Bernabé dád zro' gudijldiidx reeman con ree bèn guin. Dxel bacaabee ree

bén rliadx Jesús Pab në Bernabé, në ree ben ren din che reeman Jerusalén chigdeenë reeman apóstoles guin ree, con ree bengol rniabee loj ree bén rliadx Jesucrist din guguaia reeman xhienaag güün reeman xcwent sen guin.

<sup>3</sup> Abi' badxe'nejz ree bén Antioquía rliadx ree Jesucrist laa reeman persi zë reeman. Chi zë reeman gudëd reeman niz Fenicia në niz Samaria abi' bagojn reeman bén rliadx ree Jesucrist, bén zojb ree niz ni guial ma rliadx ree bén ad najt ree bén Israel xtiidx Dios. Abi' graczi bén ma rliadx Jesucrist niz ni, dád babaa reeman chi biguiejn reeman zian.

<sup>4</sup> Chi bidxin Pab con Bernabé Jerusalén, dxel baca' ree bén rliadx Jesucrist laa reeman, con ree apóstoles, con ree bengol rniabee loj ree bén rliadx Jesucrist. Abi' be ree Pab diidx con Bernabé gra ni been Dios con laa reeman. <sup>5</sup> Per yu' ree bénfarisew ma rliadx Jesucrist, guzuli reeman abi' rëb reeman:

—Bén ad najt ree bén Israel abi' ma rliadx reeman Jesucrist, rüjn naguiejn chu' reeman sen ru ree bén Israel, gagbee tëë reeman guial rayal chinal reeman xley Moisejs.

<sup>6</sup> Dxel bado'p ree xi apóstoles Jesús con ree bengol rniabee loj ree bén rliadx Jesucrist din guidoon xhienaag güün reeman. <sup>7</sup> Guial tant canee reeman por zian, dxel guzuli Bëd, rëbaman loj reeman:

—Gradi compniar raliduladx ree Jesucrist, lëjt ragbee guial diizd gocli gulej Dios naj lojdi din chignen xtiidxza'c Jesucrist loj ree bén ad najt bén Israel din chililadx reeman laaman. <sup>8</sup> Abi' Dios bén nünbee luxdoo graczi ree bejn, balüüman guial naj reeman xbejnman guial ma badëëd xSprijtaman loj reeman zi'cgajc baneeman du loj ree. <sup>9</sup> Zi'c ruguaia Dios dunuj ree ziangajc ruguaiaaman laa reeman, din zi'c basiaman du luxdoo ree ziangajc basiaman luxdoo reeman guial ma rliadx reeman Jesucrist. <sup>10</sup> Yan, ¿chexc zeel ad ridxga'tidi ni ma been Dios abi'za rniabeedi chinal ree bén rliadx Jesucrist ley ni ni'qui dunuj ree ni'qui dux béngulal ree ad gojct naguieen ree zi'c rniabee ley guin? <sup>11</sup> Dunuj ree rayagbee guial por ni zagdxe ni been Dad Jesucrist, been Dios dux tol ree perdon zi'cgajc laa reeman.

<sup>12</sup> Dxel bacwëëz ro' gra reeman abi' bacaagdiajg reeman ni cayü ree Bernabé con Pab, xcwent gra ree xmilagr Dios ni been reeman loj ree bén ad najt bén Israel. <sup>13</sup> Chi gulox guneë reeman, dxel nëgajc Jacob rëb:

—Gradi compniar raliduladx ree Jesucrist, gol bacaagdiajg: <sup>14</sup> Simón Bëd be diidx duloj ree xhienaag guzuloj gulej Dios bén ad najt ree bén Israel din gac reeman xbejnman. <sup>15</sup> Gra ni



ma gojc naj zi'c ni bacaa ree b́en badëë xtiidx Dios loj ree bejn loj xtiidxaman lod rëb:

<sup>16</sup> Chi ma gojc zian,  
yayünxhiey ree da bejnan mazri zi'c goc chi naban Davi,  
gacxhiey reeman por ree b́en sta naban,  
zi'c guban ree bejn xtiamp Davi  
abi' por laa reeman yayajcxhiey ree da bejnan.

<sup>17</sup> Din yaguuil ree los demazri ree bejn guial guiën reeman naj,  
gra ree b́en nacion ren, yaguuil guial guiën reeman naj,  
b́en ma gule reen din gac reeman da bejnan,  
b́en guiguiejn ree guza't ree bejn naj.

<sup>18</sup> Zian na Dios, b́en cugojn bejn ree gra ree nine diizd tiamp gulal.

<sup>19</sup> 'Zeel naladxan ad rayalt chu güün naguiejn b́en ad najt ree b́en Israel par chinal reeman ley, laa reeman guial ma basa'n xcostumbr reeman par chinal reeman xnejz Dios.  
<sup>20</sup> Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayal tëët sunë reeman ben ren b́en ad najt lacheel reeman, ad rayalt gaw reeman bëël rberejn ni'qui rejn. <sup>21</sup> Zian yaguie'ch ree loj reeman, din diizd tiamp gulal tijb gaj guiedx yu' b́en rulüü laa reeman xhie rën guiëb xley Moisejs ni rool reeman lën ree yadoo dxej raziiladx ree bejn.

<sup>22</sup> Dxel apóstoles guin ree con ree bengol rniabee loj ree b́en rliladx Jesucrist, con los demazri ree b́en rliladx Jesucrist, rëb reeman gucaabee reeman b́en guixhiaalnë reeman Pab con Bernabé din che reeman Antioquía. Abi' bacaabee reeman Judas, b́en la gajc Barsabás, në Silas, laa reeman rajp guialrniabee loj ree b́en rliladx Jesucrist. <sup>23</sup> Abi' guxhaalnë reeman laa reeman tijb gui'ch ni rëb:

“Dunujn nayajcan xi apóstoles Jesús, con ree bengol rniabee loj ree b́en rliladx laaman, në los demazri ree b́en rliladx laaman. Ragajpdiozan lëjt b́en ad najt ree b́en Israel, per nayajc ree compniar raliduladx ree Jesucrist, lëjt zojbidi Antioquía, në los demazri ree b́en zojb ree niz Siria nëtëë niz Cilicia. <sup>24</sup> Ma bayagbeen guial yu' ree b́en duladxan brii sin dux tiidxbeen, abi' cagu'nawëëg reeman lëjt con xtiidx reeman persi ad radxejlt xhie güündi guial na reeman lojdi rayal chu'di sen ni ru ree b́en Israel güün tëëdi zi'c rniabee xley Moisejs, per ad dunujtan baxhaal laa reeman.  
<sup>25</sup> Zeel bado'pan abi' raguie'chan guial zagdxe naj yacaabee bëlzi dux compniaran din guidganaj reeman lëjt, guidnë tëë reeman tio'p dux compniaran, Bernabé con Pab, b́en rayën da'tan. <sup>26</sup> Zien ree ni guijdx cuchaagloj reeman guial cayüjn

reeman sirv loj Dad Jesucrist. <sup>27</sup> Dxel cayxhaalnë'n laa reeman Judas con Silas, laa reeman na lojdi gra con quijb xtiidx reeman. <sup>28</sup> Abi' zi'c naj xgab bazaladx xSprijt Dios du lojn, dxel achetri naguiejn rüjn yanabeen lëjt ni güündi, ni rayalzi cu'guijquidi naj guial, <sup>29</sup> ad gawidi xbëël ree be ni rbe'c ree bejn loj ni naj xdios reeman, ad gaw tēedi bëël rberejn, ni'qui rejn, ad sunēdi ben ren bēn ad najt lacheelidi. Bal gapidi cudad ad zūjntidi gra ree nine, zagdxequi güündi. Gagnë Dios lëjt.”

<sup>30</sup> Zian gojcan, gui'ch guin naj ni guxhaalnë reeman guidap ree bēn guin par luguedx Antioquía. Ni bato'p reeman bēn rliladx ree Jesucrist abi' bayü reeman gui'ch guin loj reeman. <sup>31</sup> Chi biil reeman laan, dád nix guyu luxdoo reeman por ree diidx zagdxe ni zēed lojn. <sup>32</sup> Abi' Judas con Silas guial nēgajc reeman rajp quiarguiejn par gudēed reeman xtiidx Dios, dxel zien naj ni guneenë reeman bēn rliladx ree Jesucrist, bagu' reeman luxdoo reeman con xtiidx reeman. <sup>33</sup> Chi ma gudēd zien dxej za' ree Judas con Silas ni, bazaadiidxnë ree bēn rliladx Jesucrist laa reeman din yaguiaj reeman lod za' ree bēn guxhaal laa reeman, rēb reeman loj reeman: “Chignë Dios lëjt zagdxe.” <sup>34</sup> Per Silas beenman xgab baya'nman ni mazri. <sup>35</sup> Abi' Pab con Bernabé baya'n reeman Antioquía mazri, laa reeman con ree ben ren basnuu balüü reeman gutie'ch tēē reeman xtiidxza'c Jesucrist loj ree bejn ni.

*Ni barojp volt brii Pab biglüüman xtiidx Dios guiedx ren ree*

<sup>36</sup> Chi gudēd tio'p choon dxej, dxel rēb Pab loj Bernabé:

—Yo' stijb yugnaj dux compniar ree bēn rliladx ree Jesucrist, graczi ree luguedx lod ma bugtie'ch xtiidx Dios, din yuquiaa xhienaag za' reeman.

<sup>37</sup> Bernabé guyën ninë reeman Waj, bēn la gajc Marcw. <sup>38</sup> Per Pab ad cwējbt ninë reeman laaman, din chi we reeman niz Panfilia guro'nldaxaman laa reeman, ad binëtraman laa reeman. <sup>39</sup> Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel binë Bernabé Marcw, guyu reeman loj barcw zē reeman yuj la Chipre ni riga' loj nijsdoo, <sup>40</sup> dxel gulej Pab Silas din chinëman laaman abi' rēb los demazri ree bēn rliladx Jesucrist loj reeman guial chinë Dios laa reeman zagdxe. <sup>41</sup> Zianz gudēd reeman niz Siria nē niz Cilicia, ragu' reeman luxdoo ree bēn rliladx Jesucrist niz ni.

## 16

*Bine ree Pab con Silas Timoteo*

<sup>1</sup> Chi bidxin Pab con Silas guiedx Derbe nē guiedx Listra abi' Listra bidxaagloj reeman tijb bēn rliladx Jesucrist, laman

Timoteo, xniaaman naj bén Israel, nëman rlliladx Jesucrist guiáad xdadaman naj bén grieg. <sup>2</sup> Graczi ree bén rlliladx Jesucrist, bén zojb ree guiedx Listra në Iconio ruza't laaman zagdx. <sup>3</sup> Dxel rëb Pab chinëman Timoteo, per yaloj badxe'man laaman sen ni ru ree bén Israel, chitëë xhie guiëb ree bén Israel riga' niz ni, din gra reeman ragbee guial naj xDadaman bén grieg. <sup>4</sup> Graczi ree guiedx ni gudëd reeman bagojn reeman bén rlliladx ree Jesucrist ni rayal güün reeman zi'c ma rëb ree apóstoles, con ree bengol rniabee loj ree bén rlliladx laaman Jerusalén. <sup>5</sup> Zianan zeel guzudxi'ch ree bén niz ni loj guialrlliladx reeman Jesucrist, abi' guixie guixie gojcxhiey mazri ree bén rlliladx laaman.

### *Balüüloj tijb bén Macedonia loj Pab*

<sup>6</sup> Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudëdzinejz reeman niz Frigia në niz Galacia <sup>7</sup> abi' bidxin reeman niz Misia. Ni been reeman xgab nej reeman niz Bitinia, per ad cwëjb gajct xSprijt Dios nej reeman niz ni. <sup>8</sup> Dxelri gudëdzinejz reeman niz Misia, bidxin reeman guiedx Troas. <sup>9</sup> Yagaj, guxhinzii guzajc Pab zi'c rulüü cane'xhchaalaman. Baguiaaman tijb xinguaaaw zëd niz Macedonia, za'lix rzajquix liaadx loj Pab, rëbix:

—Guda niz Macedonia, taguieen dunujn yudar.

<sup>10</sup> Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bén cabejdx dunujn niz ni par yatie'chan xtiidxza'c Jesucrist.

### *Bidxin ree Pab con Silas Filipos*

<sup>11</sup> Badxu'n loj barcw luguiedx Troas abi' bio'n naliduu Samotracia. Chi bareguiaal badxinan guiedx Neápolis. <sup>12</sup> Yagaj badxoon bio'n Filipos, guiedx mazri zojbloj niz Macedonia, per Rom rniabee guiedx zii, ni badxu'n bëlzi ree dxej. <sup>13</sup> Abi' tijb dxej raziiladx ree bejn, bariin luguiedx guin bio'n tijb ruguiiwro', lod rayagbeen rado'p ree bén Israel par cwedx reeman Dios. Abi' badxu'n baneen xtiidxza'c Jesucrist loj ree béngunaa bado'p yagaj. <sup>14</sup> Tijb ree béngunaa guin la Lidia, najman bén Tiatira, ruto'man lajd zagdx ni culor murad. Diidxli rdxebaman Dios abi' cucaagdiajgaman. Dios guxhal xquiarguiejnman din gucaagdiajgaman zagdx gra ni rëb Pab. <sup>15</sup> Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rlliladxidi guial ma rlliladxan Jesucrist, gol baya'n lidxan.

Dxel beenman naguiejn baya'n nan lidxaman.

<sup>16</sup> Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xindxab luxdoom, abi' por xguialrniabee xindxab guin rnieeya'm guiáad ree b́en guzii laam dád zro' milia rüjn reeman gan por dxiin guin. <sup>17</sup> Dxel bidnalim Pab con dunujn, rbidxa'm rëbim:

—B́en guie ree rüjn xchiin Dios yu' xanyabaa, laa reeman gugojn lëjt xhienaag gaquidi perdon.

<sup>18</sup> Zien dxej da't beenm zian, xt chi balenya' Pab, dxel bayejcaman rëbaman loj xindxab yu' luxdoom:

—Por xguialrniabee Jesucrist, rniabeen lüj din yariil luxdoo biin guie.

Loj hor zii gajc barii xindxab guin luxdoom.

<sup>19</sup> Per chi gogbee ree b́en guzii laam guial ad zajctri güünm gan milia par laa reeman, dxel gunaaz reeman Pab con Silas, binë reeman laa reeman roylay loj guxtis. <sup>20</sup> Chi bayü reeman laa reeman loj ree guxtis guin, rëb reeman:

—Xin Israel guie ree rbëë reex wadijl du ladx ree, <sup>21</sup> abi' rulüü reex costumbr ree ni ad zatiëëbt ree yaguieen ree ad zajc tëët yaguieen ree, din ben Rom dunuj ree.

<sup>22</sup> Dxel wajs gra ree b́en guin contr laa reeman, abi' gunabee ree guxtis guin gulëë xab Pab con Silas din quin reeman laa reeman con var. <sup>23</sup> Chi gulox gudijn da't reeman laa reeman, dxel bilu' reeman laa reeman ladxguiib abi' gunabee reeman b́en rajp ro' ladxguiib guin din gapdxi'chaman laa reeman. <sup>24</sup> Chi biguiejn b́en rajp ro' ladxguiib guin zian, dxel bilu'man laa reeman xt lën quart bigra yu' lën ladxguiib guin, guxhiiman guia' reeman loj tabl naal con caden.

<sup>25</sup> Per garol guiaal, la'tgaj cabejdx canab Pab con Silas Dios, cayool tëë reeman cant par laaman, dxel cucaagdiajg los demazri ree b́en yu' ladxguiib guin. <sup>26</sup> Dxel tijbzi golp guzuloj xudoxh, niz ni niz guie rurlia xcimiant ladxguiib guin. Loj hor zii gajc bixal gra ree xportan abi' baxiec ree caden naxii gra ree b́en yu' lënan. <sup>27</sup> Chi baban b́en rajp ro' ladxguiib guin abi' baguiaaman zojbyal gra ree xportan, gulëë xi espadaman din nugüjt laagajcaman guial gunaladxaman gra ree b́en yu' ladxguiib guin ma baxüün. <sup>28</sup> Dxel gurixdiaj Pab, rëbaman lojman:

—Ad güünnaa lüj gajc, laa dugran nadxu' guie.

<sup>29</sup> Laa gunab gajc b́en guin tijb guij, dxel ruxüünman guyuman, rnijman guial rdxebaman, bigzuxibaman loj Pab në loj Silas. <sup>30</sup> Dxel babëëman laa reeman, gunabdiidxaman loj reeman, rëbaman:

—Dad, gol guna, ¿xhie rayal günan din güün Dios naj perdon?

<sup>31</sup> Badxi' reeman laan, rëb reeman:

—Bililadx Dad Jesucrist, zian gaquil perdon con xfamilil.

<sup>32</sup> Abi' be reeman xtiidx Dios lojman con loj gra ree bén zojb lidxaman. <sup>33</sup> Zianz guxhin zii gajc gudiibaman lod nadxeelguijdx reeman, dxel gurobnijsaman con gra xfamilaman.

<sup>34</sup> Abi' bignëman laa reeman lidxaman, dxel badëëman ni gudaw reeman. Guiáad laaman dád nix yu' luxdoooman con gra xfamilaman Guial ma rliladx reeman Dios.

<sup>35</sup> Chi bareguiaal, guxhaal ree guxtis guin suldad ree persi biguiedx reeman loj bén rajp ro' ladxguiib guin guial guslaaman Pab con Silas. <sup>36</sup> Abi' rëb bén rajp ro' ladxguiib guin loj Pab:

—Ma na ree guxtis guial guslaan lëjt. Yan ma zajc yaguiajdi ad chu'di xgab.

<sup>37</sup> Per rëb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree bén guiedx, ni'quid baneet reeman mod nadëëdan cwent loj reeman con badxe' reeman dunujn ladxguiib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgalëë reeman dunujn.

<sup>38</sup> Abi' bicojn ree suldad guin guxtis guin ree zian, dxel dád bidxeb reeman chi biguiejn reeman guial ben Rom naj Pab con Silas. <sup>39</sup> Dxel wej reeman bignab reeman perdon loj Pab con Silas babëë tëë reeman laa reeman, rëb reeman loj reeman din yaza reeman luguiedx guin. <sup>40</sup> Chi barii reeman ladxguiib, wej reeman lidx Lidia. Zianz chi gulox guneenë reeman los demazri ree bén rliladx ree Jesucrist din chu' luxdoo reeman sudxi'ch reeman loj ni rliladx reeman, dxel baza reeman.

## 17

### *Bidxin ree Pab con Silas Tesalónica*

<sup>1</sup> Chi zë Pab con Silas, gudëd reeman niz Anfípolis në niz Apolonia zianz bidxin reeman luguiedx Tesalónica lod yu' tijb xyadoo ree bén Israel. <sup>2</sup> Abi' zi'c goc xcostumbr Pab, wejman lën yadoo guin, choon dxej raziiladx ree bejn. Wejman bigneenëman laa reeman xtiidx Dios. <sup>3</sup> Bagojnman balüü tëëman laa reeman loj xtiidx Dios lod rëb guial naj sagdiaj Cristo, abi' chi ma güjtaman yabanman stijb. Rëbaman loj reeman:

—Jesús ruzat gajcan lojdi, laagajcaman naj Cristo din yabëëman dunuj ree loj dol.

<sup>4</sup> Yu' ree bén Israel guin bililadx abi' bachajg reeman Pab con Silas. Në zien ree bén grieg rën Dios bililadx, nëtëë zien ree béngunaa zojbloj bililadx Jesús. <sup>5</sup> Per ree bén Israel ad bililadxt Jesucrist, gudëdloj reeman abi' bato'p reeman benmal ziza ree lunejz persi gulëë reeman wadijl luguiedx

guin, abi' guyu reeman lidx Jasón, raguiil reeman Pab con Silas din cwëë reeman laa reeman guzuj reeman laa reeman loj ree bén guiedx guin. <sup>6</sup> Per guial ad badxejlt reeman laa reeman yagaj, dxel guxoobyuj reeman Jasón në ree ben ren bén rliladx Jesucrist, binë reeman laa reeman loj guxtis, rbixdiaj reeman, rëb reeman:

—Tio'p ree xin cabëë wadijl guidib guidxliuj, ma bi't reex guie, <sup>7</sup> abi' lidx Jasón zojb reex. Laa reex con gra ree bén nuchajg laa reex, ad cayüjnt reex zi'c rniabee xley rey César, din rëb reex guial yu' zatijb rey la Jesús.

<sup>8</sup> Chi biguiejn ree guxtis guin zian con ree bejn, gra loj xgab been reeman. <sup>9</sup> Per Jasón con los demazri ree bén guyu ladxguib guin gudijx reeman loj ree guxtis guin, dxel baslaa reeman laa reeman.

### *Bidxin Pab con Silas Berea*

<sup>10</sup> Guxhinzii gajc, guxhaal ree bén rliladx Jesucrist Pab con Silas luguiedx Berea. Chi bidxin reeman ni, wej reeman lën xyadoo ree bén Israel. <sup>11</sup> Mazri benza'c naj ree bén Israel guin guial loj ree bén Israel zojb Tesalónica. Con gan bacaagdiajg reeman ni rëb Pab. Abi' guixie guixie rusiid reeman xtiidx Dios, din gagbee reeman waliqui ni rëb Pab ya. <sup>12</sup> Zeel dád zien reeman bililadx Jesucrist, nëtëë zien bén grieg bililadx laaman zi'c ree xinguaaw zi'c ree béngunaa zojbloj niz ni. <sup>13</sup> Chi gogbee ree bén Israel zojb Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguuiw reeman bejn ree din guidxe'ch reeman Pab. <sup>14</sup> Per ree bén rliladx Jesucrist ad goglaat reeman, laa guxhaal gajc reeman Pab niz ro' nijsdoo. Guiáad Silas con Timoteo baya'n reeman mazri Berea. <sup>15</sup> Abi' ree bén biglu'nejz Pab, xt Atenas binë reeman laaman. Chi baza reeman ni, bignë reeman xruson Pab din diob che Silas con Timoteo chinal reeman laaman.

### *Bidxin Pab Atenas*

<sup>16</sup> La'tgaj cabëz Pab guidxin Silas con Timoteo luguiedx Atenas, guyunayaman guial baguiaaman zien da't ni rajp ree bejn niz ni zi'c dios. <sup>17</sup> Zeel wejman lën xyadoo ree bén Israel bigneenëman laa reeman në los demazri ree bén rën Dios zi'c ree bén Israel, guixie guixie rnieenëman chutëëz bén rdxaa glojman niz galay guiedx guin. <sup>18</sup> Guneenë tēëman garol ree bén zinal ni balüü bén brier laj epicureo, në za garol ree bén estoicos. Abi' yu' reeman rëb:

—¿Xhienin rniee xin guin zeel rniee da'tix?

Yu' tēë reeman rëb:

—Rulüü xtiidx dios ren ree bén ad naguieenbeet ree catie'chix.

Rëb reeman zian guial caneenë Pab laa reeman xtiidxa'c Jesucrist në xcwent guial babanman stijb. <sup>19</sup> Dxel binë reeman Pab tijb luar la Areópago, lod rado'p reeman. Abi' gunabdiidx reeman lojman, rëb reeman:

—¿Zajc nal ya xhie ree nicüb guin zidgalüül niz guie? <sup>20</sup> Din rül diidx du lojn ni ad rayagbeetan, zeel rayënan yayagbeen xhie rën guiëban.

<sup>21</sup> Graczi ree bën Atenas, con los demazri ree benzit zojb ni, zianczi za' reeman zian. Ruladx reeman téd reeman dxej, gucaagdiajg reeman o gü reeman ni naj ree nicüb.

<sup>22</sup> Dxel guzuli Pab galay reeman lod la Areópago, rëbaman:

—Bën Atenas, por graczi ni ma baguian, ma gogbeen guial dád zien ree xdiosidi. <sup>23</sup> Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rëb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

<sup>24</sup> 'Dios guin been guidxliuj con graczi ni yu' lojn, laaman rniabee xanyabaa në loj guidxliuj. Ad za'taman lën yadoo ni rüjn ree bejn. <sup>25</sup> Ad riaadx tētaman chu güün xhienin par laaman, din laaman naj bën razaladx bi nabajnnë' ree, laaman razaladx guialnaban duloj ree në ree ni rayaadx ree.

<sup>26</sup> 'Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tée cwe reeman. <sup>27</sup> Din yaguiil reeman Dios majsi zi'c chi rgan bejn chi raguuilaman xhienin, zian güün reeman din yadxejlanan. Majsi diidxliczi ad zijtt za'man par gra bejn. <sup>28</sup> Din por Dios nabajn ree, por laaman raniib ree radxoo tée ree, por laaman nadxu' ree loj guidxliuj. Zi'c rëb tée ree xbénrignia'di, chi rëb reeman: “Dunuj ree nayajc xi'n Dios.” <sup>29</sup> Zeel bal nayajc ree xi'n Dios, ad rayalt yaguieen ree xgab guial Dios najné or, o plajt, o guiaj ya zi'c naj ni rüjn ree bejn zi'c naj xixgab reeman. <sup>30</sup> Tiamp gulal cwëjb Dios been ree bejn zi'c naladx reeman guial achetczi ragbee reeman, per yan gra ladczi canabeeman gra ree bejn din yayüjn reeman xgab por xtol reeman. <sup>31</sup> Din Dios ma gulej tijb dxej ni yadëed ree bejn cwent lojman, dxej ni güün xguialguxtisaman. Ma gulej tēeman Jesucrist din güünman guialguxtis guin, abi' din guiguien guial gulejman laaman par zian, basbanman laaman chi gütaman.

<sup>32</sup> Chi biguiejn reeman rëb Pab guial baban Jesucrist loj ree bengüt, yu' reeman baze' laaman, yu' tée reeman rëb:

—¡Zatijb dxej yasnuu yacaagdiajgan ni canal!

<sup>33</sup> Dxel baza Pab lod za' reeman. <sup>34</sup> Per yu' reeman bachajg laaman, abi' bililadx reeman xtiidx Dios. Loj reeman no'ch

tijb b́en zobjloj ĺen Areópago laman Dionisio, ńe stijb b́engunaa la Dámaris ńe ree ben ren.

## 18

### *Bidxin Pab Corinto*

<sup>1</sup>Dxel brii Pab Atenas źeman Corinto. <sup>2</sup>Yagaj bidxaaglojman tijb b́en Ponto laman Aquila, źeedaman diaa Israel. Aquila con xb́engunaaman Priscila qui bazari reeman niz Italia guial gunabee rey Claudio yarii gra ree b́en Israel Rom. Dxel wej Pab bitixlojman laa reeman. <sup>3</sup>Abi' guial lasa'gajc dxiin ni ŕijnman ŕijn reeman, ŕijnchaaw reeman guid ni rajc ree carp, dxel baya'nńeman laa reeman persi been reeman dxiin guin. <sup>4</sup>Abi' beegaj dxej raziiladx ree b́en Israel, rej Pab rigneeman xtiidx Dios ĺen xyadoo ree b́en Israel, zi'c ree b́en naj ree b́en Israel zi'c ree b́en ad najt b́en Israel raguilaman mod din chililadx reeman ni ŕebaman.

<sup>5</sup>Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios guneeman loj ree bejn, balüü t́eeman b́en Israel ree guial Jesús naj Cristo b́en cabéz reeman. <sup>6</sup>Per guzuloj bidxe'ch reeman Pab abi' gunee reeman diidxguijdx contr laaman. Dxel gudxijp xabaman zi'c tijb sen guial ad ruzoobt reeman diidx, abi' ŕebaman loj reeman:

—Ĺejt gajc rajp dol guial guizéebidi delant loj Dios, ad najt ra'p dol. Diizd yan chiguien xtiidx Dios loj ree b́en ad najt b́en Israel.

<sup>7</sup>Dxel bariiman ĺen yadoo guin wejman lidx b́en la Justo, ŕen b́en zii Dios, gajxh gajc yadoo guin naj lidxaman. <sup>8</sup>Abi' Crispo, tijb b́en rniabee ĺen xyadoo ree b́en Israel, bililadxaman Dad Jesucrist con gra xfamilaman. Ńe zien ree b́en Corinto bililadx chi biguiejn reeman xtiidx Jesucrist abi' gurobnijns reeman. <sup>9</sup>Tijb guxhin balüüloj Dios loj Pab, ŕebaman lojman:

—Ad rdxebil, basnuu gunee da diidxan, ad gucwéézil, <sup>10</sup>naj za'né' ĺüj, achutczi zajc güün ĺüj xhienin, din luguiedx guie zien da't bejn naj par naj.

<sup>11</sup>Zianan zeel baya'n Pab Corinto tibijz garol, balüüman b́en guin ree xtiidx Dios.

<sup>12</sup>Per chi goc Galión gobernador Acaya, b́en Israel ree bachajg lasa' reeman persi gunaaz reeman Pab biné reeman laaman loj gobernador guin, <sup>13</sup>ŕeb reeman loj gobernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

<sup>14</sup>Ma niniee Pab, chi gunee Galión ŕebaman loj ree b́en Israel guin:



—Bal niajcan tijb falt o tijb guialquia narooob beenman zeel zidnēdi laaman, zūncwentan lējt. <sup>15</sup> Per najn por ree diidx nē por laj ree bejn nētēē por xleydi, zeel lējt gajc gol gunaj xhienaag güündi, ad rēntan gūnan guialguxtis xcwent ree ni guin.

<sup>16</sup> Abi' laa babēē gajcaman laa reeman roylyay guin. <sup>17</sup> Dxel yagaj gajc gunaaz gra reeman Sóstenes, bēn rniabee lēn xyadoo ree bēn Israel abi' gudijn reeman laaman, per ni'quid beencwentt gobernador guin laa reeman.

### *Badxin Pab Antioquía*

<sup>18</sup> Zienri ree dxej baya'n Pab Corinto. Dxel bazaadiidx nēman los demazri ree bēn rliladx Jesucrist, abi' bazanēman Priscila con Aquila, guyu reeman loj barcw zē reeman niz Siria. Per chi gad reeman grii Cencrea bagaj guijc Pab, por tijb promejs ni beenman. <sup>19</sup> Chi bidxin reeman Éfeso, ni basa'n Pab Priscila con Aquila, abi' wejman lēn xyadoo ree bēn Israel zojb ree ni, bigneenēman bēn Israel rado'p ree lēn yadoo guin.

<sup>20</sup> Abi' guyēn reeman niaglaa Pab ni mazri, per ad cwējbtaman.

<sup>21</sup> Rēbaman loj reeman:

—Ma yaya'n, bal gagnē Dios naj, guidganan lējt stijb.

Dxel guyuman loj barcw bazaman Éfeso. <sup>22</sup> Chi bidxinman Cesarea, dxel wejman Jerusalén bicajpdiozaman bēn rliladx ree Jesucrist, dxelri zēman Antioquía. <sup>23</sup> Chi ma gojc xchej za'man Antioquía, dxel briiman zatijb. Wejman tijb gaj ree guiedx riga' niz Galacia nē niz Frigia, ragu'man luxdoo gra ree bēn rliladx Jesucrist.

### *Gutie'ch Apolos xtiidx Dios Éfeso*

<sup>24</sup> Tiamp zii bidxin tijb bēn Israel luguiedx Éfeso, laman Apolos, gojlaman Alejandría. Dád radxejlaman diidx par guinieeman abi' dád rajcaman xtiidx Dios. <sup>25</sup> Basiidaman xtiidx Dios, dxel con gan balüüman bejn ree, zagdxe tēē rüman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman. <sup>26</sup> Abi' Apolos, sin guialrdxeb guzuloj caneeman xtiidx Dios loj ree bēn Israel lēn xyadoo reeman, zianz chi biguiejn Priscila con Aquila ni rēbaman, dxel bignē reeman laaman lidx reeman. Ni balüü reeman laaman persi basnuu basiidaman mazri xtiidx Dios. <sup>27</sup> Chi been Apolos xgab cheman niz Acaya, gra ree bēn rliladx Jesucrist bēn za'nē laaman, badxe' reeman luxdoo man din cheman, abi' guxhaal reeman tijb gui'ch loj ree bēn rliladx Jesucrist bēn zojb ree niz Acaya din yaca' reeman laaman zagdxe chi guidxinman niz ni. Chi bidxinman niz Acaya dád beenman yudar bēn ma rliladx ree Jesucrist guial gognē Dios laa reeman. <sup>28</sup> Din delant loj gra ree

bejn rëbaman guial ad laat zë ree bén Israel, abi' achutczi gojc nadxi' xtiidxaman guial graczi ni rëbaman naj diidxli, balüü tëëman loj xtiidx Dios gra luar lod rëb guial Jesús naj Cristo bén gulëjz reeman.

## 19

### *Bidxin Pab Éfeso*

<sup>1</sup> La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidxaaglojman bëlzi ree bén rililadx Jesucrist. <sup>2</sup> Abi' gunabdiidxaman loj reeman rëbaman:

—¿Guyu xSprijt Dios luxdoodi ya chi bililadxidi?

Badxi' reeman laan rëb reeman:

—Ni'quid waguejntan guial yu' xSprijt Dios.

<sup>3</sup> Dxel rëb Pab loj reeman:

—¿Xhieza naag gurobnijsidi?

Badxi' reeman laan rëb reeman:

—Barobnijsan zi'c balüü Waj bejn ree.

<sup>4</sup> Dxel rëb Pab loj reeman:

—Walican barobnijs Waj bejn, bén bayüjn ree xgab por xtol reeman. Per rëbaman guial rayal chililadx reeman bén zëëd xijchaman abi' laaman naj Jesús, bén naj gajc Cristo.

<sup>5</sup> Chi biguiejn reeman zian, dxel gurobnijs reeman por Dad Jesús. <sup>6</sup> Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cudëëd reeman xtiidx Dios loj ree bejn. <sup>7</sup> Loj gra reeman naj cost chiptio'p xinguaaaw.

<sup>8</sup> Choon bëëw wej Pab lën xyadoo ree bén Israel zojb ni. Sin guialrdxeb guneenëman laa reeman xtiidx Dios, guneenëman laa reeman abi' beenman nagueijn din güünman gan chililadx reeman xhienaag naj xguialrniabee Dios. <sup>9</sup> Per garol reeman gojc nad ad guyënt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree bén ma rililadx Jesucrist, binëman laa reeman lën tijb xzcuel bén la Tiranno. Ni balüüman laa reeman guixie guixie, <sup>10</sup> loj tio'p ijz beenman zian. Abi' graczi ree bén zojb niz Asia, zi'c ree bén Israel zi'c ree bén ad najt bén Israel, bacaagdiajg reeman xtiidx Dad Jesucrist. <sup>11</sup> Abi' por xguialrniabee Dios been Pab milagr narooob ree, <sup>12</sup> xt ree xbay Pab në ree lajd rtia lojman zi'c lantar rignë reeman loj ree bénragxuu, abi' rayajc reeman guialguijdx ni rajc reeman, rarii tëë ree xindxab yu' luxdoo reeman.

<sup>13</sup> Per guyu bëlzi ree bén Israel ziza rabëë reeman xindxab luxdoo ree bejn, abi' guyën reeman nüjnnë reeman dxiin laj Dad Jesucrist dxel rëb reeman loj ree xindxab guin:

—¡Por Jesús bén ruza't Pab, rniabeen lëjt, gol barii!

<sup>14</sup> Zian naj ni been gajdx ree xi'ngaan tijb bén Israel la Esceva, bén goc tijb bixhioz rniabee ree bixhioz. <sup>15</sup> Per tib volt tijb ree xindxab guin badxi' xtiidx reeman rëbaman:

—Nünbeen Jesús ragbee tēen chunin naj Pab, per lëjt ni'quid nünbeetan lëjt.

<sup>16</sup> Abi' bén yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman lēnū guin, ziladzi reeman nadxeelguijdx tēe reeman.

<sup>17</sup> Graczi ree bén zobj Éfeso, zi'c ree bén Israel zi'c ree bén ad najt bén Israel, gogbee reeman gojc zian, dxel dád bidxeb reeman abi' baza't reeman Dad Jesús zagdxe.

<sup>18</sup> Nē zien ree bén rliladx Jesucrist bidxin abi' delant loj gra ree bejn baneero' reeman gra ni mal ma been reeman.

<sup>19</sup> Nētēe zien ree bén been guialbidxaa bidxinnē xlibr reeman abi' baze'c reeman laa reen delant loj gra ree bejn. Chi babēe reeman cwent plac lasajc ree libr guin dxel cost tū'pchii mil milia plajt lasajc reen. <sup>20</sup> Abi' zian bire'ch xtiidx Jesucrist biguien tēe xguialrniabeeman.

<sup>21</sup> Chi ma gudēd gojc zian, been Pab xgab cheman niz Macedonia nē niz Acaya xt yadxinman Jerusalén. Rēb tēeman guial chi ma wejman Jerusalén dxelri cheman nē Rom. <sup>22</sup> Abi' guxhaalaman tio'p bén rüjn laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

### *Gojc nadxeb Éfeso*

<sup>23</sup> Lēn ree dxej zii been ree bén Éfeso nadxeb por xtiidx Jesús. <sup>24</sup> Din Demetrio, bén rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree bén rüjnnēman dxiin. <sup>25</sup> Dxel bato'paman laa reeman con ree ben ren bén rüjn gajc ree lasa' dxiin guin, abi' rëbaman loj reeman:

—Gol bacaagdiajg, lëjt ragbee guial loj dxiin guie raguieen ree gan milia ro'. <sup>26</sup> Per yan lëjt ruguiaa riguien tēedi, Pab ziza cayëbix guial dios ni rüjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, nē guidib niz Asia. <sup>27</sup> Dxel nadxeb yasēeb dux chiin ree, abi' ad tijbtizi dux chiin ree, nē xyadoo dios Diana ad zayagbeetri ree bejn laan zi'c nünbee reeman laan yan abi' achutri guidxga' xguialrniabee dios Diana, bén rēn ree bejn guidib niz Asia nē guidib loj guidxliuj.

<sup>28</sup> Chi biguiejn reeman zian, bidxe'ch reeman abi' gurixdiaj reeman rëb reeman:

—¡Bén zobjloj naj Diana, xdios ree bén Éfeso!

<sup>29</sup> Abi' gurixdiaj ree bén guiedx guin wajs reeman, gunaaz reeman tio'p ree bén Macedonia, Gayo në Aristarco, bén rzanë ree Pab. Dxel guxoobyuj reeman laa reeman, binë reeman laa reeman lod rajc xgabilt ree bén guiedx. <sup>30</sup> Guyën Pab niuman yagaj din ninieenëman bejn ree, per ad cwëjbt ree xcompniaraman, bén ma riladx ree Jesucrist. <sup>31</sup> Nëtëë loj ree guxtis Asia guin no'ch bëlzi ree xmiw Pab, laa reeman guxhaal ruson lojman guial mejorli ad chu'man ni. <sup>32</sup> Zianz gurixdiaj ree bén guin rëb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj. <sup>33</sup> Dxel galay ben zien guin babëë ree bén Israel tijb xcompniar reeman bén la Lejandr din guinieenëman bén guin ree. Dxel beenman sen loj ree bén guin din yacwëëz ro' reeman din guinieeman por ree bén Israel delant loj ree bén guiedx guin. <sup>34</sup> Per chi gogbee reeman guial najman bén Israel, tiblazujzi gurixdiaj reeman cost tio'p hor, rëb reeman:

—¡Bén zobjloj naj Diana, xdios ree bén Éfeso!

<sup>35</sup> Dxel chi been squiarban luguiedx guin gan bacwëëz ro' reeman, dxel rëbaman:

—Bén Éfeso, gra bénguidxliuj ragbee guial luguiedx guie zianczi rniaj ree bejn xyadoo dios Diana abi' rën tëë ree bejn dios Diana biajb xanyabaa. <sup>36</sup> Lëjt ragbee guial laan naj ni diidxli, zeel ad rayalt güündi zian, ad gontzi güündi xhienin sin xgab. <sup>37</sup> Din bén bidnëdi achet ni mal been reeman yadoo guin, ad wanee tët reeman diidxguijdx dux dios ree. <sup>38</sup> Bal Demetrio con ree xcompniaraman bén rüjnnëman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman. <sup>39</sup> Per bal xhieri mazri rëndi, chi gac xgabilt bén guiedx dxel gacan reglad. <sup>40</sup> Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, ¿abi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

<sup>41</sup> Chi gulox rëbaman zian, dxel bare'ch reeman.

## 20

### *Wej Pab Macedonia në Grecia*

<sup>1</sup> Chi babedxe ree bén Éfeso, gurejdx Pab bén riladx ree Jesucrist persi bagu'man luxdoo reeman. Dxelri bazaadiidxnëman laa reeman abi' zëman niz Macedonia. <sup>2</sup> Bitixlojman bén riladx ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia <sup>3</sup> lod guzuman choon bëëw. Ma niuman loj barcw din niejman Siria, chi gogbeeman guial nuyën ree bén Israel

nüjn reeman laaman xhienin. Dxel mejorli beenman xgab bayejcaman niz Macedonia. <sup>4</sup> Binëman Sópater, bën Berea, xi'ngaan Pirro, nē Aristarco con Segundo, bën Tesalónica ree, nētëë Gayo, bën Derbe, con Timoteo, nē Tíquico con Trófimo, bën niz Asia ree. <sup>5</sup> Gra reeman guned abi' gulëjz reeman Pab con naj Lujc guiedx Troas. <sup>6</sup> Guiáad dunujn chi gudëd lanij ni raw ree bën Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

### *Basban Pab Eutico*

<sup>7</sup> Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenëman bejn ree, <sup>8</sup> guiáad lënü ladya lod rado'pan dád zien ree guij re'c. <sup>9</sup> Tijb xinguiag zojb ro' ventan lax Eutico. Guial xchej da't guneenë Pab laa reeman, dxel xt garej gunaaz bacaal xin guin, abi' gudidya'x diizd yu bayon guin xt luyuj, ma güjtix chi bales reeman laax. <sup>10</sup> Dxel biguiajt Pab lod naga'x, bazuxibaman abi' gudiidxaman laax, dxel rëbaman loj reeman:

—Ad rdxebidi, nabanquix.

<sup>11</sup> Dxel bayë'p Pab zatijb, gula'man guiadxtil abi' gudaw reeman, dxel basnuu guneenëman laa reeman xt bareguiaal. Chi bareguiaal bayunejzaman ziaman. <sup>12</sup> Abi' xin gudidya' ro' ventan guin, nabanx zignë reeman laax, dxel dád nix yu' luxdoo reeman.

### *Wej Pab Mileto*

<sup>13</sup> Dxel dunujn badxu'n loj barcw baneedan bio'n par luguiedx Asón, lod baya'nan diidx yaca'n Pab, din beenman xgab niej guia'man ni. <sup>14</sup> Chi badxajg du lasa'n con laaman luguiedx Asón, dxel badxu'në'n laaman loj barcw bio'n lod la Mitilene. <sup>15</sup> Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio. <sup>16</sup> Been Pab xgab ad zejtaman Éfeso, ad guyëntaman niaglaaman niz Asia guial nuyënman diob nadxinman Jerusalén, din xixgabaman naj guial bal zajc yadxinman lanij Pentecostés.

### *Bazaadiidxnë Pab bejn ree Mileto*

<sup>17</sup> Chi nadxu'n Mileto, gunabee Pab bi't ree bën rniabee loj ree bën rliladx Jesucrist, bën zojb ree Éfeso. <sup>18</sup> Chi bidxin reeman dxel rëbaman loj reeman:

—Diizd dxej yaloy ni bialan niz Asia xt yan, lëjt ragbee xhienaag cayünan. <sup>19</sup> Loj guidib tiamp ni za'në'n lëjt cayünan sirv Jesucrist con pasens, majsi xt ronan abi' gra loj guialzi

ma gudëedan por ni rën ree bën Israel güünnë reeman naj. <sup>20</sup> Per majsi zian ad bacwëëzt rnin lojdi ni naj ni zagdxë par lëjt, tant delant loj ree bejn në lidxidi balün lëjt. <sup>21</sup> Abi' zi'c ree bën Israel në ree bën ad najt bën Israel, ma rën loj reeman din yayüjn reeman xgab por xtol reeman yadxi' tëë loj reeman loj Dios chililadx tëë reeman Dad Jesucrist. <sup>22</sup> Yan ma yaya'n Jerusalén lod caxhaal xSprijt Dios naj, ad ragbeetan xhie cabëz naj ni. <sup>23</sup> Tijbzi ni ragbeen naj guial guidib lod ran rugojn xSprijt Dios naj guial ladxguuib në zro' da't guialzi naj ni cabëz naj. <sup>24</sup> Per par naj achet güünan por zian, majsi guiëtan per con nix yu' luxdon cayünan ni rayal günan xt lod gactizan, gün tëën mandad ni banee Dad Jesús naj guial gatiechan xtiidxza'caman xhienaag rën Dios dunuj ree.

<sup>25</sup> 'Yan naj ragbee guial ni'qui tijbidi bën ma ben diidx loj xhienaag naj xguialrniabee Dios, ad zuguaatridi naj. <sup>26</sup> Zeel ganin lojdi yan guial ad achetri dol ra'pan bal id nabandi xnejz. <sup>27</sup> Din ma bagojnän lëjt gra xhienaag naj xixgab Dios achetzi baquiechan. <sup>28</sup> Yan, gol gojp lëjt gajc, gol gojp tëë ree bën rliladx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejman ma gudijxaman por xtol reeman. <sup>29</sup> Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünnë reeman bën rliladx ree Jesucrist. <sup>30</sup> Loj gajquidi grii ree bën gulüü ganax ni rusquiee, din güün reeman gan güüncwent ree bën rliladx Jesucrist xtiidx reeman luar güüncwent reeman xtiidx Dios. <sup>31</sup> Zeel gol guzujsin, gol gojp cudad, gol basaaladx, loj choon ijz ad bacwëëzt gunenë'n lëjt xt ronän banen lëjt consejw.

<sup>32</sup> 'Yan, compniar raliduladx ree Jesucrist, gusa'nän lëjt con Dios con xtiidxza'caman. Laan rajp guialrniabee par gagnën lëjt, din gusnuu gagbeedi xhienaag rënman guibandi gunee tëëman lojdi ni ma rëbaman gudëëdaman loj ree bën ma naj xbejnman. <sup>33</sup> Achut xmilia achu tëët xab rzëëbladxan. <sup>34</sup> Lëjt ragbee zagdxë guial con quijb yan benän dxiin persi gudawnë'n bën guzu ree con naj. <sup>35</sup> Abi' balün lëjt guial zian rayal güün bejn dxiin din güünman yudar bën ryaadx ree xhienin. Gol basaaladx xtiidx Dad Jesús chi rëbaman: "Mazri nix yu' luxdoo bën razaladx guial loj bën rtia'."

<sup>36</sup> Chi gulox rëb Pab zian, dxel bazuxibaman gurejdx gunabaman Dios con gra reeman. <sup>37</sup> Gra reeman biin, gudiidx reeman Pab abi' gudaw reeman laaman xid. <sup>38</sup> Dád guyunaya reeman por ni rëbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

## 21

*Wej Pab Jerusalén*

<sup>1</sup> Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nêgajcan riga' loj nijsdoo, abi' ni badxoon bio'n guiedx Pátara. <sup>2</sup> Ni badxaaglojn tijb barcw ni ma che niz Fenicia zianz badxu'n lojn. <sup>3</sup> Chi zio'n dxel dux lad ruvejsan baguiaan lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin. <sup>4</sup> Ni badxaaglojn bèn rliladx ree Jesucrist abi' badxu'nê'n laa reeman gajdx dxej. Bén guin ree por xSprijt Dios rêb reeman loj Pab guial ad bal cheman Jerusalén. <sup>5</sup> Per chi baza' gajdx dxej guin, dxel badxoon luguiedx guin, dxel gra reeman con xbéngunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios. <sup>6</sup> Dxel bazaadiidxnê'n laa reeman abi' badxê'pan loj barcw guiáad laa reeman zia lidx reeman.

<sup>7</sup> Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' tēen bugneenê'n bèn zojb ree ni, bèn rliladx ree Jesucrist abi' baya'nan con laa reeman tib dxej. <sup>8</sup> Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bèn rtie'ch xtiidx Jesucrist. Felip guin naj tijb ree bèn gajdx cwabee din qui's reeman ni rayal tia' ree bènprob abi' baya'nan lidxaman. <sup>9</sup> Yu' tajp xi'ndxa'paman biinxtijb ree abi' laa reem rudêed xtiidx Dios loj ree bejn. <sup>10</sup> Ma gojc zien dxej nadxu'n lidx Felip, chi bi't tijb bèn la Agabo nêgajcaman rudêed xtiidx Dios loj ree bejn, zêedaman niz Judea. <sup>11</sup> Chi bi'taman cwa'man xcinch Pab guxhii guia' gajcaman con yaaman, abi' naman:

—XSprijt Dios na guial Jerusalén ze guixhii ree bèn Israel bèn naj xcinch ni guie, abi' yayü reeman laaman loj ree bèn ad najt bèn Israel.

<sup>12</sup> Chi baguiejnan zian, dunujn con ree bèn rliladx Jesucrist luguiedx guin baguieenan naguiejn loj Pab ad cheman Jerusalén. <sup>13</sup> Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiëtan Jerusalén por Dad Jesús.

<sup>14</sup> Chi bayagbeen guial ad zaguieentan gan yadxoonan laaman chitêe cheman, achetri baguie'chan lojman, tijbzi ni raguie'chan lojman:

—Gac zi'c rniabee Dios.

<sup>15</sup> Chi gudêd ree dxej guin dxel baguieenan purvinid bio'n Jerusalén. <sup>16</sup> Bunê'n bêlzi ree bèn Cesarea rliladx ree Jesucrist, laa reeman binê dunujn lod baya'nan lidx tijb bèn Chipre, ma gojc xchej rliladxaman Jesucrist, laman Mnasón.

*Bignaj Pab Jacob*

<sup>17</sup> Abi' ree bèn Jerusalén riladx Jesucrist dád nix guyu lux-doo reeman baca' reeman dunujn. <sup>18</sup> Chi bareguiaal bunë'n Pab bugnajn Jacob, ni riga' gra ree bèn rniabee loj ree bèn riladx Jesucrist. <sup>19</sup> Chi gulox bagajpdiozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree bèn ad najt bèn Israel. <sup>20</sup> Chi bigueijn reeman zian, baza't reeman Dios zagdxe, zianz rëb reeman loj Pab:

—Lüj ragbee guial entr loj ree bèn Israel zien da't reeman ma bililadx Jesucrist, abi' gra reeman rëb guial rüjn naguiejn güün bejn zi'c rniabee xley Moisejs. <sup>21</sup> Ma bigueijn tää reeman guial lüj culüü bèn Israel ree, bèn ad zojbt ree loj nacion Israel guial ad züjncwentt reeman xley Moisejs, rëb tää loj reeman guial ad rüjnt naguiejn chu' xi'n reeman sen ru ree bèn Israel ad zinal tää reeman dux costumbr ree. <sup>22</sup> Yan, ¿xhienaag gac? Laa reeman guchajgczi lasa' reeman chi gagbee reeman guial ma bi'til. <sup>23</sup> Zeel mejorli güünl ze: Yu' tajp ree xin no'ch du lojn xin rayal ree güün cumplid ni cwëb reex loj Dios. <sup>24</sup> Binë reex, gol been zi'c rëb loj ley din gaquidi naya, gudijx tää por laa reex din gac ya guijc reex. Zian gagbee gra bejn guial rüjnquil zi'c rniabee ley, guial ad wali tää ni bigueijn reeman xcwentil. <sup>25</sup> Abi' por ree bèn ad najt bèn Israel, bèn ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tää reeman rejn ni'qui bëel rberejn, ad sunë tää reeman ben ren bèn ad najt lacheel reeman.

*Gunaaz ree bèn Israel Pab*

<sup>26</sup> Dxel binë Pab guidap ree bèn guin, abi' chi bareguiaal been reeman zi'c rniabee ley par gac reeman naya. Dxel guyu reeman lën yadooro' Jerusalén din gugojn reeman goc yayaaloj dxej güün reeman zi'c rniabee ley, dxej rayal chinë tijb gaj reeman tijb be guiët zi'c tijb gon par Dios.

<sup>27</sup> Chi ma yayaaloj gajdx dxej ni naj güün reeman zi'c rniabee ley, yu' ree bèn Israel zëed niz Asia, baguiaa reeman Pab lën yadooro' Jerusalén abi' gurixdiaj reeman wajs reeman, gunaaz reeman laaman, <sup>28</sup> rëb reeman:

—¡Bèn Israel, gol been yudar! Xin guie naj xin ziza gra lad caneeguidxix bèn Israel ree në dux yadoo ree, rëb tää loj ree bejn guial ad güün reeman zi'c rniabee dux ley ree. Abi' ad tijbtzi laan, në ma badxe'x bèn ad najt ree bèn Israel lën dux yadoo ree ni naj ni nada par dunuj ree ma beenx laan zi'c tijb luar ad rüjnt sirv.



<sup>29</sup> Rëb reeman zian guial baguiaa reeman Pab zizaman ni con tijb bën Éfeso bën la Trófimo, zeel gunaladx reeman binë Pab laaman lën yadooro' Jerusalén.

<sup>30</sup> Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babëë reeman laaman lën yadoo guin laa basiaaw gajc reeman port guin ree. <sup>31</sup> Za mer nugüjt reeman laaman, chi bidxin ruson guin loj suldad rniabee ree suldad guial gra ree bën Jerusalén cayüjn nadxeb. <sup>32</sup> Laa bato'p gajc suldad rniabee guin xsuldadix në za tio'p choon ree suldad rniabee, baxüün reex wej reex lod riga' ree bën guin. Chi baguiaa ree bën guin bidxin suldad rniabee guin con ree xsuldadix, dxel bacwëëz gudijn reeman Pab. <sup>33</sup> Dxel gubig suldad rniabee guin, gunaazix Pab gunabeex guxhii reex laaman con tio'p caden. Abi' gunabdiidix chu laaman xhie tëë beenman. <sup>34</sup> Per gurixdiaj reeman rëb reeman garent garen, guial rbixdiaj da't reeman achet gojc niagbeex, dxel gunabeex bignë reex Pab lod yu' ree suldad. <sup>35</sup> Chi bidxin reex loj ree sclar lod yu' ree suldad guin, gulejn reex Pab guial dád nadoxh rüjn ree bën zien nal laa reex, <sup>36</sup> abi' gra reeman rbixdiaj, rëb reeman:

—¡Gol bagüjtix!

### *Gunee Pab loj ree bejn*

<sup>37</sup> Chi ma chu'në reex Pab lod yu' ree suldad guin, gunabdiidixaman loj suldad rniabee guin, rëbaman:

—¿Zajc ganenë'n lüj ya?

Badxi' suldad guinan rëbix:

—¿Rajc rnieel diidx grieg ya? <sup>38</sup> ¿Nid lüj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejnl, bën bagüjt ree bejn?

<sup>39</sup> Dxel rëb Pab lojx:

—Bën Israel naj. Goolan luguiedx Tarso tijb ree guiedx zobjloj ni riga' niz Cilicia. Baneesii mod ganenë'n bën guie ree.

<sup>40</sup> Dxel cwëjb suldad guin, abi' guzuli Pab loj ree sclar guin beenman sen loj ree bën guin con yaaman din yacwëëz ro' reeman. Chi bacwëëz reeman, dxel guneenëman laa reeman diidx hebreo, rëbaman:

## 22

<sup>1</sup> —Lëjt bengol në los demazridi, gol bacaagdiajg ni ganin por naj.

<sup>2</sup> Chi biguiejn reeman caneenëman laa reeman diidx hebreo, mazri bacwëëz reeman. Abi' basnuuman rëbaman loj reeman:

<sup>3</sup> —Bén Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux bén gulal ree. Guiáad naj guidib luxdon benan xgab güünan sirv Dios zi'cgajc lëjt yan. <sup>4</sup> Dxel guzunaalan bén riladx ree Jesucrist, xt bagüjtan laa reeman abi' zi'c ree béngunaa zi'c ree xinguaaaw gunaazan badxe'n ladxguuib. <sup>5</sup> Bixhioz mazri zojbloj rniabee graczi ree bixhioz në gra ree guxtis Israel ragbee guial najn ni wali. Din laa reeman banee tijb gui'ch par gulün loj du lasa' bén Israel ree, bén zojb ree luguiedx Damasco din chile' yaguilan bén riladx ree Jesucrist luguiedx guin, ganaaz tēen laa reeman guidnē'n laa reeman Jerusalén din tēd reeman casti.

*Be Pab diidx xhienaag bililadxaman Jesucrist*  
(Hch. 9:1-19; 26:12-18)

<sup>6</sup> 'Per chi za'n lunejz par Damasco, chi ma cadxinan ni cost garol dxej, dxejczy brii tijb gui xanyabaa balaan bacha' guidibczy lod cazaan, <sup>7</sup> abi' breeyujn. Dxel biguiejnan cha' bén na: “Saulo, Saulo, ¿chexquiza zeel rzunalil naj?” <sup>8</sup> Abi' gunabdiidxan rēn: “¿Chu lüj Dad?” badxi'man laan naman: “Naj naj Jesús, bén Nazaret, bén rzunalil.” <sup>9</sup> Bén zinē' reen baguiaa reeman bacha' guin abi' bidxeb reeman, per ad bignia't reeman ni na cha' bén gunee naj. <sup>10</sup> Dxel gunabdiidxan rēn: “¿Xhie rayal günan Dad?” Abi' na Dad Jesucrist lon: “Bixche, basnuu xnejzil wej Damasco. Ni na reeman gra ni rayal güünl.” <sup>11</sup> Abi' guial bascajy bacha' guin lon, dxel bén zinē' reen gunaaz reeman yan, binē reeman naj luguiedx Damasco.

<sup>12</sup> 'Ni zojb tijb bén la Ananías, rüjnman cumplid gra zi'c rniabee xley Moisejs. Abi' gra ree bén Israel zojb luguiedx Damasco nünbee laaman guial nabanman xnejz. <sup>13</sup> Ananías guin bidganaj naj, chi bi'taman naman lon: “Saulo, ma zajc yaguiaal stijb.” Loj hor guin gajc baguian stijb abi' baguian laaman. <sup>14</sup> Dxel naman lon: “XDios dux béngulal ree ma bacaabee lüj din gagbeel xhie rēnman güünl, abi' guguiaal Jesucrist guien tēel cha'man, bén rüjn zi'c rayal. <sup>15</sup> Din chigneel xtiidxaman loj gra ree bénguidxliuj, gü tēel diidx loj reeman ni baguiaal ni biguiejn tēel. <sup>16</sup> Yan, ad rbēzil mazri, guzuli gurobnijs tēē gurejdx gaj Dad Jesucrist din chisüdaman xtolil.”

*Be Pab diidx xhienaag wejman loj ree bén ad najt bén Israel*

<sup>17</sup> 'Chi baguialan Jerusalén, wan lēn yadooro' persi guredx gunaaban Dios, abi' guza'can zi'c rulüü cane'xhchalan. <sup>18</sup> Baguian Dad Jesús naman: “Baquiejn. Cari barii Jerusalén, din ad züjncwentt reeman ni guiēbil por naj.” <sup>19</sup> Abi' rēn lojman: “Dad, laa reeman ragbee guial naj wa gra lēn ree yadoo gunaazan bén riladx ree lüj, badxe'n laa reeman ladxguuib

gudin tēen laa reeman. <sup>20</sup> Nē chi bagüjt reeman Esteban, bēn gunee xtiidxil, laagajc naj za' ni rēn zagdxē naj guiētaman abi' xt gunan xab ree bēn bagüjt laaman.” <sup>21</sup> Per na Dad Jesús lon: “Wej, naj gaxhal lüj zijt loj ree bēn ad najt bēn Israel.”

*Badxe' reeman Pab lod yu' ree suldad*

<sup>22</sup> Xt guintzi naga'loj bacaagdiajg reeman ni rēb Pab dxel guzuloj gurixdiaj reeman rēb reeman:

—¡Ad rayalt guiban xin guin! ¡Gol bagüjtix!

<sup>23</sup> Abi' guial cabixdiajz cabixdiaj reeman, ruzaal xab reeman niz ladia ruzaal tēē reeman yuj niz ladia. <sup>24</sup> Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rbixdiaj ree bēn guin zian contr laaman. <sup>25</sup> Per chi guxhii reex Pab din quin reex laaman, rēbaman loj tijb ree suldad rniabee za' ni:

—¿Zajc quindi tijb bēn Rom ya, chi gadidi gagbee xhie beenman?

<sup>26</sup> Chi biguiejn suldad rniabee guin zian, dxel bicojnx suldad rniabee ree suldad guin, rēbix lojx:

—Gojp cudad ni güünnēl xin guin, din xin Roman.

<sup>27</sup> Dxel wej suldad rniabee guin lod za' Pab, abi' gunabdiidxix lojman rēbix:

—¿Walín ya xin Rom lüj?

Badxi' Paban rēbaman:

—Walican.

<sup>28</sup> Abi' rēb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rēbaman:

—Per naj diizd goolan najn bēn Rom.

<sup>29</sup> Chi biguiejn ree suldad niguin Pab, guial bēn Rom najman, laa bisüd gajc reex. Xt nē suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

*Bazuj reeman Pab loj ree guxtis*

<sup>30</sup> Chi bareguiaal, guyēn suldad rniabee guin niagbeechaawix chexc zeel za' ree bēn Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz nē ree guxtis. Abi' babēex Pab bazujx laaman loj gra reeman.

## 23

<sup>1</sup> Baguiaa Pab loj ree guxtis guin, abi' rēbaman:

—Compniar Israel, loj guidib ni nabanán xt yan, achet naladxan delant loj Dios din naj ragbee xhienaag nabanán.

<sup>2</sup> Dxel Ananías, bixhioz mazri zojbloj rniabee graczi ree bixhioz, gunabeeman bén za' ree gajxh cwë' Pab din ca'p reeman ro'man. <sup>3</sup> Per badxi' Paban rëbaman loj bixhioz guin:

—¡Ziangajc ca'p Dios ro'l, bén rusquiee! ¿Id zojbil yagaj ya par güünl gualguxtis zi'c rniabee ley? Abi' ¿chexquiza zeel rüjnl zi'c ad rniabeet ley, rniabeel ca'p reeman ro'n?

<sup>4</sup> Abi' ree bén za' yagaj rëb reeman lojman:

—¿Zian rusaglojl xbixhioz zojbloj Dios ya?

<sup>5</sup> Dxel rëb Pab:

—Gol been perdon, ad gogbeetan guial laaman naj bixhioz mazri zojbloj. Din loj xtiidx Dios rëb: “Ad gusaglojl bén rniabee ladxil.”

<sup>6</sup> Chi gogbee Pab guial garol reeman naj bénsaducew za garol reeman naj bénfarisew, dxel gunee man rejs rëbaman:

—Naj naj bénfarisew, xi'n bénfarisew naj. Abi' guial rliladxan yaban ree bengüt zeel za' ree bejn contr naj.

<sup>7</sup> Chi rëbaman zian, guzuloj cadildiidx ree bénfarisew con ree bénsaducew abi' gojc reeman tio'p lala'. <sup>8</sup> Din bénsaducew ree ad rliladxt reeman guial yaban ree bengüt, ad rliladx tëët reeman guial yu' ree anjl në ree sprijt, per ree bénfarisew rliladx reeman gra ree ni guin. <sup>9</sup> Abi' been reeman naquie' yagaj. Dxel guzuli bëlzi ree bénfarisew naj mextr rulüü ley, rëb reeman:

—Achet ni mal wayüjn bén guie. Wed tijb sprijt o tijb anjl gunee laaman, gol gojp cudad ad niad contr Diosan nadxu' ree.

<sup>10</sup> Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëe reex laaman galay ree bén guin, chinë tëë reex laaman lod yu' ree suldad stijb.

<sup>11</sup> Chi gure guiaal stijb, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

### *Been reeman xgab gugüjt reeman Pab*

<sup>12</sup> Chi bareguiaal, garol ree bén Israel baya'n reeman diidx din gugüjt reeman Pab, rëb tëë reeman guial achet gaw reeman achet tëët guië' reeman xt gugüjt reeman laaman.

<sup>13</sup> Nadëd tiuu naj ree bén rëb zian. <sup>14</sup> Abi' wej reeman bigneenë reeman bixhioz ree bén rniabee ree bixhioz në ree xbengol ree bén Israel, rëb reeman loj reeman:

—Dunujn ma raguie'ch guial achetczi yadaawan xt chi ma bagüjtan Pab. <sup>15</sup> Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guijc guial rëndi gagbeechaawidi xhienaag naj

xcwentix. Abi' dunujn ma yadxu'sinan din yagüjtan laax chi gadix gui't guie.

<sup>16</sup> Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab. <sup>17</sup> Zianz guneë Pab tijb ree suldad rniabee guin, rëbaman lojx:

—Binësii xin guie loj suldad rniabee din gudëëx tijb ruson lojman.

<sup>18</sup> Binë xin suldad guin laax loj suldad rniabee guin, rëbix lojx:

—Pab, xin yu' ladxguiib guredx naj abi' gunabix guidnë'n xin guie lojl din guneëx tijb ruson lojl.

<sup>19</sup> Abi' suldad rniabee guin gunaazix yaa xin guin, binëx laax tiblax, gunabdiidxix lojx rëbix:

—¿Xhie rënl nal lon?

<sup>20</sup> Abi' rëb xin guin lojx:

—Bén Israel ree ma baya'n reeman diidx din guiniab reeman lojl guixie din chinël Pab loj ree guxtis, con gudxiib reeman guijc guial rën reeman gagbeeçaaw reeman xhienaag naj xcwentaman. <sup>21</sup> Per ad bal chililadxil laa reeman, din nadëd tiuu naj ree bën cwëz laaman guquie'chloj reeman lunejz, abi' ma rëb reeman guial achet gaw reeman ache tëët guië' reeman xt gugüjt reeman laaman. Yan za'sin reeman cabëz reeman ni guiëbil.

<sup>22</sup> Dxel rëb suldad guin loj xin guin:

—Baguiaj. Achu loj guiëbil ni ma nal lon.

### *Guxhaal reeman Pab loj gobernador Félix*

<sup>23</sup> Dxel guneë suldad rniabee guin tio'p ree xsuldadix, abi' gunabeëx laa reëx din güün reëx porvinid tio'p gayuu suldad che guia', në za gayojnchii ree suldad cwib way, zatio'p gayuu ree suldad tia' lans din che reëx Cesarea raca gaa guxhin.

<sup>24</sup> Abi' gunabee tëëx güün reëx porvinid way cwib Pab, rëbix loj reëx guial guinia reëx Pab din guidxinman zagdxë loj gobernador Félix. <sup>25</sup> Abi' guxhaalnëx laa reëx tijb gui'ch ni rëb:

<sup>26</sup> “Naj Claudio Lisias, rugajpdiozan lüj gobernador Félix, lüj guial najl bën zobjloj. <sup>27</sup> Bén Israel ree gunaaz xin guie ma nugüjt reeman laax. Per chi gogbeen guial xin Roman, dxel wan con ree da suldadan buglëën laax loj reeman. <sup>28</sup> Abi' guial rënan gagbeen xhie rüjnx zeel rdxe'ch reeman laax, dxel bazun laax loj ree guxtis Israel. <sup>29</sup> Dxel gogbeen guial por xcwent xley reeman zeel rdxe'ch reeman laax, per ad najtan ni rayal guiëtix ni'qui guial chu'x ladxguiib. <sup>30</sup> Në guial ma gogbeen guial xixgab ree bën Israel naj gugüjt reeman laax, zeel cayxhalan laax lojl. Abi' ma rën loj ree bën rdxe'ch laax

guial con lüj güün reeman reglad ni rajp reeman contr laax. Laanan rugojnan lüj.”

<sup>31</sup> Been ree suldad guin zi'c gunabee suldad rniabee guin abi' guxhin binë reex Pab luguedx Antípatris. <sup>32</sup> Chi bareguiaal suldad zë ree guia' bayejc reex lod yu' ree suldad, guiáad ree suldad dxiib way zinë reex laaman luguedx Cesarea. <sup>33</sup> Chi bidxin reex Cesarea, badëed reex gui'ch guin loj gobernador guin, bayü tëe reex Pab lojman. <sup>34</sup> Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zëedaman, <sup>35</sup> dxel rëbaman lojman:

—Chi gui't ree bën za' ree contr lüj, dxel gucagdiagan ni nal. Abi' gunabeeman gap reex Pab lën xpalas Herodes.

## 24

### *Ni gunee Pab loj gobernador Félix*

<sup>1</sup> Chi goc gaay dxej, Ananías, bixhioz mazri zojbloj rniabee graczi ree bixhioz, bidxinman Cesarea con tio'p choon ree guxtis Israel në tijb licenciad laman Tértulo. Abi' wej reeman loj gobernador guin din cwe'c reeman xguialquia Pab. <sup>2</sup> Chi bidxinnë reex Pab, guzuloj Tértulo caneeman contr laaman, rëbaman loj gobernador guin:

—Quixtëe lüj dad gobernador, por lüj nadxu'dxen, në por xguialrajquil zien ree ni rüjn sirv cayajc du ladxan. <sup>3</sup> Gra ladczi za' ree bejn conform por gra ni cayüjnl dad gobernador Félix, lüj naj bën zojbloj, quixtëeczi lüj. <sup>4</sup> Per chitëe günlaan lüj mazri, rniaaban lojl din gucaagdiajguil ni yanan lojl tibrajtooczi. <sup>5</sup> Dunujn bayagbeen xin guie naj zi'c tijb guialguijdx loj ree bën Israel, guidibczi guidxliuj zizax rustijlix laa reeman abi' laax rniabee loj tib cwaa ree bën rniee reeman nazaren. <sup>6</sup> Abi' guyën tëex nünx dux yadooro'n zi'c tijb luar ad rüjnt sirv, zeel banaazan laax bayënan naguieenan guialguxtis zi'c naj dux leyan. <sup>7</sup> Per laa bi't gajc suldad Lisias con ree xsuldadix, babëëxuu reex laax du lojn. <sup>8</sup> Abi' rëb suldad rniabee guin guial lojl gui't ree bën rbe'c xguialquia Pab, yan lüj gajc zajc guiniabdiidx lojx din gagbeel zagdxe guial walican ni ranan xcwentix.

<sup>9</sup> Abi' ree bën Israel za' ni rëb reeman guial waliqui gra ni guin. <sup>10</sup> Dxel been gobernador guin sen loj Pab din guinieeman, abi' rëb Pab:

—Guial ragbeen diidz gocli rniabeel nacion Israel, zeel ad yu'nawëëgtan yadxi'n ni rudxiib reeman guican. <sup>11</sup> Abi' lüj gajc zajc cwe'quil ruson din gagbeel guial qui gojcri chiptio'p dxej badxinan Jerusalén din ganajchi'n Dios. <sup>12</sup> Abi' achut banaaznë reeman naj cadildiidxnë'n, ni'qui guial gabën wadijl

lèn yadooro' Jerusalén, ni'qui lèn yadoo ren ree ni yu' ree ni, ni'qui luguiedx guin. <sup>13</sup> Bén guie ree ad zajct na reeman lojl guial ni diidxli naj ni rudxiib reeman guican. <sup>14</sup> Per ni naj diidxli naj guial rliladxan Jesucrist, nejzcüb guin naj ni zinaalan, cayünan sirv loj xDios dux béngulalan, abi' na ree bén guie guial ad xnejzt Diosan, per cayünan zian guial rliladxan gra ni zëed loj ley në ni bacaa ree bén badëed xtiidx Dios loj ree bejn. <sup>15</sup> Abi' zi'cgajc rliladx ree bén guie Dios, ziangajc rliladxan laaman guial yaban ree bengüt stijb, zi'c ree bén goc benza'c në ree bén goc benmal. <sup>16</sup> Zeel rünan naguiejn gabajnan zagdxe chitëë xhie ganaladxan delant loj Dios ni'qui delant loj ree bejn.

<sup>17</sup> Ma gojc zien ijz nariin, xt yan baye'c ladxan bidganë'n ni baxhaal ree bejn par ree bénprob, bidganë' tëen gon ni rayal gudëdan loj Dios. <sup>18</sup> Laan naj ni cayünan lèn yadooro' Jerusalén chi bi't ree bén Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tëetan wadijl. <sup>19</sup> Yan, bén gunaaz ree naj, laa reeman naj bén rayal su guie din na reeman xhie rünan xhie pornin rdxe'ch reeman naj. <sup>20</sup> O balguiza, bén za' ree guie na reeman xhie da dolan badxejl reeman chi guzun loj gra ree guxtis Israel. <sup>21</sup> Tijbzi ni benan chi za'n galay reeman gurixdiajn rën: “Guial rliladxan yaban ree bengüt, zeel za' ree bejn contr naj yan.”

<sup>22</sup> Chi biguiejn gobernador Félix zian, abi' guial ragbeeman xhienaag naj xnejz cüb Jesucrist, dxel basa'nman guialquia guin par stijb dxej, rëbaman loj reeman:

—Chi gui't suldad Lisias, dxel gagbeen zagdxe xhienaag naj xcwenti.

<sup>23</sup> Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoon tëë reex chignaj ree xmiwaman laaman.

<sup>24</sup> Chi goc tio'p choon dxej, bidxin gobernador Félix stijb con lacheelaman Drusila, laaman naj bén Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent guialrliladx bejn Jesucrist. <sup>25</sup> Per chi guzuloj cayëbaman guial rayal guiban ree bejn xnejz, gucwëëz tëë xixgab mal reeman, guial guidxin tëë dxej yadëed ree bejn cwent loj Dios, dxel dád bidxeb gobernador guin abi' rëbaman loj Pab:

—Baguij. Ganetan lüj chi chu'n luar stijb.

<sup>26</sup> Per Félix në milian rbëzaman gudëed Pab lojman din guslaaman laaman, zeel gurejdxaman laaman zien volt din guinieenëman laaman. <sup>27</sup> Zian gudëd tio'p ijz abi' barii Félix guial gobernador, dxel bayu Porcio Festo xluaraman. Abi'

guial guyën Félix naya'nman zagdxex loj ree bén Israel, zeel basa'nman Pab ladxguuib.

## 25

### *Gunee Pab loj Festo*

<sup>1</sup> Chi goc choon dxej ni bidxin Festo Cesarea par chu'man guial gobernador, dxel wejman Jerusalén. <sup>2</sup> Yagaj, bixhioz rniabee ree bixhioz con ree bén Israel mazri zobjloj, wej reeman lojman bile'c reeman xguialquia Pab, <sup>3</sup> abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugüjt reeman Pab runejz. <sup>4</sup> Per badxi' Festo xtiidx reeman rëbaman guial Cesarea nayaaw Pab guiáad laaman nayob yaguiajman ni, <sup>5</sup> abi' rëbaman loj reeman:

—Bén rajp ree gualrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

<sup>6</sup> Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhilaman lod rniabee-man, abi' gunabeeman chica' reex Pab. <sup>7</sup> Chi bidxinnë reex laaman, bén Israel guza ree Jerusalén, gubig reeman abi' zien ree niguijdx badxiib reeman gujcaman, majsi ni'qui tijb ni rëb reeman ad gojct nulüü reeman guial najn ni wali. <sup>8</sup> Dxel badxi' Pab xtiidx reeman, rëbaman:

—Naj, achet ni mal wayünan xley ree bén Israel, ni'qui yadooro' Jerusalén, ni'qui rey César.

<sup>9</sup> Per Festo guyënman naya'nman zagdxex loj ree bén Israel, dxel gunabdiidxaman loj Pab, rëbaman:

—¿Rënl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquil.

<sup>10</sup> Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lüy ragbee zagdxex guial achet ni mal wayünan bén Israel ree. <sup>11</sup> Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëëdan loj rey César.

<sup>12</sup> Dxel chi gulox guneenë Festo bén naj ree xbejnman, bén rëb ree ni rayal gac, rëbaman loj Pab:

—Lüy na tédil loj rey César, yan lojman tédil.

### *Za' Pab loj rey Agripa*

<sup>13</sup> Chi gudëd tio'p choon dxej, rey Agripa con xbéngunaaman Berenice bidxin reeman Cesarea bitixloj reeman gobernador Festo. <sup>14</sup> Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:



—Guie yu' tijb xin basa'n Félix ladxguiib. <sup>15</sup> Chi wan Jerusalén, bixhioz rniabee ree bixhioz con ree bén rniabee loj ree bén Israel gule'c reeman xguialquiaux, gunab reeman ganabeen guiëtix. <sup>16</sup> Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bén cabe'c xguialquiaman din guiëbaman walin ya o ad walitan ni rudxiib reeman guijcaman. <sup>17</sup> Zeel chi bi't ree bén Israel guin guie, achet guial niaglaan, bareguiaal gajc gure loj da yagxhilan, abi' gunabeen bidnä reex xin guin. <sup>18</sup> Per ree bén bi't gule'c xguialquiaux, achet ni nadxeb na reeman zi'c gunaladxan ninia reeman por laax. <sup>19</sup> Tijbzi xguialquiaux ni gule'c reeman naj por xcostumbr reeman në por tijb bén la Jesús, bén ma güjt, per Pab rëb naban Jesús guin. <sup>20</sup> Abi' guial ad ragbeetan xhie günan por zian, dxel gunabdiidxan loj Pab bal rën<sub>x</sub> chex Jerusalén din gac reglad ni guin ree ni. <sup>21</sup> Per laax gunab täd loj rey César din gac reglad ni rëb reeman por laax, zeel gunabeen yaawsiix xt chile' yaxhalan laax loj rey César.

<sup>22</sup> Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiajguil laax.

<sup>23</sup> Chi bareguiaal, dád zagdxé ca' xab rey Agripa con Berenice bidxin reeman con ree bén rniabee suldad con los demazri ree bén zobjloj luguiedx guin, bidxin reeman guyu reeman lënü lod gucaagdiajg reeman ni guiëb Pab. Dxel gunabee Festo bica' reex Pab. <sup>24</sup> Abi' rëb Festo:

—Rey Agripa në los demazridi dad za'nëdi dunujn guie. Bén ruguiaadi guie, gra bén Israel, zi'c Jerusalén zi'cgajc guie ma bi't reeman bidganaj reeman naj rniab reeman guiëtix. <sup>25</sup> Naj, achet xfaltix radxejlan guial rayal guiëtix. Guiáad laax gunab täd loj César Augusto lod gac reglad xcwentix, abi' ma benan xgab yaxhalan laax. <sup>26</sup> Per ad radxejltan ni gucan por laax loj gui'ch ni gaxhalan loj rey César, bén rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax. <sup>27</sup> Din naj rulüü ad xnejzt naj yaxhalan tijb bén yu' ladxguiib loj rey César abi' ad zëtan xhie beenman.

## 26

*Ni gunee Pab loj rey Agripa*

<sup>1</sup> Dxel rëb rey Agripa loj Pab:

—Ma zajc guinieel por lüj.

Abi' gules yaa Pab guzuloj rëbaman:

<sup>2</sup> —Dád nix yu' luxdon guial bile' za'n lojl yan rey Agripa, par ganen lojl yadxi' tēen gra ni rudxiib ree bēn Israel guican. <sup>3</sup> Din lūj ragbee zagdxe gra xcostumbr ree bēn Israel, nē conin rūjn persi rdildiidx reeman. Zeel rniaaban lojl gapil pasens gucaagdiajguil ni ganin.

### *Zi'c guban Pab gocli*

<sup>4</sup> 'Gra ree bēn Israel ragbee xhienaag gubajnan con laa reeman zi'c ladxan zi'c Jerusalén, diizd xindoon. <sup>5</sup> Ragbee tēē reeman abi' zajc na reeman laan bal rēn reeman, guial diizd xindoon najn bēnfarisew, abi' ree bēnfarisew naj bēn mazri zinal xley ree bēn Israel. <sup>6</sup> Abi' yan za'n guie, badēēd reeman naj loj ree guxtis guial rliladxan yasban Dios bengüt ree zi'c beenman promeys loj ree dux bēngulal ree. <sup>7</sup> Gra guidxiptio'p cwa' ree bēn Israel cabēz dxej güün Dios zian, zeel rēn reeman laaman rūjn tēē reeman sirv lojman dxej guiaal. Abi' yan guial rliladxan laan zeel rbe'c ree bēn Israel da guialquian, rey Agripa. <sup>8</sup> ¿O naladxidi ya nawēēg yasban Dios bengüt ree?

### *Be Pab diidx xhienaag guzunalaman bēn rliladx ree Jesucrist*

<sup>9</sup> 'Guia'xchej benan xgab rayal gūnan xhienin bēn rliladx ree Jesús, bēn Nazaret, <sup>10</sup> abi' zian benan Jerusalén. Con xtiidx ree bixhioz rniabee ree bixhioz, zien ree bēn rliladx Jesucrist badxe'n ladxguuib. Abi' chi rugūjt reeman laa reeman, nē naj rē guiētri reeman. <sup>11</sup> Zien volt benan laa reeman xhienin din gūnan naguiejn gusa'n reeman guialrliladx reeman Jesucrist. Zian benan lēn gra ree yadoo, abi' guial tant rdxe'chan laa reeman dxel guzunaalan laa reeman xt luguiedx ren ree.

### *Be Pab diidx stijb xhienaag bililadxaman Jesucrist (Hch. 9:1-19; 22:6-16)*

<sup>12</sup> 'Abi' par zian za'n Damasco, con quijb xtiidx ree bixhioz rniabee ree bixhioz. <sup>13</sup> Per ganin lūj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bēn zinē'n. <sup>14</sup> Abi' dugraczan bareeyuj, dxel biguiejn nan cha' bēn gunee naj con diidx hebreo, naman: “Saulo, Saulo, ¿chexc zeel rzunalil naj? Lūj gajc rguuil xguialnaal zi'c go'n rudxegua' loj yag rulaagnē reeman laab.” <sup>15</sup> Dxel rēn: “¿Chu lūj Dad?” Badxi'man laan naman: “Naj naj Jesús bēn rzunalil. <sup>16</sup> Per bixche, guzuli, din balūlon lojl par güünl naj sirv gü tēēl diidx ni baguiaal yan nē ni gulūn lojl. <sup>17</sup> Naj gaxhal lūj loj ree bēn Israel nē loj ree bēn ad najt bēn Israel, abi' naj gagnē' lūj chitēē xhie güün reeman lūj. <sup>18</sup> Gaxhalan lūj loj reeman din guixhialil loj reeman gusa'n reeman nejz mal, chinal reeman nejz zagdxe. Ad tiēbri reeman nabee xindxab

laa reeman, chinal tēē reeman xnejz Dios. Abi' chililadx reeman naj din gac xtol reeman perdon yayal tēē reeman ni rayal gra ree xbejn Dios, bēn ma naya ree delant lojman.”

*Bazooob Pab diidx ni balüüloj lojman*

<sup>19</sup> 'Zian gojc, rey Agripa, bazoban diidx benan ni na Jesucrist lon chi guneeman naj diidx xanyabaa. <sup>20</sup> Yaløj luguiedx Damasco gutiechan xtiidxaman, dxelri Jerusalén nē guidib niz Judea nē loj ree bēn ad najt bēn Israel. Rēn loj reeman din yayüjn reeman xgab por xtol reeman, yadxi' loj reeman loj Dios güün tēē reeman ni rayal güün reeman din guiguien guial ma bidxaa mod naban reeman. <sup>21</sup> Abi' por zian, gunaaz ree bēn Israel naj lēn yadooro' Jerusalén, guyēn reeman nugüjt reeman naj. <sup>22</sup> Per con xyudar Dios laa naj guie xt yan cusnuu cayün xtiidxaman loj gra ree bejn, zi'c ree bēn zøjbloj zi'c ree bēn ad zøjblojt. Abi' gra ni rēn loj reeman naj ganax ni bacaa ree bēn badēē xtiidx Dios loj ree bejn nē ni bacaa Moisejs xhienaag naj ni gac, <sup>23</sup> guial Cristo naj guial tēdaman guialzi, guiētaman. Per chi ma güjtaman yaløj laaman naj bēn yaban loj ree bengüt, abi' gugojnman bēn Israel ree nē ree bēn ad najt bēn Israel xhienaag gap reeman perdon.

*Nuyēn Pab nililadx Agripa Jesucrist*

<sup>24</sup> Chi cayēb Pab zian, dxel gudidxa' Festo rēbaman:

—¡Rajcguijquil Pab! guial tant rusiidil ma rajc guijquil.

<sup>25</sup> Per badxi' Pab laan rēbaman:

—Ad guictan rajc, gobernador Festo. Ni canin najn xnejz nē diidxli. <sup>26</sup> Laa rey Agripa za' guie, laaman ragbee ni canin, zeel sin gualrdxeb canen delant lojman. Naj ragbeechaaw guial laaman ragbee gra ni canin, din ad canitan ni goc ralan lod achut zajc gagbee laan. <sup>27</sup> ¿Rliladxil ni rēb ree bēn badēēd xtiidx Dios loj ree bejn ya, rey Agripa? Naj ragbee guial rliladxil.

<sup>28</sup> Dxel badxi' rey Agripa laan rēbaman:

—Sta'nczi nüjnl naj gan nililadxan Jesús.

<sup>29</sup> Abi' rēb Pab:

—Majsi sta'nz o majsi ryaadxri, na Dios guial ad tijbtzi lüj, nē gra ree bēn cucaagdiajg ni canin yan, guidxin dxej chililadxidi Jesús zi'c naj, majsi ad nēt ree caden guie.

<sup>30</sup> Dxel bisu rey Agripa con gobernador Festo con Berenice nē gra ree bēn zøjbnē laa reeman ni. <sup>31</sup> Chi bariica reeman tiblax guzuloj cayünē lasa' reeman diidx, rēb reeman:

—Achet wayüjn xin guie ni rayal guiētix, o chu'x ladxguiib.

<sup>32</sup> Dxel rēb rey Agripa loj Festo:

—Zile' naslaa reex, balidix niniab tēdix loj rey César.

## 27

*Baxhaal reeman Pab Rom*

<sup>1</sup> Chi rëb reeman ma yaxhaal reeman dunujn Italia, dxel bayü reeman Pab con sta'n ree bén yu' ladxguiib loj tijb suldad rniabee la Julio, laax rniabee tib cwaa ree suldad la Augusto. <sup>2</sup> Abi' Cesarea badxu'n loj tijb xbarcw ree bén Adramitio, barcw ni ma grii chen guiedx riga' ree niz Asia. Në Aristarco bunë'n, bén Tesalónica, guiedx riga' niz Macedonia. <sup>3</sup> Chi bareguiaal, badxinan Sidón, lod goc Julio xinza'c da't con Pab, cwëjbix bitixloj ree xmiw Pab luguiedx guin abi' badëed reeman ni ryaadxaman. <sup>4</sup> Chi badxoon Sidón badi-aawan Chipre yuj riga' loj nijsdoo, basa'nanan dux ladruvejsan chitëë yachaaglojn zro' bi, din niz du lojn rliaj bi guin. <sup>5</sup> Badüüdan loj nijsdoo gajxh Cilicia në Panfilia abi' badxinan Mira, tijb guiedx nulen Licia.

<sup>6</sup> Ni bidxaagloj suldad rniabee guin tijb barcw Alejandría ni che Italia, zianz nax yadxu'n lojn. <sup>7</sup> Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo. <sup>8</sup> Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

<sup>9</sup> Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab, <sup>10</sup> rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

<sup>11</sup> Per suldad rniabee guin mazri beencwentix bén rusa barcw guin në bén naj xbarcw laan, guial loj ni rëb Pab. <sup>12</sup> Abi' guial ad zagdxet tët naj yagaj par yadüüdan tiamp nayaag, dxel mazri zien reeman been xgab zagdxeli naj yariin yagaj, yaguieenan naguiejn yadxinan Fenice, tijb guiedx nulen Creta lod ad rbi' tët bi, ni yadüüdan tiamp nayaag.

*Gubi' tijb bidoxh loj nijsdoo*

<sup>13</sup> Dxel guzuloj cabi' tijb bi chaawladx ni zëed lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëd ro' yuj Creta. <sup>14</sup> Per ad wayajct xchej zio'n chi birii tijb bidoxh la Euroclidón loj nijs guin. <sup>15</sup> Abi' guzuloj bi guin culadxaan barcw guin. Në guial niz du lojn zëed bi guin dxel ad gojctri nusnuu barcw guin niejn niz lod rayal niejn, abi' baslaa reeman binë barcw guin dunujn niz lod cucadxaa bi guin laan. <sup>16</sup> Dxel badüüdan xijch tijb yuj-dobëz la Clauda riga'n loj nijs, lod ad rbi'tri bidoxh guin, abi'

canu naxii xan barcw guin con guidib tarbajw balë'panan loj barcw guin. <sup>17</sup> Dxel chi gulox balë'pan canu guin loj barcw guin, batiejl reeman duu lad barcw guin chitëë yaze'nan. Abi' guial rdxeb reeman chëëztiej barcw guin lën üx la Sirte, dxel gulet reeman xlon ree barcw guin din cwentzi chinë barcw guin dunujn niz lod rucadxaa bi guin laan. <sup>18</sup> Chi bareguiaal, ziangajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin. <sup>19</sup> Ni bayon dxej, cwa' reeman gra ree ni rüjnnë barcw guin dxiin bazaal reeman loj nijs guin. <sup>20</sup> Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad nagueientri du luxdoon yalaan loj nijs guin.

<sup>21</sup> Abi' guial ma gojc zien dxej ni achetczi wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tëët nasëëb ree. <sup>22</sup> Per achet güünan, ad rdxebidi din ni'qui tijbidi ad zëjtt, tijbzi barcw guin yaze'n. <sup>23</sup> Din Dios rniabee naj, bën cayünan sirv guxhaal tijb xi anjlaman balüüloj lon yan guiaal. <sup>24</sup> Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree bën zëed loj barcw guie ad zuslaat Dios guiët reeman.” <sup>25</sup> Zeel yan dad, gol badxe' luxdoodi zagdxe, din naj rliladxan Dios, ragbee tëen zagdxe guial gac zi'c na anjl guin lon. <sup>26</sup> Per gag barcw guie niz ro' tijb yuj riga' loj nijsdoo.

<sup>27</sup> Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie zë barcw guin loj nijs guin por bi guin. Abi' ree bën nulen barcw guin, guxhinzii zi'ct garol guiaal gogbee reeman guial zamer yadxinan loj yuj. <sup>28</sup> Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx mejtr naxhit. <sup>29</sup> Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guuib loj nijs guin din chile' sudxe barcw guin, abi' ma rën nejzdoo reeman yareguiaal. <sup>30</sup> Bén nulen ree barcw guin, been reeman bën sta cuzaal ree ganch guuib guin loj nijs guin niz loj barcw guin, naabzi par calet reeman canu chu' reeman par guxüün reeman. <sup>31</sup> Per bagojn Pab suldad rniabee con ree xsuldadix, rëbaman loj reex:

—Bal id ree bën guin yaya'n loj barcw guie, ad zalaatriddi.

<sup>32</sup> Dxel batüüg ree suldad guin ni naxii canu guin persi zinë nijs canu guin. <sup>33</sup> Chi ma cayni luyuj, rëb Pab loj reeman din gaw reeman, rëbaman loj reeman:

—Ma gojc chiin gubijdx ni ad raayëjstidi achet tëet wayaw-idi. <sup>34</sup> Naj rni lëjt, gol gudaw din guibandi, din gradi ni'qui tijb guidxguijquidi ad zusëëbtidi.

<sup>35</sup> Chi rëb Pab zian, cwa'man tijb guiadxtil, abi' badëëman quixtëe loj Dios niz loj gra reeman, dxel gula'man guiadxtil guin guzuloj cayawaman. <sup>36</sup> Dxel bayu luxdoo gra reeman, guzuloj nëgajc laa reeman cayaw. <sup>37</sup> Tio'pgayuu gayojnchi-ibixho'p nayajc dugran zio'pan loj barcw guin. <sup>38</sup> Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

### *Bize'n barcw loj nijsdoo*

<sup>39</sup> Chi bareguiaal, bën nulen ree barcw guin, ad bayünbeet reeman yuj badxin reeman. Per baguiaa reeman tibda'n nijsdoo guin riga' üx gadëed ro'n, abi' been reeman xgab badxig reeman barcw guin yagaj. <sup>40</sup> Dxel batüüg reeman ni naxiinë ree ganch guiib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiëc reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin. <sup>41</sup> Per wëëztiejn loj üx zien lod bigagan. Niz guiican wëëz lën üx abi' ni'quid rniibtan, guiáad niz xan guin guzuloj cayze'nan con gojl rliaj nijs guin ladan. <sup>42</sup> Dxel nuyën ree suldad guin nugüjt reex bën prejs guin ree, chitëe nixoobnijs reeman abi' nuxüün reeman. <sup>43</sup> Per suldad rniabee guin ad cwëjbtix niajc zian guial ad rëntix niëjt Pab, dxel gunabeex guial bën rajc rxoobnijs ree, yaløj laa reeman chu' loj nijs guin güün reeman naguiejn yarii reeman ro' nijs guin. <sup>44</sup> Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

## 28

### *Bidxin Pab Malta*

<sup>1</sup> Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs. <sup>2</sup> Bén naj ree bën ni, dád benza'c gojc reeman con dunujn. Been reeman tijb bajl guial nayaag nëtëe guial cayal guia, abi' na reeman du lojn din yubiigan cwë' bajl guin. <sup>3</sup> Dxel bato'p Pab ta'n yagbidx, zianz chi cudxe'man laan loj bajl guin briyaal tijb bëel lën yag guin por xi xliaa bajl guin, abi' gudawya'b yaa Pab nalbëztib yaaman. <sup>4</sup> Chi baguiaa ree bën Malta guin nalbëz bëel guin yaa Pab, dxel rëb loj lasa' reeman:

—Xin guie bejn bagüjtix, zeel majsi gulaax loj nijsdoo, per guiëtczix por ni beenx.

<sup>5</sup> Per gudxijp yaa Pab abi' biajb bëel guin loj bajl guin, guiáad laaman achet gocaman. <sup>6</sup> Gra reeman cabëz saaguij yaaman, o dxejlczi yabaman guiëtaman. Per chi gojc xchej, chi baguiaa reeman achet gocaman, bachaa xixgab reeman abi' guzuloj rëb reeman guial tijb dios najman.

<sup>7</sup> Gajxh lod badxu'n naga' ree xguidxliuj tijb bën zobjbloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tõe gojcaman con dunujn. <sup>8</sup> Nadxel naga' xdadaman, ragxuuman, yu'man xliaa rajc tõe'man yoobrejn. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guiycaman abi' bayajcaman. <sup>9</sup> Chi gogbee ree bënragxuu zobj ni ni goc, bi't reeman lod za' Pab persi bayüjnman laa reeman. <sup>10</sup> Dxel dád zien ni bazaladx reeman du lojn por zian. Abi' chi badxu'n loj barcw par yadxoon yagaj, bane reeman gra ni rayaadxan lunejz.

### *Bidxin Pab Rom*

<sup>11</sup> Choon bëew badxu'n loj yuj zii, dxelri badxu'n loj tijb barcw Alejandría, ni bitëd ni tiamp nayaag. Niz lucwaj barcw guin ca tio'p ree dxan bën la ree Cástor në Pólux. <sup>12</sup> Dxel badxinan tijb guiedx la Siracusa, yagaj badxu'n choon dxej. <sup>13</sup> Abi' yagaj badxoon bio'n gadëd ro' nijsdoo xt badxinan guiedx la Regio. Chi bareguiaal, chi badxoon yagaj, brii tijb bi lad sur dxel ni barojp dxej badxinan luguiedx la Puteoli. <sup>14</sup> Yagaj badxaagan tio'p choon ree bën naj ree bën ni në reeman rliadx Jesucrist, dxel na reeman du lojn yaya'nnë'n laa reeman abi' baya'nnë'n laa reeman toxman. Zian gojc, dxelri zio'n Rom. <sup>15</sup> Guiáad ree dux compniaran bën rliadx ree Jesucrist, bën zobj ree Rom, ma ragbee reeman guial yadxinan yagaj. Dxel brii reeman bidgachaagloj reeman dunujn xt lod la Foro de Apio në luguiedx la Tres Tabernas. Chi baguiaa Pab laa reeman, babaaman abi' badëeman quix-tëe loj Dios. <sup>16</sup> Chi badxinan Rom, dxel bayü suldad rniabee guin bën prejs guin ree loj tijb ree suldad rniabee ni. Per cwëjb reeman gurej Pab stijb yu ren lod gojp tijb suldad laaman.

### *Gunee Pab xtiidx Jesucrist Rom*

<sup>17</sup> Chi goc choon dxej badxinan Rom, gurejdx Pab bën Israel zobjbloj ree ni. Chi badxajg lasa' reeman, dxel rëbaman loj reeman:

—Compniar Israel, achet wayünan contr ree bën Israel ni'qui contr xcostumbr ree dux béngulal ree. Guiáad laa reeman gunaaz reeman naj Jerusalén, bayü reeman naj loj ree guxtis Rom. <sup>18</sup> Abi' ree bën Rom guin chi gulox badëdan cwent loj reeman, dxel nuyën reeman nuslaa reeman naj, guial gogbee reeman achet benan par guiëtan. <sup>19</sup> Per ree bën Israel

guin badxoon reeman abi' zagdxeli gunaaban gadëedan loj rey César, per ad guial ra'ptan xhienin contr ree bën Israel. <sup>20</sup> Zeel guredxan lëjt, din guidganajdi naj din ganin lojdi guial por ni rliladxan guial yaban ree bengüt zi'cgajc rliladx gra ree du lasa' bën Israel ree, zeel naxiin con ree caden guie.

<sup>21</sup> Dxel rëb reeman lojman:

—Dunujn ni'qui tijb xtiidx ree bën Judea ad waca'tan lod na reeman xcwentil, në ni'qui tijb bën duladx ree bën raza ree Judea achet wana reeman du lojn contr lüj. <sup>22</sup> Per rayënan yaguiejnan xhienaag naj xixgabil, din dunujn rayagbee guial gra ladczi rniece reeman contr religion cüb guin.

<sup>23</sup> Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zobj Pab. Abi' diizd rsil xt wadx guneenëman laa reeman xhienaag naj xguialrniabee Dios. Beenman naguiejn chililadx reeman Jesús, baza't tëëman lod rniece xcwent Jesús loj xlibr ley Moisejs në ni bacaa ree bën badëë xtiidx Dios loj ree bejn. <sup>24</sup> Yu' reeman bililadx ni rëb Pab, per yu' reeman ad bililadxt. <sup>25</sup> Abi' guial ad rdxaagt gü reeman diidx, guzuloj bare'ch reeman. Dxel rëb Pab loj reeman:

—Waliqui ni rëb Isaías bën badëëd xtiidx Dios loj ree dux béngulal ree guial rëb xSprijt Dios:

<sup>26</sup> Wej, güjdx loj ree bën guin:

Majsi rigujejn reeman, per achetczi chignia' reeman, abi' majsi ruguiaa reeman, per rulüü ad ruguiaat reeman.

<sup>27</sup> Din been luxdoo reeman gojl,

abi' rüjn reeman zi'c rulüü ad ruguiaat reeman,  
ad rigujejn tëët reeman, chitëë guguiaa reeman,  
abi' guien reeman chignia' tëë reeman.

Din ad rënt reeman gui't reeman con naj,  
abi' günan laa reeman perdon.

<sup>28</sup> Zeel gol gogbee guial diizd yan, loj ree bën ad najt bën Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

<sup>29</sup> Chi gulox rëb Pab zian, dxel zia ree bën Israel guin, cadildiidxnë lasa' reeman.

<sup>30</sup> Tio'p ijz gurej Pab ni, yu lod gudixaman. Ni rniseenëman gra ree bën rtixloj laaman. <sup>31</sup> Sin guialrdxeb rëbaman loj reeman xhienaag naj xguialrniabee Dios, abi' guneeman xtiidx Dad Jesucrist loj reeman sin guial chu nudxoon.



## Gui'ch ni guxhaal San Pabl loj ree b n Rom rliladx Jesucrist

### *Rxhiaal San Pabl xtiidx Dios*

<sup>1</sup> Naj Pab, cay nan sirv loj Jesucrist, Dios gule naj din gacan xi ap stol Jesucrist, din gatiechan xtiidxza'caman.

<sup>2</sup> Diizd gocli mal r b Dios diidxza'c guin ree, ni z ed loj xtiidxaman zi'c bacaa ree b n bad e xtiidx Dios loj ree bejn, <sup>3</sup> diidx guin ree ruza't, dux Dad ree Jesucrist guial zi'c bi'taman loj guidxliuj zi'c b nguidxliuj, loj xdiaa rey Davi zaman. <sup>4</sup> Per por xSprijt Dios laaman naj Xi'n Dios guial babanman loj ree beng t, abi' guidiblagaa rajpaman guial-rniabee. <sup>5</sup> Abi' par yaza't reeman, zeel bacaabeeman naj din gacan ap stol din guidiblagaa guidxliuj chu' b n chililadx laaman, b n guzoob t e xtiidxaman. <sup>6</sup> Abi' n  l jt ma nayab loj ree b n gule Dios din gaquidi xbejn Jesucrist.

<sup>7</sup> Zeel caxhalan gui'ch guie lojdi b n r n ree Dios, b n zobj ree Rom, l jt ma gulej Dios din gaquidi xbejnman. Dux Dad ree Dios n  Dad Jesucrist g nle' l jt yabe'cdxe t e reeman luxdoodi.

### *R n Pab cheman Rom*

<sup>8</sup> Yalojxgaj por Jesucrist rud n quixt e loj Dios por gradi, guial guidibczi ruza't reeman l jt xhienaag rliladxidi Jesucrist. <sup>9</sup> Abi' zi'c cay nan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucw e t rbedx rniaaban laaman por l jt. <sup>10</sup> Ad rucw e z t et rbedx rniaaban Dios din guneeman mod guidganan l jt, zi'c naj da xgaban diizd gocli. <sup>11</sup> Din yu'czan gan guidganan l jt din g nan l jt yudar con xtiidx Dios din sudxi'chidi lojn. <sup>12</sup> Din g n t edi naj yudar zian yaguieen du lasa' ree yudar loj guialrliladx ni raya'p ree, din chile' yalu' du luxdoo du lasa' ree.

<sup>13</sup> Compniar raliduladx ree Jesucrist, r nan gagbeedi guial zien volti da't ma benan xgab guidganan l jt, din gacxhiey ree b n chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidganan l jt. <sup>14</sup> Par naj naladxan da cwentan naj guial gul n chut ez benan xtiidx Dios, bal najman b n ciuda o najman b n guiedxdoo ya, bal rignia'man o ad rignia'taman. <sup>15</sup> Zeel r nnejzdoon guidganan l jt din gatiechan xtiidx Dios Rom.

### *Xguialrniabee xtiidxza'c Dios*

<sup>16</sup> Ad ratunë'tan xtiidxza'c Jesucrist. Din por diidxza'c guin ree zëed xgualrniabee Dios, din gra ree bèn chililadx laan laa reeman loj dol, zi'c ree bèn Israel zi'c ree bèn ad najt bèn Israel. <sup>17</sup> Din por xtiidxza'c Jesucrist ragbee ree bejn guial por guialrliladx reeman laaman ma naj reeman cwent sin dol: achet por stijb ni ren tijbzi por guialrliladx. Zian ca loj xtiidx Dios lod rëb: "Bèn naban zi'c rën Dios, guidib tiamp ni nabanman rliladxaman laaman."

### *Dol ni rajp bejn*

<sup>18</sup> Dunuj ree rayagbee guial diizd xanyabaa zëed xcastiro' Dios par ree bèn ad ridxga't laaman, bèn ad rüjnt ree zi'c rayal, abi' zi'c naban reeman ruquie'ch reeman xtiidxli Dios. <sup>19</sup> Din ragbee chaaw reeman guial yu' Dios, abi' laagajc aman balüü bejn ree guial yu'c aman. <sup>20</sup> Majsi ad ruguiaat bejn Dios, per diizd chi go'tchaaw guidxliuj raguiaa ree ni beenman, abi' por ni ma beenman rayagbee ree guial ad yu't dxej lox xgualrniabeeman abi' laa tēēman naj Dios. Zeel ad zajct xhie gudxiib bejn guijc guial achet ragbeeman xcwent Dios. <sup>21</sup> Din majsi yu' ree bejn ragbee guial yu' Dios, per ad rajpt reeman laaman respejt zi'c rayal, ad rudëe tēēt reeman quixtëe lojman, aal xgab ren ree rüjn reeman ni ad rüjnt sirv abi' gaz ragdx reeman. <sup>22</sup> Rëb reeman guial rajc da't reeman abi' mazri na tont reeman. <sup>23</sup> Din luar guiën reeman Dios ni ad yu't dxej guiët, rën reeman ni nit ree yu' dxej, rën reeman ni naj ree zi'c bejn, ni naj ree zi'c biguijn, zi'c ree be yu' tajp guia' në ree bëel.

<sup>24</sup> Zeel ma gulëeladx Dios laa reeman loj xixgab mal reeman, abi' rüjn reeman ni natu ree con ree ben ren. <sup>25</sup> Luar chinal reeman xdiidxli Dios, zinal reeman ni rusquiee ree. Abi' rën reeman rajp tēē reeman respejt ni been Dios, luar guiën reeman laaman guial beenman laa reen, abi' laaman rayal gap ree bejn respejt zianczi. Amén.

<sup>26</sup> Zeel gulëeladx Dios laa reeman loj ree ni dxuudx rüjn reeman. Abi' zien ree béngunaa ad nabantri ree xnejz, rën lasa' béngunaa gajc reeman. <sup>27</sup> Ziangajc zien ree xinguaaaw ad nabantri xnejz, rën gajc lasa' xinguaaaw reex, xinguaaaw con xinguaaaw rüjn reex ni dxuudx, ni natu. Abi' laagajc reex rguuil xcasti reex.

<sup>28</sup> Abi' guial ad ridxga't reeman Dios, zeel gulëeladx Dios laa reeman loj xixgab mal reeman, din güün reeman ganax ni ad rayalt güün reeman. <sup>29</sup> Ganax ni ad rayalt güün reeman rüjn reeman, za'në reeman xinguaaaw ren o béngunaa ren, zien ree ni mal rüjn reeman, rzëëbladx reeman gap reeman ni rajp ree ben ren. Dád nadëdloj reeman, rugüjt reeman bejn, rguuil reeman wadijl, rusquiee reeman bejn, ganaxczi

ni mal yu'guijc reeman abi' rbëë reeman xtiidxguijdx bejn. <sup>30</sup> Rnieeguijdx tëë reeman bejn, ralen reeman Dios, ad rajpt reeman bejn respejt, rlies xvalor gajc reeman, rüjn reeman benro'. Abi' rbëëguijc reeman ni mal ree, ad ruzoob tëët xtiidx xdad xniaa reeman. <sup>31</sup> Dád nad reeman, ad rüjnt cumplid xtiidx reeman, ad rënt lasa' reeman, ad raya tëët lasa' reeman. <sup>32</sup> Ragbeechaaw reeman rëb Dios guial chi guiët ree bejn, dxel gra ree bèn rüjn gra ree ni guin yayal casti. Per majsi zian, rusnuu gajc rüjn reeman ni mal guin ree abi' xt rabaa reeman chi rüjn ree ben ren zian.

## 2

### *Xguialguxtis Dios*

<sup>1</sup> Zeel chutëëz lüj guial rëbil xhie casti rayal bejn, ad rajptil derejch guiëbil zian, din lüj gajc rayal casti guin guial cayüjnl zi'cgajc rüjn reeman. <sup>2</sup> Per dunuj ree rayagbee guial Dios rüjn guialguxtis zi'c rayal, chi rudëëdaman casti bèn rüjn ree ni mal guin. <sup>3</sup> Abi' lüj guial rëbil xhie casti rayal bejn abi' nëgajquiza lüj rüjn zi'c rüjn reeman, ad naladxil laal loj xcasti Dios. <sup>4</sup> Ad rëntil guialnaza'c Dios con lüj, ad rëntil guial rdaanman lüj rajp tëëman lüj pacens, ni'quid ragbeetil guial pacens guin rüjn lüj yudar din gapil tiamp par yayüjnl xgab por xtolil. <sup>5</sup> Per guial dád nadil, ad rëntil yayejquil loj Dios, zeel lüj gajc cayüjnxhie j xtolil par dxej ni gudëëd Dios casti, dxej ni güünman guialguxtis zi'c rayal. <sup>6</sup> Par gudëëman ni rayal tijbgaj bejn bal gonin beenman. <sup>7</sup> Gudëëdaman guialnaban tiblayaa loj ree bèn ad radxagt rüjn naguiejn guiban zagdxe guial rüjn reeman naguiejn yayal reeman guialnaza'c yu' xanyabaa, rüjn tëë reeman naguiejn yaya'n reeman zagdxe loj Dios din gap reeman cuerp ni ad yu't dxej nit. <sup>8</sup> Per ree bèn ad ruzoobt diidx, rdxe'ch Dios laa reeman abi' gudëëdaman laa reeman casti, din luar chinal reeman xtiidxliman, zinal reeman nejz mal. <sup>9</sup> Gra ree bèn zinal nejz mal, naya sac reeman sagdiaj reeman, yaloj ree bèn Israel dxel bèn ad najt ree bèn Israel. <sup>10</sup> Guiáad ree bèn zë loj nejz zagdxe, guilies Dios xvalor reeman, yabaanëman laa reeman, yabe'cdxe tëëman luxdoo reeman, yaloj xgaj ree bèn Israel dxelri bèn ad najt ree bèn Israel.

<sup>11</sup> Din Dios tiblojzi rüjnman guialguxtis con gra bejn. <sup>12</sup> Gra ree bèn cayüjn dol sin guial ad nünbeet reeman ley badëëd Dios loj Moisejs, tëd reeman casti sin ley guin. Guiáad ree bèn cayüjn dol majsi ragbee reeman ley guin, laa reeman tëd casti zi'c rniabee ley guin. <sup>13</sup> Din ad guial guientzi bejn ley guin ma nayaman loj Dios, bèn rüjn ree zi'c rniabee ley guin laa reeman naj bèn naya loj Dios. <sup>14</sup> Per chi ad najt bejn bèn

Israel, abi' cayünman ni zagdxé sin guial güünbeeman ley guin, dxel ma cayünman zi'c rniabee ley guin majsi ad nünbeetaman laan, gualzi nünbeeman conin naj ni zagdxé con tēē nin naj ni mal, abi' guijc gajc reeman zēēd xley reeman. <sup>15</sup> Din zi'c naban reeman, rguien guial guijc reeman zēēd conin rayal güün reeman con tēē nin ad rayalt güün reeman luar gap reeman ley guin. Abi' laagajc reeman ragbee chi ma been reeman ni zagdxé o chi ma been reeman ni mal. <sup>16</sup> Zian gac chi güün Dios gualguxtis por gra ree ni naguie'ch ni rüjn bénguidxliuj. Abi' zi'c culün bejn ree guidibczi, laaman güün gualguxtis por Jesucrist.

### *Bén Israel ree nē xley Moisejs*

<sup>17</sup> Yan, lüj guial najl bën Israel yu'guijquül guial rajquül ley badēē Dios loj Moisejs, abi' rüjnl nabē guial najl xbejn Dios, <sup>18</sup> rēbil guial ragbeel xhienaag rēn Dios guibanl, abi' por xleyaman ragbeel conin naj zagdxé güünl. <sup>19</sup> Abi' naladxil zile' guzuxnejzil bën ad nünbeet ree ley guin nē ree bën ad nünbeet xnejz Dios, <sup>20</sup> naladxil zile' gulüül bën ad rajct ree nē ree bën rajc ta'nzi, guial por ley guin ragbeel gra, ragbee tēēl conin naj diidxli. <sup>21</sup> Per zi'c nabanl, ¿chexc zeel ad rulüüt lüj gajc luar gulüül ben ren? Din lüj rēb guial ad laat cwan bejn, abi', ¿chexquiza zeel rbanl? <sup>22</sup> Rēbil guial ad laat sunē bejn bën ad najt lacheelaman, abi' lüj, ¿chexquiza zeel rüjnl zian? Rēb tēēl guial rdxe'chil ni naladx bejn naj dios, abi', ¿chexquiza zeel rbanl lēn yadoo lod yu' ree Dios guin? <sup>23</sup> Dád nabē rüjnl guial nünbeel ley, per rusa'nxtul Dios guial ad rüjntil ni rniabee ley guin. <sup>24</sup> Ze'cli rēb loj xtiidx Dios: “Bën ad najt ree bën Israel rniee reeman Dios diidxguijdx por lējt.”

<sup>25</sup> Diidxli rüjnqui sirv guial ru xcuerp bejn sen ni ru ree bën Israel, bal rüjnman zi'c rniabee xley Dios. Per bal id rüjnman zi'c rniabee ley guin, achet sirvan guial yu'man sen guin. <sup>26</sup> Per bal tijb bën ad yu't sen guin nabanman zi'cgajc tijb bën rajc xley Dios majsi ad nünbeetaman laan, dxel ma nayabaman zi'c tijb bën yu' sen, majsi ad yu'taman sen guin. <sup>27</sup> Bën rüjn zi'c naj xley Dios, majsi ad nünbeetaman ley ad yu' tēētaman sen, gusa'nxtu'man lüj guial nünbeel ley guin yu' tēēl sen guin, abi' ad rüjntil zi'c rniabee ley guin. <sup>28</sup> Din ad guial rajlt bejn loj nacion Israel, ad guial yu' tēētaman sen ni ru ree bën Israel ma najman bën Israel loj Dios, <sup>29</sup> bën wali naj bën Israel loj Dios, guidib luxdooman zinalaman xnejz Dios, ad por guial yu'taman sen ru ree bën Israel, ad por xcostumbr tēēt reeman, por guial naban reeman con xSprijt Dios. Abi' bën naban zian, Dios rlies xvaloraman sa'n ad bénguidxliujt.

## 3

<sup>1</sup> Zeel zanadi lon xhieczi gan naj bejn bén Israel o xhieczi gan chu'man sen ru ree bén Israel. <sup>2</sup> Per naj gani lojdi guial gadxagayaa mod lasajc guial naj bejn bén Israel, din yalojxgaj loj ree bén Israel badëéd Dios xtiidxaman. <sup>3</sup> Yan ad naladxidi por guial yu' ree bén ad zinalt xnejz Dios, ad züntraman cumplid ni rëbaman din xo güün Dios ni rëbaman güünman con ree bén zinal xnejzaman. <sup>4</sup> Din laaman ad yu't dxej guchara xtiidxaman, majsi gra bénguidxliuj naj bén rusquiee, per Dios ad nëtaman rusquiee, zi'c rëb tiblajt loj xtiidxaman lod rëb: Gra bejn güünbee lüj guial rüjn cumplid xtiidxil, abi' achet zajc gudxiib reeman guijquil.

<sup>5</sup> (Per yu' bejn rüjn xgab) guial bal por dol ni cayguieen ree rulüü guial benza'c naj Dios, ¿chexquiza zeel najman benmal rudëëdaman bejn casti? <sup>6</sup> Per naj rni lojdi guial ad najt Dios benmal, din bal najman benmal xoza güün xguialguxtisaman con bénguidxliuj.

<sup>7</sup> Din bal yagui'e'ch ree guial ad rucaagdiajgt xtiidx Dios, laan naj ni rüjn yudar xtiidxli Dios din gap bejn laaman mazri respejt, dxel ad zajctri guiëb Dios naj bejn béndol. <sup>8</sup> Abi' mazri ma yaguiéen ree ni mal din gui't ni zagdxé, zi'c rëb ree bejn culün bejn ree, per Dios gudëéd casti bén rëb ree zian.

*Graczi bejn ma been dol*

<sup>9</sup> Zeel zi'c ma rnin por ree bén Israel, në por ree bén ad najt bén Israel, abi' ma ragbeedi guial ad zajct guiëbidi guial mazri benza'c naj ree bén Israel guial loj ree bén ad najt bén Israel, din tiblojzi nayajc ree béndol. <sup>10</sup> Zi'c ca tiblajt loj xtiidx Dios lod rëb:

Achutczí naj benza'c,  
per ni'qui tijn bejn.

<sup>11</sup> Achutczí rignia'.

Achutczí raguüil Dios.

<sup>12</sup> Gra reeman ma basa'n xnejz Dios.

Gra reeman ma zinal nejz mal.

Achutczí cayüjn ni zagdxé,

per ni'czi tijn bejn.

<sup>13</sup> Zi'cgajczi tijn baa ni zojbyal,  
zian ganax ni dxuudx ririi ro' reeman.

Ganax diidx rusquiee rniee reeman.

Abi' xtiidx reeman naj zi'c xvenen bëël.

<sup>14</sup> Ganax diidx mal ririi ro' reeman,  
diidxguijdx ni rüjnnaa lasa' reeman.

<sup>15</sup> Za'sin reeman din gugüjt reeman bejn.

<sup>16</sup> Bantëöz guin zë reeman, rüjn reeman ni dxuudx ree.

Abi' rusagzi reeman bejn ree.

17 Ad nünbee tēēt reeman xhienaag naj guialrbajn bejn zagdxe.

18 Ad yu'guijct reeman guial rayal guidxeb reeman Dios.

19 Dunuj ree rayagbee guial gra ni zēēd loj xley Dios, naj par ree bén zinal ley guin, chitēē chu guiēb guial achut ragbee xhienin naj dol, laan naj par gagbee bejn guial najman bēndol loj Dios. 20 Din ad guial güünt bejn gra ni rniabee ley guin ma nayaman loj Dios, ley guin rulüü din gagbee bejn guial najman bēndol.

*Por guialrliladx ma naya bejn loj Dios*

21 Per yan Dios ma balüü dunuj ree tijb nejz guial xhienaag yayajc ree naya lojman. Ad guial yaguieentzi ree zi'c rniabee ley guin, por ley guin nē por ni bacaa ree bén badēē xtiidx Dios loj ree bejn. 22 Rayagbee ree guial rüjn Dios bejn cwent zi'c bén ad yu't xtol por guialrliladxaman Jesucrist, din par Dios tiblojzi naj bejn. 23 Din gra bejn ma been dol, achutczi naya niz loj Dios. 24 Per guial najman benza'c, ma beenman perdon dux tol ree sin guial yadijx ree, ma nayajc ree perdon por Jesucrist, bén gudix por dux tol ree chi gütaman loj crüzj. 25 Dios guxhaal Jesucrist, din por xrejnman chu' perdon par bēnguidxliuj. Abi' perdon guin naj par ree bén rliladx Jesucrist. Zian rguien guial graczi rüjn Dios xnejz, abi' bal guia'xchej ad beent xguialguxtisaman por dol ni been ree bejn, laan naj por pacens ni rajpaman con bejn, 26 guial ma ragbeeman goc güün xguialguxtisaman. Zian rusnuu rulüüman guial graczi rüjnman xnejz, zeel rüjnman perdon xtol ree bén rliladx Jesucrist.

27 Yan, ¿xhienaag yaguieen ree nabē? Achet yaguieennē' ree nabē, din ad guial yaguieent ree ley guin cumplid ma nayajc ree perdon, yayajc ree perdon por guial yaliduladx ree Jesucrist. 28 Zeel rayagbee chaaw ree guial Dios rüjn perdon xtol ree bejn guial rliladx reeman Jesucrist, ad guial rüjnt bejn nagueijn güünman gra ni rniabee ley guin.

29 ¿Wen xDiosi ree bén Israel naj Dios ya, ad nēt ree bén ad najt bén Israel naj xDios laaman ya? Naj rni lojdi guial Dios naj par gra bejn, 30 din tijbzi Dios yu', laaman rüjn perdon xtol ree bén rliladx Jesucrist, yu'man o ad yu'taman sen ni rniabee ley chu' ree bén Israel. 31 Ad naladxidi cayguieen ree ley guin tiblad guial raliduladx ree Jesucrist, din ad ziantan, guial raliduladx ree laaman rguien guial nadxu'guijc ree ley guin.

<sup>1</sup> Yan, ¿xhie zajc yaguie'ch ree xcwent dux béngulal ree Abraham? <sup>2</sup> Bal niyab Abraham zi'c tijb bén gad güün dol por ree ni beenman, guyu mod nünman nabë loj ree bejn, per ad lojt Dios. <sup>3</sup> Din rëb loj xtiidx Dios: “Guial bililadx Abraham Dios, zeel been Dios laaman cwent zi'c tijb bén ad beent dol.” <sup>4</sup> Chi rün bejn dxiin, milia ni rajxaman ad ni razaladxt reeman, rtia'man laan por dxiin ni rünman. <sup>5</sup> Per guial gac bejn perdon loj Dios, ad zajct guiëb bejn guial rayalaman perdon guin por ni beenman, din achut naya loj Dios. Perdon guin zëëdan guial rliladx bejn Jesucrist, zeel rün Dios bejn cwent zi'c bén ad yu't xtol. <sup>6</sup> Zi'c gunee rey Davi guial xiquilbaa ree bén been Dios cwent sin dol sin guial güün reeman xhienin par yayal reeman perdon guin. <sup>7</sup> Rëbaman: Xiquilbaa ree bén been Dios perdon xtol, bén ma badxi'caman xtol.

<sup>8</sup> Xiquilbaa ree bén ma been Dios cwent sin dol.

<sup>9</sup> Ad gunee Davi diidx guie ree naabzi par bén yu' ree sen ni ru ree bén Israel, gunee man diidx guin ree par gra ree bejn. Din zi'c ma raguie'ch ree, Dios been Abraham cwent zi'c bén ad yu't xtol guial bililadxaman laaman. <sup>10</sup> Abi' chi biyabaman zi'c bén ad yu't xtol, ni'qui gadaman chu' sen ni ru ree bén Israel, chi gad Abraham chu' sen guin mal nün Dios laaman cwent zi'c bén ad yu't xtol. <sup>11</sup> Chi biabaman zi'c bén ad yu't xtol, dxel guyuman sen guin din sen guin naj guial ma nün Dios laaman cwent zi'c bén ad yu't xtol guial bililadxaman laaman. Zeel naj Abraham dad par ree bén rliladx Dios, majsi ad yu't reeman sen ni ru ree bén Israel, per por guialrliladx guin nün Dios laa reeman cwent zi'c bén ad yu't xtol. <sup>12</sup> Naj tëë Abraham dad par ree bén majsi yu' sen guin per rliladx reeman zi'c bililadx Abraham Dios diidx chi gadaman chu' sen guin.

### *Promejs ni been Dios loj Abraham*

<sup>13</sup> Chi been Dios promejs loj Abraham në loj ree xdiaaman, guial gudëëdaman guidib guidxliuj loj reeman zi'c tijb ni bayal reeman, ad beent Dios promejs guin loj Abraham guial beenman zi'c rniabee ley, beenman promejs guin guial bililadxaman laaman, zeel beenman laaman cwent zi'c tijb bén ad yu't xtol. <sup>14</sup> Yan bal ganaxzi ree bén zinal ley guin tia' ni gudëë Dios, achet cwent naj guialrliladx ree bejn laaman, ache tëët cwent naj promejs ni been Dios loj Abraham. <sup>15</sup> Din ley guin najn par castizi, per lod ad yu't ley, ad yu't mod chu guiëb guial ad cayüjnt bejn ley guin cumplid.

<sup>16</sup> Zeel chi been Dios promejs loj Abraham guial gudëëdaman ni rëbaman par gra ree xdiaaman, beenman promejs guin lojman guial bililadx Abraham guin laaman,

din guiguien guial najman benza'c abi' ad parzi ree b n zinalt ley guin naj promejs guin, n gajc par ree b n rliladx Dios zi'c bililadx Abraham majsi ad rajpt reeman ley guin. Zeel naj Abraham dad par dugra ree. <sup>17</sup> Zi'c ca loj xtiidx Dios lod r baman loj Abraham: "L j gac dad par zien ree b nguidxliuj." Zian naj promejs ni been Dios loj Abraham, Dios b n rusban ree beng t abi' rnieeman xcwent ree ni gad chu' loj guidxliuj guie zi'c rul   ma yu' reen.

<sup>18</sup> Majsi ragbeechaaw Abraham guial ad zajctaman famil, per chi r b Dios lojman zian, bililadxaman ni r b Dios, bililadxaman guial gac gra ni r baman lojman. Zianan zeel najman dad par gra ree b n rliladx Dios zi'cgajc laaman. Zi'c r b Dios lojman, chi r baman: "Zian gaquil famil, d d famil narooob gaquil." <sup>19</sup> Cost tibgayuu ijz ma yu' Abraham nadxel, ragbeeman guial ma naj reeman bengol n  xb ngunaaman Sara guial chu' xi'n reeman, per ad guyunaw  gtaman, bililadxaman ni r b Dios lojman. <sup>20</sup> Ad yu't dxej ad bililadxtaman ni r b Dios. Diidxli bililadxaman laaman abi' rud eman quixt e lojman, <sup>21</sup> din guidiblagaa bililadxaman guial rajp Dios guialrniabee g nman zi'c ma r baman. <sup>22</sup> Zeel been Dios cwent Abraham zi'c tijb b n ad yu't xtol.

<sup>23</sup> Abi' lod r b guial been Dios laaman cwent zi'c b n ad yu't xtol guial bililadxaman laaman, ad tijbtzi Abraham ruza't yagaj, <sup>24</sup> n gajc dunuj ree din ma raliduladx ree Dios. Abi' n  dunuj ree ma n jnman cwent zi'c b n ad yu't xtol, Dios b n basban Dad Jesucrist loj guialg jt, <sup>25</sup> Dad Jesucrist b n g t por dux tol ree, dxel babanman abi' por laaman ma naya ree loj Dios.

## 5

### *Chi ma naya bejn loj Dios*

<sup>1</sup> Ma n jn Dios dunuj ree cwent zi'c b n ad yu't xtol guial raliduladx ree laaman, zeel ma nadxu' ree zagdx con laaman por xguialg jt Dad Jesucrist. <sup>2</sup> Din guial raliduladx ree Jesucrist ma zajc yadxin ree loj Dios abi' nadxu'guijc ree ni ma beenman por dunuj ree, zeel d d nix yu' du luxdoo ree din ral  z ree yayal ree xanyabaa lod za'man. <sup>3</sup> Abi' ad ziantzi, n  guial yu' du luxdoo ree zagdx por guialrzagdiaj ni rad ud ree, din rayagbee ree por guialrzagdiaj guin yasiid ree yaya'p ree pasens. <sup>4</sup> Abi' por pacens guin yasiid ree yadaan ree ni gui'tzi, abi' guial yadaan ree ma zajc yadxin ree loj Dios. <sup>5</sup> Ni ral  z ree por Dios, ad zasa'nxtutan dunuj ree, din rayagbee ree guial r n da'taman dunuj ree por xSprijtaman b n ma baneeman dulog ree.



<sup>6</sup> Gocli babajn ree ad bile't naguieen ree xhienin din gүүn Dios dunuj ree perdon. Per chi bidxin dxej bi't Cristo gүүtaman por dunuj ree nayajc ree béndol. <sup>7</sup> Dunuj ree rayagbee guial nawëeg naj chu' bèn tiëb guiët por zatijb bejn. Ni'czi por tijb bèn naban xnejz, o wed yu' bèn tiëb guiët por tijb benza'c da't. <sup>8</sup> Per Dios ma balүүman guial rënman dunuj ree, zeel gүүt Jesucrist por dunuj ree majsi nayajc ree béndol. <sup>9</sup> Per yan ma naya ree loj Dios por xguialgүүt Jesucrist, abi' ad ziantzi, në ad zayaltri ree xcasti Dios chi guidxin dxej. <sup>10</sup> Din chi ad bile't nadxin ree loj Dios, laaman guxhal nejz guin por xguialgүүt Xi'nman Jesucrist, diidxgui yan ad zүүntaman dunuj ree perdon ya, guial ma nabajnnë' ree Jesucrist, bèn guxhal nejz par loj Dios. <sup>11</sup> Abi' ad laatzan, në guial yu' du luxdoo ree nix radëed ree quixtëe loj Dios por Dad Jesucrist, din por laaman ma nadxu' ree zagdx con Dios.

### *Adán në Cristo*

<sup>12</sup> Por tijb xinguaaw guzuloj guyu dol loj guidxliuj, abi' por dol guin guzuloj guyu guialgүүt, gra ree bejn bayal guialgүүt guin guial been reeman dol. <sup>13</sup> Diizd chi gad ley ni badëed Dios loj Moisejs chu' mal yu' dol, per guial achet ley guyu nadxel, achut zajc guiëb guial cayüjn bejn dol. <sup>14</sup> Per majsi zian, bidxinczi dxej ni güt reeman, diizd xtiamp Adán xt xtiamp Moisejs, majsi ad beent reeman lasa' dol ni been Adán. Abi' tiampzii Adán gojc tijb sen par tijb bèn naj gui't.

<sup>15</sup> Din garen naj dol ni been Adán guial loj perdon ni zëed por Dios. Por xtol tijb bejn guzuloj guyu guialgүүt par gra bejn, per por tijb bejn zëed xperdon Dios, abi' laaman naj Jesucrist. Por Jesucrist rүүn Dios dunuj ree perdon, abi' ni been Jesucrist naj ni mazri lasajc, në ni mazri zagdx par zien ree bejn. <sup>16</sup> Din garen naj dol ni been Adán guial loj perdon ni runeë Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol. <sup>17</sup> Por dol ni been Adán bi't guialgүүt par gra ree bejn. Per por ni been Jesucrist bi't perdon par gra ree bèn rliladx guial por Cristo ma naj bejn naya guidiblagaa loj Dios, abi' gap reeman guialnaban tiblayaa con laaman.

<sup>18</sup> Abi' guial bi't guialgүүt zi'c tijb casti par gra ree bejn por dol ni been Adán, ziangajc por ni zagdx ni been Jesucrist ma zajc gap ree bejn perdon në guialnaban loj Dios. <sup>19</sup> Din por tijb bèn ad bazoobt diidx gra bejn naj béndol. Per ziangajc por tijb bèn bazoob diidx ma zajc gap bejn perdon loj Dios.

<sup>20</sup> Abi' Dios badëe ley loj Moisejs, din por ley guin gagbee ree bejn guial cayüjn reeman dol. Abi' chi ragbee bejn guial cayüjnman zien dol loj Dios, ziangajc mazri benza'c naj Dios par gүүnman laaman perdon. <sup>21</sup> Guia'xchej gunabee dol bejn

ree, abi' por dol guin guzuloj guyu guialgüjt. Per yan mazri nadxu'guijc ree guial rën Dios dunuj ree, din guial rënman dunuj ree nünman dunuj ree cwent sin dol, abi' yaya'p ree guialnaban con laaman por dux Dad ree Jesucrist.

## 6

### *Ma bayëjt ree par dol per nabajnnë' ree Jesucrist*

<sup>1</sup> Ad naladxidi canin lojdi guial yaguieen ree dol mazri din guiën Dios dunuj ree mazri. <sup>2</sup> Din ad ziantan, ma bayëjt ree par dol ad rayaltri yaguieenz yaguieen ree dol. <sup>3</sup> Din gol bignia' guial chi barobnijs ree por Jesucrist, laan naj zi'c rulüü guial në dunuj ree ma bayëjt con laaman. <sup>4</sup> Chi barobnijs ree rën guiëban guial ma baxa'tyuj ree con Cristo, ma bayëjt ree con laaman din ziangajc zi'c babanman por xguialrniabee Dios ziangajc zajc guidxaa mod ni nabajn ree, yabajn ree zi'c rën Dios.

<sup>5</sup> Abi' bal chi barobnijs ree ma nayajc ree tijbzi con Jesucrist loj xguialgüjtaman, zi'c babanman ziangajc yaban ree. <sup>6</sup> Din dunuj ree rayagbee guial chi güt Jesucrist loj crüjz, güjtaman por gra ni baguieen ree yaloj chi gad ree yaguieenbee laaman, abi' yagaj gunijt zi'c babajn ree yaloj, din ma naj nawëëg güün dol dunuj ree gan din ad rniabeetri dol guin dunuj ree. <sup>7</sup> Din bén ma güjt por dol, ad rniabeetri dol guin laaman. <sup>8</sup> Abi' guial güjt Jesucrist por dux tol ree, zeel ma bayëjt ree par dol guin, yabajn tëë ree con laaman. <sup>9</sup> Din dunuj ree rayagbee guial chi baban Jesucrist ad yu'tri dxej guiëtaman din ad rniabeet guialgüjt laaman. <sup>10</sup> Con tivoltizi güjt Jesucrist por xtol ree bejn, yan ma nabanman par Dios. <sup>11</sup> Ziangajc lëjt gol been cwent guial ma güjtidi par dol, abi' ma nabandi par Dios guial ma najdi tijbzi con Dad Jesucrist.

<sup>12</sup> Zeel la'tgaj nabandi loj guidxliuj guie ad tiëbidi nabee dol lëjt, ad tiëb tëëdi güün ree xgabdxuudx lëjt gan. <sup>13</sup> Ad cwëëladx lëjt gajc loj dol par güündi ni mal, zagdxeli gol cwëjb nabee Dios lëjt, zi'c tijb bén ma güjt, abi' yabandi par laaman. Gol cwëjb nabeeman lëjt par güündi ni zagdxë. <sup>14</sup> Zian ad zanabeetri dol lëjt, per ad por guial yu'guijctidi ni rëb ley ad güündi, ad zanabeetri dol guin lëjt por guial zinalidi guial rën Dios lëjt.

### *Ma gulaa ree loj dol*

<sup>15</sup> Ad canitan por guial ma zunaal ree guial rën Dios dunuj ree yan, zeel ma zajc yaguieen ree dol guial ad zunaaltri ree ley, din ad ziantan. <sup>16</sup> Lëjt ragbee bal yu' chu rniabee dunuj ree, yazoob ree xtiidx bén rniabee dunuj ree. Yan bal dol guin rniabee lëjt yayalidi casti, per bal ruzoobidi xtiidx Dios dxel

ma rayalidi perdon. <sup>17</sup> Per quixtëe Dios guial majsi guia'xchej gunabee dol lëjt, per yan con guidib luxdoodi ma zinalidi xtiidx Dios zi'c ma basiididi. <sup>18</sup> Abi' yan guial ad rniabeetri dol lëjt, ma nabandi din güündi zi'c rën Dios. <sup>19</sup> (Canenë'n lëjt con ganax diidx ni zajc chignia'di xhie rën guiëb ni canin, din ragbeen guial nawëëg naj chignia'di ni guin ree.) Zi'c gunabee dol lëjt guia'xchej persi beendi ni dxuudx ree në graloj ree ni mal, ziangajc yan guidiblagaa gol cwëjb nabee Dios lëjt din gac güündi ni zagdxe guiban tëedi zi'c rënman.

<sup>20</sup> Chi gunabee dol lëjt ni'quid guyutidi xgab nibajndi zi'c rën Dios. <sup>21</sup> Per, ¿xhieza gan beendi por ni mal ni beendi nadxel, ni mal ni ratunëdi yan guial ma ragbeedi por laan zëed xcasti Dios? <sup>22</sup> Per yan guial ad rniabeetri dol lëjt ma zinalidi xnejz Dios, abi' laan naj ni zagdxe din por zian ma zajc guibandi zi'c rën Dios gap tëedi guialnaban tiblayaa con laaman. <sup>23</sup> Din ni rüjn bejn gan por dol laan naj casti, per ni razaladx Dios naj guialnaban tiblayaa par ree bén ma naj tijbzi con dux Dad ree Jesucrist.

## 7

### *Ni naj zi'c guialruxhliaa*

<sup>1</sup> Compniar raliduladx ree Jesucrist, lëjt ragbee xhienaag naj tijb ley. Ley guin naj ni rniabee bejn la'tgaj nabanman.

<sup>2</sup> Laan naj zi'c chi ruxhliaa bejn, ad zajct guxhliaanëman ben ren la'tgaj naban lacheelaman. Per bal guiët lacheelaman dxel ad yu't ley ni gudxoon guial guxhliaanëman ben ren.

<sup>3</sup> Zeel bal naban lacheelaman abi' guchajgaman ben ren, dolan cayünman. Per bal ma güjt lacheelaman dxel achet ley gudxoon guial guxhliaanëman ben ren ad cayün tëëtaman dol.

<sup>4</sup> Ziangajcan lëjt compniar raliduladx ree Jesucrist, por xguialgüjt Jesucrist ma güjtidi par xley Moisejs. Yan ma najdi xbejn Cristo bén baban zatijb, abi' zian ma zajc yaguieen ree zi'c rën Dios yaguieen ree. <sup>5</sup> Din chi babajn ree zi'ctzi bayën ree, mazri baguieen ree ni rudxoon ley guin yaguieen ree abi' bunaal ree ni mal ni rayal casti. <sup>6</sup> Per yan guial ma bayëjt ree par ley guin, yan guial ad rniabeetri ley guin dunuj ree guial ma bidxaa tëe mod ni nabajn ree, ma zajc yaguieen ree zi'c rën Dios por xSprijtaman bén nabajnnë' ree, ad guial nadxu'guijct ree ley guin.

### *Ley con dol*

<sup>7</sup> Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee tëetan guial dol naj guialrzëëbladx, bal id rëb loj ley guin: "Ad sëëbladxil." <sup>8</sup> Per chi gogbeen guial ni mal naj guialrzëëbladx, mazri gojcxhie j da dolan por gra ni guzëëbladxan. Bal id yu'

ley, ad zagbeet bejn xhienin naj dol. <sup>9</sup> Chi gadan gүнbee ley guin, par naj zagdxe naban. Per chi benbeen ley guin, gogbeen guial cayünan dol abi' por dol guin rayalan casti. <sup>10</sup> Bi't ley guin din gagbee bejn xhienaag guibanman, per par naj bi'tzan par gudëëdan naj casti. <sup>11</sup> Din basquiee dol guin naj guial zile' gүнan gra ni rniabee ley, per por ley guin gajc gogbeen guial castizi rayalan.

<sup>12</sup> Zeel ad ni malt naj ley guin din loj Dios zëëdan abi' gra ni zëëd loj ley guin loj Dios zëëdan, abi' zagdxe xnejz tëë naj ni rëb loj ley guin. <sup>13</sup> Ad ley guint rajp dol guial rayalan casti, dol guinan naj ni basquiee naj din gүнan ni rayal casti. Abi' por ley guin gogbeen guial ni dxuudx da't naj guial gүнün bejn dol.

<sup>14</sup> Dunuj ree rayagbee guial por Dios zëëd ley guin, per guial najn bénguidxliuj zeel zianczi rүjn dol guin naj gan. <sup>15</sup> Ad rignia'tan xhienin rajcan, din ad rүntan ni rënan, aal ni ad rëntan rүnan. <sup>16</sup> Abi' chi rүnan ni ad rëntan gүнan, zian ragbeen guial ni zagdxequi naj ley guin, din por ley guin ragbeen xhienin cayünan. <sup>17</sup> Zeel ad najtczi rүн guial rүnan ni ad rëntan, rүnan laan guial najn béndol, abi' zianczi rүjn dol guin naj gan. <sup>18</sup> Din guial najn bénguidxliuj, ragbeen guial ni'czi ta'n ad najtan benza'c, majsi rënan gүнan ganax ni zagdxe, per ad rajctan. <sup>19</sup> Ad rүntan ganax ni zagdxe ni rënan gүнan, aal ganax ni mal rүnan ni ad rëntan gүнan. <sup>20</sup> Yan bal rүnan ni ad rëntan gүнan, ad najtczi rүн par gүнan laan, rүnan laan guial najn béndol abi' zianczi rүjn dol naj gan.

<sup>21</sup> Ragbeen guial majsi rënan gүнan ganax ni zagdxe, per laa za' gajc dol guin par gүнün naj gan. <sup>22</sup> Dád ruladxan gra zi'c rniabee Dios gүнan, <sup>23</sup> per yu' ni rudxoon gүнan laan, abi' ni rudxoon guin naj dol, guial sta naban dol guin luxdon abi' zianczi rүjn naj gan.

<sup>24</sup> ¡Prob naj! ¿Chu zajc yabëë naj loj casti rayalan por dol ni rүnan guial naj naj bénguidxliuj? <sup>25</sup> Per quixtëë Dios guial por dux Dad ree Jesucrist ma gulaan loj casti guin. Diidxliczi da xgaban naj guial gүнan ganax ni rniabee Dios, per guial najn bénguidxliuj zeel zianczi rүjn dol guin naj gan.

## 8

### *Guialnaban runee xSprijt Dios*

<sup>1</sup> Gra ree bén riladx Jesucrist ad rayaltri reeman xcasti Dios, bén ad nabantri ree zi'ctzi rën reeman, laa reeman ma rүjn reeman naguiejn naban reeman zi'c rniabee xSprijt Dios. <sup>2</sup> Din por xguialrniabee xSprijt Dios, bén runee guialnaban duloj ree guial ma nayajc ree tijbzi con Jesucrist, ad rniabeetri dol dunuj ree ad zayal tëëtri ree xcasti Dios. <sup>3</sup> Guial nayajc ree bénguidxliuj ad bile't nүjn ley dunuj ree yudar, ley ni badëëd

Dios loj Moisejs. Per yan ma been Dios ni ad bile't nüjn ley guin. Laaman guxhaal Xi'n loj guidxliuj zi'cgajczi tijb bénguidxliuj persi güjtaman por dux tol ree chitëë nabeeri dol dunuj ree. <sup>4</sup> Laaman been zian, din yaguieen ree zi'c rënman zi'cgajczi tijb bën cayüjn zi'c rniabee ley guial ad nabantri ree zi'ctzi rayën ree, ma nabajn ree zi'c rniabee xSprijt Dios.

<sup>5</sup> Bën naban ree zi'ctzi naj xixgab reeman, mazri yu'guijc reeman güün reeman zi'ctzi rën reeman. Per ree bën naban zi'c rniabee xSprijt Dios, mazri yu'guijc reeman güün reeman zi'c rniabee Sprijt guin. <sup>6</sup> Guial yu'guijc bejn güünman zi'ctzi naj xixgabaman zeel zëed casti. Per bën yu'guijc güün zi'c rniabee xSprijt Dios, zajpaman guialnaban con Dios yabe'cdxe tëë Dios luxdooman. <sup>7</sup> Bën yu'guijc ree guiban zi'ctzi naj xixgab reeman, rdx'e'ch Dios laa reeman din ad rënt reeman guzoob reeman xtiidxaman ad rille' tët güün reeman zi'c rënman. <sup>8</sup> Zeel bën naban ree zi'ctzi naj xixgab reeman, ad ruladxt Dios ni rüjn reeman.

<sup>9</sup> Per lëjt ad nabantridi zi'ctzi naj xixgabidi, ma nabandi zi'c rniabee xSprijt Dios, bal wali ma nabannëdi xSprijt Dios. Din bën ad nabannët xSprijt Dios, ad najtaman xbejn Cristo. <sup>10</sup> Per bal ma nabannëdi Cristo, rën guiëban guial ma güjtidi par dol, ma nabannëdi xSprijt Dios din ma nüjn Dios lëjt cwent sin dol. <sup>11</sup> Abi' bal ma nabannëdi xSprijt Dios, bën basban Jesucrist loj ree bengüt. Majsı guiëtidi per zasban Dios lëjt din tia'di zatijb guialnaban por xSprijt Dios bën nabannëdi.

<sup>12</sup> Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree. <sup>13</sup> Din bal nabandi zi'ctzi naj xixgabidi, dxel yayalidi casti, per bal por xSprijt Dios bën nabannëdi ma basa'ndi dol tiblax dxel ma gapidi guialnaban tiblyaa con Dios.

<sup>14</sup> Gra ree bën rtiëjb rniabee xSprijt Dios laa reeman, laa reeman naj xi'n Dios. <sup>15</sup> Din ad nabannët reeman xSprijt Dios par guidxeb reeman, zi'c rdxeb tijb bejn xpatronman, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: “ıDad!” <sup>16</sup> Din xSprijt Dios rusni dunuj ree persi rayagbee ree guial ma nayajc ree xi'n Dios. <sup>17</sup> Abi' guial nayajc ree xi'n Dios dxel ma rayal ree ni guneeman zi'cgajc Jesucrist, bal wali yadaan ree guialzi zi'c laaman din yayal ree xanyabaa lod zojbaman.

<sup>18</sup> Ma benan xgab guial achet lasajc gualrzagdiaj ni caydüüd ree yan guial loj guialnaza'c ni yaca' ree xanyabaa. <sup>19</sup> Abi' xt gra ree ni badxe' Dios loj guidxliuj, ma rën nejzdooreen guidxin dxej guiguien chu ree nin naj xi'n Dios. <sup>20</sup> Din guidxliuj ma guxinan, per ad laatan rajp dol, Dios basa'n gac zian. Yan cabësi guidxliuj guin <sup>21</sup> yariin loj ree ni dxuudx ni

yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx yu' loj guidxliuj guie. <sup>22</sup> Per la'tgaj cabëz guidxliuj guin guidxin dxej guin, dunuj ree rayagbee guial dád naya cazagdiajn zi'c rzagdiaj tijb béngunaa chi ma gal xi'nman. <sup>23</sup> Abi' ad tijbtizi guidxliuj guin cazajc zian, nëgajc dunuj ree guial nabajnnë' ree xSprijt Dios zi'c tijb sen por ni gunee Dios duloj ree. Abi' cayzaagdiaj ree la'tgaj caylëjz ree guidxin dxej ni guiguien guial nayajc ree xi'n Dios, dxej ni guidxaa dux cuerp ree chi yaya'p ree cuerp cüb. <sup>24</sup> Dunuj ree rayagbee guial gac zian, laan naj ni ralëjz ree guialraliduladx ree ma nayajc ree perdon. Lëjt ragbee bal ni ralëjz ree ma gojcan, ad zalëeztri reen din ad zajctri cwëz bejn ni ma gojc. <sup>25</sup> Per bal gad ni caylëjz ree gac, ad rayalt yadxag ree yalëez ree gacan.

<sup>26</sup> Abi' xSprijt Dios ragnë dunuj ree chi ad rayagbeet ree xhie yaguieen ree, din yu' dxej loj hor guin ad rile't yarejdx yanaab ree Dios zi'c rayal. Abi' chi ad rayagbeet ree xhienaag yaguie'ch ree loj Dios, xSprijt Dios mal ragbee dux quiarguiejn ree, dxel laaman rbejdx rniab Dios por dunuj ree. <sup>27</sup> Abi' Dios, bén nünbee luxdoo gra ree bejn ragbeeman xhienin canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c rën Dios.

### *Achet zajc güün dunuj ree gan*

<sup>28</sup> Dunuj ree rayagbee guial gra ni cayza'c ree loj guidxliuj guie naj ni güün sirv par dunuj ree guial rayën ree Dios, dunuj ree guial bazoob ree xtiidxaman par yaguieen ree zi'c rënman. <sup>29</sup> Abi' diizd guia'xchej ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj bén nabee loj gra ree bén naj Xi'n Dios. <sup>30</sup> Gra ree bén ragbee Dios guial chililadx reeman laaman, rbejdxaman laa reeman din gac reeman xbejnman, rünjman laa reeman cwent sin dol abi' rudëëman xanyabaa loj reeman lod zojbaman.

<sup>31</sup> Yan, guial ma rayagbee ree gra ree ni guie, achet güünan chutëez güün xcontr dunuj ree, dunuj ree rayagbee guial Dios gagnë dunuj ree. <sup>32</sup> Ad gurexuut Dios nudëë Xi'nman din guiëtaman por dunuj ree. Yan nacli Xi'nman baneeman persi güjtaman por dunuj ree, ¿diidxgui ree ni ren ree nid zuneeman duloj ree ya? <sup>33</sup> ¿Chu zajc cwe'c dux guialquia ree nayajc ree bén ma gulej Dios? Din Dios ma nün dunuj ree cwent sin dol. <sup>34</sup> Achut zajc na guial rayal ree casti, din Jesucrist güjt persi gudijxaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree. <sup>35</sup> Zi'c rën Cristo dunuj ree, achut zajc yala' dunuj ree con laaman.

Ni'qui por gualyu'naya, o por gualzi, o por ni rüjn bejn dunuj ree, o por gualrliaan, o por gual ryaadx du xab ree, o por tijb ni nadxeb, o gual yayëjt ree, achet zajc yala' dunuj ree con laaman. <sup>36</sup> Zi'c rëb loj xtiidx Dios:

Guial nayajcan xbejn, zianczi nadxu'n loj gualgüjt.

Rüjnnë reeman dunujn zi'c ree xiil ma naj guiët.

<sup>37</sup> Per ni'qui tijb ni guin ad züjnt dunuj ree gan gual ragnë Cristo dunuj ree, bén rën dunuj ree. <sup>38</sup> Ragbeechaawan guial ni'qui gualgüjt, ni'qui gualnaban, ni'qui ree anjl, o xindxab ree, o gra ree ni rajp gualrniabee, o ni cayajc, o ni zëed gac, <sup>39</sup> o ni zëed xanyabaa, o lën liuj, ni'qui tijb ni been Dios, achetczi achut tëet zajc chiquied gualrën Dios dunuj ree por dux Dad ree Jesucrist.

## 9

### *Dios gulej bén Israel ree*

<sup>1</sup> Lëjt ragbee guial naj naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt, <sup>2</sup> guial guixie guixie dád yu'naya luxdoon, xt ni'quid radxëjlt xhie günan. <sup>3</sup> Balzianclaa majsi ad zayaltan perdon, majsi güün Cristo naj tibladd, per bal zian chile' günan yudar bén ladx reen chitëë yayal reeman casti. <sup>4</sup> Laa reeman naj bén Israel, abi' laa reeman naj bén gule Dios din gac reeman xbejnman. Abi' guzujman con laa reeman zi'c form tijb zaj, baya'nnëman laa reeman diidx conin güünman con tëenin güün reeman, badëë tëe xleyaman loj reeman. Rëbaman loj reeman xhienaag guiën reeman laaman, been tëëman promejs loj reeman. <sup>5</sup> Zëed reeman loj xdiaa ree bén been ree sirv loj Dios gulal, loj gajc ree bén zëed Cristo chi bi'taman loj guidxliuj, laaman naj bén nagle' zianczi rajp tëëman gualrniabee loj gra ni yu'. Amén.

<sup>6</sup> Ad canitan guial ad züjntri Dios xpromejsaman cumplid, ni canin naj guial ad grat ree bén Israel naj xbejn Dios.

<sup>7</sup> Ad guial zëedt reeman loj xdiaa Abraham din gac reeman xdiaaman, din rëb Dios loj Abraham: “Diizd xi'nl Isaac suloj xdiaal.”

<sup>8</sup> Laan rulüü dunuj ree guial ad por guial najt bejn bén Israel, ma najman xbejn Dios, xbejn Dios naj ree bén naj cwent loj xdiaa Abraham guial rliladx reeman xtiidx Dios zi'c Abraham. <sup>9</sup> Din Abraham bililadxaman Dios chi rëb Dios lojman: “Zatib ijz tiamp guie gajc gualan abi' dxej zii ree ma ca' Sar tijb xindobëz.”

<sup>10</sup> Abi' ad laatzan. Grop ree xi'n Rebeca gojc xdad reex Isaac, bén goc dux béngulal ree, <sup>11-13</sup> per chi gad reex gal, chi ad wayüjn tëet reex ni zagdxë ni'qui ni mal, rëb Dios loj Rebeca: “Xin yaløj guin laax güün sirv loj xinguiag guin.” Zi'c rëb loj

xtiidx Dios lod r eb: “Guy enan Jacob, per bidxe'chan Esa u.” Zian rguien guial ma ragbee Dios chu rbeman ad por ni r ujnt bejn, laaman ma ragbee chu rucaabeeman.

<sup>14</sup> Yan,  por zian yaguie'ch ree ya, ad r ujnt xguialguxtis Dios zi'c rayal?  Per ad ziantan! <sup>15</sup> Din Dios r eb loj Moisejs: “Yayan b en r enan yayan abi' b en rayal ree casti, bal r enan ad zud edtan laa reeman casti.” <sup>16</sup> Zeel ad zile't yaya Dios bejn por xixgabzaman o por ni r ujnman, laaman mal ragbee chu r enman yayaman. <sup>17</sup> Loj xtiidx Dios r eb guial r ebaman loj rey Egipto: “Naj ben l uj rey din guiguien da gualrniabeen din g unbee gra b enguidxliuj naj.” <sup>18</sup> Zeel rnin lojdi guial ma ragbee Dios chu yayaman chu t ee g unman luxdoo gojl.

<sup>19</sup> Per wed por zian nadi: “Bal zianan,  chexquiza zeel rdxe'ch Dios guial nayajc ree zi'c nayajc ree awa ad zajc yadxoon ree zi'c naj xixgabaman?” <sup>20</sup> Per,  chu naj b enguidxliuj din guinieeman Dios zian? Wen zajc gui eb tijb guiajs loj b en been laan ya: “ Chexc zeel beenl naj zian?” <sup>21</sup>  Nid b en r ujn guiajs guin r ujnn e bajn guin zi'ctzi r enman ya? Laaman ruguiaa xhie g unn eman bajn guin, bal g unman guiajs g un dxiin guixie guixie o g unman guiajs g un dxiin dxej zobjlojzi ree.

<sup>22</sup> Yan, ziangajc Dios ma ragbeeman chu rayal casti, abi' xt zajc laa nud ed gajcaman casti din guiguien xguialrniabeeman. Per gudaanman gojp t eeman pacens b en ad ruzoobt ree diidx, b en rayal ree nit. <sup>23</sup> Gudaanman laa reeman din guiguien guial laaman guinia xhienaag g unman, guial laaman naj b en ca' gualrniabee abi' bayaman b en ragbeeman diizd guia'xchej guial yayal reeman xanyabaa. <sup>24</sup> Abi' laa reeman naj dunuj ree b en ma gurejdx Dios, loj ree b en Israel n e loj ree b en ad najt b en Israel. <sup>25</sup> Zi'c ca loj libr ni bacaa Oseas b en bad e xtiidx Dios loj ree bejn, lod r eb:

B en ad najt ree da bejnan,  
gui en loj reeman guial naj reeman da bejnan,  
abi' ree b en ad yu't b en r en laa reeman,  
naj gui en laa reeman.

<sup>26</sup> Abi' lod r eb Dios loj ree bejn: “Ad da bejntan l ejt”.

Yagaj gac reeman xbejnman, laaman guial najman b en naban.

<sup>27</sup> Gui ad Isa as b en bad e xtiidx Dios loj ree bejn, r ebaman por ree b en Israel: “Majsi zien da't naj ree b en Israel zi'c  x riga' ro' nijsdoo, per ta'nz naj ree b en laa loj casti, <sup>28</sup> din Dios nayob g un cumplid xtiidxaman loj guidxliuj guie zi'c ma r ebaman.”

<sup>29</sup> Abi' diizd gocli r eb Isa as loj ree bejn:

Bal niti jb dux Dad ree Dios  
b en rajp gra gualrniabee  
ninijt gra ree dux b engulal ree,



diizd gocli mal gunijt dux diaa ree  
zi'c gunit ree bén Sodoma në ree bén Gomorra.

*Bén ad najt ree bén Israel ma naj reeman perdon loj Dios*

<sup>30</sup> Yan, ¿xhie yaguie'ch ree? Bén ad najt ree bén Israel ni'quid guyut reeman xgab xhienaag gac reeman perdon loj Dios, per yan ma naj reeman perdon guial rililadx reeman Jesucrist. <sup>31</sup> Abi' ree bén Israel majsi dád been reeman naguiejn guiban reeman zi'c rniabee ley din gac reeman perdon loj Dios, per ad gojctan. <sup>32</sup> ¿Chexc zeel ad bile't niajc reeman perdon zian? Guial mazri been reeman naguiejn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb “guiaj ni rliadx guia' bejn” <sup>33</sup> zi'c ca loj xtiidx Dios lod rëb:

Ma gulen tijb bejn luguiedx Sión, bén gac zi'c tijb guiaj ni ladx guia' ree bejn abi' gusajban laa reeman.

Abi' bén chililadx laaman ad yu't dxej yaya'nxtuman.

## 10

<sup>1</sup> Compniar raliduladx ree Jesucrist, ni rënan rniaab tēen loj Dios naj guial gac ree bén Israel perdon. <sup>2</sup> Din naj ragbee guial dád cayüjn reeman naguiejn cayüjn reeman sirv loj Dios, per diidxli ad rignia't reeman zagdx xhienaag rën Dios güün reeman. <sup>3</sup> Din ad rtiëjbt reeman chililadx reeman xhienaag rayal güün reeman din gac reeman perdon loj Dios, al zinal reeman zi'c naladx reeman gac reeman perdon, luar güün reeman zi'c rën Dios din gac reeman perdon. <sup>4</sup> Din por Jesucrist bayaaloj zi'c rniabee ley güün bejn, yan bén rililadx ree laaman, ma naya reeman loj Dios.

<sup>5</sup> Bén rën gac naya loj Dios guial zinalaman ley, rëb Moisejs guial bén güün zi'c tal rëb ley, zajpaman guialnaban la'tgaj cayüjnman zi'c rniabee ley guin. <sup>6</sup> Per guial rajc bejn naya loj Dios por guial rililadxaman Jesucrist, naj guial ad züjntaman xgab: “¿Chuczi zajc chë'p xanyabaa?” (Din rën guiëban guial ad rililadxtaman, abi' rënman guguaaaman guiat Cristo loj guidxliuj.) <sup>7</sup> Ad guiëb tēëman: “¿Chu zajc che lod za' ree bengüt?” (Din rën guiëban guial ad rililadxtaman, abi' rënman guguaaaman yaban Cristo loj ree bengüt.) <sup>8</sup> Per loj xtiidx Dios rëb: “Gajxh za' xtiidx Dios con lüj, ryaadxzi güünl xgab guiëb tēël bal chililadxil laan.” Din guialrililadx ni ratie'ch ree naj ze. <sup>9</sup> Bal yaneero'l guial Jesús naj Dad par lüj abi' guidib luxdool chililadxil guial basban Dios laaman loj ree bengüt, dxel ma najl perdon. <sup>10</sup> Din chi chililadx bejn Jesucrist con guidib luxdooan, diizd loj hor zii ma najman cwent sin dol. Abi'

chi yaneero'man guial Jesucrist naj Dad par laaman, dxe ma najman perdon.

<sup>11</sup> Abi' loj xtiidx Dios r eb: "Gra ree b en chililadx laaman ad yu't dxej yaya'nxtu reeman." <sup>12</sup> Laan r en gui eb guial loj Dios tiblojzi naj bejn, achet g un an chut e z najman, bal najman b en Israel o ad najtaman b en Israel. Din tijbzi Dios naj Dad par dugra ree, abi' d ad benza'can con gra ree b en rbejdx rniab laaman. <sup>13</sup> Din loj xtiidx Dios r eb: "Gra b en yanab perdon loj Dios, gacaman perdon." <sup>14</sup> Per,  xhieza naag cwedx guiniab reeman laaman awa ad waliladxt reeman laaman?  Abi' xhieza naag chililadx reeman laaman awa ad wacaag-diajgt reeman xcwentaman?  Xhienaag guiguiejn reeman xcwentaman awa achut b en guiniee xtiidxaman loj reeman? <sup>15</sup>  Xhienaag chu' b en guitie'ch xtiidxaman awa achut guix-hiaal laa reeman? Loj xtiidx Dios r eb: " Ni za'cdxoon naj chi rdxin b en zin e ruson zagdxe!"

<sup>16</sup> Per ad grat bejn ridxga' xtiidxza'c Dios. Zi'c r eb Isa as: "Dad,  chu ma rliladx ni ranen por l uj?" <sup>17</sup> Zeel guialrliladx z ed por ni rigueiejn bejn, abi' ni rigueiejn bejn naj xtiidxza'c Jesucrist.

<sup>18</sup>  Wen nid waguiejn ree bejn laan ya?  Per naj rni guial ma bacaagdiajg reeman laan! Din loj xtiidx Dios r eb: Guidib guidxliuj ma bire'ch xtiidx Dios abi' xt luar bigra lod naguie'ch ma bigueiejn reeman xtiidxaman.

<sup>19</sup> Yan r unan xgab:  Wen id rignia' ree b en Israel xtiidx Dios ya? Per diizd guia'xchej bacaa Moisejs ni r eb Dios por laa reeman chi r ebaman:

Naj g n din t edlojdi por ni g nan con ree b en ad najt b en Israel.

N e por ni g nan con laa reeman, majsi ad ragbeet reeman, abi' zadxe'chidi.

<sup>20</sup> Abi' sin guialrdxeb bacaa Isa as ni r eb Dios por ree b en Israel, chi r ebaman:

B en naj ree b en Israel, majsi ad baguuilt reeman naj, per badxejl reeman naj.

Abi' ma bal ulon loj reeman,

majsi ad gunabdiidxt reeman por naj.

<sup>21</sup> Bacaa t e  Isa as ni r eb Dios por ree b en Israel, chi r ebaman: "D chej za'n rbedxan bejn ree abi' ad r ent reeman guzoob reeman diidx al rusagloj reeman naj."

## 11

### *Xixgab Dios*

<sup>1</sup> Ad canitan lojdi guial ma gul eladx Dios b en Israel ree, din ad ziantan. L ejt ragbee guial b en Israel naj abi' loj xdiaa

Abraham zialan, guial zialan loj xdiaa Benjamín. <sup>2</sup> Diizd guia'xchej, gulej Dios b́en Israel ree din gac reeman xbejman, zeel ad rb́eeladxtaman laa reeman. ¿Nid rusaaladxidi tiblajt loj xtiidx Dios ya lod źeéd chi gule'c Elías b́en bad́eé xtiidx Dios loj ree bejn xguialquia ree b́en Israel loj Dios? Chi ŕebaman: <sup>3</sup> “Dad, ma bagújt reeman gra ree b́en bad́eé xtiidxil loj ree bejn ma bachijl t́eé reeman xialtar reel, najzi baya'n abi' ńegajc naj ŕen reeman gugújt reeman.” <sup>4</sup> Per badxi' Dios xtiidxaman ŕebaman: “Ma gulécán gajdx mil bejn par naj, b́en ad wazuxibtcsi ree loj dios la Baal.” <sup>5</sup> Yan ziangajc yu' ta'n b́en Israel, por guial rayaman laa reeman gulejman laa reeman par laaman. <sup>6</sup> Abi' bal guial rayaman laa reeman gulejman laa reeman, ad por ni cayújnt reeman, din bal nibejman laa reeman por ni cayújn reeman dxel ad por guial rayatraman laa reeman.

<sup>7</sup> Zian gojc, b́en Israel b́en gule Dios, badxejl reeman laaman guial rililadx reeman laaman. Per ree b́en Israel ren gad reeman yadxejl laaman, din raguiil reeman laaman zi'c naladx reeman, ad raguiilt reeman laaman zi'c ŕenman zeel beenman luxdoo reeman gojl, <sup>8</sup> zi'c ŕeb loj xtiidx Dios lod ŕeb: “Basiaaw Dios xquiarguejn reeman, abi' naj reeman zian xt yandxej, majsi ruguiaa reeman per rulúú ad ruguiaat reeman, abi' majsi rigueiejn reeman per rulúú ad rigueijnt reeman.” <sup>9</sup> Ŕeb t́eé Davi:

Xguialraw zagdx reeman con gra xguialnaza'c reeman laan gusquiee laa reeman guial źequi reeman zagdx.

Laan gusquiee laa reeman din téd reeman casti ni rayal reeman.

<sup>10</sup> Yaya'n reeman zi'c tijb b́en ad ruguiaat, abi' sac reeman zi'c tijb b́en ca b́ew xijch.

### *Gac ree b́en ad najt b́en Israel perdon*

<sup>11</sup> Ad canitan lojdi por guial ad rtiéjbt ree b́en Israel güün reeman zi'c ŕen Dios zeel ma gunijt reeman loj Dios, din ad ziantan. Guzajc reeman zian din chu' mod gac ree b́en ad najt ree b́en Israel perdon, din chile' śeébladx ree b́en Israel gap reeman perdon guin. <sup>12</sup> Yan bal guial ad bazoobt ree b́en Israel diidx, beenan sirv par din yayal los demazri ree b́enguidxliuj xguialnaza'c Dios, b́en ad najt ree b́en Israel. Yan, ¿rújndi xgab ya xhienaag güünle' Dios bejn ree chi tiéb ree b́en Israel güün reeman zi'c ŕen Dios?

<sup>13</sup> Yu' ni ŕenan ganin ĺejt b́en ad najt ree b́en Israel, ĺejt ragbee guial Dios guxhaal naj din güün xtiidxaman lojdi abi' dád cayúnan naguiejn günan zi'c rayal. <sup>14</sup> Ŕenan guial ree b́en ladx reen b́en Israel ree śeébladx zi'c rúnjdi din güün reeman zian din chile' gac reeman perdon. <sup>15</sup> Walican guial

chi ad bazoobt ree bén Israel xtiidx Dios, guyu mod gojc los demazri ree bejn perdon. ¡Per xi nix chi chililadx reeman xtiidx Dios! Laan naj zi'c chi yaban tijb bengüt zatijb. <sup>16</sup> Abi' zi'c chi beenle' Dios bén Israel ree gulal laan naj tijb sen guial güünle'man los demazri ree bén Israel, ziangajc bal güünle' Dios xliuj tijb yag guidib yag guin ma nagle'.

<sup>17</sup> Bén Israel ree naj reeman zi'c tijb yag olivo, per yu' reeman naj zi'c xidx yag olivo guin ni ma gurug. Abi' lüj guial ad najtil bén Israel najl zi'c tijb xidx yag olivo ni yu' dajn ni rguiid lod biru' xidx yag olivo guin, zeel rajpil guialnaban por xliuj yag guin. <sup>18</sup> Zeel ad naladxil guial mazri zagdxen najl guial loj yag oliv ni rnin naj ree bén Israel. Per bal rüjnl xgab zian, basaaladx guial ad lüjt cudëe guialnaban loj xliuj yag guin, xliuj yag guin cunee guialnaban lojl.

<sup>19</sup> Wed zanal: "Walican, per gurug xidx yag olivo guin persi guyu'n xluaran din gacan tijbzi con yag olivo guin."

<sup>20</sup> Waliquil, per xidx yag olivo ni canin naj ree bén Israel, gurug reen guial ad bililadxt reen abi' lüj guyul xluar reen guial rililadxil. Zeel ad rüjnl nabë, zagdxeli gojp cudad. <sup>21</sup> Din bal bén Israel ni canin naj ree xidx yag guin, ad bayat Dios laa reeman, ziangajc zajc saquil. <sup>22</sup> Gogbee guial benza'c naj Dios, per ziangajc diidxli rüjn xguialguxtisaman. Ma been xguialguxtisaman con ree bén ad bazoobt xtiidxaman, abi' ma beenman ni zagdxen con lüj. Per rayal guibanl zi'c rënman, bal id züjnl zian züjn xguialguxtisaman con lüj. <sup>23</sup> Abi' bal yayejc ree bén Israel con Dios, abi' chililadx reeman perdon ni zëed por laaman, züjnman laa reeman cwent con los demazri ree bén Israel rililadx. Din laaman rajp guialrniabee par yayünman laa reeman tijbzi con los demazri ree bén Israel.

<sup>24</sup> Din lüj guial ad najtil bén Israel, lüj guial canin najl zi'c tijb yag olivo ni yu' dajn, zile' niajquil tijbzi con yag olivo zagdxen ni rnin naj ree bén Israel, ¡diixgui ree bén Israel ni ad ruzoobt ree xtiidx Dios, nid zayajc reeman tijbzi ya con los demazri ree bén Israel bal guzoob reeman xtiidx Dios!

### *Gac ree bén Israel perdon*

<sup>25</sup> Compniar raliduladx ree Jesucrist, yu' ni ad ragbeetidi abi' rënan gagbeedan, chitëe güündi nabë. Bén Israel rüjn ree nad par guzoob reeman xtiidx Dios, cayajc zian xt chi ma bayaaløj bililadx ree bén ad najt ree bén Israel, bén ma naj ree par chililadx xtiidx Dios. <sup>26</sup> Chi ma gojc zian, dxel graczi ree bén Israel ma güüncwent xtiidx Dios. Zian gac reeman perdon, zi'c rëb loj xtiidx Dios lod rëb:

Luguiedx Siön za bén gagnë ree bén zëed loj xdiaa Jacob. Din yariica reeman loj nejz mal zinal reeman.

<sup>27</sup> Dxel gac cumplid da diidxan,

Zi'c ma rën loj reeman guial gūnan perdon xtol reeman.

<sup>28</sup> Per yan guial dád nad ree bèn Israel par chililadx reeman xtiidxza'c Jesucrist, zian yu' mod persi rliadxidi guial ad najtidi bèn Israel. Abi' majsi zian, rën gajc Dios laa reeman zi'c beenman promejs loj ree xbéngulal reeman. <sup>29</sup> Din Dios ad ruchaat xixgabaman, ni ma bazaladxaman loj bejn, ad rquiedtaman laan, ad rbëeladx tēetaman bèn ma gulejman par laaman. <sup>30</sup> Gocli ad binaltidi xnejz Dios, per yan por ree bèn Israel ad ruzoobt xtiidx Dios, ma balüüman lējt guial rayaman lējt. <sup>31</sup> Abi' bal yan ad ruzoobt ree bèn Israel xtiidx Dios, cayajc zian din yayaman lējt, per chi guidxin dxej ziangajc yayaman laa reeman. <sup>32</sup> Cwëjb Dios guial zi'c ree bèn Israel nē ree bèn ad najt bèn Israel ad zuzoobt reeman xtiidxaman, din gac yayaman gra reeman tiblojzi.

<sup>33</sup> ¡Dád zro' naj xguialrignia' Dios, nē xguialrajcaman con xguialnaza'caman! Achut zajc gagbeechaaw xhienaag naj xixgab Dios o ni cayüjnman. <sup>34</sup> Zi'c ca loj xtiidxaman lod rëb: “¿Chu zajc gagbeechaaw xhienaag naj xixgab dux Dad ree Dios? ¿Chu mazri rajc din guiëb lojman xhienaag güünman? <sup>35</sup> ¿O chu ma badëë xhienin lojman din cwëzaman quixaman laaman?” <sup>36</sup> Xieenman naj gra ni yu', laaman been laa reen abi' par laaman naj gran. Zeel rayal gap bejn laaman respejt zianczi. Amén.

## 12

### *Guialnaban cüb*

<sup>1</sup> Zeel compniar raliduladx ree Jesucrist, rniaaban lojdi, zi'c ma baya Dios dunuj ree, gol basa'n lējt loj Dios zi'c tijb gon ni ma nagle' ni yayuladx tēëman, din guibandi zi'c rënman, abi' zian guiëndi laaman. <sup>2</sup> Ad guibanridi zi'c naban los demazri ree bèn yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaag rën Dios guibandi. Zian gagbeedi conin naj zagdx, conin ruladxaman, con tēënin naj xnejz.

<sup>3</sup> Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad rayalt güün nabë guial mazri lasajquidi loj ree bejn. Zagdxeli gol been xgab por lējt zi'c rayal, segun naj quiarguejn ni banee Dios loj tijbgajdi. <sup>4</sup> Din zi'c xcuerp bejn zien la' najn, per ad tijbtzi ni rüjnman. <sup>5</sup> Ziangajc dunuj ree guial raliduladx ree Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

<sup>6</sup> Din tijbgaj dunuj ree garent garen naj quiarguejn ni baca' ree, zi'c naj ni guyën Dios baneeman dunuj ree. Zeel bal

ma baneeman quiarguejn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree. <sup>7</sup> O bal baneeman quiarguejn par yagueien ree sirv ben ren ree, rayal yagueien reen zi'c rayal. Bén cwa' quiarguejn par gulüüman bejn ree xtiidx Dios, rayal gulüüman bejn ree. <sup>8</sup> O bén cwa' quiarguejn par gudëëman consejw loj ree bejn, rayal gudëëman consejw. Guiáad bén cwa' quiarguejn par yazaladxaman xhienin loj ree bejn, rayal yazaladxaman con guidib luxdoodman. Abi' bén cwa' quiarguejn par nabeeman, rayal gapaman ciudad nabeeman zi'c rayal, o bén cwa' quiarguejn par güünman yudar bén cazagdiaj ree, rayal chu' luxdoodman zagdxe güünman laa reeman yudar.

*Ni rayal güün ree bén rliladx Jesús*

<sup>9</sup> Gol guyën lasa'di con guidib luxdoodi, gol basa'n ree ni mal tiblax, gol binal ni zagdxe. <sup>10</sup> Gol guyën gra ree bejn zi'c tijb bijchidi, ad rüjn lëjt gajc benro', gol gojp respekt lasa'di.

<sup>11</sup> Ad gaquidi bén ploj par güündi ni rayal güündi, con guidib luxdoodi gol been sirv loj Dios.

<sup>12</sup> Gol badxe' luxdoodi zagdxe por ni cabëzidi tia'di, gol gudaan tée loj ni rzagdiajdi, ad gucwëëz cwedx guiniabidi Dios.

<sup>13</sup> Chi xhie ryaadx xcompniaridi, bén rliladx ree Jesucrist, gol been reeman yudar. Gol gojc benza'c con ree bén ri't lidxidi.

<sup>14</sup> Gol gurejdx Dios por ree bén rzunal lëjt par güün reeman lëjt ni mal, ad guzaalidi diidxmal guijc reeman, gol gurejdx Dios guial gagnëman laa reeman.

<sup>15</sup> Gol badxe' luxdoodi nix con ree bén yu' luxdoo nix, per con ree bén yu' luxdoo naya, gol been naguiejn din gagbee reeman guial za'quidi con laa reeman.

<sup>16</sup> Gol gubajn zagdxe con ree lasa'di, ad güündi nabë, gol gojc bén naxanladx. Ad naladxidi mazri rajquidi guial loj ree ben ren.

<sup>17</sup> Ad güündi ni mal bén rüjn lëjt ni mal, gol been naguiejn güündi ni zagdxe loj gra ree bejn. <sup>18</sup> Gol been naguiejn da't din cwenëdi bejn ree zagdxe. <sup>19</sup> Compniar raliduladx ree Jesucrist, ad rgu' guialxyajn luxdoodi con ree bén rüjn lëjt xhienin, gol basa'nan loj Dios, laaman güün xguialguxtis, zi'c rëb loj xtiidxaman, lod rëb: “Naj naj bén rayal güün xguialguxtis, gudë tëen ni rayal bejn. Zian rëb dux Dad ree Dios.” <sup>20</sup> Rëb tëëman: “Bal rliaan bén rdxe'ch lüj, badëëd ni gawaman, o bal re'caman nijs, badëëd ni guië'man, zian guguaal yatuman.” <sup>21</sup> Ad bal tiëbil güün ni mal lüj gan, been ni zagdxe din güünl ni mal guin gan.

## 13

*Royal yaya'p ree guxtis respejt*

<sup>1</sup> Gra bejn rayal gucaagdiajg xtiidx gobiarn në xtiidx gra ree guxtis. Din por Dios yu' ree gobiarn në gra ree guxtis, por laaman zëed gualrniabee ni rajp reeman. <sup>2</sup> Zeel bén ad ruzoobt xtiidx ree bén rniabee guin, rën guiëban guial ad rënt reeman güün reeman zi'c rniabee Dios. Abi' ree bén rüjn zian laagajc reeman rguuil xcasti, <sup>3</sup> din bén rajp ree gualrniabee ad za't reeman par guchejb reeman bén rüjn ree ni zagdx, za' reeman par guchejb reeman bén rüjn ree ni mal. Yan bal rën guibanl guial ad zadxebtil bén ca' ree gualrniabee, gubajn zagdx din yaya'nl zagdx loj reeman. <sup>4</sup> Din laa reeman cayüjn reeman sirv loj Dios din yalaj reeman lüj. Per bal cayüjnl ni mal, zadxebil bén ca' ree gualrniabee, din ad ca' xlia'tzi reeman gualrniabee guin, laa reeman cayüjn sirv loj Dios din gudëed reeman casti bén rüjn ree ni mal. <sup>5</sup> Zeel rayal guzoobidi xtiidx ree bén ca' ree gualrniabee, ad güündi zian naabzi par ad zayaltidi casti, gol been zian guial ragbeedi zian rayal güündi. <sup>6</sup> Gol gudijx tëe impuest, din gusnuu nabee ree bén ca' ree gualrniabee, din laan naj mandad bayal reeman par güün reeman sirv loj Dios.

<sup>7</sup> Zeel gol badëed ni rayal gudëedidi, bal rayal cwe'quidi milia, gol gule'can o bal rayal quixidi impuest, gol gudijxan. Gol bazoob xtiidx bén rayal guzoobidi xtiidx, gol gojrp respejt bén rayal respejt. <sup>8</sup> Gol been naguiejn gol baguijx ni ralidi loj ree bejn, abi' ad rayalt gucwëez guiëndi bejn ree. Din bén rën bejn ree, ma cayüjnman cumplid gra ni rniabee xley Dios. <sup>9</sup> Xmandamient Dios rëban: “Ad sunël bén ren bén ad najt lacheelil, ad gugüjtil bejn, ad cwanl, ad sëëbladxil ni rajp ben ren”, per mandamient guie ree, con ree xmandamient ren Dios rajc cumplid con tijb mandamient rëb: “Guyën ben ren ree zi'c rën lüj gajc.” <sup>10</sup> Din bén rën bejn ree ad zajct güünman laa reeman ni mal guial rënman laa reeman. Zeel con guial rën lasa' bejn rayaaløj rüjnman gra ni rëb loj xley Dios.

<sup>11</sup> Gol gogbee xhie tiamp nadxu' ree yan, gol gogbee guial ma gojl yatie'ch dux bacaal ree. Din yan ma zidyob dxej gui't Jesucrist guial loj chi guzuløj qui baliduladxri ree xtiidxza'caman. <sup>12</sup> Mazri caydop tiamp guin, abi' mazri cabig dxej gui'taman, zeel rayal yasa'n ree ni rinë dunuj ree loj nejz mal, abi' yaguieen ree naguiejn yaguieen ree ganax ni zagdx din yunaal ree nejz zagdx. <sup>13</sup> Rayal yabajn ree zagdx zi'c rayal, ad yaguieen ree ni natu. Ad yazüdx ree, o ad rayalt yaguieen ree lanij naabzi par chu' mod yaguieen ree ni dxuudx. Ad rayalt sunë bejn ben ren bén ad najt lacheelaman, o guial gapaman graløj vijs, o gualrdil o gualrdëdloj. <sup>14</sup> Gol

basa'n lëjt gajc loj dux Dad ree Jesucrist, ad rayalt guibandi zi'ctzi rëndi.

## 14

### *Ad gusa'nxtudi bën qui rlliladxri xtiidx Dios*

<sup>1</sup> Zagdxé gol guneenë bën qui rlliladxri Jesucrist ad gusa'nxtudi laaman guial mazri rajquidi guial lojman. <sup>2</sup> Din yu' ree bën rlliladx Jesucrist naladx reeman zajc gaw reeman xhietëez nin, per yu' ree bën qui rlliladxri naladx reeman guial zagdxeli naj ad zajwt reeman bëel. <sup>3</sup> Bën rüjn xgab guial zajc gawaman xhietëez nin, ad rayalt güünman tibläd bën naladx yu' ni ad zajct gaw bejn. Guiáad bën rüjn xgab guial yu' ni ad zajct gaw bejn, ad rayalt guze'man bën naladx zajc gaw bejn xhietëez nin. Din niz loj Dios tiblojzi ma naj reeman xbejnman. <sup>4</sup> Zeel, ¿chu naj bejn din guze' xcompniaraman bën rlliladx Jesucrist por niguinzi ree? Diosqui ragbee bal cayünman ni zagdxé o cayünman ni mal. Abi' bal ad wayignia'taman xhienaag güünman, dxel dux Dad ree Jesucrist rajp gualrniabee par gagnëman laaman güünman zi'c rayal.

<sup>5</sup> Ziangajc yu' ree dux compniar ree bën raliduladxnë' ree Jesucrist naladx reeman guial yu' dxej zobjloj, yu'za ree bën naladx guial tiblojzi naj gra dxej, per achet güünan, tijbgaj bejn con ni naladxaman naj zagdxé par laaman. <sup>6</sup> Din bën rüjn xgab guial yu' dxej zobjloj, rüjnman zian persi rënman Dios. Guiáad bën naladx guial tiblojzi naj gra dxej, rüjnman zian persi rënman Dios. Abi' bën raw graloj, rawaman guial yu'guijcaman guial por Dios zëedan abi' rudëëman quixtëë lojman. Guiáad bën naladx guial yu' ni ad zajct gaw bejn, rüjnman zian guial naladxaman zian cayajpaman Dios respejt abi' rudëëman quixtëë lojman.

<sup>7</sup> Ni'qui du tijb ree ad nabant ree por dux xgabzi ree, o ad zayëjtt ree por dux xgabzi ree. <sup>8</sup> Bal nabajn ree por dux Dad ree Jesucrist par laa tëëman nabajn ree. Abi' bal yayëjt ree por laaman par laa tëëman yayëjt ree. Zeel bal nabajn ree o yayëjt ree, par dux Dad ree Jesucrist ma nayajc ree. <sup>9</sup> Din par zian güjtaman abi' babanman, din gacaman Dad loj ree bën naban në loj ree bën ma güjt.

<sup>10</sup> ¿Chexquiza din guze' lasa'l bën rlliladx Jesucrist o güün lasa'l tibläd ya? Awa dugra ree rayal yadxu' loj Dios din yadëed ree cwent lojman. <sup>11</sup> Zi'c ca loj xtiidxaman lod rëb:

Naj naj Dios naban,

abi' diidxli rnin lojdi guial gra ree bejn guzuxib lon.

Abi' gra ree bejn guiëb guial naj naj Dios.



<sup>12</sup> Abi' tijbgaj dunuj ree rayal yadëed ree cwent loj Dios, per por dunuj gajc ree.

*Ad gusajbidi bejn loj dol*

<sup>13</sup> Zeel ad rayalt yaneeguidx du lasa' ree Bén rlliladx ree Jesucrist, zagdxeli yaguieen ree naguiejn yaya'p ree cudad chitëe por dunuj ree güün reeman dol. <sup>14</sup> Naj najn xbejn Jesús, ragbeen guial ad dolt naj gaw bejn xhietëëznin. Per par Bén naladx guial ad zajct gawaman xhietëëznin, par laaman dolan cayünman bal gawaman xhietëëznin. <sup>15</sup> Yan bal por ni rawil naladx tijb xcompniaril Bén rlliladx Jesucrist guial dolan cayünl, abi' bal id ridxga'l laaman rën guiëban guial ad rëntil laaman. Gojp cudad chitëe por ni rawzil güün xcompniaril dol, din nëgajc por laaman güjt Jesucrist loj crüzj. <sup>16</sup> Ad güünl tijb ni guinieeguidx ree xcompniaril lüj, majsi lüj ragbee guial ad ni malt naj ni cayünl. <sup>17</sup> Niz loj Dios ad ni rawt bejn o ad ni rë'taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' tëe luxdoo man nix por xSprijt Dios. <sup>18</sup> Abi' Bén naban zian guial zinalaman Jesucrist, cayünman zi'c rën Dios, zi'c ruladx tëe bejn.

<sup>19</sup> Zeel rayal yaguieen ree naguiejn yabajnnë' du lasa' ree zagdx yabedxe tëe du luxdoo ree, din yasnuu yayagbee ree xhienaag yunaal ree xnejz Dios. <sup>20</sup> Gol gojp cudad chitëe por ni rawzidi gunijtidi tijb xbejn Dios. Walican graczi zajc gaw bejn. Per ni mal guin naj bal par xcompniaril dolan cayünl. <sup>21</sup> Zeel zagdxeli naj guial ad zajwtil bëel ad zë' tëetil vin o xhie stijb nin bal por laan güün xcompniaril dol. <sup>22</sup> Majsi lüj ragbee guial achet güünan gaw bejn xhietëëznin, per zagdxeli lüjzi con Dios. Naj rni guial, ¡xiquilbaa Bén ad yu'nawëëgt luxdoo rawaman xhietëëznin! <sup>23</sup> Per Bén yu'nawëëg luxdoo par gawaman xhienin, abi' gawaman laan laagajcaman ma cayün dol guial ad cayawtraman guidib ladxaman. Bal naladx bejn ad laat naj ni cayünman, dxel laagajcaman cayün dol.

## 15

*Royal yaguieen ree ni naladx bejn naj zagdx*

<sup>1</sup> Yan, dunuj ree guial ma nadxu'dxi'ch ree loj ni raliduladx ree Jesucrist, rayal yaguieen ree yudar Bén ad wazudxi'cht loj guialrlliladx Jesucrist luar yaguieen ree ni rayentzi ree, <sup>2</sup> dugra ree rayal yaguieen ree naguiejn din chu' luxdoo dux compniar ree zagdx con dunuj ree. Abi' rayal yaguieen ree ni naladx reeman naj zagdx, din chile' gusnuu güünbee reeman xnejz Dios. <sup>3</sup> Din ni'qui Jesucrist ad beent zi'c naj xixgabaman, gojc zi'c ca loj xtiidx Dios lod rëb: "Naj bayal gra ree diidx mal ni ninia reeman lojl." <sup>4</sup> Gra ni ca loj

xtiidx Dios, can din yayagbee ree xhienaag yabajn ree, abi' por xtiidx Dios zëed pacens nē guialragnē chitëe yalenyā' ree yalëjz ree ni ralëjz ree yaca' ree. <sup>5</sup> Dios, bén razaladx pacens nē guialragnē chitëe yalenyā' ree, laaman gagnē lëjt din guibandi nadxag con gra ree xcompniaridi zi'c naj xixgab Jesucrist. <sup>6</sup> Din tiblojzi guilies reeman xvalor Dios, xdad dux Dad ree Jesucrist.

*Bire'ch xtiidx Dios loj ree bén ad najt bén Israel.*

<sup>7</sup> Zeel, zi'c baca' Jesucrist lëjt par gaquidi xbejnman, zian-gajc gol guneenē ree xcompniaridi zagdxē, bén rliiladx ree laaman par guiliesidi xvalor Dios. <sup>8</sup> Gol basaaladx guial bi't Cristo loj guidxliuj par gulüüman bén Israel ree xtiidx Dios, zian bidgaguieenman sirv loj reeman, persi gojc cumplid promejs ni been Dios loj ree xbéngulal reeman, abi' zian biguien guial rüjnqui Dios cumplid xtiidxaman. <sup>9</sup> Bi't tēe Cristo loj guidxliuj din por laaman, bén ad najt ree bén Israel guilies reeman xvalor Dios guial rayaman laa reeman, zi'c ca loj xtiidxaman lod rëb:

Xt loj ree bén ad najt bén Israel guzatan lüj  
guial najl benza'c.

Gol tēen cant ree par lüj.

<sup>10</sup> Ziangajc rëb zatibljaj loj xtiidx Dios:

Lëjt bén ad najt ree bén Israel,  
gol babaa zi'c rabaa ree bén Israel.

<sup>11</sup> Zatibljaj loj xtiidx Dios rëb:

Gra ree bén ad najt bén Israel.

Nē los demazri ree bejn, gol gules xvalor Dios.

<sup>12</sup> Rëb tēe Isaías:

Loj xdiaa Isaí, grii tijb bén nabee bénguidxliuj ree,  
xt ree bén ad najt bén Israel, chililadx laaman.

<sup>13</sup> Dios bén ragnē dunuj ree ralëjz ree ni caylëjz ree, laaman yagu' luxdoodi zagdxē yabe'cdxē tēeman luxdoodi guial rliiladxidi laaman, din cwëz da'tidi ni gunee man por xSprijt Dios.

<sup>14</sup> Compniar raliduladx ree Jesucrist, naj ragbee chaaw guial zagdxē nabandi con ree xcompniaridi, ma ragbee tēedi zagdxē xhienaag chinalidi xnejz Dios, xt rajc rudëedidi consejw rulüü tēe xcompniaridi. <sup>15</sup> Per majsi zian, tio'p choon lajt loj gui'ch guie bacan diidx naa, din yasaaladxidi xhienaag guibandi. Rünan zian por guialrniabee ni ma banee Dios naj, <sup>16</sup> din gūnan sirv loj Jesucrist. Din da dxiinan naj gulün bén ad najt ree bén Israel xtiidxza'c Dios din guiban reeman zi'c rën Dios, din gac reeman naya niz lojman por xSprijtaman. <sup>17</sup> Ra'pan xhie gūnnë'n nabë, guial ragnē Jesucrist naj por ree dxiin cayūnan por Dios. <sup>18</sup> Per achetzi zajc guiën bal id zën

guial por Cristo cayünan laan, din laaman cayagnë naj persi cayünan yudar bën ad najt ree bën Israel din gac chililadx reeman guzooob tää reeman xtiidx Dios. Yan ma rliladx reeman laaman por ni rën loj reeman në por guial ruguiaa reeman xhienaag nabanen, <sup>19</sup> në guial ma baguiaa reeman sen ree con ree milagr ni ma gojc por xguialrniabee xSprijt Dios. Zian ma gutiechan xtiidxza'c Jesucrist guidibczi, diizd Jerusalén xt guidib niz Ilírico. <sup>20</sup> Din zian naj da xgaban günan, gatie'chan xtiidxza'c Jesucrist. Per ad lod ma guzulojt ben ren con dxiin guie, gatiechanan lod ad waguiejntczi reeman xcwent Cristo, <sup>21</sup> zi'c ca loj xtiidx Dios lod rëb:

Bën ad waguiejnt ree xcwentaman,  
güünbee reeman laaman.

Guiáad ree bën ad wayagbeet xcwentaman,  
gagbee reeman laan.

### *Rüjn Pab xgab cheman Roma*

<sup>22</sup> Abi' guial wan guidibczi lod ma rnin lojdi, zeel ad wayajct gan guidganan lëjt, majsi zianczi guyënan nidganan lëjt. <sup>23</sup> Per yan guial ma gulox gutiechan xtiidx Dios guidib niz guie, abi' guial ma gojc zien ijz ni rënan guidganan lëjt, <sup>24</sup> zeel rünan xgab guidganan lëjt chi gan España. Abi' chi gadëëdan guguiän lëjt, chi ma gojc tio'p choon dxej yu' luxdoon zagdx guial za'n con lëjt, dxel ma güündi naj yudar din gan España. <sup>25</sup> Per yan yaloj gan Jerusalén chigsa'nän tijb yudar par ree dux compniar ree bën rliladx ree Jesucrist. <sup>26</sup> Din bën Macedonia ree con ree bën Acaya bën rliladx gajc ree Jesucrist, been reeman xgab guto'p reeman yudar guin par ree bënprob zojb ree Jerusalén, bën rliladx ree Jesucrist. <sup>27</sup> Abi' por xixgab reeman guixhiaal reeman yudar guin, per zagdx naj ni cayüjn reeman din mal nuzëëb reeman loj reeman. Din por ree bën Israel bidxin xtiidx Dios loj reeman, dxel yan laa reeman guial ad najt reeman bën Israel, zagdxen guial güün reeman yudar bën Israel ree zi'ctzi gac reeman. <sup>28</sup> Zeel chi ma balooxan dxiin guie, chi ma bayün yudar guin, dxel gan España, abi' chi gadëëdan ladxidi dxel guidganan lëjt. <sup>29</sup> Naj ragbee guial chi guidganan lëjt, zien da't ni guneë Dad Jesucrist par ganin lëjt.

<sup>30</sup> Yan por dux Dad ree Jesucrist në guial rën xSprijt Dios dunuj ree, rniaaban lojdi din güündi naj yudar yarejdx yanaab ree Dios por naj. <sup>31</sup> Gol gurejdx gunab Dios din gagnëman naj loj ree bën Judea, bën ad rliladxt ree Jesucrist, gol gurejdx tää Dios por dux compniar ree bën rliladx ree Jesucrist, bën zojb ree Jerusalén din tiëb reeman tia' reeman yudar ni chigsa'nän par laa reeman. <sup>32</sup> Dxel bal gagnë Dios

ma chu' luxdon zagdxe guidganan lëjt dxel ma zajc yazi-  
iladxan la'tgaj za'n con lëjt. <sup>33</sup>Dux Dad ree Dios bén rabe'cdxe  
du luxdoo ree, laaman gagnë gradi. Amén.

## 16

### *Rugajpdioz Pab bejn ree*

<sup>1</sup> Yan ni gui't Febe ladxidi, béngunaa ni naj dux compniar  
ree guial raliduladx ree Jesucrist, bén cayüjn tää sirv lën  
yadoo ni zojb guiedx Cencrea. <sup>2</sup> Gol baca'man zagdxe por  
Dad Jesucrist, zi'c rayal yaguieennë' ree dux compniar ree  
bén rliladx ree Jesucrist. Gol beenman yudar bal xhienin  
ryaadxaman, din dád zien ree bejn ma beenman yudar nëgajc  
naj ma beenman yudar.

<sup>3</sup> Gol bagajpdioz Aquila con xbéngunaaman Priscila, bén  
cayüjn ree naj yudar cayguieenan sirv loj Jesucrist. <sup>4</sup> Abi'  
laa reeman xt guzuj reeman loj guialgüjt por naj, zeel rudën  
quixtää loj reeman. Abi' ad najtzi rudë quixtää loj reeman  
në ree dux compniar ree bén rliladx ree Jesucrist bén ad najt  
ree bén Israel rudëë quixtää loj reeman. <sup>5</sup> Gol bagajpdioz ree  
bén rliladx Jesucrist, bén rado'p ree lidx Priscila con Aquila.  
Gol bagajpdioz da miwan Epeneto, bén goc bén yaløj bililadx  
xtiidx Jesucrist niz Acaya. <sup>6</sup> Gol bagajpdioz Li, bén ma been  
da't lëjt yudar. <sup>7</sup> Gol bagajpdioz ree bén ladxan Adrónico con  
Junias, bén guyu'në' reen ladxguiib. Abi' ree xi apóstoles Jesús  
dád rën reeman laa reeman, abi' yaløj laa reeman bililadx  
Jesucrist guial lon.

<sup>8</sup> Gol bagajpdioz Amplias, da miwan bén rën da'tan guial  
nayajcan xbejn Jesucrist. <sup>9</sup> Gol bagajpdioz Urbano, bén cayüjn  
naj yudar cayguieenan sirv loj Jesucrist. Gol bagajpdioz  
tää da miwan Estaquis. <sup>10</sup> Gol bagajpdioz Apeles, bén ma  
balüü guial diidxiczi rliladxaman Jesucrist, gol bagajpdioz  
tää xfamil Aristóbulo. <sup>11</sup> Gol bagajpdioz tää Herodión ben  
ladxan, në ree xfamil Narciso, bén ma rliladx Jesucrist. <sup>12</sup> Gol  
bagajpdioz Trifena në Trifosa, bén cayüjn ree sirv loj Jesu-  
crist. Gol bagajpdioz tää Pérsida, bén naguieenbee ree guial  
dád cayüjnman sirv loj Jesucrist. <sup>13</sup> Gol bagajpdioz Rufo,  
bén diidxiczi zinal xnejz Dios, gol bagajpdioz tää xniaaman,  
bén rënan zi'c da nan. <sup>14</sup> Gol bagajpdioz Asíncrito, Flegonte,  
Hermas, Patrobas, Hermes në gra ree bén za' con laa reeman,  
bén ma rliladx ree Jesucrist. <sup>15</sup> Gol bagajpdioz Filólogo, Julia,  
në Nereo con bizanman, në Olimpás con gra ree bén rliladx  
Jesucrist bén za' ree con laa reeman.

<sup>16</sup> Gol bagajpdioz lasa'di zi'c rayal. Dux compniar ree bén  
raliduladx ree Jesucrist bén za' ree guie, rugajpdioz reeman  
lëjt.

<sup>17</sup> Compniar raliduladx ree Jesucrist, rniaaban lojdi din gapidi cudad con ree bën rlia' lasa' ree bejn, bën rusquiee ree bejn guial rulüü reeman ni ren ree guial loj ni ma basiididi. Ad guidxga'di laa reeman, <sup>18</sup> din ad lojt Jesucrist cayüjn reeman sirv, rüjn reeman ni rëntzi reeman, abi' con diidx-nagüüdx ne con diidxza'c rüjn reeman gan bën ad ragbeetczi ree o bën ad ragbeeza'ct ree xtiidx Dios. <sup>19</sup> Per lëjt, guidibczi ma ragbee ree bejn guial ruzoobquidi diidx zinalidi xtiidx Dios, dád nix yu' luxdon abi' rënan susindi par güündi ni zagdx ad par güüntidi ni mal. <sup>20</sup> Dios, bën rabe'cdxe luxdoo bejn, laaman gagnë lëjt nayob chitëë güünri xindxab lëjt gan. Dux Dad ree Jesucrist gagnë lëjt.

<sup>21</sup> Rugajpdioz Timoteo lëjt, bën cayüjn naj yudar con xchiin Dios ni cayünan, në ree bën ladxan bën la ree Lucio, Jasón, në Sosípater, rugajpdioz reeman lëjt.

<sup>22</sup> Në Tercio, bën cayüjn gui'ch guie rugajpdioz lëjt por dux Dad ree Jesucrist.

<sup>23</sup> Nëtëë Gayo rugajpdioz lëjt, lidxaman za'n, runee tëë lidxaman rado'p ree dux compniar ree bën rliladx ree Jesucrist. Në Erasto, bën naj tesorer luguiedx guie në bën la Cuarto ben rliladx Jesucrist, rugajpdioz reeman lëjt.

<sup>24</sup> Dux Dad ree Jesucrist güünle' gradi. Amén.

### *Diidx bigra bacaa Pab loj gui'ch guie*

<sup>25</sup> Radëën quixtëë loj Dios din laaman zile' gagnë lëjt din gusnuu gagbeedi sudxi'ch tëedi loj xtiidxza'c Jesucrist, zi'c ma balüün lëjt xhienaag din gaquidi perdon. Din zian naj xixgab Dios diizd chi gad guidxliuj gacchaaw, xgab ni ad gogbeet ree bejn diizd guia'xchej. <sup>26</sup> Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree bën badëë xtiidx Dios loj ree bejn zi'c gunabee Dios laa reeman, bën naban goctëëz. Abi' guidibczi care'ch xtiidx Dios din chililadx ree bejn Jesucrist guzoob tëë reeman xtiidxaman.

<sup>27</sup> ¡Tijbzi Dios, bën rajc gradooczi, rayal yaya'p reeman respejt zianczi por Dad Jesucrist! Amén.

## Gui'ch yaløj ni guxhaal San Pabl loj ree bèn Corinto rliladx Jesucrist

### *Rxhiaal Pab xtiidx Dios*

<sup>1</sup> Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, bèn rliladx Jesucrist. <sup>2</sup> Caxhalan gui'ch guie par lèjt najdi bèn rliladx xtiidx Dios luguiedx Corinto, lèjt guial ma nayadi delant loj Dios por Jesucrist, abi' ma bacaabee Dios lèjt gaquidi xbejnman bacaabee tèëman gra ree bèn gra lad bèn rliladx ree Jesucrist, bèn naj Dad par dunuj ree nē par laa reeman. <sup>3</sup> Dux Dad ree Dios nē Dad Jesucrist gūünle' lèjt, yabe'cdxe tèë reeman luxdoodi.

### *Rudëed Pab quixtëe loj Dios*

<sup>4</sup> Gra dxejczy rudëdan quixtëe loj Dios por lèjt zi'c ma gognëman lèjt guial rliladxidi Jesucrist. <sup>5</sup> Nē guial najdi tijbzi con Jesucrist dád ma gognë Dios lèjt, baneeman lèjt quiar-guiejn din guinieedi chignia' tèedi xtiidxaman. <sup>6</sup> Zian rguien guial diidxli naj ni ma biguiejndi por Cristo diidz chi guzuloj bililadxidi laaman. <sup>7</sup> Abi' zianczy rajpidi xyudar Dios la'tgaj rbëzidi dxej ni gui't Jesucrist zatijb. <sup>8</sup> Abi' Dios gagnë lèjt din sudxi'chidi guidiblagaa loj ni rliladxidi laaman, chitëe xhie xtolidi chu' dxej ni gui't dux Dad ree Jesucrist zatijb. <sup>9</sup> Din Dios diidxli rüjn xtiidxaman cumplid, abi' laaman naj bèn gule lèjt din gaquidi tijbzi con dux Dad ree Jesucrist.

### *Ad rayalt la' lasa' ree xbejn Jesucrist*

<sup>10</sup> Compniar raliduladx ree Jesucrist, rniaaban lojdi por Jesucrist din guidxag cwedi, ad gaquidi tio'p lala', tijbzi gol gojc, tijbzi xgab gol been. <sup>11</sup> Rnin lojdi zian compniar raliduladx ree Jesucrist, din ma gogbeen guial yu' wadijl entr lèjt, zian bagojn ree xfamil Cloé naj. <sup>12</sup> Guial garent garen rëb ree bejn, yu' reeman rëb: "Naj naj xbejn Pab", yu' tèë reeman rëb: "Naj naj xbejn Apolos", yu' reeman rëb: "Naj naj xbejn Bëd", yu' tèë reeman rëb: "Naj naj xbejn Cristo." <sup>13</sup> Per naj rni lojdi guial Cristo tijbzi najman, din ad najt güt loj crüjz por lèjt, ad gurobnijs tèëtidi par gaquidi da bejnan. <sup>14</sup> Quixtëe Dios chi wan ladxidi achut mazri barobnijsan, Crispozi nē Gayo. <sup>15</sup> Chitëe guiëbidi guial gurobnijsidi par gaquidi da bejnan. <sup>16</sup> Barobnijs tèën xfamil Estéfanas, per ad rusaaladxtran chu mazri barobnijsan. <sup>17</sup> Din ad guxhaalt Cristo naj par gurobnijsan bejn ree, guxhaalaman naj par gatie'chan diidx xhienaag gap bejn perdon loj Dios. Ad cane

tëetan con diidx ni yadxaløj ree bejn naj luar cu'guijc reeman par xhie güjt Cristo loj crüjz.

*Xgualrniabee Dios në xquiargueijnman*

<sup>18</sup> Gra ni raguie'ch ree guial por xhie güjt Cristo loj crüjz, achet lasajcan par ree bën zë loj nejz mal. Per par dunuj ree guial ma raya'p ree perdon, dád lasajc xgualgüjtaman din zian rayagbee ree xhienaag naj xgualrniabee Dios. <sup>19</sup> Abi' loj xtiidx Dios rëb:

Gunijtan xquiargueijn ree bën ni rëb guial rajc da't reeman, abi' guscayjan xquiargueijn ree bën ni rëb guial rignia' da't reeman.

<sup>20</sup> Yan, ¿con ree bën rëb guial rajc da't reeman? ¿Con ree mextr rajc ley? ¿Con ree bën rëb guial rajc da't reeman xcwent ree ni yu' loj guidxliuj? Par Dios achet lasajc xquiargueijn bénguidxliuj. <sup>21</sup> Abi' por xquiargueijn Dios ragbeechaawaman guial ad zayünbeet bénguidxliuj laaman por xquiargueijn reeman, zeel beenman xgab yabëëman bejn loj casti por xtiidxaman ni caylүүn bejn ree. Abi' ree bën yarii loj casti guin laa reeman naj bën rliladx laaman, majsi par ree ben ren achet lasajc ni canin por Cristo.

<sup>22</sup> Din bën Israel ree rën reeman guguaa reeman milagr din chililadx reeman, abi' ree bën ad najt bën Israel rën reeman guien reeman ni mazri nawëëg din chililadx reeman. <sup>23</sup> Per dunujn ni caylүүn bejn ree naj par xhie güjt Cristo loj crüjz, abi' ree bën Israel rdxe'ch reeman, guiáad par ree bën ad najt bën Israel achet sirv rüjn ni caylүүn. <sup>24</sup> Per par ree bën ma bacaabee Dios, zi'c ree bën Israel zi'c ree bën ad najt bën Israel, por Cristo rguien xgualrniabee Dios në xquiargueijnman. <sup>25</sup> Din ni rulүү achet lasajc guial ni rüjn Dios, laan naj ni mazri lasajc loj xgualrajc bénguidxliuj. Abi' xt ni bigra xgualrniabee Dios laan naj ni mazri lasajc loj xgualrniabee bénguidxliuj. <sup>26</sup> Gol gogbee compniar raliduladx ree Jesucrist guial ta'nzi ree bën rliladx laaman naj bën rignia' zi'c naladx ree bénguidxliuj, ta'nzi ree bën rliladx laaman rajp guialrniabee loj guidxliuj guie, abi' ta'nzi ree bën rliladx laaman naj ree bën za loj ree famil ni naj bën zøjbloj. <sup>27</sup> Abi' Dios gulej ree bën ni naladx ree bejn ad rajcza'ct din yaya'nxtu ree bën rajc da't, gulej tëëman bën ad ca't ree guialrniabee din yaya'nxtu ree bën ca' guialrniabee. <sup>28</sup> Dios gule ree bën ni naladx ree bejn guial achet sirv laa reeman, bën ni naladx ree bejn guial achet lasajc reeman, bën ni achut naj loj guidxliuj guie din chiquiedaman xgualdxal ree bën naj ree chunin loj guidxliuj guie. <sup>29</sup> Zianan zeel achut zajc güün benro' delant loj Dios. <sup>30</sup> Yan por Dios ma najdi tijbzi con Jesucrist, dxel por laaman rtia'di xgualrajc Dios. Abi' guial raliduladx ree Jesucrist ad

zayaltri ree casti, por laaman ma naya ree, nayajc tēē ree par laaman abi' ma raya'p ree perdon loj Dios. <sup>31</sup> Zianan din gac zi'c rēb loj xtiidx Dios lod rēb: “Bal yu' bèn rēn guilies xvalor gajc, luar güündi zian gol gules xvalor dux Dad ree Jesucrist.”

## 2

### *Xtiidx Jesucrist bèn cwa loj crūjz*

<sup>1</sup> Compniar raliduladx ree Jesucrist lējt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx nawēēg par chignia'di. <sup>2</sup> La'tgaj guzun con lējt ad gunetan diidx ren ree lojdi, tijbzi xcwent Jesucrist bèn cwa loj crūjz. <sup>3</sup> Abi' chi wan ladxidi zi'c tijb bèn ni ad yu't gojl, rniyczan guial rdxeban bialan lojdi. <sup>4</sup> Nē chi gunenē'n lējt, chi gunen xtiidx Dios lojdi, ad gunenē'tan lējt con ree diidx ni gūnan lējt gan por da diidxan, benan gan rliladxidi Jesucrist por xyudar xSprijt Dios nē xguialrniabeeman. <sup>5</sup> Din guiguien guial ni rliladxidi Jesucrist zēēdan por xguialrniabee Dios ad por xguialrajct bēnguidxliuj.

### *Por xSprijt Dios nūnbee bejn laaman*

<sup>6</sup> Majschi ralüün bèn ni ma rajc ree mazri xtiidx Dios, ralüün laa reeman por guialrajc. Per ad por guialrajct ni yu' loj guidxliuj guie, lasa' guialrajc ni rajp ree bèn rniabee, guialrajc ni yu' dxej nit. <sup>7</sup> Ralüün laa reeman por guialrajc ni zēēd por Dios, din yanee ree zi'c naj xixgab Dios, xgab ni goc ni nagueie'ch par ree bēnguidxliuj, abi' xgab guin naj guial chililadx reeman Jesucrist, diizd chi gad guidxliuj gacchaaw been Dios xgab guin din gac yayal ree xanyabaa. <sup>8</sup> Laan naj tijb ni ad gogbeet ree bèn rniabee loj guidxliuj guie, din bal niagbee reeman dxel ad nucaat reeman dux Dad ree Jesucrist loj crūjz, bèn ca' guialrniabee. <sup>9</sup> Per loj xtiidx Dios rēb:

Achut waguiaa, achu tēēt waguiejn

abi' ni'quid wayüjnt bēnguidxliuj xgab

por ni nagu'chaaw Dios par ree bèn rēn laaman.

<sup>10</sup> Per dunuj ree ma balüü Diosan duloj ree por xSprijtaman bèn naban con dunuj ree, din xSprijt Dios gran ragbeeman, xt ni mazri nagueie'ch ni zēēd por Dios.

<sup>11</sup> Achut ragbee xhie xgab cayüjn tijb bejn. Xsprijtsaman ragbee xhie xgab cayüjnman. Ziangajc xSprijt Dios tijbzi laaman ragbee xhienaag naj xixgab Dios. <sup>12</sup> Abi' dunuj ree guial ma zunaal ree xnejz Dios, ad nabajnt ree con tijb sprijt ni zēēd loj guidxliuj guie, ma nabajn ree con Sprijt zēēd loj Dios, din por xSprijt Dios yayagbee ree gra ni ma bazaladx Dios duloj ree guial najman benza'c. <sup>13</sup> Abi' laa reen naj ni caylüün bejn ree, per ad por dux quiarguejntan, xSprijt Dios



culüü dunujn xhienaag yanen. Zian ralüün xcwent Dios bèn ma nabannë xSprijtaman.

<sup>14</sup> Per bèn ad nabannët xSprijt Dios ad rliladxtaman ni zëed ree por Dios ni rulüü xSprijt Dios dunuj ree, din par laaman najn tijb ni ad rüjnt sirv. Zeel ad zajct chignia'man xcwent Dios din con xSprijtzi Dios zajc chignia' bejn ni rën guiëban. <sup>15</sup> Per bèn ma nabannë xSprijt Dios por Sprijt guin rignia'man ni naj xcwent Dios, abi' ni'qui tijb ree bèn ad nabannët xSprijt Dios ad rignia't chexc zeel rignia'man ni guin ree. <sup>16</sup> Loj xtiidx Dios rëb: “¿Chu ma bignia' xixgab Dios? ¿Chu zajc gulüü Dios ni güünman?” Per dunuj ree, naj dux xgab ree zi'c xixgab Cristo.

### 3

#### *Compniar rüjn ree sirv loj Dios*

<sup>1</sup> Compniar raliduladx ree Jesucrist, chi guzun con lëjt ad gunenë'tan lëjt zi'c ree bèn ma nabannë xSprijt Dios, gunenë'n lëjt zi'c ree bèn ad nabannët xSprijt Dios, zi'c ree bèn qui guzulojri rliladx Jesucrist. <sup>2</sup> Diidx ad nawëëgt ree gunenë'n lëjt zi'c rudëë bejn lejch loj tijb xindobëz guial xo gawix ni raw bengol, zian gunenë'n lëjt diidx ad nawëëgt ree. Abi' ni'qui yan ad zile't ganenë'n lëjt zi'c ree bèn ma rignia' mazri xtiidx Dios. <sup>3</sup> Din sta nabandi zi'c naban gra ree bénguidxliuj. Nadëdloj lasa'di rdil tëedi, zian rguien guial sta nabandi zi'c gra ree bénguidxliuj bèn ad zinalt ree xnejz Dios. <sup>4</sup> Din chi rëbidi: “Naj naj xbejn Pab”, o chi rëbidi ya: “Naj naj xbejn Apolos”, zian rguien guial sta cayüjndi zi'cgajc chutëëz bénguidxliuj.

<sup>5</sup> Per naj rni lëjt: ¿Chu naj Pab o chu naj Apolos? Gol gogbee guial nayajczan tio'p ree bèn cayüjn sirv loj Dios persi bile' bililadxidi tijb gajc dunujn cayguieen dxiin ni bane Dios dunujn. <sup>6</sup> Yaguie'ch ree guial naj naj zi'c bèn rxübin abi' Apolos naj bèn rguuil, per por Dios cayagbeedi mazri xtiidxaman zi'c rusni'saman tijb cwaandoo. <sup>7</sup> Abi' zi'c bèn rxübin zi'c bèn caguuil mandadzí cayüjn reeman, Diosan naj bèn ni rusni's ni rxübin reeman. <sup>8</sup> Yan ziangajc naj con Apolos tijbzi mandad cayguieenan, rayagbeen guial zunee Dios dunujn ni rayalan bal xhienaag yaguieenan mandad ni baneeman yaguieen tijb gajc dunujn. <sup>9</sup> Zeel naj con Apolos nayajcan compniar cayguieenan xmandad Dios.

Yaguie'ch ree lëjt naj xguiniaa Dios lod cayguieenan dxiin o lëjt naj zi'c tijb yu ni cayüjn Dios. <sup>10</sup> Abi' naj guial catiechan xtiidxaman najn zi'c tijb albanil bèn ni rajp da't cudad din grii xchiinman zagdxé guial bacaabeeman naj günan xcimiant yu guin. Abi' ree bèn ni cusnuu culüü xtiidx Dios, laa reeman naj zi'c bèn cusnuu cayüjn yu guin. Per rayal gap reeman cudad

xhienaag cales reeman yu guin, <sup>11</sup> din achut zajc guchaa cimiant ni ma benan, abi' cimiant guin naj guial rliladx Jesucrist. <sup>12</sup> Abi' ree bèn ni cayguie'ch ree naj ree bèn ni cusnuu cales yu loj cimiant ni cayguie'ch ree naj guialrliladx Jesucrist, bal cayüjn reeman laan con or o con plajt o con ree guiaj zagdxe o con yag o con biqui o con balagya'. <sup>13</sup> Per chi guidxin dxej ni güün Dios xguialguxtisaman, dxel guiguuien xhienaag naj xchiin reeman. Din dxej guin gac zi'c chi rajc prueb xhienin loj guij din guiguuien xchiin tijb gaj bejn. <sup>14</sup> Abi' bal rüjn sirv ni beenman zi'c tijb bèn ni ruzoob tijb yu ni ad re'ct, zaca'man ni rayalaman por ni beenman. <sup>15</sup> Per bal che'c ni beenman, sacaman zi'c tijb bèn ni re'c lidx abi' penz rliaaman loj bajl, din zajcaman perdon per gusëëbaman gra.

<sup>16</sup> Zeel gol gogbee guial lëjt naj zi'c tijb xyadoo Dios guial nabandi con xSprijt Dios. <sup>17</sup> Abi' bal chu bèn gutie'chdojn bèn rliladx ree Jesucrist, zunidloj Dios laaman guial ruse'nman xyadoo nagle'man ni canin naj lëjt guial najdi xbejnman.

<sup>18</sup> Ad gusquiee lëjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli bènrajc da't. <sup>19</sup> Din delant loj Dios achet lasajc guialrajc bénguidxliuj, tib lajt loj xtiidxaman rëb: “Ad rudëët Dios mod grii zagdxe ni naj xixgab ree bèn naladx guial dád nasin reeman par güün reeman tijb ni ad najt xnejz.” <sup>20</sup> Rëb tëë loj xtiidxaman: “Dios ragbeechaaw guial xixgab ree bèn rajc da't achet lasajcan.” <sup>21</sup> Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra. <sup>22</sup> Ma nulendi dunujn, naj Pab, Apolos në Bëd. Xieendi naj guidxliuj, guialnaban, guialgüjt, ni yu', në ni qui chu'ri, xieendi naj gra. <sup>23</sup> Abi' lëjt ma najdi xbejn Cristo abi' Cristo naj Xi'n Dios.

## 4

### *Dxiin ni been ree bèn naj ree xi apóstoles Jesús*

<sup>1</sup> Gol baguiaa dunujn zi'ctzi xmojs Cristo par yasiidan bejn ree xhienaag naj xixgab Dios, xgab ni naguie'ch par bejn. <sup>2</sup> Per lëjt ragbee guial tijb mojs naj par güünman gra ni rayal güünman din gap reeman laaman confianz. <sup>3</sup> Zeel ad rutan xgab bal xhienaag ruguiaadi naj o bal xhienaag ruguiaa ree guxtis naj, din ni'qui naj ad zajct ganin xhienaag najn. <sup>4</sup> Din majsi bal naladxan guial achet ni mal wayünan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaag cayünan. <sup>5</sup> Zeel ad rayalt yadxa lojdi chu cayüjn zagdxe o chu ad cayüjnt zagdxe, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandadaman

guidib du luxdoo ree, dxej guin yayagbee ree xhie diidxza'c guinee Dios por tijb gaj dunuj ree.

<sup>6</sup> Compniar raliduladx ree Jesucrist, gra ree ni canin lëjt wen par lëjtan. Abi' Apolos con naj nayajcan tijb ejempl par lëjt, din por dunujn gusiididi ad tēdlaj guiliesidi xvalor bejn chitēē por zian gusa'ndi trajs stijb bejn. <sup>7</sup> Din ni'qui tijb bejn ad lasajct mazri loj stijb bejn. ¿O xhie rajpidi ni ad baneet Dios lojdi? Abi' bal por laaman rajpidi ni rajpidi, ¿chexc zeel rlies xvalorgajquidi zi'c rulüü ad por Diost rajpidi laan?

<sup>8</sup> Lëjt naladxidi achet ryaadxidi, guial ma bayaaløj rignia'di abi' ad ryaadxtridi dunujn. Abi' naladxidi najdi zi'c ree rey. ¡Per xinix niajquidi rey din nanabeen con lëjt! <sup>9</sup> Yu' dxej naladxan guial dunujn nayajcan xi apóstoles Jesús, Dios basial dunujn yayajcan zi'c ree bèn ad lasajct, zi'c ree benmal ni rayal guialgüjt, abi' radxaløj ree anjl nē ree bénguidxliuj dunujn. <sup>10</sup> Abi' la'tgaj nayajcan zi'c ree bèn ad yu't xquiar-guiejn par bénguidxliuj guial ratie'chan xtiidxza'c Cristo, lëjt rlies xvaloridi guial rignia' da'tidi guial rliladxidi laaman. Dunujn nayajc zi'c bèn ad yu't gojl guiáad lëjt naladxidi yu' da'tidi gojl abi' rajp ree bejn lëjt respejt guiáad dunujn ad rēnt reeman dunujn. <sup>11</sup> Xt yandxej sta cayzaagdiajn por guialrliian, guial re'c nijs nē guial ryaadx du xaban. Zienloj ni rüjnnē ree bejn dunujn, achet du lidxan. <sup>12</sup> Abi' dád radxagan raguieenan dxiin din guidxel ni yadaawan. Chi ruzaal ree bejn diidxmal du guiican radxi'nān con diidxza'c, abi' radaanan ni rüjnnētzi reeman dunujn. <sup>13</sup> Abi' chi rnieeguijdx reeman dunujn, raneeza'cnē'n laa reeman. Xt yan nayajcan zi'c tijb guix par bénguidxliuj, nayajcan zi'c tijb ni ad rüjnt sirv par laa reeman. <sup>14</sup> Ad cucatan gui'ch guie par gusa'nxtun lëjt, cucan laan din gunen lëjt consejw zi'cgajc da xi'n reen guial rēnan lëjt. <sup>15</sup> Din majsi gapidi zi'c chii mil ree bèn gusiid lëjt, per najzi naj zi'c tijb Dad par lëjt. Din por naj guzuløj rliladxidi Jesucrist chi basidan lëjt xtiidxza'camān. <sup>16</sup> Zeel rniaaban lojdi din guibandi zi'c nabanān.

<sup>17</sup> Din par zian rxhialan Timoteo guitixlojman lëjt, bèn rēnan zi'c da xi'nān laaman diidxli rliladxaman Jesucrist. Laaman gusaaladx lëjt xhienaag nabanān guial rliladxan Jesucrist, din zi'c nabanān naj ni cusidan bèn rliladx ree Jesucrist gra lod ran. <sup>18</sup> Yu' ree xcompniaridi naladx guial ad zitixlotran lëjt abi' rlies xvalor reeman guial naban reeman zagdxe. <sup>19</sup> Per Dios guneē permis din diob guitixlon lëjt dxel gagbeen wali reeman ya naban reeman zi'c rniee reeman o rnieez reeman. <sup>20</sup> Din guial guiban zi'c rniabee Dios ad najtan diidxzi, rayal güün bejn zi'c rniabee Dios con xguialrniabee-man. <sup>21</sup> Yan, ¿conin rēndi günan chi guitixlon lëjt, gadilē'n lëjt

ya o gui nan l jt ganen 'n l jt diidxa'c?

## 5

### *Xhienaag gac con b n r jn tijb dol*

<sup>1</sup> Ma bacagdiagan guial tijb l jt b n rliladx ree Jesucrist nabann  xnarojpidi zi'c lacheelidi, ni'quiza ree b n ad n nbeet Dios ad r jnt lasa' dol guin. <sup>2</sup> Abi' l jt r jn  benro', luar r jn  benro' gol guyunaya gol bab  t  b n guin lojdi. <sup>3</sup> Majs  ad za'tan con l jt, per r nan xgab por l jt zi'cgajc rul   za'n con l jt, abi' ma benchaawan xgab xhie rayal b n r jn dol guin. <sup>4</sup> Zi'c guialrniabee ni banee Jesucrist naj, naj rni l jt: "Gol bachajg lasa'di." Dxel gol gunaladx guial za'n con l jt abi' por xguialrniabee Dad Jesucrist, <sup>5</sup> gol been b n guin tiblax, gol basa'nman loj xindxab din gagnaaman o sagdiajman por ni cay jnman din gacaman perdon dxej ni gui't dux Dad ree Jesucrist.

<sup>6</sup> Ad nixtan guial rlies xvalorgajquidi abi' rti jbidi rajc lasa' ree dol guin. Gol gogbee guial zi'c r jn levadur cob par guidxtil ziangajc con tijb b n g  n dol ma z  gajcan zian con gra ree lasa'di. <sup>7</sup> Zeel gol been naguiejn din gaquidi naya zi'c cob harin ni ad yu't levadur guijc. Din zi'c bag jt ree bejn tijb xiil lanij pascw din yaya xtol reeman, ziangajc dunuj ree por xguialg jt Jesucrist ma naya ree loj Dios. <sup>8</sup> Abi' guial yabaa ree por zian naj guial yabajn ree guidib du luxdoo ree zi'c rayal, zi'c guidxtil ni ad no'cht levadur, luar yabajn ree con ree ni mal n  ree dol zi'c babajn ree yaloj.

<sup>9</sup> Abi' zi'c ma rnin lojdi loj stijb gui'ch ni ma guxhalan lojdi, ad guchajquidi b n naban ree nadxuudx. <sup>10</sup> Ad canen 'tan l jt zian por ree b n ad rliladxt Dios, b n naban ree nadxuudx o rz  bladx reeman ni ruguiaa'tzi reeman o naj reeman gubaan o r n reeman ni ren luar gui n reeman Dios, din bal zianan dxel ryaadx yariidi loj guidxliuj guie. <sup>11</sup> B n ni canin l jt naj ree b n ni r b naj ree xcompniaridi, b n rliladx ree Jesucrist abi' naban reeman nadxuudx, o rz  bladx reeman ni ruguiaatzzi reeman, o r n reeman ni ren ree luar gui n reeman Dios, o rb   reeman xtiidx bejn, o naj reeman bengui', o b ngubaan. Xcompniaridi b n naban ree zian ni'quid rayalt gawn di laa reeman. <sup>12-13</sup> Ad da cwenttan naj ganen por ree b n ni ad najt dux compniar ree loj ni raliduladx ree Jesucrist bal rajp reeman dol o ad rajpt reeman dol, Dios naj b n g  n guialguxtis con laa reeman, per dux cwent ree naj guial yazuxnejz ree b n naj ree dux compniar ree b n rliladx ree Jesucrist. Zeel gol bab  b n cay jn dol entr lojdi.

## 6

*Chi yu' wadijl entr ree bën rliladx Jesucrist*

<sup>1</sup> Zi'c chi xhie rzajcnë tijb xcompniaridi bën rliladx Jesucrist, ¿chexc zeel rëjdi loj guxtis din yabëëxnejzaman ni rza-jquidi luar chedi loj ree xcompniaridi bën rliladx ree Jesucrist? <sup>2</sup> ¿Id rliladxidi ya guial yu' dxej bën rliladx ree Jesucrist laa reeman naj bën güün xguialguxtis loj ree bénguidxliuj? Abi' bal yu' dxej güün xguialguxtis reeman loj bénguidxliuj, ¿chexquiza zeel ni ad nawëëgt ni rzajc ree xcompniaridi ad rajct rabëëxnejzidi? <sup>3</sup> ¿Id ragbeedi ya guial xt loj ree xianjl Dios yu' dxej yaya'p ree guialrniabee? ¡Abi' xt mazri zile' yalëëxnejz ree ni cayza'c ree loj guidxliuj guie! <sup>4</sup> Zeel zi'c chi xhie rzajcnë lasa'di, ¿chexc zeel zëdi loj ree bën ad najt xbejn Cristo din yabëëxnejz reeman ni rzajquidi? <sup>5</sup> Canin lëjt ni guin ree din yatu lojdi. ¿Wen nid yu'czi tijb lëjt zajc yabëëxnejz ni rzajc lasa'di ya? <sup>6</sup> Per lëjt luar güündi zian aal rudëed lasa'di loj ree bën ni ad rliladxt Dios.

<sup>7</sup> Abi' natun guial gudëed xcompniaridi loj guxtis guial cadilidi, mejorli gol gudaan ni rüjnnë reeman lëjt. Mejrli tiëbidi cuan reeman xieendi. <sup>8</sup> Per luar güündi zian, lëjtli cayüjn ree ni mal guin con ree xcompniaridi bën rliladx ree Jesucrist. Rtia'di xieen reeman abi' rüjnnëdi laa reeman ni ad rayalt güünnëdi laa reeman.

<sup>9</sup> ¿Id ragbeedi ya guial bën naj ree benmal ad zut reeman loj xguialrniabee Dios? Gol gogbee guial loj xguialrniabee Dios ad zut ree bën ni naban ree nadxuudx, në ree bën rën ree ni ad najt ree Dios, në ree bën za'në bën ad najt lacheel reeman, në ree xinguaaw rüjn zi'c béngunaa në ree xin rën lasa' xinguaaw zi'c béngunaa. <sup>10</sup> Në ree béngubaan, në ree bën rzëëbladx ni ruguiaatzi reeman, në ree bengu' con ree bën rnieeguijdx bejn, në ree bën raguuil xhienaag chiquied reeman xieen bejn, ad zut reeman loj xguialrniabee Dios. <sup>11</sup> Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb bën ni ad wayüjnt dol por xguialrniabee Dad Jesucrist në por xSprijt Dios bën ma nabannëdi.

*Dux cuerp ree naj par Dios*

<sup>12</sup> Walican zajc yaguieen ree zi'ctzi rayën ree, per ad gratan naj zagdxe par güün bejn. Zajc günan zi'ctzi rënan, per ad zatiëëbtan xhie nabee naj. <sup>13</sup> Yu' ree bejn rëb: “Guialraw naj par lën bejn, abi' lën bejn naj par guialraw.” Walican, per gunidloj Dios grop ree ni guin. Per ad walitan guial xcuerp bejn naj par güünman ni dxuudx ree con bën ad najt lacheelaman. Din dux cuerp ree naj par Dios, abi' laaman rniabee dux cuerp

ree. <sup>14</sup> Dxel zi'c basban Dios dux Dad ree Jesucrist, ziangajc yasbanman dunuj ree por xgualrniabeeman.

<sup>15</sup> Gol gogbee guial ma najdi tijbzi con Cristo, guial dux cuerp ree ma naj tiblia' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yunë' ree tijb béngunaa dxuudx? ¡Ad rayalt gac zian! <sup>16</sup> ¿Nid ragbeedi ya guial chi runë bejn tijb bèn ni ad najt lacheelaman, dxel ma najman tijbzi con bendxuudx guin? Lëjt ragbee guial loj xtiidx Dios rëb: "Grop reeman ma naj tijbzi." <sup>17</sup> Per bèn ni ma naj tijbzi con dux Dad ree Jesucrist, najman tijbzi con laaman por xSprijt Dios.

<sup>18</sup> Gol gojp da't cudad ad güündi ni dxuudx ree con bèn ad najt lacheelidi. Xhietëz dol ren ad ruxhiintan xcuerp bejn zi'c rxin xcuerpaman chi rüjnman ni dxuudx con bèn ad najt lacheelaman. <sup>19</sup> Din gol gogbee guial lëjt naj xyadoo xSprijt Dios bèn ma baneeman lojdi, dxel zian zi'c ma nabandi con xSprijt Dios ad rniabeetri lëjt gajc. <sup>20</sup> Din par zian gudijx Jesucrist por dunuj ree chi gütaman loj crüjz. Zeel gol beennë xcuerpidi dxiin par güündi Dios bèn zøjbloj, din laaman naj bèn rniabee lëjt.

## 7

### *Consejw xcwent guialruxhliaa*

<sup>1</sup> Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdxe naj guial ad zuxhliaat bejn. <sup>2</sup> Per chitëë güün bejn dol con stijb bejn, zagdxen guial tijb gaj xinguaaaw chu' lacheel o tijb gaj béngunaa chu' lacheel, <sup>3</sup> din gudëë xinguaaaw guin gust lacheelix abi' béngunaa guin gudëëzaman gust lacheelaman. <sup>4</sup> Din chi ma baxhliaa tijb béngunaa ad laatraman rniabee xcuerp, xinguaaaw guin naj xin rniabee laan. Ziangajc chi ma baxhliaa xinguaaaw, ad rniabeetri xcuerpax, béngunaa guin ma rniabee laan. <sup>5</sup> Zeel xinguaaaw në béngunaa ad rayalt gudxoon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cwedx guiniabidi Dios, zagdxen. Per chi ma gudëd ree dxej guin, gol bachajg lasa'di stijb chitëë güün xindxab lëjt gan con ree xixgabidi.

<sup>6</sup> Ad canitan lojdi guial najczi guxhliaa bejn, per ad ni maltan guial guxhliaadi. <sup>7</sup> Da xgaban naj guial xi nix gra ree bejn gac zi'c naj, per tijb gaj bejn ma bazaladx Dios xquiar-gueijnman guial xhienaag guibanman, bal guxhliaaman o bal id zuxhliaaman.

<sup>8</sup> Par ree bèn xtijb në par ree béngunaa bizëjb, naj rni guial zagdxeli yaya'n reeman zi'c naj. <sup>9</sup> Per bal id zadaan reeman

guial ad zuxhliaat reeman, dxel zagdxeli guxhliaa reeman luar gudëed xcuerp reeman casti guial taan reeman.

<sup>10</sup> Guiáad ree bèn ma baxhliaa, ad da diidxtanan ganin lojdi, xtiidx dux Dad ree Jesucristan guial ad zaro'nt béngunaa lacheelaman. <sup>11</sup> Per bal tio'n lacheelaman ad rayalt guxhlianëman xin ren, zagdxeli naj yachajg lasa' reeman stijb. Ziangajc xinguaaaw ad najt yala' lacheelix.

<sup>12</sup> Yan, ni ganin ad ni guneet dux Dad ree Jesucristan, per naj rni lojdi: Bal yu' xinguaaaw rliladx Jesucrist abi' lacheelix ad rliladxt, abi' bal par béngunaa guin achet güünan, dxel ad najt yala' lasa' reex. <sup>13</sup> Ziangajc bal rliladx béngunaa guin abi' lacheelaman ad rliladxt, abi' bal par xinguaaaw guin achet güünan, dxel ziangajc ad rayalt yala' reeman. <sup>14</sup> Din xinguaaaw ni ad rliladxt Jesucrist, züjnle' Dios laax guial rliladx lacheelix. Guiáad béngunaa ni ad rliladxt Jesucrist züjnle' Dios laaman guial rliladx lacheelaman, zian güünle' Dios xi'n reex. Din bal id naj zian, ad nayabt xi'n reex loj Dios zi'c tijb bèn ni ad wayüjnt dol. <sup>15</sup> Per bal xinguaaaw o béngunaa ni ad rliladxt Jesucrist rënman yala' lacheelaman guial rliladx lacheelaman Jesucrist, yala'ri reeman. Bèn rliladx ad zajct güünman naguiejn guibannë lacheelaman laaman din ad gurejdx Dios dunuj ree par yabajn ree con wadijl. <sup>16</sup> Din béngunaa guin ad ragbeetaman bal güünman gan chililadx lacheelaman, o bal xinguaaaw guin ma rliladx dxel ni'qui laax ad ragbeet bal güünx gan chililadx lacheelix.

<sup>17</sup> Naj rni guial tijbgaj ree bèn ni ma rliladx Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuløj rliladx reeman Jesucrist. Zianan naj ni cayën loj ree dux compniar ree bèn rliladx ree Jesucrist güün reeman. <sup>18</sup> Bal tijb bejn chi guzuløj rliladxaman Jesucrist mal yu'man sen ni ru ree bèn Israel, yaya'nraman zian. O bal id yu'man sen guin chi guzuløj bililadxaman Jesucrist, ad najt chu'man sen guin. <sup>19</sup> Din achet güünan bal yu' bejn sen guin o ad yu'taman sen guin, ni mazri lasajc naj guial güünman zi'c rniabee Dios. <sup>20</sup> Zeel gol baya'n zi'c najdi chi guzuløj bililadxidi Jesucrist. <sup>21</sup> Bal najl zi'c bèn nado' chi guzuløj bililadxil laaman, ad najtan ni chu'l xgab xhienaag güünl. Per bal zile' ad zajctril zi'c bèn nado', mazri zagdxë barii loj ni najl zi'c bèn nado' guin. <sup>22</sup> Bèn ni naj zi'c bèn nado' chi guzuløj bililadxaman Cristo ma najman zi'cgajc bèn ni ad najt zi'c bèn nado' par güünman sirv loj Cristo. Abi' bèn ni ad najt zi'c bèn nado' chi guzuløj bililadxaman Cristo, dxel Cristo ma rniabee laaman. <sup>23</sup> Lëjt ragbee guial ma gudijx Jesucrist zro' por lëjt, yan ma najdi par Dios. Ad rayalt tiëbidi nabee ree bénguidxliuj lëjt con

ree ni rusquiee. <sup>24</sup> Zeel rnin lojdi compniar raliduladx ree Jesucrist, gol baya'n zi'c najdi chi guzuløj bililadxidi Jesucrist.

<sup>25</sup> Yan lëjt bën ad waxhliaat ree, dux Dad ree Jesucrist achet rëbaman por zian. Per naj zajc gunen lëjt consejw xhienaag güündi, abi' da xgaban naj guial zaliladxidi ni ganin lojdi din guial raya Dios naj bacaabeeman naj cayünan mandad ni cayünan. <sup>26</sup> Zeel naladxan guial zi'c naj tarbajw ni caydüüd ree yan, zagdxeli naj guial ad zuxhliaatidi. <sup>27</sup> Bën ni ma baxh-liaa ad najt gusa'n lacheelaman. Guiáad bën ni ad waxhliaat ad rayalt güünman naguiejn guxhliaaman. <sup>28</sup> Per bal rüjnł xgab guxhliaal, ad dolt naj guxhliaal. Ziangajc ree biinxdüb ni rën guxhliaa, ad dolt naj guxhliaa reem. Per rugojnan lëjt guial zienloj naj ni rzajc bën ruxhliaa, abi' laan ad rëntan saquidi.

<sup>29</sup> Ni rënan gagbeedi naj guial ma caydop ree dxej ni zio'p ree loj guidxliuj guie par yaguieen ree xmandad Dios. Zeel bën ni ma baxhliaa ree gol been sirv Dios xt lod guneeztan lëjt zi'cgajc ree bën ni ad waxhliaat. <sup>30</sup> Ni'qui guialrabaa, ni'qui guialrunaya, ni'qui guial rajp bejn xhienin loj guidxliuj guie achet zajc gudxoon guial güün bejn xmandad Dios. <sup>31</sup> Bën ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdéd.

<sup>32</sup> Ni rënan naj guial ad zutidi xgab por ree ni yu' loj guidxliuj guie. Tijb xinguaaaw xtijb mazri rüjnx xgab por xmandad Dios, mazri rüjnx naguiejn güünx zi'c ruladx Dios. <sup>33</sup> Per tijb xinguaaaw ni ma baxhliaa mazri rüjnx xgab por ree ni yu' loj guidxliuj guie, par laax mazri rüjn naguiejn yabaanë lacheelix laax. <sup>34</sup> Dxel tio'p ma naj xixgabix, por Cristo në por xbéngunaax. Ziangajc tijb béngunaa ni ad waxhliaat mazri rüjnman xgab por ree xmandad Dios guidiblagaa rüjnman sirv loj Dios par güünman zi'c ruladxaman. Per tijb béngunaa ni ma baxhliaa mazri rüjnman xgab por ree ni yu' loj guidxliuj guie, mazri rüjnman naguiejn yabaanë lacheelaman laaman.

<sup>35</sup> Gra ni canin lojdi, canin laan par günan lëjt yudar ad par gudxontan guxhliaadi, caninan din guibandi zi'c rayal xnejz dxel gol been gol gubajn tée zi'c rën dux Dad ree Jesucrist sin guial gudxoon xhienin lëjt.

<sup>36</sup> Chutëez xinguaaaw rüjn xgab guxhliaanë biin rnieenëx abi' bal ma yu' biingunaa guin ijz par guxhliaam, güünri reex ni naladx reex naj zagdxé par laa reex. Bal guxhliaa reex, guxhliaari reex. Ad doltan guial guxhliaa bejn. <sup>37</sup> Ziangajc chutëez bën ni ad rüjnt xgab guxhliaa, ad rayalt güünman xgab guial rüjn naguiejn guxhliaaman bal ma beenman xgab zagdxé guial ad zuxhliaataman. Din zagdxé gajcan bal id



zuxhliaa bejn. <sup>38</sup> Zeel rnin lojdi zagdxen guial chu guxhliaa, per mazri zagdxe bal id zuxhliaa bejn.

<sup>39</sup> Tijb béngunaa chi ma baxhliaaman, ad rayalt sunëman xinguaaw ren chi nabannë lacheelaman. Per bal guiët lacheelaman ma zajc tia' xin ren laaman per con tijb ree xcompniaraman xin riladx Jesucrist. <sup>40</sup> Per naladxan guial mazri zagdxe guibanman bal id zuxhliaaman stijb. Zian rünan xgab guial nabannë'n xSprijt Dios zi'cgajc lëjt.

## 8

### *Guialraw ni rbe'c ree bejn loj ni naladx reeman naj Dios*

<sup>1</sup> Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhienaag yaguieen ree por ree ni guin, per yu' dxej por guialrignia' rlies bejn xvalor gajcaman. Per guialrën lasa' bejn lasajc mazri din por guial rën lasa' bejn zile' yaguieen yudar du lasa' ree din yasnuu yayignia' ree xhienaag rayal yabajn ree. <sup>2</sup> Bal yu' bën naladx guial ma bayaaloj rignia'man gra, cusquiee laagajcaman din ryaadx da'tri chignia'man. <sup>3</sup> Per bën ni rën Dios, Dios nünbee laaman.

<sup>4</sup> Yan por guial raw bejn guialraw ni ma gule'c reeman loj ree ni naladx reeman naj Dios, dunuj ree rayagbee guial achet guialrniabee rajp ree dios guin loj guidxliuj guie, din tijbzi Dios yu'. <sup>5</sup> Majsı yu' ree bejn naladx guial yu' zien ree dios bën rniabee xanyabaa në loj guidxliuj, <sup>6</sup> per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa tēëman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tēë raya'p ree guialnaban.

<sup>7</sup> Per ad grat ree bejn rüjn xgab zian. Din yu' ree bën ni guyën graloj ni naladx reeman naj Dios, abi' yan guial qui bililadxri reeman Jesucrist naladx reeman guial dolan gaw tijb bejn guialraw ni ma gurej loj ree dios guin. <sup>8</sup> Dunuj ree rayagbee guial ad ni rawt bejn rüjn guiban bejn mazri zagdxe loj Dios, lasa'gajcanan bal yadaaw ree o ad zadaawt ree lasa' ree guialraw guin. <sup>9</sup> Per majsı lëjt ragbee guial zajc gawidi xhietëëznin, rayal gapidi cudad ad güüندی guial ree bën qui riladxri Jesucrist güün reeman dol. <sup>10</sup> Din bal lüj guial achet naladxil rawil xhietëëznin, zobjil cayawil guialraw ni ma gurej loj ree ni ad najt dios. Dxel guguaa tijb ree bën qui riladxri Jesucrist lüj abi' nëgajcaman sēëbladx gaw guialraw guin majsı lën luxdooman naladxaman guial ad zagdxet naj ni cayüjnman. <sup>11</sup> Dxel por xguialrajquil cayüjnl guial güünman dol guial ad nıxt yu' luxdooman cayawaman ni guin ree, per badxe'guijc guial në por laaman güjt Jesucrist loj crüz. <sup>12</sup> Zeel

bal r jnl tijb ni naj ni mal par ree b n qui rliladxri ree Jesucrist abi' r jn reeman dol por l j, dolan cay jnl delant loj Cristo. <sup>13</sup> Bal por tijb ni rawan r jn ree da compniaran dol, mejorli ad zawtran laan chit e g nman dol por naj.

## 9

### *Ni zajc g n tijb ap stol*

<sup>1</sup> L jt ragbee guial zajc g nan ni r nan por guialrniabee ni ra'pan guial najn ap stol. Ma baguiaan dux Dad ree Jesucrist abi' l jt naj ree b n ni ma benan gan par laaman guial ma bililadxidi laaman. <sup>2</sup> Bal yu' ree b n ni ad n nbeet naj zi'c ap stol, per l jt ragbee guial ap stol najn. Din zi'c ma rliladxidi Jesucrist dxel ma rguien guial diidxli najn ap stol.

<sup>3</sup> Abi' par ree b n ad rliladxt guial najn ap stol, ze naj ni r n loj reeman: <sup>4</sup> Ra'pan derejch guneee reeman ni gawan n  ni gui n. <sup>5</sup> Abi' zajc t e guxhlian con tijb b ngunaa naj dulasa' raliduladx ree Jesucrist din chin n laaman bant ez guin gan, zi'c r jn los demazri ree ap stoles con ree bijch Dad Jesucrist n  B d. <sup>6</sup>  O najzi con Bernab  bayal yaguieenan xmandad Dios dux cwentan ya? <sup>7</sup> Per ni'qui tijb suldad ad rejt loj wadijl xcwentaman, yu'czi b n rguijx xgaxtaman. Ziangajc b n rx bin uv,  wen id zajc gawaman laan ya? Laadx b n ni rajp vag ree,  wen id zajc gui man xlejch reeb ya? <sup>8</sup> Abi' ad xixgabtzi b nguidxliujn canin lojdi, n  loj ley ni bad e Dios loj Moisejs r b zian. <sup>9</sup> Din loj ley guin r b: "Ad gudxe'di guijxh ro' ree be gui'xh la'tgaj cay jn reeb dxiin." Ad r bt Dios zian guialzi yu'man laa reeb xgab, <sup>10</sup> r baman zian por dunuj ree. Din zi'c b n rlia' yuj zi'c b n rusia trigo, grop reeman yu'guijc guial yu' ni yaca' reeman. <sup>11</sup> Yan ma bal n l jt xhienaag chinalidi xnejz Dios,  wen zro' da't yanaaban lojdi ya bal g  ndi dunujn yudar din gusnuu dux guialnaban? <sup>12</sup> Bal stijb ree b n ni rusiid l jt rila' rtia' reeman ni rayal gud  didi loj reeman, dxel ziangajc dunujn raya'pan mazri derejch g  ndi dunujn yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chit e xhie cwib guijc guial ad zucaagdiajgtri ree bejn xtiidxza'c Jesucrist. <sup>13</sup> L jt ragbee guial gra ree bixhioz ni r jn sirv l n xyadoo Dios, rtia' reeman tibda'n ni rin  ree b n Israel loj Dios persi rila' rbajn reeman. Ziangajc gra ree bixhioz ni r jn ree sirv lule' yadoo guin lod rin  ree bejn be ree par Dios, n  reeman rtia' ta'n ni rin  ree bejn persi rila' rbajn reeman. <sup>14</sup> Yan laagajcan r b dux Dad ree Jesucrist por ree b n ni rul u xtiidxza'caman, guial por ree b n ni rul u reeman rayal guiban reeman. <sup>15</sup> Per naj achet caca'n, ad caxhal t etan gui'ch guie lojdi din

guneedi xhienin. Din par naj zagdxeli naj guiëtan luar chu' bën chiquied guialrabaa guin luxdon guial cusidan bejn ree xtiidxza'c Jesucrist.

<sup>16</sup> Ad rayalt gales da valor gajcan guial cusidan bejn ree xtiidxza'c Jesucrist, din mandad guin naj ni bayalan. ¡Prob naj bal idan gusid bejn ree diidxza'c guin! <sup>17</sup> Zeel bal cayünan mandad guin guial ruladxan gūnan laan, dxel yu' ni gaca'n. Per ni'qui bal id ruladxan gūnan mandad guin, laan bayal gūnan. <sup>18</sup> Abi' ni rūnan gan naj guialrabaa ni yu' luxdon majsi ad naxtan, majsi ad caca'tan ni rayal tia' bën ni rulüü xtiidxza'c Jesucrist, per cusnuu culün diidxza'c guin ree bejn ree.

<sup>19</sup> Abi' majsi ad yu't bën rniabee naj por mandad guin, per laa naj guie par gra ree bejn din gac gūnan sirv xbejn Cristo. <sup>20</sup> Abi' chi za'n con ree bën Israel, rūnan naguiejn persi yu'guijc reeman guial nayajcan bën Israel din gūnan gan gac reeman xbejn Cristo. Chi za'n con ree bën Israel bën rüjn ree naguiejn chinal xley Moisejs dxel rūnan zi'c bën zinal ley guin, din gūnan gan gac reeman xbejn Cristo, majsi ragbeen guial ad rniabeet ley guin naj. <sup>21</sup> Abi' chi za'n con ree bën ad najt bën Israel, bën ad zinalt ree ley guin dxel majsi ragbeen guial Dios naj bën rniabee naj guial nabanani zi'c rniabee Cristo, per rūnan naguiejn din guguaiaa reeman naj zi'cgajc tijb lasa' reeman din gac gūnan gan gac reeman xbejn Cristo. <sup>22</sup> Chi za'n con ree bën yu'nawëëg par güün reeman o gaw reeman xhienin, dxel rūnan naguiejn din su reeman zagdxex con naj din gūnan laa reeman yudar gac reeman xbejn Cristo. Bantëëz lod ran rūnan naguiejn din guguaiaa reeman naj zi'cgajc tijb lasa' reeman, din günczan gan majsi ta'nzi reeman gūnan gan gap reeman perdon por Cristo.

<sup>23</sup> Gra ree ni guie cayünan guial rēnan xtiidxza'c Jesucrist, din tiblojzi güünle' Dios naj con gra ree bën rliladx diidxza'c guin ree.

<sup>24</sup> Lëjt ragbee guial chi yu' tijb carrer zien bejn ruxüün, per tijbzaman naj bën rtia' prem. Ziangajc lëjt gol been naguiejn tia'di ni gunee Dios. <sup>25</sup> Bën ni ruxüün ree rajp laagajc reeman cudad chitëë xhie gudxoon guxüün reeman. Rūjn reeman zian din güün reeman gan, abi' ni rüjn reeman gan naj tijbzi coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit. <sup>26</sup> Abi' ragbeechaawan xhienin cayünan, ad cayüntan zi'c tijb bën ni ruxüün sin guial gagbeen chexc, ad rüntan zi'c tijb bën ni rga'p sin guial gagbeeman ban ca'paman. <sup>27</sup> Zeel cusagdiaj naj gajc din gac ganabee naj gajc gūnan zi'c rayal gūnan, chitëë guial

culün bejn ree xtiidxza'c Jesucrist achet yayalan delant loj Dios.

## 10

### *Guial rën ni ad najt ree Dios*

<sup>1</sup> Compniar raliduladx ree Jesucrist, gol basaaladx guial dux bengol gulal ree bén binal ree Moisejs, gra reeman guza xan zaj ni guxhaal Dios abi' gra reeman gudëd loj nijsdoo ni la nijsdoo xnia. <sup>2</sup> Zian biguien guial xbejn Moisejs naj reeman din gra reeman guzanë laaman xan zaj guin, abi' gudëd reeman con laaman loj nijsdoo guin. Zian gurobnijs reeman loj zaj guin në loj nijsdoo guin. <sup>3</sup> Gra tëë reeman gudaw guialraw ni bi't diizd xanyabaa. <sup>4</sup> Gra tëë reeman gu' nijs ni bazaladx Dios loj reeman, nijs brii lad tijb guiaj. Rën guiëban guial diizd nadxel mal naban Cristo con laa reeman lod zëtzi reeman. <sup>5</sup> Per zien reeman ad beent zi'c ruladx Dios, abi' güjt reeman niz loj yujbidx niz lod guza reeman.

<sup>6</sup> Gra nine gojc din yayagbee ree guial ad laat yaguieen ree lasa' ree ni mal ni been reeman. <sup>7</sup> Ad rayalt yayën ree ni rëb ree bejn naj ree Dios zi'c been zien ree dux bengol gulal ree, din rëb loj xtiidx Dios xcwent reeman: "Gurej reeman, gudaw reeman dxel bisu reeman been reeman ni dxuudx ree." <sup>8</sup> Ad rayal tëët güün bejn ni dxuudx con bén ad najt lacheelaman, zi'c been zien ree dux bengol gulal ree abi' tijb dxej güjt gajlbichoon mil reeman. <sup>9</sup> Ad zaneeguijdx tëët ree Dios zi'c been zien ree bén guin, abi' gudaw bëël laa reeman persi güjt reeman. <sup>10</sup> Ad rayal tëët yaguie'ch ree guial ad cayüjnt Dios zi'c rayal, din zian been zien ree dux bengol gulal ree abi' guxhaal Dios tijb anjl bagüjt laa reeman.

<sup>11</sup> Gra ni guzac reeman cwan loj xtiidx Dios din yayagbee ree guial ad laat yaguieen ree zi'c been reeman, dunuj ree guial nabajn ree yan guial ma caydop dxej ni yadëed ree bejn cwent loj Dios. <sup>12</sup> Zeel bén ni naladx za'dxi'ch loj xnejz Dios, mejorli gapaman cudad chitëë güün dol laaman gan. <sup>13</sup> Gra ni cazajquidi ad najtan ni ad rzajct bejn, din Dios ad zaro'nladxtaman lëjt. Ad zuslaat Dios saquidi tijb ni ad zadaantidi, abi' laaman güün lëjt yudar din gagbeedi xhien-aag laadi loj ni cayajc.

<sup>14</sup> Zeel compniar raliduladx ree Jesucrist, zi'c rënan lëjt rnin lojdi gapidi cudad ad goc guiëndi ni naladx ree bejn naj dios. <sup>15</sup> Naj ragbee guial najdi ganax bén rignia', zeel lëjt gajc gol been xgab bal zagdxe naj ni canin lojdi. <sup>16</sup> Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radü' ree vin ni ma gogle' rasaaduladx ree rejn ni ma guxhie'man chi gütaman por dux tol ree. Abi' chi

radaaw ree guiadxtil zi'c beenman, laan naj tijb sen guial ma nayajc ree tijbzi con laaman. <sup>17</sup> Din majsi zien nayajc ree, per zi'c rlia' tijbzi guiadxtil par dugra ree, zian rguien guial ma nayajc ree tijbzi con Cristo.

<sup>18</sup> Lëjt ragbee xhienaag rüjn ree bèn Israel chi rinë reeman tijb gon par Dios, abi' zi'c raw reeman tiblia' gon guin yu'guijc reeman guial ma naj reeman tijbzi con Dios. <sup>19</sup> Ad canitan lojdi por ree ni naladx ree bejn naj dios guial lasajc reen o guial lasajc guialraw ni gurej loj ree dios guin. <sup>20</sup> Din bèn rüjn ree zian ad lojt Diosan rbe'c reeman guialraw guin ree, loj xindxaban rbe'c reeman laa reen. Abi' ad rëntan gaquidi tijbzi con ree xindxab guin. <sup>21</sup> Ad zacjt güüнди zian par guiguien guial ma najdi tijbzi con ree xindxab guin, abi' gaw tēdi guiadxtil con vin din guiguien guial ma najdi tijbzi con Cristo. <sup>22</sup> ¿O rēndi ya yache'ch ree Dios? ¿Wen mazri raya'p ree guialrniabee guial lojman ya?

### *Xhie zajc güün ree xbejn Dios*

<sup>23</sup> Graczi zajc güün bejn, per ad gratan naj zagdxe guial güünman. Majsi gra zile' güün bejn, per ad gratan rüjn sirv par güün lasa'man yudar chinalaman xnejz Dios. <sup>24</sup> Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

<sup>25</sup> Zi'c chi rziidi bēel luguia', ad guiniabdiidxidi bal ma gurejn loj xdios reeman, chitēē xhie guinialadxidi chi gawidi laan. <sup>26</sup> Din xieen dux Dad ree Dios naj guidxliuj con gra ni yu' lojn.

<sup>27</sup> Bal tijb bèn ad waliladxt xtiidx Dios na lojdi guial chitawidi lidxaman, abi' bal rēndi chedi gol chej. Gol gudaw gra ni gunee reeman lojdi ad xhie guiniabdiidxidi chitēē xhie naladxidi. <sup>28</sup> Per bal yu' xcompniaridi na guial ni cunee bèn guin cayawidi ma gurejn loj xdiosaman, ad gawidi laan por bèn bagojn lëjt chitēē güünman xgab mal guial ad laa cayüjndi, majsi lëjt ragbee guial xieen dux Dad ree Dios naj guidxliuj nē ni yu' loj guidxliuj guin. <sup>29</sup> Ad canitan lëjt xcwent guial xhie naladxidi, ni canin lëjt naj por ree xgab ni zajc güün stijb xcompniaridi por lëjt.

Per wed yu'di rüjn xgab: “Per, ¿chexc zeel ad züntan gra ni ragbeen ad najt ni mal por xixgabzi stijb bejn? <sup>30</sup> Wed rēb tēdi: Naj ragbee guial rudēn quixtēē loj Dios por gra ni rawan, ¿chexquiza zeel güün reeman xgab mal por naj?” <sup>31</sup> Per naj rni lojdi gra ree ni guin rayal gudxe'guijquidi din zi'c ni rawidi zi'c ni rē'di nē gra ree ni rüjndi rayal güüнди laan par güüнди Dios bèn zojbloj. <sup>32</sup> Gol gojp cudad xhienaag nabandi din zi'c ree bèn Israel zi'c ree bèn ni ad najt bèn Israel con ree xcompniaridi bèn rliadx ree Jesucrist ad züjnt reeman

xgab mal por lëjt. <sup>33</sup> Din zian rünan, rünan naguiejn chitëë xhie naladx bejn con naj. Ad rüntan ni rüjnzi naj yudar, rünan naguiejn din günan ni rüjn yudar zien ree bejn din gac gap reeman perdon loj Dios.

## 11

<sup>1</sup> Zeel gol binal zi'c rünan, zi'c zinaalan zi'c been Cristo.

*Xhie rayal güün ree bejn chi rbejdx rniab reeman Dios*

<sup>2</sup> Naj dád rabaanë'n lëjt guial rusaaladxidi naj, guial yu'guijquidi rüjn tēedi zi'c balün lëjt. <sup>3</sup> Rën tēen gusaaladxidi guial Dios rniabee Cristo abi' Cristo rniabee xinguaaw abi' xinguaaw rniabee béngunaa. <sup>4</sup> Tijb xinguaaw chi rgu' xhienin guijquix par cwedx guiniabix Dios o gulüüx xtiidx Dios, natu naj ni cayüjnx. <sup>5</sup> Ziangajc chutëëz béngunaa cabejdx canab Dios o culüüman bejn ree xtiidx Dios, abi' achet xoob guijcaman, natu gajc naj ni rüjnman. Güünman cwent guial najman zi'c tijb béngunaa ni biaj guijc xt garej. <sup>6</sup> Zeel bal tijb béngunaa ad rëntaman guixhioob xhienin guijcaman, gugajli guijcaman. Per bal ragbeeman, guial natun guiyaj guijcaman xt garej, mejorli guixhioob xhienin guijcaman. <sup>7</sup> Per xinguaaw achet zajc chu' guijquix din Dios beenman laax zi'cgajczi laaman, zian rulüüx respejt ni rajpax Dios. Abi' béngunaa guial rxhioob xhienin guijcaman, zian rulüüman respejt ni rajpaman xinguaaw. <sup>8</sup> Din ad gojct xinguaaw con guxtil lad béngunaa, béngunaa guin gojc con guxtil lad xinguaaw. <sup>9</sup> Ad gojct xinguaaw par béngunaa, béngunaa guin gojc par xinguaaw. <sup>10</sup> Zeel béngunaa rayal guixhioob xhienin guijcaman din guiguien guial xinguaaw rniabee laaman zi'c rulüü ree anjl chu rniabee laa reeman. <sup>11</sup> Majsı delant loj Dios tiblojzi naj bejn, din bal id béngunaa niu achut xinguaaw niu, abi' bal id chu xinguaaw niu achut béngunaa niu. <sup>12</sup> Walican, guial con guxtil lad xinguaaw gojc béngunaa, per yan por béngunaa ri't xinguaaw loj guidxliuj, zeel zi'c xinguaaw con béngunaa por Dios yu' reeman loj guidxliuj.

<sup>13</sup> Naj rni lëjt, lëjt gajc gol been xgab bal zagdxen cwedx guiniab tijb béngunaa Dios abi' achet naxhoob guijcaman. <sup>14</sup> Bejn gajc ragbee guial natun bal id zugaj guijc xinguaaw. <sup>15</sup> Per par béngunaa mazri zagdxer guienman bal guyool guidxguijcaman, din rajpaman laan par gusiaawan guijcaman. <sup>16</sup> Bal chu ad za't conform por ni canin lojdi, per naj rugojn lëjt guial achet stijb costumbr raya'p ree, zian naj dux costumbr ree con los demazri ree bën rliladx xtiidx Dios.

*Ruxhiin reeman zi'c basa'n Dad Jesucrist gac*

<sup>17</sup> Yan xcwent ni ma ganin lëjt, ad zile't ganin guial zagdxer naj ni cayüjndi din chi radxaag lasa'di par cwedx guiniabidi

Dios, al ni ad rayalt güündi rüjndi. <sup>18</sup> Yaløj rnin lojdi biguejnan guial chi radxaag lasa'di par cwedx guiniabidi Dios ad raya'ntidi diidx, abi' tiblåd rlıladxanan. <sup>19</sup> Din nawëg najn guial ad zajct zian, abi' zian rguien chu diidxli zinal xnejz Dios. <sup>20</sup> Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist. <sup>21</sup> Din tijbgajdi rüjn naguiejn diob gawidi, ad rbëjzt xcompniaridi. Abi' la'tgaj yu' ree bejn rliaan, yu'di raw da't abi' xt rzüdxidi guial rë'di zi'ctzi rëndi. <sup>22</sup> ¿Id yu' lidxidi ya lod gawidi guië' tëedi zi'ctzi rëndi?, ¿o ad rëntidi xcompniaridi Bén rlıladx ree xtiidx Dios ya, zeel rusa'nxtudi Bénprob ree Bén achet rajp? Yan, ¿rëndi ya chu' luxdon zagdx con lëjt por zian? ¿Per zian zi'c cayüjndi, ad zajct ganin lojdi guial zagdx naj ni cayüjndi!

### *Ni bigra gudaw Jesucrist xche*

(Mt. 26:26-29; Mr. 14:22-25; Lc. 22:14-20)

<sup>23</sup> Abi' ni balün lëjt, basidan laan por dux Dad ree Jesucrist guial guxin ni bayü reeman laaman chi bigra gudawaman xche, cwa'man tijb guiadxtıl. <sup>24</sup> Abi' chi gulox badëeman quixtëe loj Dios dxel gula'man guiadxtıl guin, rëb gajman: "Guiadxtıl guie naj da cuerpan ni ma bayün par guiëtan por lëjt. Abi' chi güündi zian, gol beenan guial gusaaladxidi naj." <sup>25</sup> Ziangajc beennëman cojp ni yu' vin chi gulox gudaw reeman xche, dxel rëbaman: "Vin guie naj da rejnan ni gaxhie'n chi guiëtan par gaxhalan tijb nejz cüb guial xhienaag gac ree bejn perdon loj Dios. Abi' chi güündi zian, gol been zian guial rusaaladxidi naj." <sup>26</sup> Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guiadxtıl rë' tëedi vin, zian rulüüdi guial güjtaman por lëjt, gol been zian xt chi gui'taman loj guidxliuj guie zatıjb.

### *Xhienaag rayal gac xche*

<sup>27</sup> Yan bal yu' Bén raw guiadxtıl rë' tëeman vin xche guin, abi' ad yu' guijctaman ni rën guiëb ni cayünman, dolan cayünman guial ad yu'guijctaman ni rën guiëb xcuerp në xrejn dux Dad ree Jesucrist. <sup>28</sup> Zeel rayal güün bejn xgab xhienaag nabanman delant loj Dios dxel ma zajc gawaman guiadxtıl guië' tëeman vin xche guin. <sup>29</sup> Din Bén raw guiadxtıl guin con vin guin abi' ad yu'guijctaman ni rën guiëb xcuerp Jesucrist. Laagajcaman caguil xcasti. <sup>30</sup> Din guial rüjn ree bejn zian zeel dád ziendi ragxuu, zien tëedi ad yu't gojl abi' zien reeman ma güjt. <sup>31</sup> Per bal yaløjxgaj yaguieen ree xgab xhienaag nabajn ree loj Dios dxel ma zajc yadaaw ree xche guin, achetri xcasti Dios yayal ree. <sup>32</sup> Per ziangajc bal yu' xcasti Dios ni yayal ree, laan naj par guzuxnejzaman dunuj

ree chitëe yaguieen ree dol, chitëe yayal ree casti ni rayal ree bèn ad rlliladxt xtiidxaman.

<sup>33</sup> Zeel compniar raliduladx ree Jesucrist, chi radxaag lasa'di par gawidi, gol gulëjz ree xcompniaridi din gawidi tijbzi. <sup>34</sup> Per bal yu'di ad zajct cwëz guial ma rliaandi, zagdxeli gaw lidxidi chitëe yayalidi xcasti Dios guial ad zÿjntidi zi'c rayal. Gra ni rayal ganin lojdi, chi guialan guidganan lëjt dxel yanee ree.

## 12

### *Quiarguiejn ni runee xSprijt Dios*

<sup>1</sup> Yan ganin lëjt, quiarguiejn ni runee Dios loj tijb gaj bejn por xyudar xSprijt Dios, din ad rëntan guibandi sin guial gagbeedi ni guin ree.

<sup>2</sup> Lëjt ragbee guial chi gadidi güünbee Dios dxel gogdxadi, bidxga'di ni na ree bejn lojdi naj ree dios abi'za ni'quid rnieet reen. <sup>3</sup> Zeel gol gogbee, chutëez bèn rnieeguidx Jesucrist, rën guiëban guial ad nabannëetaman xSprijt Dios. Achu tëet bejn zajc guiëb: “Jesucrist naj bèn rniabee naj!”, bal id nabanman con xSprijt Dios.

<sup>4</sup> Quiarguiejn rent quiarguiejn ren runee Dios dunuj ree, per Sprijt guin gajc naj bèn ragnë dugra ree. <sup>5</sup> Majsi ni rent ni ren naj xmandad Dios ni cayguieen ree, per laagajcaman naj bèn ni cayguieen ree sirv. <sup>6</sup> Abi' majsi garent garen cayÿjn tijbgaj bejn, Dios gajc naj bèn ni cayÿjn yudar tiblojzi. <sup>7</sup> Tijbgaj dunuj ree rulüü Dios ni rayal yaguieen ree con xyudar xSprijt Dios din yaguieen ree yudar dux compniar ree. <sup>8</sup> Din con xyudar xSprijt Dios yu' ree bèn ma ca' quiarguiejn par guinee reeman, yu' tëe ree bèn ma ca' quiarguiejn par chignia' reeman diidxli xcwent Dios. <sup>9</sup> Abi' por xyudar xSprijt Dios yu' ree bèn ma cwa' guialrliladx ni guidiblagaa. Yu' tëe ree bèn ma cwa' guialrniabee par yayÿjn reeman bënragxuu ree. <sup>10</sup> Yu' tëe ree bèn ma cwa' guialrniabee par güün reeman gadxagayaa ree milagr. Yu' ree bèn ma ca' quiarguiejn par gudëed reeman xtiidx Dios loj ree bejn. Yu' tëe ree bèn ma cwa' ree quiarguiejn par gagbee reeman bal wali o ad walit ni canee bèn rëb guial caneeman xtiidx Dios. Yu' tëe reeman ma ca' quiarguiejn par guinee reeman gadxagayaa ree diidx, abi' yu' reeman ma ca' quiarguiejn par yadëed reeman tijb diidx par stijb diidx. <sup>11</sup> Per por xyudar gajc xSprijt Dios rÿjn bejn ni guin ree, laaman ma ragbee conin rudëëman güün tijb gaj bejn ni naladxaman naj zagdxë.

### *Tijbzi cuerp nayajc dugra ree*

<sup>12</sup> Din zi'c dux cuerp ree majsi zien la' najn, per tijbzi nayajc ree. Ziangajc dunuj ree guial raliduladx ree Jesucrist majsi



zien nayajc ree per tijbzi nayajc ree con laaman. <sup>13</sup> Din dugra ree barobnijs por tijbzi xSprijt Dios par yayajc ree tijbzi con gra ree dux compniar ree majsi nayajc ree bèn Israel o ad nayajct ree bèn Israel, bal nayajc ree zi'c bèn nado' o ad nayajct ree zi'c bèn nado', per tijbzi ma nayajc ree din dugra ree tiblojzi nabajn ree con xSprijt Dios.

<sup>14</sup> Lëjt ragbee guial ad tibia'tzi naj xcuerp bejn, zien la' naj xcuerp bejn. <sup>15</sup> Yan bal guiëb guia' bejn: "Ad najtan tibia' xcuerp bejn din ad najtan yaa bejn." Per ad por ziant ad najt guia' bejn tibia'man. <sup>16</sup> Ziangajc majsi guiëb guidiajg bejn: "Ad najtan tibia' xcuerp bejn din ad najtan guiaalojman", ad por ziant ad najtri guidiajgaman tibia' xcuerpaman. <sup>17</sup> Din bal guidib xcuerp bejn niajc guiaalojman, ¿xhieza naag niguiejnman?, o bal guidib xcuerp bejn niajc guidiajgaman, ¿xhieza naag niuxi'man? <sup>18</sup> Per Dios ma ragbeeman banguin rayal guzoobaman tibia'gaj ni naj xcuerp bejn din gacaman zi'c rënman. <sup>19</sup> Din bal niajc xcuerp bejn tiblojzi, dxel ad najtran cuerp. <sup>20</sup> Per zi'c ma rnin lëjt majsi zien la' naj xcuerp tijb bejn per tijbzi naj guidiban.

<sup>21</sup> Ad zajct guiëb guiaaloj bejn loj yaaman: "Ad ryaadxtan lüj." Ad zajct tëet guiëb guijc bejn loj guia'man: "Ad ryaadxtan lëjt." <sup>22</sup> Din luar lod rulüü ad rüjnza'ct sirv, laa reen naj ni mazri rüjn sirv. <sup>23</sup> Abi' ree luar lod ad rguient zagdxe, raguieen ree naguiejn din guiguien reen zagdxe. Guiáad ree luar naguie'ch, mazri raya'p ree cudad luar guin ree rata'cw reen din guiguien reen zagdxe. <sup>24</sup> Ad zro't radxu' ree xgab por ree luar ni rguien, mazri raya'p ree cudad luar naguie'ch ree zeel radojt ree xhienin din guiguien zagdxe dux cuerp ree. Zianan been Dios xcuerp bejn <sup>25</sup> din chitëë yaguieen ree xgab guial yu' lod ad rüjnt sirv, guidib dux cuerp ree rüjn yudar lasa'. <sup>26</sup> Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

<sup>27</sup> Yan ziangajc guial nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tibia' cuerp guin. <sup>28</sup> Abi' entr gra dux compniar ree bèn rliladx Jesucrist. Dios yaløj bacaabeeman bèn naj ree xi apóstoles Jesús, ni barojp bacaabeeman bèn gudëëd ree xtiidxaman loj ree bejn, bayon bacaabeeman bèn gulüü ree xtiidxaman bejn ree, dxel bacaabeeman bèn gap ree guialrniabee par yayüjn reeman bënragxuu ree. Bacaabee tëëman bèn güün ree gadxagayaa milagr. Bacaabee tëëman bèn ni güün ree yudar bejn ree. Bacaabee tëëman bèn ni nabee ree loj ree bèn rliladx xtiidxaman abi' bacaabeeman bèn ni rníee ree zien ree diidx. <sup>29</sup> Ad grat ree bejn naj apóstoles ad gra

tëet ree bejn zajc gudëed xtiidx Dios loj ree bejn, ad grat ree bejn zajc gulüü xtiidx Dios bejn ree. Ad grat ree bejn zajc güün milagr,<sup>30</sup> ad gra tëet ree bejn zajc yayüjn ree Bénragxuu, abi' ad grat bejn zajc guiniee zienloj diidx ad gra tëet bejn zajc yayüjn tijb diidx zatijb diidx.<sup>31</sup> Per gol been naguiejn din gunee Dios lëjt quiarguiejn zagdxee ree, abi' naj ganin lëjt conin naj nejz mazri zagdxee chinalidi.

## 13

### *Xcwent guial rën bejn ree*

<sup>1</sup> Din bal rajc rnien zienloj diidx ni rniece bénguidxliuj në xtiidx ree anjl yu' xanyabaa, per bal id rënan bejn najzan zi'c tijb guiib rzijdx o zi'c tijb plati ni yu' cha'. <sup>2</sup> O bal nayalan nudëdan xtiidx Dios loj ree bejn, o nia'pan quiarguiejn par niagbeen gra ni zëed por Dios ni gad gagbee bejn, o nia'pan zienloj guialrignia' o nia'pan tijb guialrliladx Dios ni xt zile' guchan xliajt ree guia', per bal id rënan bejn ree achet lasajcan. <sup>3</sup> Ziangajc majsi gagui'san gra ni ra'pan loj ree Bén ni ryaadx laan abi' yayü da cuerpan din che'can, per bal id rënan bejn ree achet lasajc ni cayünan.

<sup>4</sup> Guial rën lasa' naj gap pacens lasa' bejn, gac bejn benza'c con lasa'man, ad zadëdlojt lasa' bejn, ad züjnt bejn nabë, ad züjnt bejn benro' loj lasa'man. <sup>5</sup> Guial rën lasa' naj gap respejt lasa' bejn, ad gac bejn naxhien, ad yaleny'a'man, ad chu'xyajn tëe lasa' bejn, <sup>6</sup> ad rayalt yabaa bejn por ni mal ni cayüjn bejn o ni cazajcaman, rayal yabaaman chi zë bejn xnejz. <sup>7</sup> Guial rën lasa' naj güün bejn perdon lasa'man ni güünnëtz'i reeman laaman, abi' chililadx lasa'man, ad zadxag tëëtaman cwëzaman ni cabëzaman, taan tëëman ni rüjnnëtz'i reeman laaman. <sup>8</sup> Guial rën lasa' ad yu't dxej loxan, per guialrajc yu' dxej loxan, ad zu tëëtri Bén ni rudëed ree xtiidx Dios loj ree bejn ni'qui ree Bén rniece zienloj diidx. <sup>9</sup> Din yan bal rayignia' ree, tibda'nzi naj ni rayignia' ree abi' bal radëed ree xtiidx Dios loj ree bejn, tibda'nzi rayagbee ree xcwentaman. <sup>10</sup> Per chi guidxin dxej yayignia' ree gran, dxel achetri lasajc ni rayagbee ree yan.

<sup>11</sup> Chi gocan xindoo gunen zi'c xindoo, benan xgab zi'c xindoo, go'pan xquiarguiejn xindoo. Per chi bidxin dxej gojcan bengol basa'nan gra guial xindoo tiblax. <sup>12</sup> Ziangajc yan ad rayignia't ree gra zi'cgajc chi ad rguient zagdxee loj tijb guiaawajn, per chi guidxin dxej yadxin ree lod zøjb Dios dxel yayignia' ree gra. Yan yu'zi ni rignia'n per chi guidxin dxej guidxinan lod zøjb Dios dxel günbeen gra zi'c nünbeeman naj.

<sup>13</sup> Choon naj ree ni ad yu't dxej lox, guialrliladx Dios, guialrbëz ni gunee Dios, në guial rën Dios dunuj ree. Per loj guiyon ree ni guin mazri lasajc guial rën Dios dunuj ree.

## 14

*Guialrniee stijb diidx*

<sup>1</sup> Gol been naguiejn gol guyèn ree bejn, gol gurejdx gunab tēē Dios din guneeman xquiarguejndi din gūūndi xmandadaman, per mazri rūjn naguiejn gapidi quiarguejn par gudēēdi xtiidx Dios loj ree bejn. <sup>2</sup> Bèn rniee tijb diidx ni ad rignia't gra bejn, gūūnman cwent guial achut caneenēman. Tijbzi Dios caneenēman guial achut rignia' xtiidxaman, tijbzi laaman ragbee ni caneeman per bejn ree ad ragbeet reeman ni rēn guiēb ni caneeman. <sup>3</sup> Per tijb bèn rulūū xtiidx Dios bejn ree cayūjnman yudar xhienaag chinal bejn xtiidx Dios, cudēēdaman consejw loj ree bejn ragu' tēēman luxdoo reeman. <sup>4</sup> Abi' bèn rniee tijb diidx ni ad rignia't gra ree bejn, par tijbzi laaman naj ni caneeman, per bèn rniee xtiidx Dios cayūjnman yudar gra ree xbejn Dios din gusnuu chinal reeman xnejzaman.

<sup>5</sup> Bal zianclaa gradi niajc niniee zienloj ree diidx, per mejorlan bal zajc gulūūdi bejn ree xtiidx Dios. Din mazri lasajc guial guiniee bejn xtiidx Dios guial loj guial guinieeman zienloj ree diidx, o bajtēē bal zile' guiēbaman loj ree bejn xhie rēn guiēb ni rnieeman din gūūn sirv ni rnieeman gra ree bejn. <sup>6</sup> Din zi'c naj bal guitixlon lējt compniar raliduladx ree Jesucrist, abi' ganen lojdi tijb diidx ni ad zignia'tidi, xhieza sirv gūūnan lējt bal id canin lojdi zagdxe ni balūū Dios naj o ni ragbeen o bal id canen xtiidx Dios lojdi zagdxe o xhietēēz zatijb ni rayal gusiididi?

<sup>7</sup> Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdxe ad zignia't ree bejn xhienin cucwejdxaman. <sup>8</sup> Ziangajc bal id zucwejdx reeman zagdxe trompejt loj wadijl, xhieza naag chignia' reeman guial ma rayal suchaaw reeman par til reeman con ree bèn rayal tilnē reeman? <sup>9</sup> Yan ziangajc bal guinieenēdi bejn ree con tijb diidx ni ad rignia't reeman, xhieza naag chignia' reeman ni rēbidi! Xlia'zi caneedi achut rignia' ni rnieedi. <sup>10</sup> Lējt ragbee guial zienloj diidx yu' loj guidxliuj guie, per graczan yu' ni rēban par bèn rignia' laan. <sup>11</sup> Per bal chu guinieenē naj con tijb diidx ni ad rignia'tan dxel benzit najman par naj abi' za naj benzit najn par laaman. <sup>12</sup> Zeel zi'c rēndi gapidi quiarguejn por xyudar xSprijt Dios par gūūndi xhietēēz ni naj xchiin Dios, gol gunab loj Dios din yazaladxaman quiarguejn lojdi din gac gūūndi ni rūjn sirv par gra ree xbejn Cristo.

<sup>13</sup> Zeel bèn ni rniee tijb diidx ni ad rignia't gra ree bejn, rayal guiniabaman loj Dios din gagnēman laaman din gac gusignia'man bejn ree ni rēbaman. <sup>14</sup> Din zi'c naj bal gabedx ganaaban Dios con tijb diidx ni ad rignia'tan dxel tijbzi da

sprijtan ragbee ni canen, per naj ni'quid ragbeetan xhienin canen. <sup>15</sup> Zeel ni rayal gūnan naj, gabledx ganaaban loj Dios con da sprijtan abi' gagbeen xhie rēn guiēb ni canen. Ziangajc chi rolan cant ree par Dios rayal gagbeen chignia' tēen xhie rēn guiēb ni cayolan. <sup>16</sup> Din bal rnieel diidx zagdx ree loj Dios con diidx ni ad rignia't ni'qui lūj. Dxel bèn za' con lūj, ad zajct guiēbaman “Amén” chi ma gulox badēēdil quixtēē loj Dios guial ad rignia'taman ni rnieel. <sup>17</sup> Majsi nix da't badēēdil quixtēē loj Dios, per achetczi yudar beenl bèn za' con lūj par gagbeeman xhienaag chinalaman xnejz Dios guial ad bignia'taman ni rēbil. <sup>18</sup> Quixtēē Dios naj mazri rajc zien loj diidx guial loj gradi. <sup>19</sup> Per majsi zian chi za'n lod rado'p ree dux compniar ree bèn rliladx ree Jesucrist par ganenē'n laa reeman, par naj mejorli naj ganenē'n laa reeman con gaay diidx per diidx ni chignia' reeman nē ni gūn laa reeman sirv din gulūū reeman ben ren ree luar ganenē'n laa reeman con chiimil diidx ni ad rignia't reeman.

<sup>20</sup> Compniar raliduladx ree Jesucrist, ad bal rūjnridi xgab zi'c xindobēz. Gol gojc zi'c xindobēz per guial ad zūjntidi ni mal, per par gūūndi xgab gol been xgab zi'c bengol. <sup>21</sup> Loj xtiidx Dios rēb: “Gaxhalan bèn rniee ree diidx ren, bèn ad najt ree bèn niz guie din guinieenē reeman bèn guie ree. Per ni'qui zian ad zuzoobt reeman da diidxan, rēb dux Dad ree Dios.” <sup>22</sup> Zeel guial rniee zienloj diidx, najn tijb sen par ree bèn ad rliladxt xtiidx Dios din chililadx reeman. Per guial rulūū bejn ree ni rēn Dios gagbee reeman, laan naj ni gūūn sirv par ree bèn ma rliladx ad par bèn ad rliladxt. <sup>23</sup> Per ni'qui zian chi radxaag lasa'di par gucaagdiajguidi xtiidx Dios, abi' bal suløj guiniee tijb gajdi gadxagayaa diidx ni achut rignia' abi' chu' ree bèn qui bililadxri xtiidx Dios o bèn ad waliladxt ree xtiidxaman, ¿wen id zanaladx reeman ya guial guijquidi rajc? <sup>24</sup> Per bal chu' bèn qui bililadxri o bèn ad waliladxt abi' caneedi xtiidx Dios, dxel chi guiguiejnman ni caneedi, gagbeeman xhie dol cayūjn reeman, laagajcaman gagbee chu najman. <sup>25</sup> Zian gagbeeman xhienaag nabanman dxel guzuxibaman cwedx guiniabaman Dios, abi' guiēbaman guial diidxli za' Dios con lējt.

### *Gol been gra xnejz*

<sup>26</sup> Gra ni canin lojdi compniar raliduladx ree Jesucrist, caninan din gagbeedi guial chi rado'pidi par gucaagdiajguidi xtiidx Dios, gradi zajc gūūn ni chile' gūūndi, bèn ni gool cant par Dios, bèn ni gulūū ree bejn, bèn gugojn bejn ree conin balūū Dios lojman, bèn guiniee diidx ren ni ad rignia't gra bejn nē bèn gudēēd xtiidxaman loj ree bejn. Per gra ni gūūndi gūūn sirv par gūūnan yudar los demazri ree xcompniaridi

din gusnuu sudxi'ch reeman loj ni rliladx reeman xtiidx Dios. <sup>27</sup> Bal yu' bèn rniee tijb diidx ni ad rnieet gra bejn, tio'pzaman o choonzaman guiniee diidx ni rajcaman, abi' tijb gaj tijb gaj reeman guiniee, chu' tõe bèn ni guiëb loj ree bejn xhie rën guiëb ni rëb reeman. <sup>28</sup> Per bal id yu' bèn zajc gugojn bejn ree xhienin rëb reeman con diidx ni rajc reeman, mejorli achet guiëb reeman delant loj ree bejn. Zagdxeli laazi reeman cwedx Dios lën luxdoo reeman. <sup>29</sup> Abi' ree bèn gugojn delant loj gra ree bejn conin balüü Dios laa reeman, tio'pzi reeman o choon reeman guiniee. Abi' los demazri reeman gucaagdiajg bal zagdxequi naj ni canee reeman. <sup>30</sup> Per bal tijb bèn zojb cucaagdiajg loj hor guin gulüü Dios laaman xhienin, rayal yacwëez bèn canee din gac gugojn bèn guin bejn ree xhie nin balüü Dios lojman loj hor guin. <sup>31</sup> Gra ree bèn ni bayal gudëed xtiidx Dios loj ree bejn, gradi zajc gugojn bejn ree xhienin balüü Dios lëjt, per tijb gajdi chi yayalidi din gra ree bèn cucaagdiajg gusiid reeman chu' tõe luxdoo reeman. <sup>32</sup> Gol badxe'guijc guial ree bèn rudëe xtiidx Dios loj ree bejn laagajc reeman rniabee laa reeman din guiniee reeman chi rayal guiniee reeman. <sup>33</sup> Din Dios ad rëntaman tijb ni ad najt xnejz, rënman tijb ni naj xnejz din yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo, <sup>34</sup> loj hor ni ma cucaagdiajg reeman xtiidx Dios ad yu't permis guiniee ree béngunaa rayal guzoob reeman xtiidx xixinguaaw reeman zi'c rëb Dios güün reeman diisd gulal. <sup>35</sup> Bal xhie rën reeman gagbee reeman, mejorli lidx reeman guiniabdiidx loj lacheel reeman, din natun guiniee tijb béngunaa loj hor ni cucaagdiajg reeman xtiidx Dios.

<sup>36</sup> Gol basaaladx guial ad lëjtit naj bèn yaløj cwa' xtiidx Dios ad tijb tëetzi lëjt ragbee xtiidx Dios din güündi zi'c naj xixgabidi. <sup>37</sup> Bal chu bèn naladx guial ma cwa'man quiargueijn par gudëeman xtiidx Dios loj ree bejn o por xSprijt Dios ma cwa'man xhie stijb quiargueijn, dxel laa gagbee gajcaman guial ni cusan loj gui'ch guie najn zi'c rniabee dux Dad ree Dios. <sup>38</sup> Per bal id rliladxaman ni canin lojdi loj gui'ch guie, ziangajc ad chililadxidi xtiidxaman.

<sup>39</sup> Yan zi'c ma rnin lojdi compniar raliduladx ree Jesucrist, gol been naguiejn din gapidi quiargueijn din gudëedi xtiidxaman loj ree bejn, ad bal gudxoondi guiniee tijb ree xcompniaridi bèn rniee tijb diidx ni ad rignia'tidi. <sup>40</sup> Per gra ni rüjndi gol beenan xnejz, gol beenan zi'c rayal.

## 15

*Baban Jesucrist loj ree bengüt*

<sup>1</sup> Compniar raliduladx ree Jesucrist, rën tēen gusaaladxidi xtiidxza'c Jesucrist ni ma rnin lojd, diidxza'c ni ma bililadxidi loj ni za'dxi'chidi. <sup>2</sup> Gol basaaladx guial por ree diidxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

<sup>3</sup> Yaløjxgaj balün lējt ni basidan yaløj. Rnin lojdi guial Cristo güt por dux tol ree zi'c rēb loj xtiidx Dios. <sup>4</sup> Abi' biguie'chaman dxel ni goc choon dxej babanman zi'cgajc rēb loj xtiidx Dios. <sup>5</sup> Chi ma babanman, dxel balüülojman loj Bēd dxel loj los demazri ree apóstoles. <sup>6</sup> Zianz balüülojman nē loj ree tijb cwaa ree bèn rliladx laaman, gojc reeman mazri de gaay gayuu bejn. Yu' reeman ma güjt, per mazri zien reeman sta naban. <sup>7</sup> Balüü loj tēēman loj Santiaaw dxelri loj ree apóstoles. <sup>8</sup> Ni bigra balüülojman lon, naj najn zi'c tijb xindo ni rajl chi ma gudēd tiamp ni rayal galix. <sup>9</sup> Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin bèn rliladx ree Jesucrist. <sup>10</sup> Per guial naj Dios benza'c zeel najn ni najn, abi' ad bayaxlia'tzaman naj dīn naj mazri ma benan xmandadaman guial loj los demazri ree xbejn Jesús, majsi diidxliczi ad da xtijbt naj cayūnan ni cayūnan, nē con xyudar Dios cayūnan laan. <sup>11</sup> Zeel achet güūnan bal por chunin biguiejndi xtiidx Dios bal por naj o por stijb ree xbejn Jesús, ni mazri lasajc naj guial ma biguiejndan abi' ma bililadxidan.

### *Yaban ree bengüt*

<sup>12</sup> Yan zi'c ma balüün lējt xtiidx Dios guial baban Cristo, ¿chexquiza zeel yu'di rēb ad zabant ree bengüt? <sup>13</sup> Bal id zaban ree bengüt, rën guiēban guial ad babant Cristo. <sup>14</sup> Abi' bal id baban Cristo dxel achet sirv ni caylūün lējt, ache tēēt sirv ni rliladxidi laaman. <sup>15</sup> Dxel bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxel ad walitan guial baban Jesucrist. <sup>16</sup> Din bal id zaban ree bengüt, dxel ni'qui Jesucrist ad babantri. <sup>17</sup> Abi' bal id babanman, achet sirv guial rliladxidi laaman ache tēēt perdon yu' por xtolidi. <sup>18</sup> Bal naj zian, xt ree bèn ma güjt achet xperdon reeman majsi bililadx reeman Jesucrist. <sup>19</sup> Bal lojzi guidxliuj guie güūn sirv ni baliladx ree Jesucrist dxel dunujzi ree nayajc ree bèn naban mazri naya guial loj chutēēz bēnan.

<sup>20</sup> Per diidxliczi Jesucrist naj bèn baban, abi' laaman naj quijb bèn yaløj baban. <sup>21</sup> Abi' zi'c bidoonloj guialgüjt loj guidxliuj guie por tijb bejn, ziangajc por tijb bejn yaban ree bengüt. <sup>22</sup> Zi'c bidoonloj guialgüjt par gra ree bejn por Adán, ziangajc yan por Jesucrist ma yu' stijb guialnaban par ree bèn rliladx laaman. <sup>23</sup> Per gra gac zi'c rayal: Yaløj Jesucrist

naj bèn baban, dxel chi gui'taman stijb dxel ma yaban ree bengüt bèn bililadx ree laaman. <sup>24</sup> Abi' chi ma beenman gan gunabeeman gra ree bèn rdxe'ch laaman, zi'c ree bèn rajp guialguxtis në ree bèn rajp graløj guial rniabee, dxel ma yayü xguialrniabeeman loj dux Dad ree Dios. <sup>25</sup> Din rayal nabee Cristo xt chi ma beeman gan canabeeman gra ree bèn rdxe'ch laaman. <sup>26</sup> Abi' ni chigra gunidlojman naj guialgüjt. <sup>27</sup> Loj xtiidx Dios rëb guial Dios badëë guialrniabee loj Jesucrist din nabeeman gra, per ad rënt guiëban guial në Dios rniabeeman din Dios badëëd guialrniabee lojman. <sup>28</sup> Abi' dxej ni ma rniabee Jesucrist loj gra dxel yayüman guialrniabee ni badëëd Dios lojman din ma nabee tijbzi Dios gra.

<sup>29</sup> Yan bal id zaban ree bengüt, ¿chexquiza zeel yu' ree bèn rirobnijs xcwent ree bèn ma güjt, abi'za bal id zaban ree bengüt?

<sup>30</sup> Achet sirv guial nadxu'n loj ni nadxeb gra hor. <sup>31</sup> Din rugojnan lëjt, gra dxej za'n loj guialgüjt, laan naj ni diidxli ni rnin lëjt zi'cgajc walin guial dad nix yu' luxdon con lëjt guial najdi xbejn Cristo. <sup>32</sup> Yan bal naabzi loj guidxliuj guie güün sirv ni cayünan dxel achet sirv ni basajc ree bèn Éfeso naj, naj reeman bendoxh zi'c ree bedoxh. Din bal id zaban ree bengüt mejorli yaguieen ree zi'c rëb ree bèn rëb: “Yadaaw ree yadü' tëë ree din guixie ma bayëjt ree.”

<sup>33</sup> Per naj rni lëjt ad tiëbidi gusquiee reeman lëjt. Din guial ridxga' xtiidx ree bèn ni ad zët xnejz, najzan par guxhiinan zi'c nabandi. <sup>34</sup> Zeel gol been xgab zi'c rayal ad bal rüjn tëëridi dol din yu'di ni'quid nünbeetidi Dios, zeel canin lojdi zian din yaya'nxtudi.

### *Xhienaag yaban ree bengüt*

<sup>35</sup> Per wed yu'di rüjn xgab: “¿Xhieza naag yaban ree bengüt? ¿Xhienaag naj cuerp ni gap reeman?” <sup>36</sup> Per xgab guin xgab tontzan. Din lëjt ragbee guial chi rxübin bejn tijb xhaj xhienin, chi rliejnan dxel rnijt xhaj ni guxübinman. <sup>37</sup> Ad cwaan ni rliejn guint rxübin bejn, xhajnan rxübinman, zi'c rüjn bejn con trigo o xhietëëz stijb xhaj nin. <sup>38</sup> Per chi rliejnan ma najn cwaandoo zi'c rniabee Dios gacan, xhietëëz xhaj nin ni rxübin bejn ma yu' cwaando ni guilienan. <sup>39</sup> Zi'c nadxaa xcuerp bejn con xcuerp ree be, nadxaa tëë bëjl con xcuerp ree biguijn. <sup>40</sup> Nadxaa tëë ree ni yu' xanyabaa con ree ni yu' guidxliuj, nadxaa naj guialza'cdxoon ree ni yu' xanyabaa con ree ni yu' loj guidxliuj. <sup>41</sup> Nadxaa xbacha' gubijdx guial loj bëëw nadxaa tëë xbacha' ree bajl xanyabaa, xt ree bajl xanyabaa garent garen naj xbacha' reen.

<sup>42</sup> Yan ziangajc gac con guial yaban ree bengüt. Cuerp ni rguie'ch rodxa, per cuerp ni gap bejn stijb ad yu't dxej godxa. <sup>43</sup> Cuerp ni rguie'ch rxinan, per chi yaban bejn stijb ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stijb ma gapaman cuerp ni yu' gojl. <sup>44</sup> Rguie'ch cuerp ni rajp bejn loj guidxliuj guie, per chi yaban bejn stijb ma gapaman tijb cuerp ni güün sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

<sup>45</sup> Loj xtiidx Dios rëb guial yaløj Adán gojp guialnaban loj guidxliuj guie. Dxel bi't Jesucrist, bèn razaladx guialnaban loj ree bejn. <sup>46</sup> Ad yaløjt rajp bejn guialnaban ni gapaman xanyabaa, yaløjxgaj rajpaman guialnaban loj guidxliuj guie dxel guialnaban xanyabaa. <sup>47</sup> Adán gojcaman con yuj zeel najman bénguidxliuj, per Jesucrist xanyabaa zëédaman. <sup>48</sup> Gra ree bénguidxliuj naj xcuerp reeman zi'c goc xcuerp Adán loj guidxliuj guie, per chi guidxin dxej dxel gap ree bejn tijb cuerp lasa' cuerp ni rajp Jesucrist xanyabaa. <sup>49</sup> Din zi'c nayajc ree zi'c goc Adán loj guidxliuj guie, ziangajc yayajc ree zi'c naj Jesucrist xanyabaa.

<sup>50</sup> Abi' rugojnan lëjt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rodx ad zajct chu'n lod yu' ni ad rodxt. <sup>51</sup> Per rënan gagbeedi tijb ni achutczì wayagbee xt yan guial ad dugrat ree yayëjt, per dugra ree guidxaa zi'c nayajc ree, yaya'p ree cuerp ren. <sup>52</sup> Laan gac chi yaguiejn ree trompejt ni gugojn dunuj ree guial ma bidxin tiamp ni yarii ree loj guidxliuj guie, dxel tibrajtzi zi'ctzi chi ruchip guiaaløj bejn zian guidxaa zi'c nayajc ree. Chi guibejdx trompejt guin yaban ree bengüt dxel ad yu'tri dxej guiët reeman abi' hor zii ma bidxaa zi'c nayajc ree yan. <sup>53</sup> Din rüjn naguiejn guidxaa cuerp ni rodx por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët. <sup>54</sup> Abi' chi ma bidxaa cuerp ni rodx por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët, dxejzii naj dxej ni ma gojc cumplid ni rëb loj xtiidx Dios lod rëb: "Xt guin ma bayaaløj gojc gan loj guialgüjt." <sup>55</sup> Nadxel tëë ma gojc cumplid zi'c rëb loj xtiidx Dios lod rëb: "Guialgüjt, ¿conza guial rüjn gan? ¿Conza guial rusagzil bejn?" <sup>56</sup> Guialrusagzi guialgüjt naj por dol, abi' por ley ragbee bejn guial dol guin naj ni rniabee laaman. <sup>57</sup> Per quixtëe dux Dad ree Dios, bèn rüjn dunuj ree yudar par yaguieen ree gan por xguialgüjt Dad Jesucrist.

<sup>58</sup> Zeel compniar raliduladx ree Jesucrist zi'c rënan lëjt rnin lojdi, gol guzudxi'ch ad chu' tëë luxdoodi tio'p. Guixie guixie



gol been naguiejn güündi mazri xmandad Dios, din lèjt ragbee guial ad ni xlia'tzi gra ni cayüjndi par Dad Jesucrist.

## 16

### *Milia ni rdo'p par ree xbejn Dios*

<sup>1</sup> Yan por milia ni naj guto'pιδι par güündi yudar stijb ree dux compniar ree bèn raliduladx ree Jesucrist, gol been zi'c gunabeen güün ree bèn rlıladx ree Jesucrist niz Galacia. <sup>2</sup> Gazob dumingw tijb gajdi gol gule'c cintabl zi'ctzi beendi gan lèn toxman, din chi guialan ad rüntri naguiejn guido'pιδι milia guin. <sup>3</sup> Abi' chi guialan, bèn ni gucaabeedi par gaxhalan laa reeman chigsa'n gon guin Jerusalén gaxhalan laa reeman con gui'ch ni guiëb chu naj reeman. <sup>4</sup> Abi' bal guguian guial rün naguiejn gan dxel chinë'n laa reeman.

### *Xhienaag naj xixgab Pab*

<sup>5</sup> Yaløj gadëëdan niz Macedonia dxel guialan Corinto guidanan lèjt. <sup>6</sup> Wed xchej gazun con lèjt. Wed guidib tiamp nayaag gazun con lèjt, dxel güündi naj yudar din gan lod naj gan. <sup>7</sup> Ad rëntan gadëëdzi nejzan gaguixlon lèjt, rënan gaglaan con lèjt bal gunee Dios permis. <sup>8</sup> Per yan naj yaya'nan Éfeso xt lanij pentecostés, <sup>9</sup> din guie merczi yan catiëjb ree bejn cucaagdiajg reeman xtiidx Dios, abi' rulüü zien reeman chililadx laan, majsi zien gajc reeman rdxe'ch naj por zian.

<sup>10</sup> Chi gui't Timoteo, gol been naguiejn din suman zagdxe con lèjt, din lasa'gajc xmandad Dios ni cayünan cayünman. <sup>11</sup> Zeel achu lèjt guiniajgaa lojman, gol beenman yudar din gusnuu xnejzaman sin guial chu'man xgab, din gui'taman guie lod cabëëzan laaman con los demazri ree dux compniar ree.

<sup>12</sup> Abi' Apolos, naj guza'c laaman liaadx din nidnëman laa reeman nitixloj reeman lèjt, per ad guyëntaman ni'taman yan, per zi'tcaman guitixlojman lèjt chi guneen laaman tiamp.

### *Diidx bigra ni bacaa Pab loj gui'ch guie*

<sup>13</sup> Gol guzujsin gol guzujdxi'ch tëë loj ni rlıladxidi Jesucrist. Gol gudaan ni gui'tzi gol guzujdxi'ch tëë. <sup>14</sup> Gra ni güündi gol beenan guial rëndi bejn ree.

<sup>15</sup> Compniar raliduladx ree Jesucrist, lèjt ragbee guial Estéfanos con xfamilaman laa reeman naj bèn yaløj bililadx Jesucrist niz Acaya, ragbee tëëdi xhienaag cayün reeman yudar dux compniar ree bèn rlıladx ree Jesucrist. Zeel rnin lojdi: <sup>16</sup> Lasa' ree bèn guin gol bazoob xtiidx reeman con gra ree bèn cayün xmandad Dios në ree bèn cayün yudar cayajc mandad guin.

<sup>17</sup> Dád nix guyu luxdon chi baguiaad Estéfanos guie, në Fortunato në Acaico. Din por laa reeman guza'can zi'cgajc chi za'n con gradi. <sup>18</sup> Laa reeman bagu' luxdon niz guie zi'c ragu' reeman luxdoodi, abi' lasa' ree bën guin gol gojp reeman respejt.

<sup>19</sup> Gra ree compniar rliladx Jesucrist niz Asia guie rugajpdioz reeman lëjt. Abi' Aquila con lacheelaman Priscila con gra ree xbejn Cristo bën rado'p ree lidx reeman, rugajpdioz reeman lëjt, nayajc ree xbejn Cristo. <sup>20</sup> Gra ree dux compniar ree bën rliladx ree Cristo rugajpdioz reeman lëjt, gol bagajpdioz tää lasa'di zi'c rayal.

<sup>21</sup> Naj Pab, quijb naj cuca lëjtr guie ree par gugajpdiozan lëjt.

<sup>22</sup> Bal yu' bën ad rënt dux Dad ree Jesucrist, laaman ma rayal xcasti Dios. ¡Dux Dad ree Jesucrist nayob gui'taman!

<sup>23</sup> Abi' dux Dad ree Jesucrist güünle' gradi. <sup>24</sup> Zi'c nayajc ree xbejn Cristo tiblojzi rënan gradi. Amén.

## Gui'ch barojp ni guxhaal San Pabl loj ree bén Corinto rliladx Jesucrist

### *Rugajpdioz Pab bén Corinto rliladx ree Jesucrist*

<sup>1</sup> Naj Pab, Dios bacaabee naj gacan xi apóstol Jesucrist, në dux compniar ree Timoteo za' con naj. Naj cuca gui'ch guie par lëjt guial ma rliladxidi xtiidx Dios luguiedx Corinto në los demazri ree bén riga' niz Acaya. <sup>2</sup> Dux Dad ree Dios con Dad Jesucrist güünle' lëjt yabe'cdxe tëë reeman luxdoodi.

### *Tarbajw ni gudëd Pab*

<sup>3</sup> Quixtëë Dios xDad Dad Jesucrist, bén naj Dad bén raya dunuj ree naj tëëman Dios bén ragu' du luxdoo ree. <sup>4</sup> Laaman ragu' du luxdoo ree loj xhietëëz guialrzagdiaj ni radüüd ree din gac yalu' ree luxdoo ree bén cadëd xhietëëz guialzi, yalu' ree luxdoo reeman zi'c ragu' Dios du luxdoo ree. <sup>5</sup> Din majsi cayzaagdiaj da't ree guial nayajc ree xbejn Cristo, zian-gajc dád ragu'man du luxdoo ree. <sup>6</sup> Abi' bal cayzaagdiajn, cayzaagdiajn din yaguieenan lëjt yudar din chu' luxdoodi din laa tëëdi loj dol. Abi' bal cu'man du luxdoon, rgu'man du luxdoon din chu' luxdoodi din gac taandi lasa' ree guialzi ni caydüüdan. <sup>7</sup> Ad yu' nawëëgt du luxdoon con lëjt, din zi'cgajc cazagdiajdi ziangajc cayzaagdiajn dxel ziangajc yagu' Dios luxdoodi zi'cgajc ragu'man du luxdoon.

<sup>8</sup> Compniar raliduladx ree Jesucrist, rayënan gagbeedi guial dád zro' naj ni baza'can niz Asia. Naya baza'can niz ni, par dunujn ad zadaantran, ad nagueientran nejz guial yabajnran mazri, <sup>9</sup> bagueieenan xgab guial ma bayëjtan. Per baza'can zian din yadxë'guijcan guial achet zajc yaguieen dunujzan sin xyudar Dios, bén rasban ree bengüt. <sup>10</sup> Laaman babëë dunujn loj guialgüjt guin abi' gagnëman dunujn loj lasa' ree ni nadxeb guin. Dunuj ree rayagbee guial gusnuu güünman dunujn yudar, <sup>11</sup> mazri bal güündi yudar cwedx guiniabidi Dios por dunujn. Abi' bal zien ree bejn cabejdx canab Dios por dunujn dxel zien gajc reeman gudëëd quixtëë lojman zi'c cayagnëman dunujn.

### *Chexc ad wejt Pab Corinto*

<sup>12</sup> Abi' ni rabaan rnin lojdi guial achetczi naduladxan guial rayagbeen nabajnan naya delant lojdi në delant loj ree bénguidxliuj, abi' diidxli cayguieenan ni rayal yaguieenan. Per ad cayguieentan zian por dux quiargueijnzan, cayguieenan zian por xyudar Dios. <sup>13</sup> Loj dux gui'chan ad racaatan ni ad zajct goolidi o ni ad zajct chignia'di. Balzianclaa chignia'di

gra ni canin lojdi. <sup>14</sup> Zi'cgajc ta'ngaj cayagbeedi guial chi gui't Dad Jesucrist zatijb l jt yabaadi con dunujn gui ad dunujn yabaan con l jt.

<sup>15</sup> Laan naj ni yu'guican, zeel yaloy benan xgab nidganan l jt din nabaadi guial ma barojp volt bidganan l jt. <sup>16</sup> Benan xgab nidganan l jt chi nialan niz Macedonia, abi' chi nazaan Macedonia nialan nidganan l jt stijb, dxel nagu'nejzidi naj par Judea. <sup>17</sup> Ad g undi xgab guial chi rnin guidganan l jt rnizan zian. Ad g undi xgab guial r nan zi'c r jn gra ree b nguidxliuj, ganin guialan abi' ragbeen guial ad zialtan. <sup>18</sup> Dios ragbee guial ad raguie'chtan yaguieenan ni rayagbeen ad zaguieentan. <sup>19</sup> Din Jesucrist Xi'n Dios, b n ni ma baguien xtiidx lojdi, naj con Silvano con Timoteo, ad najt Jesucrist b n na g unman ni ragbeeman ad z jntaman, laaman ganax diidxli rnieeman. <sup>20</sup> Din por laaman rajc cumplid gra ree xpromejs Dios. Zeel por laaman raguie'ch ree "Am n" chi rad ed ree quixt e loj Dios. <sup>21</sup> Abi' Dios laaman cay jn dunuj ree yudar con l jt din yadxu'dxi'ch ree loj ni nayajc ree tijbzi con Cristo, Dios bacaabee dunuj ree din yayajc ree par laaman. <sup>22</sup> Laaman gule dunuj ree par laaman, abi' guxhaal xSprijtaman b n nabajnn ' ree zi'c tijb sen guial yaca' ree ni yaca' ree.

<sup>23</sup> Yan bal gadan ga Corinto zi'c benan xgab, Dios ragbee guial gadan ga guial ad r ntan gadil 'n l jt, abi' Dios gud ed naj casti bal id wali ni canin. <sup>24</sup> Ad cayguieentan naguiejn yanabeen l jt xhienaag chililadxidi Jesucrist, din dunujn rayagbee guial diidxli za'dxi'chidi loj ni rliladxidi Jesucrist, ni cayguieenan naj guial yaguieenan l jt yudar din chu' luxdoodi nix guibandi.

## 2

<sup>1</sup> Zeel benan xgab ad zidganatan l jt yan, chit e chu'naya luxdoodi. <sup>2</sup> Din bal gagu'nayan luxdoodi,  chuza cu' luxdon nix bal ma badxe'nayan luxdoodi l jt ragu' luxdon? <sup>3</sup> Zeel bacan zi'c bacan loj gui'ch ni guxhalan lojdi, din chi guialan ad cu'di luxdon naya luar cu'di luxdon nix. Abi' naj ragbee bal yu' luxdon zagdxe gradi yu' luxdoo zagdxe por zian. <sup>4</sup> Chi bacan gui'ch guie d d guyun xgab abi' guyunayan xt ronan bacan diidxnaa ni bacan loj gui'ch guie, per ad bacatan gui'ch guin par gagu'nayan l jt, bacanan par gagbeedi guial r n da'tan l jt.

### *Yu' perdon par b n badxe' falt*

<sup>5</sup> Bal yu' tijbidi ma badxe'naya naj, per ad najtzi guyu-naya n gajc l jt guyunaya. Rnin n  l jt chit e gad edlajn guial ganin gracziidi guyunaya por zian. <sup>6</sup> Per naj rni lojdi

compniar raliduladx ree Jesucrist, ma gojczy yan con casti ni ma badëedidi loj bén guin. <sup>7</sup> Yan gol beenman perdon gol bagu' tée luxdooman chitëe chu'naya luxdooman xt ad zadxejlt xhie güünman. <sup>8</sup> Zeel rniaaban lojdi, gol been naguiejn din gagbeeman guial rëndi laaman zi'cgajc guyëndi laaman guia'xchej. <sup>9</sup> Gui'ch ni guxhalan lojdi gocli, guxhalanan din gagbeen bal ruzoobidi da diidxan guial güüdi gra ni ganin lojdi. <sup>10</sup> Yan chutëez bén güüdi perdon, nëgajc naj gün laaman perdon. Abi' bén ma benan perdon, bal yu' ni günan perdon, benan laaman perdon delant loj Cristo por lëjt <sup>11</sup> chitëe güün xindxab dunuj ree gan, din dunuj ree rayagbee xhienaag naj xguialrusquiee xindxab.

### *Ad nixt guyu luxdoo Pab guzujman Troas*

<sup>12</sup> Chi bidxinan guiedx Troas par ganen xtiidxza'c Jesucrist, dád gognë Dios naj par günan mandad guin ni. <sup>13</sup> Per ad nixt guza'can guial ad bidxaaglojtan dux compniar ree Tito. Zeel basa'nan bén guin ree abi' wan Macedonia.

### *Ragnë Jesucrist dunujn zianczi*

<sup>14</sup> Per quixtëe Dios guial por Jesucrist guixie guixie cayagnëman dunujn chitëe xhie güün dunujn gan abi' por dunujn cayagbee ree bejn xtiidxza'c Jesucrist, diidxza'c guin ree naj zi'c tijb ni rliaa nejxh ni rire'ch cha' guidibczi. <sup>15</sup> Abi' por Jesucrist dunujn nayajc zi'c tijb go'xh ni rliaa nejxh delant loj Dios, go'xh ni rdxin loj ree bén rliladx Jesucrist në loj ree bén ad rliladxt. <sup>16</sup> Par ree bén ad rliladxt laaman, dunujn nayajc zi'c tijb go'xh ni rugÿjt, per par ree bén rliladx laaman dunujn nayajc zi'c tijb go'xh ni runee guialnaban. Per, ¿chu zajc güün ree ni guin sin xyudar Dios? <sup>17</sup> Dunujn ad cayguieentan negojs con xtiidx Dios zi'c rÿjn garol ree bejn, dunujn raguieenan zi'c rayal, zi'c ma bacaabee Dios dunujn yaguieenan. Abi' Dios ragbee guial por guial nayajcan xbejn Cristo zeel raneen xtiidxaman.

## 3

### *Nejz cüb ni yu' par yadxin ree loj Dios*

<sup>1</sup> Chi ranan zian, ad naladxidi guial dunuj gajcan cayles dux valoran. Lëjt ragbee guial ad rÿjnt naguiejn yalüün tijb gui'ch lojdi par gagbeedi chu dunujn o yanaaban gui'ch lojdi ni güün dunujn yudar par gagbee ree bejn chu nayajcan zi'c rÿjn ree ben ren. <sup>2</sup> Din lëjt gajc naj tijb gui'ch par dunujn, gui'ch ni yu' du luxdoon ni rool ree bejn ni nünbee tée reeman. <sup>3</sup> Zi'c rulüü yaguie'ch ree lëjt naj tijb xtiidx Cristo ni bacaan, per ad bacaatanan con tint, bacaanan con xSprijt Dios bén naban, tijb ni ad cwat loj tijb guiaj nata', cwan luxdoo ree bejn.

<sup>4</sup> Dunujn raya'p Dios confianz por Jesucrist, <sup>5</sup> abi' ad raguieentan xgab guial yu' ni raguieen dunujzan, din gra ni raguieenan, raguieenan laan con xyudar Dios. <sup>6</sup> Dios naj bën razaladx dunujn quiargueijn par yagojnan bejn ree xcwent nejz cüb ni ma yu' par yadxin ree loj Dios, nejz cüb ni ad ryaadxt chinal bejn tijb ley ni zëed loj gui'ch, per rüjn naguieijn chinalaman ni zëed por xSprijt Dios. Din ley castizi naj ni zidnën, per xSprijt Dios guialnaban naj ni rudëeman loj ree bejn.

<sup>7</sup> Abi' majsi castizi naj ni zidnë ley ni badëe Dios loj Moisejs loj tijb guiaj nata', per dád bidiin bacha' loj Moisejs chi cwa'man ley guin, xt ad gojct nuguaiaa ree bën Israel lojman por bacha' guin, bacha' ni ta'ngaj ta'ngaj gunidlojn. <sup>8</sup> Bal chi bi't ley guin gojc zian, yan, ¡mazri ni za'cdxoon naj guial gucaagdiajg ree bejn xcwent nejz cüb ni rulüü xSprijt Dios ni ma rajp bejn con Dios! <sup>9</sup> Din chi bi't ley ni ridnë casti par ree bejn, con bacha' bi'tan, yan, ¡mazri ni za'cdxoon naj guial guien ree bejn xhienaag gac reeman naya delant loj Dios! <sup>10</sup> Abi' bal ni za'cdxoon gojc chi bi't xley Dios loj guidxliuj guie, yan achetci lasajc guialza'cdxoon guin par guialza'cdxoon ni naj por nejz cüb ni ma rajp ree bejn con Dios. <sup>11</sup> Abi' bal ni ad rüjnt sirv par gra tiamp, bi'tan con tijb ni za'cdxoon, yan mazri ni za'cdxoon naj ni ad yu't dxej nit.

<sup>12</sup> Abi' guial yu'guijc ree zian, zeel sin guialrdxeb caylüünan bejn ree. <sup>13</sup> Ad raguieentan zi'c been Moisejs, basiaaw lajd lojman chitëë gagbee ree bën Israel guial ziquied guialrulaa bacha' lojman, bacha' ni laa gunit gajc. <sup>14</sup> Per ad lojtzi Moisejs biaaw, ne gajc xquiargueijn ree bejn biaaw. Din xt yandxej chi rool reeman loj xtiidx Dios ni bacaa Moisejs, achet rignia' reeman, tijbzi por Jesucrist zajc chignia' reeman laan. <sup>15</sup> Per xt yandxej chi rool reeman ni bacaa Moisejs ad rignia't reeman guial sta nayaaw xquiargueijn reeman. <sup>16</sup> Per bën rliladx Jesucrist, laaman rxhial xquiargueijnman. <sup>17</sup> Din tijbzi naj Jesucrist con xSprijt Dios, abi' lod ma naban bejn con xSprijt Dios achetri rniabee laaman. <sup>18</sup> Zeel achetri nayaaw duloj ree zi'c been Moisejs, din dunuj ree nayajc ree zi'c guiaawajn lod rguien xbacha' Jesucrist abi' chaawladx cayajc ree zi'c rënman yayajc ree, abi' guixie guixie cusniman dunuj ree por xSprijtaman.

## 4

<sup>1</sup> Zeel zi'c ma baya Dios dunujn abi' gulejman dunujn par yaneen xtiidxaman, ad zadxagtan yaguieenan mandad guin. <sup>2</sup> Dunujn achet raquie'chan, achet ni ad rünjt sirv cayguieenan, ad caysquieetan bejn ree ad caychaa tëetan

xtiidx Dios. Dunujn cayneen ni naj xtiidxli Dios, abi' bejn gajc ree zajc gagbee guial cayguieenan xnejz delant loj Dios. <sup>3</sup> Per bal yu' bén ni ad rignia't xtiidxza'c Jesucrist ni cayneen, ad rignia'taman laan guial ad zétaman loj xnejz Dios. <sup>4</sup> Abi' xindxab rniabee loj guidxliuj guie ma bascajyix xquiargueijn reeman, guial ad rént reeman chililadx reeman, chitée gusni xtiidxza'c Jesucrist laa reeman abi' ad zajct guguaa reeman xguialrniabeeman, laaman guial najman zi'c gajczi Dios. <sup>5</sup> Ad caytie'chtan dux tiidx gajcan, ni caytie'chan naj xtiidxza'c Jesucrist, bén naj Dad par dunuj ree. Abi' ni ranazan lojdi guial cayguieenan sirv lèjt por guial rayënan Jesucrist. <sup>6</sup> Abi' laagajc Dios ni gunabee persi bani loj guidxliuj guie chi gule'cchaawaman laan, laagajcaman basni dux quiargueijnan, guxhalaman dux quiargueijnan din yayignia'n xhien-aag naj xguialrniabeeman, guialrniabee raguiaa ree por Jesucrist.

### *Yabajn ree por guialrliladx*

<sup>7</sup> Gulejman dunujn par yaguieenan ni cayguieenan, majsi nayajczan zi'c guiajs bajn din guiguien guial gra guialrniabee zëed por Dios ad por dunujtan. <sup>8</sup> Majsi graloj guialzi caydüüdan per ad ralenya'tan. Majsi rulüü achetri zajc yaguieenan, per radxejl gajc xhienaag yaguieenan. <sup>9</sup> Majsi xhietëez rüjnnë bejn dunujn, per ad riro'nladxt Dios dunujn. Rguin reeman dunujn per ad runidlojt reeman dunujn. <sup>10</sup> Bantëez guin zio'n nadxu'n loj guialgüjt zi'cgajc guzajc Jesucrist, per zian ralüün guial raya'pan xguialnabanman. <sup>11</sup> Dxel la'tgaj nabanen, guixie guixie nadxu'n loj guialgüjt guial nayajcan xbejn Jesucrist, per zian ralüün guial raya'pan xguialnabanman, majsi guidxin dxej nit dux cuerpan. <sup>12</sup> Nadxu'n loj guialgüjt guial caytie'chan xtiidx Jesucrist, per por zian ma rajpidi guialnaban delant loj Dios.

<sup>13</sup> Loj xtiidx Dios rëb: “Guial bililadxan, zeel gunen ni gunen.” Yan ziangajc guial raliduladxan xtiidx Dios zeel cayneen laan. <sup>14</sup> Din dunujn rayagbee guial Dios, bén basban dux Dad ree Jesucrist loj guialgüjt, ziangajc yasbanman dunuj ree guial ma nayajcan tijbzi con Jesucrist dxel lèjt con dunujn tijbzi chignëman dunuj ree lod zojbaman. <sup>15</sup> Din gra ni cayguieenan në gra ni cayza'can, cayza'can zian din yaguieenan lèjt yudar din gusnuu gacxhiey ni rliladxidi Jesucrist. Zian ma gac ree bejn mazri zien gudëed reeman quixtëe loj Dios, guza't tëe reeman laaman zagdxe.

<sup>16</sup> Zeel ad ralenya'tan. Din majsi cayo'xh dux cuerpan por mandad guin, per dux sprijtan guixie guixie caycüb Dios laan. <sup>17</sup> Achetczi lasajc ree guialzi ni caydüüdan loj guidxliuj guie din najn ni rdëd, per por guialzi guin ree rayalan xguialnaza'c

Dios, gualnaza'c ni lasajc mazri abi' ad yu't dxej nitan. <sup>18</sup> Din dunuj ree ad cayguieent ree naguiejn yaya'p ree ni raguaiaa ree loj guidxliuj guie, cayguieen ree naguiejn din yaya'p ree ni ad raguaiaa ree. Din ni raguaiaa ree loj guidxliuj guie yu' dxej nit reen, per ni ad raguaiaa ree yan ad yu't dxej nit reen.

## 5

<sup>1</sup> Dunuj ree rayagbee gual dux cuerp ree naj zi'c tijb yu cenci par dux sprijt ree loj guidxliuj guie, yu ni yu' dxej nit. Per rayagbee ree gual xanyabaa Dios gunee dunuj ree stijb cuerp, cuerp ni ad gojct por bénguidxliuj zi'c rajc tijb yu, abi' cuerp guin yaya'p ree par tiblayaa. <sup>2</sup> La'tgaj raya'p ree cuerp guie loj guidxliuj ralu' ree gualquia, par dunuj ree xi nix diob guidxin dxej yaya'p ree cuerp ni yaya'p ree xanyabaa. <sup>3</sup> Din ad ganaxtizi Sprijt yayajc ree xanyabaa, nēgajc cuerp yaya'p ree. <sup>4</sup> La'tgaj raya'p ree cuerp ni raya'p ree loj guidxliuj guie, cayzaagdiajn nadxu'n xgab por ni cayza'can. Ad ranatan gual rayēnan yayējtān, ni rayēnan naj gual yaya'pan cuerp cūb ni yaya'pan par tiblayaa din nit dux cuerpan ni rayal nit. <sup>5</sup> Dios been dunuj ree zi'c nayajc ree abi' banee xSprijtaman duloj ree zi'c tijb sen gual gac zi'c naman gac.

<sup>6</sup> Zeel zianczi raya'p ree confians, abi' dunuj ree rayagbee gual la'tgaj nabajn ree loj guidxliuj guie, zijt nadxu' ree gual lod zojb dux Dad ree Jesucrist. <sup>7</sup> Per dunuj ree zunaal reeman gual raliduladx ree laaman ad gual raguaiaa ree xhienaag gac. <sup>8</sup> Zeel raya'p ree confians guin, abi' ma rayēn ree yasa'n ree cuerp ni raya'p ree loj guidxliuj guie din yo' ree yuchu' ree con Jesucrist. <sup>9</sup> Zeel achet güūnan bal loj guidxliuj guie o bal xanyabaa, per ni rayēn ree naj gual yaguieen ree zi'c rēn Cristo. <sup>10</sup> Din dugra ree rayal yadxin lojman lod güūnman gualguxtis din tijbgaj dunuj ree yaca' ni rayal ree, por ni zagdxe o por ni mal ni baguieen ree loj guidxliuj guie.

### *Xhienaag gap bejn nejz par guidxinman loj Dios*

<sup>11</sup> Zeel por respejt ni raya'p ree Jesucrist, cayguieen ree naguiejn guidxga' ree bejn xtiidxaman. Abi' Dios ragbee gual dunuj ree cayguieen ree zi'c rayal, balzianclaa nē lējt güūnbee dunujn gual dunujn cayguieencan xnejz. <sup>12</sup> Ad caylest dux valoran, ni rayēnan naj gual yabaadi gual gagbeedi ni naj diidxli por dunujn, din gac yadxi'di diidx loj ree bén rüjn naguiejn yaya'n reeman zagdxe delant loj ree bejn luar güūn reeman xgab xhienaag naban reeman delant loj Dios. <sup>13</sup> Yan bal par bejn rajc duguijcan por ni cayguieenan, per cayguieenan laan por Dios. Abi' bal par lējt nadēdguieenan zeel cayguieenan mandad guie, cayguieenan laan par yaguieenan lējt yudar. <sup>14</sup> Gual rēn Cristo dunujn zeel cayguieenan ni



cayguieenan, din dunujn rayagbee guial Cristo güjt par gra bejn abi' gra ree bejn ma naj zi'c bengüt par dol. <sup>15</sup> Abi' Jesucrist güjtaman por gra bejn din bén chililadx ree laaman ad zabajntri reeman zi'ctzi rën reeman, ma guiban reeman zi'c rënman, laaman guial güjtaman por laa reeman abi' babanman stijb. <sup>16</sup> Zeel bal guia'xchej baguieen ree xgab guial naj Cristo tijbzi bénguidxliuj, per ad najtri dux xgab ree zian por laaman. Abi' ad rayidxga'tri ree guial chu naj bejn, <sup>17</sup> din chutëez bén ma naj tijbzi con Cristo, ma bidxaa mod ni nabanman. Ma nabanman garen guial loj ni gubanman guia'xchej.

<sup>18</sup> Per gra nine naj por xyudar Dios, laaman been persi raya'p ree nejz par yadxin ree lojman por Jesucrist, abi' laaman gule dunujn din yagojnan bejn ree xhienaag din gap reeman nejz par guidxin reeman lojman. <sup>19</sup> Din tijbzi naj Dios con Jesucrist abi' por Jesucrist rüjn Dios naguiejn gap ree bejn nejz par guidxin reeman lojman, por Jesucrist ma nayab ree bejn sin dol delant loj Dios, zianan naj ni bacaabeeman dunujn yagojnan bejn ree. <sup>20</sup> Zeel dunujn nayajc bén canee por Cristo, caydëedan xtiidx Dios din gagbee ree bejn xhie rniab Dios güün reeman. Abi' por Jesucrist ranaaban lojdi: Gol guzuj zagdx con Dios. <sup>21</sup> Din Jesucrist achetczi dol beenman, per por dux tol ree baslaa Dios güjtaman zi'c tijb béndol din por laaman, cuguiaa Dios dunuj ree zi'c tijb bén ni ad wayüjnt dol.

## 6

<sup>1</sup> Zeel zi'c cayguieenan xmandad Dios, dunujn ranaab lojdi: Ad güünbee xlia'di guial rën Dios lëjt. <sup>2</sup> Din loj xtiidxaman rëb: Chi bidxin dxej guidxga'n lüj, bidxga'n lüj abi' chi bidxin dxej gapil perdon dxel beenan lüj yudar.

Abi' dunujn rana lojdi guial ma bidxin dxej guin par lëjt, ma bidxin dxej guidxga' Dios lëjt në dxej güünman lëjt perdon.

<sup>3</sup> Dunujn ad cayguieentan tijb ni güün guial ad zaliladxtri ree bejn Jesucrist, ad cayguieentan tijb ni guiëb ree bejn guial ad cayguieentan zi'c balüün bejn ree. <sup>4</sup> Par gra caylüün bejn ree guial dunujn nayajc bén cayüjn sirv Dios caydaan tëen xhietëez ni raza'can, zi'c gualzi, tarbajw, ni naya, <sup>5</sup> në guial naa ni rüjn ree bejn dunujn. Në guial rgu' reeman dunujn ladxguiib, rgu' tëë reeman dunujn loj wadijl, ni radxagan guial tant zien ni raguieenan, ni ralëen bacaal, ne gualrliaan ni radüüdan. <sup>6</sup> Caylüü tëen bejn ree chu nayajcan guial nabajnan zi'c rayal, guial rayagbeen conin naj diidxli,

guial raya'pan pacens nayajc tēen benza'c con ree bejn, guial nabajnan con xSprijt Dios, guial diidxli rayēnan ben ren ree, <sup>7</sup> guial ranen ni naj diidxli, guial cayūjn Dios dunujn yudar, nē guial radēen consejw loj ree bejn o radxi'n xtiidx ree bejn con xtiidx Dios. <sup>8</sup> Yu' dxej rajp ree bejn dunujn respejt, yu' tēē dxej rnieeguijdx reeman dunujn. Yu' dxej rniee reeman diidxza'c ree por dunujn, yu' tēē dxej rniee reeman dunujn diidxguijdx. Rūjnnē reeman dunujn zi'c bén rusquiee majsi diidxli naj ni raneen. <sup>9</sup> Yu' dxej rūjn reeman zi'c bén ad nūnbeet dunujn, majsi nūnbee reeman dunujn. Majsi rulūū ma yayējtan per ad rayējtan, abi' majsi xhietēēz rūjnnē reeman dunujn per ad rugūjtt reeman dunujn. <sup>10</sup> Majsi yu' naya du luxdoon, per raguieenan nagueijn din guiguien guial yu' du luxdoon nix. Majsi bénprob dunujn per por dunujn zien ree bén ma naj rijcw niz loj Dios guial ma ragbee reeman xtiidxaman. Majsi achet raya'pan loj guidxliuj guie, per achet rayaadxan.

<sup>11</sup> Bén Corinto, dunujn ma ranan gra por dunujn, achet ni naguei'ch par dunujn guial diidxli rayēnan lējt. <sup>12</sup> Dunujn ad rlioxt rayēnan lējt, lējt bal id rēnrīdi dunujn. <sup>13</sup> Per naj rniēnē' lējt zi'c rniēnē tījb dad gra xi'nman: Gol guyēn dunujn zi'c rayēnan lējt.

### *Nayajc ree zi'c xyadoo Dios naban*

<sup>14</sup> Gol gojp cudad xhie ree compromis gūūndi con ree bén ad riladxt Dios, din garen naj xixgab ree bén ma zinal ree xnejz Dios guial loj xixgab ree bén contzi naban. Garen naj xixgab ree bén ridxga' xtiidx Dios guial loj xixgab ree bén ad ridxga't laan. <sup>15</sup> Lējt ragbee guial ad zajct gac Cristo tījbzi con xinxgab, ziangajc garen naj bén riladx Cristo guial loj bén ad riladxt laaman. <sup>16</sup> Garen naj ree bén riladx dux Dad ree Dios guial loj ree bén riladx ni naladx reeman naj dios. Din dunuj ree guial raliduladx ree Dios naban, dunuj ree nayajc xyadoodan zi'c rēb tīblajt loj xtiidxaman lod rēb:

Naj gabajnnē' laa reeman gazu tēen con laa reeman bantēēz guin che reeman.

Naj gac xDios reeman  
abi' laa reeman gac da bejnan.

<sup>17</sup> Rēb tēē loj xtiidx Dios:

Gol barīi loj ree ben mal, gol been tīblad.

Ad gūūndi ni dxuudx din yaca'n lējt,

<sup>18</sup> abi' naj gac tījb Dad par lējt

guiáad lējt gaquidi da xi'ngaanan nē daxi'ndxa'pan.

Zian rēb dux Dad ree Dios bén ca' gra guialrniabee.

## 7

<sup>1</sup> Ni guin ree naj ree promejs ni ma been Dios con dunuj ree nayajc ree bén rlıladx ree Jesucrist. Zeel rayal yaguieen ree naguiejn yabajn ree naya. Yasa'n ree tıblad dol, xgab mal, nē gra ree ni dxuudx. Abi' guixie guixie yaguieen ree naguiejn yabajn ree zi'c rēn Dios por respejt ni raya'p reeman.

*Rabaa Pab guial bayüjn ree bén Corinto xgab por xtol reeman*

<sup>2</sup> ¡Gol gojc benza'c con dunujn! Dunujn achet waguieenan lējt, achet ni mal waguieenan lējt ad wasquiee tēetan lējt. <sup>3</sup> Ad naladxidi caneguijdxan lējt, din zi'c ma rnin lojdi diizd guia'xchej guial dunujn rayēnan lējt, abi' majsi yayējtan o majsi yabajnan per tijbzi nayajcan con lējt. <sup>4</sup> Dád ra'pan lējt confianz abi' dád rabaanē'n lējt. Majsi xhietēez guialzi caydüüdan, per zi'c rgu'di du luxdoon nix zeel dád rabaan, majsi xhietēez cayza'can

<sup>5</sup> Din diizd chi badxinan niz Macedonia achetczi guial yaziiduladxan por gra ni cayza'can, zi'c ni rüjnnē ree bejn dunujn nē guialnadxeb ni caydüüdan. <sup>6</sup> Per Dios bén ragu' luxdoo ree bén yu'naya luxdoo, laaman bagu' du luxdoon chi bi't Tito guie. <sup>7</sup> Abi' ad guialzi bi'ttaman bayu du luxdoon nix, nē guial bagu'di luxdooman zeel bayu du luxdoon. Naman du lojn guial dád rēndi guguaadi naj, yu' tēedi xgab yu'naya tēedi por naj. Laan naj ni rabaanē'n guial yu'quidi xgab por naj.

<sup>8</sup> Majsi naya guyu luxdoodi por gui'ch ni guxhalan lojdi, per achet naladxan. Majsi dád naya guyu luxdon chi guxhalanan guial ragbeen zunayadi tıbladēd, <sup>9</sup> per yan nix yu' luxdon, ad guial guyu nayatidi, yu' luxdoon nix dın por guialguyunaya guin ma bayüjndi xgab zēdi loj xnejz Dios. Guyunayadi abi' gudaandi zi'c rēn Dios, abi' achet ni mal baguieenan lējt. <sup>10</sup> Dın chi runaya luxdoo bejn zi'c rēn Dios, guialrunaya guin rüjn yudar persi rayüjn bejn xgab por xtolaman, zian rarii bejn loj casti, abi' ad yu't dxej yayüjn bejn xgab guial gulaaman loj casti guin. Per guial runaya luxdoo bejn abi' ad rüjntaman naguiejn chu'man loj xnejz Dios, dxel ad zajct gapaman guialnaban delant loj Dios. <sup>11</sup> Per lējt gol baguiaa zi'c ma been yudar guial guyunayadi abi' gudaandi zi'c rēn Dios. Por guial guyunayadi nayob beendi naguiejn bazuxnejzidi ni ma rnin cayüjn tijb lējt, abi' balendi bidxeb tēedi por ni cayüjnx. Dxel ma rēnejzdoodi gazun con lējt, badēē tēedi laax casti zi'c rayal. Por gra ni beendi zian biguien guial achet dol rajpidi por zian. <sup>12</sup> Gui'ch ni guxhalan lojdi, ad guxhaltanan guialzi rünan xgab por bén cayüjn dol guin o guial rünan xgab por bén cazagdiaj por xtol bén guin. Guxhalan gui'ch guin lojdi

din gulüüdi loj Dios guial yu'guijcquidi dunujn. <sup>13</sup> Laan naj ni rabaanë'n guial beenquidi zian.

Abi' yan mazri rabaan guial raguiaan Tito yu' luxdooman zagdxe baguiaadaman guial dád naza'c gojqquidi con laaman. <sup>14</sup> Zeel ad basa'nxtutidi naj por gra zi'c bazatan lëjt lojman. Din gra ni rën por lëjt naj diidxli zi'c ragbeedi guial dunujn ganax diidxli raneen, abi' tée diidxli naj ni raguie'chan loj Tito por lëjt. <sup>15</sup> Yan dad rusaaladxaman lëjt guial rusaaladxaman xhienaag bazoobidi xtiidxaman në gra respejt ni gopidi laaman chi guzuman con lëjt. <sup>16</sup> Dád nix yu' luxdon guial ra'pan lëjt confianz par gra.

## 8

### *Guial rudëed gon con guidib luxdoo*

<sup>1</sup> Yan compniar raliduladx ree Jesucrist, rayënan gagbeedi xhienaag cayagnë Dios bén rliladx ree Jesucrist niz Macedonia. <sup>2</sup> Majsì xhietëez cazajc reeman, per ad rucwëëzt rguien guial dád rabaa reeman. Majsì dád bénprob reen, per dad rabaa reeman rudëed reeman cintabl par gagnë reeman bejn ree. <sup>3</sup> Naj ragbee guial diidxli been reeman yudar bejn ree xt lod baneetzan laa reeman. Laa reeman been yudar mazri guial loj ni baguieenan xgab, sin guial chu güün laa reeman naguiejn. <sup>4</sup> Dád been reeman naguiejn du lojn din yatiëjban guial në laa reeman güün yudar bén rliladx ree Jesucrist, <sup>5</sup> abi' been reeman yudar mazri guial loj ni baguieenan xgab, laan naj guial diidxli ma basa'n laagajc reeman loj Dios, laan naj ni been reeman yaloj. Zeel yan ma za' reeman par güün reeman ni yaguie'chan loj reeman guial rën reeman güün reeman zi'c rën Dios. <sup>6</sup> Zeel yan zi'c ma guzuloj Tito cuto'paman yudar guin, raguie'chan lojman din gulox guto'paman laan entr lëjt. <sup>7</sup> Dunujn rayagbee guial par gra zagdxe zëdi: Diidxli rliladxidi Jesucrist, ragbeedi xcwentaman, achet ryaadxidi par guinieedi xtiidxaman, za'sindi par güündi laaman sirv rën tëedi dunujn, yan gol been naguiejn din guiguien guial najdi benza'c par güündi yudar con ni ranan lojdi. <sup>8</sup> Ad rüntan lëjt naguiejn guial gudëedi ni rdo'p, per rugojnan lëjt zi'c rabaa ree ben ren guial rüjn reeman yudar, din bal rëndi gulüüdi guial diidxli rëndi xcompniaridi. <sup>9</sup> Din lëjt ragbee zi'c naza'c Dad Jesucrist, bén basa'n gra guialnaza'c xanyabaa, abi' bi'taman loj guidxliuj zi'c tijb bén ni achet rajp din por laaman yayal në lëjt xguialnaza'c Dios.

<sup>10</sup> Zeel rnin lojdi guial zagdxen gulooxidi ni guzulojdi gudibijz. Yaloj lëjt been xgabza'c guial güündi yudar, abi' laa guzuloj gajquidi. <sup>11</sup> Yan zi'cgajc yu' luxdoodi nix guzulojdi,

ziangajc gol babaa gusnuudi gudëedi ni rdo'p zi'ctzi galguzu-jdi. <sup>12</sup> Din chi diidxli rën bejn güünman yudar, xhietëez naag zajc güünman yudar. Ad rayalt gudëedaman xt ni ad rajptaman.

<sup>13</sup> Ad canitan lojdi guial tädidi tarbajw cwe'quidi xt ni ad rajptidi par güündi yudar bën ryaadx ree xhienin chitëë xhie guiyaadx reeman, ni rayënan naj guial tibloj yaguieen dulasa' ree yudar. <sup>14</sup> Yan lëjt zajc güündi yudar bën ryaadx ree xhienin, dxel despuejs güün reeman lëjt yudar con ni ryaadxidi. Zian tibloj yaguieen du lasa' ree yudar. <sup>15</sup> Loj xtiidx Dios rëb: "Bën bato'p zro' achet been sobr, abi' bën bato'p ta'nzi achet biaadxaman."

### *Tito con ree xcompniaraman*

<sup>16</sup> Quixtëe Dios badëeman loj Tito lasa'gajc xgab rünan por lëjt. <sup>17</sup> Yan chi raguie'chan lojman guidganajman lëjt, laa cwëb gajcaman guial ma rënman guguaaman lëjt, ad beent nagueijn chu niniabee ni'taman.

<sup>18</sup> Abi' con laaman cayxhaalan stijb dux compniaran bën ma nünbee ree dux compniar ree bën rliladx ree Jesucrist guidibczi, guial rulüüman bejn ree xtiidxza'c Dios zagdxe. <sup>19</sup> Ma bacaabee tëe ree dux compniar raliduladx ree Jesucrist laaman din saman con dunujn din güünman dunujn yudar yune'n ni cado'p. Abi' yudar guin cado'pan din guiguien guial rayënan yaguieenan yudar stijb ree dux compniar ree, abi' por yudar guin guza't reeman Dad Jesucrist zagdxe. <sup>20</sup> Zeel cwabee bën guie din saman con dunujn chitëë xhie gucaaquia reeman dunujn por gra yudar ni cado'p ni naca'n par yugsa'nan. <sup>21</sup> Din dunujn rayënan yaguieenan gra zi'c rayal, ad naabtizi loj Dad Jesucrist, në loj ree bejn.

<sup>22</sup> Yan cayxhaalan Tito con bën guin cayxhaalnë'n laa reeman stijb dux compniaran bën ma balu'been zien volt guial diidxli rënman güünman yudar, abi' mazri yan guial dád rajpaman lëjt confians. <sup>23</sup> Bal chu guiniabdiidx por Tito, gol güjdx guial da compniaran najman, laaman cayüjn naj yudar par günan lëjt yudar chinalidi xnejz Dios. Guiáad za' tio'p dux compniaran bën zë ree con laaman, dux compniar ree bën rliladx ree Jesucrist guxhaal laa reeman, abi' ruza't reeman Jesucrist zagdxe. <sup>24</sup> Yan gol balüü loj reeman guial diidxli rëndi bejn ree, din por laa reeman gagbee ree los demazri ree compniar rliladx Jesucrist xcwentidi, din guguaa tëe reeman guial ni diidxli naj ni ma rën loj reeman xcwentidi.

## 9

*Yudar par ree xbejn Jesucrist.*

<sup>1</sup> Yan por yudar ni rayal yale'can par yaguieenan yudar dux compniar ree bén rlliladx ree Jesucrist, ad ryaadxt ganin mazri xcwentan, <sup>2</sup> din naj ragbee guial ruladxidi güündi yudar. Abi' xt nix yu' luxdon rën loj ree bén Macedonia guial lëjt bén Acaya diizd gudibijz cayüjndi naguiejn cayüjndi yudar, abi' gra ree bén Macedonia been naguiejn güün yudar chi biguiejn reeman zian. <sup>3</sup> Zeel caxhalan Tito con za tio'p ree dux compniar ree din guiguien guial waliqui ni ma gunen por lëjt xcwent yudar guin, din güündi naguiejn güündi yudar zi'c ma rën por lëjt. <sup>4</sup> Din bal guidnë'n tio'p choon ree bén Macedonia ad yadxaaglojn lëjt ad za'tidi porvinid, abi' natun par naj chitëë ganin natun par lëjt por confianz ni ra'pan lëjt. <sup>5</sup> Zeel benan xgab rën loj Tito con za tio'p dux compniar ree guial mejorli ned gaj reeman guidganaj reeman lëjt, din güün tëë reeman yudar guloox guto'p reeman yudar ni ma nadi din ma najn purvinid chi gualan. Zian guiguien guial diidxli rëndi yazaladxidi ad guialzi canabeetan lëjt.

<sup>6</sup> Naj rni lojdi bén rxübin ta'n, ta'n gajc raca'man, guiáad bén rxübin zro', zro' gajc raca'man. <sup>7</sup> Tijbgaj lëjt gol badëë zi'c naj xixgabidi gudëëdi, ad mal gant ad naguiejn tëët, din Dios rënman bén razaladx guidib luxdoo. <sup>8</sup> Abi' Dios rajpaman gra guialrniabee par güünman lëjt yudar gapidi gra ni ryaadxidi chitëë xhie guiyaadxidi din güündi yudar zi'c rayal. <sup>9</sup> Loj xtiidx Dios rëb:

Bén ni rgui's ni rajpaman abi'  
rudëëman laan loj ree bénprob,  
ad yu't dxej yayanladx reeman  
ni zagdxe ni rüjnman.

<sup>10</sup> Yan Dios bén razaladx bin rxübin bejn, bén razaladx guial-raw par ree bejn, laaman gulüü lëjt xhie güündi din gapidi gra ni rayal gapidi, din gac güündi yudar mazri bén ryaadx ree xhienin. <sup>11</sup> Zian mazri naj ni gunee Dios lojdi din gusnuu güündi yudar yazaladxidi. Abi' por yudar ni guixhiaalnëdi dunujn par ree compniar rlliladx ree Jesucrist, laa reeman gudëëd quixtëë loj Dios. <sup>12</sup> Abi' yudar guin ad züjntan sirv naabzi par loj ni ryaadx reeman laan, güünan sirv në par gudëëd reeman mazri quixtëë loj Dios. <sup>13</sup> Por yudar guin gagbee reeman guial cuzoobquidi xtiidxza'c Jesucrist zi'c rlliladxidi laan abi' guza't reeman Dios zagdxe por zian, në guial najdi benza'c rgui'sidi ni rajpidi par laa reeman në par gra ree bén ryaadx laan. <sup>14</sup> Abi' zën reeman lëjt, cwedx tëë reeman Dios por lëjt por xgab za'c ni banee Dios lojdi guial güündi yudar. <sup>15</sup> Quixtëë Dios por ni ma bazaladxaman duloj ree por xi'nman, xt ni'quid radxejlt xhie yaguie'ch ree por zian!

## 10

### *Guialrniabee ni rajp Pab guial najman xi apóstol Jesucrist*

<sup>1</sup> Naj Pab, yu' ree bën na guial benza'c naj chi za'n con lëjt, abi' chi za'n zijt sin guial rdxeb rdiilë'n lëjt. Per zi'cgajc ninieenë Cristo lëjt con respejt në con diidxza'c, rniaaban lojdi guial <sup>2</sup> xi nix chi gualan guidganan lëjt ad rüjnt naguiejn gadilë'n bën rëb ree por da xgabzan cayünan ni cayünan, din ad rdxebtan ganenë'n laa reeman. <sup>3</sup> Walican nayajcan bénguidxliuj, per ad raguieentan naguiejn yaguieenan gan por dux xgabzan zi'c rüjn ree bën ad zinalt xnejz Dios. <sup>4</sup> Ad raguieentan naguiejn yaguieenan bejn ree gan por dux xgabzan, dunujn raguieenan gan por xguialrniabee Dios, guialrniabee ni zajc guse'n xhietëez ni mal. <sup>5</sup> Por guialrniabee guin baguieenan gan loj ni rudxiib ree bejn duguijcan, abi' baguieen tëen gan loj guial nadxal reeman ni rudxoon güünbee reeman Dios. Zianan rase'nan xhietëez xgab din chile' gucaagdiajg reeman xtiidx Jesucrist. <sup>6</sup> Abi' lëjt chi ma cuzoobidi xtiidx Dios diidxli, dxel dunujn ma nadxu'n par yazuxnejzan gra ree bën ad wazoobt diidx zagdx.

<sup>7</sup> Lëjt mazri ridxga'di zi'c ruguiaadi bejn. Bal yu' bën rüjn xgab guial diidxli najman xbejn Cristo, rayal cu'guijcaman guial nayajc ree xbejn Cristo zi'cgajc laaman. <sup>8</sup> Abi' majsi ganin lojdi mazri xcwent guialrniabee ni banee Dios lon, ad ratutan din laaman banee guialrniabee par günan lëjt yudar chignia'di mazri xcwent xnejzaman ad par gunijttan lëjt. <sup>9</sup> Ad naladxidi guial rënzán gucheban lëjt con ree da gui'chan. <sup>10</sup> Din yu' ree bën ni rëb guial diidx naa abi' sin guialrdxeb rnienë'n lëjt loj ree da gui'chan, abi' chi za'n con lëjt ni'quid rulüüt lasajcan par lëjt, ni'quid radxat loj ree bejn ni rnien. <sup>11</sup> Per naj rnin lojdi guial bën rëb ree zian rayal gagbee reeman guial zi'cgajc raneenë'n lëjt loj dux gui'chan chi nadxu'n zijt, ziangajc zajc yaguieenan chi nadxu'n con lëjt.

<sup>12</sup> Din dunujn ad raguieentan zi'c rüjn ree bën rlies xvalor gajc, per ni'czi ta'n ad raguieentan xgab yaguieenan zian. Din nitontzi rüjn reeman chi rlies xvalor gajc reeman, ruguiaa laagajc reeman xhienaag naj reeman par ree stijb xcompniar reeman. <sup>13</sup> Per dunujn ad ralest dux valor gajcan mazri guial loj ni rayal, din dunujn ranazan ni naj diidxli zi'c gulej Dios dunujn yaguieenan, yan ma cwëjbaman badxinan ladxidi. <sup>14</sup> Zeel ad güündi xgab guial cadëdtë caynabeen lëjt, din yaloj dunujn bio'p ladxidi par yasiidan lëjt xtiidxza'c Jesucrist. <sup>15</sup> Dunujn ad ralest dux valor gajcan por tijb ni been stijb bejn. Per ralëezan guial ni's xguialrliladxidi, din yasnuu yaguieenan lëjt yudar gusnuu güünbeedi ni rayal gagbeedi

xhienaag rayal yaguieen ree. <sup>16</sup> Zian ma zile' yo'n mazri delant ladxidi par yatie'chan xtiidxza'c Jesucrist, per lod achut wazuloj chitëe yales dux valor gajcan con ni ma been ben ren.

<sup>17</sup> Bal yu' bèn rën guilies xvalor gajc, mejorli guiliesaman xvalor dux Dad ree Dios. <sup>18</sup> Din ad bèn rliest xvalor gajc naj bèn raya'n zagdxë loj Dios, bèn raya'n zagdxë naj bèn rlies xvalor Dios.

## 11

### *Pab con ree apóstoles bèn rusquiee ree*

<sup>1</sup> Yan, ¡Xi nix taandi naj con tio'p choon ree da xgab tontan! Per naj rni lojdi gol gudaan naj. <sup>2</sup> Naj rënan lëjt zi'cgajc rën Dios lëjt. Zi'cgajc tijb dad rajp xi'ndxa'p biin ni ma naj guxhliaa din chile' guidxinm naya loj xin tia' laam, zian rënan guidxinë'n lëjt loj Cristo naya sin dol. <sup>3</sup> Per rdxëban chu' bèn gusquiee lëjt zi'c basquiee bëël Eva, abi' ad züntridi xgab guidib luxdoodi xcwent Jesucrist. <sup>4</sup> Din chi ri't ben ren rüman diidx lojdi xcwent Cristo, per garen guial zi'c ma balüün lëjt, o chi ri't bèn ren rüman diidx lojdi xcwent Sprijt, per ad lasa't xSprijt Dios bèn ma nabannëdi, o chi ri't ben ren lojdi naman xhienaag din gapidi perdon, per garen guial loj ni ma ranan lojdi, lëjt laa ridxga' gajquidi laa reeman. <sup>5</sup> Per naj rulüü achet ryaadxan delant loj ree bèn rëb laa reeman naj quijb xi apóstoles Jesús. <sup>6</sup> Din majsi achet sirv naj par ganen, per ad ryaadxtan guialrignia' abi' lëjt ragbee guial diidxlin por gra ni ma baguiaadi baguieenan.

<sup>7</sup> Per, ¿chuj ni ni malan benan ya guial ad bentan benro' lojdi persi benan gan gojquidi xbejn Cristo, në guial ad baquijxtan lëjt chi basidan lëjt xtiidx Dios? <sup>8</sup> Ben renli ree bèn naj ree xbejn Cristo cwa'n xmilia reeman persi beenan naj yudar la'tgaj guzun con lëjt persi basidan lëjt xtiidx Dios. <sup>9</sup> Abi' chi guzun con lëjt, chi biaadxan xhienin ad gunaabtan lojdi güündi naj yudar, bèn Macedonia ree bèn rliladx ree Jesucrist laa reeman bidnë ni biaadxan nadxel. Ad goct wanin lojdi guneedi xhienin par naj, ad yu' tëët dxej ganin guial rüjn naguiejn güündi naj yudar. <sup>10</sup> Zi'c najn xbejn Cristo rnin lojdi ni naj diidxli, guial niz Acaya Achutczzi zajc gudxoon guial chu' luxdon zagdxë guial guiën ni benan con lëjt. <sup>11</sup> Abi' ¿chexc zeel benan zian con lëjt? ¿Guial ad rëntan lëjt ya? Per Dios ragbee guial dád rënan lëjt.

<sup>12</sup> Abi' gusnuu günan zi'c cayünan xt yandxej guial ad zanaabtczan lojdi güündi naj yudar, din chitëe xhie guiniee ree bèn ruladx guilies xvalor gajc guial naj reeman xbejn Jesús guial zi'cgajc cayguieenan cayüjn reeman. <sup>13</sup> Din laa



reeman rëbzi reeman guial naj reeman xi apóstoles Jesús, rusquieezi reeman bejn ree rüjnzi reeman zi'c rulüü naj reeman xi apóstoles Jesús. <sup>14</sup> Per xt ni'quid radxat loj bejn por zian, din xt xindxab zile' gulüüloj loj bejn zi'c tijb xianjl Dios. <sup>15</sup> Dxel xt ni'quid radxat loj bejn guial bén ni cayüjn ree xmandad xindxab rëb reeman guial laa reeman cayüjn xmandad Dios. Per laa reeman zayal reeman casti ni rayal reeman por ni cayüjn reeman.

*Tarbajw ni gudëd Pab guial najman xi apóstol Jesucrist*

<sup>16</sup> Yan canin lëjt stijb: Ad naladxidi guial ad nadëdguientan, per bal rüjnzi xgab zian gol basa'n za naj ganen zi'c tijb bén ad nadëdguient din nëgajc naj gales da valoran majsi tibda'nzi. <sup>17</sup> Ad nat Dios guial gales da valoran zi'c cayünan, per gales da valoran zi'c tijb bén ad nadëdguient. <sup>18</sup> Zi'c yu' zien ree bén rlies xvalor gajc por ni rüjn reeman loj guidxliuj guie, yan ziangajc naj gales da valor gajcan. <sup>19</sup> Din guial najdi bén rignia' ad nawëëgt naj taandi bén ad nadëdguient ree. <sup>20</sup> Rdaandi bén rniabee ree lëjt rüjn reeman zi'ctzi rën reeman, rdaandi bén rtia' ree ni rajpidi, bén rusquiee ree lëjt, o rniece reeman lojdi ganax ree diidx nabë abi' xt rtiëjbidi rëëz reeman ro'di. <sup>21</sup> Majsi natu'n par naj, per naj rni lojdi guial ad baya'ptan valor guial naguieennë'n lëjt zian.

Per bal rlies xvalor reeman por xhiedxitzinin, nëgajc naj zajc gales da valoran. Canen lojdi zi'c tijb bén ad nadëdguient, din ad xnejztan. <sup>22</sup> Per bal na reeman guial naj reeman bén Hebreo, nëgajc naj naj bén Hebreo. Bal na reeman guial naj reeman bén Israel, ziangajc naj bén Israel gajc naj. Bal na reeman guial loj xdiaa Abraham zëed reeman, nëgajc naj zial loj xdiaa Abraham. <sup>23</sup> Abi' bal na reeman guial xmandad Cristo cayüjn reeman, naj mazri cayünan xmandadaman. Majsi zi'c rniece bén ad nadëdguient rnien chi rnin zian, per diidxli guial naj mazri ma benan xmandad Cristo guial loj reeman. Abi' por zian mazri ma guyun ladxguuib guial loj reeman, mazri ma gudijn ree bejn naj guial loj reeman abi' mazri zien volt ma guzun loj guialgüjt. <sup>24</sup> Gaay volt ma gudijn ree bén Israel naj, abi' beegaj gudijn reeman naj zi'ctiubitap volt rugaz reeman duu ladan. <sup>25</sup> Choon volt gudijn reeman naj con yag, abi' tib volt bacaaguaiaj reeman naj. Choon volt ma wej barcw lod za'n xan nijsdoo, abi' tibdxej tibguiaal baya'n nan loj nijsdoo. <sup>26</sup> Guidibczi lod ma wan, gudëëdan loj ree ni nadxeb chi gudëëdan loj ree guiw, loj ree béngubaan, loj ree bén ladxan bén Israel ree në loj ree bén ad najt bén Israel. Ma gudëëd tëen loj ree ni nadxeb luguiedx ree, dajn ree, loj nijsdoo, në loj ree bén rusquiee na reeman guial naj reeman xbejn Cristo. <sup>27</sup> Dád ma guzaagdianj. Dád zien volt ma gulën

bacaal, ma gulaanan, ma we'can nijs, abi' ma guyu dxej ni achetdzi gudawan. Ma gognajlan, ma biaadx tēē da xaban.

<sup>28</sup> Abi' ad laatzanan ma guza'can, zien ree ni ma guza'can. Abi' guixie guixie rünan xgab por ree xbejn Cristo bén zojb ree niz lod ma wan. <sup>29</sup> Bal xhie cazajc tijb ree bén rliladx Jesucrist, cayünan xgab por laaman. Abi' bal cusquiee reeman tijb ree bén rliladx Jesucrist par güünman dol, dád ralenan yu' tēēn laaman xgab. <sup>30</sup> Bal rüjn naguiejn gales da valor gajcan, tijbzi ni ganin por naj, naj por guialrzagdiaj ni ma gudēēdan. <sup>31</sup> Abi' Dios xDad Dad Jesucrist, laaman bén rayal respejt guidib tiamp, laaman ragbee guial diidxli naj ni canen. <sup>32</sup> Tiamp chi canabee rey Aretas, wan luguiedx Damasco dxel gunabee gobernador luguiedx guin biaaw nejb par guiniaaz reeman naj. <sup>33</sup> Per guyu ree bén ni badxe' naj lēn tijb dxüm abi' gulet reeman naj niz ro' ventan ni naj ro' ze' ni nayaw guiedx guin, zian gulaan loj gobernador guin.

## 12

### *Ni balüüloj lon*

<sup>1</sup> Achet rüjn bejn gan guial guilies xvalor gajcaman, per rayal ganin lojdi por ree ni balüüloj lon nē ree ni balüü Dad Jesucrist naj. <sup>2</sup> Naj nünbee tijb xinguaaaw rliladx Jesucrist, ma gojc chidaj ijz wejx xanyabaa lod zojb Dios. Ad ragbeetan bal binē xcuerpix o xsprijtzix wej, ad ragbeetan, tijbzi Dios ragbee. <sup>3</sup> Bal binē xcuerpix o xsprijtzix wej, ad ragbeetan, tijbzi Dios ragbee. Per naj ragbee <sup>4</sup> guial wejx lod zojb Dios, lod biguiejnx diidx ni xt ni'quid radxejlt xhienaag ninieex laan guial ad rayalt gagbee gra bejn laan. <sup>5</sup> Bén zii zajc galesan xvalor, per ad rliestan da valor gajcan, ni rnizan por naj por ree guialrzagdiaj ni ma gudēēdan. <sup>6</sup> Abi' majsi gales da valoran, ad cayüntan zi'c tijb bén ad nadēdguient din ganax ni diidxli naj ni ganin. Per ad rüntan zian chitēē yadxaløj bejn naj mazri guial loj ni rayal por ni ruguiaa reeman rünan, o por ni rigujiejn reeman rnien.

<sup>7</sup> Nē par chitēē gales da valoran zro' por gra ni ma balüü Dios naj, cadēēdan tijb guialzi ni naj zi'cgajc zi'c chi yu' tijb guiējch tiblajt bejn. Laan naj xchiin xindxab par güünnaax naj chitēē gales da valoran. <sup>8</sup> Choon volt ma canaaban loj Dios din chiquiedaman guialzi ni cadēēdan, <sup>9</sup> per laaman na lon: "Zi'c rēnan lüj achet gac, din mazri rguien da guialrniabeen chi cazagdiaj bejn." Zeel rabaan por ree guialrzagdiaj ni cadēēdan din guiguien guial nabanen con xguialrniabee Cristo. <sup>10</sup> Rabaan por xhietēēz guialrzagdiaj ni cadēēdan, o nē chi rnieeguijdx bejn naj, o chi ryaadxan xhienin, o chi xhie rüjn bejn naj, nē gra ree tarbajw ni cadēēdan, guial cadēēdan

laan guial r nan Cristo. Din chi cazaagdian dxel mazri ra'pan yudar Cristo.

*Yu' Pab xgab por ree b n r liladx Cristo luguiedx Corinto*

<sup>11</sup> Gunen n l jt por naj gajc zi'c tijb b n ad nad dguient, per l jt rajp dol guial benan zian. Din l jt naj b n rayal guilies da valoran delant loj ree b n ni r b guial laa reeman naj quijb xi ap stoles Jesucrist. Din majsi tijbzi b n ad r jnt sirv naj, per achet ryaadxan delant loj reeman. <sup>12</sup> Chi guzun con l jt ad balenya'tan guial g nan milagr ree n  gra los demazri ree ni badxalojdi ni benan n  graloj ree ni benan ni been sirv zi'c sen guial diidxli najn xi ap stol Jesucrist. <sup>13</sup> Gra zi'c ma benan con gra ree compniar r liladx Jesucrist lod ma wan, ma benan laan con l jt. Tijbzi ni ad bentan con l jt naj guial ad rnitan lojdi guial g undi naj yudar con gra ni ryaadxan la'tgaj guzun con l jt, per bal guneguijdxan l jt por zian ;Gol been naj perdon!

<sup>14</sup> Yan ma cay nan xgab guidganan l jt stijb, laan naj ni yayon volt guidganan l jt. Abi' ni'qui yan ad zanitan lojdi guial g undi naj yudar, ad ni rajptidi r nan, l jt naj b n r nan. Din ad xi'nt bejn rguuil xhienaag guibanman, dad guin ree rguuil xhienaag guiban ree xi'n reeman. <sup>15</sup> Abi' majsi gra ni ra'pan g nan gaxt, o majsi yadib da cuerpan par g nan l jt yudar, per achet g unan. Majsi rul   chi mazri r nan l jt, ta'nzi r ndi naj.

<sup>16</sup> Walican guial ad gunaabtan lojdi niagn di naj nuneedi xhienin, per yu' ree b n r b guial benan zian din nasinan par gusquien l jt. <sup>17</sup>  Wen basquieen l jt ya chi guxhalan b n bidganaj ree l jt? <sup>18</sup> N  chi r n loj Tito guial gui'taman guidganajman l jt abi' guxhalan laaman con stijb dux compniar ree b n r liladx Jesucrist,  wen yu' ni basquiee Tito lojdi ya?  Nid zi'c laaman zi'c naj tiblojzi naj xgab raguieenan ya abi' zi'cgajc r nan r jnman?

<sup>19</sup> Por gra ni ma ranan lojdi, ad naladxidi guial caylaj dunuj gajcan, din achet waguieenan l jt. Dios ragbee guial zi'c nayajcan xbejn Cristo cayneen n l jt, abi' gra ni caynan lojdi najn par yaguieenan l jt yudar chinalidi xnejz Dios guial ray nan l jt. <sup>20</sup> Din rdxeban guial chi guialan guidganan l jt ad zadxaaglojtan l jt zi'c r nan, abi' l jt ad zuguaatidi naj zi'c r ndi guguaadi naj. Rdxeban gadxaaglojn l jt con wadijl, guialnad doj, guialrdxe'ch, guialrlies xvalor gajc, guialrniee guijdx lasa', guial ruza't bejn, guial r jn benro' n  guial ad nadxagri lasa'di. <sup>21</sup> Rdxeb t en guial chi guidganan l jt stijb abi' yaya'nxtun por l jt delant loj Dios. Abi' d d chu' naya luxdon por zien ree lasa'di b n ad rb zt ree r jn dol, b n ad ray jnt ree xgab zi'c naban reeman. Ad rucw  zt rzun 

reeman bén ad najt lacheel reeman, ad rucwëez tëet reeman vijs ni rajp reeman o stijb ree ni ad rüjnt sirv ni rüjn reeman.

## 13

### *Diidx bigra bacaa Pab loj gui'ch guie*

<sup>1</sup> Yan ni yayon volt guidganan lëjt. Chi guialan, gra ni nadi por stijb ree xcompniaridi, rayal chu' tio'p o choon testiw din guiguien guial diidxli naj ni canadi. <sup>2</sup> Abi' zi'c rën loj ree bén ni cayüjn dol chi bialan bidganan lëjt ni barojp volt zi'cgajc ma rnin loj gradi, laagajcan canin lojdi yan za'n zijt guial chi guialan guidganan lëjt stijb, achetczi ni téd zezi par ree bén ni cayüjn dol. <sup>3</sup> Zian gagbeedi ni rëndi gagbeedi guial Jesucrist cunee diidx ni rayal ganin lojdi. Abi' Jesucrist achet ryaadxaman par güünman zi'c rayal güünman con lëjt abi' con lëjt culüü xguialrniabeeman ni rajpaman. <sup>4</sup> Walican güjt Jesucrist loj crüzj zi'c tijb bén ad rajpt guialrniabee, per yan nabanman por xguialrniabee Dios. Abi' zi'c güjtaman zi'c tijb bén ad rajpt guialrniabee ziangajc dunuj ree rulüü ad raya'pt ree guialrniabee, per zi'c nayajcan xbejn Cristo raya'pan xguialrniabee Dios par yaguieenan ni rayal yaguieenan con lëjt.

<sup>5</sup> Lëjt gajc gol been xgab bal walidi rliladxidi Jesucrist. Lëjt gajc gol been xgab xhienaag nabandi. Gol gogbee guial ma nabandi con Jesucrist, bal id rnieezidi guial rliladxidi laaman. <sup>6</sup> Balzianclaa gagbeedi guial dunuj diidxli raliduladxan laaman. <sup>7</sup> Abi' rarejdxan Dios por lëjt chitëë güündi ni mal, ad par yaya'ntan zagdxe delant loj ree bejn, cayguieenan zian par güündi ni naj zagdxe, majsi par ree bejn ad cayguieentan zi'c rayal. <sup>8</sup> Per ad zajct yaguieenan tibladi ni naj diidxli, dunuj caynazan ni naj diidxli. <sup>9</sup> Zeel yu' du luxdoon nix achet güünan ni cayza'ctzan din chile' sudxi'chidi loj ni rliladxidi. Abi' rarejdxan Dios din gagbeedi guidiblagaa xhienaag guibandi xnejz. <sup>10</sup> Abi' caxhalan gui'ch guie lojdi dxelri guidganan lëjt, din chi guialan guidganan lëjt ad ryaadxt gadilë'n lëjt por guialrniabee ni bane Dad Jesucrist lon, guialrniabee ni baneeman lon par günan lëjt yudar chignia'di mazri zagdxe xnejz Dios, ad par gunijttan lëjt.

<sup>11</sup> Yan compniar raliduladx ree Jesucrist par guloxan gui'ch guie, naj rni lëjt: Gol badxe' luxdoodi zagdxe, gol been naguiejn gol gubajn zi'c rayal, gol bagu' luxdoodi gol gubajn tëe zagdxe, gol babe'cdxe luxdoodi con ree xcompniaridi. Abi' Dios bén rën dunuj ree rabe'cdxe tëeman du luxdoo ree laaman gagnë lëjt. <sup>12</sup> Xhietëez hor ni radxaag ree xcompniaridi, gol bagajpdioz lasa'di zi'c rayal. <sup>13</sup> Gra ree dux

compniar ree bén riladx ree Jesucrist niz guie rugajpdioz reeman lëjt.

<sup>14</sup>Dad Jesucrist güünle' gradi, guial rën Dios lëjt abi' xSprij-taman gagnë lëjt zianzi. Amén.

## Gui'ch ni guxhaal San Pabl loj ree b n Galacia rliladx Jesucrist

### *Rugajpdioz San Pabl b n rliladx ree Jesucrist*

<sup>1</sup> Naj Pab najn ap stol, per ad b nguidxliujt bacaabee naj ad laa t et reeman guxhaal naj, najn ap stol por Jesucrist n  por dux Dad ree Dios b n basban laaman loj gualg jt. <sup>2</sup> Gra ree dux compniar ree b n za' ree guie con naj ragajpdiozan l jt najdi b n rliladx Jesucrist niz Galacia. <sup>3</sup> Dux Dad ree Dios n  Dad Jesucrist g  nle' l jt yabe'cdxe t e reeman luxdoodi. <sup>4</sup> Jesucrist g jt por dux tol ree persi bab eeman dunuj ree loj gra ree ni mal ni yu' loj guidxliuj guie zi'c goc xixgab dux Dad ree Dios. <sup>5</sup> Zeel rayalczi yaya'p reeman respejt zianczi. Am n

### *Achetri diidx ren ni zajc yab e dunuj ree loj dol*

<sup>6</sup> D d radxalon guial d d cari cab eladxidi xtiidx Dios, abi' laaman guial r n Jesucrist l jt zeel gurejdxaman l jt. Per l jt diidx ren ma ridxga'di <sup>7</sup> abi' ni'quid xtiidx Diosan. Diidxliczi yu' ree b n r n gagdxadi abi' r n reeman guchaa reeman zi'c naj xtiidx Cristo. <sup>8</sup> Per bal yu' b n rul u l jt diidx ren ree guial loj ree diidx ni ma bal n l jt par gaquidi perdon, laaman ma rayal xcasti Dios, majsi chut e znin majsi naj gajc o majsi tijb xi anjl Dios. <sup>9</sup> Zi'c ma rnin l jt abi' yan ma rninan zatijb: Bal chu rul u l jt diidx ren ree guial loj xtiidx Cristo ni ma bililadxidi, laaman ma rayal xcasti Dios.

<sup>10</sup> Ad raguiltan mod guial yaya'n nan zagdxre loj ree b nguidxliuj, r nan naguiejn din yaya'n nan zagdxre loj Dios. Din bal g nan naguiejn yaya'n nan zagdxre loj ree b nguidxliuj dxel ad cuzobtran xtiidx Cristo.

### *Xhienaag gojc zeel gojc Pab ap stol*

<sup>11</sup> Compniar raliduladx ree Jesucrist, r nan gagbeedi guial xtiidx Cristo ni ma bal n l jt ad b nguidxliujt gul e guic laan. <sup>12</sup> Abi' ad cwa'tanan ad basid t etan laan por b nguidxliuj, Jesucrist gajc naj b n bal u laan naj.

<sup>13</sup> L jt ma biguiejn guial chi guyu'n loj xreligion ree b n Israel, guzunaalan b n rliladx ree xtiidx Dios din g nan laa reeman ni mal abi' benan naguiejn din gusa'n ni rliladx reeman. <sup>14</sup> Abi' naj mazri guzudxi'chan loj religion guin guial loj ree lasa' zidn 'n tijbzi guial benan naguiejn benan gra ree xcostumbr ree dux b ngulalan. <sup>15</sup> Per guial r n Dios naj, diizd chi gadan guial loj guidxliuj mal gulejman naj. Dxel chi beenman xgab. <sup>16</sup> Bal uuloj xi'nman lon din gatiechan xtiidxza'caman loj ree b n ad najt b n Israel. Abi' chi goc zian

achut loj bignabdiidxan, <sup>17</sup> ad watan Jerusalén nignan Bén ma naj ree xi apóstoles Jesús gocli diidz chi gadan gac xi apóstol Jesús, laa wa gajcan niz Arabia dxel baye'can niz Damasco stijb.

<sup>18</sup> Chi goc choon ijz dxel wan Jerusalén persi benbeen Béd abi' guzun con laaman chiin gubijdx. <sup>19</sup> Per achut apóstol ren baguaian tijbzi Jacob bijch Dad Jesucrist. <sup>20</sup> Gra ni canin lëjt naj diidxli abi' Dios ragbeechaaw guial ad rusquieetan.

<sup>21</sup> Dxelri wan niz Siria nē niz Silicia. <sup>22</sup> Per ree Bén rlliladx Cristo, Bén zojb ree niz Judea ad wayünbeet reeman naj nadxel. <sup>23</sup> Rguiejnzi reeman rēb ree bejn: “Bén guzunal dunuj ree yaloy par gūnman dunuj ree ni mal yan ma catie'chaman xtiidx Jesucrist, majsi yaloy beenman naguiejn din yasa'n ree ni raliduladx ree Jesucrist.” <sup>24</sup> Abi' rudēē reeman quixtēē loj Dios guial nē naj ma rlliladx Cristo.

## 2

### *Bachajg Pab Bén Naj ree apóstoles*

<sup>1</sup> Chi goc chidaj ijz, dxel wan Jerusalén zatijb. Binē'n Bernabé con Tito, <sup>2</sup> din Dios na guial gan ni. Abi' Jerusalén guin badxaag dulasa'n tijb luar con ganax ree Bén rniabee loj ree xbejn Cristo persi benē'n laa reeman diidx por xtiidx Jesucrist ni culün Bén ad najt ree Bén Israel. Benan zian din ad rēntan guial ni ma benan o ni cayūnan gacan dxiin xlia'. <sup>3</sup> Per ni'qui Tito Bén guzu ni con naj, majsi najman Bén grieg ad beent reeman laaman naguiejn chu'man sen ni ru ree Bén Israel. <sup>4</sup> Din guyu tio'p choon ree Bén Israel been reeman zi'c rulüü naj reeman dux compniaran persi gojc bachajg reeman dunujn par gula'ch reeman conin ad raguieentran guial ma raliduladxan Jesucrist din gac nabee reeman dunujn yaguieenan zi'c rniabee ley. <sup>5</sup> Per ni'czi tibda'n ad batiëjbtan nūjn reeman dunujn gan, din ad rayēntan cwēēladxidi xtiidxli Jesucrist ni ma zinalidi.

<sup>6</sup> Abi' ree Bén rniabee loj ree xbejn Jesucrist achetri na reeman lon guial rayal gūnan, majsi chutēēz naj reeman din delant loj Dios tiblojzi naj bejn. <sup>7</sup> Luar ninia reeman xhie mazri nūnan, laa gogbee gajc reeman guial Dios gulej naj din gatiechan xtiidxza'c Jesucrist loj ree Bén ad najt Bén Israel, zi'cgajc gulejman Béd din guitie'chaman diidxza'c guin ree loj ree Bén Israel. <sup>8</sup> Abi' Dios Bén bacaabee gajc Béd din gacaman apóstol loj ree Bén Israel, laagajcaman bacaabee naj din gacan apóstol loj ree Bén ad najt Bén Israel.

<sup>9</sup> Zeel Jacob, Béd con Waj Bén rniabee ree mazri loj ree Bén rlliladx Jesucrist, gogbee gajc reeman guial Dios naj Bén banee naj guialrniabee guin. Abi' banee yaa reeman zi'c tijb

sen guial ma nayajcan compniar guial ma za' tēē reeman conform guial naj con Bernabé yuglūūn bén ad najt ree bén Israel, guiáad laa reeman gulūū reeman bén Israel ree. <sup>10</sup> Ni gunabzi reeman du lojn din yaguieenan yudar bénprob ree, abi' laan naj ni ruladxan gūnan.

### *Gudilē Pab Bēd*

<sup>11</sup> Per chi we Bēd guiedx Antioquía, dxel gudilē'n laaman guial ad cayūjntaman zi'c rayal. <sup>12</sup> Guial yaloj gudawnēman bén ad najt ree bén Israel. Per chi bidxin ree bén guxhaal Jacob guiedx Antioquía, dxel ad bachajgtraman bén ad najt ree bén Israel guial bidxebaman xhie niējb ree bén zinal ley. <sup>13</sup> Nē los demazri ree bén Israel bén rliladx ree Jesucrist bén zobj ree ni nē reeman been zi'c been Bēd abi' xt nē Bernabé been zian. <sup>14</sup> Zeel chi baguian guial ad cayūjnt reeman zi'c rēb loj xtiidzxa'c Jesucrist, dxel rēn loj Bēd delant loj gra reeman: “Lūj najl bén Israel abi' ad nabantil zi'c laa reeman, ¿chexc zeel rūjnl naguiejn guiban ree bén ad najt ree bén Israel zi'c naban ree bén Israel?”

### *Guialrliladx Jesús rabēē bejn loj dol*

<sup>15</sup> 'Dunuj ree nayajc ree bén Israel diidz chi bayajl ree abi' ad yu't dxej babajn ree sin xley Dios zi'c ree bén ad najt bén Israel. <sup>16</sup> Per dunuj ree rayagbee guial achut zajc gac naya niz loj Dios por guial zinal bejn ley, gacaman naya guial rliladxaman Jesucrist. Zeel nē dunuj ree ma raliduladx Jesucrist din yayajc ree naya delant lojman guial raliduladx reeman, ad guial cayguieent ree zi'c rniabee ley. Din achut zajc gac naya delant loj Dios guial zinalaman ley.

<sup>17</sup> 'Yan bal cayguieen ree naguiejn yayajc ree naya delant loj Dios, laan rulūū dunuj ree guial nayajcqui ree bēndol, ¿wen mazri bēndol cayūjn Cristo dunuj ree ya? ¡Dunuj ree rayagbee guial ad ziantan! <sup>18</sup> Din bal ma basa'nan xley Moisejs, abi' yaye'can con ley guin zatijb dxel naj gajc cayūn naj bēndol. <sup>19</sup> Zeel ma basa'nan ley guin din gabajnan par Dios. <sup>20</sup> Abi' rūnan cwent guial nē naj gūjt chi gūt Cristo loj crūjz dxel ad nabantri da xtijban, ma nabannē'n Cristo. Abi' yan zi'c nabanen, ma nabanen zi'c rliladxan Xi'n Dios, bén rēn naj gūjt tēēman por naj. <sup>21</sup> Abi' ad rūntan tiblax guial rēn Dios dunuj ree, din bal nile' niajc bejn naya niz loj Dios guial rūjn bejn zi'c rniabee xley Moisejs dxel achetri lasajc guial gūjt Cristo.”

## 3

### *Guialrliladx Jesucrist rquied dol*

<sup>1</sup> ¡Bén Galacia, chexc zeel ad radēdguientidi! ¿Chu basajy xquiarguiejndi? Awa chi balūn lējt, delant loj gradi bagojnan



lějt par xhie gűjt Cristo loj crűjz. <sup>2</sup> Yan rėnzan gagbeen: ¿Nabannėdi xSprijt Dios ya guial rűjndi zi'c rniabee xley Moisejs o por guial rliladxidi xtiidx Jesucrist ni ma bacaagdiajguidi? <sup>3</sup> Xipxi nadidi zeel awa ma nabannėdi xSprijt Dios abi' yan naladxidi guial din yayaaloy gaquidi zi'c rėn Dios rayal chinalidi ley. <sup>4</sup> ¿Wen achet lasajc guialrzagdiaj ni gudėdidi ya, o guzagdiaj xlia'zidi ya? <sup>5</sup> Chi runee Dios xSprijtaman lojdi abi' rűjnman milagr ree delant lojdi, ¿wen rűjnman zian ya por guial zinalidi xley Moisejs o por guial ma bililadxidi xtiidx Jesucrist ni ma bacaagdiajguidi?

<sup>6</sup> Gol basaaladx guial Abraham por guial bililadxaman Dios, been Dios laaman cwent zi'c tijb b́en ad wayűjnt dol. <sup>7</sup> Zeel gol gogbee guial gra ree b́en rliladx Dios, laa reeman naj zi'c xi'n Abraham. <sup>8</sup> Diizd gocli mal ragbee Dios guial majsi loj ree b́en ad najt b́en Israel yu' ree b́en gűnman cwent zi'c b́en ad wayűjnt dol guial rliladx reeman laaman. Din tiblajt loj xtiidxaman rėb guial rėbaman loj Abraham: “Gűnle'n gra ree bėnguidxliuj por lűj.” <sup>9</sup> Zeel rűjnle' Dios gra ree b́en rliladx laaman zi'cgajc beenle'man Abraham guial bililadxaman laaman.

<sup>10</sup> Gra ree b́en zinal xley Moisejs yu' casti par laa reeman din loj gajc libr ley guin rėb: “B́en ad zinalt gűn gra zi'cgajczi rėb loj ley guin, yayalaman casti.” <sup>11</sup> Zeel rayagbee ree ad zile't gac bejn naya loj Dios por guial rűjnman zi'c rniabee ley. Din loj xtiidx Dios rėb: “B́en rliladx Dios rajpaman guialnaban delant lojman guial ma nűjnman laaman cwent sin dol.” <sup>12</sup> Per ley guin ad rniabtan chililadx bejn laan, loj libr ley guin rėb: “B́en gűn zi'c gajczi rniabee ley, zajpaman guialnaban.”

<sup>13</sup> Jesucrist badxi'ca dunuj ree loj xmaldicion ley din laaman bayal casti ni rayal ree por ley guin, din loj libr ley guin rėb: “Ma zė maldicion guiyc b́en rėjt loj crűjz.” <sup>14</sup> Zian guzajc Jesucrist par chile' gűnle' Dios b́en ad najt ree b́en Israel, zi'c beenle'man Abraham. Abi' guial rliladx reeman Jesucrist zeel ma naban reeman con xSprijt Dios zi'c tal rėb Dios diizd guia'xchej.

### *Xley Moisejs nė xpromejs Dios*

<sup>15</sup> Yan compniar raliduladx ree Jesucrist ganin lějt xhien-aag rűjn ree bėnguidxliuj: Chi rajs tijb gui'ch abi' rgu' bejn laan firm, dxel achut zajc guse'n laan o gucaa guiyc ree diidx ni ca loj gui'ch guin. <sup>16</sup> Ziangajc gol gogbee, chi been Dios promejs guial gűnle'man Abraham con xdiaaman, ad rėbt loj xtiidx Dios guial gűnle'man “b́en zėėd ree” loj xdiaa Abraham. Ad rėbtan zien bejn, rėban tijbzi bejn, din laaman rėb gűnle'n “B́en zėėd” loj xdiaaman. Abi' b́en zėėd loj xdiaaman laaman naj Cristo. <sup>17</sup> Abi' ni canin lějt naj guial xley Moisejs bi'tan

tajpgayuu gajlbichii ijz despuejs ni been Dios promejs con Abraham, zeel ad zajct guse'n ley guin promejs ni ma been Dios. <sup>18</sup> Din bal par yaca' ree ni rëb Dios loj Abraham rayal yaguieen ree zi'c rniabee ley, dxel ad promejstran. Per Dios bazaladx loj Abraham ni rëbaman por promejs ni beenman lojman.

<sup>19</sup> Wed zanabdiidxidi lon, ¿par xhieza rüjn ley guin sirv? Badëe Dios ley guin din gagbee bejn guial najman bëndol, abi' been ley guin sirv xt dxej ni bi't bën zëed loj xdiaa Abraham zi'c tal been Dios promejs con laaman diizd guia'xchej. Bën naj ree xianjl Dios badëe ley guin loj Moisejs, abi' Moisejs badëed laan loj ree bejn. <sup>20</sup> Per chi been Dios promejs con Abraham achutczí badëed xtiidxaman, quijb laaman guneenë Abraham.

### *Xhie sirv rüjn ley*

<sup>21</sup> Ad naladxidi canin guial ley guin za' contr xpromejs Dios. Canin bal por ley guin zajc gap bejn guialnaban delant loj Dios, dxel ma ragbee bejn guial ma nayaman loj Dios guial zinalaman ley. Per ad ziantan <sup>22</sup> din loj xtiidx Dios rëb guial dol rniabee gra bejn din gra ree bën chililadx Jesucrist tia' reeman gra ni rëb Dios.

<sup>23</sup> Chi gad guialrliladx Jesucrist guidoonloj, gunabee ley dunuj ree, zi'c chi nayaaw bejn balëez ree guidoonloj guialrliladx Jesucrist. <sup>24</sup> Zeel par dunuj ree ley guin naj ni balüü dunuj ree xhienaag yabajn ree abi' gunabeen dunuj ree xt dxej ni baguieenbee ree Jesucrist din güünman dunuj ree cwent zi'c tijb bën ni ad wayüjnt dol guial raliduladx ree laaman. <sup>25</sup> Per yan guial ma raliduladx ree Jesucrist ad rüjntri naguiejn gulüü ley guin dunuj ree.

<sup>26</sup> Din guial raliduladx ree Jesucrist ma nayajc ree xi'n Dios. <sup>27</sup> Abi' guial barobnijs ree por Jesucrist zeel ma nayajc ree tijbzi con laaman din ma nabajnnë' reeman. <sup>28</sup> Abi' zi'c bën Israel zi'c bën ad najt bën Israel, zi'c bën naj zi'c bën nado' zi'c bën ad najt zi'c bën nado', zi'c xinguaaaw zi'c béngunaa, par Cristo tiblojzi nayajc ree din ma nayajc ree tijbzi con laaman. <sup>29</sup> Zeel bal ma nayajc ree xbejn Cristo dxel ma nayajc ree zi'cgajc xi'n Abraham abi' yayal ree ni rëb Dios loj Abraham diizd gulal.

## 4

<sup>1</sup> Ni canin naj: Zi'c tijb xindo rayal ni rajp xdadix, la'tgaj najx xindoo achet guialrniabee rajpax, zi'cgajc tijb mojs, majsi xieenx naj gra ni rajp xdadix. <sup>2</sup> Abi' yu' ree bën rajp laax yu' tëe ree bën rniabee laax në ree ni rajpax, xt chi guidxin dxej ni rëb xdadix tia'x ni rayalix. <sup>3</sup> Ziangajc dunuj ree, zi'c

tijb xindoo bayajc ree yaloj guial bunaaldxi'ch ree gra ree xcostumbr ree bénguidxliuj. <sup>4</sup> Abi' chi bidxin dxej gojc zi'c rëb Dios gac, guxhaal xi'nman Jesucrist loj guidxliuj guie, tijb bénguidxliuj gojc xniaaman. Abi' gubajnman zi'c rniabee ley ni basa'n Moisejs duloj ree <sup>5</sup> persi bile' babëëman dunuj ree loj ley guin bile' tëë nayajc ree Xi'n Dios.

<sup>6</sup> Abi' guial nayajc ree xi'n Dios, guxhaalaman xSprijt Jesucrist persi nabajnnë' reeman, abi' por Sprijt guin raguie'ch ree: “¡Dux Dad ree Dios!” <sup>7</sup> Zeel ad nayajctri ree zi'c mojs, ma nayajc ree xi'n Dios, ma rayal ree ni gunee Dios por Cristo.

### *Yu' Pab xgab por ree bén rliiladx Jesucrist*

<sup>8</sup> Yaloj chi gadidi güünbee quijb Dios, beendi sirv loj ree ni naladxidi naj Dios, per diidxli ad Diost reen. <sup>9</sup> Per yan guial ma nünbeedi Dios o guial ma nünbeeman lëjt, ¿chexc zeel rëndi yabi'di güündi graloj ni ad rüjnt sirv ni beendi yaloj? ¿Chexc zeel rëndi gaquidi zi'c bén nado' loj ree ni guin ree zatijb? <sup>10</sup> Abi' yan guial sta zinëdi cwent xhie dxej o xhie bëëw o xhie tiamp o xhie ijz naj ni zojbloj par lëjt par güündi xhienin zi'c goc xcostumbridi. <sup>11</sup> Dád rdxeban por lëjt, doolgui basid xlia'zan lëjt.

<sup>12</sup> Zeel rniaaban lojdi compniar raliduladx ree Jesucrist, gol gubajn zi'c nabanen, zi'c benan persi gogbeedi guial tiblojzi nayajc ree. Ad canitan lojdi guial xhie ni mal ma beendi naj <sup>13</sup> din lëjt ragbee guial yaloj chi basidan lëjt xtiidxza'c Jesucrist, ragxuun nadxel. <sup>14</sup> Per majsi zian, gudaandi naj. Ad beentidi naj tiblax ad gulëëladx tëëtidi naj, bidxga'di naj zi'c tijb xianjl Dios o zi'cgajc Jesucrist. <sup>15</sup> Naj ragbee guial bal zile'n xt guiaalojdi zajc cwëëdi par guneedan lon. Laadx yan, ¿conzan guial rabaanëdi naj? <sup>16</sup> ¿O al rdxe'chidi naj ya guial rnin ni naj diidxli lojdi?

<sup>17</sup> Rnin lojdi guial ree bén cayüjn naguiejn guial guidxga'di xtiidx reeman, ad zagdxet rën reeman lëjt, xixgab reeman naj din gusa'ndi ni basidan lëjt abi' mazri guidxga'di xtiidx reeman. <sup>18</sup> Ad ni malt naj guial guiën bejn lasa' bejnman, per par ni zagdxe në zianczi, ad chi za'tzan con lëjt. <sup>19</sup> Par naj lëjt naj zi'c da xi'nan. Abi' cazaagdiajn por lëjt zatijb, zi'c rzagdiaj tijb béngunaa chi rajl xi'nman. Abi' gusnuu gazaagdiajn xt chi ma zinalidi Jesucrist diidxli zi'c rayal. <sup>20</sup> ¡Bal zianclaa za'n con lëjt din ganenë'n quijb lëjt, per yan ad ragbeetan xhienaag günnë'n lëjt!

### *Agar con Sara*

<sup>21</sup> Per gol guna, lëjt bén rën ree guiban zi'c rniabee ley. ¿Wen id wayignia'di ni rëb loj ley ya? <sup>22</sup> Loj ley rëb guial guyu tio'p xi'n Abraham: Guyu xi'nman con tijb béngunaa

brii laj Agar bën goc xmojsaman, guyu tää stijb xi'nman con quijb xbéngunaaman bën brii laj Sara. <sup>23</sup> Xi'n Abraham con béngunaa goc xmojsaman, guyux guial bagaal Abraham laaman. Per xi'nman xin guyu con quijb xbéngunaaman guyux ad por guial bagaaltzi Abraham xbéngunaaman, nē par gac cumplid promejs ni been Dios lojman. <sup>24</sup> Yan, Sara nē Agar laa reeman naj ejempl por tio'p nejz ni yu' par chinal bejn. Tijb nejz guin naj guial chinal bejn ley ni badēed Dios loj Moisejs ruguia' Sinaí, abi' bën zinal ree ley guin naj reeman zi'c bën nado' loj ley guin zi'c goc Agar loj Abraham. <sup>25</sup> Lējt ragbee guial niz Arabia naj guia' Sinaí, abi' ree bën niz ni rniee reeman guia' guin Agar. Per yan Jerusalén naj zi'c guia' guin, din gra ree bën zēed niz Jerusalén, bën zinal ree ley, laa reeman naj zi'c bën nado' loj ley. <sup>26</sup> Per dunuj ree du ladx ree naj Jerusalén ni yu' xanyabaa abi' Jerusalén guin ad najtan zi'c ni nado' loj ley guin zi'c ad gojct Sara loj Abraham. <sup>27</sup> Loj xtiidx Dios rēb:

Babaa béngunaa ni ad zajct chu' xi'n.

Babaa da't guial ad nünbeetil guialrzagdiaj ni rdēd béngunaa ni rajl xi'n.

Din bën ad rut xi'n, mazri zien xi'nman chu' guial loj bën ru xi'n.

<sup>28</sup> Rnin lojdi compniar raliduladx ree Jesucrist, zi'c gol Isaac guial bililadx Abraham xtiidx Dios guial gac zian, ziangajc dunuj ree ma nayajc ree xi'n Dios guial raliduladx ree xtiidxaman. <sup>29</sup> Abi' lēn ree dxejzii, xi'n Agar baze'x xi'n quijb xbéngunaa Abraham, ziangajc yan bën zinal ree ley ruze' reeman dunuj ree nabajnnē' ree xSprijt Dios, guial ma nayajc ree xi'n Dios, <sup>30</sup> Per, ¿xhie rēb loj xtiidx Dios? Rēban: “Balaagdxa xmojsil con guidib xi'nman, din ad rayalt gac tio'p lala' ni rayal tia' xi'n quijb xbéngunaal.” <sup>31</sup> Zeel compniar raliduladx ree Jesucrist, dunuj ree ad nayajct ree zi'c xi'n bën naj zi'c bën nado' guin, nayajc ree zi'c xi'n quijb xbéngunaa Abraham guial ad rniabeet ley dunuj ree.

## 5

### *Gol guzujdxi'ch loj ni rliladxidi xtiidx Dios*

<sup>1</sup> Cristo naj bën babēe dunuj ree loj ni rniabee ley dunuj ree. Zeel gol guzujdxi'ch, ad bal guibandi zatijb zi'c bën nado' guial güündi zi'c rniabee ley.

<sup>2</sup> Naj Pab rnin lējt. Bal rudi sen zi'c rniabee ley, achet lasajc guial rliladxidi Jesucrist. <sup>3</sup> Abi' rnin lējt zatijb: Chutēez bën ru sen guin rayal güünman zi'c tal rniabee ley. <sup>4</sup> Lējt guial rüjndi xgab guial güündi zi'c rniabee ley ma najdi naya delant loj Dios, laan rēn guiēb guial ad najtridi xbejn Cristo ad yu'guijc

tëetridi guial rën Dios lëjt. <sup>5</sup> Per dunuj ree por xSprijt Dios në guial raliduladx ree Jesucrist nadxu'guijc ree guial yadxin ree naya delant loj Dios. <sup>6</sup> Din chi ma naj bejn tijbzi con Cristo achet lasajc bal yu'man sen o ad yu'taman sen. Ni mazri lasajc naj guial chililadxaman Cristo. Abi' por guialrliladx guin zajc yabajn ree zagdxë yayën dulasa' ree. <sup>7</sup> Lëjt ma zëdi zagdxë. ¿Chu na lojdi guial ad zidxga'tidi ni naj diidxli? <sup>8</sup> Din xgab guin ad zëëdtan por Dios, Bén gule lëjt. <sup>9</sup> Zeel gol gojp cudad “din con ta'nnijt zajc gusquiee reeman gradi.” <sup>10</sup> Per naj ra'pan Cristo confians guial ad zusa'ntidi ni basidan lëjt. Abi' Dios gudëëd casti Bén cusquiee ree lëjt, majsi chutëëznin. <sup>11</sup> Bal rën guial rüjn naguiejn chu' ree bejn sen, ad zazunaltri ree Bén Israel naj. Ziangajc bal guiën guial rayal chu' ree bejn sen, rën guiëban guial achet lasajc guial güjt Cristo loj crüjz. <sup>12</sup> Balzianclaa gra ree Bén ruslen lëjt guial rayal chu'di sen, jmejorli gutüüg laagajc reeman tiblayaa!

<sup>13</sup> Din lëjt ma gulaadi loj ley, per ad guial ad rniabeetri ley lëjt din güündi ni rëntzidi, rayal guiëndi güün tëë yudar lasa'di. <sup>14</sup> Din con tijbzi mandamient ma been bejn gra zi'c rniabee xley Dios. Mandamient guin rëb: “Guyën ben ren zi'c rën lüj gajc.” <sup>15</sup> Per bal rdxe'ch lasa'di abi' rdilidi, gol gojp cudad chitëë zianzi la' lasa'di.

### *Guialnaban ni runee xSprijt Dios*

<sup>16</sup> Zeel rnin lojdi: Gol gubajn zi'c rniabee xSprijt Dios guibandi. Ad guibanridi zi'ctzi naj xixgabidi. <sup>17</sup> Din guial rbajn bejn zi'ctzi naj xixgabaman, ad najtan zi'c rniabee xSprijt Dios guiban bejn. Abi' zi'c rniabee xSprijt Dios guiban bejn, ad najtan guial guiban bejn zi'ctzi naj xixgabaman. Ni'qui laan ni'qui zi'c rniabee xSprijt Dios ad najtan tibloj. Zeel ad zajct guiban bejn zi'ctzi rënman. <sup>18</sup> Per bal xSprijt Dios naj Bén rniabee lëjt dxel ad rniabeetri ley lëjt. <sup>19</sup> Yan laa rguien gajc con ree nin zëëd con xixgabzi ree bejn: Guialrzunë xinguaaw ren o bëngunaa ren, guialrüjn bejn nidxuudx, guialrajp bejn gadxagayaa vijs, <sup>20</sup> guial rën bejn graloj ni naladxaman naj Dios, guial rüjn bejn guialbidxaa, guialrdxe'ch lasa', guialrdil, guialrzëëbladx ni rajp bejn, guialralenya', guialrlies xvalor gajc, guialrlia' lasa' bejn, guial ru loj tibcwaa bejn o stib cwaaman, <sup>21</sup> guialrdëdloj, guialrugüjt bejn, guialrzüdx, guialnala në xhietëëz ni mal lasa' ree ni guin. Rugojnan lëjt zi'cgajc ma rnin lojdi yaloj, Bén cayüjn ree lasa' ree ni guin ad zayalt reeman lod rniabee Dios.

<sup>22</sup> Per ni zëëd por xSprijt Dios naj, guialrën lasa' bejn, guialrabaa, guialrga'dxe luxdoo, guial yu' pacens, guialnax-anladx, guial rajc naza'c, guial rüjn cumplid xtiidx, <sup>23</sup> guial rüjn naya, guialrniabee bejn xixgab mal gajcaman. Abi' ad

yu't ley ni rudxoon guial güün bejn ni guin ree. <sup>24</sup> Abi' ree bën ma naj xbejn Cristo ma basa'n reeman gra dol, nē gra ree ni mal ni rēn reeman güün reeman din ma güjt Cristo por gra dol. <sup>25</sup> Yan bal ma nabajn ree con xSprijt Dios rayal yabajn ree zi'c rniabee Sprijt guin yabajn ree.

<sup>26</sup> Ad yales dux valor gajc ree, ad yache'ch du lasa' ree, ad yadēdloj du lasa' ree.

## 6

### *Yaguieen du lasa' ree yudar*

<sup>1</sup> Compniar raliduladx ree Jesucrist, rnin lējt, bal chu xcompniaridi rüjn dol gan, lējt guial ma rajquidi mazri xti-idix Dios gol guneenēman con ganax ree diidxza'c, din rayal cu'guijquidi guial nēgajc lējt zajc güün dol lējt gan. <sup>2</sup> Gol gognē lasa'di loj xhietēz gualzi ni rdēdidi, zian ma cayüjndi ni rniabee Cristo güüdi.

<sup>3</sup> Bal yu' bën ni naladx guial rajcaman gra abi' achetczj rajcaman, dxel laagajcaman cusquiee laaman. <sup>4</sup> Tijbgaj bejn rayal güün xgab bal nabancaman xnejz. Abi' bal nabanman xnejz, tijbzi laaman rayal yabaa luar güünman xgab guial nabanman zagdxe loj gra ree bejn. <sup>5</sup> Din tijbgaj dunuj ree rayal yaya'p ree xhienaag yabajn ree.

<sup>6</sup> Chutēz bën cusiid xtiidx Dios, rayal güünman yudar bën culüü laaman con ni ryaadxaman.

<sup>7</sup> Ad gusquiee lējt gajc, din achut zajc guze' Dios. Ni rxübin bejn laagajcan yato'paman. <sup>8</sup> Bal nabanman zi'ctzi naj xixgabaman zadxin dxej yayalaman casti. Per bën naban zi'c rniabee xSprijt Dios, por Sprijt guin yayalaman guialnaban tiblayaa delant loj Dios. <sup>9</sup> Ad rayalt yadxag ree guial yaguieen ree ni zagdxe, din bal id zadxag ree chi guidxin dxej yaca' ree ni yayal ree. <sup>10</sup> Zeel beegaj gunen dunuj ree rayal yaguieen ree yudar bejn ree, abi' mazri con dux compniar ree bën rliladx ree Jesucrist.

### *Xconsejw Pab*

<sup>11</sup> Gol baguiaa xi narooob ree lejtr ni cucan par lējt con quijb yan. <sup>12</sup> Bën cayüjn ree naguiejn chu'di sen, rüjn reeman zian par yaya'n reeman zagdxe loj ree bejn luar sagdiaj reeman guial rliladx reeman Jesucrist. <sup>13</sup> Per ni'qui ree bën yu' sen guin ad rüjnt reeman gra zi'c rēb ley guin. Rēnzi reeman chu'di sen guin din güün reeman nabē guial ma been reeman gan yu'di sen guin. <sup>14</sup> Per naj achet por ni günan nabē, tijbzi por guialgüjt Dad Jesucrist. Abi' guial güjtaman loj crüzj ma basa'nan gra ree ni mal yu' loj guidxliuj guie abi' ma güjtan par ree ni mal guin. <sup>15</sup> Din chi ma naj bejn tijbzi con Cristo,

achet lasajc bal yu' bejn sen o ad yu'taman sen. Ni mazri lasajc naj guial ma bachaa zi'c nabanman. <sup>16</sup> Abi' ree bën ma zinal xnejz Cristo, Dios yaya laa reeman yabe'cdxe tëëman luxdoo reeman në gra ree bën diidxli naj xbejn Dios.

<sup>17</sup> Diizd yan ad rëntran chu guche'ch naj. Din dib ni ca ree ladan laa reen rulüü guial najn xiapó stol Jesucrist.

<sup>18</sup> Compniar raliduladx ree Jesucrist, dux Dad ree Jesucrist güünle' gradi. Amén.

## Gui'ch guxhaal San Pabl loj ree bèn Éfeso rliladx Jesucrist

### *Rugajpdioz San Pabl bèn Éfeso ree*

<sup>1</sup> Naj Pab, najn tijb xi apóstol Jesucrist por xguialrniabee Dios. Cusan gui'ch guie par lëjt guial diidxli zinalidi xtiidx Jesucrist, lëjt guial ma najdi xbejn Dios luguiedx Éfeso. <sup>2</sup> Dux Dad ree Dios nē Dad Jesucrist güünle' lëjt yabe'cdxe tēē ree-man luxdoodi.

### *Rüjnle' Dios bèn rliladx ree Jesucrist*

<sup>3</sup> Quixtēē Dios, xdad Dad Jesucrist, dád benza'c najman, guial yan ma nayajc ree tijbzi con Jesucrist, ma beenle'man dunuj ree diizd xanyabaa con graloj guialnaza'c din gac yunaal ree xtiidxaman. <sup>4</sup> Laaman bacaabee dunuj ree por Dad Jesucrist diizd chi gad guidxliuj gacchaaw din yabajn ree naya sin dol lojman. <sup>5</sup> Abi' guial rēnman dunuj ree, diizd guia'xchej beenman guial yayajc ree xi'nman por Jesucrist zi'c beenman xgab gac. <sup>6</sup> Zeel ad racwēēt raza't ree Dios zagdxē guial dád benza'c najman, ma beenle'man dunuj ree por Xi'nman Jesucrist, bèn rēnman, <sup>7</sup> bèn ma gudijx por dunuj ree chi guxhie' xrejnman, abi' ma gojc perdon dux tol ree guial dád rēn Dios dunuj ree. <sup>8</sup> Zeel dád zro' guialrajc nē guialrignia' ma bazaladxaman duloj ree, <sup>9</sup> abi' ma balüüman duloj ree xhienaag naj xixgabaman diizd gocli, zi'cgajczi ma beenman xgab gac. <sup>10</sup> Guiáad xgab guin gacan cumplid chi guidxin dxej, Dios gusa'n gra loj Jesucrist zi'c ni yu' xanyabaa nē loj guidxliuj.

<sup>11</sup> Nētēē guial nayajc ree tijbzi con Jesucrist, Dios ma ba-caabee dunuj ree din yayajc ree par laaman zi'c naj xixgabaman diizd guia'xchej, din laaman rüjn gra zi'c rēnman gac. <sup>12</sup> Abi' laaman ma been zian, din dunuj ree nayajc ree bèn yaloj bililadx Jesucrist, yayajc ree bèn guza't laaman zagdxē por xguialrniabeeman. <sup>13</sup> Nēgajc lëjt chi biguejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c rēb Dios guial guneeman xSprijtaman, dxel yan guial ma nabannēdi laaman, laaman naj zi'c tijb sen ni rulüü guial ma najdi par Dios. <sup>14</sup> Guial ma nabannē xSprijt Dios dunuj ree, yaca' ree ni rēb Dios guneeman chi ma bara xbejnman za' xanyabaa, din chitēē yacwēēt yaza't ree-man zagdxē por xguialrniabeeman.

*Rniab Pab quiarguiejn loj Dios*



15 Abi' guial ragbeen rliadxidi Dad Jesús rën tēedi los demazri ree bén naj xbejn Dios, 16 zeel ad rucwēēt rudēn quixtēē loj Dios por lējt, beegaj rbedx rniaaban laaman. 17 Laaman naj Dios rniabee diizd xanyabaa, xDad Dad Jesucrist. Rniaaban lojman yazaladxaman quiarguejñ lojdi din chignia'di ni gulūūman lojdi gusnuu tēē gūūnbeedi laaman mazri. 18 Rniaaban lojman din guixhialaman xquiarguejñdi din chignia'di xhie rën guiēb ni rbēzidi diizd chi bacaabeeman lējt, chignia' tēēdi guial ni za'cdxoon narooob tēē naj ni nagu'chaaw Dios par ree bén naj xbejnman. 19 Rniaab tēēn lojman guial gagbeedi guial dād narooob naj xguialrniabeeman ni cayagnē dunuj ree raliduladx reeman. Laagajc guialrniabee narooob guin balūū Dios 20 chi basbanman Jesucrist abi' gule'caman laaman xladbeeman xanyabaa 21 lod badēēman guialrniabee lojman ni mazri lasajc guial loj gra ree guialrniabee, nē loj gra guialguxtis nē loj gra gobiarn. Abi' mazri lasajc guialrniabee guin guial loj gra ree guialrniabee yu', nē ni qui chu'ri ree loj guidxliuj guie. 22 Dxel basa'n Dios gran loj Jesucrist, bacaabeeman laaman din nabeeman gra ree bén rliadx laaman. 23 Guiáad ree bén rliadx laaman, guidiblagaa nabannēman laa reeman abi' bantēēz guin za'man din laaman guidiblagaa rniabee.

## 2

### *Nayajc ree perdon guial rën Dios dunuj ree*

1 Gocli gojquidi zi'c bengüt loj Dios por ree ni mal nē por ree dol 2 ni beendi guial binalidi nejz mal been tēēdi zi'ctzi rën xindxab gūūndi, sprijtmal ni nabannē gajc ree bén ad ruzoobt xtiidx Dios. 3 Du gra ree ziangajc babajn ree guia'xchej. Baguieen ree zi'ctzi bayēn ree, zi'ctzi goc dux xgab ree, abi' zi'cgajc rayal ree bén ad ruzoobt xtiidx Dios casti, ziangajc nayal ree casti. 4 Per guial raya da't Dios dunuj ree rën tēēman dunuj ree, 5 zeel majsı bayajc ree zi'c bengüt lojman por dux tol ree, per yan ma raya'p ree guialnaban lojman con Jesucrist. Guial tant benza'c naj Dios, zeel nayajc ree perdon. 6 Chi basbanman Jesucrist nēgajc dunuj ree basbanman abi' zi'c rulūū ma nadxu'nē' ree Jesucrist xanyabaa. 7 Dios been zian din dxej zēēd ree guiguien guial dād rēnman dunuj ree, abi' benza'c tēē najman con dunuj ree por Jesucrist. 8 Guial naj Dios benza'c, zeel ma nayajc ree perdon, ad guial nayajc ree benza'c lojman. Por guial rliadx zēēd xperdon Dios. 9 Ni'quid por ni zagdxē ni ma baguieent ree zēēd perdon guin chitēē chu guilies xvalor gajc. 10 Por Dios nadxu' ree loj guidxliuj guie abi' por Jesucrist bachaaman mod babajn ree

yaloj din yaguieen ree ni zagdx e zi'c beenman xgab yaguieen ree diizd gocli.

### *Tijbzi nayajc ree por Jesucrist*

<sup>11</sup> Zeel l jt b n ad najt ree b n Israel, gol basaaladx xhienaag guzajquidi yaloj. B n Israel ree gul  laj l jt b n ad yu't ree sen guial yu' reeman sen zi'c rniabee ley. <sup>12</sup> Tiamp zii ad beenbeetidi Jesucrist, ad gojctidi cwent loj ree b n Israel ad gojc t  tidi cwent guial rayalidi ni r b Dios gud  man loj ree xbejnman. Contzi gubajndi achet gul jzidi ad gubajnn  t  tidi Dios. <sup>13</sup> Per yan guial ma rliladxidi Jesucrist, l jt guial guzujdi zijt loj Dios, por xrejn Jesucrist ma bibiguiddi lojman. <sup>14</sup> Din Jesucrist babe'cdxe du luxdoo ree. Laaman bis d guialrdxe'ch ni rudxoon gac ree b n Israel tijbzi con ree b n ad najt b n Israel. <sup>15</sup> Abi' por xguialg jt Jesucrist gulox gra ree costumbr rniabee xley ree b n Israel g n ree bejn, laaman been persi gojc ree b n Israel con ree b n ad najt b n Israel zi'c tijbzi guiedx c b guial ma nayajc ree tijbzi con laaman. Zian babe'cdxeman luxdoo ree bejn. <sup>16</sup> Din por xguialg jt Jesucrist loj cr jz ma gulox guialrdxe'ch lasa' ree b n Israel con ree b n ad najt b n Israel, abi' ma nadxu'n ' ree Dios zagdx e guial ma nayajc ree tijbzi por Jesucrist. <sup>17</sup> Abi' laaman bidgagojn dugra ree, zi'c ree b n Israel zi'c ree b n ad najt b n Israel xhienaag yadxu'n ' ree Dios zagdx e. <sup>18</sup> Dxel por Jesucrist grop cwaa ree bejn ma rajp nejz par loj Dios guial tijbzi naj xSprijt Dios nabajnn ' ree. <sup>19</sup> Zeel ad najtridi zi'c b n z  d lod ren, zi'c benzit loj Dios, ma najdi cwent loj ree xbejnman, ma najdi tijbzi con ree xbejnman. <sup>20</sup> L jt naj zi'c xze' tijb yu ni cayajc, gui ad ree xi ap stoles Jes s con ree b n bad   xtiidx Dios loj ree bejn, naj reeman zi'c xcimiant yu guin, gui ad Jesucrist naj zi'c guiaj zobjloj ni cayajcn  yu guin. <sup>21</sup> Abi' guial yagaj guzuloj cayajs yu guin, dxel cay 'pzi cay 'p ze' guin ni cayguie'ch ree najdi din yayajc ree tijbzi xyadoo Dios con Jesucrist. <sup>22</sup> N  yan guial ma najdi tijbzi con Jesucrist ma naj t  di tijbzi con los demazri compniar raliduladx reeman din yayajc ree tijbzi yadoo lod za' Dios por xSprijtaman.

## 3

### *Cwabee Pab din chigneeman xtiidxza'c Jesucrist*

<sup>1</sup> Por zianan yu'n ladxguuib, naj Pab guial cay nan sirv loj Jesucrist din g nan yudar l jt b n ad najt ree b n Israel. <sup>2</sup> L jt ragbee guial naj Dios benza'c zeel baneeman dxiin guin lon din g nan l jt yudar chignia'di xtiidxaman. <sup>3</sup> Abi' laaman bal   naj xhienaag naj xixgabaman diizd gulal, zi'cgajczi ma rnin lojdi diizd guia'xchej. <sup>4</sup> Chi goolidi laan, gagbeedi

guial ma ragbeen xhienaag naj xixgab Dios par Jesucrist. <sup>5</sup> Tiamp gulal achut gojc niagbee xhienaag naj xixgabaman par Jesucrist, gojcan zi'c tijb ni naguie'ch par ree bejn. Per yan por xSprijtaman ma balüüman laan loj ree xi apóstoles Jesús nē loj ree bën badëë xtiidx Dios loj ree bejn. <sup>6</sup> Abi' ni goc zi'c tijb ni naguie'ch par ree bejn naj guial por xtiidxza'c Jesucrist, nē ree bën ad najt bën Israel ma rayal ni gudëë Dios loj ree bën Israel guial ma naj reeman tijbzi, dxel ziangajc ma nayab reeman loj promeys ni been Dios por Jesucrist.

<sup>7</sup> Naj cugojn xtiidxza'c Jesucrist loj ree bejn, ad guial rayalt günan dxiin guin. Guial naj Dios benza'c, zeel bazaladxaman guialrniabee lon par günan laaman sirv. <sup>8</sup> Naj naj bën bigra bën lasajc ta'nz loj gra ree xbejn Dios, per guial naj Dios benza'c, bacaabeeman naj din günn diidx loj ree bën ad najt bën Israel xcwent xguialnaza'c narooob Jesucrist, <sup>9</sup> nē par gugoynan zagdx gra reeman xhienaag naj xixgab Dios bën been gra, xgab ni ad balüü gajtaman loj ree bejn. <sup>10</sup> Din yan zi'c naj ree bën rliladx Jesucrist, gagbee gra ree bën rajp guialrniabee xanyabaa guial gra lojczy guialrajc rajp Dios. <sup>11</sup> Abi' diidx chi gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist. <sup>12</sup> Nē guial raliduladx ree Jesucrist ma raya'p ree nejz par loj Dios, abi' con confians ma zajc yubiig ree lojman. <sup>13</sup> Zeel rnin lojdi ad runayadi por ree guialzi ni cadëëdan por lëjt, din zagdxen par lëjt.

### *Dád rën Jesucrist dunuj ree*

<sup>14</sup> Zeel ruzuxiban loj dux Dad ree Dios; <sup>15</sup> laaman naj Dad loj gra ni yu' loj guidxliuj nē xanyabaa. <sup>16</sup> Abi' rniaaban lojman por xguialrniabee narooobaman yazaladxaman lëjt gojl nē guialrniabee por xSprijtaman din yayu luxdoodi, <sup>17</sup> guibannë tēedi Jesucrist guial rliladxidi laaman. Din zian zi'c diidxli zinalidi zi'c rën Jesucrist dunuj ree, <sup>18</sup> dxel ma zajc gagbeedi con los demazri ree compniar raliduladx ree laaman guial gudëdlaj abi' xt banczi naaloj zro' rënman dunuj ree. <sup>19</sup> Zeel rniaaban loj Dios gagbeedi plact rënman dunuj ree, guial mazri zro' najn guial loj ni raguieen ree xgab, abi' zian guidiblagaa guibannëdi Dios.

<sup>20</sup> Laaman, guial rajpaman guialrniabee par güünman mazri guial loj ni raguieen ree xgab o mazri guial loj ni ranaab ree lojman por xSprijtaman bën nabajnnë' ree, <sup>21</sup> abi' rayal yaza't reeman zagdx gra dxej nē gra tiamp por Jesucrist, dunuj ree guial raliduladx ree Jesucrist. Amén.

## 4

*Nayajc ree tijbzi por xSprijt Dios*

<sup>1</sup> Naj, yu'n ladxguibb guial cayünan sirv Jesucrist, rniaaban lojdi zi'c ma najdi xbejn Dios, gol gubajn zi'c rayal guiban ree bën ma naj ree xbejnman. <sup>2</sup> Gol gojc benza'c në bën naxanladx, gol gojp pacens gol gudaan tëë lasa'di guial rën lasa'di. <sup>3</sup> Gol been naguiejn gusnuu gaquidi tijbzi con xyudar xSprijt Dios bën rabe'cdxe du luxdoo ree par yayajc ree tijbzi. <sup>4</sup> Dunuj ree nayajc zi'c tijbzi cuerp, abi' dugra ree nabajnnë' xSprijt Dios, abi' zi'c ma nayajc ree xbejn Dios, ziangajc ralëjz ree ni guneeman. <sup>5</sup> Tijbzi Dad, tijbzi gualrliladx në tijbzi gualrirobnijs raya'p ree. <sup>6</sup> Din tijbzi Dios yu', bën naj Dad par dugra ree, rniabeeman dugra ree, nabannëman dugra ree rüjn tëëman ujs dugra ree.

<sup>7</sup> Per tijb gaj dunuj ree ma naj ni yaguieen ree, zi'ctzi ni banee Jesucrist yaguieen ree. <sup>8</sup> Zianan zeel rëb loj xtiidx Dios: Chi bayë'paman xanyabaa, beenman gan loj gra gualrniabee, abi' badëëdaman loj ree bejn ni rayal güün reeman.

<sup>9</sup> Abi', ¿xhie rën guiëb lod rëb “bayë'paman”? Rën guiëban bi'taman loj guidxliuj. <sup>10</sup> Guiáad Jesucrist bën bi't loj guidxliuj, laagajcaman naj bën bayë'p xanyabaa persi canabeeman guidib guidxliuj në xanyabaa. <sup>11</sup> Abi' ma badëëman loj ree bejn ni rayal güün reeman, yu' reeman bayal gac apóstoles, yu'za reeman bayal gac bën rudëë xtiidx Dios loj ree bejn, yu' reeman bayal guitie'ch xtiidxaman, yu' tëë reeman bayal gudëë consejw gulüü tëë reeman bën rliladx ree laaman. <sup>12</sup> Zian bacaabee Jesucrist bejn ree din gusiid los demazri ree bën rliladx laaman, gac tëë güün reeman laaman sirv, gusnuu tëë güünbee reeman laaman, <sup>13</sup> xt yayaaloj yaliduladx ree yaguieenbee tëë ree Xi'n Dios guidiblagaa, din yayaaloj yayignia' ree xhienaag rayal yunaal ree Jesucrist. <sup>14</sup> Dxel ad zayajctri ree zi'c ree xindoo rliladx xhietëëznin, ad zayajctri ree zi'c tijb ni rnë bi niz ni niz guie por graloj ni rü ree bën raguiil mod gusquiee ree bejn, <sup>15</sup> rayal yayën du lasa' ree, yadü ree diidx yunaal tëë ree ni diidxli din gusnuu yayignia' ree yaguieen tëë ree zi'c rën Jesucrist bën rniabee dunuj ree. <sup>16</sup> Din por Jesucrist nayajc ree tibloj gra ree compniar raliduladx ree laaman. Por laaman nadxajg dulasa' ree nayajc ree tijbzi, abi' tijb gaj dunuj ree con ni rayal yaguieen ree par yaguieen du lasa' ree yudar din gusnuu yayën dulasa' ree por Jesucrist.

*Guialnaban cüb con Jesucrist*

17 Yan por Jesucrist rnin lëjt: Ad bal guibanridi zi'c naban ree ben ad nünbeet Dios, din laa reeman naban zi'ctzi naj xixgab reeman, 18 nacay xquiarguiejn reeman, ad rajpt reeman guialnaban rën Dios gap reeman, guial ad rignia't reeman ache tëët naladx reeman. 19 Ma been luxdoo reeman gojl, ma gulëëladx laagajc reeman abi' cusnuu cayüjn reeman graloj nidxuudx. 20 Per lëjt ad beenbeetidi Jesucrist din guibandi zian, 21 bal walidi ma biguiejndi xcwentaman bal wali tëëdi ma basiididi diidxli zëed por laaman. 22 Gol basa'n zi'c gubandi yaloj, din ruxhiinzi zi'c gubandi yaloj con xgabmal ni basquiee lëjt guial beendi zi'ctzi guyëndi. 23 Gol been naguiejn guidxaa xixgabidi guidiblagaa 24 din gaquidi zi'c tijb bencüb been Dios zi'c rënman, con tijb guialnaban naya në zi'c rayal por xdiidxliman ni ma biguiejndi. 25 Zeel ad bal rnieeridi diidx rusquiee. Gol gunee diidxli con xcompniaridi din tijbzi nayajc dugra ree con Jesucrist. 26 Bal rdxe'chidi, ad güündi dol. Ad gudxe' guialrdxe'ch guin luxdoodi dëchej, 27 chitëë tiëbidi güün xindxab lëjt gan. 28 Bén rban, rayal gucwëez cwanman abi' güünman dxiin, din con dxiin zagdxe güünman dxel ma rajpaman con xhie güünman yudar bén ryaadx ree xhienin. 29 Ad rniee tëëdi diidxguijdx, gol gunee ganax diidxzagdxe ni güün yudar chignia' ree ben ren bén gucaagdiajg ree laan din güünan laa reeman sirv. 30 Ad rgu'nayadi xSprijt Dios, bén ma nabannëdi zi'c tijb sen guial ma najdi xbejnman par dxej ni guidxindi lojman. 31 Gol basa'n tiblax gra guialralenya', guialrdxe'ch, guialralen lasa', guialrguidxa'në lasa', guialrniee diidxguijdx loj lasa' në graloj ni mal. 32 Gol gojc benza'c, gol baya lasa'di gol been tëë lasa'di perdon zi'c been Dios lëjt perdon por Jesucrist.

## 5

### *Zi'c rayal guiban ree Xi'n Dios*

1 Zi'c ma najdi xi'n Dios bén rënman, gol been naguiejn güündi zi'c laaman. 2 Gol gubajn zagdxe, gol guyën lasa'di zi'c guyën Jesucrist dunuj ree abi' bayü laagajcaman güjtaman por dunuj ree, gojcaman zi'c tijb gon ni rliaa nejxh par Dios.

3 Yan lëjt guial ma najdi xbejn Dios, ad rayalt guiniee loj lasa'di diidx dxuudx, ni'qui graloj ree ni ad rüjnt sirv ad rzëëbladx tëëdi gra par lëjt. 4 Ad rnieedi diidxguijdx ree, diidxtont ree, diidx ni ad rayalt guinieedi din ad ni zagdxt reen. Mazri zagdxe gol badëë quixtëë loj Dios. 5 Din lëjt ma ragbee guial ree bén naban nadxuudx në ree bén rüjn ni ad rüjnt sirv, në ree bén rzëëbladx gap gra (mazri yu'guijc reeman ni guin ree luar guiën reeman Dios), dxel ad zile't chu' reeman lod rniabee Jesucrist con Dios. 6 Gol gojp cudad achu gusquiee

lëjt con ree diidx ad rüjnt wen, din por ree ni guin zëed xcasti Dios par ree bèn ad ruzoobt diidx. <sup>7</sup> Zeel ad güündi zi'c rüjn reeman.

<sup>8</sup> Gocli gubajndi zi'c tijb bèn nayaaw xquiargueijn, per yan guial ma najdi tijbzi con Jesucrist, laaman naj biani par lëjt. Zeel gol gubajn zi'c ree bèn ma zinal biani guin, <sup>9</sup> din guial chinal bejn biani guin ma zile' güünman ni zagdxé zi'c rayal, nē ni naj diidxli. <sup>10</sup> Gol been naguieijn gol been zi'c ruladx Dios. <sup>11</sup> Ad nē lëjt güün ni ad rüjnt ree sirv ni rüjn ree bèn nayaaw xquiargueijn, gol guneenē reeman din gagbee reeman ni rüjn reeman. <sup>12</sup> Din xt ratu bejn güman ni rüjn reeman ralan. <sup>13</sup> Per por xtiidx Jesucrist laa gagbee gajc reeman xhienin rüjn reeman. <sup>14</sup> Din zianan zeel rēb loj xtiidx Dios:

Batie'ch xbacaalil, lüj guial zinalil nejz mal.

Bariica loj dol din gusni Jesucrist xquiargueijnl.

<sup>15</sup> Zeel gol gojp cudad xhienaag nabandi, ad gontzi guibandi, gol gubajn zi'c bèn yu' xquiargueijn. <sup>16</sup> Gol been naguieijn guibandi zi'c rayal naga yu' tiamp, din lēn ree dxej guie ad xnejztri naban bejn. <sup>17</sup> Zeel ad gontzi nabandi zi'c naj xixgabidi, gol beenli naguieijn chignia'di xhienaag rēn Dios guibandi. <sup>18</sup> Ad südxidi, din guialrzüdx guin ruxhiin bejn. Zagdxeli gol cwējb nabee xSprijt Dios luxdoodi guidiblagaa. <sup>19</sup> Chi rünē lasa'di diidx, gol baza't ni ca loj ree salmos, loj ree himno, nē gra loj ree cant ni naj par Dios. Abi' guidib luxdoodi gol biil gol baza't tēē Dios zagdxé. <sup>20</sup> Abi' guixie guixie gol badēēd quixtēē loj dux Dad ree Dios por Dad Jesucrist por gra ni rüjnman par dunuj ree.

### *Zi'c rayal guibannē lasa' ree bèn rliladx Jesucrist*

<sup>21</sup> Gol bazoob xtiidx lasa'di por respejt ni rajpidi Jesucrist. <sup>22</sup> Nē lëjt bēngunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist. <sup>23</sup> Din xinguaaw ree rniabee lacheel zi'c rniabee Jesucrist bèn rliladx ree laaman, bèn babēē laa reeman loj dol abi' naj reeman xbejnman. <sup>24</sup> Abi' zi'c ruzoob ree bèn rliladx Jesucrist xtiidxaman, ziangajc ree bēngunaa rayal guzoob xtiidx lacheel reeman. <sup>25</sup> Nēgajc lëjt xinguaaw nuxhliaa ree, gol guyēn lacheelidi zi'c rēn Jesucrist bèn rliladx ree laaman, abi' xt güjtaman por laa reeman <sup>26</sup>persi bisüdaman xtol reeman, basiaman laa reeman por xtiidxaman nē por guialrirobnijs, <sup>27</sup> din guidxin reeman lojman nix da't nē ni'qui tijb ni mal, sin falt o dol ren ree, guidxin reeman lojman nayadxuj sin dol. <sup>28</sup> Yan ziangajc ree xinguaaw baxhliaa, rayal guiēn lacheel reex zi'c rēn laagajc reex. Abi' xin rēn lacheel, laa gajquixan rēnx. <sup>29</sup> Din ni'qui

tijb bejn ad rdx'e'cht laagajcaman, ruyaanli laagajcaman rni-ajchi' tēē laagajcaman zi'c rüjnnē Jesucrist dunuj ree nayajc ree bën rliiladx laaman <sup>30</sup> guial nayajc ree tijbzi con laaman. <sup>31</sup> Zeel zi'c rēb loj xtiidx Dios: “Xinguaaw gusa'n xdad xniaax din gaquix tijbzi con lacheelix abi' grop reex ma naj tijbzi bejn.” <sup>32</sup> Dád nawēēg naj par chignia' bejn diidx guie ree, per caninan din zian naj Jesucrist con ree xbejnman. <sup>33</sup> Yan, xinguaaw ree, gol guyēn lacheelidi zi'c rēn lējt gajc. Guiáad lējt béngunaa, gol gojp respejt lacheelidi.

## 6

<sup>1</sup> Nē lējt najdi xi'n, guial zinalidi Jesucrist, gol bazoob xtiidx ree xdadidi, din zian rayal güündi. <sup>2</sup> Abi' mandamient yaloj ni rēb guial yu' ni yaca' ree bal yaguieen ree ni rēb: “Gojp respejt xdad xniaal, <sup>3</sup> din guibanl zagdxē guiban tēēl xchej loj guidxliuj guie.” <sup>4</sup> Nēgajc lējt dad na ad gusagdiaj xi'ndi chitēē guidxe'ch reex por zian. Mejorli gol basni's reex zagdxē, gol guneenē reex gol balüü tēē reex zi'c rēn Dios. <sup>5</sup> Nē lējt bën rüjn ree xchiin bejn, gol bazoob xtiidx bën naj xpatrondi loj guidxliuj guie. Con guidib luxdoodi gol gojp respejt gol bazoob tēē xtiidx reeman, gol gunaladx xchiin Jesucristan cayüjndi. <sup>6</sup> Gol been reeman sirv ad chi ruguiaatzi reeman lējt par yaya'ndi zagdxē loj reeman, gol gunaladx guial Jesucristan cayüjndi sirv guial diidxli cayüjndi zi'c rēn Dios güündi. <sup>7</sup> Gol been dxiin con gan, gol gunaladx xchiin Jesucrist cayüjndi, ad xchiint bénguidxliuj. <sup>8</sup> Din lējt ma ragbee guial tijbgaj bejn majsi bën rüjn xchiin bejn o bën ad rüjnt xchiin bejn, per gudēē Jesucrist ni rayalaman zi'ctzi naj ni zagdxē beenman. <sup>9</sup> Nēgajc lējt bën naj ree patron, gol gojc benza'c con ree xmojsidi, ma gojczy rusagzidi laa reeman, din lējt ragbee guial bën rniabee laa reeman nē lējt yu'man xanyabaa, abi' ad rbetaman loj bejn.

### *Gol guzudxi'ch loj ni rliiladxidi*

<sup>10</sup> Rni tēēn lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xguialrniabee narooberman. <sup>11</sup> Gol gojp lējt gajc con xguialrniabee Dios din sudxi'chidi chitēē güün xindxab lējt gan con ree ni rusquiee. <sup>12</sup> Din ad cayguieent ree naguiejn yaguieen ree gan loj tijb ni naj bēēl nē dxijt, caydijl ree con gra loj sprijtmal zi'c ree ni rajp guialrniabee, guialguxtis nē gra loj xsprijt xindxab ni yu' ni canabee tēē loj guidxliuj guie. <sup>13</sup> Zeel gol gojp lējt gajc con xguialrniabee Dios din chile' taandi xhietēēz loj guialzi gui't sudxi'ch tēēdi loj xhietēēz ni saquidi.

<sup>14</sup> Gol guzudxi'chcliza por ni diidxli ni ma ragbeedi, gol basnuu tēē zi'c rayal guibandi. <sup>15</sup> Gol guzusin par guinieedi

xtiidxza'c Jesucrist din por laan yadxu' ree zagdx con Dios. <sup>16</sup> Gol badxe'guijc tää guial guialrliladx ni rajpidi naj ni ragnë lëjt loj gra ni zëäd por xindxab. <sup>17</sup> Në ni been Dios perdon xtolidi, laan naj ni rutëë lëjt, guiáad xtiidxaman naj zi'c tijb espad ni runee xSprijt Dios lojdi. <sup>18</sup> Ad gucwëëz cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusin par cwedx guiniabidi laaman, ad gucheeladxidi, gol gurejdx tääman por gra ree xbejnman. <sup>19</sup> Gol gurejdx gunab tääman por naj din yazaladxaman naj diidx ni rayal ganen din ganen sin guialrdxeb xtiidxza'c Jesucrist ni zidnë perdon. <sup>20</sup> Dios bacaabee naj par ganen xtiidxza'caman, abi' por zian yu'n ladxguiib. Per gol gurejdx gunab Dios chitëë gadxeban gün xtiidxaman zi'c rayal günan.

*Diidx bigra ca ree loj gui'ch guie*

<sup>21</sup> Tíquico, tijb du lasa' ree bën rayën da't ree, abi' diidxli cayünman dunuj ree yudar cayguieen ree sirv Jesucrist, laaman gugojn lëjt gra xhienaag za'n xhie tää cayünan, <sup>22</sup> din par zianczi caxhalan laaman din gugojnman lëjt xhienaag nadxu'n niz guie yagu' tääman luxdoodi. <sup>23</sup> Rniaaban loj Dios guial gra ree bën rliladx Jesucrist, cwe'cdxeman luxdoo reeman guiën tää lasa' reeman, chililadx tää reeman laaman në Dad Jesucrist, <sup>24</sup> güünle' tääman gra ree bën wali rën Dad Jesucrist.



## Gui'ch guxhaal San Pabl loj ree bën Filipos rliladx Jesucrist

### *Rugajpdioz Pab bën rliladx ree Jesucrist*

<sup>1</sup> Naj Pab con Timoteo, raguieenan sirv loj Jesucrist. Caycaan gui'ch guie par lëjt najdi bën rliladx Jesucrist luguiedx Filipos, në par ree bën rniabee lojdi rulüü tää reeman xtiidx Dios në ree bën rüjn yudar bën rliladx ree Jesucrist. <sup>2</sup> Dux Dad ree Dios në Dad Jesucrist güünle' lëjt, yabe'cdxe tää reeman lëjt.

### *Rbejdx rniab Pab Dios por ree bën rliladx Jesucrist*

<sup>3</sup> Zianczi chi rasaaladxan lëjt, rudën quixtää loj da Dadan Dios. <sup>4</sup> Abi' zianczi chi rbedx rniaaban laaman dád nix ru luxdon, rbedx rniaaban laaman por gradi. <sup>5</sup> Din diizd dxej ni guzuloj rliladxidi Jesucrist dxel guzuloj raguieen ree tijbzi xgab par guire'ch xtiidxaman xt yan. <sup>6</sup> Ragbeechaawan guial diizd chi guzuloj rliladxidi xtiidx Dios, laaman cusnuu cayagnë lëjt din gaquidi zi'c rayal xt dxej gui't Jesucrist stijb. <sup>7</sup> Najczi guial günan xgab zian por gradi, din rusaaladxan lëjt, zi'c chi yu'n ladxguiib ziangajc chi culün conin naj diidxli xcwent Dios din tibloj cayüjnle'man dunuj ree. <sup>8</sup> Dios ragbee guial dád rusaaladxan lëjt guial rënan lëjt zi'cgajczi rën Jesucrist lëjt. <sup>9</sup> Rniab tään lojman din mazri guiën lasa'di, abi' guixie guixie gusnuu guixhialaman xquiarguiejndi din gagbeedi ni rayal güündi, <sup>10</sup> din chile' cwedi ni naj mazri zagdxe. Abi' zian guibandi naya sin dol niz loj Dios, chitää xhie naman contr lëjt dxej ni gui't Dad Jesucrist stijb. <sup>11</sup> Abi' por laaman zajc guibandi zi'c rën Dios zi'c balüü Jesucrist lëjt din gap ree bejn Dios mazri respejt guilies tää reeman xvaloraman.

### *Yabajn ree par Cristo*

<sup>12</sup> Compniar raliduladx ree Jesucrist, rënan gagbeedi guial graczi ni guza'can cayüjn reen yudar persi care'ch xtiidxza'c Jesucrist. <sup>13</sup> Abi' yan, gra ree bën yu' lën palas në gra ree bën zobj niz guie ragbee reeman guial yu'n ladxguiib por guial najn xbejn Jesucrist. <sup>14</sup> Abi' chi baguiaa ree compniar raliladxnë' ree Jesucrist guial yu'n ladxguiib, mazri guzudxi'ch reeman abi' zien da't reeman guyu luxdoo gutie'ch reeman xtiidx Jesucrist sin guialrdxeb.

<sup>15</sup> Per diidxliczi yu' reeman rtie'ch xtiidx Jesucrist guial rdëdloj reeman naj abi' rën reeman gac reeman mazri bën zobjloj. Per yu' reeman rtie'ch xtiidxaman guial naj xixgab

reeman zagdxe. <sup>16</sup> Yu'za reeman guial rën reeman Jesucrist, catie'ch reeman xtiidxaman abi' ragbee reeman guial yu'n ladxguiib guial za'dxi'chnë'n xtiidxaman guial najcan diidxli. <sup>17</sup> Per yu' reeman ad walit reeman naj xixgab reeman zagdxe catie'ch reeman xtiidx Dios, naabzi par guilies bejn xvalor reeman abi' xixgab reeman naj guial gusagdiaj reeman naj mazri lën ladxguiib guie. <sup>18</sup> Per achet güünan majsi zagdxe naj xixgab reeman o ad zagdxe ya, contzi ma catie'ch reeman xtiidx Jesucrist, laan naj ni rabaanë'n abi' mazri yabaan. <sup>19</sup> Din ragbeen guial yariin loj ni cadëedan guial cabejdx canabidi Dios por naj në guial cayagnë xSprijt Jesucrist naj. <sup>20</sup> Naj ragbee guial ad yu't dxej guslaa Dios naj yaya'nxtun, sin guialrdxeb gulün bejn ree xhienaag ra'pan respejt Jesucrist majsi nabanen o majsi guiëtan. <sup>21</sup> Din par naj la'tgaj nabanen cayünan laaman sirv, abi' bal guiëtan mazri zagdxen din ma gazun con laaman. <sup>22</sup> Per bal gabajnran loj guidxliuj guie, gusnuu günan sirv loj Cristo zi'c rayal, per ad ragbeetan conin naj zagdxe par naj. <sup>23</sup> Din loj grop ree ni guin dád nawëegan par gaben conin günan, tijb rënan yaca' Dios naj din gazun con Cristo, laan naj mazri zagdxe par naj, <sup>24</sup> per por lëjt rüjn naguiejn gabajnran. <sup>25</sup> Abi' naj ragbeen guial gabajnran din günan lëjt yudar gusnuu chinalidi xnejz Dios, din chu' luxdoodi gusnuu chililadxidi Jesucrist. <sup>26</sup> Abi' chi guidganan lëjt stijb, chu' ni yabaanëdi gudëe tëedi quixtëe loj Jesucrist por ni beenman por naj.

<sup>27</sup> Per ganin lëjt, gol been naguiejn gol gubajn zi'c rayal, zi'c rëb loj xtiidx Jesucrist. Din bal guidganan lëjt o bal id zialan, per rënan guiguiejnan guial za'dxi'chidi nadxag tëe lasa'di abi' tiblojz cayüjndi naguiejn catie'chidi xtiidx Jesucrist. <sup>28</sup> Ad guidxebidi bén rdxe'ch lëjt. Zian guiguien guial ma canijt reeman loj Dios, per lëjt zian guiguien guial ma rajpidi perdon zëed loj Dios. <sup>29</sup> Din ad cwabeetidi par chililadxzidi Jesucrist, cwabeedi në par sagdiajdi por laaman. <sup>30</sup> Lëjt con naj tiblojz caydüüd ree tarbajw par yatie'ch ree xtiidx Jesucrist, ma baguiaadi xhienaag rdëedan tarbajw por xtiidxaman abi' yan caguiejndi guial cusnuu cayünan mazran.

## 2

### *Nadxag yadxu' ree por Jesucrist*

<sup>1</sup> Yan, zi'c ma yu' luxdoodi zagdxe por Cristo, zi'c ma yu' luxdoodi nix guial rusnuu rën lasa'di, në zi'c ma nabannëdi xSprijt Dios në zi'c yu' luxdoodi nix con lasa'di, në zi'c raya lasa'di. <sup>2</sup> Gol basnuu gol gubajn zian din yagu'di luxdoon nix. Gol gubajn, gol guyën tëe lasa'di tibloj, gol gojc tijbzi, gol been tëe tijbzi xgab. <sup>3</sup> Ad sëëbladxidi güündi gan loj ree lasa'di o

guilies xvalor l jt gajc, mazri zagdx e gol been naya, gol been t e xgab guial stijb lasa'di mazri lasajc guial lojdi. <sup>4</sup> Ad bal chu'di xgab por l jtzi, gol guyu xgab por stijb lasa'di.

<sup>5</sup> Gol been xgab zi'c been Jesucrist xgab. <sup>6</sup> Din majsi laaman naj Dios, per ad guzudxi'chtaman guial ni jbaman laaman naj Dios. <sup>7</sup> Basa'n xguialrniabeeman persi bi'taman loj guidxliuj guie zi'c tijb mojs abi' gojlaman zi'c tijb b nguidxliuj. <sup>8</sup> Abi' chi gocaman zi'c tijb b nguidxliuj beenman naya abi' bazoob xtiidx xDadaman, xt g jtaman loj cr jz, majsi ni natu naj guial r jt loj cr jz. <sup>9</sup> Zeel d d guialrniabee naroo bad e Dios lojman, bad e t eman lojman laj bejn ni mazri lasajc loj gra laj bejn. <sup>10</sup> Din chi guiguiejn ree bejn laj Jesucrist, guzuxib gra reeman lojman, zi'c ree ni yu' xanyabaa, n  gra ree ni yu' loj guidxliuj, n t e ree ni yu' l n liuj. <sup>11</sup> Abi' gra bejn gui b guial Jesucrist naj Dad, zian guilies reeman xvalor dux Dad ree Dios.

### *Xbejn ree Jesucrist naj zi'c tijb guij ni rulaa bacha'*

<sup>12</sup> Zeel compniar raliduladx ree Jesucrist, zi'c r nan l jt abi' rnin l jt guial zi'c bazoobidi da diidxan chi guzun con l jt, ziangajc gol bazoob da diidxan mazri yan guial za'n zijt. Con guialrdxeb n  con respejt gol been zi'c rayal g un ree b n ma naj perdon. <sup>13</sup> Din por Dios z ed xgabza'c ni r jn di, abi' laaman ragn  l jt din g undi zi'c r nman.

<sup>14</sup> Gol been gra ni rayal g undi, achet guial ad zayuladxtidi achet t et guial tildiidxidi, <sup>15</sup> chit e xhie guinee bejn l jt o chit e xhie xfaltidi yadxelj reeman. L jt najdi xi'n Dios gol gubajn naya niz loj ree b n ad zinalt xnejz Dios, b n r jn ree ni guijdx. Din gaquidi zi'c tijb guij loj reeman, zi'c tijb guij ni rulaa bacha' lod nacay, <sup>16</sup> guial za'dxi'chn di xtiidx Dios ni zidn  guialnaban. Abi' zian yabaan por l jt dxej ni gui't Jesucrist stijb guial gagbeen ad bentan dxiin xlia' ad bizaa t etan xlia'. <sup>17</sup> Din guial rliladxidi Dios laan naj zi'c tijb gon par laaman, abi' nix yu' luxdon majsi gui tan din yayaaloj gon guin guial rabaan 'n gradi. <sup>18</sup> Yan ziangajc gol babaa, gol babaa zi'c rabaan.

### *Timoteo n  Epafrodito*

<sup>19</sup> Dad Jesucrist gagn  naj din diob gaxhalan Timoteo lod zojbidi din xhienladxan chi gagbeen xhienaag riga'di. <sup>20</sup> Din tijbzi Timoteo yu' l jt xgab zi'c yu'n l jt xgab. Achut b n ru l jt xgab zi'c laaman. <sup>21</sup> Graczi reeman ru xgab per por laagajc reeman, ad rut reeman xgab por ni r n Jesucrist g un reeman. <sup>22</sup> Per ma ragbeedi xhienaag naj Timoteo, ma ragbeedi xhienaag cay jnman naj yudar persi catiechan xtiidx Jesucrist. Cay jnman naj yudar zi'c r jn bejn xDadaman

yudar. <sup>23</sup> Zeel rēnan gaxhalan laaman din guitixlojman lējt, gagbeezan xhienaag gariican loj cwent guie <sup>24</sup> Dad Jesucrist gagnē naj din diob guidgana quijb naj lējt.

<sup>25</sup> Abi' rulüü rüjn naguiejn gaxhalan da miwan Epafrodito ladxidi. Lējt guxhaal laaman din güünman naj yudar loj ree ni ryaadxan. Abi' zian cayünman naj yudar, tiblojzi cayzagdiajn. <sup>26</sup> Dád rēnman guidganajman lējt abi' dád yu'man xgab guial gogbeedi gogxuuman. <sup>27</sup> Abi' walican gogxuuman zamer niējtaman. Per baya Dios laaman, abi' ad laatzaman, nēgajc naj bayaman, chitēē chu'naya luxdon mazri zi'c ma guyu nayan. <sup>28</sup> Zeel diob gaxhal gajcan laaman din yabaadi chi guguaadi laaman stijb chitēē chu'naya tēēn mazri. <sup>29</sup> Gol babaa, gol baca'man guial najman tijb du lasa' ree bën rliladx Jesucrist. Zian gol guyēn gra ree bën naj zi'c laaman. <sup>30</sup> Din zamer niējtaman guial rüjnman sirv loj Jesucrist, guzujman loj guialgüjt guial beenman naj yudar loj ni ad bile't nüjn quijb lējt naj yudar.

### 3

#### *Ni mazri lasajc*

<sup>1</sup> Yan, compniar raliduladx ree Jesucrist, gol badxe' luxdoodi zagdxē por Dad Jesucrist. Par naj achetan guial ganin lējt diidx ni ma rni gajcan tijb, din par lējt lasajc ree diidx guin chitēē chu' ni gusquiee lējt. <sup>2</sup> Gol gojp cudad con ree bentont, bën ad nadēdguient, benmal, bën rüjn ree naguiejn din chu' ree bejn xsen bën Israel. <sup>3</sup> Din mazri lasajc sen ni raya'p ree, abi' sen guin naj guial diidxli zunaal ree Dios por xSprijtaman bën nabajnnē' ree, abi' rabaa ree guial ma rayagbee ree nayajc ree xbejn Jesucrist, per ad por guial zunaalt ree costumbr. <sup>4</sup> Majsi zajc gales da valoran guial zinaalan gra ree costumbr, per bal yu' bën rlies xvalor gajc, nēgajc naj zajc güün zian. <sup>5</sup> Din chi goc toxman goolan, badxe' reeman naj sen ni ru ree bën Israel. Abi' bën Israel naj, loj xdiaa Benjamín zialan, rnien diidx Hebreo din xi'n ree bën rniee diidx Hebreo naj. Benan gra ni rniabee ley din bēnfarisew gojcan. <sup>6</sup> Benan zi'cgajczi rüjn ree bēnfarisew, zeel xt guzunaalan bën rliladx ree Jesucrist din güünan laa reeman ni mal, benan gra zi'c tal rniabee ley abi' achut zajc niējb guial ad cayüntan zi'c rayal. <sup>7</sup> Gra ni benan nadxel, par naj dád lasajcan nadxel, per yan achet lasajcan par naj, din yan Cristo mazri lasajc. <sup>8</sup> Abi' achet ni mazri lasajc guial loj ni nünbeen Dad Jesucrist, por laaman gra ni benan nadxel ma basa'nan tiblax, naj reen zi'c tijb guix par naj din nabee Cristo naj guidiblagaa, <sup>9</sup> abi' gacan tijbzi con laaman. Ad naladxtan por guial rünan zi'c rniabee ley achet dol ra'pan niz loj Dios, naladxan por guial rliladxan

Jesucrist, din por guialrliladx guin ma naya bejn loj Dios. <sup>10</sup> Zeel rënan gënbeecheawan Cristo, gënbee tëen guialrniabee ni basban laaman, rën tëen gadaanan xhietëez loj guialrzagdiaj ni gadëedan zi'c gudaanman, ma guidxin dxej gacan zi'c rayal gacan por xguialgüjtaman. <sup>11</sup> Din yu'guican guial yabanan zi'c baban Jesucrist.

### *Ni gunee Dios xanyabaa*

<sup>12</sup> Ad canitan lojdi guial ma bayaaloj benan gra o guial najn benza'c, per cayünan naguiejn din gacan zi'c rën Cristo gacan diizd chi guzuloj rniabeeman naj. <sup>13</sup> Compniar raliduladx ree Jesucrist, naj rni lëjt guial ad wayaalojt gënan zi'c rayal, per cayünan naguiejn din yayanladxan gra ni benan gocli din gac gusnuun par delant, <sup>14</sup> din yayaaloj gënan zi'c rayal din chile' gaca'n ni gunee Dios xanyabaa zi'c gurejdxaman dunuj ree por Jesucrist.

<sup>15</sup> Abi' dunuj ree guial ma rayagbee ree zagdxe ni rën guiëb xtiidx Dios, rayal yaguieen ree xgab zian. Per bal garen naj xixgabidi guial loj ni canin lojdi, Dios gulüü lëjt conin naj diidxli. <sup>16</sup> Per rüjn naguiejn yabajn ree zi'c ma rayignia' ree.

<sup>17</sup> Compniar raliduladx ree Jesucrist, gol gubajn zi'c naban, gol baguiaa tëe xhienaag naban ree bén naban zi'c naban. <sup>18</sup> Din zien volt ma rnin lojdi abi' yan caydxi'nan zatijb, xt ronnan canin lëjt guial zien ree bejn naban zi'c ree bén ad rliladxt guial güjt Cristo loj crüzj por dux xtol ree. <sup>19</sup> Abi' ree bén guin castizi naj ni rbëz laa reeman din mazri ruladx reeman güün reeman ni dxuudx. Abi' luar yatu reeman por ni rüjn reeman aal mazri rlies xvalor reeman guial mazri rüjn reeman xgab por ree ni yu' loj guidxliuj guie. <sup>20</sup> Per dunuj ree ma nayab ree xanyabaa abi' caylëjz ree guial diizd xanyabaa gui't Dad Jesucrist bén gudix por dux tol ree. <sup>21</sup> Laaman naj bén guchaa dux cuerp ree ni raya'p ree loj guidxliuj guie din gacan zi'c naj xcuerpaman xanyabaa. Abi' güünman zian con guialrniabee ni rajpaman par nabeeman gra.

## 4

### *Gol badxe' luxdoodi zagdxe por Dad Jesucrist*

<sup>1</sup> Zeel compniar raliduladx ree Jesucrist, rënan lëjt rën tëen guidganan lëjt, lëjt rgu' luxdon zagdxe, abi' najdi zi'c tijb prem par naj, gol guzujdxi'ch loj ni rliladxidi Dad Jesucrist.

<sup>2</sup> Yan, rniaaban loj Evodia në loj Síntique din guidxag cwe reeman guial naj reeman compniar loj ni rliladx reeman Dad Jesucrist. <sup>3</sup> Abi' ziangajc lüj compniar ni cayguieen dxiin tijbzi, rniaaban lojl din güünl yudar béngunaa guin ree din laa reeman been naj yudar bire'ch xtiidx Jesucrist në Clemente

con ree ben ren, gra reeman ma yu' laj loj libr ni yu' laj ree b n guiban tiblayaa con Dios.

<sup>4</sup> Zianczi gol badxe' luxdoodi zagdxe por Dad Jesucrist. Naj rni l jt  Gol badxe' luxdoodi zagdxe! <sup>5</sup> Gol been naguiejn g unbee gra bejn l jt guial najdi benza'c. Gol badxe'guijc guial zamer gui't Dad Jesucrist zatijb.

<sup>6</sup> Ad rayalt chu'di xgab por xhienin, gol gurejdx gunab Dios por gra ni rzajquidi, gol gurejdxaman gol bad e t e quixt e lojman. <sup>7</sup> Dios yabe'cdxe luxdoodi, zro' rabe'cdxeman luxdoo bejn mazri guial loj ni naladx bejn, abi' laan naj ni gagn  l jt din yayaalyuj luxdoodi yayaalyuj t e xquiarguejndi guial ma najdi tijbzi con Jesucrist.

### *Gol badxe'guijc ganax ni zagdxe*

<sup>8</sup> Naga gad lox g nan gui'ch guie, compniar raliduladx ree Jesucrist, rnin l jt gol badxe'guijc ganax ni diidxli, ni rayal respejt n  ni naj xnejz. Gol badxe'guijc ganax ni r jn sirv, ni naj zagdxe n  ni rayal g n b n z  xnejz. Gol badxe'guijc gra ni naj zagdxe n  ni guilies bejn xvalor.

<sup>9</sup> Gol been zi'c basidan l jt, zi'c ma bal n l jt, gol been zi'c rnin l jt zi'c ma baguiaadi benan, zian gagn  Dios l jt b n rabe'cdxe luxdoo ree bejn.

### *Ni bad ed ree b n filipos loj Pab*

<sup>10</sup> D d rabaan por Dad Jesucrist guial ma basaaladxidi naj. Ad canitan bayanladxidi naj, canin zian guial ad gojctri n jndi naj yudar. <sup>11</sup> Ad canitan zian guial cayaadxan xhienin din ma basidan gad edan con ni ra'ptzan. <sup>12</sup> Ragbeen xhienaagan chi naban bejn loj guialprob ragbee t en xhienaagan chi achet ryaadx bejn, din ma basidan rdaanan ni z edtzi, bal rawan o bal id rawan, bal r jnan naj sobr o bal ryaadxan. <sup>13</sup> Rajc rdaanan ni z edtzi con xyudar Jesucrist. <sup>14</sup> Per zagdxe naj ni beendi guial beendi naj yudar loj ni cazaagdiajn.

<sup>15</sup> Ragbee t edi guial chi briin niz Macedonia din suloj gatie'chan xtiidxza'c Jesucrist, l jtzi bazaladx xhienin lon guial loj gra ree guiedx lod ma rliladx reeman xtiidx Jesucrist, zi'c benan l jt yudar ziangajc beendi naj yudar. <sup>16</sup> Ziangajc chi guzun luguiedx Tesal nica chi biaadxan xhienin, b lczi volt beendi naj yudar. <sup>17</sup> Ad cayguiltan mod din g undi naj yudar mazri, ni r nan naj guial mazri yaya'ndi zagdxe loj Dios. <sup>18</sup> Ma baca'n gra ni guxhaalidi con Epafrodito, yan xt sobr r jnan naj, par naj ni guxhaalidi naj zi'c tijb ni nadxoon o tijb gon ni ruree nejxh, ni ruladx Dios. <sup>19</sup> Zeel Dios gunee l jt gra ni ryaadxidi por ree ni za'c ni rajpaman xanyabaa con Dad Jesucrist. <sup>20</sup>  Abi' por guialrniabee ni rajp dux Dad ree Dios, rayalczi yaya'p reeman respejt goct ez! Am n.

*Rugajpdioz ree bèn rñiladx Jesucrist bèn Tesalónica ree*

<sup>21</sup> Gol bagajpdioz gra ree bèn ma naj xbejn Jesucrist, guiáad gra ree bèn rñiladx Jesucrist bèn za'nè' reen guie, rugajpdioz reeman lèjt. <sup>22</sup> Gra ree bèn zobj ree guie, bèn ma naj ree xbejn Jesucrist, nè gra ree bèn rñjn sirv loj rey, nè reeman rugajpdioz lèjt.

<sup>23</sup> Dux Dad ree Jesucrist güünle' gradi. Amén.

## Gui'ch guxhaal San Pabl loj ree bèn Colosas rliadx Jesucrist

### *Rxhiaal Pab xtiidx Dios*

<sup>1</sup> Naj Pab, najn tijb xi apóstol Jesucrist, din zian rën Dios. Naj con Timoteo nayajcan compniar raliduladxan Jesucrist, <sup>2</sup> caycaan gui'ch guie par lëjt guial diidxli zinalidi xtiidx Jesucrist, lëjt guial najdi xbejn Dios luguiedx Colosas. Dux Dad ree Dios güünle' lëjt cwe'cdxe tääman luxdoodi.

### *Rbejdx Pab Dios por ree xbejn Jesucrist*

<sup>3</sup> Beegaj chi rarejdxan Dios, xDad Dad Jesucrist, radäädan quixtää lojman por lëjt. <sup>4</sup> Din ma baguiejnan xhienaag rliadxidi Jesucrist xhie tää naag rëndi gra ree bèn naj ree xbejnman. <sup>5</sup> Guial cabëzidi yayalidi guialnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli. <sup>6</sup> Abi' ree diidxza'c guin ni ma bacaagdiajguidi, gra ladczi ma care'chan. Abi' gra ladczi ma caliladx ree bejn laan zi'cgajc guzaquidi chi biguiejndi guial naza'c Dios abi' diidxli rënman lëjt. <sup>7</sup> Lëjt gogbee diidxli guin ree chi balüü Epafra laa reen lëjt. Laaman cayüjn dunujn yudar abi' dád rayënan laaman, din laaman diidxli cayüjn sirv loj Jesucrist delant lojdi. <sup>8</sup> Abi' tää laaman be diidx du lojn xhienaag rën lasa'di guial yu' xSprijt Dios luxdoodi. <sup>9</sup> Zeel diizd chi baguiejnan xhienaag nabandi, ad racwëëzt rarejdxan Dios por lëjt din chignia'di zagdxe xhienaag rënman güüнди gunee tääman lëjt gra loj guialrajc guixhial tääman xquiarguiejndi por xSprijtaman. <sup>10</sup> Abi' zian guibandi zi'c rayal guiban ree bèn rliadx Jesucrist, din güüнди zi'c tal ruladxaman abi' gusnuu güüнди ganax ree ni zagdxe gusnuu tää güünbeedi Dios mazri. <sup>11</sup> Abi' ranaaban lojman din con xguialrniabee za'cdxoonman gagnëman lëjt din sudxi'chidi, taan täädi xhi-etëëz loj guialzi tädidi sin guial yalenyä'di. <sup>12</sup> Abi' xt nix chu' luxdoodi gudëedi quixtää loj dux Dad ree Dios guial basiaman lëjt din yayalidi ni rayal ree xbejnman, bèn zinal ree xnejzaman. <sup>13</sup> Laaman babëë dunuj ree loj xguialrniabee xindxab abi' bagu'man dunuj ree loj xguialrniabee xi'nman Jesucrist bèn rënman, <sup>14</sup> abi' gudijxaman por dux tol ree, yan ma raya'p ree perdon loj Dios.

### *Por xguialgüjt Jesucrist ma nadxu'në' ree Dios zagdxe*

<sup>15</sup> Achut zajc guguaiaa Dios, per Jesucrist naj zi'c gajczi naj Dios. Abi' laaman mal rniabeenëman Dios diizd chi gad guidxliuj gacchaaw. <sup>16</sup> Por Jesucrist gojc gra ni yu' xanyabaa



në loj guidxliuj, zi'c ni ruguiaa bejn zi'c ni ad ruguiaataman. Abi' por laaman yu' graloj gualrniabee në graloj gualguxtis ni rajp ree ni ad rajct ruguiaa ree bejn. Gran gojc por laaman në par laaman. <sup>17</sup> Mal yu' Jesucrist diisd guida'xchej chi gad guidxliuj gacchaaw, laaman dxiibguijc gra abi' rniabeeman gra. <sup>18</sup> Abi' laa tēēman rniabee gra ree bèn rliladx laaman, bèn ma naj ree xbejnman. Laaman naj bèn yaloj abi' yaloj laaman baban loj ree bengüt din guiguien gual tijbzi laaman rajp gualrniabee loj gra. <sup>19</sup> Din bayuladx Dios gac Jesucrist zi'c gajczi naj Dios. <sup>20</sup> Abi' por Jesucrist gra bénguidxliuj ma za' zagdx con Dios, zi'c ni yu' loj guidxliuj zi'c ni yu' xanyabaa. Za' bejn zagdx con Dios por xgualgüt Jesucrist loj crüzj. <sup>21</sup> Gocli ad gojctidi tijbzi con Dios, gojquidi zi'c bèn bidxe'ch laaman gual beendi ganax ni mal. <sup>22</sup> Per yan ma za'di zagdx con Dios por ree gualzi ni gudēd Jesucrist chi gütaman loj crüzj din gac guidxindi lojman naya sin dol chitēē xhie naman lojdi. <sup>23</sup> Per par zian rayal sudxi'chidi loj gualrliladx ni rajpidi, ad gucwēēz chinalidi xtiidzxa'c Jesucrist ni ma biguiejndi. Abi' diidzxa'c guin gajc ree ma bire'ch guidib guidxliuj. Abi' naj naj tijb ree bèn catie'ch diidzxa'c guin ree.

### *Bacaabee Dios Pab din güünman sirv loj ree xbejn Dios*

<sup>24</sup> Abi' yan nix yu' luxdon por gualzi ni cadēēdan gual rünan lējt yudar abi' lasa'gajc gualzi ni gudēd Jesucrist cadēēdan din chile' günan yudar bèn rliladx ree laaman bèn ma naj ree xbejnman. <sup>25</sup> Din Dios bacaabee naj par günan sirv loj ree xbejnman. Abi' laaman banee dxiin guin naj din gulün lējt xtiidxaman zi'c tal najn. <sup>26</sup> Diisd tiamp gulal ad bignia't ree bejn zagdx ni rēn guiēb xtiidx Dios. Per yan ma balüüman ni rēn guiēban loj ree xbejnman. <sup>27</sup> Din gugojn reeman bèn ad najt ree bèn Israel xhienaag naj xgualnaza'c za'cdxoonman. Abi' ni ad balüüt Dios loj ree bejn tiamp gulal naj gual nabannē Jesucrist lējt abi' por laaman ragbeedi zagdx gual yu' dxej yayalidi xanyabaa. <sup>28</sup> Abi' dunujn batie'ch xtiidx Jesucrist, baneenē'n bejn ree, balüü tēēn laa reeman con gra quiarguiejn ni runee Dios din chi guidxin reeman lojman por Jesucrist ma naj reeman zi'c rēnman gac reeman. <sup>29</sup> Abi' naj dád cayünan naguiejn cayünan dxiin guie con gualrniabee ni baneeman naj.

## 2

<sup>1</sup> Rēnan gagbeedi gual cayün da'tan naguiejn cayünan lējt yudar, në ree bèn zojb guiedx Laodicea në gra ree bèn ad wayünbeet naj. <sup>2</sup> Cayünan naguiejn din yayu luxdoo reeman din gusnuu guiban reeman tijbzi, guiēn lasa' reeman chu' tēē xquiarguiejn reeman din chile' güünbee reeman ni ad balüüt

Dios bejn ree gualal abi' laaman naj Jesucrist, <sup>3</sup> por laaman zëed gra gualrajc në gualrignia'. <sup>4</sup> Canin diidx guie ree lojdi chitëe chu gusquiee lëjt con ree xtiidx zagdx reeman. <sup>5</sup> Majsi ad za'tan con lëjt, per yu'guican lëjt abi' rabaan gual cayüjndi zi'c rayal, za'dxi'ch tēedi loj gualrliladxidi Jesucrist.

<sup>6</sup> Zeel zi'c ma rliladxidi Dad Jesucrist, ziangajc gol gojc tijbzi con laaman. <sup>7</sup> Gol been naguiejn gol binalaman guidiblagaa, gol guzudxi'ch loj gual rliladxidi laaman zi'c ma basiididi ad gucwëez tēe gudēedi quixtēe loj Dios.

### *Gualnaban ni rudēed Jesucrist*

<sup>8</sup> Gol gojp cudad, ad tiëbidi güün ree bén rën gusquiee lëjt gan con ree ni rulüü reeman o con ree diidx ni ad rüjnt sirv ni zëed por ree costumbr o por ree gualrniabee yu' loj guidxliuj, din ad zëedt reen por Jesucrist.

<sup>9</sup> Din zi'cgajczi naj Dios, ziangajczi naj Jesucrist. <sup>10</sup> Abi' nabannēdi Dios guidiblagaa gual najdi tijbzi con Jesucrist, din laaman rniabee loj gra gualrniabee në loj gualguxtis. <sup>11</sup> Abi' tēe gual ma najdi tijbzi con Jesucrist ma yu'di xsenman, per ad lasa't sen ru ree bén Israel, sen yu'di por laaman najn gual ma basa'ndi dol tiblād. <sup>12</sup> Chi gurobnijsidi, laan rën guiëb gual güjtidi con Jesucrist abi' babandi con laaman stijb gual rliladxidi Dios rajp gualrniabee persi basbanman Jesucrist loj gualgüjt. <sup>13</sup> Gocli gojquidi zi'c bengüt delant loj Dios por xtolidi në por gual ad guyutidi sen ni ru ree bén Israel. Per yan por Jesucrist, ma been Dios dux tol ree perdon abi' ma raya'p ree gualnaban con Jesucrist. <sup>14</sup> Ma badxi'ca Dios dux tol ree ni bayal nadijx ree zi'c rniabee xleyaman, badxi'caman dol guin ree chi güt Jesucrist loj crüjz abi' laaman naj bén gudijx laan por dunuj ree. <sup>15</sup> Abi' zian beenman gan gra loj ree gualguxtis në loj gra gualrniabee zëed loj xindxab. Basa'nxtuman laa reeman loj ree bejn, beenman laa reeman gan gual güjtaman loj crüjz.

### *Gol been xgab ni yu' ree xanyabaa*

<sup>16</sup> Zeel achut rayal gula'ch lëjt por ni rawidi në ni rē'di o por gual ad rüjntidi cwent dxej lanij o dxej ni yu' bëew cüb o dxej raziiladx ree bejn. <sup>17</sup> Din gra ree ni guin naj zi'c tijb xbala Jesucrist abi' yan laaman naj bén ma bi't. <sup>18</sup> Ad tiëbidi gutiaalguiiw bén rën ree anjl zi'c Dios lëjt, par gusa'ndi xnejz Dios, din laa reeman rulüü naj reeman bén naxanladx, per ad najt reeman laan rëb tēe reeman gual yu' ni rulüüloj loj reeman. Dxel laagajc reeman rlies xvalor por xixgab gajc reeman. <sup>19</sup> Per laa reeman ad nabannēt reeman Jesucrist, bén rniabee dunuj ree. Abi' por laaman caysnuu cayignia'

ree xhienaag yunaal ree xnejzaman din yadxajg du lasa' ree yayajc ree tijbzi con Jesucrist zi'c naj xixgab Dios.

<sup>20</sup> Yan bal walidi ma güjtidi con Jesucrist par ree ni rbëëguijc ree bénguidxliuj, ¿chexquiza zeel ruzoobidi xtiidx ree bén rëb: <sup>21</sup> “Ad rayalt gugaalil ni guin, ad gawil ni guin, ad guiniaazil ni guin”? <sup>22</sup> Gra ree mandamient guin yu' dxej nit reen, din bénguidxliuj gulëëguijc laa reen. <sup>23</sup> Diidxliczi rulüü lasajc da't ree mandamient guin guial tant rüjn ree bejn naguiejn güün reeman laa reen cumplid abi' rüjn reeman bén naxanladx dxel rusagzi laagajc reeman, per achetczi lasajc ree mandamient guin par gucwëöz reen ni mal rzëëbladx reeman güün reeman.

### 3

<sup>1</sup> Zeel bal ma rajpidi guialnaban cüb con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios. <sup>2</sup> Ad güündi xgab ganax ree ni yu' loj guidxliuj, gol been xgab mazri ni yu' ree xanyabaa. <sup>3</sup> Gol gunaladx ma güjtidi par ree ni yu' loj guidxliuj abi' ma rajpidi guialnaban delant loj Dios por Jesucrist. <sup>4</sup> Abi' chi gui't Jesucrist stijb, bén runee dunuj ree guialnaban, në lëjt yayal guibannë laaman loj xguialrniabee za'cdxoonman.

#### *Zi'c rayal guiban ree bén rliladx Jesucrist*

<sup>5</sup> Yan, gol basa'n gra ree ni mal riga' loj guidxliuj guie. Ad sunëdi bén ren bén ad najt lacheelidi. Gol basa'n ni ad rüjnt ree sirv, në ree xgabmal në ree ni mal yu'di gan güündi. Ad sëëbladx tëëdi gapidi gra loj ni yu' loj guidxliuj din bén rüjn zian laan rënman mazri luar Dios. <sup>6</sup> Abi' por ree ni guin zëëd xcasti Dios par ree bén ad ruzoobt xtiidxaman. <sup>7</sup> Lasa' ree ni mal guin beendi chi gadidi güünbee Jesucrist. <sup>8</sup> Per yan gol basa'n gra ree ni mal guin zi'c guialrdxe'ch, guialralen lasa', guialrüjn ni mal lasa', guialrnieeguijdx në guial rniee diidxguijdx. <sup>9</sup> Ad rusquiee loj lasa'di, din ad nabantridi zi'c gubandi gocli chi beendi ni mal ree, <sup>10</sup> din yan ma bidxaa mod nabandi. Ma najdi zi'c bencüb guial chigagaj ma cayajquidi zi'c rën Dios gaquidi din güünbeedi Dios mazri zagdx, bén runee lëjt guialnaban. <sup>11</sup> Abi' chi ma rliladx bejn Jesucrist, achet güünan chutëöz najman, bal najman bén grieg o bén Israel, bal yu'man sen ru ree bén Israel o ad yu'taman laan ya, bal najman benzit o najman bén zojb dajn, bal najman zi'c bén nado' o ad najtaman zi'c bén nado' Per ni mazri lasajc naj guialrliladxaman Jesucrist, bén rniabee za' tëëman con dugra ree.

<sup>12</sup> Abi' Dios rën lëjt, zeel gulejman lëjt din gaquidi xbejman. Zeel gol baya bejn ree, gol gojc benza'c, gol gojc bén naxanladx, ad gaquidi bendxal, gol gojp pasens lasa'di. <sup>13</sup> Ad

yaleny'a'në lasa'di. Gol been tëë perdon lasa'di bal xhie rüjnnë reeman lëjt. Zi'c been Dad Jesucrist lëjt perdon ziangajc gol been perdon bejn ree. <sup>14</sup> Gol badxe'guijc guialrën lasa' naj ni mazri lasajc. Abi' guialrën lasa' guin rüjn yudar din guidxaag guiban bejn. <sup>15</sup> Gol cwëjb nabee Jesucrist lëjt din yabedxe luxdoodi, din par zian gulej Dios lëjt par gaquidi tijbzi por Jesucrist gol badëë tëë quixtëë lojman por zian.

<sup>16</sup> Gol badxe'guijc da't xtiidx Jesucrist, gol balüü gol guneenë tëë lasa'di zi'c rayal. Gol badëë quixtëë loj Dios con ree cant në ree salmos në los demazri ree cant ni naj par Dios. <sup>17</sup> Xhietëëz ni güündi ni guiniee tëëdi, yaloj xgaj gol basaaladx Dad Jesús abi' por laaman gol badëëd quixtëë loj dux Dad ree Dios.

### *Zi'c rayal guiban tijb famil*

<sup>18</sup> Lëjt béngunaa yu' ree lacheel, gol bazoob xtiidx lacheelidi, din zian rayal güün bén rliladx Jesucrist. <sup>19</sup> Abi' ziangajc lëjt xinguaaaw yu' ree lacheel, gol guyën lacheelidi ad gusagzi tëëdi laa reeman.

<sup>20</sup> Në lëjt xin naj ree xi'n, gol bazoob gra xtiidx ree xDadidi, din zian ruladx Dios. <sup>21</sup> Abi' ziangajc lëjt dad na, ad gusagdiaj xi'ndi chitëë guidxe'ch reex abi' yaleny'a' reex.

<sup>22</sup> Lëjt bén rüjn ree xchiin bejn, gol bazoob gra xtiidx xpatrondi loj guidxliuj guie. Ad chi ruguiaatzi reeman lëjt par yaya'ndi zagdxe loj reeman, guidib luxdoodi gol been xchiin reeman por respejt ni rajpidi Dad Jesucrist. <sup>23</sup> Xhietëëz nin güündi, gol beenan con gan. Gol gunaladx loj Jesucrist cayüjndi sirv, ad lojt bénguidxliuj. <sup>24</sup> Din lëjt ma ragbee guial zian yu' ni tia'di loj Dad Jesucrist guial cayüjndi laaman sirv. <sup>25</sup> Per par ree bén rüjn ni mal, laa reeman yayal casti por ni mal been reeman, din Dios ad rbetaman loj bejn.

## 4

<sup>1</sup> Nëgajc lëjt bén naj ree patron, gol been zi'c rayal con ree bén rüjn xchiindi, gol gojc tëë benza'c con laa reeman, din lëjt ragbee guial xanyabaa yu' bén rniabee lëjt.

<sup>2</sup> Gol guzusin, gol gurejdx Dios ad bal gucheeladxidi, gol badëë quixtëë lojman. <sup>3</sup> Gol gurejdx tëë Dios por dunujn din guixhialaman nejz din gac yatie'chan mazri xtiidx Jesucrist ni ad wayünbeet ree bejn. Abi' por ree diidx guin yu'n ladxguiib. <sup>4</sup> Gol gurejdx Dios din gac gatiechan diidx guin ree loj ree bejn zi'c rayal din gac chignia' reeman laan zagdxe.

<sup>5</sup> Gol gubajn zagdxe delant loj ree bén ad waliladxt Jesucrist gol gunee tëë xtiidxaman loj reeman beegaj chi chu' mod. <sup>6</sup> Chi rüdi diidx, gol be diidx xnejz din yayuladx bejn ni rnieedi gagbee tëëdi xhienaag yadxi'di ni rniabdiidx reeman lojdi.

*Rxhiaal ree xbejn Jesucrist xtiidx Dios*

<sup>7</sup> Tíquico, tijb du lasa' ree, bèn rayèn ree, bèn diidxli cayüjn naj yudar cayünan sirv loj Jesucrist, laaman gugojn lëjt gra xhienaag za'n niz guie. <sup>8</sup> Par zian caxhalan laaman din gugojnman lëjt xhienaag nadxu'n niz guie din yagu' tēēman luxdoodi. <sup>9</sup> Abi' con laagajcaman caxhalan Onésimo, tijb du lasa' ree bèn rayèn gajc ree, bèn naban zi'c rayal, bèn naj bèn ladxidi. Laa reeman gugojn lëjt gra ni cayajc niz guie.

<sup>10</sup> Aristarco, bèn yu'nē'n ladxguiib, laaman rxhiaal xtiidx Dios lojdi. Nēgajc Marcw, bijchwin Bernabé rugajpdioz lëjt. Abi' ma bagojnman lëjt chunin naj Marcw, bal gui'taman guidganajman lëjt, gol baca'man zagdxe. <sup>11</sup> Abi' nēgajc Jesús, bèn la gajc Justo, rxhiaal xtiidx Dios lojdi. Loj gra ree bèn Israel rliladx Jesucrist, laaz reeman cayüjn naj yudar caytie'chan xtiidx Dios abi' laaz reeman naj bèn cagu' luxdon. <sup>12</sup> Nē Epafra, bèn ladxidi, rxhiaal xtiidx Dios lojdi. Laaman cayüjn sirv loj Jesucrist. Gra dxejczy rbejdxaman Dios por lëjt din sudxi'chidi chinalidi xnejz Dios güün tēēdi gra zi'c rēnman. <sup>13</sup> Naj ragbee zagdxe guial dád ruman xgab por lëjt, nē por ree bèn Laodicea, nē por ree bèn Hierápolis. <sup>14</sup> Lujc, doctor rayèn da't ree, nē Demas, nē reeman rxhiaal xtiidx Dios lojdi.

<sup>15</sup> Gol bagajpdioz ree dux compniar ree bèn rliladx ree Jesucrist, bèn zojb ree luguiedx Laodicea. Gol bagajpdioz tēē Ninfas con los demazri ree xbejn Jesucrist bèn rado'p ree lidxaman. <sup>16</sup> Chi ma gulox biilidi gui'ch guie, dxel gol guxhaalan loj ree bèn rliladx Jesucrist, bèn zojb ree luguiedx Laodicea, din nē reeman gool laan. Nē gui'ch ni guxhalan loj reeman rayal yaxhaal reeman lojdi din nēgajc lëjt gool laan. <sup>17</sup> Abi' gol güjdx loj Arquipo din güünman cumplid ni ma bacaabee Dad Jesucrist güünman. <sup>18</sup> Naj Pab, quijb naj cuca lejtr guie ree par gugajpdiozan lëjt. Gol basaaladx guial yu'n ladxguiib. Dios güünle' lejt. Amén.

## Gui'ch yaloj guxhaal San Pabl loj ree bén Tesalónica rliiladx Jesucrist

<sup>1</sup> Naj, Pab con Silvan në Timoteo, cayxhaalan gui'ch guie par lëjt najdi bén rliiladx Jesucrist luguiedx Tesalónica, dux Dad ree Dios në Dad Jesucrist güünle' lëjt yabe'cdxe tëë ree-man luxdoodi.

### *Rudëë Pab quixtëë loj Dios*

<sup>2</sup> Guixie guixie radëen quixtëë loj dux Dad ree Dios por gradi, rasaaladx tëen lëjt chi rarejdx ranaaban laaman. <sup>3</sup> Në zianczi chi rarejdx ranaaban laaman, nadxe'duguijcan ni ma beendi guial rliiladxidi laaman, në guial rën lasa'di, nadxe'duguijc tëen guial cadaandi cabëzidi gui't Dad Jesucrist stijb. <sup>4</sup> Compniar raliduladx ree Jesucrist, dunujn rayag-bee guial Dios rën lëjt, gulej tëëman lëjt. <sup>5</sup> Din chi baneen xtiidxza'caman lojdi, ad diidxtizi balüün lëjt, balüün lëjt con xguialrniabee xSprijt Dios abi' rayagbeen guial diidxli naj ni caynan lojdi. Lëjt ragbee xhienaag babajnan chi badxu'në'n lëjt, babajnan zian din yaguieenan lëjt yudar xhienaag guibandi.

<sup>6</sup> Abi' lëjt nabandi zi'c babajnan lojdi në zi'c balüü Jesucrist, abi' por xSprijt Dios babaadi bililadxidi ni banan lojdi, majsi dád guzagdiajdi. <sup>7</sup> Zian najdi tijb ejempl par gra ree bén rliiladx Jesucrist niz Macedonia në niz Acaya. <sup>8</sup> Por lëjt bire'ch xtiidxaman ad tijbtizi luarzii ree, gra ladczi ruza't reeman xhienaag rliiladxidi Dios, xt ni'qui chetri ryaadx yaguie'chan. <sup>9</sup> Din laagajc reeman rü diidx xhienaag baca'di dunujn chi budganajn lëjt, xhie tëë naag basa'ndi ni naladxidi naj ree dios persi binalidi quijb Dios naban abi' guzuloj cayüjndi laaman sirv. <sup>10</sup> Rü tëë reeman diidx xhienaag cabëzidi gui't Jesucrist Xi'n Dios diizd xanyabaa, bén basbanman loj ree bengüt, Jesús bén rabëë dunuj ree loj casti ni zëed.

## 2

### *Ni been Pab luguiedx Tesalónica*

<sup>1</sup> Lëjt ragbee, compniar raliduladx ree Jesucrist, guial ad budganaj xlia'tzan lëjt, <sup>2</sup> majsi lëjt ragbee guial luguiedx Filipos guna ree bejn diidxguijdx du lojn në graloj ree guialzi badëed reeman dunujn. Per Dios baneen dunujn valor persi badün xtiidxza'caman lojdi, majsi xhietëez raza'can por ree bén rdxe'ch dunujn. <sup>3</sup> Din ad baneenë'tan lëjt diidx rusquiee, o par yaguieennë'n lëjt zi'ctzi rayënan ya, o par yasquieen lëjt,

<sup>4</sup> per zi'c bacaabee Dios dunujn din yaneen xtiidxza'caman guial baguiaaman zile' yaguieenan ni rayal yaguieenan, laanan naj ni radün ad par yaya'ntan zagdxe loj ree bejn, par yaya'nän zagdxe loj Dios, bén ragbee gra ni yu' luxdoo bejn. <sup>5</sup> Lëjt ragbee guial ad yu't dxej baneenë'n lëjt zagdxe naabzi par guiëndi dunujn, ache tëët guiyc badxiiban din yaca'n xmiliadi. Dios ragbee guial laan naj diidxli. <sup>6</sup> Ad radiiltan guza't ree bejn dunujn zagdxe, ad radiil tëëtan guza'tidi dunujn zagdxe, o guza't ree ben ren dunujn zagdxe, <sup>7</sup> majsi guial nayajcan xiapó stol Jesucrist, raya'pan derejch yanabeen lëjt güüdi xhienin par dunujn, per ad raguieentan zian. Lëjt ragbee guial benza'c bayajcan chi badxu'në'n lëjt, zi'cgajczi tijb na rusni's rniaj tää xi'n. <sup>8</sup> Abi' guial tant rayënan lëjt, ad tijbtzi xtiidx Dios baneen lojdi, në dux guialnabanan bayënan naneen por lëjt, guial tant rayënan lëjt. <sup>9</sup> Abi' lëjt ragbee compniar, guial dád baguieenan dxiin. Dxej guiaal baguieenan dxiin, chitëë yalu'n xchiindi guial güüdi dunujn yudar yabajnan la'tgaj balüün lëjt xtiidxza'c Dios.

<sup>10</sup> Lëjt në Dios ragbee chaaw guial chi badxu'në'n lëjt, babajnan xnejz zi'c rayal, abi' achet chile' gudxiibidi du guiycan, lëjt bén rililadx ree Jesucrist. <sup>11</sup> Lëjt ragbee xhienaag baneen lëjt consejw, xhie tää naag balu'n luxdoodi zi'c rüjn tijb dad con ree xi'nman. <sup>12</sup> Ma banan lojdi din guibandi zi'c rayal guiban bén ma naj ree xbejn Dios, bén rbejdx lëjt din yayalidi xanyabaa lod rniabeeman.

<sup>13</sup> Zeel në dunujn ad racwëëzt radëen quixtëë loj Dios, guial chi biguiejndi xtiidxaman ni banan lojdi, bidxga'di laan zi'c xtiidx Dios ad zi'ctzi xtiidx bénguidxliuj. Abi' diidx guin ree naj ni rusni xquiarguiejndi, lëjt guial rililadxidi Jesucrist. <sup>14</sup> Abi' lëjt compniar raliduladx ree laaman, ma guzajquidi zi'c guzac ree xbejn Dios, bén Israel zojb ree niz Judea, bén rililadx ree Jesucrist. Din zi'cgajc basagdiaj ree bén ladxidi lëjt, ziangajc basagdiaj lasa' bén Israel reeman laa reeman. <sup>15</sup> Abi' tää ree bén Israel bagüjt reeman Dad Jesús, zi'cgajc bagüjt reeman bén badëëd ree xtiidx Dios loj ree bejn, balaagdxa tää reeman dunujn, ad rüjnt reeman zi'c rën Dios, abi' contzi gra bejn rdxe'ch reeman. <sup>16</sup> Rudxoon reeman yalüün bén ad najt ree bén Israel xhienaag gac reeman perdon, zian laagajc reeman cutioob guiyc xtol reeman, abi' yan ma cadëd reeman xcastiro' Dios.

### *Guyën Pab niejman Tesalónica stijb*

<sup>17</sup> Compniar raliduladx ree Jesucrist, chi basa'nän lëjt tio'p choondxej, majsi ad raguiaatan lëjt, per rasaaduladxan lëjt, abi' rayën nejzdoon yaguiaan lëjt stijb. <sup>18</sup> Dád bayënan nudganajn lëjt. Naj Pab, zien volt da't guyënan nidganen

lëjt, per badxoon xindxab niajc zian. <sup>19</sup> Per yan sta rayënan yudganajn lëjt, din ni ralëjzan naj guial lëjt ragu' du luxdoon zagdxë. Lëjt naj dux chiinan ni rabaanë'n yubiignë'n loj Dad Jesucrist chi gui'taman stijb. <sup>20</sup> Lëjt naj bën rabaanë'n rlies tëëdi dux valoran.

### 3

<sup>1</sup> Zeel chi badxu'n luguiedx Atenas, ad radaantran, ma rayënan yayagbeen xhienaag za'di, dxel baguieenan xgab baya'n du xtijban ni. <sup>2</sup> Abi' baxhaal dux compniaran Timoteo, bën cayguieennë'n xchiin Dios caytie'chan xtiidxza'c Jesucrist, din yagu'man luxdoodi sudxi'chidi loj ni ma rliladxidi, <sup>3</sup> din ni'qui tijbidi ad zalenya't por ree guialzi ni cadëdidi, lëjt ragbee guial zian yaza'c ree. <sup>4</sup> Chi badxu'në'n lëjt, banan guial dád zien loj guialzi yadüüd ree, abi' lëjt ragbee guial laan naj ni ma gojc. <sup>5</sup> Zeel ad gudaantran, abi' guxhalan Timoteo din gagbeen xhienaag zinalidi ni rliladxidi, din rdxeban gusquiee xindxab lëjt, abi' achetri sirv nünj ni baguieenan por lëjt.

<sup>6</sup> Per yan ni ma baguiaad Timoteo ni bidganajman lëjt, ma bagojnman dunujn guial zinalidi zagdxë ni rliladxidi Jesucrist në zi'c rën lasa'di. Laaman na guial zianczi yu' luxdoodi zagdxë rasaaladxidi dunujn, abi' dád ma rëndi guguaadi dunujn, zi'cgajc rayënan yaguaan lëjt. <sup>7</sup> Zeel, compniar raliduladx ree Jesucrist, majsi graloj tarbajw në guialzi caydüüdan, per dád nix yu' du luxdoon raguiejnan guial zagdxë zinalidi ni rliladxidi. <sup>8</sup> Abi' yan mazri nix ma bayu du luxdoon guial ma bayagbeen za'dxi'chquidi loj ni zinalidi xnejz Dad Jesucrist. <sup>9</sup> Dxel xt ni'quid radxejltan xhienaag yadëën quixtëë loj Dios por lëjt, guial dád nix yu' du luxdoon lojman por lëjt. <sup>10</sup> Dxej guiaal radi'n ranaaban lojman din guneeman mod yudganajn lëjt, abi' lox yanan lojdi ni ryaadx gagbeedi xcwent guial rliladxidi Jesucrist.

<sup>11</sup> Dux Dad ree Dios në Dad Jesucrist gagnë dunujn din gac yudganajn lëjt. <sup>12</sup> Abi' Dad Jesucrist gagnë lëjt din gusnuu guiën lasa'di mazri, guiën tëëdi gra lasa' bejnđi zi'c rayënan lëjt. <sup>13</sup> Laaman gagnë lëjt sudxi'chidi loj xnejz Dios din sudi naya sin dol lojman, dxej ni gui't Dad Jesucrist stijb con gra ree xbejnman.

### 4

#### *Zi'c rën Dios guiban ree xbejnman*

<sup>1</sup> Yan, compniar raliduladx ree Jesucrist, raza'can lëjt li-aadx, rana tëën lojdi por laaman, guial zi'c nabandi yan zi'c



ma balüün lëjt guibandi, din güündi zi'c rën Dios, gol been naguiejn gol basnuu mazri guibandi zi'c rënman.

<sup>2</sup> Din lëjt ma ragbee gra ni guxhaal Dad Jesús dunujn yanan ni güündi. <sup>3</sup> Ni rën Dios naj guial guibandi naya lojman, guial ad güündi nidxuudx ree con ree bén ad najt lacheelidi. <sup>4</sup> Gol gogbee guial tijbgaj lëjt rayal guibannë lacheelidi zagdxe zi'c rën Dios con respejt, <sup>5</sup> ad chu' lacheelidi naabzi par grii xgustidi zi'c rüjn ree bén ad nünbeet Dios. <sup>6</sup> Ni'qui tijbidi ad rayalt güünnaladx lasa'di, gusquiee lasa'di güündi xhie nidxuudx con lacheel reeman. Din dux Dad ree Dios zudëëdaman casti gra ree bén rüjn zian, zi'c ma banan lojdi zi'c ma bagojnan lëjt. <sup>7</sup> Din Dios ad gurejdxaman dunuj ree yayajc ree xbejnman par yabajn ree nadxuudx, gurejdxaman dunuj ree par yabajn ree naya. <sup>8</sup> Zeel bén ad ridxga't ni ma banan lojdi, ad bénguidxliujtan ad ridxga'taman, Diosan ad ridxga'taman, bén razaladx xSprijt duloj ree.

<sup>9</sup> Yan, xcwent guial guiën lasa'di, ad ryaadxt yanan lëjt xhienin xcwentan, din lëjt gajc ma basiid por Dios xhienaag guiën lasa'di, <sup>10</sup> abi' laan naj ni cayüjndi con gra dux compniar ree bén rliladx ree Jesucrist niz Macedonia. Per raza'can lëjt liaadx din gusnuu guiën lasa'di mazri. <sup>11</sup> Gol been tëë naguiejn guibannë lasa'di zagdxe, gol guyu xgab xchiindi, zi'c ma ranan lojdi güündi dxiin, <sup>12</sup> din guibandi zagdxe loj ree bén ad rliladxt Jesucrist në chitëë xhie guiyaadxidi.

### *Ni gac chi gui't Dad Jesucrist*

<sup>13</sup> Yan, compniar raliduladx ree Jesucrist, ad rayëntan guibandi sin guial gagbeedi xcwent ree bengüt, chitëë chu'nayadi zi'c ree bén ad rliladxt Jesucrist. <sup>14</sup> Din bal raliduladx ree guial güjtaman abi' babanman stijb, ziangajc raliduladx ree guial ree bén ma güjt, bén bililadx ree laaman, yasban Dios laa reeman por Jesucrist.

<sup>15</sup> Zeel zi'c ma rayignia'n xtiidxaman, dunujn rana lojdi guial gra ree xbejnman, bén sta naban ree chi gui'taman stijb, ad zanedt reeman loj ree xbejnman bén ma güjt ree. <sup>16</sup> Din dxejzii guiguien cha' bén rniabee xhienaag gac, guiguien cha' anjl rniabee ree anjl, guiguien guibejdx xtrompejt Dios. Dxel guiat Dad Jesucrist diizd xanyabaa, abi' yaløj ree xbejnman bén ma güjt ree yaban stijb. <sup>17</sup> Guiáad dux compniar ree bén sta naban ree dxejzii, yadxaag ree con ree bén baban guin, dxel yo' ree ladya loj ree zaj lod yadxaag ree Dad Jesucrist. Zian yo' ree yuchu'në' reeman tiblayaa. <sup>18</sup> Zeel gol bagu' luxdoo lasa'di con ree diidx guin.

## 5

<sup>1</sup> Yan, compniar raliduladx ree Jesucrist, xhie dxej gac zian o goc gac zian ya, ad rüjnt naguiejn ganinan lëjt. <sup>2</sup> Din lëjt ragbeechaaw guial zi'cgajczi ri't tijb béngubaan guxin, chi achut rbëz laaman, zian guidxin dxej gui't Dad Jesucrist stijb. <sup>3</sup> Chi guiëb ree bejn: “Zagdxe zio' ree, achet gac”, dxel dxejczy gui't gualzi par laa reeman ni ad zariit reeman loj, zi'c chi rdxin hor ragnaa lën béngunaa chi ma gal xi'nman. <sup>4</sup> Per lëjt compniar, ad zëtridi loj nejzmal din guiniaaz dxej ni gui't Dad Jesucrist lëjt zi'c chi ri't tijb béngubaan. <sup>5</sup> Din graczidi ma zinal Dios, zinalidi xnejzaman, nejz nayni. Ad zunaalt ree nejz mal, nejz nacay. <sup>6</sup> Zeel ad najt guial yabajn ree zi'c tijb bénaayëjs, zi'c rüjn los demazri ree bejn, rayal yatie'ch dux bacaal ree, yadxu' ree nadëdguiendxuj. <sup>7</sup> Bén zinal ree nejzmal zi'c tijb bénaayëjs, zi'c tijb bengu', zian zinal reeman nejz guin. <sup>8</sup> Per dunuj ree, guial ma zunaal ree xnejz Dios, guidib tiamp naj guial yabajn ree nadëdguien. Yadxu'dxi'ch ree loj gualrliladx ni ma raya'p ree në loj ni rën Dios dunuj ree, abi' yadxu'dxi'ch tée ree në loj ni ma raliduladx ree guial ma raya'p ree perdon. Abi' zi'c tijb xin suldad yu' xcascwix ni rutëë yaya'p tée reen zi'c tijb ni gutëë dunuj ree loj ni mal <sup>9</sup> Din ad gurejdx Dios dunuj ree par yayal ree xcastiman, gurejdxaman dunuj ree din yayal ree perdon por Dad Jesucrist, <sup>10</sup> bén güt por dunuj ree, din majsi nabajn ree o ma bayëjt ree chi gui'taman stijb, per yo' ree yuchu'në' reeman. <sup>11</sup> Zeel gol bagu' luxdoo lasa'di gol been tée yudar lasa'di din gagbeedi mazri xtiidx Dios zi'c ma cayüjndi.

*Ni rayal güün ree bén rliladx Jesucrist*

<sup>12</sup> Compniar raliduladx ree Jesucrist, raza'can lëjt liaadx, gol gojp respejt bén rusiid ree lëjt xtiidx Dios, bén rulüü ree lëjt rnieenë tée reeman lëjt xhienaag chinalidi Jesucrist. <sup>13</sup> Gol gojc benza'c da't con laa reeman, gol guyën da't reeman por dxiin cayüjn reeman. Gol gubajnnë lasa'di zagdxe.

<sup>14</sup> Ranaab tëen lojdi compniar, gol guneenë ree bén ad rënt güün dxiin, gol bagu' luxdoo ree bén ralenya'në xnejz Dios, gol been tée yudar bén ad za'dxi'cht ree loj xnejzaman, gol gojp pacens gra reeman.

<sup>15</sup> Gol been naguiejn ad güündi ni mal bén rüjn ree lëjt ni mal, zagdxeli gol gojc benza'c con lasa'di në con gra ree bejn. <sup>16</sup> Gol badxe' luxdoodi zagdxe zianczy. <sup>17</sup> Ad gucwëez cwedx guiniabidi Dios. <sup>18</sup> Gol badëë quixtëë lojman por gra, din zian rënman güündi, lëjt najdi xbejn Jesucrist.

<sup>19</sup> Ad rbexuudi nabee xSprijt Dios lëjt. <sup>20</sup> Gol bidxga' ni rniee ree bén rudëed xtiidxaman. <sup>21</sup> Yaloj xgaj gol gogbee zagdxe

xhietëëznin, dxel gol been ni naj zagdxe. <sup>22</sup> Gol gubi'ca loj gra ree ni mal.

<sup>23</sup> Dios, bén rabe'cdxe luxdoo bejn, laaman gagnë lëjt din gaquidi lojman naya guidiblagaa. Laaman gagnë xcuerpidi, gagnëman xsprijtidi në guidibлагаadi din gaquidi nayadxuj lojman dxej gui't Dad Jesucrist. <sup>24</sup> Abi' Dios güün zian, din laaman, bén rbejdx dunuj ree par güünman dunuj ree xbejnman, rüjn xtiidxaman cumplid.

*Diidx bigra ca ree loj gui'ch guie*

<sup>25</sup> Compniar raliduladx ree Jesucrist, gol gurejdx gunab Dios por dunujn. <sup>26</sup> Gol badëë xtiidx Dios da cwentan loj gra ree compniar rliladx Jesucrist. <sup>27</sup> Abi' por laaman, naj rni lojdi rniabee tëën lëjt: Gol biil gui'ch guie loj gra ree compniar rliladx laaman. <sup>28</sup> Dux Dad ree Jesucrist güünle' lëjt.

## Gui'ch barojp guxhaal San Pabl loj ree b́en Tesalónica rliladx Jesucrist

<sup>1</sup> Naj, Pab con Silvan në Timoteo, cayxhaalan gui'ch guie par lějt rliladxidi Jesucrist luguiedx Tesalónica, lějt najdi xbejn dux Dad ree Dios në xbejn Dad Jesucrist. <sup>2</sup> Dux Dad ree Dios në Dad Jesucrist güünle' lějt yabe'cdxe tēē reeman luxdoodi.

### *Rudēēd Pab quixtēē loj Dios*

<sup>3</sup> Guixie guixie radēēn quixtēē loj Dios por lějt compniar raliduladx ree Jesucrist, din zian rayal yaguieenan guial mazri cusnuu rliladxidi laaman, abi' tijb gajdi mazri ma rēn lasa'di. <sup>4</sup> Zeel dád nix yu' du luxdoon raza'tan lějt loj gra ree xbejn Dios, raguie'chan loj reeman pacens ni rajpidi në guialrliladx ni rajpidi, rdaan tēēdi gra ree ni rüjnnē ree bejn lějt në gra ree guialzi ni cadēdidi. <sup>5</sup> Zian rguien xnejz naj xguialguxtis Dios, guial gulejman lějt din yayalidi lod rniabeeman, din por laan cadēdidi guialzi.

<sup>6</sup> Abi' guial gra ni rüjn Dios naj xnejz, zeel gudēēdaman casti gra ree b́en cudēēd lějt casti. <sup>7</sup> Guiáad lějt cadēdidi guialzi yan, guneeman lějt guialraziiladx con dunujn, dxej ni gulüüloj Dad Jesucrist diizd xanyabaa galay xbianiman ni naj zi'c bajl, con ree xianjlanan b́en ca' ree mazri guialrniabee. <sup>8</sup> Dxel gudēēdaman casti b́en ad bayagbeet ree Dios, b́en ad guyēnt ree nuzoob xtiidxza'c Dad Jesucrist. <sup>9</sup> Gudēēdaman laa reeman casti tiblayaa, su reeman zijt par Dios në par xguialrniabee za'cdxoonman. <sup>10</sup> Zian gac dxej ni gui't Dad Jesucrist, din guza't ree bejn laaman zagdxe por ree xbejnman, yadxa tēē loj gra reeman laaman, abi' në lějt, din ma bililadxidi xtiidxaman ni badün lojdi.

<sup>11</sup> Zeel ad racwēēzt rarejdx ranaaban Dios por lějt din gagnēman lějt guibandi zi'c rayal, zi'c guredxaman lějt guibandi. Ranaab tēēn lojman guial con xguialrniabeeman gac cumplid gra xixgabzagdxeđi në gra ni rüjndi guial rliladxidi laaman. <sup>12</sup> Abi' zian guiliesidi xvalor Dad Jesucrist, guiáad laaman guilies xvaloridi guial laaman con dux Dad ree Dios rēn reeman dunuj ree.

## 2

### *Gulüüloj b́en ca' xguialrniabee xindxab*

<sup>1</sup> Yan, compniar raliduladx ree Dad Jesucrist, xcwent guial gui'taman stijb në guial yadxaag ree con laaman, raza'can lějt liaadx, <sup>2</sup> ad bal tiēbidi tibrajtzi gusquiee ree bejn lějt, b́en rēb

ree ma bidxin dxej gui't Dad Jesucrist. Ad guidxebidi gucaag-diajguidi zian, o na ree bejn guial tijb sprijt rëb loj reeman zian, o dunujn baxhaal gui'ch loj reeman lod raguie'chan zian. <sup>3</sup> Ad tiëbidi chu gusquiee lëjt, din chi gad dxej guin guidxin, yalojxgaj guidxin ree dxej ni ad zuzoobtri bejn xtiidx Dios. Abi' gulüüloj tijb bën güün ganax ni rën xindxab, bën ma naj par gabijl. <sup>4</sup> Laagajc laaman guilies xvalor, abi' yalenman gra ni nünbee bejn zi'c Dios në gra ni rniajchi' bejn zi'c dios, xt cweman lën xyadoo Dios, abi' guiëbaman guial laaman naj Dios.

<sup>5</sup> Gol basaaladx guial zian rnin lojdi chi guzunë'n lëjt. <sup>6</sup> Abi' yan lëjt ma ragbee chu cutëe chitëe gulüülojman, la'tgaj guidxin dxej rayal gulüülojman. <sup>7</sup> Ma cayajc ree xgabmal guin, per yu' bën cutëe gac reen cumplid. Chi ma bisüd bën cutëe guin, <sup>8</sup> dxel gulüüloj benmal guin, abi' Dad Jesucrist con tijbzi gulüjbaman gugüjtaman laaman, dxel con xbianiman ni guidnëman gunidlojman laaman. <sup>9</sup> Benmal guin por xindxab gui'taman, abi' dád gapaman gualrniabee. Güünman zien ree ni yadxaloy ree bejn, güün tëeman zien ree milagr par gusquieeman. <sup>10</sup> Con graloj ree ni mal gusquieeman bën canijt ree loj Dios, guial ad guyënt reeman ad cwëjb tëet reeman nililadx reeman ni diidxli zile' nuslaa laa reeman loj dol. <sup>11</sup> Zeel ruslaa Dios gusquiee gra ree ni guin laa reeman, abi' guililadx reeman ni ad najt ni diidxli, <sup>12</sup> din yayal gra reeman casti, guial ad bililadxt reeman ni diidxli guin, din mazri bayuladx reeman been reeman ni mal.

### *Sudxi'ch reeman loj ni rliladx reeman*

<sup>13</sup> Compniar, rën Dad Jesucrist lëjt. Zianczi rayal yadëen quixtëe loj Dios por lëjt, din diizd guia'xchej ma bacaabeeman lëjt din laadi loj casti, guial ma nayadi por xSprijt Dios në guial ma bililadxidi ni naj diidxli. <sup>14</sup> Par zian gurejdx Dios lëjt gaquidi xbejnman chi badün xtiidxza'c Dad Jesucrist lojdi, din yayalidi xanyabaa lod za'man.

<sup>15</sup> Zeel, compniar raliduladx ree Jesucrist, gol guzujdxi'ch gol binal tëe ni balüün lëjt chi badxu'në'n lëjt, në ni ma banan lojdi loj gui'ch ren. <sup>16</sup> Abi' Dad Jesucrist gajc në dux Dad ree Dios bën rën dunuj ree, bën ragu' du luxdoo ree zianczi, bën banee tëe ni ralëjz ree guial najman benza'c, <sup>17</sup> laaman yagu' luxdoodi gagnë tëeman lëjt din sudxi'chidi din gra ni guinieedi güün tëedi gac zagdx.

## 3

### *Rën Pab cwedx guiniab reeman Dios*

<sup>1</sup> Yan, compniar raliduladx ree Jesucrist, gol gurejdx gunab Dios por dunujn din diob guire'ch xtiidx Dad Jesucrist gralad,

abi' guza't reeman xtiidxaman zagdxe zi'cgajc beendi. <sup>2</sup> Gol gurejdx gunab tēēman din yabēēman dunujn loj ree benmal, loj ree bendxuudx ad nabant xnejz, din ad grat bejn rliladx xtiidx Dad Jesucrist. <sup>3</sup> Per laaman zianczi rūjn xtiidxaman cumplid, abi' laaman gagnē lējt din sudxi'chidi, guinia tēēman lējt chitēē güüнди ni mal. <sup>4</sup> Dunujn rayagbeechaaw guial laaman cayagnē lējt cayūjndi gusnuu tēē güüнди ni banan lojdi. <sup>5</sup> Gagnēman lējt din guiēndi bejn ree zi'c rēn Dios laa reeman gap tēēdi pacens zi'c gojp Dad Jesucrist pacens.

*Rūjn naguiejn güün bejn dxiin*

<sup>6</sup> Yan, compniar raliduladx ree Jesucrist, por laaman ranabeen lējt: Gol bariica loj chutēēz compniar gaz za' ad rēnt güün dxiin, bēn ad naban tēēt zi'c balūün lējt. <sup>7</sup> Din lējt ragbee xhienaag guibandi din guibandi zi'c nabajnan. Dunujn ad badxu'nē'tan lējt sin guial naguieenan dxiin, <sup>8</sup> achu tēēt banee xlia' ni badaawan. Lējt ragbee guial dād baguieenan naguiejn baguieenan dxiin, dxej guiaal baguieenan dxiin chitēē yalu'n xchiindi guial güüнди dunujn yudar din gac yabajnan. <sup>9</sup> Majsijajc nanabeen lējt nūjndi dunujn yudar, per baguieenan dxiin par yalūün xhienaag rayal guibandi güüнди zi'c raguieenan. <sup>10</sup> Chi badxu'nē'n lējt, ranan lojdi: Bēn ad rēnt güün dxiin, ad zajw gajctaman. <sup>11</sup> Per yan baguiejnan guial yu'di gaz za' ad rēntidi güüнди dxiin, abi' rudi loj ni ad rayaltidi. <sup>12</sup> Par bēn zii ree dunujn rana ranabee tēēn laa reeman por Dad Jesucrist yabedxe reeman, güün reeman dxiin din guiban reeman.

<sup>13</sup> Guiáad lējt compniar, ad yalenyadi güüнди ni naj zagdxe. <sup>14</sup> Bal yu' tijbidi ad ruzoobt diidx guial güüнди ni ranan loj gui'ch guie, gol baguiaa chu benan, ad guchajg tēēdi laaman din yatu lojman. <sup>15</sup> Per ad guguiaadi laaman zi'c tijb bēn rdxe'chidi, gol baguiaaman zi'c tijb bijchidi, gol guneenēman din guibanman zagdxe.

*Diidx bigra ca ree loj gui'ch guie*

<sup>16</sup> Dad Jesucrist bēn rabe'cdxe luxdoo bejn, laaman yabe'cdxe luxdoodi guixie guixie nē loj gra. Laaman sunē lējt.

<sup>17</sup> Naj, Pab, quijb naj cuca ree lejtr guie par gugajpdiozan lējt. Zian rūnan con gra ree da gui'chan, zian naj ree da lejtran.

<sup>18</sup> Dad Jesucrist güünle' gradi.

## Gui'ch yaløj guxhaal San Pabl loj Timoteo

### *Rugajpdioz Pab Timoteo*

<sup>1</sup> Naj Pab, najn tijb xiapóstol Jesucrist por xguialrniabee Dios bèn rüjn perdon dux tol ree në por Jesucrist bèn rayagbee ree gui't stijb. <sup>2</sup> Cuccan gui'ch guie par lüj Timoteo, din par naj lüj naj zi'cgajc da xi'nann guial tiblojzi raliduladx Jesucrist. Dux Dad ree Dios në Dad Jesucrist güünle' lüj, yayaman lüj yabe'cdxe tëëman luxdool.

### *Rëb Pab loj Timoteo xcwent ree bèn rusquiee*

<sup>3</sup> Zi'c rnin lojl chi briin za'n niz Macedonia, guial yaya'nlgüedx Éfeso din nabeel tio'p choon ree bejn ni chitëë rulüü reeman bejn ree ni ad najt diidxli. <sup>4</sup> Ad chililadx reeman ni rbëëguijc ree bejn, ad guidxga' tëë reeman ban za reeman, o chu rajc reeman xbengol gulal reeman, din ad ni guint ree gagnë laa reeman par gusnuu chililadx reeman xtiidx Dios.

<sup>5</sup> Canabeen lüj din güün reeman zian din guiguien guial diidxli rën lasa' reeman, achet naladx reeman din guiguien tëë guial guidib luxdoo reeman rliladx reeman xtiidx Dios. <sup>6</sup> Din yu' reeman ad rüjntri zian guial ganax ree ni ren ni ad rüjnt ree sirv rü reeman. <sup>7</sup> Rën reeman gulüü reeman bejn ree xhienaag naj xley Dios, abi' ni'qui laa reeman ad ragbeet xhie rën guiëb ni rniee reeman ni'quid rignia't reeman ni naladx reeman naj zagdx culüü reeman bejn ree.

<sup>8</sup> Dunuj ree rayagbee guial zagdx naj ley guin par bèn rignia' xhie sirv rüjnan. <sup>9</sup> Abi' rayagbee ree guial ad baneet Dios ley guin par ree bèn naban xnejz niz lojman, baneeman ley guin par tëd ree bejn casti, bèn naban ree zi'ctzi naj xixgab reeman, bèn ad ruzoobt ree diidx, bèn ad yu'guijct ree Dios, bèn rüjn ree dol, bèn ad rajpt ree Dios respejt, bèn ad rüjnt ree naguiejn guiën reeman Dios, bèn rugüjt xdad xniaa, në par gra ree bèn rugüjt bejn, <sup>10</sup> rüjn tëën sirv par xcasti ree bèn za'në xinguaaw o búngunaa ren, par ree xin ruladx lasa' xinguaaw gajc o búngunaa ruladx lasa' búngunaa gajc, në par ree bèn rban bejn ree par guto' reeman laa reeman zi'c mojs, nëtëë par ree bèn rusquiee në ree bèn ruza't Dios par sudxi'chnë xguialrusquiee reeman në par gra ree bèn rüjn xcontr ni naj diidxli. <sup>11</sup> Diidxli guie ree naj ni zëed ree loj xtiidxza'cdxoon Jesucrist. Dux Dad ree Dios, bèn rayal respejt, laaman naj bèn basa'nnë naj diidx guin ree din gatiechan laa reen.

*Xhienaag baya Dios Pab*

<sup>12</sup> Quixtëe Dad Jesucrist laaman cayagnë naj, rajp tëeman naj confianz abi' bacaabeeman naj par gatiechan xtiidxaman, <sup>13</sup> majsi yaløj gunen laaman diidxguijdx abi' guzunaalan bën rliiladx ree laaman din gūnan laa reeman ni mal abi' dád naya bennë'n laa reeman. Per Dios bayaman naj guial ad bignia'tan ni cayūnan din gad naj chililadx Jesucrist. <sup>14</sup> Abi' dád benza'c gojcaman con naj, balüüman naj xhienaag chililadxan balüü tëeman xhienaag guiënan Dad Jesucrist.

<sup>15</sup> Diidxli ni ganin lëjt, rayal chililadx bejn: guial Jesucrist bi't loj guidxliuj par gūnman xtol bejn perdon, abi' loj gra ree bejn naj naj mazri bëndol. <sup>16</sup> Per majsi najn mazri bëndol, baya Dios naj abi' gojp Jesucrist naj pacens din gagbee ree bën chililadx xhienaag rajp Jesucrist pacens par chililadx bejn xtiidxaman, abi' zian gap reeman guialnaban tiblyaa con Dios. <sup>17</sup> Zeel zianczi rayal yaya'p reeman respejt yaza't tëe reeman zagdxe guial najman rey bën ad yu't dxej guiët, abi' rajpaman guialrniabee par tiblyaa guial tijbzi laaman naj Dios abi' achut rajc ruguiaa laaman. Amén.

<sup>18</sup> Timoteo, par naj lüj naj zi'c da xi'nān zeel rnin lüj been zi'c gunee reeman xcwentil diizd yaløj, abi' zi'c tijb suldad ni rej loj wadijl ad guidxebil niz loj ree bën za' ree contr xtiidx Dios. <sup>19</sup> Guzudxi'ch loj ni rliiladxil Jesucrist, been tëe ganaxzi ree xgab zagdxe par gūnl zi'c rayal. Din yu' ree bejn guial ad rüjnt reeman zian, yan ma bānijt reeman ni rliiladx reeman Dios. <sup>20</sup> Zian ma guzajc ree Himeneo con Lejandr, zeel ma bayūn laa reeman loj satanás din gusiid reeman guial ad rayalt guinee reeman Dios diidguijdx.

**2***Xhienaag cwedx guiniab bejn Dios*

<sup>1</sup> Yaløjdoon ni rnin lojdi naj guial cwedx guiniabidi Dios, cwedx guiniabidi laaman por gra ree bénguidxliuj, gudëed tëedi quixtëe lojman. <sup>2</sup> Rayal yarejdx yanaab ree Dios por ree rey nē por gra ree guxtis loj guidxliuj din chile' yabajn ree zagdxe gusnuu tēe yabajn ree zi'c rēn Dios. <sup>3</sup> Din laan naj ni zagdxe ni rayuladx tēe dux Dad ree Dios, bën rüjn perdon dux tol ree, <sup>4</sup> bën rēn guial gra bejn gac perdon guidxin tēe dxej gagbee bejn xhie rēn guiëb xtiidxliiman. <sup>5</sup> Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial bi'taman loj guidxliuj zi'cgajc tijb bénguidxliuj. <sup>6</sup> Güjtaman loj crüzj persi gudijxaman por xtol gra ree bénguidxliuj, zian naj ni balüü Dios bejn chi bidxin dxej bacaabeeman gac zian. <sup>7</sup> Zeel bacaabeeman naj gacan xi apóstol Jesucrist din gatiechan xtiidxaman, nē par gusidan



bén ad najt ree bén Israel conin naj diidxli, xhie tää naag chililadx reeman Jesucrist, walin ad rusquieetan.

<sup>8</sup> Yan rēnan guial guidibczi cwedx guiniab ree xinguaaw Dios, guilies yaa reex con guidib luxdoo reex sin dol, sin guial-rdx'e'ch nē sin wadijl. <sup>9</sup> Rēn tēen guial ree béngunaa su reeman zi'c rayal, ad tēdlaj suchaaw reeman con or, nē ree perl nē ree vistid zagdx'e o guial tēdlaj güünchaaw guidxguijc reeman. <sup>10</sup> Din mazri zagdx'e güün reeman ni naj zagdx'e, zi'c rayal güün ree béngunaa ni ma zinal xnejz Dios. <sup>11</sup> Abi' rayal gucaag-diajgzi reeman ache guiniee reeman chi rulüü ree xinguaaw xtiidx Dios. <sup>12</sup> Din ad zatiēēbtan guial gulüü tijb béngunaa bejn ree chi radxaag lasa' reeman par gucaagdijg reeman xtiidx Dios, ad rayalt nabee béngunaa xinguaaw, rayal gucaagdijgzaman. <sup>13</sup> Din Dios, yaløj Adán beenchaawaman, dxelri Eva. <sup>14</sup> Din ad Adánt basquiee reeman, yaløj Eva basquiee reeman, abi' por guialrusquiee guin beenman dol. <sup>15</sup> Per zajc gac béngunaa perdon, bal güün xchiinman zagdx'e guial najman na, bal gusnuu chililadxaman Dios, guiēnman bejn ree guiban tēēman xnejz.

### 3

#### *Xhienaag guiban ree bén rniabee*

<sup>1</sup> Gol badxe'guijc da diidxan: Bal chu bén rēn gap guial-rniabee loj gra ree bén rliladx Jesucrist par gulüüman laa reeman xnejz Dios, zagdxequi naj ni rēnman güünman. <sup>2</sup> Per bén rajp guialrniabee guin rayal güünman zi'c rayal chitēē chu guinieeguijdx laaman. Rayal chu' tijbzi lacheelaman, guibanman zagdx'e chu' tēē xquiarguejnman din gap ree bejn laaman respejt. Gacaman benza'c con ree bén rdxin lidxaman, gac tēēman tijb bén rignia' par gulüüman bejn ree. <sup>3</sup> Ad rayalt gacaman bengui', ni'qui bén rguuil wadijl ad rayal tēēt yaguiilaman mod par tia'man xmilia ree bejn, rayal gacaman benza'c con chutēēz, gac tēēman bén naxanladx ad zazēēbladx tēētaman milia. <sup>4</sup> Rayal nabee lidxaman zi'c rayal din gulüü ree xi'nman xhienaag gap reex respejt guzoob tēē reex diidx. <sup>5</sup> Din bal id rajc rniabee lidxaman, ¿xhieza naag nabeeman bén rliladx ree Jesucrist? <sup>6</sup> Zeel tijb bén qui guzulojri rliladx Jesucrist, ad rayalt nabeeman loj ree bén ma rliladx chitēē guilies xvalor gajcaman abi' yayalaman lasa' casti ni bayal xindxab. <sup>7</sup> Bén rajp guialrniabee guin xt ree bén ad rliladxt Jesucrist rayal güünbee laaman guial najcaman benza'c chitēē yaya'nxtuman abi' güün xindxab laaman gan.

*Ni güün ree bén rüjn yudar bén rniabee ree*

<sup>8</sup> Yan ziangajc ree bën ma cwabee par güün reeman yudar bën rniabee ree, rayal güün reeman zi'c rayal din gap ree bejn laa reeman respekt, güün cumplid xtiidx reeman, ad guië' tää reeman, ad yaguiil tää reeman mod par tia' reeman xmilia ree bejn. <sup>9</sup> Con xgabza'c chinal reeman ni ma balüü Dios dunuj ree. <sup>10</sup> Zeel yaløjxgaj rayal gac reeman prueb abi' bal id xhie xfalt reeman, dxel ma zile' guzuj bejn laa reeman din güün reeman yudar bën rniabee ree. <sup>11</sup> Ziangajc ree búngunaa ni ma cwabee par güün reeman yudar, rayal güün reeman zi'c rayal din gap bejn laa reeman respekt ad zaneeguijdx reeman bejn, rayal guiban reeman zagdxë abi' güün cumplid xtiidx reeman. <sup>12</sup> Abi' ree xinguaaaw cwabee guin par güün reex yudar bën rniabee loj ree xbejn Cristo, tijbzi lacheel reex rayal chu', nabee tää lidx reex con xi'n reex zi'c rayal. <sup>13</sup> Din bën rüjn ree sirv zi'c rayal ad respektzi rajp bejn laa reeman, sin gualrdxëb ma zile' guiëb reeman xhienaag rliladx reeman Jesucrist.

### *Naroob naj bën raliduladx ree*

<sup>14</sup> Gagnë Dios chile' guialan guidganan lüj. Per cucan gui'ch guie, <sup>15</sup> din bal gaglaan ma ragbeel xhienaag guiban bejn delant loj los demasri ree xbejn Dios, bën ma naj ree xbejn Dios naban, abi' za'dxi'ch reeman rulüü tää reeman xtiidxliman. <sup>16</sup> Dunuj ree rayagbee guial dád bën naroob najman, bën raliduladx ree:  
 Bi'taman loj guidxliuj zi'c tijb búnguidxliuj,  
 rëb xSprijt Dios guial laaman naj bën naya  
 abi' baguiaa ree anjl laaman bi'taman loj guidxliuj.  
 Bre'ch xtiidxaman loj ree bën ad najt bën Israel,  
 guidibczi bililadx bejn laaman abi'  
 baca' Dios laaman xanyabaa.

## 4

### *Bën rusa'n ree gualrliladx reeman Jesucrist*

<sup>1</sup> Ma bagojnchaaw xSprijt Dios guial zëed ree dxej ni yu' ree bejn gusa'n gualrliladx reeman Jesucrist, mazri guidxga' reeman xtiidx ree bën rusquiee në gra ree ni zëed por xindxab. <sup>2</sup> Mazri guidxga' reeman bën rusquiee ree, bën wed rüjnz ree, bën achetri ree rzajc guial rüjn reeman dol din ma naya' reeman zian. <sup>3</sup> Guiëb reeman guial ad najt guial guxhliaa ree bejn ad zajw tää reeman graloj. Per Dios badxe' graloj guialraw par gaw ree bën rliladx laaman, bën ma ragbee ree conin naj diidxli abi' gudëed reeman quixtëe lojman. <sup>4</sup> Din gra ni badxe' Dios naj zagdxë, achet ni rayal cwexuu bejn tia'man bal gudëeman quixtëe chi cayawaman laan. <sup>5</sup> Din chi rarejdx

ranaab ree Dios con xtiidxaman rüjnle'man guijc ni yadaaw ree.

### *Bén rüjn sirv zagdxe loj Jesucrist*

<sup>6</sup> Zeel bal rulüül bén rliladx ree Jesucrist zi'c ma rnin, dxel cayüjnquil sirv Jesucrist zi'c rayal, abi' zian gusnuu gusiidil mazri guial loj ni ma rajquil xcwent guialrliladx guin nē ree diidxza'c ni zinalil. <sup>7</sup> Per ad guidxga'l ni rbēēguijc ree bejn, ni ad najt ree diidxli por Dios, mejorli basnuu basiid sudxi'chil guibanl zi'c rēn Dios. <sup>8</sup> Zagdxe naj par güün bejn graløj ejercijs par gacaman gojl, per loj gra xhietēēznin mazri lasajc guiban bejn zi'c rēn Dios. Din ad lojtzi guidxliuj guie güün sirv guial naban bejn zi'c rēn Dios, nēgajc xanyabaa lod gap bejn guialnaban tiblayaa. <sup>9</sup> Dunuj ree rayagbee guial ni diidxli naj ree diidx guie, abi' rayal chililadx gra bejn laan. <sup>10</sup> Zeel majsi cayza'can ni cayza'can, per cayguieenan ni cayguieenan guial raliduladxan Dios naban, bén naban par güünman yudar gra ree bejn, per mazri bén rliladx ree laaman.

<sup>11</sup> Zian rayal gusiidil bejn ree güjdx tēē loj reeman din güün reeman zian. <sup>12</sup> Gojp cudad chitēē guiēb ree bejn guial achet sirv lüj guial ad wayajctil bengol. Mejorli been naguiejn din gaquil tijb ejempl par ree bén rliladx Jesucrist, zi'c xhienaag rül diidx, zi'c nabanl, zi'c rēnl ben ren ree, zi'c rliladxil Dios nētēē por ree xixgabza'quil. <sup>13</sup> La'tgaj guialan, basnuu biil xtiidx Dios loj ree bejn, guneenē reeman balüü tēē reeman xhie rēn guiēb xtiidx Dios. <sup>14</sup> Ad yayanladxil güünl zi'c rayal güünl por quiarguiejn ni banee Dios lojl chi badxiib yaa ree bengol guijqul chi gogbee reeman guial lüj naj bén gule Dios.

<sup>15</sup> Badxe'guijc diidx guie ree din gagbee gra ree bejn guial cusnuu zēl delant. <sup>16</sup> Gojp lüj con ni rusiidil bejn ree. Guzujdxi'ch loj ni ma ragbeel, zian yabēē lüj gajc loj casti yabēē tēēl bén cucaagdiajg ree xtiidxil.

## 5

### *Xhienaag güün Timoteo con ree bén rliladx Jesucrist*

<sup>1</sup> Ad tilnēl tijb bengol, badēēman consejw zi'cgajc xdadil, abi' xin naj ree xinguiag, badēē reex consejw zi'cgajc bijchil. <sup>2</sup> Ziangajc béngunaa bengol ree badēē reeman consejw zi'cgajc xniaal, abi' biinguiag ree, badēē reem consejw zi'cgajc bizanl con xgabza'c.

<sup>3</sup> Bidxga' ree béngunaa bizējb ni diidxli achut rajp. <sup>4</sup> Per bal tijb béngunaa bizējb guin yu' ree xi'n o xiajg, dxel yaløj laa reex gusiid guidxga' xfamil, güün reex yudar din yaguijx reex ni baslaa xdad xniaa reex laa reex. Din zian naj zagdxe, zian tēē ruladx Dios. <sup>5</sup> Béngunaa naj diidxli bén bizējb, bén ad rajptri

chunin loj guidxliuj guie, tijbzi Dios naj Bén yu'guijcaman güün laaman yudar dxel ad rucwëët rbejdx rniabaman laaman dxej guiaal. <sup>6</sup> Per tijb béngunaa bizëjb ni rüjn ni rëntzi, laaman naj zi'c tijb bengüt guial ad yu'guijctaman Dios. <sup>7</sup> Bagojn gra ree diidx guie Bén ma rliladx ree Jesucrist chitëe chu guinieeguijdx laa reeman. <sup>8</sup> Din Bén ad rüjnt yudar xcompniar, abi' ni'qui xfamilaman Bén zojb ree lidxaman ad rüjntaman yudar, laaman ma basa'n ni rliladxaman abi' piorli najman guial loj ree Bén ad rliladxt Jesucrist.

<sup>9</sup> Ad tia'l laj chutëez béngunaa bizëjb par gac reeman yudar, naabzi ree béngunaa bizëjb Bén ma nadëd ree gayojn ijz abi' ad guzunëetaman ben ren la'tgaj naban lacheelaman. <sup>10</sup> Bal nünbee tëe ree bejn laaman guial beenman ganax ree ni rüjn sirv, bal baslaa ree xi'nman zi'c rayal, bal badëe lidxaman baya'n ree bejn bal gojcaman benza'c con ree Bén rliladx Jesucrist Bén bidxin ree lidxaman, bal beenman yudar Bén rzagdiaj ree, bal been tëeman naguejñ beenman ganax ni zagdxe.

<sup>11</sup> Per ad tia'l laj ree béngunaa bizëjb benguiag ree, din despuejs rën reeman guxhliaa reeman abi' ad rüjntri reeman ni rayal güün reeman por Cristo guial rën reeman guxhliaa reeman stijb. <sup>12</sup> Dxel rüjn reeman dol guial ad rüjntri reeman ni ma been reeman compromis con Cristo. <sup>13</sup> Abi' tëe ree benguiag guin zë reeman yu yu, zianz rajc reeman costumbr achetci rüjn reeman. Abi' ad laatzan, rzuloj ruza't reeman bejn, ru reeman loj xhietëeznin abi' rniee reeman ni ad rayalt guinee reeman. <sup>14</sup> Zeel rënan guial Bén naj ree béngunaa bizëjb benguiag, mejorli guxhliaa reeman stijb, chu' xi'n reeman nabee tëe lidx reeman zi'c rayal, chitëe gudëed reeman mod guinieeguijdx ree Bén ralen ree dunuj ree laa reeman. <sup>15</sup> Din yu' ree béngunaa bizëjb ma guro'nladx reeman xnejz Dios abi' ma zinal reeman xnejz xindxab.

<sup>16</sup> Abi' bal tijb Bén rliladx Jesucrist naj xfamilaman tijb Bén baya'n bizëjb, dxel laaman rayal güün yudar béngunaa bizëjb guin chitëe gacan mazri carg par ree dux compniar ree Bén rliladx ree Jesucrist. Zian güün reeman yudar béngunaa bizëjb diidxli achutri rajp loj guidxliuj guie.

<sup>17</sup> Bén rliladx ree Jesucrist rayal gap reeman respejt Bén rniabee laa reeman në ree Bén rniee ruluü tëe xtiidx Dios zi'c rayal, gudëe tëedi loj reeman gra ni ryaadx reeman. <sup>18</sup> Din loj xtiidx Dios rëb: “Ad gudxe'di guijxh ro' ree begui'xh la'tgaj cayüjn reeb dxiin”, rëb tëe loj xtiidx Dios: “Rayal gax Bén rüjn dxiin”.

<sup>19</sup> Ad guidxga'di ni rudxiib ree bejn guijc tijb ree Bén rniabee ree Bén rliladx Jesucrist, bal id yu' tio'p choon ree

bejn rēb guial diidxli naj ni rniee reeman por laaman. <sup>20</sup> Per bal tijb bēn ma ca' guialrniabee rusnuu rŭjnman dol, rayal guinieenēl laaman delant loj gra reeman din guidxeb los demazri reeman.

<sup>21</sup> Yan por Dios, por Jesucrist nē por ree anjl ni ma gulejman, naj rni badxe'guijc been tēē zi'c ma rnin ad cwel loj ree bejn, tiblojzi been con gra reeman. <sup>22</sup> Gojpcudad cwel tijb bēn ni nabee din ad ragbeetil bal yu' ni mal cayŭjnman, dxel gŭŭn ree bejn xgab guial nēgajc lŭj ruladx ni cayŭjnman. Gojpcudad graloj ree dol.

<sup>23</sup> Nē guial guiē't guiē't ragxuu lēnl guial ad nadaant lēnl, ad rē'l nijs lagajzi mejorli gu' tibda'n vin.

<sup>24</sup> Yu' reeman laa rguien gajc xhie dol cayŭjn reeman diidz chi gad reeman gudēēd cwent loj Dios, per yu' reeman ad rguient xhie dol cayŭjn reeman xt chi yadēēd reeman cwent loj Dios. <sup>25</sup> Ziangajc yu' ree bēn ni laa rguien gajc ni zagdxe ni cayŭjn reeman, abi' yu' reeman ni'quid rguient ni zagdxe ni cayŭjn reeman, per yu' dxej gagbee ree bejn laan.

## 6

<sup>1</sup> Gra ree mojs rayal gap reeman respejt xpatron reeman chitēē chu guiniee diidxguijdx contr Dios o contr xtiidxaman ni caylŭŭn. <sup>2</sup> Abi' bal rliladx patron guin Jesucrist dxel rayal gap reeman laaman mazri respejt guial nēman rliladx Jesucrist zi'cgajc laa reeman. Abi' tēē rayal gŭŭn xchiin reeman zi'c rayal guial cayŭjn reeman sirv tijb xcompniar reeman bēn rliladx Jesucrist compniar ni rēn reeman. Zian balŭŭ ree bejn gŭjdx tēē loj reeman din gŭŭn reeman zian.

### *Guialnaza'c ni naj diidxli*

<sup>3</sup> Bal yu' bēn rulŭŭ diidx ni ad najt zi'c xtiidxza'c Dad Jesucrist ni'qui zi'c raliduladx ree Jesucrist ad rulŭŭtaman bejn ree, <sup>4</sup> najzaman bendxal. Din ruladxaman tildiidxaman abi' ni'quid xnejzt rnieeman, dxel ni zēēd guialnadēdloj, guial rdxe'ch, guial rniee diidxguijdx abi' ad rliladxtri lasa' reeman, <sup>5</sup> ad rucwēēzt rdil reeman por ree ni ad rŭjnt sirv ni yu' guijc reeman guial ad ragbeet reeman ni naj diidxli, dxel naladx reeman guial chililadx reeman Jesucrist ma gac reeman ben rijcw. Bēn naj ree zian, biquied loj reeman. <sup>6</sup> Dad ben rijcw naj bejn chi ma rliladxaman Jesucrist, per bēn za' conform con ni rajptzaman. <sup>7</sup> Din achet budnē' ree loj guidxliuj ache tēēt zajc yunē' ree chi yayējt ree. <sup>8</sup> Bal raya'p ree ni yadaaw ree nē lajd ni yadojt ree con laan rayal yaya'n ree conform. <sup>9</sup> Per ree bēn rzēēbladx gac reeman rijcw loj guidxliuj guie ad rile't sudxi'ch reeman, laa rŭjn gajc xindxab laa reeman gan. Mazri rŭjn reeman xgab ni ad rŭjnt

sirv abi' rüjn reeman ni ad rayalt güün reeman ni rüjn persi rnijt reeman. <sup>10</sup> Din guial rzëëbladx milia laan naj xliuj gra ni mal. Abi' yu' reeman por guialrzëëbladx guin ma basa'n reeman ni rliladx reeman Dios abi' laagajc reeman cusagdiaj laa reeman.

### *Ni rayal güün Timoteo*

<sup>11</sup> Per lüj Timoteo, xbejn Dios, briica loj ree ni mal guin. Been naguiejn guibanl zagdxe, guibanl zi'c rën Dios, bililadxaman, gojc Bén naxanladx, gojp pacens guyën tée ree ben ren. <sup>12</sup> Been da't naguiejn guzudxi'ch loj ni rliladxil xtiidx Jesucrist. Ad gusëëbil guialnaban ni naj guialnaban tiblyaaa, din par zian gulejman lüj abi' rëbil delant loj zien ree bejn xhienaag rliladxil Jesucrist. <sup>13</sup> Yan, por Dios Bén razaladx guialnaban loj gra ni yu' loj guidxliuj në por Jesucrist Bén ni gunee sin guialrdxeb loj Poncio Pilato, naj rniabee lüj <sup>14</sup> din guzobil diidx güünl ni rnin lojl, sin guial guchaal xhienin chitëë guiëb ree bejn guial ad cayüjntil xnejz. Zian been xt dxej ni gui't Dad Jesucrist stijb. <sup>15</sup> Gui'taman dxej ni nabee Dios gui'taman, Dios Bén rayal respejt Bén naj tijbzi Dios rajp tëëman gra guialrniabee, Bén naj xrey ree rey naj tëëman xDad ree dad. <sup>16</sup> Bén ni ad yu't dxej guiët, Bén ni za' lod mazri nayni lod achut zajc chibig. Ni'qui tijb bénguidxliuj ad waguiaat laaman ad zajc tëët guguaiaa bejn laaman. ¡Par laaman naj respejt në guialrniabee par tiblyaaa! Amén.

<sup>17</sup> Bén naj ree benrijcw loj guidxliuj guie, güjdx loj reeman ad güün reeman benro' ad cu'guijc tëë reeman guial ni rajp reeman najn par tiblyaaa, din guialnaza'c ni rajp bejn yu' dxej yaran. Mejrli cu'guijc reeman Dios Bén naban din laaman razaladx da't dunuj ree graloj din chu' du luxdoo ree nix. <sup>18</sup> Güjdx loj reeman din güün reeman ni zagdxe, güün reeman zien ree ni rüjn sirv, cu' tëë luxdoo reeman zagdxe güün reeman yudar Bénprob ree. <sup>19</sup> Abi' zian guto'p reeman guialnaza'c ni güün laa reeman yudar loj ree dxej ni zëed din yayal reeman guialnaban tiblyaaa xanyabaa.

### *Xconsejw Pab*

<sup>20</sup> Timoteo, badxe'guijc ni rayal güünl, Ad guidxga'l didxdxuudx ree xcwent ree ni ad rüjnt ree sirv, ni'qui ree diidx rusquiee, ni'qui ree diidx ni rü ree Bén ni naladx guial rajc da't reeman abi'za ad walit ni rajc reeman. <sup>21</sup> Din yu' ree Bén rüjn zian yan, abi' ma basa'n reeman guialrliladx reeman Dios.

Dios güünle' lüj Timoteo. Amén.

## Gui'ch barojp guxhaal San Pabl loj Timoteo

### *Rugajpdioz Pab Timoteo*

<sup>1</sup> Naj Pab, najn tijb xi apóstol Jesucrist, Dios gule naj din gatiechan diidx por promeys ni beenman guial gudëédaman guialnaban tiblyaa loj ree bén rliladx Jesucrist. <sup>2</sup> Naj caxhal gui'ch guie par lüj Timoteo bén rënan zi'c da xi'nan. Dux Dad ree Dios con Dad Jesucrist güünle' lüj, yayaman lüj, yabe'cdxe tëëman luxdool.

### *Guialrulüü xcwent Jesucrist*

<sup>3</sup> Dxej guiaal chi rbedx rniaaban Dios, rusaaladxan lüj, abi' rudën quixtëë loj Dios, bén rünan sirv con guidib luxdon zi'c been ree da bengol gulalan been reeman laaman sirv. <sup>4</sup> Chi rusaaladxan ni biinl, ma rën nejzdoon guguan lüj din yayu luxdon zagdxe. <sup>5</sup> Yu'guican guial lüj diidxli rliladxil Jesucrist, yaloj xnaxüsil Loida con xniaal Eunice bililadx laaman zian, zeel ragbeechaawan guial ziangajc rliladxil laaman.

<sup>6</sup> Zeel rnin lojl, been naguiejn din guiguien quiarguiejn ni banee Dios lojl chi badxib yan guijquil. <sup>7</sup> Din ad baneet Dios xSprijtaman duloj ree par yadxeb ree, banee xSprijtaman par yadxu'dxi'ch ree, par yayën du lasa' ree, në par yaya'p ree tijb quiarguiejn zagdxe. <sup>8</sup> Zeel ad yatul guinieel xtiidx Dad Jesucrist, ad yatu nëtëël naj yu'n ladxguuib por laaman, con xyudar Dios gudaan guialzi ni rayal tëdil guial gutie'chil xtiidxza'c Jesucrist. <sup>9</sup> Din Dios ma beenman perdon dux tol ree abi' ma gulejman dunuj ree din yabajn ree zi'c rënman, ad por ni baguient ree, diidx chi gad guidxliuj gacchaaw beenman xgab guial por Jesucrist gulüüman dunuj ree xhienaag rënman dunuj ree. <sup>10</sup> Yan bi't Jesucrist bén güt por dux tol ree, rayagbee ree guial diidxli rën Dios dunuj ree. Abi' Jesucrist naj bén biquied guialrniabee loj guialgüjt abi' zian biguien guial yu' guialnaban, guialnaban tiblyaa par ree bén rliladx xtiidxaman.

<sup>11</sup> Zeel gulej Dios naj din gacan xi apóstol Jesucrist, din ganen xtiidxaman gulü tëën laan bén ad najt ree bén Israel, <sup>12</sup> abi' por zian cadëëdan guialzi ni cadëëdan. Per ad ratutan por zian, din naj ragbee chu rliladxan, abi' ragbeen guial laaman rajp guialrniabee par cu'chaawaman ni basa'nan lojman xt dxej ni gui'taman stijb.

<sup>13</sup> Badxe'guijc binal tëë ree diidxza'c ni ma balün lüj, tant zi'c rliladxil Dios në zi'c rën ree lasa'l guial ma nayajc ree tijbzi

con Jesucrist. <sup>14</sup> Abi' con xyudar xSprijt Dios bén naban con dunuj ree, gojp ni banee Dios güünl.

<sup>15</sup> Läj ragbee guial gra ree bén zobj niz Asia ma gulëladx reeman naj, loj reeman no'ch Figelo con Hermógenes. <sup>16</sup> Dios gagnë ree xfamil Onesíforo, din laaman dád zien volt bagu'man luxdon. Abi' ad batunëtaman naj yu'n ladxguuib, <sup>17</sup> naabzi bi'taman Rom baguuilaman naj xt lodzi badxejlan naj. <sup>18</sup> Abi' läj ragbee guial dád beenman dunuj ree yudar chi badxu' ree Éfeso. Xi nix chi gui't Dad Jesucrist stijb, yaya da'taman laaman.

## 2

### *Zi'c tijb xsuldad Jesucrist*

<sup>1</sup> Guiáad läj xi'ngaan, guzujdxi'ch loj yudar ni raya'p ree por Jesucrist. <sup>2</sup> Abi' ni biguiejnl rën delant loj zien ree bejn, balüün loj ree bén diidxli rliladx, bén ni zajc gulüü ree ben ren.

<sup>3</sup> Zi'c tijb suldadza'c, zian gudaan ree guialzi, zi'c najl xbejn Jesucrist. <sup>4</sup> Ni'qui tijb bén naj suldad ad rut loj ni ad najt xcwent ree suldad par chile' yaya'nman zagdxe loj bén rniabee laaman. <sup>5</sup> Ziangajc bén ni rguijt xhie tijb nin, rayal quitaman xnejz din chile' tia'man prem. <sup>6</sup> Abi' bén rüjn dxiin dajn, yaloj xgaj rüjn da'taman dxiin din gac yaca'man guialnaza'c. <sup>7</sup> Been xgab ni canin lojl, abi' Dad Jesucrist gagnë läj din chignia'l gra. <sup>8</sup> Basaaladx Jesucrist, bén güt abi' babanman, bén zëed loj xdiaa rey Davi, zian naj xtiidxza'caman ni catiechan. <sup>9</sup> Abi' por zian cadëedan guialzi, xt naxiin lën ladxguuib zi'c tijb benmal, per xtiidx Dios ad naxiitan. <sup>10</sup> Zianan zeel rdaanan gra par günan yudar bén ni ma naj ree par Dios, din gap reeman perdon por Jesucrist yayal tëe reeman guialnaban za'cdxoon ni naj par tiblayaa.

<sup>11</sup> Waliqui ree diidx ni rëb:

Bal ma bayëjt ree con laaman,  
ziangajc yabajn ree con laaman.

<sup>12</sup> Bal radaan ree xhietëez ni raza'c ree,  
ziangajc yanabee ree con laaman.

Bal raguie'ch ree guial ad naguieenbeet reeman,  
ziangajc guiëbaman guial ad nünbeetaman dunuj ree.

<sup>13</sup> Bal id raguieen ree cumplid dux tiidx ree,  
per laaman rüjn cumplid xtiidxaman  
din ad zajct guidxaa zi'c najman.

### *Tijb bén raya'n zagdxe con xchiin*

<sup>14</sup> Güjdx loj ree bejn din gusaaladx reeman ni guie ree, abi' por Dios güjdx loj reeman guial ad rdildiidx reeman por ree ni ad rüjnt yudar, ruxhiinzan bén ni rigueijn ree laan.



15 Been xt lod chile' güünl din yaya'nl zagdxé loj Dios, din chibiguil lojman zi'c tijb bén ni rüjn dxiin abi' achet ni gustu laaman, guial cayüjn xnejz con xtiidx Dios. 16 Ad gül diidx ni ad rüjnt sirv, ni ad rüjnt yudar bejn ree. Din bén rüjn ree zian zi'cri zinal reeman nejz mal, 17 abi' xtiidx reeman naj zi'c tijb guialguijdx ni rigaa. Lasa' ree bén guin naj Himeneo con Fileto, 18 din ad zinaltri reeman zi'c naj xtiidx Dios. Rëb reeman guial xcwent guial yaban ree bengüt mal gudëd gojc zian, abi' rüjndxa reeman xguialrliladx tio'p choon ree bejn. 19 Per xtiidx Dios ad zajct guidxan zi'c tijb guiaj ni zojbdxi'ch. Abi' loj xtiidx Dios rëb: “Dios nünbee bén naj ree xbejnman”, rëb tée loj xtiidxaman: “Graczi ree bén rëb guial nünbee reeman Dios rayal gusa'n reeman gra ni mal.”

20 Lën tijb yu narooB, ad ganaxt ree ni or yu' o ni plajt, nëgajc ree ni goc con yag në con bajn yu'. Din yu' reen rüjn sirv guixie guixie, yu' tée reen ma naj dxej rüjn reen sirv. 21 Yan ziangajc bén ni rüjn naguiejn guiban naya, laaman naj zi'c ni rüjn sirv chi rajc xhienin, laaman ma naj xbejn Dad Jesucrist në ni güün sirv par laaman, din za'man par güünman gra ni naj zagdxé.

22 Zeel basa'n xixgab xinguiag, xgab ni ad rüjnt sirv, gubajn xnejz. Binal guialrliladx, guialrën lasa' në guial yabedxe luxdoo con los demasri ree bén ni con guidib luxdoo rbejdx rniab Dad Jesucrist. 23 Ad tildiidxil por tijb ni ad züjntil gan, o por tijb ni ad lasajct par tildiidxil, din lüj ragbee guial por zian rzuloj wadijl. 24 Abi' tijb bén ni rüjn sirv Dad Jesucrist ad rayalt gacaman bén ruladx wadijl, rayal gacaman benza'c con chutëez, rayal gacaman tijb bén ni gac gulüü ree bejn, gacaman bén pacens 25 guzuxnejz tée man con ree diidxzagdxé bén ni rüjn ree xcontr ni naj diidxli. Abi' rupent zian güün Dios guial yayüjn reeman xgab din gagbee reeman ni naj diidxli. 26 Par laa reeman loj xtramp xindxab ni rniabee laa reeman güün reeman ni rënman.

### 3

#### *Xhienaag gac ree bejn dxej ni bigra ree*

1 Rayal tée gagbeel Timoteo guial dxej ni bigra ni zëed ree, dád nawëeg gacan par ree bejn guial guiban reeman. 2 Din bejn ree, par laagajc reeman güün reeman xgab, ganaxzi milia güün reeman xgab, abi' güün reeman benro', ganax ree diidxdxal guiniee reeman, guinieeguijdx reeman Dios con ree bejn. Ad zuzoobtri xtiidx ree xdad reeman o xniaa reeman, achetri yayuladx reeman, ad zidxga'tri reeman ni naj por Dios, 3 ad zëntri reeman ad zaya tëetri reeman bejn ree. Ganax diidx rusquiee guiniee reeman bejn ree, ad

zucwëëzt güün reeman ni dxuudx ree, dád bén nayaaladx gac reeman, abi' guidxe'ch reeman ni naj zagdxe. <sup>4</sup>Yayü reeman laagajc ree bén ni rajp laa reeman confians, sin guialrdxeb guiniee reeman xhietëez ni gui't guijc reeman, dád guilies xvalor reeman, mazri ma güün reeman ni rëntzi reeman guial loj zi'c rën Dios. <sup>5</sup>Gulüü guial dád benyadoo naj reeman, per ni'quid zaliladxt reeman xguialrniabee Dios.

Ad guchajguil bén ni naj ree zian. <sup>6</sup>Din loj reeman no'ch bén ni ru ree lidx ree bejn, abi' rüjn reeman gan béngunaa ni naban ree con gadxagayaa ree dol, con gadxagayaa ree xgab ni ad rüjnt sirv, tibrajtzi rliladx reeman laa reeman <sup>7</sup>béngunaa guin ree zianczi rusiid reeman, per ad ragbeetzi reeman ni diidxli. <sup>8</sup>Gulal bén ni brii ree laj Janes con Jambres been xcontr reeman Moisejs. Yan ziangajc naj ree bén ni za' ree contr ni naj diidxli, laa reeman ma guxin xquiarguejn reeman, ad zinaltri reeman zi'c rayal chililadx reeman. <sup>9</sup>Per ad xchejt güün reeman zian, din gra ree bejn gagbee guial rusquiee reeman zi'c goc con Janes në Jambres.

#### *Rniabee Pab sudxi'ch Timoteo loj ni basiidaman*

<sup>10</sup>Per lüj Timoteo, ragbeel zagdxe xhie rulün bejn ree, xhienaag naban, xhienaag naj da xgaban, xhienaag rliladxan, xhienaag ra'pan pacens, xhienaag rënan bejn ree, xhienaag rdaanan, <sup>11</sup>xhie ma been ree bejn naj, xhie tëe ree guialzi ma gudëëdan. Lüj ragbee xhienaag guza'can luguiedx Antioquia, Iconio con Listra. Dád ma guzaagdiajn por gra ni ma been ree bejn naj, per Dios babëe naj loj gra ree guialrzagdiaj guin. <sup>12</sup>Abi' dunuj ree rayagbee guial gra ree bén ni rën guiban zi'c rën Dios guialrliladx reeman Jesucrist, naj sagdiaj reeman por ni güün ree bejn laa reeman. <sup>13</sup>Per ree ben mal con ree bén rusquiee, zi'cri zinal reeman nejz mal, rusquiee reeman bejn ree rusquiee tëe laagajc reeman.

<sup>14</sup>Per lüj basnuu guzudxi'ch loj ni ma basiidil, në loj ni ma rliladxil, din lüj ragbee chu ree nin basiid lüj. <sup>15</sup>Abi' lüj diizd xindool nünbeel xtiidx Dios, diidx ni zile' güün lüj yudar gagbeel xhienaag naj perdon ni zëed por guialrliladx Jesucrist. <sup>16</sup>Gra ni zëed loj xtiidx Dios, por Dios zëëdan. Abi' rüjnan sirv par gusiid bejn bejn ree, par gudëe bejn consejw, par guzuxnejz bejn bejn ree, në par gagbee bejn xhienaag rayal guibanman, <sup>17</sup>din gagbee xbejn Dios guidiblagaa din güünman graloj ni naj ni zagdxe.

## 4

<sup>1</sup>Delant loj Dios në delante loj Jesucrist, bén gui't zi'c tijb rey par güünman guialguxtis loj ree bén naban në loj ree bén ma güjt, naj rni lojl, <sup>2</sup>gutie'ch xtiidx Dios. Been naguiejn

gunee xtiidxaman ad chi yu'tzi mod. Been naguiejn chililadx ree bejn ni rnieel, gudilë ree bén ad ruzoobt diidx, badëë tëe consejw loj ree bejn, balüü reeman sin guial yalenyal'. <sup>3</sup> Din zadxin dxej ad zatiëjbt ree bejn gucaagdiajg reeman ni naj diidxli, ma güün reeman zi'ctzi rën reeman, zaguiil reeman zien ree bén gulüü laa reeman ganax ni ruladx reeman gucaagdiajg reeman. <sup>4</sup> Ad zidxga'tri reeman ni naj diidxli, mazri ma guidxga' reeman ni rbëëguijc ree bejn. <sup>5</sup> Per lüj Timoteo, gubajn nadëdguien, gudaan xhietëez guialrzagdiaj tädil, gutie'ch xtiidxza'c Jesucrist, been mandad ni banee Dios lojl güünl.

<sup>6</sup> Din naj zamer gugüjt reeman naj, ma zidbig guialgüjt par naj. <sup>7</sup> Ma guzudxi'chan loj xtiidx Dios majsi guza'can ni guza'ctzan, ma gulox benan ni rayal günan abi' ad basa'ntan ni rliladxan. <sup>8</sup> Yan prem ni rayalan ma cabëzan naj, prem ni gunee Dad Jesucrist lon chi guidxin dxej, bén rüjn guialguxtis zi'c rayal. Abi' ad lotzan gunee man prem guin, në loj gra ree bén yu' luxdoo nix cabëz reeman laaman.

### *Ni rayal güün Timoteo*

<sup>9</sup> Been naguiejn diob guidganajl naj, <sup>10</sup> din Demas ma guro'nladxaman naj guial mazri ruladxaman ni yu' ree loj guidxliuj, zeel zëman niz Tesalónica. Abi' Crescente ma zëman niz Galacia guiáad Tito zëman niz Dalmacia. <sup>11</sup> Tijbzi Lujc za' con naj. Chi gui'til tanë Marcw din zile' güünx yudar gutie'chix xtiidx Dios. <sup>12</sup> Tíquico ma guxhalan laaman luguiedx Éfeso. <sup>13</sup> Chi gui'til tanë da cajpan ni basa'nan luguiedx Troas lidx Carpo, në ree da libran tanë ad yayanladx tëel guidnël da gui'ch reen.

<sup>14</sup> Lejandr bén naj herrer, dád zien ree ni mal ma beenman naj, per con Dios yaguijxaman gra ni beenman. <sup>15</sup> Gojp cudad con laaman, din laaman dád rüjn xcontraman ni ranee ree.

<sup>16</sup> Yaloj chi guzun loj ree guxtis achutczí been naj yudar, graczi reeman guro'nladx naj. Gagnë Dios ad zidxga'taman ni been reeman. <sup>17</sup> Per Dad Jesucrist been naj yudar banee tëëman naj gojl persi baloox gutiechan xtiidxaman, persi biguiejn ree gra ree bén ad najt bén Israel laan. Zian baslaa Dios naj, zi'c rliaa tijb bejn loj beedx. <sup>18</sup> Abi' Dad Jesucrist, laaman yabëë naj loj gra ni mal, laaman guinia naj xt chi guidxin dxej guidxinan lod canabeeman xanyabaa. ¡Par laaman naj respejt gra tiamp në zianczi! Amén.

### *Diidx bigra ca loj gui'ch guie*

<sup>19</sup> Bagajpdioz Prisca në Aquila në ree xfamil Onesíforo. <sup>20</sup> Erasto baya'nman Corinto, guiáad Trófimo ragxuuman basa'nan laaman luguiedx Mileto. <sup>21</sup> Been naguiejn guda chi

gad tiamp nayaag gui't. Eubulo, Pudente, Lino, Claudia në los demasri ree bén rliladx Jesucrist rugajpdioz reeman lüj.

<sup>22</sup> Dad Jesucrist gagnë lüj, abi' Dios güünle' gradi. Amén.

## Gui'ch guxhaal San Pabl loj Tito

### *Rxhiaal Pab xtiidx Dios*

<sup>1</sup> Naj Pab cayünan Dios sirv, naj najn xiapóstol Jesucrist par günan yudar bén ma naj ree par Dios xhienaag chililadx reeman laaman din gagbee tēē reeman diidxli xhienaag guiban reeman delant loj Dios, <sup>2</sup> din yu'guijc ree guial zian yaya'p ree guialnaban tiblyaa delant loj Dios. Diizd chi gad guidxliuj gacchaaw, rēbaman guial yazaladxaman guialnaban guin, abi' dunuj ree rayagbee ree zagdxe guial ad rnieet Dios diidx rusquiee. <sup>3</sup> Abi' chi bidxin dxej ni gule Dios guial gogbee ree bejn xtiidxaman laaman balüü xtiidx, abi' naj bayal catiechan xtiidxza'caman laan naj ni guxhaalaman naj günan, bén ni rüjn dux tol ree perdon. <sup>4</sup> Cucan gui'ch guie par lüj, Tito, guial najl zi'c da xi'n'an guial tiblojzi raliduladx Jesucrist. Dux Dad ree Dios con Jesucrist bén güt por dux tol ree, yaya reeman lüj, güünle' reeman lüj yabe'cdxe tēē reeman luxdool.

### *Dxiin ni been Tito guiedx Creta*

<sup>5</sup> Naj basa'n lüj niz Creta din güünl ni ryaadx günan ni. Abi' tijbgaj luguedx gucaabeel bén ni nabee ree loj ree xbejn Cristo zi'c ma rnin. <sup>6</sup> Chi gucaabeel laa reeman rayal gucaabeel bén ni naban ree zi'c rayal chitēē chu guinieeguijdx laaman, bén ni yu' tijbzi lacheel, rliladx tēē ree xi'nman Jesucrist, bén ni nünbee ree bejn guial ad nabant ree xi'nman zi'ctzi rēn reex ad najt tēēt reex xin rusagloj. <sup>7</sup> Din bén rajp guialrniabee loj ree xbejn Cristo, lojman riga' gra ni naj por Dios, zeel rüjn naguiejn guibanman zi'c rayal. Ad rayalt güünman xgab guial tijbzi ni guiēbaman güün sirv, ad rayalt gacaman bēnralenya', ad rayalt gacaman bengu', ni'qui ben ruladx wadijl, ad zaguiil tēētaman mod xhienaag tia'man xmilia ree bejn. <sup>8</sup> Rayal gacaman bén ni gudēē lidx yaya'n ree bejn chi rüjnman naguiejn, bén ruladx güün ganax ni zagdxe, gac tēē nabee laagajcaman. Rayal gacaman benza'c, guibanman zi'c rayal delant loj Dios nē delant loj ree bejn, ad rayalt guibanman zi'ctzi rēnman. <sup>9</sup> Rayal chinalaman diidxli ni ma basiidaman, din chile' gusiidaman bejn ree diidxza'c guin ree din guzuxnejz tēēman bén ni rnieeguijdx ree xtiidxli Dios.

<sup>10</sup> Din dád zien ree bén ad ruzoobt diidx yu'. Ganax diidx rusquiee rniee reeman abi' rusquiee reeman bejn ree, abi' loj ree bén Israel ni rulüü ley loj reeman no'ch mazri lasa' ree ben guin. <sup>11</sup> Lasa' ree bén guin ad rayaltri yatiēēb ree gulüü reeman bejn ree, din dád zien ree yu ma beendxa reeman gra

tijb famil guial rulüü reeman laa reeman ni ad rayalt naabzi par güün reeman gan milia.

<sup>12</sup> Tijb gajc bén ladx reeman bén rëb reeman naj bén badëë xtiidx Dios loj ree bejn, laaman rëb guial ree bén Creta ganax diidx rusquiee rniee reeman, dád nadoxh reeman, dád bén nala naj reeman abi' achetczi rën reeman güün reeman. <sup>13</sup> Abi' waliman, zeel gudilë reeman con diidxdoxh din chile' chinal reeman xtiidx Cristo zi'c rayal, <sup>14</sup> ad guidxga'ri reeman ni rbëëguijc ree bén Israel, ad güün teë reeman ni rniabee ree bén ni ma guro'nldax ree ni naj diidxli.

<sup>15</sup> Bén naya ree xquiarguiejn, achet xgab mal rüjn reeman. Per ree bén rüjn ganax xgabdxuudx, bén ad riladxt, achetczi xgab zagdxe rüjn reeman guial ad nayat xquiarguiejn reeman, ganax ree xgab mal yu' guijc reeman. <sup>16</sup> Laa reeman rëb guial nünbee reeman Dios, per rëbzi reeman din ad rüjnt reeman ni rën Dios. Dád bendxuudx naj reeman rusagloj teë reeman, ni'qui tijb ni rüjn sirv ad rajct rüjn reeman.

## 2

### *Ni rayal gulüü Tito*

<sup>1</sup> Per lüj Tito, balüü ree bejn gra zi'c tal naj xtiidxza'c Dios. <sup>2</sup> Balüü ree bengol din guiban reeman zagdxe, gustëdguien reeman din gap bejn laa reeman respejt, guidib luxdoo reeman chililadx reeman, guiën reeman bejn ree, taan teë reeman xhietëëz ni sac reeman. <sup>3</sup> Ziangajc ree béngunaa bengol rayal guiban reeman zi'c rayal guiban ree xbejn Cristo. Ad rayalt gü reeman xtiidx bejn, ad gac reeman bengu'. Rayal gulüü reeman bejn ree xhienaag naj ni zagdxe, <sup>4</sup> rayal gulüü reeman béngunaa guiag ree din guiën lacheel reeman con xi'n reeman, <sup>5</sup> din guiban teë reeman naya delant loj Dios, nadëdguien, guinia lidx reeman, gac reeman benza'c guzoob teë reeman xtiidx lacheel reeman chitëë chu guinieeguijdx xtiidx Dios.

<sup>6</sup> Ziangajc lüj Tito, badëë consejw loj ree xinguaaw guiag din guiban reex nadëdguien. <sup>7</sup> Been naguiejn din güünl gra xnejz din guguaa reex xhienaag güün reex ni naj zagdxe. Chi rulüül laa reex, balüü reex zagdxe zi'c rayal, <sup>8</sup> con ganax ree diidx zagdxe chitëë xhie gudxiib ree bejn guijquil, din yaya'nxtu ree bén ni rdxe'ch dunuj ree guial achet yadxejl gudxiib reeman duguijc ree.

<sup>9</sup> Badëë teë consejw loj ree bén naj ree mojs din guzoob gra xtiidx xpatron reeman, gac reeman benza'c ad yadxi'ro' reeman. <sup>10</sup> Ad cwan reeman xhie xieen xpatron reeman, gac reeman bén confians din guguaa gra ree bejn xhienaag

naban reeman guial niza'cdxoon naj xtiidx dux Dad ree Dios b́n rŭjn dux tol ree perdon.

<sup>11</sup> Abi' Dios ma balŭŭman plact rĕnman dunuj ree, abi' guial rĕnman dunuj ree zile' gac gra ree bejn perdon. <sup>12</sup> Guial rĕnman dunuj ree rayagbee ree guial rayal yasa'n ree ni mal con ree ni ad rŭnjt sirv ni rayĕn ree yaguieen ree loj guidxliuj guie, din yabajn ree nadĕdguien, zi'c rayal, zi'c rĕn Dios yabajn ree loj guidxliuj guie <sup>13</sup> la'tgaj caylĕjz ree dxej za'cdxoon ni gac cumplid xtiidxza'caman zi'c ma naman duloj ree guial gui't dux Dios ree Dad Jesucrist con xguialrniabeeman, b́n been perdon dux tol ree. <sup>14</sup> Laaman gŭt por dunuj ree din yabĕĕman dunuj ree loj gra dol abi' basiaman dunuj ree din yayajc ree xbejnzaman abi' yaguieen ree naguiejn yaguieen ree ganax ni zagdxe.

<sup>15</sup> Gra ni ma rnin lojl balŭŭn laa reeman sin guialrdxeb badĕĕd reeman consejw, bazuxnejz reeman con guialrniabee ni ca'l. Ad tiĕbil gusagloj reeman lŭj.

### 3

#### *Ni rayal gŭŭn ree b́n rliladx Jesucrist*

<sup>1</sup> Basaaladx reeman din gŭŭn reeman ni rĕb ree b́n rniabee laa reeman nĕ ni rĕb ree guxtis, gac reeman b́n nacaagdiajg susin tĕĕ reeman par gŭŭn reeman ni naj zagdxe. <sup>2</sup> Ad guinieeguijdx reeman bejn ree, ad quuil reeman wadijl, gac reeman benza'c nĕ bĕnchaawladx con chutĕĕz bĕnan.

<sup>3</sup> Gocli nĕgajc dunujn baguieenan zi'ctzi bayĕnan, ad bazoobtan diidx, badxu'n loj nejz mal, baguieenan ni bayĕntzan nĕ zi'ctzi naj dux xgaban. Baguieenan ganax ni ad najt zagdxe, bayajcan b́n nadĕdloj, bidxe'ch ree bejn dunujn abi' badxe'ch gajcan laa reeman. <sup>4</sup> Per chi bidxin dxej dux Dad ree Dios b́n baguijx por dux tol ree, balŭŭman loj ree bejn guial najman benza'c rĕn tĕĕman bejn. <sup>5</sup> Laaman been dux tol ree perdon, per ad guial baguieent ree xhie ni rŭjn sirv, guial bayaman dunuj ree. Laaman basia dunuj ree yan ma nayajc ree naya delant lojman, abi' por xSprijtaman ma raya'p ree guialnaban cŭb. <sup>6</sup> Por Dad Jesucrist b́n baguijx por dux tol ree, Dios bazaladx dunuj ree zro' da't xSprijtaman. <sup>7</sup> Dxel zi'cgajc laaman ma nulabaman dunuj ree sin dol guial najman benza'c, yayal ree guialnaban tiblayaa ni ralĕjz ree.

<sup>8</sup> Laan naj diidxli. Zeel rĕnan gusnuu gugojnl diidx guie ree b́n ni rliladx ree Dios din gŭŭn reeman naguiejn gŭŭn reeman ni naj zagdxe. Abi' nine ree naj ni zobjloj nĕ ni gŭŭn sirv par gra ree bejn. <sup>9</sup> Per ad guidxga'l diidx ni ad rŭjnt ree sirv ni rnĕee ree bejn, ad guidxga'l xtiidx ree b́n ni ru ree xgab mazri chunin naj diidxli xdiaa gulal ree bejn. Ad

guidxga' tēēl bēn ni rdildiidx ree por xley Moisejs, din ad najtan ni zojbloj achet tēēt lasajc ni rniee reeman, achetdzi sirv rüjn ree ni guin.

<sup>10</sup> Bal por tijb lējt rzuloj rlia' lasa' ree xbejn Cristo, guneenēman tib volt o tio'p volt, abi' bal id ruzoobaman xtiidxil mejorli babēēman lojdi. <sup>11</sup> Din lüj ragbee guial lasa' ree bēn guie ma guro'nladx reeman ni naj diidxli abi' laagajc reeman cunijt laa reeman por xtol reeman.

### *Ni rayal güün Tito*

<sup>12</sup> Chi gaxhalan Artemas o Tíquico lod zojbil, been da't naguiejn tagnaj naj luguiedx Nicópolis, din ni ma benan xgab gadēēdan tiamp nayaag. <sup>13</sup> Been tēē yudar Apolos nē licenciad Zena zi'ctzi gaquil. Badēē gra ni ryaadx reeman din chinal xnejz reeman chitēē xhie guiyaadx reeman. <sup>14</sup> Nē ree dux compniar ree rayal gusiid güün ni naj ni zagdxe, güün reeman yudar chi rüjn naguiejn güün reeman yudar chitēē guiban xlia'zi reeman.

### *Diidx bigra ca ree loj gui'ch guie*

<sup>15</sup> Gra ree bēn za' con naj rugajpdioz reeman lüj. Bagajpdioz sii gra ree bēn rēn dunujn por guialrliladx ni raya'pan. Dux Dad ree Dios güünle' gradi. Amēn.



## Gui'ch guxhaal San Pabl loj Filemón

<sup>1</sup> Naj Pab, yu'n ladxguiib guial rtiechan xtiidx Jesucrist. Naj, nē Timoteo raxhaalan gui'ch guie par lūj Filemón, nayajc ree compniar ratie'ch ree xtiidxaman, lūj ragbee rayēn da'tan lūj. <sup>2</sup> Raxhaal tēen gui'ch guie par gra ree bēn rlliladx Jesucrist bēn rado'p ree lidxil, nē par Apia nētēē par Arquipo, bēn naj dux compniar ree caytie'ch ree xtiidx Jesucrist. <sup>3</sup> Dux Dad ree Dios nē Dad Jesucrist gūnle' lējt yabe'cdxe tēē reeman luxdoodi.

### *Rudēē Pab quixtēē loj Dios por Filemón*

<sup>4</sup> Beegaj chi rbedx rniaaban Dios rudēn quixtēē lojman por lūj, <sup>5</sup> din ma cwa'n ruson guial dād rēnl rlliladx tēēl Dad Jesús dād rēn tēēl gra ree bēn ma naj xbejn Dios. <sup>6</sup> Rniaab tēēn lojman guial lūj cayūjnl dunujn yudar par yatie'ch ree mazri xtiidx Jesucrist, gusnuu gagbeel gra ni zagdxe ni raya'p ree guial ma nayajc ree tijbzi con Jesucrist. <sup>7</sup> Dād nix yu' luxdon rabaa tēēn guial rēnl dux compniar ree bēn rlliladx ree Jesucrist, din por lūj bijch ma bayu luxdoo reeman zagdxe.

### *Rniee Pab por Onésimo*

<sup>8</sup> Zeel majsi ra'pan gualrniabee par ganin conin rayal gūnle' guial najn tijb xi apóstol Jesucrist, <sup>9</sup> per guial rayēn du lasa', zagdxeli rniaaban lojl, naj Pab, ma najn tijb bengol abi' yan yu'n ladxguiib guial rtiechan xtiidx Jesucrist, <sup>10</sup> rniaaban lojl por Onésimo, bēn naj zi'c da xi'nān guial ma bililadxaman xtiidx Jesucrist ni ben lojman lēn ladxguiib guie.

<sup>11</sup> Gocli achet sirv been Onésimo lūj, per yan zi'c rūjnman naj sirv ziangajc gūnman lūj sirv. <sup>12</sup> Yan caydxi'n laaman lidxil, gunajchi'man zi'c rniajchi'l naj. <sup>13</sup> Guyēnan nizujman con naj din nūjnman naj yudar luar lūj, la'tgaj yu'n ladxguiib guial rtiechan xtiidx Jesucrist. <sup>14</sup> Per ad guyēntan nūnan xhienin sin xtiidxbeel din xhietēēz favor gūnle' por naj ad zūjntilan nagueijn, gūnlan guial guiēnl. <sup>15</sup> Bal brii Onésimo lidxil tiblādēd, per gojc zian din chile' sunēman lūj tiblyaa, <sup>16</sup> per ad zi'ctri tijb mojs, mazri zagdxe guial loj tijb mojs, zi'c tijb bijchil bēn rēnl. Dād rēnan laaman, per lūj rayal guiēnl laaman mazri ad zi'ctzi tijb bejn, rayal guiēnl laaman zi'c tijb bijchil por Jesucrist.

<sup>17</sup> Yan bal walil nayajc ree compniar por Jesucrist, baca' Onésimo gunaladx naj gajcan. <sup>18</sup> Bal yu' xhie beenman lūj, o bal yu' xhie ralaman lojl, naj yaguix laan. <sup>19</sup> Abi' naj Pab, quijb naj cuca diidx guie ree: Naj yaguixan, majsi rulūū ad rūjnt nagueijn ganin lojl din gusaaladxil guial xt xgualnabanl rali

lon. <sup>20</sup> Yan been naj favor guin guial rënJ Jesucrist, zian bagu' luxdon guial nayajc xbejn Jesucrist.

<sup>21</sup> Naj caxhal gui'ch guie lojl abi' ragbeechaawan guial guzoobil da diidxan, ragbee tēen guial mazri naj ni güünl guial loj ni canin lojl. <sup>22</sup> Been tēe porvinid lēnū lidxil lod yaya'nan, din zi'c cabejdx canabidi Dios, ragbeen tiëbaman guidganan lējt.

*Diidx bigra ca ree loj gui'ch guie*

<sup>23</sup> Epafra, bēn yu'nē'n ladxguiib guial ratie'chan xtiidx Jesucrist, rugajpdiozaman lūj. <sup>24</sup> Nēgajc Marcw, Aristarco, Demas nē Lujc, bēn cayūjn gajc ree naj yudar caytie'chan xtiidx Jesucrist nē reeman rugajpdioz lūj. <sup>25</sup> Dad Jesucrist güünle' lējt.

## Gui'ch par ree bén Hebreos

### *Ma gunee Xi'n Dios xtiidx xDadaman*

<sup>1</sup> Tiamp gulal, Dios guneenë ree dux béngulal ree zien volt në gadxagayaa mod por ree bén badëë xtiidx Dios loj ree bejn, <sup>2</sup> per yan ma guneenëman dunuj ree por Xi'nman. Dios been gra ni yu' xanyabaa në loj guidxliuj por Xi'nman. Abi' gra basa'n loj Xi'nman. <sup>3</sup> Laaman naj xbacha' za'cdxoon Dios, laaman naj zi'cgajczi naj Dios. Abi' laaman naaz gra ni yu' por gualrniabee ni rajpaman.

### *Xi'n Dios naj mazri bén zobjloj guial loj ree anjl*

<sup>4</sup> Zianan zeel laaman naj mazri bén zobjloj loj ree xianjl Dios din laaman naj quijb Xi'n Dios. Chi gulox guzajcaman ni guzacaman par yayajc ree naya por dux tol ree, dxel gurejman xanyabaa xladbee xDadaman Dios bén rajp gra gualrniabee <sup>5</sup> Din ad yu't dxej rëb Dios loj ree anjl:

Lüj naj da xi'nan,

abi' diizd yan gulün guial lüj naj da xi'nan.

Achut tëët loj anjl rëbaman:

Naj gac Xdadil, abi' lüj gac da xi'nan.

<sup>6</sup> Per chi guxhaal Dios Xi'nman loj guidxliuj, Xi'nman bén rajp gualrniabee zi'cgajc laaman, dxel rëbaman:

Gra ree da anjlan,

gol guyën da Xi'nan, gol gojp tëëman respejt.

<sup>7</sup> Abi' chi gunee Dios por ree anjl, rëbaman:

Naj rün ree da anjlan zi'c bi, rün tëën laa reeman zi'c bajl.

<sup>8</sup> Per por Xi'nman rëbaman:

Dad Dios, xgualrniabeel naj par tiblayaa,

abi' guidib tiamp nabeel zi'c rayal.

<sup>9</sup> Lüj ruladxil ni naj zagdxe

abi' rdxe'chil ni mal.

Zeel Dios bén naj xDiosil

baneeman lüj mazri guial rabaa guial loj gra ree bén za'nël.

<sup>10</sup> Rëb tëëman:

Dad, diizd yaloj lüj been guidxliuj në xanyabaa

con gra ni yu' loj reen.

<sup>11</sup> Gra reen yu' dxej nit reen,

per lüj ma nabanl tiblayaa.

Gra reen yayox zi'c tijb lajd,

<sup>12</sup> gusie'til laa reen zi'c rusie't bejn xabaman,

abi' zuchaal laa reen zi'c ruchaa bejn xabaman,

per lüj ad yu't dxej guidxaa zi'c najl

abi' zianczi gapil guialnaban.

13 Ad yu't dxej rëb Dios loj tijb ree xianjlaman:

Gurej da ladbeen xt günan gan nabeel bén rdxe'ch ree lüj.

14 Din gra ree anjl naj sprijt cayüjn ree sirv loj Dios, abi' rxhiaalaman laa reeman din güün reeman yudar bén ni gap ree guialnaban tiblyaa delant loj Dios.

## 2

*Ad yasa'n ree diidx ni yabëë dunuj ree loj dol*

1 Zeel rüjn naguiejn yayidxga' ree xtiidx Dios ni ma bacaag-diajg ree chitëë yasa'n ree xnejzaman ni ma zunaal ree. 2 Din zi'c goc cumplid gra xtiidx Dios ni gunee ree anjl diizd gocli, bén ad bazoobt diidx, bén been ree dol, laa reeman bayal casti ni rayal reeman. 3 ¿Xhieza naag laa ree loj casti bal në dunuj ree ad zayidxga't xtiidx Dios ni rugojn dunuj ree par yayajc ree perdon? Awa laagajc Dad Jesucrist bagojn xcwent perdon guin diizd yaloj, abi' ree bén biguiejn laan, laa reeman bagojn dunuj ree. 4 Yan zi'c ma cwa' bejn guialrignia' rent guialrignia' ren por xSprijt Dios zi'c naj xixgabaman, abi' por ree sen në ree milagr con los demazri ree ni radxaloj bejn, zian ma balüü Dios guial ni diidxli naj ree diidx guin.

*Jesucrist rabëë bejn loj dol*

5 Dios ad badëëtaman guialrniabee loj ree xianjlaman par nabee reeman lod yaya'p ree guialnaban cüb ni cayza't ree, 6 din yu' tiblajt loj xtiidx Dios lod rëb bejn:

Dios, ¿chu naj bénguidxliuj zeel rusaaladxil laaman?

¿Chu naj xi'n bénguidxliuj zeel rüjnl xgab por laaman?

7 Guyu tijb tiamp ni baletil xi valoraman guial loj ree anjl.

Per despuejs ma beenl laaman bén zobjloj,

badëël guialrniabee lojman din nabeeman gra ree ni been-  
chaawil,

8 abi' gra basa'nl lojman.

Chi badëë Dios guialrniabee lojman par nabeeman gra, achetczi ni baya'n ni ad zanabeetaman majsi dunuj ree sta ad cayguiaat ree guial nabeeman gra. 9 Per dunuj ree rayagbee guial guyu tiamp ni balet Dios xvalor Jesús guial loj ree anjl. Yan ma ca'man guialrniabee abi' rajp bejn laaman respejt por guialzi ni gudëdaman chi gütaman por gra bejn, abi' zian gojc guial rën Dios dunuj ree.

10 Por Dios yu' gra, abi' laaman rniabee gra ni yu', abi' rënman chu' zien ree xi'nman xanyabaa. Zeel por guialzi ni gudëd Jesucrist bayaaloj bazoobaman xtiidx Dios, abi' tijbzi por laaman ma zajc yaya'p ree perdon. 11 Bén ma naya ree delant loj Dios, por Jesucrist naya reeman. Abi' tant Jesucrist tant ree bén ma naya por laaman, tijbzi Dios naj xdad reeman.

Zeel ad ratut Jesucrist rëbaman loj reeman: Da bichan. <sup>12</sup> Zi'c ca tib lajt loj xtiidx Dios lod rëb: Gün diidx loj ree da bichan xcwentil, abi' chi yadxaag lasa' reeman golan cant ree ni guza't lüj zagdxe.

<sup>13</sup> Rëb tëëman:

Tijbzi Dios yu'guican gagnë naj;

abi' rëbaman:

Laa naj guie con ree da xi'n nan xin bazaladx Dios naj.

<sup>14</sup> Abi' zi'c bénguidxliuj tibloj najman rejn con bëël, ziangajc gojc Jesucrist chi bi'taman loj guidxliuj persi gojc güjtaman, abi' por xguialgüjtaman beenman gan loj guialrniabee ni gop xindxab loj guialgüjt. <sup>15</sup> Zian beenman persi babëëman bejn ree loj guialnadxeb xieen guialgüjt, bën ni guidib tiamp ni naban reeman rdxeb reeman guialgüjt zi'c rdxeb bejn xpatronman. <sup>16</sup> Din laaman ad bi'ttaman loj guidxliuj par gagnëman anjl ree, bi'taman par gagnëman bën naj ree xdiaa Abraham. <sup>17</sup> Zeel gojcaman zi'cgajczi bénguidxliuj, persi bidxin dxej gojcaman tijb bixhioz zojbloj delant loj Dios, bixhioz ni raya bejn, bën rüjn tëë cumplid xtiidx Dios persi gojc gudixxaman por xtol ree bejn. <sup>18</sup> Abi' guial laagajcaman guzagdiaj been tëë xindxab guial ad zuzoobtaman xtiidx Dios, zeel laaman zajc gagnë ree bën ni cayüjn xindxab naguiejn güün reeman dol.

### 3

#### *Jesús naj mazri bën zojbloj guial loj Moisejs*

<sup>1</sup> Zeel compniar, lëjt guial ma najdi xbejn Dios, lëjt guial ma bacaabeeman lëjt par gaquidi xi'nman, gol badxe'guijc Jesucrist guial laaman naj bixhioz zojbloj, bën raliduladx ree, bën guxhaal Dios loj guidxliuj. <sup>2</sup> Din Jesucrist bazoobaman xtiidx Dios bën bacaabee laaman zi'c bazoob Moisejs xtiidx Dios delant loj ree bën Israel. <sup>3</sup> Per mazri rayal Jesucrist respejt guial loj Moisejs guial mazri zojblojman, zi'c tijb bën ni rüjn yu mazri ruza't reeman laaman zagdxe guial loj yu guin. <sup>4</sup> Gra yu yu'czi tijb bën rüjn laan, per Dios laaman been gra ni yu'. <sup>5</sup> Abi' Moisejs bazoobaman xtiidx Dios, beenman sirv lojman chi badëëdaman xtiidxaman loj ree bën Israel persi bagojnman laa reeman ni rëb Dios. <sup>6</sup> Per Jesucrist guial najman Xi'n Dios, laaman rniabee loj gra ree xbejn Dios. Abi' dunuj ree nayajc ree xbejn Dios bal yasnuu yadxu'dxi'ch ree loj ni raliduladx ree laaman sin guial yalenya' ree abi' yalëöz ree xt dxej bigra.

#### *Gol guzujdxi'ch loj xnejz Dios*

<sup>7</sup> Zeel, zi'c rëb xSprijt Dios:

Bal rucaagdiajguidi xtiidx Dios yan dxej,

<sup>8</sup> ad cwexuudi zi'c been ree b n ad bacaagdiajgt xtiidxaman chi been reeman laaman prueb chi guzu reeman loj yujbidx.

<sup>9</sup> Abi' yagaj naj lod ad bacaagdiajgt ree xb ngulalidi xtiidx Dios majsi baguiaa reeman milagr ni beenman delant loj reeman loj tiuu ijz niz loj yujbidx.

<sup>10</sup> Zeel bidxe'ch Dios b n guin ree, abi' r baman:

“Xgab ren r jn reeman, ni'quid r jnt reeman naguiejn din gagbee reeman xhienaag r nan g  n reeman.”

<sup>11</sup> Zianan zeel bidxe'ch Dios abi' r baman guial ad yu't dxej gap reeman xguialraziiladx Dios.

<sup>12</sup> Zeel gol gojp cudad compniar raliduladx ree Jesucrist, chit   chu' tijbidi guial por xixgab malidi ni rudxoon chililadxidi, guibi'cadi loj xnejz Dios b n naban. <sup>13</sup> Mejrli guixie guixie gol guneen  gol badxe' t   luxdoo ree lasa'di naga yu' tiamp, chit   ad zuzoobtridi xtiidx Dios guial ma been dol l jt gan. <sup>14</sup> Din bal ma nayajc ree xbejn Cristo, zianczi rayal yadxu'dxi'ch ree loj ni raliduladx ree laaman zi'c baliduladx ree laaman diizd guia'xchej.

<sup>15</sup> Abi' zi'c ma rnin lojdi, loj xtiidx Dios r b:

Bal rucaagdiajguidi xtiidx Dios yan,

ad bal gaquidi nad zi'c goc ree b n ad bazoobt xtiidx Dios gocli.

<sup>16</sup> Abi',  chuzaa ree nin ad bazoobt xtiidx Dios majsi biguiejn reeman ni guneeaman?  Nid b n Israel ni bab   gajc ree Moisejs Egipton ya? <sup>17</sup> Abi',  nid laagajc reeman bidxe'ch Dios loj tiuu ijz ya por dol ni been reeman abi' zien reeman g jt loj yujbidx? <sup>18</sup> Abi',  nid b n guin gajc reen r b Dios loj ya guial ma beenchaawaman xgab guial ad zut reeman lod gap reeman xguialraziiladxaman, guial ad bazoobt reeman xtiidxaman? <sup>19</sup> Zian rayagbee ree guial ad gojpt reeman guialraziiladx guin guial ad bililadxt reeman ni r b Dios loj reeman.

## 4

<sup>1</sup> Zeel yan guial sta raya'p ree promejs ni been Dios guial yaya'p ree xguialraziiladxaman, rayal yaya'p ree cudad chit   awa raya'p ree promejs guin yaya'n tijb dunuj ree guial ad zaya'pt ree guialraziiladx guin. <sup>2</sup> Din dunuj ree ma bacaagdiajg ree xtiidxza'c Jesucrist zi'cgajc laa reeman, per laa reeman achet sirv been guial bacaagdiajg reeman diidx guin ree, guial ad bililadxt reeman laan. <sup>3</sup> Per dunuj ree guial ma baliduladx ree xtiidx Dios, ma raya'p ree guialraziiladx guin, sa'n por ree b n ad bililadxt r b Dios:

Guial bache'ch reeman naj zeel ma benan xgab guial ad zajpt reeman da guialraziiladxan.

Diisd chi gule'cchaaw Dios guidxliuj baloox xchiinman, <sup>4</sup> zi'c rëb loj xtiidxaman por dxej ni raziiladx bejn:

Chi gulox been Dios gra xchiinman  
dxel ni goc gajdx dxej baziiladxaman.

<sup>5</sup> Per par ree bën ad bazoobt xtiidxaman rëbaman:

Ad yu't dxej gap reeman da gualraziiladxan.

<sup>6</sup> Bën biguiejn ree xtiidx Dios yaloj, ad gojpt reeman gualraziiladx guin guial ad bazoobt reeman xtiidxaman, per sta yu' ree bën ryaadx gap gualraziiladx guin. <sup>7</sup> Zeel chi gudëd zien ijz, Dios gulëëca zatijb dxej ni naj yandxej. Abi' zi'c ma rnin guial rëb rey Davi tib lajt loj xtiidx Dios:

Bal riguejndi xtiidx Dios yandxej,  
gol bazoob xtiidxaman.

<sup>8</sup> Din bal por Josué niapj ree bën Israel gualraziiladx, ad nuza'tt Dios zatijb dxej. <sup>9</sup> Zeel xt yandxej yu' gualraziiladx guin par ree xbejn Dios. <sup>10</sup> Din bën rajp xgualraziiladx Dios, raziiladxaman xieen gra xchiinman zi'c baziiladx Dios chi gulox been xchiinman. <sup>11</sup> Zeel rayal yaguieen ree naguiejn yaya'p ree gualraziiladx guin, chitëë chu güün zi'c been ree bën ad bazoobt xtiidx Dios.

<sup>12</sup> Din xtiidx Dios nabanen rajp tëen gualrniabee. Mazri rëëzan guial loj tijb espad ni nadoxh grop lad, rëëzan lën luxdoo bejn në lën xsprijtaman. Xt lën dxijt në lën yob rëëzan, abi' por laan ragbee bejn bal ni mal o ni zagdxe naj ni rënman güünman. <sup>13</sup> Achetczi ni been Dios zajc guiguie'ch lojman, din gradooczan ruguiaaman, abi' lojman naj yadëed ree cwent.

### *Jesús naj bixhioz mazri zojbloj*

<sup>14</sup> Zeel guial ma raya'p ree bixhioz ni mazri zojbloj, abi' laaman naj Jesucrist Xi'n Dios, bën ma zojb xanyabaa, rayal yasnuu yadxu'dxi'ch ree loj ni raliladx ree laaman. <sup>15</sup> Din Jesucrist bën naj dux bixhioz zojbloj ree laaman zajc gagnë dunuj ree chitëë güün dol dunuj ree gan. Din në laaman guzajc graløj zi'cgajc cayza'c ree, per laaman ad yu't dxej beenman dol. <sup>16</sup> Zeel con confianz ma zajc yabiig ree loj Dios yarejdx yanaab reeman, bën rën dunuj ree par yayaman dunuj ree. Abi' guial rënman dunuj ree, laaman gagnë dunuj ree loj hor ni yayën ree chu güün dunuj ree yudar.

## 5

<sup>1</sup> Gra bën rajc bixhioz mazri zojbloj, Dios gulej laaman loj ree bejn persi rbejdx rniabaman Dios por ree bejn. Abi' lojman rudëë bejn gon par Dios në ree be ni guiët por ree xtol ree bejn. <sup>2</sup> Abi' guial bénguidxliuj gajc naj bixhioz guin, zeel ragbeeman xhienaaq rzajc bejn. Zeel rile' rajpaman pacens bën ni ad ragbeet xhienin rüjn, në ree bën ad zinalt xnejz Dios.

<sup>3</sup> Abi' guial yu' chi rüjn bixhioz guin dol zeel nëman rugüjt tijb be zi'c gon par Dios por xtolaman, zi'cgajc rüjnman por ree bejn.

<sup>4</sup> Abi' achut zajc guiëb guial gacaman bixhioz zobjbloj, Dios naj bën rbe laaman zi'c guleman Aarón. <sup>5</sup> Ziangajc gojc con Jesucrist, ad laataman rëb guial gacaman bixhioz zobjbloj par dunuj ree, Dios bacaabee laaman, chi rëbaman:

Lüj naj da Xi'n'an, abi' diizd yan gulün guial lüj naj da Xi'n'an.

<sup>6</sup> Ziangajc rëb zatib lajt loj xtiidx Dios por Jesucrist: Lüj naj bixhioz par tiblayaa zi'c goc Melquisedec bixhioz.

<sup>7</sup> Chi guban Jesucrist loj guidxliuj guië dád biinman gurejdx gunabaman Dios bën zajc yabëë laaman loj guialgüjt ni gudëdaman. Dxel bidxga' Dios Jesús badëëman laaman valor guial bazoobaman gra xtiidxaman. <sup>8</sup> Majsj Xi'n Dios najman, per basiidaman bazoobaman diidx majsj guzagdi-ajman. <sup>9</sup> Abi' guial guidiblagaa beenman gra ni rën Dios güünman, zeel por laaman tiblayaa ma yu' perdon par gra ree bën guzoob xtiidxaman. <sup>10</sup> Abi' Dios naj bën gule laaman par gacaman bixhioz zobjbloj zi'c goc Melquisedec bixhioz.

### *Royal yasnuu yaguieenbee ree xtiidx Dios*

<sup>11</sup> Dád zien ni yu' ganin lëjt por ree ni guin, per nawëëg najn par ganinan zi'c rënan guial dád nen rignia'di. <sup>12</sup> Ma gojc xchej da't nünbeedi xtiidx Dios, yan bal zajcan, lëjt ma rayal gulüü ben ren ree, per lëjt sta ryaadx chu' bën gulüü lëjt xtiidx Dios stijb ni basiididi guia'xchej. Lëjt naj zi'c tijb xindoo ni rë' ganax lejch luar gawix graloj. <sup>13</sup> Abi' gra ree bën naj zi'c xindoo ad wayajct gaw graloj, ad zile't gagbee reeman conin naj xnejz. <sup>14</sup> Per ree bën ni cusnuu cayignia' xtiidx Dios, laa reeman naj zi'c bën ma raw graloj guial ma rignia' reeman conin naj zagdxre con tëënin naj ni mal.

## 6

<sup>1</sup> Zeel rayal yaguieen ree naguiejn mazri yayignia' ree xtiidx Jesucrist, luar yaye'c ree yasiid ree xtiidxaman ni ma basiid ree guia'xchej. Zagdxeli naj zian luar yasiid ree naabzi xhienaag yasa'n ree ni mal ni baguieen ree yaloj, o xhienaag yaliduladx ree Dios, <sup>2</sup> o xhienaag tiobnijs bejn, o xhienaag yadxiib du yaa ree guiyc bejn, o xhienaag yasban Dios bengüt ree, o xhienaag güün Dios xguialguxtisaman chi guidxin dxej yadëëd ree cwent lojman, <sup>3</sup> zagdxeli naj guial yasnuu ree yasiid ree xtiidxaman. Abi' Dios gagnë dunuj ree din chile' yaguieen ree zian.

<sup>4</sup> Din bën ma ragbee ree xcwent Dios, bën ma nünbee ree xcwent ree ni yu' xanyabaa, bën ma gubajn ree con xSprijt



Dios, <sup>5</sup> abi' bayuladx reeman xtiidzxa'c Dios, ma ragbee t e reeman xhienaag nabee Dios, <sup>6</sup> dxel rusa'n reeman guial chinal reeman xtiidzxa'c Jesucrist, par laa reeman d ad naw eg naj chu' reeman loj xnejz Dios, din zi'c rul u cucaa reeman Jesucrist Xi'n Dios loj cr uz zatijb din guze' ree bejn laaman. <sup>7</sup> B enguidxliuj ree naj reeman zi'c tibia' guidxliuj ni r e' guibidx guia ni ryajb, abi' bal rajc da't guiniaa guin par b en r jn dxiin lojn dxel r jnle' Dios laan. <sup>8</sup> Per bal ganax gui jch n e ree gui'xh mal rliejn lojn, dxel ad r jntan sirv, abi' mazri z ed gajxh casti par guidxliuj guin abi' casti guin naj guial che'can.

### *Ni nuzujdxi'ch dunuj ree loj xnejz Dios*

<sup>9</sup> Ad caynatan zian por l jt, din dunujn rayagbee guial zagdxen cay jndi, guial zinalquidi ni rayal g undi din laadi loj xcasti Dios. <sup>10</sup> Abi' laaman r jn xguialguxtisaman zi'c rayal, abi' ad zayanladxtaman ni zagdxe ni beendi n e guial ma bal udi guial r ndi laaman, abi' beendi yudar cusnuu t e cay jndi yudar dux compniar ree b en raliduladx ree Jesucrist. <sup>11</sup> Per dunujn ray nan guial gusnuu g undi zian xt dxej chigra, sin guial yaleny'a'di din yayalidi ni cab zidi tia'di. <sup>12</sup> Ad gaquidi b en ploj, gol been zi'c been ree b en bililadx Dios sin guialralenya' tia' reeman ni r b Dios tia' reeman.

<sup>13</sup> Chi been Dios promejs loj Abraham, baza't laagajcaman din achut b en mazri lasajc guial lojman, <sup>14</sup> abi' r baman loj Abraham: "Naj diidxli g nle' l j abi' d ad zien ree xdiaal chu'." <sup>15</sup> Abi' Abraham guyuman pacens ad balenya'taman persi cwa'man ni r b Dios gud eman lojman. <sup>16</sup> Chi r jn bejn jurar, r jnman jurar por stijb b en mazri lasajc guial lojman din guiguien guial diidxliqui g unman ni r baman. <sup>17</sup> Ziangajc yan, guial r n Dios gul uman loj ree b en ni tia' ni r baman guial ad yu't dxej guchaa xixgabaman por promejs ni beenman, zeel beenman jurar. <sup>18</sup> Tio'p ni ad zaze'nt been Dios, beenman promejs been t eman jurar abi' rayagbee ree guial ad rnieetaman diidx rusquiee. Zianan zeel nadxu' ree valor zubiig ree loj Dios din g unman dunuj ree yudar guial ma raya'p ree confianz guial gac zi'c ma r baman. <sup>19</sup> Abi' guial rayagbee ree guial gac zi'c ma r b Dios, zeel nadxu'dxi'ch ree loj xtiidxaman zi'c nuzujdxi'ch tijb ganch guilb tijb barcw. Abi' guial nadxu'dxi'ch ree diidz xanyabaa z edan, <sup>20</sup> lod ma guyu Jes s par guixhialaman nejz par dunuj ree, b en ma naj bixhioz zobjloj tiblayaa zi'c goc Melquisedec.

## 7

*Jes s naj bixhioz zi'cgajc gojc Melquisedec*

<sup>1</sup> Melquisedec gojc rey Salem gojc tëëman xbxhioz Dios bén yu' xanyabaa. Chi baza Abraham loj wadijl lod beenman gan rey gudilnë ree laaman, dxel bigchaagloj Melquisedec laaman, abi' beenle'man Abraham. <sup>2</sup> Dxel loj gra ree ni been Abraham gan, beenman laan chii lala' abi' badëëman tijban loj Melquisedec. Melquisedec rën guiëban “rey ni rüjn xguialguxtis zi'c rayal”, Abi' guial gojcaman xrey Salem rën guiëban “rey rabe'cdxe luxdoo ree bejn”, din Salem rën guiëb “ni rabe'cdxe luxdoo ree bejn”. <sup>3</sup> Melquisedec guin achut ragbee chu naj xDadaman, o xniaaman o chu ree nin naj xdi-aaman. Achut ragbee goc gojlaman goc tëë güjtaman. Laaman goc bixhioz zi'cgajc Jesús Xi'n Dios bén ma naj bixhioz par tiblayaa.

<sup>4</sup> Gol been xgab xi bén lasajc gojc Melquisedec nadxel. Zeel xt dux béngulal ree Abraham badëë tib part loj chii ni beenman gan loj ree rey ni gudilnëman. <sup>5</sup> Loj ley rëb guial ree bixhioz Israel ni zëed loj xdiaa Leví rajp reeman derejch tia' reeman tib part loj chii ni rajp ree bén Israel, majsi tijbzi loj xdiaa Abraham zëed gra reeman. <sup>6</sup> Melquisedec majsi ad zëedtaman loj xdiaa Leví, per cwa'man tib part loj chii ni been Abraham gan. Dxel beenle'man Abraham bén cwa' xpromejs Dios. <sup>7</sup> Abi' dunuj ree rayagbee guial bén rüjnle' stijb bejn, mazri lasajcaman guial loj bén rüjnle'man. <sup>8</sup> Per gra ree bixhioz ni rtia' tib part loj chii la' ni rajp ree bejn, rëjt gajc reeman zi'cgajc dunuj ree. Sa'n Melquisedec bén cwa' tib lia' ni been Abraham gan, loj xtiidx Dios ruza't laaman zi'c rulüü sta nabanman. <sup>9</sup> Yan zi'c rulüü yaguie'ch ree guial Leví con ree bixhioz ni zëed loj xdiaaman bén ni rtia' ree tib part loj chii ni rajp ree bejn në reeman badëë tib part guin loj Melquisedec loj hor ni bigchaagloj Melquisedec dux béngulal ree Abraham. <sup>10</sup> Din chi bigchaagloj Melquisedec dux béngulal ree Abraham, ad wayut Leví, per loj xdiaa Abraham zëed Leví.

<sup>11</sup> Bal por ree bixhioz Levitas nile' niajc bejn naya delant loj Dios por ley ni guyu par ree bén Israel, dxel ad rüjntri naguiejn ni't stijb bixhioz bén naj zi'c Melquisedec ad zi'ct Aarón. <sup>12</sup> Din chi bidxaa bixhioz nëgajc ley bidxaa, <sup>13</sup> din dux Dad ree Jesucrist laaman naj bixhioz guin. Per ad lojt xdiaa ree bixhioz zëedaman, loj diaa ren zëedaman abi' ni'qui tijb ree xdiaaman ad gojct bixhioz. <sup>14</sup> Dunuj ree rayagbee guial loj xdiaa Judá zëed dux Dad ree Jesucrist abi' Moisejs ad baza'ttaman diaa guin chi rëbaman chu reenin gac bixhioz.

<sup>15</sup> Per laa rguien gajc guial Jesucrist naj bixhioz zi'cgajc Melquisedec, <sup>16</sup> guial ad lojt xdiaa Leví zëedaman zi'c rëb loj ley par gac bejn bixhioz, najman bixhioz guial rajpaman

guialrniabee guibanman tiblayaa. <sup>17</sup> Din ze rëb loj xtiidx Dios por laaman:

Lüj naj bixhioz par tiblayaa, lasa' bixhioz ni goc Melquisedec.

<sup>18</sup> Zianan zeel gojc ley guin tiblad guial ad beentan sirv guial nüjn bejn zi'c rniabee ley guin. <sup>19</sup> Ad bile't nüjn ley guin gan nibajn bejn zagdxe delant loj Dios. Per luar ley guin zagdxe naj guialrliladx ni raya'p ree din por guialrliladx guin ma raya'p ree nejj par yadxin ree loj Dios. <sup>20-21</sup> Gulal chi ru bejn rajcaman bixhioz, achet promejs been Dios, per chi bacaabee Dios Jesús gacaman bixhioz, Dios been promejs zi'c ca tiblajt loj xtiidxaman lod rëb:

Dux Dad ree Dios ma been promejs abi' ad zuchaat xixgabaman:

“Lüj naj bixhioz par tiblayaa, lasa' bixhioz ni goc Melquisedec.”

<sup>22</sup> Zeel zian zagdxe naj nejj cüb ni guxhal Jesús par yadxin ree loj Dios. <sup>23</sup> Gulal zien gojc ree bixhioz per guial rdxin dxej rëjt reeman ad bile't niajc reeman bixhioz par tiblayaa. <sup>24</sup> Per Jesús ad yu't dxej guiëtaman ad yu' tëët dxej lox guial najman bixhioz. <sup>25</sup> Zianan zeel rile' rabëëman bejn ree loj xcasti Dios, bén rën ree gap nejj par guidxin reeman loj Dios por laaman, din laaman rajpaman guialnaban par tiblayaa par cwedx guiniabaman Dios por laa reeman. <sup>26</sup> Zeel laaman naj bixhioz zobjloj bén rayaadx ree gagnë dunuj ree. Din laaman naj bén naya nali, achet ni mal rüjnman, nayaman loj Dios, garen najman guial loj béndol, abi' zobjaman xanyabaa cwë' Dios. <sup>27</sup> Laaman ad ryadxt güünman zi'c rüjn ree bixhioz zobjloj guial guixie guixie rugüjt reeman be gui'xh zi'c gon par Dios. Yaløj por xtol gajc reeman dxel por xtol ree ben ren. Per Jesús con tib volt güjtaman por dux tol ree, ad ryaadxtri guiëtaman stijb. <sup>28</sup> Por ley bile' gojc ree bejn bixhioz zobjloj majsi ad nayaalojt naya reeman niz loj Dios. Per despuejs rëb Dios guial diidxliczi xi'nman gac bixhioz zobjloj, laaman nayaaloj nayaman niz loj Dios zianczi.

## 8

### *Jesús naj dux bixhioz zobjloj ree*

<sup>1</sup> Loj gra diidx ni caydü ree ni mazri lasajc naj guial Jesucrist naj dux bixhioz zobjloj ree, bén ni ma zobj xanyabaa xladbee Dios bén rniabee. <sup>2</sup> Ni ma rüjnman sirv guialbixhioz, lën yadoo ni bazoob Dios, ad bénguidxliujt. <sup>3</sup> Gra ree bixhioz zobjloj loj guidxliuj guie xchiin reeman naj guial rinë reeman gon rugüjt tëë reeman be ree zi'c gon par Dios. Ziangajc Jesucrist bén naj dux bixhioz zobjloj ree yu' ni badëëman loj Dios. <sup>4</sup> Abi'

bal sta za' Jesucrist loj guidxliuj guie ad niajctaman bixhioz, guial ma yu' ree bixhioz ni rinë ree gon loj Dios zi'c rniabee ley ni basa'nnë Dios Moisejs. <sup>5</sup> Per gra ni rüjn ree bixhioz loj guidxliuj guie, najzi reen zi'c tijb bala, zi'c tijb sen xhienaag naj ree ni yu' xanyabaa. Dunuj ree rayagbee guial najzi reen zi'c tijb sen din chi ma cadxin gajxh güün Moisejs yadoo, dxel rëb Dios lojman: “Baguiaa zagdxë din güünl zi'cgajczi balün lüj ruguia' Sinaí.” <sup>6</sup> Per mazri zagdxë naj ni rüjn Jesucrist, bën bayal naj dux bixhioz zojbloj ree, din mazri zagdxë naj nejz cüb ni guxhalaman din chile' yadxin ree loj Dios. Abi' por nejz cüb guin mazri zagdxë naj ree xpromejs Dios par bejn.

<sup>7</sup> Bal por ley nile' nibajn bejn zagdxë delant loj Dios, dxel ad rüjnt naguiejn niu nejz cüb. <sup>8</sup> Per baguiaa Dios guial ad cayüjnt ree bejn zi'c rayal zeel rëbaman:

Naj rni guial guidxin dxej gaxhalan nejz cüb par ree bën Israel në ree bën Judá.

<sup>9</sup> Per nejz cüb guin ad najtan zi'c ley ni basa'nan loj xbéngulalidi chi babën laa reeman Egipto.

Abi' guial ad bazoobt reeman da diidxan zeel gulëladxan laa reeman, zian rëb Dios.

<sup>10</sup> Rëb tēēman:

Zian ma baya'n diidx gac con ree bejn chi guidxin dxej guijc reeman yasa'nan da leyan abi' lën luxdoo reeman gucanan.

Dxel naj gac xDios reeman, abi' laa reeman gac da bejnan.

<sup>11</sup> Dxejzii ree ad rüjntri naguiejn gusiid ree bejn lasa' reeman. Ni'qui bijch reeman par güünbee reeman naj, din gra reeman güünbee naj, diizd xindobëz xt bengol.

<sup>12</sup> Abi' naj gün perdon gra ree ni mal ni ma been reeman, abi' ad yu't dxej gusaaladxan xtol reeman.

<sup>13</sup> Chi rëb Dios guial guixal nejz cüb guin rën guiëban guial achetri sirv rüjn nejz gulal guin ni gop ree bejn par guidxin reeman lojman, abi' ni ad rüjntri sirv nayob nitan.

## 9

*Yadoo ni yu' loj guidxliuj në yadoo ni yu' xanyabaa*

<sup>1</sup> Dunuj ree rayagbee guial chi binal bejn ley ni cayguie'ch ree naj nejz gulal, loj ley guin zëed xhienaag guiën bejn Dios, xhie tēē naag rayal güün reeman tijb yadoo loj guidxliuj guie.

<sup>2</sup> Lën yadoo guin guzëeb tijb lajd persi gojcan tio'p lën. Tijb lënan ni naj niz ro' port, lod brii laj lod nada abi' lën guin guzojb ni ru gandel në tijb mex ni gudxib ree guiadxtil ma gogle'. <sup>3</sup> Dxel stijb lën guin xijch lajd guin brii laj lod mazczi nada. <sup>4</sup> Lën guin guyu tijb altar ni or lod rgu' reeman goxyal

në tijb caj ni brii laj xcaj xpromejs ree Dios. Abi' caj guin nadüüban or zi'c lënan zi'c xijchan. Lën caj guin yu'chaaw guiaj ni ca ree guidxii xmandamient Dios në xvar Aarón ni бага' con stijb re or ni guyuchaaw mana. <sup>5</sup> Dxel guijc caj guin guzobj tio'p xfigur ree anjl bén la ree querubines abi' con xhiil reeman rusiaaw reeman guijc lod ru-roob bixhioz zobjloj xrejn ree be por xtol ree bejn. Per por yan ad rüjnt naguiejn guzatan mazri ree ni guin lojdi.

<sup>6</sup> Chi gulox been reeman gra zi'c rayal gac lën tijb yadoo loj guidxliuj guie, dxel guixie guixie guyu ree bixhioz lën yadoo guin per naabzi lod brii laj lod nada, lod rguieen reeman ni rayal güün reeman par Dios. <sup>7</sup> Per stijb lën guin lod la mazcsi nada, tijbzi bixhioz zobjloj ru ni tib volt lën tib ijz. Abi' ad zajct chu'man bal id zinëman xrejn ree be din güün Dios perdon xtolaman në xtol ree bejn. <sup>8</sup> Por ree ni guin rulüü xSprijt Dios dunuj ree guial la'tgaj rüjn sirv lod brii laj lod nada ad yu't mod chu' bejn lod la mazcsi nada. <sup>9</sup> Gra ree ni guin najzi reen tijb ejempl par dunuj ree yan, din gon në ree be ni binë ree bejn par Dios, ad beent reen sirv par nayaaloy ninialadx reeman guial ma naya reeman loj Dios. <sup>10</sup> Gra ree costumbr ni gop reeman zi'c ree con ni gudaw reeman, në ree ni gu' reeman në gra ree ni rayal güün reeman din naladx reeman guial ma naj reeman naya, laan naj ni gunabee ley güün ree bejn xt dxej ni bachaa Dios gra.

<sup>11</sup> Din yan ma bi't Jesucrist, bén naj bixhioz zobjloj par dunuj ree, abi' por laaman ma raya'p ree yaya'p tēē ree ni ma rëb Dios yaya'p ree. Abi' mazri zagdxe naj lën yadoo lod ma guyuman mazri lasajc yadoo guin guial ad zobjtan loj guidxliuj guie ad gojc tēētan por ree bénguidxliuj guie. <sup>12</sup> Jesucrist ma guyuman lën yadoo lod nada da't, per ad con xrejnt ree go'n dobëz o xrejn ree dxib, guyuman con quijb xrejnman. Laaman con tib volt guyuman, ad rüjnt naguiejn güünman zian stijb abi' por laaman raya'p ree perdon par tiblayaa. <sup>13</sup> Tiamp gulal xrejn ree dxib o xrejn ree go'n o cobdëj ni we'c ree vagdobëz ru-roob bixhioz guijc ree bejn persi naladx reeman ma naya reeman. Yan bal zian naladx reeman guial raya'n reeman naya, <sup>14</sup> diidxgui con xrejn Jesucrist nid zanaduladx ree ya guial ma naya ree niz loj Dios xcwent dux tol ree, din chile' yaguieen ree ni rën Dios bén naban. Din por xguialrniabee xSprijt Dios, Jesucrist bén ad beentczi dol, badëë laagajcaman zi'c tijb gon par Dios.

<sup>15</sup> Zeel por Jesucrist ma raya'p ree tijb nejz cüb par yadxin ree loj Dios. Din por xguialgüjt Jesucrist ma yu' perdon par dux tol ree në xtol ree bén ni binal ley, gra ree bén naj xbejn Dios zian yaca' ree ni rëb Dios yaya'p ree par

tiblayaa. <sup>16</sup> Din zi'cgajc tijb bén rlies tijb gui'ch guial chu yaya'nnë ree ni rajpaman, ad zÿjnt gui'ch guin dxiin xt chi ma gÿjtaman. <sup>17</sup> La'tgaj naban bén guin achet sirv rÿjn gui'ch guin, rÿjnan sirv xt chi ma gÿjtaman. <sup>18</sup> Zeel diizd tiamp gulal par guzuloj been sirv ley ni basa'n Dios loj Moisejs, bagÿjt reeman tio'p choon ree be gui'xh persi gulëë reeb rejn. <sup>19</sup> Din chi gulox bagojn Moisejs gra ree bejn gra ni zëed loj xley Dios dxel cwa'man guidxlad xiil ni nayë' culor xnia bacaaman laan guijc tib xidx yag ni la hisopo, dxel badxe'man laan loj nijs ni no'ch xrejn ree go'n dobëz con xrejn ree dxib dxel bacojpaman laan loj libr ley në guijc ree bejn <sup>20</sup> rëbgajman: "Rejn guie naj tijb sen guial ma banee Dios xleyaman lojdi par gÿündi laan cumplid." <sup>21</sup> Bacojp tëëman rejn guin lën yadoo në guijc gra ree ni rÿjnnë ree bixhioz dxiin lën yadoo. <sup>22</sup> Ley guin gra gunabeen gagle' con rejn din guiguien guial ma naya reen delant loj Dios, din sin rejn achet perdon par dol yu'.

### *Xrejn Jesucrist rquied dol*

<sup>23</sup> Zeel par guiguien guial ma naya ree ni beennë ree bixhioz dxiin lën yadoo guin, gojc naguiejn bagÿjt reeman be ree persi beenle' reeman ni guin ree. Per ni guin ree najzi reen zi'c tijb xsen ni yu' ree xanyabaa, din par ree ni yu' xanyabaa ryaadx rejn mazri lasajc guial loj xrejn ree be. <sup>24</sup> Abi' Jesucrist ad lënt yadoo ni been bénguidxliujn guyuman, yadoo ni najzi tijb sen guial xhienaag naj xanyabaa, ma guyuman xanyabaa lod caneeman por dunuj ree loj Dios. <sup>25</sup> Jesucrist ad biaadxt niëjtaman zien volt por dol ree, ad beentaman zi'c been ree bixhioz zobjloj guial gazobijz binë reeman xrejn ree be lën yadoo lod brii laj lod nada da't. <sup>26</sup> Din bal id zian, zien volt niëjtaman diizd chi gocchaaw guidxliuj. Per chi bidxin dxej bi'taman, con tib voltzi badëë laagajcaman par guiëtaman din chiquied dux tol ree. <sup>27</sup> Zi'cgajc gra bejn tib voltzi rëjt reeman, dxel zëed ni yadëed reeman cwent loj Dios. <sup>28</sup> Ziangajc Jesucrist tib voltzi badëë laagajcaman par guiëtaman din quixaman por xtol ree bejn. Abi' chi gui'taman stijb ad zi'ttaman por dol, gui'taman din chignëman bén cabëz ree laaman.

## 10

### *Ad leyt riquied dol*

<sup>1</sup> Ley ni basa'nnë Dios Moisejs najzan tijb sen xcwent ree ni gac, per ad por ziant gojc ni rayal gac. Din majsi gazobijz gÿjt ree be par Dios zi'c gunabee ley gÿün bejn, per ad guyut dxej ni naladx reeman guial ma bayaaloj naya reeman loj Dios. <sup>2</sup> Din bal ninialadx reeman guial ma naya reeman con tib volt ni bagÿjt reeman be ree par Dios, dxel ad ryaadxtri nÿjn

reeman zian guial ma ragbee reeman achetri xtol reeman.  
<sup>3</sup> Per ad gunaladxt reeman zian, gazobijz rusaaladx xtol reeman chi rugüjt reeman be ree par Dios, <sup>4</sup> din xrejñ ree go'n në xrejñ ree dxib ad zajct chiquiedan xtol ree bejn.

<sup>5</sup> Zeel chi bi't Jesucrist loj guidxliuj, rëbaman loj Dios:

Ad rëntil xrejñ ree be

ni'qui los demazri ree ni ridnë bejn par lüj,  
 zeel baneel naj cuerp ni ra'pan loj guidxliuj guie.

<sup>6</sup> Ad rëntril guial ruze'c reeman be ree par lüj  
 ni'qui xrejñ ree be ni ridnë reeman por xtol reeman.

<sup>7</sup> Zianan zeel rën:

“Laa naj guie, Dad Dios,  
 zialan par gūnan zi'c rënñ,  
 zi'c ca loj libr por naj.”

<sup>8</sup> Jesucrist yaloj rëbaman guial ad rënt Dios xrejñ ree be, ni'qui los demazri ree ni rinë bejn par laaman, ni'qui guial ruze'c reeman be ree por xtol reeman zi'c rniabee ley gūñ reeman. <sup>9</sup> Chi gulox rëb Jesús zian, dxel rëb tēeman: “Laa naj guie, Dad Dios, zialan par gūnan zi'c rënñ.” Zianan baloox Jesucrist guial rinal ree costumbr ni rëb loj ley abi' guxhalaman tijb nejz cüb par yadxin ree loj Dios. <sup>10</sup> Yan ma nayajc ree naya delant loj Dios guial ma been Jesucrist zi'c rën Dios, badëäd laagajcaman güjtaman por xtol ree bejn, con tib volt par tiblayaa, ad ryaadxt gūñman zian stijb.

<sup>11</sup> Gra ree bixhioz Israel guixie guixie za' reeman cayüjn reeman gra ni rniabee ley gūñ reeman, abi' guixie guixie rugüjt reeman be ree par Dios. Abi' majsi zien volt rüjn reeman zian per ad rquiedt gualrugüjt be guin ree xtol ree bejn. <sup>12</sup> Per Jesucrist con tib volt badëäd laagajcaman güjtaman por xtol ree bejn, ad ryaadxt gūñman zian stijb. Dxel gurejman xladbee Dios, <sup>13</sup> lod cabëzaman guidxin dxej nabeeman loj gra ree bén rdxe'ch laaman. <sup>14</sup> Din laaman con tib volt badëä laagajcaman güjtaman por xtol ree bejn dxel tiblayaa ma naya ree bén rliladx laaman. <sup>15</sup> Abi' dunuj ree rayagbee ree guial walin din por xSprijt Dios zëäd ree diidx ni ca loj xtiidx Dios guial rëb Dios:

<sup>16</sup> Zianan ma baya'n diidx gac  
 con ree bejn chi guidxin dxej:  
 Guijc reeman gusa'n da leyan  
 abi' lën luxdoo reeman gucanan

<sup>17</sup> Abi' rëb tēeman:  
 Ad yu't dxej gusaaladxan xtol reeman  
 në graloj ree ni mal ni ma been reeman.

<sup>18</sup> Abi' zi'c ma yu' perdon par dol, ad rüjntri naguiejn guiët ree be por dol.

### *Royal yubiig ree loj Dios*

<sup>19</sup> Zeel compniar raliduladx ree Jesucrist sin gualrdxeb ma zajc yadxin ree lod zojb Dios por xrejn Jesucrist, <sup>20</sup> din chi badëed xcuerpaman persi güjtaman, guxhalaman tijb nejz cüb ni zidnë gualnaban par dunuj ree. <sup>21</sup> Yan zi'c ma rniabee Jesucrist dunuj ree, bén naj bixhioz zojbloj xanyabaa, <sup>22</sup> con guidib du luxdoo ree ma zajc yubiig ree loj Dios con tijb gualrliladx ni wali ree raliduladx ree laaman, con tijb quiarguejn naya sin xgab mal, con tijb cuerp ni ma baya loj dol, zi'c chi qui badiibri dux cuerp ree con nijs naya. <sup>23</sup> Zeel royal yadxu'dxi'ch ree loj ni raliduladx ree Dios, din laaman züjn cumplid xtiidxaman zi'c ma rëbaman. <sup>24</sup> Royal yagueien ree xgab xhienaag yalu' ree luxdoo ree dux compniar ree yayën tëe du lasa' ree yagueien tëe ree ni naj zagdxe. <sup>25</sup> Ad rayalt yagueien ree zi'c rüjn ree bén ad rejtri ree lod radxaag lasa' ree dux compniar ree par chignia' reeman mazri xtiidx Dios, royal yalu' ree luxdoo du lasa' ree, abi' mazri yan gual ma rayagbee ree gual ma zidyob dxej gui't Jesucrist stijb.

<sup>26</sup> Din bal ma rayagbee ree xtiidxli Jesucrist abi' baguieen ree xgab yagueien ree mazri dol, dxel ad yu'tri por chu zajc yayajc ree perdon. <sup>27</sup> Ni cabësi dunuj ree naj xgualguxtis doxh Dios, tijb bajl lod yayal ree bén ad ruzoobt xtiidxaman. <sup>28</sup> Chi bal id been tijb bejn zi'c rniabee ley ni basa'nnë Dios Moisejs, abi' yu' tio'p choon testiw gual ad beent bén guin zi'c rniabee ley guin, dxel ad yu'tri mod laaman loj gualgüjt ni rayalaman. <sup>29</sup> Yan gol been xgab, ¡xixpi mazri castiro' yayal bén rnieeguijdx xSprijt Dios bén ragnë dunuj ree! Bén ni naladx gual achet lasajc Xi'n Dios, abi' rüjnman desprejs xrejnman, rejn ni rulüü gual gac zi'c rëb Dios, rejn ni rusia xtol bejn. <sup>30</sup> Dunuj ree rayagbee gual rëb Dios: "Naj royal gün gualguxtis, naj gudë ni royal bejn." Rëb tëëman: "Dios naj bén ni yaca' cwent por ni cayüjn bejn." <sup>31</sup> ¡Abi' nadxeb yayal bejn xcasti Dios bén naban!

<sup>32</sup> Per lëjt gol basaaladx xhienaag guzajquidi chi qui been-beeridi xtiidxli Jesucrist. Gudaandi gra gualzi ni gudëdidi. <sup>33</sup> Yu'di zien loj da't gualzi badëed ree bejn lëjt, abi' baze' reeman lëjt delant loj ree bejn, yu' tëedi ad gulëeladxtidi bén guzac ree zian. <sup>34</sup> Ad gulëeladxtidi bén ni guyu ree ladxguiib, abi' chi baca' ree bejn gra ni rajpidi, babaagajquidi gual ma ragbeedi mazri lasajc ni rajpidi xanyabaa, në ree ni rajpidi ni, taan reen tiblayaa. <sup>35</sup> Zeel ad gusa'ndi gualrliladxidi Jesucrist, din por gualrliladx guin dád zagdxe naj ni tia'di. <sup>36</sup> Rüjn naguiejn gapidi pacens din chile' güündi zi'c rën Dios, zian tia'di ni ma rëbaman guneeman lojdi. <sup>37</sup> Din loj xtiidx Dios rëb:



Nayob, dád nayob gui't bën naj gui't,  
ad zaglaataman.

<sup>38</sup> Abi' bën naban zi'c rënan,  
guidib tiamp ni nabanman rlliladxaman naj.  
Per bal gusa'nman ni rlliladxaman naj,  
ad zabaanë'tan laaman.

<sup>39</sup> Per dunuj ree ad nayajct ree zi'c ree bën rusa'n ni rlliladx  
reeman Jesucrist abi' rayal reeman casti, dunuj ree nayajc ree  
bën rlliladx Jesucrist diidxli par chitëë yayal ree casti.

## 11

### *Guialrliladx Dios*

<sup>1</sup> Yan, ¿xhienin naj guialrliladx? Guialrliladx naj guial guidi-  
blagaa yaliduladx ree gac zi'c caylëjz ree gac, në guial waliqui  
ni raliduladx ree ni ad raguiaat ree. <sup>2</sup> Dux béngulal ree baya'n  
reeman zagdxe delant loj Dios guial bililadx reeman laaman.

<sup>3</sup> Zi'c raliduladx ree Dios, dunuj ree rayagbee guial con xti-  
idxaman beenman xanyabaa në guidxliuj në gra ni raguiaa  
ree, achetczy ni beenman con ree ni raguiaa ree yan.

<sup>4</sup> Guial bililadx Abel Dios, zeel zagdxe naj gon ni badëëman  
guial loj Caín, abi' baya'nman zagdxe delant loj Dios abi' cwa'  
Dios gon ni bazaladx Abel lojman. Zian majsi ma güjt Abel,  
per sta rguiajt xhienaag bililadxaman Dios.

<sup>5</sup> Guial bililadx Enoc Dios zeel ad güjttaman, guidib naban-  
man ziaman xanyabaa abi' ad badxejlt ree bejn laaman guial  
ma zignë Dios laaman. Per chi gadaman chignë laaman, loj  
xtiidx Dios rëb guial bayuladx Dios zi'c gubanman. <sup>6</sup> Abi'  
achut zajc güün zi'c rën Dios bal id rlliladxaman laaman.  
Chutëëz bën rën gap nejz par guidxinman loj Dios rayal  
chililadxaman guial yu' Dios chililadx tëëman guial laaman  
rudëë ni rëbaman gudëëman loj ree bën raguiil laaman.

<sup>7</sup> Guial bililadx Noé Dios dxel chi rëb Dios lojman guial  
gac ree ni gadaman guguiaa gac bazoobaman xtiidxaman,  
beenchaawaman tijb barcw din laaman con ree xfamilaman  
loj ni rëb Dios gac. Dxel por guialrliladx guin biguien guial  
gra bénguidxliuj rayal casti ni rëb Dios, abi' baya'n Noé zagdxe  
delant loj Dios guial bililadxaman xtiidxaman.

<sup>8</sup> Ziangajc Abraham guial bililadxaman Dios, bazoobaman  
xtiidxaman chi rëbaman lojman din grii ladxaman cheman  
lod tia'man guidxliuj ni gudëëd Dios lojman. Abi' brie  
ladxaman ni'quid ragbeetaman banguin cheman. <sup>9</sup> Guial  
bililadxaman Dios, gubajnman zi'c benzit loj guidxliuj ni rëb  
Dios gudëëdaman lojman. Gurejman lën ree carp ni naj në  
guid, ziangajc Isaac në Jacob në laa reeman rayal guidxliuj  
guin. <sup>10</sup> Gubajn Abraham zian guial ragbeeman chisobaman  
luguedx ni beenchaaw Dios, guiedx ni ad yu't dxej nit.

<sup>11</sup> Ziangajc Sara, por xguiarliladxaman, majsi ma najman bengol par chu' xi'nman, per guyuman gojl par gacaman na abi' guyu tijb xi'nman guial bililadxaman guial rüjn Dios cumplid xtiidxaman. <sup>12</sup> Zian gojc majsi bengol da't ma naj Abraham per gojcaman famil. Dád zien ree xdiaaman guyu zi'c ree bajl xanyabaa, zi'c ree üx ni riga' ro' nijsdoo ni ad zile't guiyab.

<sup>13</sup> Gra ree bèn ma bazatan xt bidxin dxej güjt reeman bililadx reeman Dios, majsi ad baguiaat reeman gojc cumplid gra ree promejs ni been Dios loj reeman, per guial rililadx reeman ragbee reeman guial zajc zi'c rëb Dios abi' rabaa reeman. Laa reeman ragbee guial tio'p choon dxejzi zëed reeman loj guidxliuj guie ad tiblayaat. <sup>14</sup> Abi' ree bèn rniee zian, zian rguienchaaw guial sta rguuil reeman lod diidxli gac ladx reeman. <sup>15</sup> Din bal por guidxliuj lod guza reeman cayüjn reeman xgab, dxel zile' nayejc reeman ni stijb. <sup>16</sup> Per laa reeman mazri rüjn reeman xgab por tijb luar lod naj mazri zagdx, mazri rüjn reeman xgab por xanyabaa. Zeel Dios ad ratutaman najman xDios reeman abi' ma beenchaawaman luar lod guiban reeman xanyabaa.

<sup>17</sup> Guial bililadx Abraham Dios, dxel chi been Dios laaman prueb din gugüjt xi'nman Isaac din gudëedaman laaman zi'c gon par Dios, cwëjb Abraham majsi tijbzi Isaac guin naj xi'nman, majsi ragbee tëëman guial rëb Dios lojman: <sup>18</sup> “Por xi'nl Isaac gacxhie j da't xdiaal.” <sup>19</sup> Per Abraham yu'guijcaman guial rajp Dios guialrniabee xt par yasbanman bengüt ree, abi' zi'c rulüü baban xi'nman stijb chi gudëdaman prueb guin.

<sup>20</sup> Ziangajc Isaac por guialrliladxaman Dios dxel chi beenle' ree xi'nman Jacob con Esaú, rëbaman xhienaag gac con tijbgaj reeman. <sup>21</sup> Abi' ziangajc Jacob guial bililadxaman Dios ziangajc beenle'man grop ree xi'n Xiëb chi ma guidxin hor guiëtaman. Dxel cwa' yagriadxaman abi' gurejdx gunabaman Dios. <sup>22</sup> Ziangajc Xiëb guial bililadxaman Dios, chi ma guidxin hor guiëtaman, rëbaman guial grii ree bèn Israel Egipto, abi' rëbaman loj reeman xhienaag güünnë reeman xdxijtaman.

<sup>23</sup> Por guial bililadx ree xdad xniaa Moisejs Dios chi gol Moisejs guin, baquie'ch reeman laax choon bëëw guial baguiaa reeman najx xindoza'cdxoon, abi' ad bidxebt reeman guial rëb bèn naj rey guial guiët gra ree xindobëz. <sup>24</sup> Abi' chi goc Moisejs guin bengol, guial bililadxaman Dios, gojc xixgabaman cwexuuman niajcaman xi'n xi'ndxa'p rey Egipto. <sup>25</sup> Par laaman zagdxeli naj sagdiajman con ree xbën Israelaman, luar nünman dol niro'nladxaman laa reeman din niajpaman

ni rënman, ni ad rdaant ree par tiblayaa. <sup>26</sup> Par laaman mazri lasajc sagdiajman zi'c Cristo luar ni ajpaman gra ree guialnaza'c ni yu' Egipto, din mazri yu' guijcaman guialnaza'c ni yayalaman delant loj Dios. <sup>27</sup> Guial bililadx Moisejs Dios, briiman Egipto, ad bidxebtaman majsi balen rey Egipto. Guzudxi'chaman zi'c rulüü ruguiaaman Dios bén ad zajct ruguiaa ree bejn.

<sup>28</sup> Në guial bililadx Moisejs Dios, beenman lanij pascw, abi' gunabeeman baroob ree bén Israel rejn ro' xport lidx reeman, din chi täd xianjl guialgüjt, ad zugüjttaman xi'n yaloj ree bén Israel. <sup>29</sup> Guial bililadx ree bén Israel Dios, gudöd reeman zi'c loj yujbidx lod bixal loj nijsdoo la nijsdoo xnia. Per chi guyën ree bén Egipto nidöd reeman, loj hor guin bayaaw nijs guin dxel gu' reeman nijs abi' güjt reeman.

<sup>30</sup> Guial bililadx ree bén Israel Dios, chi baza' gajdx dxej ni biaw reeman guiedx Jericó, dxel bazaj ze' ni nayaw guiedx guin. <sup>31</sup> Abi' Rahab bén goc béngunaa dxuudx luguiedx Jericó, guial bililadxaman ad güjttaman chi güt ree los demazri ree bén ladxaman bén ad bazoobt ree diidx, guial baca'man bén Israel ni we ree bigla'ch luguiedx guin.

<sup>32</sup> Yan, ¿xhie mazri ganin lojdi? Ad zadaant tiamp guin ganin lojdi xcwent Gedeón, Barac, Sansón, Jefté, Davi, Samuel në xcwent ree bén badëë xtiidx Dios loj ree bejn. <sup>33</sup> Gra reeman bililadx Dios abi' been reeman gan loj zien ree nacion, been xguialguxtis reeman zi'c rayal, baguiaa reeman gojc cumplid ni rëb Dios loj reeman abi' basiaaw reeman ro' ree beedx. <sup>34</sup> Guzuj reeman loj bajl ro' abi' achet goc reeman, gulaa reeman loj guialgüjt con espad, guyu reeman gojl chi rulüücüzi ad yu't reeman gojl, guzudxi'ch reeman loj wadijl abi' balaagdxa reeman benzit ni gudilë reeman. <sup>35</sup> Në ree béngunaa ni güt ree xfamil, por guial bililadx reeman Dios baban ree xfamil reeman stijb.

Per yu' ree bejn majsi güjt reeman, per par laa reeman mazri zagdx guzagdiaj reeman loj ree bén bagüjt laa reeman, luar nusa'n reeman guialrliladx reeman Dios par gap reeman stijb guialnaban cüb ni mazri lasajc. <sup>36</sup> Yu' tää reeman guzagdiaj baze' ree bejn laa reeman, gudijn ree bejn laa reeman, xt guxhii ree bejn laa reeman con caden abi' guyu reeman ladxguiib. <sup>37</sup> Yu' reeman bagüjt ree bejn con guiaj, yu' tää reeman bagüjt reeman gulëëxhün reeman laa reeman con sierr, güjt tää reeman con espad. Yu' tää reeman biza gra lad najcw reeman guid xab xiil në guid xab dxib, probza laa reeman naya biza reeman, graloj beennë ree bejn laa reeman. <sup>38</sup> Biza reeman niz loj yujbidx, niz ruguia' ree, në graloj lën ree guiajbiliaa. Bén guin ree ad rayal nibajn

reeman loj guidxliuj guial dád benza'c gojc reeman. <sup>39</sup> Abi' majsi biguien guial gra reeman diidxli bililadx reeman Dios, per ad cwa't reeman ni rëbaman loj reeman. <sup>40</sup> Din laaman beenman xgab tijb ni mazri zagdxe par dunuj ree, abi' ad gojc gajt ni rëbaman loj reeman din tijbzi yaca' ree ni rëbaman con laa reeman.

## 12

### *yunaal ree Jesús*

<sup>1</sup> Zeel, zi'c ma bacaagdiajg ree por zien ree bejn xhienaag bililadx reeman Dios, rayal yasa'n ree tiblax gra dol në gra ree ni rudxoon yaguieen ree zi'c rayal, ad zalenya' tēet ree yunaal ree nejz ni ma balüü Dios dunuj ree. <sup>2</sup> Rayal yadxe'guijc ree Jesucrist din por laaman zēed guialrliladx ni raya'p ree abi' por tijbzi laaman rayaal loj guialrliladx ni raya'p ree. Gudaanman guialzi ni gudëdaman loj crüzj, ad batutaman güjtaman zian din ragbeeman guial chi ma gulox guzagdiajman, dxel gui't guialrabaa. Abi' yan ma zojbaman xladbee Dios xanyabaa.

<sup>3</sup> Gol been xgab xhienaag guzagdiaj Jesucrist chi basagdiaj ree bëndol laaman, chitēē yadxaguidi, ad yalenyadi por ni cazajquidi. <sup>4</sup> Din majsi cusagdiaj ree bejn lëjt guial cayüjndi naguiejn ad cayüjntidi dol, per ad wazujtidi loj guialgüjt por zian. <sup>5</sup> ¿Wen ma bayanladxidi ya xhienaag banee Dios lëjt consejw najdi xi'nman? Loj xtiidxaman rëb:

Xi'n, bidxga' zi'c runee dux Dad ree Dios lüj consejw, ad bal yalenyal chi guzuxnejzaman lüj.

<sup>6</sup> Din rüjnnaaman bén ni naj ree xi'nman, ruzuxnejzaman laa reeman guial rënman laa reeman.

<sup>7</sup> Zeel gol gudaan guialzi, din zagdxe najn par lëjt. Rüjnnë Dios lëjt zi'c rüjnnë bejn xi'nman, ¿wen yu' dad ad ruzuxnejzt xi'n ya? <sup>8</sup> Yan bal id ruzuxnejz Dios lëjt zi'c rüjnnë gra ree xi'nman, rën guiëban guial ad najtidi xi'nman diidxli, ad najtaman xDadidi. <sup>9</sup> Lëjt ragbee guial chi bayajc ree xindoo, gudijn dux dad ree dunuj ree din yacaagdiajg ree xtiidxaman abi' raya'p reeman respejt. Yan, ¿chexc di ad ree yazoob xtiidx dux Dad ree Dios bén yu' xanyabaa, din yaya'p ree guialnaban con laaman? <sup>10</sup> Dux dad ree ruzuxnejzaman dunuj ree por tio'p choon dxej ni zio'p ree loj guidxliuj din yaguieen ree zi'c ni naladxaman naj zagdxe. Per Dios ruzuxnejzaman dunuj ree par tijb ni mazri zagdxe par dunuj ree, ruzuxnejzaman dunuj ree din yabajn ree naya zi'c laaman. <sup>11</sup> Diidxliczi achet guialnaa naj nix loj hor ni cadëdilan, ragnaalil. Per ree bén ni rusiid ruzoob diidx zian, laa reeman naban zagdxe, naalyuj delant loj Dios.

*Ad cwëëladxidi xtiidx Dios*

<sup>12</sup> Zeel gol bagu' luxdoodi, gol badëed valor lëjt gajc zi'c tijb bèn raca'ladx chi ma badxag da'taman. <sup>13</sup> Gol been naguiejn gol gubajn xnejz, din ree bèn ragdxa xhie güün reeman, ad gusa'n reeman xnejz Dios, chu' luxdoo reeman zagdxé chinal reeman laan.

<sup>14</sup> Gol been naguiejn guibandi zagdxé con gra ree bejn, gol gubajn naya delant loj Dios din bèn ad nabant naya ad zile't guguaaman dux Dad ree Dios. <sup>15</sup> Gol gojp cudad chitëë chu' tijbidi gusa'n tiblax zi'c rën Dios gagnëman lëjt chitëë chu' tijbidi gac zi'c gui'xh nala ni rüjn guialquia abi' guxhiinan gra xcompniaridi. <sup>16</sup> Ni'qui tijbidi ad rayalt sunëdi bèn ad najt lacheelidi, ad cwe'quidi tiblax ni zagdxé ni zëed ree por Dios chitëë saquidi zi'c guzac Esaú, por tijb guialraw bato'man guialrniabee ni rayalaman guial najman bèn yaloj loj bijchaman. <sup>17</sup> Abi' lëjt ragbee guial chi guyën Esaú nünjle' xdadaman laaman ad beenle'taman laaman zi'c rayalaman. Majsi dád biinman gunabaman laan, per ad bile't nuchaaman ni beenman.

<sup>18</sup> Lëjt gadidi chibig lod ad najt par gugaalidi zi'c gubig ree bèn Israel gulal guiyc guia' Sinaí lod baguiaa reeman cayajc bajl guiyc guia' guin, baguiaa reeman go'xh ya's ni basiaaw guiyc guia' guin abi' rbi' gaj tijb bidoxh yagaj zi'c bidojn. <sup>19</sup> Dxel biguiejn reeman bibejdx tijb trompejt abi' biguiejn reeman cha' Dios guneenëman laa reeman. Per guial tant bidxeb reeman biguiejn reeman cha'man dád guzajc reeman laaman liaadx ad rnieenëman laa reeman. <sup>20</sup> Din ragbee reeman guial nawëëg naj ni gunabee Dios güün reeman chi rëbaman: “Chutëëz bejn o be gui'xh ni gugaal guiyc guia' guie rayal guiëtaman o guiëtib con guiaj o con lans.” <sup>21</sup> Nadxeb naj ni baguiaa reeman xt Moisejs rëb: “Rnijn guial tant rdxeban.”

<sup>22</sup> Per lëjt ma bibiguidi loj Dios, ad guzajctidi zian. Ma yu' nejz par guidxindi ruguia' Sión, xanyabaa lod naj Jerusalén ladx Dios bèn naban, lod nadxag lasa' ree zien da't ree anjl, <sup>23</sup> dád nix yu' luxdoo reeman rën reeman laaman lod yadxajc lasa' ree xbejn Dios bèn ni ma ca ree laj loj libr xanyabaa. Ni zojb Dios, bèn yanab cwent loj gra bejn, ni tëë za' xSprijt ree bèn guban zi'c rayal laa reeman ma naya reeman por Dios. <sup>24</sup> Ni gajc zojb Jesucrist, bèn guxhal nejz cüb ni raya'p ree par yadxin ree loj Dios. Chi güt Abel xrejnman gunab gac guialguxtis, per con Jesucrist ad gojct zian, güjtlaman, guxhie' tëë xrejnman par yayajc ree perdon.

<sup>25</sup> Zeel gol gojp cudad gol bidxga' Dios, laaman najman bèn rnieenë dunuj ree. Din bal bèn ni ad bidxga't ree xtiidx Moisejs bèn badëed xtiidx Dios loj guidxliuj guie ad gulaat reeman loj casti ni rayal reeman, diidxgui dunuj ree nid

zayal ree xcasti Dios ya bal id zayidxga' ree xtiidx Jesucrist, bën guza diizd xanyabaa din guinieenëman dunuj ree. <sup>26</sup> Chi gunee Dios béngulal ree ruguia' Sinaí, binij guidxliuj. Per yan ma rëbaman: “Gunin guidxliuj zatijb, per ad guidxliujtzi, në xanyabaa.” <sup>27</sup> Chi rëb Dios guial güünman zian zatijb, rën guiëban guial gunijman gra ni beenman, din chiquied ni rayal chiquied din yaya'n ni ad rayalt chiquied. <sup>28</sup> Zeel rayal yadëed ree quixtëe loj Dios guial ma rayal ree lod canabeeman, lod ad yu't dxej nit, abi' con respejt në guialrdxeb yaguieen ree ni ruladxaman. <sup>29</sup> Din dux Dios ree naj zi'c tijb bajl ni ruze'c gra.

## 13

### *Xhienaag güün bejn ni yayuladx Dios*

<sup>1</sup> Ad cwëz guiëndi xcompniaridi bën rliladx ree Jesucrist.

<sup>2</sup> Ad yayanladxidi gudëe lidxidi yaya'n ree bën ri't, din zian yu' ree bën baca' ree xianjl Dios sin guial gagbee reeman chunin.

<sup>3</sup> Gol basaaladx bën yu' ree ladxguiib, gol gunaladx guial në lëjt yu' ladxguiib con laa reeman. Gol been tëe xgab por ree bën ni cazagdiaj, gol gunaladx guial në lëjt cazagdiaj.

<sup>4</sup> Gol gojp respejt guialruxhlaa, ad gusquiee lacheelidi. Din Dios zudëedaman casti bën za'në xinguaaaw o béngunaa ren, në gra ree bën ni rüjn ree ni dxuudx con ree bën ad najt lacheel reeman.

<sup>5</sup> Ad sëëbladxidi milia, gol baya'n conform con ni rajpidi din Dios ma rëb: “Gra dxej za'n con lüj, abi' ad yu't dxej gabëladxan lüj.” <sup>6</sup> Abi' con confianz zajc yaguie'ch ree:

Da Dadan Dios naj bën ragnë naj

ad rdxebtan majsi xhietëez güünnë ree bejn naj.

<sup>7</sup> Gol basaaladx ree bën ni gunabee ree lojdi, bën ni balüü ree lëjt xtiidx Dios. Gol been xgab xhienaag gubajn reeman gol binal tëe zi'c bililadx reeman Jesucrist.

<sup>8</sup> Abi' Jesucrist laagajcaman nieey, laagajcaman yan në zianczi. <sup>9</sup> Ad tiëbidi gusquiee graloj ni rulüü ree bejn lëjt, din ad najt reen zi'c rayal chinalidi Cristo. Mazri zagdxe gol gojp confianz xyudar Dios din guibandi xnejz luar chinalidi costumbr xcwent guial xhie zajc gawidi o xhie ad zajct gawidi, din costumbr guin ree achet yudar rüjn ree delant loj Dios.

<sup>10</sup> Dunuj ree raya'p ree tijb bën güüt por dunuj ree, laaman naj zi'c tijb xgon bejn por xtolaman, gon ni ad zajct gaw ree bixhioz rüjn ree sirv lën yadoo guin. <sup>11</sup> Bixhioz zobjloj guin, laaman rinë xrejn ree be ni rudëed ree bejn zi'c gon por xtol reeman, rinëman rejn guin lën yadoo lod rayal chinëman laan. Dxel ree begüt guin re'c reeb ro' guiedx lod achut zobj.

<sup>12</sup> Ziangajc gojc con Jesucrist, ro' guiedx Jerusalén güjtaman

par gusiaman bejn xtol reeman por xrejman. <sup>13</sup> Zeel yunaal ree Jesucrist majsi gulëe reeman laaman luguiedx Jerusalén, në majsi xhietëez gualxtu o gualrzagdiaj yadüüd ree zi'c laaman. <sup>14</sup> Din loj guidxliuj guie ad raya'pt ree tijb guiedx lod ma nabajn ree tiblayaa, dunuj ree caylëjz ree lod yabajn ree tiblayaa. <sup>15</sup> Zeel con xyudar Jesucrist ad yacwëez ree yadëed ree quixtëe loj Dios, laan naj gon yadëed ree lojman, abi' zian raxhoobdol ree gual nayajc ree xbejnman. <sup>16</sup> Ad yayanladxidi güündi ni zagdxe güün tëe lasa'di yudar con ni gactzidi, din laa reen naj ni ruladx Dios.

<sup>17</sup> Gol bazoob xtiidx ree bén rniabee lojdi, bén rulüü ree lëjt xtiidx Dios. Gol gojp reeman respekt din laa reeman ruguiaa lëjt din chinalidi xtiidx Dios, gual ragbee reeman yadëed reeman cwent loj Dios. Gol been ni yabaanë reeman ad ni cu'nayat laa reeman, din gual ad ruzoobt diidx achet sirv güünan lëjt.

<sup>18</sup> Gol gurejdx gunab Dios por dunujn. Dunujn rayagbee gual achet ni mal cayguieenan, abi' rayënan gual gra ni yaguieenan, yaguieenan laan xnejz. <sup>19</sup> Rniaaban lojdi din cwedx guiniabidi Dios por naj, din guneeman permis diob gualan din gazun con lëjt zatijb.

*Diidx bigra ni bacan loj gui'ch guie*

<sup>20</sup> Dios bén rabe'cdxe luxdoo ree bejn, bén basban Jesucrist, rajpaman dunuj ree zi'c rajp tijb bejn xiil, por xgualgüjtaman zianczi ma raya'p ree nejz par yadxin ree loj Dios, <sup>21</sup> laaman gagnë lëjt par gra ni naj zagdxe din chile' güündi zi'c rënman. Laaman gagnë dunuj ree din yayajc ree zi'c rënman gual ma nayajc ree tijbzi con Jesucrist. ¡Laaman rayal yaya'p ree respekt zianczi! Amén.

<sup>22</sup> Compniar raliduladx ree Jesucrist, ad narooft gui'ch guie, per rniaaban lojdi ad yaleny'a'di por ree diidx ni canin lëjt cunen lëjt consejw. <sup>23</sup> Rugojn tëen lëjt gual ma barii dux compniar ree Timoteo ladxguuib abi' bal nayob gui'taman niz guie, dxel du gropan yo'p yudganajn lëjt.

<sup>24</sup> Gol bagajpdioz gra ree bén rniabee lojdi bén ni rulüü ree lëjt, në gra ree dux compniar ree bén rliladx ree Jesucrist. Abi' ree bén Italia rugajpdioz reeman lëjt.

<sup>25</sup> Dios güünle' gradi. Amén

## Gui'ch bacaa Santiaaw

### *Rxhiaal Santiaaw xtiidx Dios*

<sup>1</sup> Naj naj Santiaaw, cayünan xchiin Dios në xchiin Dad Jesucrist, rugajpdiozan gra ree bën naj xdiaa Israel, nare'chidi guidib guidxliuj.

### *Quiarguiejn zëed loj Dios*

<sup>2</sup> Gradi compniar raliduladx ree Jesucrist, rnin lëjt, gol babaa majsi xhietëez loj gualrzagdiaj tëdidi. <sup>3</sup> Lëjt ragbee, chi rdëdidi gralojn gual rliladxidi Dad Jesucrist, zian rusiididi gapidi pasens. <sup>4</sup> Per gol been naguiejn güün pasens guin lëjt yudar din gaquidi zi'c rën Dios, gusnuudi loj xnejzaman, chitëë guiyaadxidi xhienin.

<sup>5</sup> Bal chu lëjt riaadx chu' mazri xquiarguiejn, gol gunab xquiarguiejndi loj Dios. Laaman gunee gra ni riaadxidi, ad zabexuutaman guneeaman laan. <sup>6</sup> Per rayal chililadxidi gual guneeaman laan, ad rayalt chu' nawëëguidi, din bën ru nawëëg luxdoo naj zi'c xtüjp nijsdoo ni rinë bi ni guiezi. <sup>7</sup> Bën naj zian ad cwëzidi gunee Dios ni guiniabidi, <sup>8</sup> din bën ru nawëëg, ad rüjntaman tijbzi xgab, ad rinal tëëtaman tijbzi nejz.

<sup>9</sup> Lëjt gual najdi bënprob gol babaa, din loj Dios najdi bën zobjloj. <sup>10</sup> Guiáad lëjt benrijcw, gol babaa gual ma ragbeedi achet lasajc gualrijcw loj Dios, din gualrijcw guin najn ni téd zi'c rdéd guiaa rial dajn. <sup>11</sup> Lëjt ragbee chi rbëë loj gubijdx gojl, dxel rucwiidxan gui'xh, rba'y ree xguiaan, dxel ad nixtri rguienan. Ziangajc benrijcw yu' dxej guiëtaman majsi galay gra ree ni rajpaman.

### *Bën rdaan ree rdëd loj gualrzagdiaj*

<sup>12</sup> Chabaa bën rzudxi'ch loj xnejz Dios rdaan tëëman xhietëez rzajcaman gual rliladxaman Jesucrist. Chi ma gudaanman loj gualrzagdiaj, tia'man coron rayalaman, laan naj gualnaban tiblayaa ni cwëb Dios yazaladxaman loj ree bën rën laaman.

<sup>13</sup> Bal chu rüjn xgab güün ni mal, ad najtan ni naladxaman gual Dios rudxe' xgab guin guijcaman. Din ad yu't dxej guiën Dios güünman ni mal, ni'quid rgu' tëëtaman xgab guijc bejn güünman ni mal. <sup>14</sup> Xixgabmal gajc bejn rudëë laaman gan güünman ni mal. <sup>15</sup> Zeel por xgabmal guin rüjn bejn dol, dxel chi ma rniabee dol guin laaman, stijbzi xcasti Dios rayalaman.

<sup>16</sup> Gradi compniar raliduladx ree Jesucrist, diidxli rënan lëjt, ad gusquiee lëjt gajc. <sup>17</sup> Graczi xgab zagdxë në gra ni za'c



zëed loj Dios, bén been gra ree bajl yu' xanyabaa. Ad yu't dxej guidxaaman, zianczi rüjnman ni zagdxe.

<sup>18</sup> Guial guyënman, zeel baneeman guialnaban tiblayaa duloj ree, guial ma raliduladx ree xtiidxaman, din yayajc ree zi'c ree bin yaløj yaca'man loj gra ree ni beenman. <sup>19</sup> Zeel yan ma ragbeedi nine ree.

### *Rayal yasa'n ree gra ni mal riga' loj guidxliuj*

Rënan lëjt, zeel rnin lojdi gradi compniar raliduladx ree Jesucrist: Gol guzujsin din gucaagdiajguidi, ad yooblaxidi guial guinieedi ni'qui guial yalendi, <sup>20</sup> din bén ralen ad zajct güünman ni rën Dios. <sup>21</sup> Zeel gol gulëeladx gra ni ad najt zagdxe në gra ni mal riga' loj guidxliuj guie, gol gojc bënchaawladx, gol bazoob xtiidx Dios ni ma bacaagdiajguidi, din laan yabëë lëjt loj dol. <sup>22</sup> Per gol been zi'c rëb xtiidxaman, ad aal rucaagdiajgzi laan abi' ad rüjntaman zi'c ma bacaagdiajgaman, najman zi'c tijb bén ruguiaa loj guiaawajn, <sup>24</sup> per chi ma ziaman, rayanladxaman xhienaa naj lojman. <sup>25</sup> Per bén ad rayanladxt ni bacaagdiajgaman rüjnman naguiejn chignia'man xtiidx Dios mazri, din laan nayaaløj rabëë tëen dunuj ree loj dol. Rzudxi'chaman loj nejz guin, rüjn tëëman ni rën Dios. Bén güün zian chu' luxdooan zagdxe por ni cayüjnman.

<sup>26</sup> Bal chudi naladx zinalidi xnejz Dios zagdxe per ad rajptidi cudad xhienin guinieedi, cusquiee lëjt gajc, dxel achet lasajc guial naladxidi zinalidi xnejz Dios. <sup>27</sup> Din par dux Dad ree Dios bén zinal xnejzaman zagdxe naj bén rüjn yudar xindo bizëjb ree në ree béngunaa bizëjb chi rzagdiaj reeman, rajp tëëman cudad chitëë yabaman loj ni mal riga' loj guidxliuj.

## 2

### *Ad rayalt yalej ree loj ree bejn*

<sup>1</sup> Gradi compniar raliduladx ree Jesucrist bén rniabee, ad rayalt cwedi loj ree bejn. <sup>2</sup> Yaguie'ch ree, chu' tijb bejn lod rado'pidi, najcwaman lajd zagdxe yu' tëë guibnil or yaaman, chu' tëë tijb bënprob najcwaman lajd senci, <sup>3</sup> abi' mazri güüncwentidi bén najcw lajd zagdxe guin, guiëbidi lojman: “Gurej guie, laan naj luar zagdxe”, guiáad loj bënprob guin guiëbidi: “Yagaj guzuli o gurej luyuj zii ya.” <sup>4</sup> Chi rüjndi zian, ¿nid cabedi bejn loj gajquidi ya?, ¿nid rula'chidi ya chi rüjndi gra ree xgabmal guin? <sup>5</sup> Gradi compniar raliduladx ree Jesucrist, rënan lëjt, gol bacaagdiajg nine: Dios gule bén naj ree bënprob loj guidxliuj din chililadx da't reeman laaman, din yalay reeman lod rniabeeman zi'c cwëbaman loj ree bén

rën laaman. <sup>6</sup> Guiáad lëjt rusa'n xtudi bénprob ree. Wen, ¿id benrijcw guin ree rusagzi lëjt ya rudxig tée reeman lëjt loj guxtis? <sup>7</sup> ¿Id laagajc reeman rnieeguijdx Jesucrist ya, bén naj bénlasajc? Zi'c najman Xi'n Dios, ziangajc najdi xi'n Dios, guial nuchajguidi laaman.

<sup>8</sup> Bal walidi rüjndi ni ca loj xley Dios, zi'c ca loj xtiidxaman ni rëb: “Guyën bejn ree zi'c rën lüj gajc”, dxel zagdxequi cayüjndi. <sup>9</sup> Per bal mazri rüjncwentidi tijb bejn guial loj stijbaman, dxel ma cayüjndi dol, ma rajpidi dol guial ad rüjntidi cumplid xley Dios. <sup>10</sup> Din bal chutëez zinal gra ni ca loj ley guin per ad rüjntaman tijb ni rayal güünman, ma cusaglojman guidib ley guin. <sup>11</sup> Dios gajc rëb: “Ad sunël xinguaaaw ren o béngunaa ren”, rëb tëeman: “Ad gugüjtil bejn.” Per bal id za'nël xinguaaaw o béngunaa ren ya per rugüjtil, dxel ma cusaglojl xley Dios. <sup>12</sup> Zeel gol gunee gol been tée zi'c ree bén yadëed cwent diidxli loj Dios por xtiidxaman ni rabëe dunuj ree loj dol. <sup>13</sup> Din bén ad rayat ree lasa', ad zayat Dios laa reeman dxej güün xguialguxtisaman. Per bén raya ree lasa' ad najtan ni guidxeb reeman dxej guin.

### *Rayal yaguieen ree ni rën Dios*

<sup>14</sup> Zeel rnin lëjt, ¿xhie sirv güün bal chu guiëb, rliladxan Dios, abi' ad rüjntaman ni rënman? ¿Wen, guialzi rliladxaman ya gacaman perdon? <sup>15</sup> Yaguie'ch ree, tijb dux compniar ree, bén rliladx Jesucrist, najman xinguaaaw o béngunaa ya, guiyaadx xabaman con ni gawaman, <sup>16</sup> abi' guiëb tijb lëjt loj reeman: “Yaguiajdi zagdxe, gawidi zagdxe ad gagnajl tëedi.” Per bal id rudëedi ni riaadx reeman, ¿xhieczi gan guiëbidi zian? <sup>17</sup> Ziangajc rzajc bén rëb rliladx Dios abi' ad rüjntaman ni rënman, achet lasajc guial rëbaman rliladxaman laaman.

<sup>18</sup> Xt zajc chu na lojl: “Lüj na rliladxil Dios, guiáad naj rünan ni rënman.” Yan balüü naj guial rliladxil laaman guial ad rüjntil ni rënman, guiáad naj gulün guial rliladxan guial rünan zi'c rënman. <sup>19</sup> Zagdxe rüjnl bal rliladxil yu' tijbzi Dios, per në ree xindxab rliladx zian, abi' xt rnij reex guial rdxeb reex. <sup>20</sup> Zeel ad bal natontil, bignia' achet lasajc guial chililadx bejn Dios bal id rüjnman ni rënman. <sup>21</sup> Basaaladx, dux béngulal ree Abraham, bayagbee Dios laaman zi'c bén ad beent dol, guial beenman ni guyën Dios, chi rëbaman lojman din nugüjt xi'nman Isaac nudëe tëeman laax zi'c gon lojman. <sup>22</sup> Ma qui ruguiaal, guial bililadxaman, zeel beenman ni guyën Dios. Guial beenman zian, zeel biguien guial diidxli bililadxaman laaman. <sup>23</sup> Zian gojc cumplid ni ca loj xtiidx Dios, lod rëb: “Bililadx Abraham Dios, zeel bayagbeeman laaman zi'c bén ad beent dol”, bayagbee tée ree bejn laaman zi'c tijb xmiw Dios.

<sup>24</sup> ¿Ma bignia'di yan ya? Rayagbee Dios bejn zi'c tijb Bén ad wayüjnt dol guial rüjnman ni rënman, ad guialzi rëbtaman rililadxaman laaman. <sup>25</sup> Ziangajc gojc con tijb Bén brii laj Rahab, Bén goc béngunaa dxuudx, bayagbee Dios laaman zi'c Bén ad beent dol guial beenman ni rën Dios, chi badëed lidxaman baquie'chloj tio'p ree Bén Israel we ladxaman biquiaa reeman xhienaag chu' ree xsuldad reeman, been tëeman laa reeman yudar persi zia reeman nejz ren. <sup>26</sup> Din Bén achet xsprijt ad zajct guibanman. Ziangajc rzajc tijb Bén rililadx Dios: bal id züjnman zi'c rënman, achet lasajc guial rëbaman rililadxaman laaman.

### 3

#### *Du lüdx ree naj zi'c tijb luar lod guidxa ni mal*

<sup>1</sup> Gradi compniar raliduladx ree Jesucrist, rnin lëjt: Ad bal ziendi guiën gac mextr gulüü xtiidx Dios, din ma ragbeedi, dunujn guial ralüün xtiidxaman, mazri zro' naj guialguxtis ni güün Dios con dunujn bal id zaguieenan zi'c rayal. <sup>2</sup> Du graczi ree rüjn xhietëez dolan gan yu' dxej, per bal chu lëjt ad rüjnt dol ni'qui tijb diidxguijdx ad ririi tëet ro'di, najdi Bén naya delant loj Dios, rajc tëe rniabee lëjt gajc. <sup>3</sup> Lëjt ragbee, chi ralu' ree fren ro' ree way din che reeb lod rayën ree, zian raguieen ree gan ranabee reeb. <sup>4</sup> Ziangajc ree barcw, majsi narooB reen, majsi por mazt rucadxaa bidoxh laa reen, per con tijb guibdobëz ni la timón, con laan ma zajc chinë bejn laan lod rëntzaman. <sup>5</sup> Ziangajc naj du lüdx ree, najn ni dobëz, per narooB guialquia rüjnman. Najn zi'c tijb guij dobëz, per majsi najn ni dobëz, rüjnman guialquia narooB ruze'can dajn narooB. <sup>6</sup> Du lüdx ree naj zi'c tijb guij, zajc yanee në' reen ganax ni mal yu' loj guidxliuj. Bal id zaya'p ree cudad, du lüdx gajc ree guxhiin dunuj ree, dxel zianczi grii diidx zëed loj xindxab du ro' ree. <sup>7</sup> Rayagbee ree guial graloj ree bedoxh zajc gagnadoo, xt në ree be rzuj në ree bëel nëtëe ree be yu' loj nijs, yan ma gognadoo reeb por ree bénguidxliuj. <sup>8</sup> Per lüdx bejn achut wayüjn gan nabee laan, najn zi'c tijb ni ad zajct gagnadoo, zi'c tijb ni guidxa venen rugüjt. <sup>9</sup> Con du lüdx ree ranee ree diidx zagdx par dux Dad ree Dios, abi' con laagajcan raneeguijdx ree bejn, Bén been gajc Dios zi'c najman. <sup>10</sup> Gradi compniar raliduladx ree Jesucrist, du ro' ree ririi diidx zagdx në diidxguijdx, per ad rayalt gacan zian. <sup>11</sup> Lëjt ragbee, lod rajch nijs zagdx ad zajct grii nijs naxij, <sup>12</sup> ad zajc tëet tia aceitunas loj yag higo, ad za zajct tia higo loj yag uv, ad zajc tëet grii nijs zagdx lod ririi nijs naxij.

*Ni rüjn Bén ca' quiarguiejn rudëe Dios*

<sup>13</sup> Bal chu lëjt naladx rajc rignia' tēē gra xtiidx Dios, rayal gacaman bēnchaawlaxd guiban tēēman zi'c rayal, zian guiguiein guial yu' xquiarguiejnman. <sup>14</sup> Per bal guidxa guialnadēdloj luxdoodi rēn tēēdi gra par lëjt gajc din gaquidi mazri bēn zobjloj, ad güündi benro' guial rajquidi xtiidx Dios, cusquieezidi guial rüjndi zian. <sup>15</sup> Lasa' quiarguiejn guin ad Diost rudēē laan, xquiarguiejn gajc bēn riga' loj guidxliuj guien, zēēd tēēn loj xindxab. <sup>16</sup> Din lod yu' guialnadēdloj lod yu' tēē bēn rēn gra par laagajcaman, ni yu' wadijl nē gra loj ni mal. <sup>17</sup> Per bēn rajp quiarguiejn runeē Dios, yaloj rüjnman naguiejn guibanman zagdxē lojman, gac tēēman bēn ad rüjnt nabē, nē benza'c, gap tēēman bejn ree pasens, yayaman bejn ree, gacaman benza'c con ree bejn, ad zabejtaman loj ree bejn güün tēēman cumplid ni guinieeman. <sup>18</sup> Bēn rüjn ree naguiejn ribajn sin wadijl, raguuil reeman mod guinieenē reeman bejn zagdxē, zian rbajn reeman zi'c rēn Dios.

## 4

<sup>1</sup> ¿Ban zēēd guial ralen lasa'di nē guial rdilidi? ¿Id zēēdan por xgabmal ni rüjndi ya? <sup>2</sup> Rzēēbladxidi gapidi ni ad rajptidi, zeel xt rugüjt lasa'di din tia'di ni rēndi, rdēdloj tēēdi bejn ree, abi' bal id zajc gapidi ni rajp reeman, dxel ralen lasa'di abi' rdilidi. Per diidxliczi ad rajptidi ni rēndi, din ad rniabtidan loj Dios. <sup>3</sup> Abi' bal rniabidan, ad runeetaman laan, din ad rniabtidan par güündi ni zagdxē, rēnzidan din guibandi zi'ctzi rēndi. <sup>4</sup> ¿Bēn rusquiee! ¿Id ragbeedi ya guial chu rinal ni mal yu' loj guidxliuj ad zajct gaquidi xmiw Dios? Zeel bal chu rēn chinal ni mal guin, laagajcaman za' contr Dios. <sup>5</sup> Ad ca xlia'tzi loj xtiidxaman lod rēb: “Badxe' xSprijt Dios du luxdoo ree, rēnman Sprijt guin, xt neelojman laaman.” <sup>6</sup> Dád zro' naj yudar rüjn Dios dunuj ree, zi'c ca loj xtiidxaman lod rēb: “Dád naza'c Dios con ree bēn rüjn naya lojman, per ad rüjn cwenttaman bēn rüjn ree benro'.” <sup>7</sup> Zeel gol bazoob xtiidx Dios, ad gudēēdi mod güün xindxab lëjt gan, zian chiquiedix loj xnejzidi. <sup>8</sup> Gol gubig loj dux Dad ree Dios din güün cwentaman lëjt, guiáad lëjt bēndol, gol bariica loj dol, guiáad ree bēn yu' nawēēg luxdoo guial chinalidi xnejz Dios, con guidib luxdoodi gol binalaman. <sup>9</sup> Gol guyu xgab, gol guyu naya gol biin tēē por xtolidi, luar guxijdxidi gol biin, luar chu' luxdoodi nix gol guyu naya, <sup>10</sup> gol been naya loj Dios, din guiliesaman xvaloridi.

### *Ad rayalt yala'ch du lasa' ree*

<sup>11</sup> Gradi compniar ralidulaxd ree Jesucrist, ad bal rnieeguijdx lasa'di, din bēn rnieeguijdx o bēn rula'ch lasa', ma ca-neeguijdxaman cula'ch tēēman xley Dios. Bal rula'chidan,

ad cayüntridi zi'c rniabeen, lëjtli ma canabee laan. <sup>12</sup> Per tijbzi Dios basa'n ley guin rüjn tēeman guialguxtis, laaman ca' guialrniabee guial yabēeman nē guial gunijtaman. Per lüj, ¿chu najl zeel rula'chil bejn?

### *Dux guialnaban ree naj ni tibrajtzi*

<sup>13</sup> Yan gol bacaagdiajg nine lëjt bēn rēb ree: “Yan o guixie ya yo'n loj tijb ciuda, ni yadxu'n tib ijz, yaguieenan negojs lod yaguieenan gan zro' da't milia.” <sup>14</sup> Ni'quid ragbeetidi xhie gac guixie, din dux guialnaban ree naj zi'c tijb bēj rguien tibrajt, stibrajt ma gunidlojn. <sup>15</sup> Zagdxeli naj guiēbidi: “Bal gunee Dios dunujn guialnaban, yaguieenan nine o ni ni ya.” <sup>16</sup> Per lëjt mazri zinalidi xtiidx dxalidi, abi' laa reen naj ni mal. <sup>17</sup> Zeel bēn ragbee xhienaag gūnman ni zagdxe abi' ad rüjntaman laan, ma cayünman dol.

## 5

### *Ni rüjn ree benrijcw*

<sup>1</sup> ¡Lëjt, najdi benrijcw! Gol bacaagdiajg nine, gol biin gol gurixdiaj tēē, din ma zēēd lod sagdiajdi, <sup>2</sup> tant zien ni rajpidi xt rxin reen, guiáad xabidi xt raw be laa reen. <sup>3</sup> Gra or nē plajt ni rajpidi xt rzobēj reen, laagajc reen rulüü ni mal rüjndi, laagajc reen gac zi'c tijb bajl gustib lëjt. Ma zidyob gūn Dios xguialguxtisaman, guiáad lëjt gule'cchaaw ni lasajc ree loj guidxliuj guie. <sup>4</sup> Gol baguiaa, laa ree bēn been xchiindi canab din quixidi laa reeman, xt Dios bēn ca' gra guialrniabee ma biguiejn guial caygu' reeman guialquia. <sup>5</sup> Nabandi zi'ct rēndi, per cusni'szidi ni ad züjnt lëjt sirv chi guidxin dxej gūn xguialguxtis Dios. <sup>6</sup> Din xt baguulidi mod persi bagüjtidi bēn ad beent ree xhienin, abi' achet gojc nüjn reeman chitēē niējt reeman.

### *Royal yarejdx ree Dios yaya'p tēē ree pasens*

<sup>7</sup> Gradi compniar raliduladx ree Jesucrist, gol gojp pasens xt dxej gui't dux Dad ree Jesucrist stijb, zi'c rdaan tijb bēn rüjn dxiin dajn, rbēzaman guia yaloj xt guia bigra din yalesaman ni guxübinman. <sup>8</sup> Ziangajc lëjt gol gojp pasens, ad yalenyadi, din ma zidyob dxej gui't dux Dad ree Jesucrist.

<sup>9</sup> Rni tēēn lëjt, ad yalenyadi nē lasadi, chitēē xhie casti yayalidi, din ma zidyob dxej gūn xguialguxtis Dios. <sup>10</sup> Gol binal zi'c been ree bēn badēē xtiidx Dios loj ree bejn, gojp reeman pasens gudaan tēē reeman graloj guialrzagdiaj gudēd reeman. <sup>11</sup> Rayagbee ree guial xiquilbaa ree bēn rdaan loj guialrzagdiaj. Ma biguiejndi xcwent bēn brii laj Job, xhienaag gudaanman chi guzagdiajman, ragbee tēēdi xhienaag beennē

Dios laaman, chi gulox gudëdaman loj gra gualrzagdiaj guin, din Dios dád naza'caman raya tēeman bejn ree.

<sup>12</sup> Gol gojp cudad chi rüjndi xhie compromisan loj bejn, ad guza'tidi Dios o xhie stijbnin ya, chitëe gudëed Dios lëjt casti, zagdxeli naj guinieedi diidxli güün tēe xtiidxidi cumplid.

<sup>13</sup> Bal chu lëjt cazagdiaj, gol gurejdx Dios, o bal yu' luxdoodi zagdxe, gol biil par laaman. <sup>14</sup> Guiáad bal ragxuu tijb lëjt, rayal guinieedi bën rniabee ree lëjt gual najdi bën rliladx Jesucrist, din cwedx reeman Dios por laaman quiëeb tēe reeman laaman sejt por laj Jesucrist. <sup>15</sup> Bal cwedx reeman Dios con guidib luxdoo reeman, zayajc bënragxuu guin, yales Dios laaman, abi' bal xhie dolan ma beenman, güünman laan perdon. <sup>16</sup> Zeel gol baxhoobdol loj lasa'di gol gurejdx tēe Dios por lasa'di din yayajquidi, din tijb bën zinal xnejz Dios, chi rbejdxaman laaman, rüjn cwentaman laaman. <sup>17</sup> Zi'c bën brii laj Elías bën badëe xtiidx Dios loj ree bejn, gojcaman bënguidxliuj zi'cgajc dunuj ree, abi' chi gudi'n gunabaman loj Dios gual ad zalt guia, dxel ad golt guia choon ijz garol. <sup>18</sup> Chi guredxaman Dios zatijb, zianz bazuloj gol guia, dxel bayu gualnaza'c loj guidxliuj.

<sup>19</sup> Gradi compniar raliduladx ree Jesucrist, bal chu lëjt rarii loj xnejz Dios abi' por stijb bejn yayejquidi, <sup>20</sup> gol gogbee gual chutëez bën rasiejc tijb bëndol loj nejz zagdxe chitëe chinalaman ni mal, laaman rabëe bëndol guin loj casti, abi' majsi ma beenman zien dol, gran gac perdon.

## Gui'ch yaløj bacaa San Pedr

### *Rxhiaal Bëd xtiidx Dios loj ree bejn*

<sup>1</sup> Naj Bëd, najn tijb xi apóstol Jesucrist, laaman guxhaal naj, cucan gui'ch guie par lëjt najdi bën bire'ch gra lad abi' zøjbidi guiedx riga' ree niz Ponto, Galacia, Capadocia, Asia Menor në Bitinia. <sup>2</sup> Ma gulej dux Dad ree Dios lëjt diidz gocli, zi'c goc xixgabaman. xSprijtaman gulëeca lëjt din guzoobidi diidx gac tëë luxdoodi naya delant lojman por xrejn Jesucrist. Zro' güünle' Dios lëjt yabe'cdxe tëëman luxdoodi.

### *Ni ralëjz ree guneë Dios*

<sup>3</sup> Quixtëë Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree guneë Dios. <sup>4</sup> Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' tëët dxej nitan. <sup>5</sup> Guial rliladxidi Dios, laaman rnij lëjt con xguialrniabeeman, din chi guidxin dxej nit guidxliuj, dxel gagbee gra bejn guial ma beenman lëjt perdon.

<sup>6</sup> Zeel rabaa da'tidi majsi tëdidi graloj guialrzagdiaj tiblädëd, <sup>7</sup> din por guialrzagdiaj guin guiguien chu diidxli rliladx Dios, zi'c rüjnnë reeman or, rudëëd reeman laan loj bajl din gagbee reeman bal najn ganax or. Or guin najn ni rnidloj, zeel mazri lasajc guialrliladx laaman, bal chu taan xhietëëz loj guialrzagdiajn, din ad yu't dxej nit xguialrliladxidi. Abi' dxej gui't Jesucrist stijb, lasa' guialrliladx guin naj ni ruladx Dios, guiáad ree bejn në ree anjl guza't reeman laaman zagdxë gap tëë reeman laaman respejt guial rusnuu rliladxidi laaman.

<sup>8</sup> Ad waguiaatidi Jesucrist per rëndi laaman, abi' yan rliladxidi laaman majsi ad waguiaatidi laaman, dád nix yu' luxdoodi abi' tant nix yu' luxdoodi, xt ad radxejlt xhienaag guiëbidi, <sup>9</sup> din lëjt ragbee, guial rliladxidi, ma nüjn Dios lëjt cwent zi'c ree bën achet xtol.

<sup>10</sup> Diidz gocli, bën badëë ree xtiidx Dios loj ree bejn basiid reeman been tëë reeman naguiejn niagbee reeman xhienaag güün Dios bejn ree perdon, abi' rëb reeman xhienin güün Dios par lëjt guial najman benza'c. <sup>11</sup> Por xSprijt Jesucrist gogbee reeman diidz gocli guial sagdiajman zianz qui gapraman guialrniabee, dxel been reeman naguiejn niagbee reeman chu benan sac zian goc tëë gac zian. <sup>12</sup> Per balüü Dios laa reeman guial ni guneë reeman ad najtan par laagajc reeman, najn par lëjt, abi' yan lëjt ma rignia'di ni guin ree por ree

bén catie'ch xtiidxza'c Jesucrist por xgualrniabee Sprijt zëed xanyabaa. Nē ree anjl ma rēn nejzdoo gagbee nine ree.

### *Ze rayal guiban ree xi'n Dios*

<sup>13</sup> Zeel gol guzusin gol bastēdguien tēē, con guidib luxdoodi gol gulējz ni gunee Dios guial najman benza'c, dxej gui't Jesucrist stijb. <sup>14</sup> Zi'c ree xi'n Dios nazobdiidx reeman, ad bal guibanridi zi'c gubandi gocli chi gadidi güünbee laaman. <sup>15</sup> Laaman gule lējt, zeel gol been naguiejn guibandi naya delant lojman, din laaman naj Bén naya nali. <sup>16</sup> Zi'c rēb loj xtiidxaman: “Gol gubajn naya delant lon, din naj naj Bén naya nali.” <sup>17</sup> Yan bal rnieedi Dios “Dad”, Bén rüjn xgualguxtis tibloj, bal conin rüjn tijb gaj bejn, rayal gapidi laaman respejt guidib tiamp guibandi loj guidxliuj guie. <sup>18</sup> Din lējt ragbee guial babēēman lējt loj costumbr ni basa'nnē ree xbéngulalidi lējt, costumbr ni ad rüjnt ree sirv, abi' lējt ragbee guial gojx din yariidi loj reen, per ad gojxt con ree ni rniyt, zi'c or o plajt ya, <sup>19</sup> gojx con xrejñ za'cdxoon Jesucrist ni guxie'man loj crüjz chi gütaman zi'c tijb xiil zagdxe be ad naxint, be rugüjt reeman par Dios por xtol ree bejn. <sup>20</sup> Diizd chi gad guidxliuj gacchaaw, mal gulej Dios laaman din sacaman zian, yan ma guzajcaman zian guial rēnman lējt. <sup>21</sup> Zeel por laaman rliladxidi Dios Bén basban laaman badēē tēēman guialrniabee lojman, yan con guidib luxdoodi ma rliladxidi Dios rbēz tēēdi ni guneeman.

<sup>22</sup> Yan, guial ma ruzoobidi xtiidxaman ni naj diidxli, ma naya luxdoodi delant lojman din guiēn lasa'di zi'c rayal, zeel gol guyēn lasa'di con guidib luxdoodi. <sup>23</sup> Din ma bidxaa mod nabandi, zi'c rulüü gojlidi stijb, abi' guialnaban zinalidi ad zēēdtan por tijb Bén nit, zēēdan por xtiidx Dios, diidx naban, diidx ni ad zanijt, <sup>24</sup> din loj xtiidxaman rēb:

Gra bénguidxliuj naj zi'c gui'xh dajn,  
guiáad ni rajp reeman naj zi'c xguiaa gui'xh guin.

Rbidx gui'xh guin, abi' riajb xguiaan,

<sup>25</sup> per xtiidx Dios ad yu't dxej nitan.

Abi' laan naj xtiidxza'c Jesucrist ni ma biguiejndi.

## 2

<sup>1</sup> Zeel gol basa'n gra ni mal, gra ni rusquiee, ad bal rüjnzidi, gol basa'n guialnadēdloj nē guial rnieeguijdx lasa'di. <sup>2</sup> Zi'c re'c ree xindo quigojlnējzri dud, zian gol been naguiejn chignia'di xtiidx Dios, din gusnuu gagbeedi mazri xhienaag rayal guibandi din yabandi loj ree bengüt con gra ree Bén nuchajg Jesucrist chi gui'taman stijb, <sup>3</sup> bal walidi ma ragbeedi guial naj Dios benza'c.



*Jesucrist naj zi'c guiaj naban*

<sup>4</sup> Gol bibig loj Jesucrist, laaman naj zi'c guiaj naban. Been ree bénguidxliuj laaman tiblax, per par Dios najman bén lasajc, laaman gule laaman. <sup>5</sup>Ziangajc lëjt, guial ma rliadixidi Jesucrist, najdi zi'c ree guiaj naban ni cayajcnë xyadoo Dios. Najdi bixhioz naya luxdoo rüjn sirv lojman, din nabandi zi'c ruladx Dios, laan naj ni rudëedi lojman zi'c gon por Jesucrist.

<sup>6</sup> Rëb loj xtiidx Dios:

Gol baguiaa, guzoban tijb guiaj zagdx luguedx Jerusalén.

Laan naj guiaj nabee, guiaj zojbloj, nilasajc tëë.

Bal chu chililadx laan,  
ad yu't dxej yaya'nxtuman.

<sup>7</sup> Par lëjt, guial rliadixidi Jesucrist, laaman naj zi'c guiaj lasajc da't. Per par ree bén ad rliadix rajc cumplid ni rëb loj xtiidx Dios, lod rëb:

Guiaj ni gulëëgo'n ree bén rüjn yu,  
yan laan naj guiaj zojbloj.

<sup>8</sup> Rajc tëë cumplid ni rëb stib lajt loj xtiidxaman, rëban:

Laaman naj guiaj rirejl guia' ree bejn,  
abi' rureeyujn laa reeman.

Rzajc reeman zian, guial ad ruzoobt reeman xtiidx Dios, zian rajc ni rëbaman xcwent reeman.

<sup>9</sup> Per lëjt naj bén guleman, najdi bixhioz rüjn ree sirv lojman, guial najman dux rey ree. Lëjt ma naya luxdoo delant lojman, abi' gulejman lëjt din chigtie'chidi diidx xcwent ree ni zagdx rüjnman. Laaman babëë lëjt loj nejz mal, persi bagu'man lëjt loj xnejz za'cdxoonman. <sup>10</sup> Gocli achutczi najdi, per yan ma najdi xbejn Dios. Gocli ad ragbeetidi guial raya Dios lëjt, per yan ma ragbeedi.

*Zi'c rayal guiban ben rliadix Dios*

<sup>11</sup> Gradi compniar raliduladx ree Jesucrist, rniaaban favor lojdi, zi'c zio'p ree loj guidxliuj guie tibrajtzi, ad bal tiëbidi güün ree xgab mal lëjt gan, din xgab mal guin ree rüjn naguiejn zianczi din gusa'n ree bejn xnejz Dios. <sup>12</sup> Gol gubajn zagdx loj ree bén ad nünbeet laaman, zian majs rnieeguidx reeman lëjt yan, rëb reeman najdi benmal, per chi guguiaa reeman guial zagdx naj ni cayüjndi, dxel guza't reeman laaman zagdx, dxej ni yadëed reeman cwent lojman.

<sup>13</sup> Guial rliadixidi Dad Jesucrist, gol bazoob xtiidx gra ree bén rniabee loj guidxliuj guie. Gol bazoob xtiidx pristent rniabee xnaciondi <sup>14</sup> në xtiidx gobernador bén rxhiaalaman din gudëedaman casti bén rüjn ree ni mal guilies tëëman xvalor ree bén rüjn ni zagdx. <sup>15</sup> Din rën Dios güündi ni zagdx ree din gucwëëzidi ro' ree bentont ad rignia't abi' rnieeguidx reeman lëjt.

<sup>16</sup> Zajc güündi zi'c rëndi, per ad por ziantzi güündi ni naj ni mal, gol been zi'c rayal güün ree xbejn Dios. <sup>17</sup> Gol gojp respejt gra bejn zi'c rayal, gol guyën ree bén rlladx Jesucrist, gol bidxeb Dios, gol gojp tää respejt pristent rniabee xnaciondi.

### *Gol gudaan loj guialrzagdiaj*

<sup>18</sup> Lëjt bén naj ree mojs, gol bazoob xtiidx ree xpatrondi, gol gojp tää reeman respejt, ad bén najtzi ree benza'c raya tää reeman lëjt, në ree bén naj bendxuudx. <sup>19</sup> Din zagdxë naj guial chu rdaan loj guialrzagdiaj, majsi ad rayaltaman laan, rdaanman laan guial rënman güünman ni ruladx Dios. <sup>20</sup> Bal chu lëjt rzagdiaj por ni mal rüjndi, achet lasajcan, per bal rzagdiajdi por ni zagdxë rüjndi abi' rdaandi loj guialrzagdiaj guin, laan lasajc delant loj Dios, <sup>21</sup> din par zian gulejman lëjt. Guzagdiaj Jesucrist por lëjt, zian balüüman lëjt xhienaag guibandi din chinalidi xnejzaman. <sup>22</sup> Ad yu'tczi dxej beenman dol abi' ni'qui tijb diidx rusquiee ad briit ro'man. <sup>23</sup> Chi rëb reeman diidxguijdx lojman, ad badxi'taman laan con diidxguijdx, chi basagzi reeman laaman, ad rëbtaman loj reeman guial yaguijx reeman ni cayüjnnë reeman laaman, graczan basa'nman loj Dios bén rüjn xguialguxtis zi'c rayal. <sup>24</sup> Guzagdiaj Jesucrist loj crüzj por dux tol ree persi babëëman dunuj ree lojn din yabajn ree zi'c rën Dios, abi' por lod bidxeelguijdxaman ma bayüjnman du luxdoo ree naya. <sup>25</sup> Gocli gubajndi zi'c xiil rzëëb, per yan ma najdi xbejn Jesucrist bén rën lëjt rajp tääman lëjt zi'c tijb bén rajp xiil.

## 3

### *Zi'c rayal guiban ree bén ca' lasa'*

<sup>1</sup> Në lëjt bëngunaa ma yu' ree lacheel, gol bazoob xtiidx lacheelidi, din bal chu lacheelidi ad rlladxt xtiidx Dios, per chi guguaa reex zi'c nabandi, dxel guililadx reex. Ad rüjnt naguiejn xhie guiëbidi loj reex, <sup>2</sup> chililadx reex guial guguaa reex nabandi zi'c rayal rajp täädi laa reex respejt. <sup>3</sup> Chi rzujchaawidi, ad bal rdëdlaj rüjnchaaw guidxguijquidi ni'qui guial güündi ujs ganax ni or o gacwidi ganax lajd lasajc. <sup>4</sup> Mazri zagdxë naj guial güündi naguiejn gac luxdoodi naya delant loj Dios, gol gojc benza'c në bén chaawladx, din laan ad yu't dxej nitan, abi' laan mazri lasajc delant lojman. <sup>5</sup> Din zian gubajn ree bëngunaa binal ree xnejzaman goc da't, bililadx reeman laaman bazoob tää reeman xtiidx lacheel reeman. <sup>6</sup> Zian been Sara, bazoob xtiidx lacheelaman Abraham, abi' guneeman laaman "Dad". Gaquidi zi'c xi'n Sara, bal rüjndi ni zagdxë sin guialrdxeb.

<sup>7</sup> Ziangajc lëjt xinguaaaw, gol gubajnnë lacheelidi zagdxë, gol gojp reeman respejt ad guialzi najt reeman bén nada,

rayal güündi zian guial nē reeman rayal guialnaban tiblayaa razaladx Dios, guial najman benza'c. Zian gol gubajn, chitēē xhie gudxe' nawēēg lējt chi cwedx guiniabidi laaman.

*Xhie rayal güündi chi xhie güün nē reeman lējt*

<sup>8</sup> Zeel rnin loj gradi: Gol gubajnnē lasa'di zagdxe, gol bachajg lasa'di, gol been xgab tijbzi, gol guyēn lasa'di zi'c rayal, gol gojc benza'c nē bēn chaawladx. <sup>9</sup> Ad yadxi'di ni mal rüjn ree bejn lējt, ad yadxi'di diidxguijdx ni na reeman lojdi, gol gurejdx Dios din gagnēman laa reeman, din Dios gulej lējt par gagnēman lējt. <sup>10</sup> Din rēb loj xtiidxaman:

Bén rēn guiban zagdxe chu' tēē luxdooman zagdxe, rayal gapaman cudad ad guinieeman diidxguijdx ad guiniee tēēman diidx rusquiee.

<sup>11</sup> Cwēēladxaman ni mal, güünman ni zagdxe güün tēēman naguiejn guibannē ree lasa'man zagdxe, zian rayal guibanman zianczi.

<sup>12</sup> Din dux Dad ree Dios rnij bēn rüjn ree ni rēnman rüjncwent tēēman xtiidx reeman chi rbejdx reeman laaman, per ralenman bēn rüjn ree ni mal.

<sup>13</sup> Achut güün lējt ni mal, bal cayüjndi naguiejn güündi ni zagdxe. <sup>14</sup> Per xiquilbaadi bal cusagdiaj bejn lējt guial cayüjndi ni zagdxe. Ad chu'di xgab ad guidxeb tēēdi por zian, <sup>15</sup> gol gojp respejt gol badxe'guijc tēē dux Dad ree Jesucrist. Gol guzujsin din yadxi'di xtiidx ree bēn guiniabdiidx lojdi xcwent ni riladxidi, per gol badxi' xtiidx reeman zagdxe con diidx zagdxe ree. <sup>16</sup> Gol gubajn zagdxe din guiguien guial achet ni mal yu'guijquidi din yaya'nxtu ree bēn rnieeguijdx lējt, guial rüjndi ni zagdxe riladx tēēdi Jesucrist. <sup>17</sup> Mazri zagdxe naj sagdiaj bejn guial güünman ni zagdxe, bal zian rēn Dios, luar sagdiajman guial güünman ni mal.

<sup>18</sup> Din xt Jesucrist guzagdiaj, güjtaman tib voltzi por dux tol ree majsi ad beentaman dol, per güjtaman duxcwent ree nayajc ree bēndol, zian guxhalaman nejz din gac yadxin ree loj Dios, güjtaman zi'c bēnguidxliuj per babanman por xSprijtaman. <sup>19</sup> Chi gadaman yaban, wej xSprijtaman bigneenēman xsprijt ree bengüt lod nayaaw reeman. <sup>20</sup> Sprijt guin ree naj xsprijt ree bēn ad bazoobt diidx tiamp gulal, chi guban Noé loj guidxliuj guie, chi gop Dios laa reeman pasens la'tgaj cayüjn Noé barcw, abi' xhujnzi bejn gulaa loj nijs banijt guidxliuj tiamp zii. <sup>21</sup> Nijs guin naj zi'c guialrirobnijs ni rulüü guial ma nayajc ree perdon. Guialrirobnijs guin ad rēnt guiēban guial najn par gusian dux cuerp ree, rulüün guial caynaab ree loj Dios din yaya dux quiarguiejn ree, guial ma raya'p ree guialnaban cüb guial baban Jesucrist loj ree bengüt, <sup>22</sup> bēn

bayë'p xanyabaa abi' za'man xladbee Dios lod canabeeman anjl ree në ree sprijt ca' gualrniabee.

## 4

### *Gol beennë quiarguiejn ni banee Dios dxiin*

<sup>1</sup> Zeel zi'c gudëd Jesucrist loj gualrzagdiaj, në lëjt rayal taan lojn. Din por gualrzagdiaj guin rüjn bejn dol tibläd, <sup>2</sup> din güünman zi'c rën Dios guidib xgualnabanman luar güünman zi'c naj xixgabaman. <sup>3</sup> Xchej da't gubajndi zi'c naban ree bën ad nünbeet Dios, gubajndi zi'ctzi guyëndi, beendi zi'ctzi gojc xixgab dxuudxidi, gu'di, badxajg lasa'di persi beendi nidxuux ree, guzüdx da'tidi, guyën tēedi ni ad najt ree Dios, laan naj ni rbijxhladx Dios. <sup>4</sup> Per yan gual ad zinaltridi zi'c naban ree bën naban zian, zeel radxa loj reeman, rnieeguijdx tēe reeman lëjt. <sup>5</sup> Per rayal yadēed reeman cwent loj Dios bën za' par güün xgualguxtisaman con ree bën naban në ree bën ma güjt. <sup>6</sup> Din në ree bën ma güjt biguiejn xtiidx Dios chi guban reeman loj guidxliuj guie, din guiban reeman loj Dios majsi par ree bénguidxliuj ma güjt reeman.

<sup>7</sup> Ma zidyob dxej nit guidxliuj, zeel gol bastëdguien gol guzujsin tēe din cwedx guiniabidi Dios con guidib luxdoodi. <sup>8</sup> Ad yayanladxidi gual guiën lasa'di zi'c rayal, din bën rën lasa' rüjnman perdon majsi xhietēez rüjnnë reeman laaman. <sup>9</sup> Bal yu' tijb xcompniaridi rniab luar lidxidi din yaya'nman, gol badēedsii lidxidi con guidib luxdoodi ad yalenya'di. <sup>10</sup> Loj tijb gajdi ma banee Dios quiarguiejn din güündi ni rayal güündi. Zeel gol been lasa'di yudar con ni rajc rüjndi, din guiguien gual cayüjndi zi'c rayal con quiarguiejn ni bazaladxaman lojdi. <sup>11</sup> Bal chu lëjt ca' quiarguiejn par gulüü xcompniaridi, rayal guinieedi ni naj diidxli zi'c tal rëb loj xtiidx Dios, ziangajc bën ca' quiarguiejn par güünman yudar dux compniar ree, rayal güünman laan con gojl razaladx Dios lojman. Gra ni cayüjndi, gol beenan din guza't ree bejn Dios zagdxë por Jesucrist, bën rayal respejt në gualrniabee zianczi. Amén.

### *Gol gudaan gra gualrzagdiaj*

<sup>12</sup> Gradi compniar raliduladx ree Jesucrist, rënan lëjt, zeel rnin lojdi, ad ru nawëëguidi gual zro' naj loj gualrzagdiaj cadëdidi, din laan naj zi'c prueb par lëjt. Ad rudi xgab chexc zeel cazajquidi zian. <sup>13</sup> Gol babaali chi cazagdiajdi zi'c guzagdiaj Jesucrist, din ziangajc yabaadi chi guguaadi xbianiman dxej gui'taman stijb. <sup>14</sup> Xiquilbaadi bal chu na diidxguijdx lojdi gual zinalidi Jesucrist, din gra dxejczzi za'në xSprijt Dios lëjt, bën ca' gualrniabee. <sup>15</sup> Achet lasajc bal cazagdiajdi gual bagüjtidi bejn, o por gualgubaan, o por gual rüjndi ni

mal o guial rudi lod ad rayaltidi. <sup>16</sup> Per bal chu cazagdiaj guial zinalaman xnejz Jesucrist, ad rayalt yatuman, rayal gudëeman quixtëe loj Dios guial ma najman xbejn Jesucrist.

<sup>17</sup> Gol gogbee, guial rtiëjb Dios rzagdiaj ree xbejnman din guzoob reeman diidx, abi' bal dunuj ree nayajc ree xbejnman cayza'c ree zian, xhieczi naag sac ree bën ad rënt guzoob xtiidxza'caman. <sup>18</sup> Nacli ree bën zinal xnejz Dios nawëëg naj guial yaguaiaj reeman xanyabaa, piorli ree bëndol bën ad nünbeet ree Dios, xhieczi naag naj luar lod yayal reeman. <sup>19</sup> Zeel bën cazagdiaj ree zi'c naj xixgab Dios, rayal gusnuu güün reeman ni zagdx gusa'n tëe reeman gran loj Dios, laaman gagnë laa reeman. Laaman bazaladx guialnaban rüjn tëeman zi'c rayal.

## 5

### *Consejw par ree bën rliladx Jesucrist*

<sup>1</sup> Yan rënan gudëdan consejw loj ree bën rniabee ree lojdi, naj guial ca'n guialrniabee zi'cgajc laa reeman, naj tëen testiw xcwent ni guzagdiaj Jesucrist, zi'cgajc laa reeman guguan xbianiman dxej gui'taman stijb, zeel rënan guiën nine ree loj reeman. <sup>2</sup> Rnin lojdi, gol gunaj ree xbejn Jesucrist, bën rayal ree gulüüdi din gusnuu chinal reeman xnejz Dios. Ad güündi dxiin guin guialzi ragbeedi rayal güündi laan, gol beenan guial yu'di gan güündi laan, con guidib luxdoodi gol beenan, ad bal güündi laan guialzi rzëëbladxidi milia. <sup>3</sup> Ad guial ca'tidi guialrniabee din nabeedi zi'c tal rëndi, rayal guibandi zagdx din guguaa ree bën rliladx Jesucrist din guiban reeman zian, <sup>4</sup> din chi gui't bën rniabee dunuj ree stijb, dxel guneeman tijb niza'cdxoon ni ad yu't dxej nit.

<sup>5</sup> Ziangajc lëjt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tëe xtiidx ree xcompniaridi, din:

Ralen da't Dios bën rüjn ree benro',

per dád benza'can con ree bën rüjn naya.

<sup>6</sup> Zeel gol been naya loj Dios, bën ca' gra guialrniabee, din guiliesaman xvaloridi chi guidxin dxej. <sup>7</sup> Gol basa'n gra xgab yu'di loj Dios, din laaman rniaj lëjt.

<sup>8</sup> Gol guzujsin, gol gojp cudad, din xindxab xin ralen da't lëjt, za'x zi'c tijb beedx rliaan, rguilix chu güünx gan. <sup>9</sup> Zeel ad tiëbidi güünx lëjt gan, gol guzujdxi'ch loj ni rliladxidi, din ragbeedi guial zi'c cazagdiajdi, ziangajc cazagdiaj ree bën rliladx Jesucrist guidib guidxliuj. <sup>10</sup> Per chi ma gudëdidi ta'n loj guialrzagdiaj, dxel gagnë Dios din gusnuu güündi naguiejn guibandi zi'c rënman, su tëedi rejs, sudxi'chidi, gap tëedi segur guial zinalidi xnejzaman. Laagajcaman naj Dios cayüjn

dunuj ree yudar loj gra ni cayza'c ree, abi' ma gulejman dunuj ree din yayaal ree tiblayaa lod rniabeeman guial nachajg ree Jesucrist. <sup>11</sup> Laaman rayal respejt, din tijbzi laaman ca' guialrniabee zianczi. Amén.

*Diidx bigra ca ree loj gui'ch guie*

<sup>12</sup> Silvan, tijb dux compniar ree, bén ragbeen naban zi'c rën Dios, laaman been gui'ch guie din ganin lojdi tio'p choon diidx, par gunen lëjt consejw nētëë par gugojnän lëjt guial diidxli rën Dios lëjt, zeel gol basnuu gol guyënman gol guyën tēë lasa'di. <sup>13</sup> Bén rililadx ree Jesucrist, bén ma gulej Dios zi'cgajc lëjt, bén zojb ree Babilonia, rugajpdioz reeman lëjt. Nē Marcw xin nūnan zi'c da xi'nän rugajpdioz lëjt. <sup>14</sup> Guial rën lasa'di, gol bagajpdioz lasa'di xhietëëz horan radxaaglojdi. Yabe'cdxe Dios luxdoodi guial ma nuchajguidi Jesucrist.

## Gui'ch barojp bacaa San Pedr

### *Rxhiaal Bëd xtiidx Dios loj ree bejn*

<sup>1</sup> Naj, Simón Bëd, najn tijb xi apóstol Jesucrist rün tēen sirv lojman, cucan gui'ch guie par lējt guial rajpidi lasa'gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bën rabëë bejn ree loj dol. <sup>2</sup> Güünle' Dios lējt mazri, yabe'cdxe tēeman luxdoodi guial ma nünbeedi laaman nē dux Dad ree Jesucrist.

### *Zi'c rayal gac ree xbejn Jesucrist*

<sup>3</sup> Por xguialrniabee Dios ma baneeman gra ni rayaadx ree, din yaya'p ree guialnaban tiblayaa, yabajn tēë ree naya delant lojman, din ma naguieenbee ree Dios bën gule dunuj ree guial ca'man guialrniabee naj tēeman benza'c. <sup>4</sup> Zeel ma beenman promejs du loj ree, promejs narooob ree ni lasajc ree, abi' por laa reen ma yu' xSprijt Dios luxdoodi, ma been tēëdi tiblad gra ree ni ad rüjnt sirv nē ree ni mal riga' loj guidxliuj guie. <sup>5</sup> Zeel gol been naguiejn por guialrliladx ni rajpidi gol gubajn zagdxe, din guial guibandi zagdxe, dxel mazri ma gagbeedi xhienaag guibandi. <sup>6</sup> Abi' guial gagbeedi xhienaag guibandi, ma zajc gucweëz xixgabmalidi, abi' guial gucweëzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant loj Dios, <sup>7</sup> dxel guial guibandi naya delant lojman, ma zajc guiën lasa'di, abi' guial guiën lasa'di, ma zajc guiëndi gra ree bejn.

<sup>8</sup> Bal yu'guijquidi nine ree cusnuu tēë cayüjndi naguiejn guibandi zian, dxel ad naban xlia'tzidi, ad beenbee xlia' tēëtidi dux Dad ree Jesucrist. <sup>9</sup> Per bën ad rüjnt naguiejn guiban zian, laaman naj zi'c tijb bēnlutia'p o zi'c tijb bën ad ruguiaat zijt, ma bayanladxaman guial biquied Dios xtola-man ni beenman guia'xchej. <sup>10</sup> Zeel rnin lojdi, compniar raliduladx ree Jesucrist, zi'c ma bacaabee Dios lējt ma gulej tēeman lējt, gol been naguiejn gol guzudxi'ch loj xnejzaman, din bal sudxi'chidi, ad zayajbtridi loj dol. <sup>11</sup> Zian gapidi nejz nali din chu'di lod rniabee dux Dad ree Jesucrist tiblayaa, bën babëë dunuj ree loj dol.

<sup>12</sup> Zeel zianczi ganin nine ree lojdi din gusaaladxidi laa reen, majsi ma ragbeedan, majsi ma zinal tēëdi ni diidxli ni ma bacaagdiajquidi. <sup>13</sup> La'tgaj naban loj guidxliuj guie, naladxan rayal gunen consejw lojdi con ree diidx guin. <sup>14</sup> Din

por dux Dad ree Jesucrist ma gogbeen guial ma zidyob dxej yazaan loj guidxliuj guie.

<sup>15</sup> Zeel cayün da'tan naguiejn rnienë'n lëjt, din gusaaladxidi da diidxan majsi ma güjtan.

### *Bén baguiaa ree xguialrniabee Jesucrist*

<sup>16</sup> Chi ranan lojdi xhienaag naj xguialrniabee Jesucrist xhie tää naag gui'taman stijb, ad balëëguijctan ni banan lojdi. Din con quijb du lojn baguiaan xbianiman <sup>17</sup> chi biguien cha' Dios diizd xanyabaa, gulesaman xvaloraman baza't tääman laaman zagdxe, rëbaman: "Xin guie naj da xi'nän, rënan laax rabaanë' tääna laax." <sup>18</sup> Abi' dunujn nayajc bën biguien cha' Dios diizd xanyabaa chi nadxu'në'n Jesús ruguia' zii, lod biguien xbianiman.

<sup>19</sup> Zianan zeel mazri raliduladxan ni rëb ree bën badëäd xtiidx Dios loj ree bejn, zeel zagdxe naj bal yu'guijquidi ni rëb reeman, din xtiidx reeman naj zi'c tijb guij rusni lod nacay la'tgaj rareguiaal. Yan ziangajc lëjt chaawladx cusnuu cayagbeedi xcwent Dios xt chi gui't Jesucrist stijb, bën naj bajl rusni par dunuj ree, dxel ma gagbeedi graczan zi'c tal najn. <sup>20</sup> Per gol gogbee guial ni'qui tijb xtiidx Dios ad zajct chignia' bejn por xixgabzaman. <sup>21</sup> Din bën badëäd ree xtiidx Dios loj ree bejn, ad guneeet reeman xtiidxaman zi'c goczi xixgab reeman, gunee reeman ni basajb xSprijt Dios guijc reeman.

## 2

### *Bén rülüü ree diidx rusquiee (Judas 4-13)*

<sup>1</sup> Zian zi'c guyu ree bën rusquiee loj ree bën Israel tiamp gulal rëb reeman rudëäd reeman xtiidx Dios loj ree bejn, ziangajc chu' ree bën rusquiee gulüü lëjt ni rusquiee ree, yaguuil reeman mod din gulüü reeman lëjt ni ad najt diidxli par gagdxadi. Ad zatiëjbt reeman nabee Jesucrist laa reeman, majsi baguijxaman xtol reeman, zeel ad zaglaat gunijt Dios laa reeman. <sup>2</sup> Per zien ree bejn chinal guiban nadxuudx zi'c naban reeman, abi' por laa reeman guinieeguijdx ree bejn xtiidxza'c Dios. <sup>3</sup> Abi' guial rzëëbladx reeman milia, yaguuil reeman xhie ni rusquiee gulüü reeman lëjt din tia' reeman xmiliadi, per ziangajc ad zalaat reeman loj xcasti Dios ni cabëz laa reeman, din diizd gocli mal yu' casti ni yayal ree bën rüjn zian.

<sup>4</sup> Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabëz reeman dxej güün xguialguxtisaman. <sup>5</sup> Ad



been tëëtaman perdon benmal guyu ree tiamp gulal, banijta-  
man laa reeman con nijs. Tijbzi Noé bén balüü xhienaag chi-  
nal ree bejn xnejz Dios, laazaman naj Bén gulaa con zagajdx  
ree bejn. <sup>6</sup>Ziangajc chi been xguialguxtis Dios con ree guiedx  
Sodoma në Gomorra, baze'caman laa reen xt bayajc reen  
cobdëj, abi' laan naj ejempl par ree Bén guiban nadxuudx  
zi'c ree Bén guiedx zii ree. <sup>7</sup>Per baslaa Dios Bén brii laj Lot,  
Bén guban zi'c rën Dios guyu tëëman xgab guial baguiaaman  
zi'c guban ree benmal guin. <sup>8</sup>Abi' guial gubajnman zagdxe,  
zeel guixie guixie guyunaya da'taman por ree nidxuudx bigu-  
iejnman baguiaa tëëman been ree Bén guin. <sup>9</sup>Rajc rüjn Dios  
yudar Bén ruzoob ree xtiidxaman xhietëöz loj prueb cadëd  
reeman, abi' ma naj xhie güünnëman benmal ree dxej güün  
xguialguxtisaman.

<sup>10</sup>Laan naj ni yayal ree Bén naban zi'ctzi rën reeman, ad  
rënt reeman nabee Jesucrist laa reeman, dád nad reeman, ad  
ratut reeman, ad rdxeb tëët reeman rnieeguijdx reeman Bén  
naj ree xianjl Dios. <sup>11</sup>Abi' ni'qui ree xianjl Dios, majsi rajp  
reeman mazri gojl në gualrniabee, per achet diidxguijdx rëb  
reeman lojman contr laa reeman.

<sup>12</sup>Lasa' ree Bén guin naban reeman zi'c ree be, ad yu't  
xquiarguiejn reeman abi' rnieeguijdx reeman ni ad rignia't  
reeman, guidiblagaa rüjn reeman ni rëntzi reeman sin xgab.  
Zi'c ree be zëedzi reeb loj guidxliuj guie par guiniaaz reeb din  
guiët reeb, ziangajc laa reeman por nidxuudx rüjn reeman  
ma cusëëb laagajc reeman, <sup>13</sup>abi' yaguijx reeman gra ni  
rüjnnë reeman bejn ree.

Rabaa da't reeman guial rüjn reeman ni dxuudx ree, ni natu  
ree.

Naj reeman zi'c tijb manch, ruxhiin reeman lanij rüjndi chi  
rawidi tijbzi, abi' rabaa da't reeman guial rusquiee reeman  
lëjt.

<sup>14</sup>Ad zajct guguaa reeman tijb béngunaa sin guial ad züjnt  
reeman xgabdxuudx, ad rucwëzt rüjn reeman dol rusquiee  
tëë reeman Bén ad rignia'za'ct ree xtiidx Dios din güün ree-  
man dol, abi' dád nasin reeman par güün reeman gan ni  
rzëëbladx reeman, laa reeman ma naj par yayal reeman xcasti  
Dios. <sup>15</sup>Ad zinaltri reeman xnejzaman, ma bidxaa zi'c naban  
reeman, ma zinal reeman ni been Balaam Bén badëed xtiidx  
Dios loj ree bejn, xi'n Bén brii laj Beor, chi guyënman nünman  
gan milia por ni mal nünman. <sup>16</sup>Per chi zëman ziguieenman  
ni mal guin, bacwëöz Dios laaman, basneeman xburaman zi'c  
tijb bejn, zian bacwëöz Dios xixgabtontaman.

<sup>17</sup>Yan Bén rusquiee cuzat reen lojdi naj reeman zi'c bizë ni  
ad yu't nijs, zi'c zaj ni ad nët guia, zeel rayal reeman lod nacay  
da't lod ad yu' tëët dxej yarii reeman. <sup>18</sup>Ganax ree diidx nabë

rü reeman, diidx ad rüjnt ree sirv, rëb reeman guial achet güünan guiban bejn zi'ctzi rënman, abi' zian rusquiee reeman bën qui cusa'nri ree nejzmal. <sup>19</sup> Rëb reeman guial achut rayal nabee bejn, per ad rignia't reeman guial nidxuudx rüjn reeman rniabee laa reeman, din graczi ni ad rajct rucwëëz rüjn ree bejn, laan naj ni rniabee laa reeman. <sup>20</sup> Chi ma beenbee ree bejn dux Dad ree Jesucrist guial laaman naj bën babëë dunuj ree loj dol ma basa'n tëë reeman nidxuudx yu' ree loj guidxliuj guie, abi' rtiëjb reeman rniabeen laa reeman stijb, dxel piorli guiban reeman guial chi gad reeman güünbee laaman. <sup>21</sup> Zagdxeli naj ad nünbeet reeman xnejzaman, guial beenbee reeman laan abi' basa'n reeman xtiidxza'caman ni ma biguiejn reeman. <sup>22</sup> Con laa reeman rajc cumplid diidx ni rëb: “Rayaw bë'cw ni bayëbib, guiáad cüch qui gojzri con nijs naya rayub loj nizbajn.”

### 3

#### *Ni gac chi gui't Jesucrist stijb*

<sup>1</sup> Gradi compniar raliduladx ree Jesucrist, rën da'tan lëjt, nine naj gui'ch rarojrp rxhialan par lëjt. Loj grop gui'ch guie cayünan nagueijn ganenë'n lëjt din güündi xgab zi'c rayal. <sup>2</sup> Gol basaaladx ni rëb ree bën badëëd xtiidx Dios loj ree bejn tiamp gulal, gol basaaladx tëë xtiidx dux Dad ree Jesucrist, bën babëë dunuj ree loj dol, xtiidxaman ni balüü ree apóstoles lëjt.

<sup>3</sup> Gol badxe'guijc, chi ma zidyob nit guidxliuj, chu' ree bën guze' lëjt abi' guiban reeman zi'ctzi rën reeman. <sup>4</sup> Abi' na reeman lojdi: “¿Gon promisejs been Jesucrist guial gui'taman stijb? Ma güjt gra ree dux béngulal ree, abi' graczi ni yu' loj guidxliuj guie sta naj gajc diizd chi gocchaaw guidxliuj.” <sup>5</sup> Na reeman zian, guial ad rënt reeman yayagbee reeman guial diizd tiamp gulal mal yu' xanyabaa në guidxliuj abi' por xguialrniabee Dios brii guidxliuj guin loj nijs. <sup>6</sup> Gojc xchej, dxel con nijs gajc banijt Dios bën gocli ree. <sup>7</sup> Per xanyabaa në guidxliuj raguiaa ree yan, ma naj guial gunijt Dios laa reen con bajl por xguialrniabeeman dxej ni güün xguialguxtisaman con ree bën ad ruzoobt xtiidxaman.

<sup>8</sup> Zeel rnin lojdi, compniar raliduladx ree Jesucrist, ad bal yayanladxidi, guial par dux Dad ree Dios tib dxej naj zi'c timil ijz, guiáad timil ijz naj zi'c tib dxej.

<sup>9</sup> Ad cayaglaataman par güün cumplid xpromejsaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

<sup>10</sup> Zi'c tal ri't tijb béngubaan achut ragbee gui'taman, zian guidxin dxej gui't dux Dad ree Jesucrist stijb, nadxeb da't gac naquie' chi nidloj xanyabaa, gui'ad gra ree ni yu' xanyabaa guin, gunijt Dios laa reen con bajl, në guidxliuj con gra ree ni yu' lojn, con bajl gunijt Dios laa reen.

<sup>11</sup> Yan, guial ma ragbeedi xhienaag nit guidxliuj, rüjn naguiejn guibandi naya sin dol zi'c rën Dios. <sup>12</sup> Con gan gol gulëjz dxej ni ma gulejman, dxej ni guze'caman xanyabaa në gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxej zii. <sup>13</sup> Per dunuj ree caylëjz ree xanyabaa cüb në guidxliuj cüb zi'c ma been Dios promejs, ni gac zi'c tal rënman.

<sup>14</sup> Zeel rnin lojdi compniar raliduladx ree Jesucrist, la'tgaj cabëzidi gac ree ni guin, gol been da't naguiejn din guidx-aagloj Dios lëjt naya sin dol, riga'dxenë tëë lasa'di. <sup>15</sup> Gol badxe'guijc, guial dux Dad ree Dios cayajpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bën rayën da't ree, zian-gajc naman lojdi loj ree xtiidxaman, zi'ctzi naj quiarguiejn ni bazaladx Dios lojman. <sup>16</sup> Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawëëg guial chignia' bejn, dxel bën ad rajctczi ree në ree bën ad zinalt xtiidx Dios con guidib luxdoo, ruchaa reeman ni rën guiëb xtiidx Pab, zi'cgajc rüjnnë reeman ni zëëd ree loj xtiidx Dios, zeel laagajc reeman cusëëb laa reeman.

<sup>17</sup> Compniar raliduladx ree Jesucrist, rënan lëjt, zeel yan guial ma ragbeedi nine ree, gol gojp cudad chitëë güün ree bën rën ree gusquiee lëjt gan, chitëë gucwëëz sudxi'chidi loj xnejz Dios. <sup>18</sup> Zagdxeli gol been naguiejn güünbeedi mazri dux Dad ree Jesucrist, bën baguijx dux tol ree, gol been tëë naguiejn gagbeedi mazri guial rën da'taman dunuj ree. Laaman rayal respekt gra tiampczi.

## Gui'ch yaløj bacaa San Juan

### *Jesucrist runee guialnaban tiblayaa*

<sup>1</sup> Gui'ch guie naj par gugojnan lëjt xcwent Jesucrist, bën mal yu' gocli diizd chi gad guidxliuj gacchaaw. Ma bacaagdiajgan, ma baguiaan ni beenman, baguiaan laaman zagdxe, ma baqui' tēen laaman con quijb du yaan. Laaman naj bën runee guialnaban, <sup>2</sup> ma bi'taman loj guidxliuj, ma baguiaan laaman, dunujn nayajc testiw ragojn tēen lëjt xcwentaman. Laaman naj bën runee guialnaban tiblayaa, najman bën guzunē Dios diizd gocli bi't tēeman loj guidxliuj. <sup>3</sup> Zeel ragojn lëjt ni ma baguiaan ni ma baguiejn tēen din gaquidi tijbzi con dunujn zi'c nayajcan tijbzi con dux Dad ree Dios con xi'nman Jesucrist. <sup>4</sup> Ragojn lëjt nine ree loj gui'ch guie din chu' luxdoodi zagdxe, zi'c yu' du luxdoon zagdxe.

### *Royal yanaab ree loj Dios din güünman dux tol ree perdon*

<sup>5</sup> Ni ne naj ni balüü Jesucrist dunujn, yan ragojn lëjt guial naj Dios biani, achetczi dol nabannēman. <sup>6</sup> Bal yaguie'ch ree nadxu'nē' reeman abi' zunaal gajc ree nejz mal rasquiee ree ad zunaalt ree diidxli.

<sup>7</sup> Per bal yunaal ree xbiani Dios zi'c za'man, guial achet xtolaman, dxel ma nayajc ree tijbzi con du lasa' ree. Abi' xrejñ xi'nman Jesucrist chiquied gra dux tol ree.

<sup>8</sup> Bal yaguie'ch ree achet dux tol ree yu', rasquiee dunuj gajc ree, ad cayguie'ch tēet ree diidxli. <sup>9</sup> Per bal yaxhoobdol ree loj Dios, rayagbee ree zagdxe guial güünman ni naman, güünman perdon dux tol ree, chiquied tēeman gra ni mal yu' du luxdoo ree. <sup>10</sup> Per bal yaguie'ch ree ad waguieent ree dol, raguieen reeman zi'c bēnrusquiee, ad raliduladx tēet ree xtiidxaman.

## 2

### *Bén rēn Dios rayal guzoobaman xtiidxaman*

<sup>1</sup> Xi'n, rucan nine ree par lëjt chitēē güündi dol. Per bal chu lëjt rüjn dol, raya'p ree bën guiniee por dunuj ree loj Dios, laaman naj Jesucrist bën ad wayüjntczi dol. <sup>2</sup> Por xguialgüjtaman naj dux tol ree perdon, abi' ad dux toltzi ree, nē gra xtol ree bénguidxliuj.

<sup>3</sup> Bal razoob ree xtiidx Dios, zian raya'p ree segur guial ma naguieenbee reeman zagdxe. <sup>4</sup> Per bal chu rēb: “Nünbeen Dios”, abi' ad ruzoobtaman xtiidxaman, rusquieeman, din ad walit ni rēbaman. <sup>5</sup> Per bēnrusoob xtiidxaman, diidxli rēnman laaman con guidib luxdooman, zian rayagbee ree

guial ma nabajnnë' reeman. <sup>6</sup> Bén rëb nabannëman Dios, rayal guibanman zi'c guban Jesucrist.

*Bén zinal ree xnejz Dios rën lasa' reeman*

<sup>7</sup> Gradi compniar raliduladx ree Jesucrist, diidx canin lojdi yan ad diidx cübt reen, xtiidx gajc Jesucristan ni ma biguiejndi diizd yaløj, laagajcanan canin lojdi yan. <sup>8</sup> Per canin laa reen zi'c rülüü diidx cüb reen, din por Jesucrist në por lëjt ma rguien guial ma cusa'ndi ni mal abi' zinalidi ni zagdxë.

<sup>9</sup> Bal chu rëb zinal xnejz Dios abi' ralen lasa'man, sta zinalaman nejz mal. <sup>10</sup> Bén rën lasa' zinalaman xnejz Dios, abi' ma naj nawëëg guial güün dol laaman gan. <sup>11</sup> Per bén ralen lasa', nabanman loj nejz mal, ad ragbeetaman ban cheman, din nejz mal guin basa'n laaman zi'c tijb bénlutia'p.

<sup>12</sup> Xi'n, rucan gui'ch guie par lëjt, din ma gojc xtolidi perdon por xguialrniabee Jesucrist. <sup>13</sup> Cucan nine ree par lëjt guial najdi bén ma rignia' mazri chunin naj Jesucrist. Bén ma yu' gocli diizd chi gad guidxliuj gacchaaw, cucan ni ne ree par lëjt bén ma rignia' ta'n chunin naj Jesucrist din ma beendi gan ad züjntidi ni zëed loj xindxab, cuca tëen nine ree par lëjt bén qui guzulojri ree cayignia' chunin naj Jesucrist din ma nünbeedi dux Dad ree Dios.

<sup>14</sup> Bacan nine ree par lëjt guial ma rignia'di mazri chunin naj Jesucrist bén ma yu' gocli diizd chi gad guidxliuj gacchaaw, baca tëen nine ree par lëjt guial ma rignia'di ta'n chunin naj Jesucrist, din za'dxi'chidi zinal tëedi diidxli xnejz Dios con guidib luxdoodi, ma been tëedi gan ad züjntidi ni zëed loj xindxab.

<sup>15</sup> Ad sëëbladixidi ni ad najt zagdxë ni rüjn ree bejn loj guidxliuj, bal chu rën mazri ni riga' loj guidxliuj guie, ad rëntaman dux Dad ree Dios, <sup>16</sup> din achetczi ni mal yu' loj guidxliuj guie zëed loj Dios, ni rajc gajc loj guidxliuj guien, rüjn reeman zi'c naj xixgab dxuudx reeman, rzëëbladix reeman gap reeman gra ni ruguiaa reeman, rüjn tëe reeman benro' por gra ni rajp reeman. <sup>17</sup> Per guidxliuj guie yu' dxej nitan con guidib ni mal yu' lojn, per bén naban zi'c rën Dios rajpaman guialnaban tiblayaa con laaman.

*Yunaal ree ni naj diidxli*

<sup>18</sup> Xi'n, rnin lojdi ma zidyob dxej nit guidxliuj, din ma biguiejndi guial rayal gui't tijb bén su contr Jesucrist guiëb tëeman laaman naj Jesucrist. Yan zien ree bén ralen laaman ma balüüloj, zeel rayagbee ree guial ma zidyob dxej nit guidxliuj. <sup>19</sup> Bén ralen ree Jesucrist, duloj gajc ree brii reeman nayajc ree bén rliladx Jesucrist, per diidxliczi ad najt reeman dux bejn ree, din bal niajc reeman dux bejn ree, naya'n

reeman duloj ree guial raliladx ree Jesucrist, per gojc nine din guiguien guial ad grat reeman naj dux bejn ree. <sup>20</sup> Jesucrist banee xSprijt Dios lojdi, abi' por laaman gradi ma ragbee ni naj diidxli. <sup>21</sup> Cucan nine par lëjt, ad guial ad ragbeetidi conin naj ni diidxli, cucanan guial ma ragbeedan, abi' lëjt ragbee guial ni'qui tijb ni rusquiee ad zajct gui't loj ni diidxli guin. <sup>22</sup> Yan, ¿chu naj bën rusquiee? Bën rusquiee naj bën rëb guial ad Jesúst naj bën guxhaal Dios loj guidxliuj. Bën rëb zian naj zi'cgajc naj bën za' contr Jesucrist guial ad rliladxtaman Dios ni'qui xi'nman Jesucrist. <sup>23</sup> Din chutëez bën rëb guial ad najt Jesucrist Xi'n Dios, laaman ad nünbeet dux Dad ree Dios, per bën rëb Jesucrist naj Xi'n Dios në dux Dad ree Dios nünbeeman.

<sup>24</sup> Zeel gol binal diidx ma biguejndi diidz guia'xchej chi bililadxidi Jesucrist. Bal chinalidi diidx guin ree, dxel ziz nabannëquidi dux Dad ree Dios con xi'nman Jesucrist. <sup>25</sup> Abi' ni ma rëb Jesucrist guneeman naj guialnaban tiblyaa.

<sup>26</sup> Cucan diidx guie ree par lëjt por ree bën rën gusquiee lëjt. <sup>27</sup> Per nabannëdi xSprijt Dios, bën banee Jesucrist, ad riaadxtidi bën gulüü lëjt, din Sprijt guin gajc rulüü lëjt gra, abi' ganax diidxli ad ni rusquieet, zeel gol gubajn zi'c rniabeeman din gusnuu gaquidi tijbzi con Jesucrist.

<sup>28</sup> Yan rnin lojdi xi'n, gol binal xnejz Jesucrist, chitëe yadxeb ree chi gulüülojman, ad zaya'nxtu tëtë ree lojman chi gui'taman. <sup>29</sup> Lëjt ragbee guial rüjn Dios zi'c rayal, ragbee tëtëdi guial graczi ree bën rüjn zi'c rayal, laa reeman naj xi'n Dios.

### 3

#### *Bën naj ree xi'n Dios*

<sup>1</sup> Gol been xgab, plact rën dux Dad ree Dios dunuj ree, zeel balëe dulaj ree xi'n Dios, abi' waliczan nayajc ree xi'nman. Per bën ad zinalt ree xnejz Dios ad nünbeet reeman dunuj ree zi'c xi'nman, din ad nünbeet reeman laaman. <sup>2</sup> Gradi compniar raliduladx ree Jesucrist, rënan lëjt, rnin lojdi: Ma nayajc ree xi'n Dios, majsi ad rayagbeet ree xhienaag yayajc ree chi gui't Jesucrist stijb, per raya'p ree segur guial yayajc ree zi'c najman, din xt nadxel yaguaa ree diidxliczi xhienaag najman. <sup>3</sup> Graczi ree bën rliladx guial gac zian, rüjn reeman naguiejn guiban reeman naya delant loj Dios zi'c laaman, guial achet xtolaman.

<sup>4</sup> Per graczi ree bën ad zinalt ni rniabee Dios, cayüjn reeman dol, din dol naj guial ad rüjnt reeman ni rniabeeman. <sup>5</sup> Lëjt ragbee guial bi't Jesucrist loj guidxliuj din chiquiedaman xtol ree bejn, abi' laaman ad guyutczi dxej ad yu' tëtë dxej nünman dol. <sup>6</sup> Zeel bën naj ree tijbzi con laaman rüjn reeman

naguiejn ad rüjnt reeman dol, per graczi Bén rüjn dol zianczi ad wayignia't reeman chu najman, ad wayünbee tēet reeman laaman. <sup>7</sup> Xi'n, ganin lējt, ad bal tiēbidi chu gusquiee lējt, din Bén cayünj ni rēn Dios, laaman naya delant lojman zi'c naya Jesucrist delant lojman. <sup>8</sup> Per Bén yu' loj dol xbejn xindxaban, din xindxab rüjn dol diidz yaløj, abi' Jesús Xi'n Dios bi'taman loj guidxliuj par zianczi din güünman gan loj xgualrniabee xindxab.

<sup>9</sup> Zeel ni'qui tijb ree Bén ma zinal xnejz Dios ad rusnuutri rüjn dol, din ma nabannēman Dios, ad rayal tēetri güünman dol din ma najman xi'nman. <sup>10</sup> Laa rguien gajc chu reenin naj xi'n Dios chutēē reenin naj xi'n xindxab, din chutēēz ad rüjnt ni rēn Dios ad rēn tēet lasa'man, dxel ad najtaman xi'n Dios.

### *Royal yayēn du lasa' ree*

<sup>11</sup> Abi' lējt ma biguiejndi xtiidx Dios diidz guia'xchej guial rayal yayēn dulasa' ree. <sup>12</sup> Ad rayalt yaguieen ree zi'c been Caín, cwējbaman gunabee xindxab laaman, zeel bagüjt bi-jchaman. Caín been zian, din beenman ganax ni mal, guiáad bijchaman been ni zagdxe.

<sup>13</sup> Zeel gradi compniar raliduladx ree Jesucrist, ad gagdxadi bal yalen ree bénguidxliuj lējt guial ma zinalidi xnejz Dios. <sup>14</sup> Dunuj ree rayagbee guial ad nayajct ree zi'c bengüt par laaman, ma raya'p ree guialnaban delant lojman, guial rayēn du lasa' ree. Per Bén ad rēnt lasa', sta najman zi'c bengüt par Dios. <sup>15</sup> Graczi Bén ralen lasa' najman zi'c Bén rugüjt bejn, abi' lējt ragbee, tijb Bén rugüjt bejn ad rajptaman guialnaban tiblayaa delant loj Dios. <sup>16</sup> Ma rayagbee ree conin naj guial rēn lasa', guial güjt Jesucrist por dunuj ree, yan ziangajc dunuj ree rayal yayēn dulasa' ree xt yayējt ree por laa reeman. <sup>17</sup> Per bal chu tijb dunuj ree ad riaadxt xhienin loj guidxliuj guie abi' ruguiaaman tijb Bén cayaadx laan abi' ad rüjntaman laaman yudar, dxel, ¿xhienaag guiēbaman guial rēnman Dios? <sup>18</sup> Xi'n, ganin lējt, ad con diidxtizi yaguie'ch ree guial rayēn dulasa' ree, rayal guiguien guial rayēn dulasa' ree por ni raguieen ree.

### *Raya'p ree segur guial za' nē Dios dunuj ree*

<sup>19</sup> Zian rayagbee ree cayzoob ree xtiidx Dios, abi' raya'p ree segur guial cayguieen ree ni rayal yaguieen ree delant lojman. <sup>20</sup> Per bal cayguieen ree zian abi' sta ragbee du luxdoo ree guial ad cayguieent ree zi'c rayal, rayal yayagbee ree guial Dios naj mazri benro' guial duloj ree, abi' laaman ragbee gra. <sup>21</sup> Zeel zi'c rēnan lējt rnin lojdi, bal ragbee du luxdoo ree guial cayguieen ree ni zagdxe, dxel raya'p ree segur guial cayguieen ree ni zagdxe delant loj Dios. <sup>22</sup> Laaman guneec graczi ni yanaab ree lojman guial razoob ree xtiidxaman

ni rniabeeman, abi' raguieen ree naguiejn raguieen ree ni ruladxaman. <sup>23</sup> Ni ne naj ni rniabeeman yaguieen ree guial yaliduladx ree Jesucrist naj xi'nman yayën tää dulasa' ree zi'c gunabeeman dunuj ree. <sup>24</sup> Bén rüjn ree ni rniabee Dios, laa reeman nabannë Dios abi' Dios nabannë laa reeman, rayagbee tää ree guial za'man con dunuj ree por xSprijtaman bén baneeman duloj ree.

## 4

### *Bén ad rliadxt Jesucrist ad yu't xSprijt Dios luxdooman*

<sup>1</sup> Gradi compniar raliduladx ree Jesucrist, rënan lëjt, rni tään lojdi: ad rliadxidi chutëez bén rëb rnieeman xtiidx Dios. Yaløj xgaj gol gogbee zagdx bal wali reeman xtiidx Diosan rniee reeman o ad laatanan ya, din loj guidxliuj guie ziza zien ree bén rusquiee, rëb reeman rniee reeman xtiidxaman. <sup>2</sup> Yan din gagbeedi chu reenin rniee xtiidx Dios: Laa reeman naj bén rliadx guial Jesucrist bi't zi'c bénguidxliuj. Bén rliadx ree zian yu' xSprijt Dios luxdoo reeman. <sup>3</sup> Per bén ad rliadxt ree zian ad yu't xSprijtaman luxdoo reeman, laa reeman naj bén ralen Jesucrist. Ma biguiejndi guial rayal gui't tijb bén su contr laaman. Abi' diizd yan ma za' sprijt guin guidxliuj, zeel zien ree bén ralen Jesucrist ma yu' loj guidxliuj guie.

<sup>4</sup> Per lëjt xi'n ma najdi xi'n Dios, guiáad ree bén ralen Jesucrist ad zajct güün reeman lëjt gan, din mazri naroo guialrniabee ca' bén nabannë lëjt guial loj bén nabannë bén zinal ree nejz mal loj guidxliuj guie. <sup>5</sup> Bén za' ree contr Jesucrist rüjn reeman xgab tijbzi ni riga' loj guidxliuj guie rniee reeman, guiáad ree bén ad rliadxt Jesucrist rüjncwent reeman ni rëb reeman. <sup>6</sup> Per dunuj ree ma nayajc ree xbejn Dios, abi' bén ma nünbee ree Dios rucaagdiajg reeman ni ranee ree, guiáad ree bén ad nünbeet Dios ni'quid rüjncwent reeman ni ranee ree, zian rayagbee ree chu nabannë xSprijt Dios bén rulüü dunuj ree diidxli chutëenin nabannë sprijt ni rulüü ganax ni rusquiee.

### *Rën Dios dunuj ree*

<sup>7</sup> Rënan lëjt, rnin lojdi rayal yayën dulasa' ree, din gualrën lasa' zëed loj Dios. Gra bén rën lasa' naj xi'n Dios nünbee tää reeman laaman. <sup>8</sup> Abi' bén ad rënt lasa' ad wayünbeetaman Dios, din gualrën lasa' zëed loj Dios. <sup>9</sup> Balüü Dios guial rënman dunuj ree, din majsi tijbzi xi'nman Jesucrist, guxhaalaman laaman guidxliuj din yaya'p ree guialnaban delant loj Dios por laaman. <sup>10</sup> Rën Dios dunuj ree. Ad dunujt ree bayën laaman, yaløj laaman guyën dunuj ree, zeel guxhaal xi'nman Jesucrist persi güjtaman por dux tol ree, zeel ma yu' perdon par dunuj ree. <sup>11</sup> Rënan lëjt, zeel rnin lojdi, zi'c rën Dios dunuj



ree, ziangajc rayal yayën dulasa' ree. <sup>12</sup> Majsi achut waguiaa laaman, per bal rayën dulasa' ree, nabannë' qui ree Dios, abi' diidxli rayën reeman.

<sup>13</sup> Dunuj ree rayagbee guial nabannë' reeman abi' laaman za' con dunuj ree, din ma banee xSprijtaman duloj ree. <sup>14</sup> Abi' dunuj gajcan baguiaa ragojn tēen guial guxhaal Xi'n Dios loj guidxliuj guie persi gūjtaman por xtol gra ree bejn. <sup>15</sup> Chutēēz rēb guial Jesucrist naj Xi'n Dios nabannëman Dios, abi' Dios nabannë laaman. <sup>16</sup> Dunuj ree rayagbee raliladx tēē ree guial rēn Dios dunuj ree. Por laaman zēēd guial rayën dulasa' ree. Abi' bēn rēn lasa' nabannëman Dios, guiáad Dios nabannë laaman.

<sup>17</sup> Bal wali rayën ree Dios zi'c rēnman, ad najtan ni yadxeb ree dxej gūūn xguialguxtisaman, din ma nayajc ree tijbzi con laaman, zi'c naj Jesucrist tijbzi con laaman. Din guidib dux guialnaban ree nabannë' reeman loj guidxliuj guie. <sup>18</sup> Bēn rēn Dios, ad rdxebtaman, din bēn rēn laaman diidxli, ad rdxebtraman, per bēn ad rēnt laaman rdxebaman, din rūjnman xgab casti ni yayalaman, zeel bal chu rdxeb, ad walitaman rēnman laaman. <sup>19</sup> Dunuj ree rayën Dios, din yaløj laaman guyën dunuj ree. <sup>20</sup> Bal yu' bēn rēb: "Rēnan Dios", abi' ralen lasa'man, rusquieeman. Din bal id rēn lasa'man bēn ruguiaaman, ¿xhienaag guiēnman Dios bēn ad waguiaataman? <sup>21</sup> Laagajcaman na: Bēn rēn Dios rayal guiēn lasa'man.

## 5

*Guial raliduladx ree Jesucrist zeel raguieen ree gan loj ni mal*

<sup>1</sup> Gra ree bēn rliladx guial Jesús naj bēn guxhaal Dios, laa reeman naj xi'nman. Bal chu rēn dux Dad ree Dios, nē gra ree xi'nman rēnman. <sup>2</sup> Chi rayën ree Dios raguieen tēē ree ni rniabeeman, dxel rayagbee ree guial rayën ree gra ree xi'nman. <sup>3</sup> Guial guiēn bejn Dios naj guial gūūnman ni rniabeeman. Abi' ad nawēēgt naj guial gūūnman ni rniabeeman, <sup>4</sup> din gra bēn naj xi'nman ma rūjn gan loj ree ni mal yu' loj guidxliuj guie. Abi' guial raliduladx ree, zeel ma raguieen ree gan loj ree ni mal guin. <sup>5</sup> Bēn rliladx guial Jesús naj Xi'n Dios, tijbzi laaman zajc gūūn gan loj ree ni mal yu' loj guidxliuj.

*Ni rulüü Dios dunuj ree xcwent Jesucrist*

<sup>6</sup> Jesucrist bi't loj guidxliuj, gurobnijsaman guxhie' tēē xrejnmān loj crūjz. Ad gurobnijsztaman, nē guxhie' xrejnmān. XSprijt Dios naj testiw, laaman rū diidxli xcwent ree nine.

<sup>7</sup> Choon testiw yu' xanyabaa: xDadaman Dios, Jesucrist nē xSprijt Dios, guiyon reeman naj tijbzi Dios.

<sup>8</sup> Yu' tēē choon testiw loj guidxliuj: XSprijt Dios, nē guial gurobnijš Jesucrist con ni guxhie' xrejman loj crūjz, guiyon reen rü diidx tijbzi.

<sup>9</sup> Bal raliduladx ree ni na ree bejn, mazri rayal yaliduladx ree ni na Dios xcwent xi'nman Jesucrist, dīn xtiidxaman mazri lasajcan. <sup>10</sup> Bén rīliladx Xi'n Dios, laaman rīliladx ni rēb Dios xcwentaman. Per bén ad rīliladxt laaman, rūjnman Dios zi'c bén rusquiee, dīn ad rīliladxtaman ni rēbaman xcwent Xi'nman. <sup>11</sup> Abi' ni rēbaman naj guial ma baneeman guialnaban tiblayaa duloj ree, guialnaban guin zēēd por xi'nman. <sup>12</sup> Bén za'nē Xi'n Dios tijbzi, laaman naban tiblayaa delant loj Dios, per bén ad za'nēt laaman tijbzi, laaman ad ca't guialnaban guin.

*Ni bigra ca loj gui'ch guie*

<sup>13</sup> Cucan nine ree par lējt najdi bén rīliladx Jesucrist Xi'n Dios dīn gagbeedi guial ma ca'di guialnaban tiblayaa delant loj Dios.

<sup>14</sup> Rayagbee ree zagdxē: chi yanaab ree xhienin lojman, rūjncwentaman dunuj ree, bal yanaab ree zi'c rēnman. <sup>15</sup> Bal rayagbee ree rūjncwentaman dunuj ree chi ranaab ree xhienin, ziangajc rayagbee ree zagdxē guial guneeman ni ranaab ree.

<sup>16</sup> Bal chu dunuj ree rayagbee guial tijb dunuj ree cayguieen dol ni zajc gac perdon, rayal cwedxaman Dios por laaman zian gudēē Dios guialnaban tiblayaa lojman, bal zajc gac dol guin perdon. Yu' dol ni ad zajct gac perdon, abi' ad canitan guial cwedxidi Dios por bén rūjn dol guin. <sup>17</sup> Graczi ni mal naj dol, per yu' dol ni zajc gac perdon.

<sup>18</sup> Rayagbee ree guial bén ma naj ree xi'n Dios ad rusnuutri rūjn reeman dol, dīn Jesucrist Xi'n Dios naj bén rniaj laa reeman, abi' xindxab ad zajctri nabeex laa reeman. <sup>19</sup> Rayagbee ree guial nayajc ree xbejn Dios, per ree bénguidxliuj, bén ad najt ree xbejn Dios, xindxab rniabee laa reeman. <sup>20</sup> Rayagbee tēē ree guial Jesucrist Xi'n Dios ma bi'taman loj guidxliuj guie, guxhalaman dux quiarguejn ree, persi baguieenbee ree bén naj quijb Dios. Yan nadxu'nē' reeman tijbzi por Xi'nman Jesucrist. Tijbzi laaman naj Dios, por laa tēēman yu' guialnaban tiblayaa. <sup>21</sup> Xi'n, gol gojp cudad chitēē chinalidi ni naladx ree bejn naj Dios.

## Gui'ch barojp bacaa San Juan

### *Rxhial Waj xtiidx Dios loj ree bejn*

<sup>1</sup> Naj, bèn rniabee loj ree bèn rliladx Jesucrist, rxhialan gui'ch guie lojdi najdi bèn gulej Dios rliladx tëëdi Jesucrist, diidxli rënan lëjt, abi' ad tijbtizi naj, në gra ree bèn zinal xtiidx Dios. <sup>2</sup> Rënan lëjt guial ma nabannë' ree xtiidx Dios abi' laan nabannë dunuj ree zianczi. <sup>3</sup> Dux Dad ree Dios con Xi'nman Jesucrist güünle' lëjt, yaya reeman lëjt, yabe'cdxe tëë reeman luxdoodi guial zinalidi xtiidxaman rën tëë lasa'di.

### *Rniabee Dios yayën du lasa' ree*

<sup>4</sup> Dád nix guyu luxdon chi gogbeen yu' ree xcompniaridi, diidxli zinal xtiidx Dios naban tëë reeman zi'c rniabee dux Dad ree Dios. <sup>5</sup> Yan, zi'c rënan lëjt najdi dux compniar ree, gol been wen gol guyën lasa'di. Ni canin lojdi ad nicübta, diidx ni bacaagdiajg gajquidi diizd guia'xchejn. <sup>6</sup> Guial rën Dios naj guial guiban bejn zi'c rniabee Dios, abi' ni rniabeeman ni bacaagdiajgudi diizd guia'xchej naj guial rayal guiban bejn, guiën lasa'man.

### *Bén rusquiee ree bejn*

<sup>7</sup> Rnin zian, din gra ladczi guidxliuj ziza zien ree bèn rusquiee ree bejn, guial ad rliladxt reeman bi't Jesucrist loj guidxliuj zi'c bejn, bèn rüjn zian rusquieeman abi' za'man contr Jesucrist. <sup>8</sup> Gol gojp cudad chitëë gusëëbidi ni rayalidi por ni cayüjndi, din tia'di gra ni rayalidi delant loj Dios.

<sup>9</sup> Chutëëz bèn racaa guijc zi'c balüü Jesucrist bejn ree ad nabannëtaman Dios, per bèn zinal xtiidx Jesucrist zi'c balüüman bejn ree, laaman nabannë Dios con Xi'nman. <sup>10</sup> Bal chu gui't lidxidi abi' ad rulüütaman xtiidx Dios zi'c balüü Jesucrist, ad cu'di laaman lënü, ad güüncwent tëëdi ni rnieeman. <sup>11</sup> Din bèn rüjncwent xtiidxaman, rën guiëban guial ma za'man conform con ni rusquiee bèn guin.

### *Diidx bigra ca ree loj gui'ch guie*

<sup>12</sup> Zien ree ni rënan ganin lëjt, per ad rëntan gucanan loj gui'ch, din wed ad zaglaat guialan guidganan lëjt din ganenë' quijb naj lëjt din chu' du luxdoo ree zagdxe tijbzi. <sup>13</sup> Bèn naj ree bèn ma gulej Dios, dux compniar raliduladx ree Jesucrist bèn zojb ree niz guie, rugajpdioz reeman lëjt.

## Gui'ch bayon bacaa San Juan

### *Rugajpdioz Waj Gayo*

<sup>1</sup> Naj, bén rniabee loj ree bén rliladx Jesucrist, rxhialan gui'ch guie par lüj Gayo najl da miwan diidxli rēnan lüj.

<sup>2</sup> Zi'c rēnan lüj rniaaban loj Dios zi'c zēl zagdxē loj xnezaman ziangajc grii zagdxē gra ni cayüjnl gunee tēēman lüj guialnadaan. <sup>3</sup> Dád nix guyu luxdon chi guna garol dux compniar ree guial diidxli nabanl zi'c rēb loj xtiidx Dios. <sup>4</sup> Achet mazri ni rgu' luxdon zagdxē zi'c chi riguiējnan guial diidxli naban ree da compniaran zi'c rēb loj xtiidx Dios.

<sup>5</sup> Zi'c rēnan lüj Gayo, rnin lojl guial zagdxē da't naj ni cayüjnl con dux compniar ree bén rliladx Jesucrist abi' mazczi zagdxē naj ni rüjnl con ree bén zēēd lood ren. <sup>6</sup> Din laa reeman na delant loj gra ree bén rliladx Jesucrist, bén rado'pnē' reen guie, guial gunajchi'l laa reeman, zeel zagdxē güünl guial güünl laa reeman yudar con ni ryaadx reeman guial cayüjn reeman sirv loj Dios din gusnuu xnejz reeman. <sup>7</sup> Din brii reeman zigtie'ch reeman xtiidx Jesucrist abi' ad rtiējbt reeman tia' reeman ni rudēē ree bén ad rliladxt laaman. <sup>8</sup> Zeel dunuj ree bén raliduladx ree Jesucrist, rayal yaguieen ree yudar bén catie'ch ree xtiidxaman, zian yaguieen ree yudar guire'ch ni naj diidxli.

### *Ad ruzoobt Diótrefes diidx*

<sup>9</sup> Ma guxhalan tijb gui'ch loj ree dux compniar ree bén rliladx ree Jesucrist, per Diótrefes guial ruladxaman nabeeman ad rüjncwenttaman dux tiidxan. <sup>10</sup> Zeel bal guidganan lējt dxel ganenē'n laaman xcwent guial rnieeguijdxaman rniee tēēman diidx rusquiee contr dunujn abi' ad tijbtzi laan rüjnman nē ad rudēēt lidxaman yaya'n dux bejn ree bén zēēd ree lood ren, ad rtiējb tēētaman gudēēd lidx ree ben ren yaya'n reeman, abi' ree bén rudēēd lidx ad rtiējbtaman chu' reeman lēn yadoo.

<sup>11</sup> Zi'c rēnan lüj Gayo rnin lojl ad chinalil nejz mal, been ni naj ni zagdxē din bén rüjn ni zagdxē laaman naj xbejn Dios per bén zinal ni mal ad nünbeetaman Dios.

<sup>12</sup> Graczi reeman ruza't Demetrio zagdxē guial binalaman zi'c rayal, laa nen gajc xhienaag nabanman xt dunujn raza't laaman zagdxē abi' lüj ragbee guial diidxli naj ni raguie'chan.

*Diidx bigra ca ree loj gui'ch guie*

<sup>13</sup> Zien ni rēnan ganin lojl per ad rēntan gucanan loj gui'ch,  
<sup>14</sup> din wed ad zaglaat guialan guidganan lüj, dxel ganenē'  
quijb naj lüj.

<sup>15</sup> Yabe'cdxe Dios luxdool, dux miw ree bēn riga' ree guie  
rugajpdioz lüj, bagajpdioz tēē gra dux miw ree.

## Gui'ch bacaa San Judas

### *Rugajpdioz Judas bén naj ree bén gule Dios*

<sup>1</sup> Naj, Judas bijch Santiaaw, cayünan sirv Jesucrist, cucan gui'ch guie par lëjt najdi bén ma gulej dux Dad ree Dios guial rënman lëjt, abi' dux Dad ree Jesucrist canaj lëjt. <sup>2</sup> Gusnuu yaya Dios lëjt, yabe'cdxeman luxdoodi guiën tēēdi laaman.

### *Bén ad rnieet ree diidxli (2Pe. 2:1-17)*

<sup>3</sup> Gradi compniar raliduladx ree Jesucrist, rënan lëjt, diizd gocli guyënan nixhialan gui'ch lojdi, din gagbeedi xcwent xhienaag naj perdon ni raya'p ree delant loj Dios, per yan ma bidxin dxej rüjn nagueijn gaxhalan gui'ch guie lojdi din ganin lojdi din guiniadi guialrliladx ni ma raya'p ree, ni nayaaloj, guial nayajc ree xbejn Jesucrist. <sup>4</sup> Din yu' ree bén rüjn bén rliladx naabzi par go'ch reeman lojdi. Bén guin ree diizd gocli ma ragbee Dios guial rayal reeman casti, din ad rdxeht reeman laaman, rudxiib reeman guiyc naj Dios benza'c, abi' naban reeman zi'ctzi rën reeman. Ad rtiëjbt reeman nabee Jesucrist laa reeman, laaman naj tijbzi dux Dad ree bén rniabee dunuj ree.

<sup>5</sup> Majsi ma ragbeedi ni ganin lëjt, per ganinan din gusaal-adxidi guial majsi babëë Dios bén Israel ree Egipto, per despuejs banijtaman bén ad bililadxt ree laaman. <sup>6</sup> Në ree anjl ad bazooht xtiidx Dios niniabee reeman lod badëëman loj reeman, basiaawaman laa reeman lod nacay da't xt dxej güün xguialguxtisaman. <sup>7</sup> Nëtëë ree bén Sodoma con ree bén Gomorra con ree guedx gure gajxh, ad laat gubajn reeman, been reeman gra loj nidxuudx zi'ctzi guyën reeman, zeel basagzi Dios laa reeman, banijtaman baze'c tēëman laa reeman, laan naj ni rayal yaguaiaa ree chitëë yaguieen ree zian.

<sup>8</sup> Per ni'czi zian, yan ziangajc rüjn ree bén raguiil mod par go'chzi reeman lojdi, rüjn reeman xgab guial zajc güün reeman zi'ctzi rën reeman, ruxhiin laagajc reeman, ad rtiëjb tēët reeman nabee Jesucrist laa reeman, rnieeguijdx tēë reeman bén naj ree xianjl Dios. <sup>9</sup> Per chi gudildiidx ree arcangel Miguel con xindxab guiyc xcuerp Moisejs, ni'quid bayaxt anjl guin niëjbaman diidxguijdx loj xindxab guin, tijbzi ni rëbaman naj: "Ladxaa Dios gusa'nan lüj." <sup>10</sup> Abi' yan bén raguiil gajc ree mod go'ch reeman lojdi, rnieeguijdx reeman ni ad rignia't reeman, per nidxuudx rüjn reeman, ad rüjnt reeman laan

xgab, contzi rüjn reeman laan zi'c ree be guial ad rüjnt reeb xgab. Zian cusëëb laagajc reeman delant loj Dios.

<sup>11</sup> ¡Prob laa reeman!, guial zinal reeman ni mal zi'c been Caín, mazri zinal reeman milia zi'c been Balaam, guiët tée reeman zi'c güt Coré chi guyënman niniabeeman luar Moisejs. <sup>12</sup> Laagajc reeman ruxhiin lanij rüjndi chi rado'pidi din gawidi tijbzi, guidiblagaa ad ratut reeman raw reeman ad rüjn tée't reeman xgab por ree bejn, rüjnz reeman xgab par cha lën reeman. Naj reeman zi'c zäj ni ad nët guia ni rinë bi, zi'c ree yag rbidx abi' ria'xh reen guial ad rtiat reen. <sup>13</sup> Naj reeman zi'c xtüjp nijsdoo chi rajsan zro' da't, din zi'c ririi bichijn loj nijs guin, ziangajc sin guialxtu rüjn reeman nidxuudx ree, naj tée reeman zi'c ree bajl xanyabaa ni basëëb xnejz, dxel tiblyaaa ma rayal reeman lod nacay da't.

<sup>14</sup> Abi' bën brii laj Enoc, laaman gojc gajdx loj ree xdiaa Adán, gunee man xcwent ree bën guin chi rëbaman: “Naj baguiaa dux Dad Dios zidnë zien da't ree xianjla-man <sup>15</sup> zidgaguieen xguialguxtisaman con gra ree bejn, din guiëbaman xhie casti rayal ree benmal por gra ni mal been reeman në por diidxguijdx ni gunee reeman laaman guial naj reeman bëndol.” <sup>16</sup> Lasa' ree bën guin achetzi ruladx reeman, abi' graczi rnieeguijdx reeman. Zianczi rüjn reeman zi'ctzi rën reeman, abi' zianczi ruza't laagajc reeman zagdx ruza't tée reeman bejn ree zagdx din cwentzi güün ree bën guin ni rën reeman.

### *Mod rayal guiban ree xbejn Dios*

<sup>17</sup> Per lëjt compniar raliduladx ree Jesucrist, rën da'tan lëjt, gol basaaladx guial bën goc ree xi apóstoles Dad Jesucrist <sup>18</sup> rëb reeman: “Chi ma zidyob nit guidxliuj, chu' ree bën guze' gra ni zëed loj Dios güün tée reeman zi'ctzi naj xixgabdxuudx reeman.” <sup>19</sup> Lasa' ree bën guin naj bën rlia' lasa' ree bën ma zinal xnejz Dios, abi' naban reeman zi'ctzi rën reeman, ad yu't xSprijt Dios luxdoo reeman.

<sup>20</sup> Per lëjt compniar raliduladx ree Jesucrist, gol guzudxi'ch loj ni riladxidi, din guialrliladx guin zëed loj Dios. Gol gurejdx gunab Dios con xyudar xSprijtaman. <sup>21</sup> Gol basnuu gol binal guial rën Dios la'tgaj cabëzidi guidxin dxej gunee Jesucrist guialnaban tiblyaaa duloj ree guial rayaman dunuj ree.

<sup>22</sup> Gol been yudar bën sta yu' nawëeg ree luxdoo. <sup>23</sup> Gol been yudar bën zë ree loj nejzmal, zi'c rüjn tijb bën rüjn yudar bën cayajb loj bajl, gol guyën reeman per ad chu'ladxidi zi'c rüjn reeman, gol gojp cudad chitëe yabidi loj xtol reeman.

### *Diidx bigra ca ree loj gui'ch guie*

<sup>24</sup> Yu' tijbzi Dios ca' guialrniabee par guiniaman lëjt, chitëë yabidi loj dol, din chu' luxdoodi zagdxe sin dol chi guidxindi xanyabaa lod za'man. <sup>25</sup> Laaman naj tijbzi Dios bén babëë dunuj ree loj dol por dux Dad ree Jesucrist, rayalaman respejt din gra naj xieenman, tijbzi laaman ca' guialrniabee con guialguxtis diizd gocli, yan con gra tiampczi. Amén.



## Ni balüü Jesucrist loj San Juan

<sup>1</sup> Ni ne ree naj ni ma balüü Dios loj Jesucrist din në laaman gulüü laan loj ree xbejnman, din gagbee reeman conin ma zidyob gac. Abi' Jesucrist guxhaal xianjlanan din gulüüman ni guin ree lon, naj Waj xbejn Jesucrist, bën cayüjn laaman sirv. <sup>2</sup> Abi' canin ni diidxli xcwent xtiidx Dios, xcwent Jesucrist në xcwent gra ree ni baguian.

<sup>3</sup> Xiquilbaa ree bën ni rool, në ree bën rucaagdiajg në ree bën ridxga' ni ca loj gui'ch guie ni rugojn xcwent ree ni gac, din ma zidyob gac reen.

### *Rxhiaal San Juan gui'ch loj guigajdx ree yadoo*

<sup>4</sup> Naj Waj cucan gui'ch guie par lëjt najdi xbejn Cristo, lëjt bën naban ree loj guigajdx ree xguiedx Asia. Dux Dad ree Dios, bën gui't bën naj Dios diizd gocli në yan, në guigajdx ree sprijt za' lod canabeeman, në Jesucrist, laa reeman güünle' lëjt yabe'cdxe tëë reeman luxdoodi. <sup>5</sup> Jesucrist been gra ni naj güünman, laa tëëman goc bën yaløj baban loj ree bengüt abi' laaman rniabee gra ree bën rniabee loj guidxliuj. Laaman rën dunuj ree abi' con xrejnman basiaman dux tol ree <sup>6</sup> abi' beenman dunuj ree zi'c bën rniabee, been tëëman dunuj ree bixhioz rüjn sirv xDadaman Dios. Zeel Jesucrist rayalaman respejt në gualrniabee zianczi. Amén.

<sup>7</sup> ¡Gol gogbee guial gui'taman loj zaj! Gra ree bejn guguaiaa laaman xt ree bën ni guliiz lans cwë'lënman, abi' gra ree bénguidxliuj goon da't chi guguaiaa reeman laaman. Laan naj diidxli. Zian gac.

<sup>8</sup> Dux Dad ree Dios bën rajp gra gualrniabee. Laaman gui't, laaman naj Dios diizd guia'xchej, në yan, laaman rëb por laagajcaman: “Naj naj zi'c lejtr A con Z, lejtr ni rzuloj në ni rlioxnë alfabeto, naj ca' gra gualrniabee.”

### *Baguaiaa San Juan xgualrniabee Cristo*

<sup>9</sup> Naj Waj tijb ree lasa'di bën rliladx Jesucrist. Tijbzi nadxu' ree loj xgualrniabeeman, tijbzi cayzaagdiaj ree abi' caydaan ree por laaman. Naj guyu'n ladxguuib loj yuj riga' loj nijsdoo lod la Patmos guial rtiechan xtiidx Dios në gra ree ni ragbeen xcwent Jesucrist. <sup>10</sup> Chi yu'n ladxguuib loj yuj riga' loj nijsdoo guin, guyu tijb dumingw chi guza'can zi'c bën rnie'xhchaal por xgualrniabee xSprijt Dios, abi' xichan biguiejnan zi'c cha' trompejt abi' biguien rejs da't cha' tijb <sup>11</sup> bën ni rëb:

—Naj naj zi'c lejtr A con Z, lejtr ni rzuloj në ni rlioxnë alfabeto, din tijbzi naj naj bën rniabee. Bacaa loj gui'ch gra

ni cuguaal dxel guixhiaalil gui'ch guin loj guigajdx cwaa ree da bejnan bén zobj ree niz Asia, luguiedx Éfeso, Esmirna, Pérgamo, Tiatira, Sardis, Filadelfia në Laodicea.

<sup>12</sup> Dxel chi badxi' lon par guguian chunin rnieenë naj dxel baguian gajdx ree candeler or. <sup>13</sup> Abi' galay ree candeler guin baguian tijb ni naj zi'c tijb bejn, najcwaman tijb lajd yool xt guia'man, abi' naxii tijb cinch or luxdooman. <sup>14</sup> Naquichbëj guiycaman zi'c naj guidxlad xiil, zi'c naj guida-jnayaag naquich naj guidxguiycaman abi' zi'c bajl re'criani guaalojman. <sup>15</sup> Abi' guia'man rdiinan bacha' zi'c guiib ni la bronze chi yu'n loj guij, abi' cha'man naj rejs zi'c rüjn nijs naquie' chi rguiajtan. <sup>16</sup> Guiáad yaaman ladbee ca'man gajdx bajl xanyabaa. Abi' ro'man ririi tijb Espad ni nadoxh da't grop lad, guiáad lojman rulaa bacha' zi'c chi rusni gubijdx gojl da't.

<sup>17</sup> Dxel chi baguian laaman biajban guia'man zi'c bengüt. Per laaman guxhoob yaa ladbeeman guican, naman:

—Ad rdxebil, naj naj bén rniabee diizd guia'xchej abi' par tiblayaa. <sup>18</sup> Ma güjtan, per yan ma babanan, abi' ma nabanantiblayaa, abi' naj rniabee guialgüjt në gabijl. <sup>19</sup> Yan bacaa ni ma baguaal në ni cuguaal në ni qui gacri. <sup>20</sup> Ni në rën guiëb guigajdx ree bajl xanyabaa ni baguaal yan ladbee, në guigajdx ree candeler or. Guigajdx ree bajl xanyabaa guin rën guiëban gajdx ree bén rniabee guigajdx cwaa ree da bejnan niz Asia, abi' guigajdx candeler or guin rën guiëban guigajdx cwaa ree da bejnan.

## 2

### *Diidx par ree bén Éfeso*

<sup>1</sup> Yan bacaa ni guixhiaalil loj bén rniabee ree da bejnan luguiedx Éfeso. Bacaa: “Bén ni ziza galay ree candeler or, bén ni ca' gajdx ree bajl xanyabaa con yaa ladbeeman, laaman na lojdi: <sup>2</sup> Naj ragbee xhie cayüjndi. Naj ragbee xhie tarbajw cadëdidi, ragbee tëen guial ad ralenya'tidi. Naj ragbee guial ad rdaantidi bén mal ree, abi' ma beendi prueb bén na ree naj xi apóstoles Jesucrist majsi achut naj reeman abi' ma gogbeedi guial ganax diidx rusquiee rniee reeman. <sup>3</sup> Naj ragbee guial rajpidi pacens abi' ma guzagdiajdi guial rëndi naj sin guial yalenya'di. <sup>4</sup> Per yu' ni ad ruladxtan rüjndi: guial ad rëntridi naj zi'c guia'xchej. <sup>5</sup> Gol basaaladx xhienaag guyëndi naj guia'xchej guial zi'c cayüjndi yan. Gol bayüjn xgab, gol been zi'c beendi guia'xchej, bal id züjndi zian, nayob gaxhalan casti par lëjt abi' ad zajctridi biani par los demazri ree bejn, bal id zayüjndi xgab. <sup>6</sup> Per yu' ni cayüjndi zi'c rayal, guial rdxe'chidi ni rüjn ree ben nicolaítas, zi'cgajc rdxe'chan por

ni rüjn reeman. <sup>7</sup> Bén rën ree gucaagdiajg, gol bacaagdiajg ni rníee xSprijt Dios par ree da bejnan: Bén ni güün gan loj dol, naj gudë ni gawaman ni rtia loj yag ni runee guialnaban ni zobj xanyabaa lod zobj Dios.”

### *Diidx par ree bén Esmirna*

<sup>8</sup> Yan bacaa ni guixhiaalil loj bén ni rniabee ree da bejnan luguiedx Esmirna. Bacaa: “Bén rniabee diizd guia'xchej në par tiblyaa, bén ni güt abi' babanman stijb, laaman na lojdi: <sup>9</sup> Naj ragbee xhienaag cadëdidi tarbajw por ni rüjn bejn lëjt, ragbee tëen loj guialprob ni nabandi majsi diidxli najdi benrijcw guial ma zinalidi xtiidx Dios, abi' ragbeen xhienaag rnieeguijdx bejn lëjt, bén ni na ree naj reeman bén Israel xbejn Dios majsi laa reeman naj xbejn xindxab. <sup>10</sup> Ad rdxebtidi guialzi ni tëdidi din xindxab güünx gan din cu' ree bejn tio'p choondi ladxguiib par guiguien guial diidxli zinalidi xnejz Dios. Chii dxej tëdidi guialzi guin ree, per gol guzujdxi'ch xt dxej guiëtidi, abi' naj yazaladx lëjt guialnaban tiblyaa. <sup>11</sup> Bén rën ree gucaagdiajg gol bacaagdiajg ni na xSprijt Dios par ree da bejnan: Bén güün gan loj dol, achetri güün guialgüjt ni rarojp laaman.”

### *Diidx par ree bén Pérgamo*

<sup>12</sup> Yan bacaa ni guixhiaalil loj bén rniabee ree da bejnan luguiedx Pérgamo. Bacaa: “Bén ca' espad ni nadoxh grop lad ro', laaman na lojdi: <sup>13</sup> Naj ragbee guial luguiedx zobjidi xindxab rniabee ni. Per majsi zian lëjt za'dxi'chidi con naj ad rucwëëzt rililadxidi naj ni'qui lën ree dxej ni bagüjt reeman Antipas, tijb ree xcompniaridi bén ad bacwëëzt bililadx naj, bén bagüjt reeman ladxidi lod rniabee xindxab. <sup>14</sup> Per yu' ree ni ad ruladxtan rüjndi. Tijb ni ad ruladxtan rüjndi naj guial lojdi no'ch ree bén ad rusa'nt ni basiid Balaam bejn ree, bén rëb loj Balac xhienaag guzaalguiiwaman bén Israel ree din gaw reeman guialraw ni ma gurej loj ree xdios Balac guin, në par been reeman graløj ree nidxuudx con ree bén ad najt lacheel reeman. <sup>15</sup> Stijb ni ad ruladxtan naj guial lojdi no'ch ree bén ad rucwëëzt rüjn zi'c rüjn ree bén nicolaítas. <sup>16</sup> Zeel gol bayüjn xgab por ni rüjndi, bal id züjndi zian nayob gaxhalan casti din günan guialguxtis con laa reeman con espad ni ririi ro'n. <sup>17</sup> Bén rën ree gucaagdiajg, gol bacaagdiajg ni na xSprijt Dios par ree da bejnan: Bén rüjn gan loj dol, naj gudë mana gawaman, guialraw xanyabaa ni ad nünbeet ree bejn. Gudë tëen tijb guiaj naquichdoo lod ca laj cübaman ni achutczí ragbee, tijbzi bén tia' guiaj guin gagbee.”

### *Diidx par ree bén Tiatira*

18 'Yan bacaa ni guixhiaalil loj bén rniabee ree da bejnan luguiedx Tiatira. Bacaa: "Xi'n Dios, bén re'criani guiaaloz zi'c bajl, bén rdiin bacha' guia' zi'c guiib ni la bronce, laaman na lojdi: 19 Naj ragbee ni cayüjndi, ragbeen xhienaag rëndi naj, xhienaag rliadxidi naj, xhie cayüjndi por naj abi' ad ralenya'tidi. Naj ragbee gual mazri zagdxé cayüjndi yan gual loj guia'xchej, 20 Per yu' ni ad ruladxtan cayüjndi: Rdaandi Jezabel, béngunaa ni na rudëéd xtiidx Dios. Abi' rtiëjbidi rulüüman da bejn reen dxel ruzaalguiiwaman laa reeman rüjn reeman ni dxuudx ree con ree bén ad najt lacheel reeman, abi' raw reeman gualraw ni ma gurej loj ree xdios ree bénguidxliuj. 21 Ma badën tiamp din yayüjnman xgab, din gusa'n xgualdxuudxaman, per ad rëntaman. 22 Zeel yan gaxhalan gualguijdx par laaman, gaaman gagxuuman. Abi' bén rüjn ree zi'c rüjnman, bal id reeman guchaa mod ni naban reeman ziangajc zro' naj gualzi ni téd reeman, 23 gugüjtan gra ree bén ma been xgab guiban zi'c naban béngunaa guin. Zian gagbee ree da bejnan gual naj ragbee xhie yu' guiic bejn xhie tée yu' luxdooman, xhie xgab rüjnman. Naj gune lëjt ni rayalidi bal gonin rüjndi. 24 Par gra ree da bejnan bén zojb ree luguiedx Tiatira, lëjt bén ad zinalt ree zi'c rusiid Jezabel guin bejn ree, lëjt gual na reeman ad ragbeetidi xt ni bigra xcwent xindxab gual ad ridxga'tidi laa reeman, achetri ni ganin lojdi, 25 tijbzi ni rnin lojdi: Gol guzujdxi'ch loj ni ma ragbeedi xt chi gualan stijb. 26 Bén güün gan loj dol, abi' gusnuu güünman zi'c rënan guidib tiamp ni guibanman, naj gudë gualrniabee lojman din nabeeman loj ree nacion. 27 Nabeeman loj ree nacion guin zi'c tijb bén ni ca' tijb var guiib, zi'czi rlia' bejn tijb guiajs zian güünnëman bén ni ad rënt ree guzoob diidx. Gudën gualrniabee guin lojman zi'c banee da Dadanan lon, 28 gudë tëen lojman bajl xanyabaa ni rliejn rsildoo. 29 Bén rën ree gucaagdiajg, gol bacaagdiajg ni rëb xSprijt Dios par ree da bejnan."

### 3

#### *Diidx par ree bén Sardis*

1 'Yan bacaa ni guixhiaalil loj bén rniabee ree da bejnan luguiedx Sardis. Bacaa: "Bén naban con guigajdx ree xSprijt Dios abi' ca'man gajdx bajl xanyabaa, laaman na lojdi: Naj ragbee gra ni cayüjndi ragbee tëen gual ma güjtidi, majsi par ree bejn nabandi. 2 Zeel gol batie'ch xbacaalidi, gol been naguiejn chitëë nit ni sta cayüjndi, din naj ruguian gual ad cayüjntidi xnejz delant loj da Dadan Dios. 3 Gol basaaladx ni ma biguiejndi në ni ma basiididi, abi' gol been zian, gol bayüjn xgab zi'c ni cayüjndi. Din bal id zatie'ch xbacaalidi

zi'c cayüjndi, dxel zi'c ri't tijb bégubaaan ziangajc chi gagbeedi ma bi't casti par lëjt. <sup>4</sup> Per luguiedx Sardis, yu' tio'p choon ree bejn sta naya, laa reeman naj Bén gacw lajd naquich abi' sa reeman con naj, din rayal reeman laan. <sup>5</sup> Bén güün gan loj dol, chi guidxin hor, zian gacwaman lajd naquich abi' ad zuse'n tēetan lajman loj xlibr guialnaban. Abi' delant loj Dios nē loj ree anjl guien guial laaman naj da bejnan. <sup>6</sup> Bén rēn ree gucaagdiajg, gol bacaadiajg ni rēb xSprijt Dios par ree da bejnan.”

### *Diidx par ree Bén Filadelfia*

<sup>7</sup> Yan bacaa ni guixhiaalil loj Bén rniabee ree da bejnan luguiedx Filadelfia. Bacaa: “Bén naya nali, Bén naj diidxli, Bén rajp guialrniabee loj gra zi'c gojp rey Davi guialrniabee, tijbzi laaman rajp guialrniabee par guixhialaman tijb nejz ni achut zajc gusiaaw o gusiaawaman tijb nejz ni achut zajc guixhial, laaman na lojdi: <sup>8</sup> Naj ragbee gra ni cayüjndi. Gol gogbee guial majsi ad rajptidi guialrniabee, per naj ma guxhal tijb nejz din gutie'chidi da diidxan sin guial chu gutēē lojdi, din zinalquidi da diidxan abi' ad goct rēbidi guial ad najtidi da bejnan. <sup>9</sup> Lëjt guguaa ni günan con ree xbejn xindxab Bén rēb ree naj reeman Bén Israel xbejn Dios, abi' rusquieezi reeman. Guguaadi ni günan laa reeman, guidgazuxib reeman lojdi, gagbee tēē reeman xhienaag rēnan lëjt. <sup>10</sup> Abi' zi'c ma bazoobidi diidx gapidi pacens guial chinalidi da diidxan, ziangajc ganan lëjt chi guidxin dxej gui't guialzi loj guidib guidxliuj, zi'c tijb prueb par gra ree bēnguidxliuj. <sup>11</sup> Nayob guialan loj guidxliuj stijb. Gol guzujdx'i'ch loj ni ma ragbeedi chitēē tia' ben ren ni rayalidi. <sup>12</sup> Bén güün gan loj dol, naj gudē lojman tijb luar zojbloj lēn yadoo zojb xanyabaa lod naban da Dadan Dios, ni guibanman tiblayaa. Dxel tiblajtaman guca laj da Dadan Dios con lan nicüb, con laj ladx da Dadan Dios ni la Jerusalén cüb ni naj xanyabaa lod zojbaman. <sup>13</sup> Bén rēn ree gucaagdiajg, gol bacaagdiajg ni rēb xSprijt Dios par ree da bejnan.”

### *Diidx par ree Bén Laodicea*

<sup>14</sup> Yan bacaa ni guixhiaalil loj Bén rniabee ree da bejnan luguiedx Laodicea. Bacaa: “Bén ni rüjn cumplid xtiidx, Bén ni been gra ni rayal güünman, Bén naj diidxli, Bén rniabeenē Dios diizd gocli chi gad guidxliuj gacchaaw, laaman na lojdi: <sup>15</sup> Naj ragbee gra ni cayüjndi. Ad najtidi zi'c nijs nayaag o zi'c nijs laa. ¡Balzianclaa tiblayaa niajquidi zi'c nijs nayaag o zi'c nijs laa! <sup>16</sup> Per lëjt najdi zi'c nijs nayool, ni'qui nadxa' ni'quidza nayaagt, dxel zi'c laa rabēē gajc ro' bejn nijs nayool guin, zian ma rēnan gabēladxan lëjt. <sup>17</sup> Lëjt rēb guial najdi

benrijcw, rajpidi gra abi' achet ryaadxidi. Per ad ragbeetidi guial achet rajpidi, najdi bénprob, bén zibëel, achet sirv lëjt, najdi bénlutia'p niz lon guial ad nabantidi xnejz. <sup>18</sup> Zeel rnin lojdi, zi'c rzii bejn ganax or, zian gol been naguiejn gapidi gra da yudaran, din gaquidi rijcw delant lon. Abi' zi'c chi rzii bejn lajd naquich din guiguienman naya, zian gol bayünj xgab din guiguie'ch xguialxtudi abi' guiguiendi naya delant lon. Nè chi rzii bejn tijb rumed par guiaaløj bejn din guguaaman zagdx, zian gol been naguiejn din gapidi da guial rignia'n din guguaadi zagdx. <sup>19</sup> Rdilnë'n abi' ruzuxnejzan gra ree bén rënan. Zeel gol bagu' luxdoodi gol bayünj tëe xgab xhien-aag nabandi. <sup>20</sup> Gol gogbee guial naj cabedx lëjt, zi'c chi rnìee tijb bejn rulidx stijb bejn. Cabëësan chu guidxga' naj, zi'c chi rgu' bejn stijb bejn din gaw reeman tijbzi. Abi' bén guidxga' naj ma nabannë'n laaman abi' laaman nabannëman naj. <sup>21</sup> Bén güün gan loj dol naj gudë cwë'n cweman lod canabeen, zi'cgajc naj chi gulox benan gan loj dol, gure cwë' da Dadan Dios lod canabeeman. <sup>22</sup> Bén rën ree gucaagdiajg, gol bacaagdiajg ni na xSprijt Dios par ree da bejnan."

## 4

### *Rlies reeman xvalor Dios xanyabaa*

<sup>1</sup> Chi gulox bacan diidx guie ree, baguian niz ladia dxel baguian tijb port naxal xanyabaa. Abi' bén guneenë gajc naj diizd guia'xchej bén naj cha' zi'c trompejt, laaman na lon:

—Wë'p guie din gulün lüj ni gac ree chi ma gojc ree ni rnin lojl.

<sup>2</sup> Loj hor zii gajc por xguialrniabee xSprijt Dios, chi gogbeen ma za'n xanyabaa yagaj baguian tijb yagxhil zagdx zi'c xi yagxhil tijb rey, lojn zojb tijb bejn. <sup>3</sup> Abi' bén zojb loj yagxhil guin rulaaman bacha' zi'c ree guiaj zagdx ni lasajc wayëjx, ni la jasje në cornalina. Abi' guijc yagxhil guin ca tijb guidgij ni rulaa bacha' zi'c guiaj zagdx ni la esmeralda. <sup>4</sup> Abi' gadëd ro' yagxhil guin baguian zagajlbitap ree yagxhil zagdx abi' loj ree yagxhil guin zojb ree gajlbitap ree bengol najcw reeman lajd naquich yu' coron or guijc reeman. <sup>5</sup> Abi' lod za' yagxhil ni za' galay los demasri ree yagxhil guin, yagaj ririi ree bacha' zi'c chi rë'p nijs në ree naquie' zi'c chi rbidxa' guziaaw. Abi' delant loj yagxhil guin re'c gajdx ree guij ni naj ree guigajdx xSprijt Dios. <sup>6</sup> Baguia tëen delant loj yagxhil guin zi'c nijsdoo, per nayadxujn zi'c tijb guiaawajn.

Abi' cwë' yagxhil guin za' tajp ree be, tijb gaj reeb za' tib xquin gaj yagxhil guin abi' guidib niz xijch reeb në niz loj reeb yu' guiaaløj reeb. <sup>7</sup> Tijb reeb naj zi'c beedx, be barojp guin naj zi'c go'n, be bayon guin naj lojb zi'c loj bejn, be badajp

guin naj zi'c bisia ni cazuj. <sup>8</sup> Tijb gaj ree be guin yu' xho'p xhiil reeb, abi' xijch xhiil reeb në lën xhiil reeb yu' zien da't guiaaloj reeb. Abi' dxej guiaal ad rucwëëzt rëb reeb:

Naya nalil, naya nalil naya nalil najl dux Dadan Dios,

lÿj guial ca'l gra guialrniabee,

lÿj guial najl Dios diizd guia'xchej në yan abi' gui'til.

<sup>9</sup> Beegaj chi rlies ree be guin xvalor bën ni zojb loj yagxhil guin, bën naban tiblayaa, beegaj ruza't reeb laaman zagdxe rudëed reeb quixtëe lojman, <sup>10</sup> guigajlbitap ree bengol zojb yagaj, bazuxib reeman lojman, bën ni zojb loj yagxhil abi' nabanman tiblayaa, abi' ruzuxib reeman lojman rudxiib xcoron reeman niz lojman, rëbgaj reeman:

<sup>11</sup> Dux Dad ree Dios, lÿj rayal guiya'p respejt,

diidxza'c në guialrniabee.

Din lÿj beenchaaw gra ni yu'

abi' lÿj rëb guial chu' gra ni yu',

abi' yu' reen.

## 5

### *Tijb gui'ch ni nadüüb con bën naj zi'c xi xiiil Dios*

<sup>1</sup> Dxel baguian guial bën zojb loj yagxhil zagdxe ni naj zi'c xyagxhil tijb rey, ca'man tijb gui'ch yaaman ladbee. Gui'ch guin zi'c lojn zi'c xijchan ca lejtr abi' nadüüban, abi' naguiidan con gajdx se chitëe chu guixhial laan. <sup>2</sup> Loj hor guin baguian tijb anjl bën gojl da't, rbidxa'man rejs rëbaman:

—¿Chu rayal chiquied ree se guie abi' guixhial loj gui'ch guie?

<sup>3</sup> Per ni'qui xanyabaa, ni'qui loj guidxliuj, ni'qui lën liuj ad bidxejlt bën ni rayal guixhial gui'ch guin, ni'qui par guguaaman ni ca loj gui'ch guin. <sup>4</sup> Abi' naj dád binan chi baguian guial achut rdxejl guixhial loj gui'ch guin në par guguaaman ni ca loj gui'ch guin. <sup>5</sup> Dxel na tijb ree bengol guin lon:

—Ad roonl, baguiaa nial ma yu' tijb bën ni rayal guixhial loj gui'ch guin abi' chiquiedaman guigajdx se guin din ma beenman gan loj gra, laaman bën naj zi'c tijb beedx loj xdiaa Judá por guialrniabee ni rajpaman, laaman za loj xdiaa rey Davi.

<sup>6</sup> Abi' chi baguian, dxel baguian guial galay lod za' yagxhil zagdxe ni naj zi'c xyagxhil tijb rey, lod za' guidap ree be guin galay ree bengol ni riga' yagaj, za' tijb bën naj zi'c xi xiiil Dios rguien xsen lod bidxeelguijdxaman chi gütaman. Abi' yu' gajdx xcajchaman con gajdx guiaalojman, guigajdx guiaalojman naj guigajdx xSprijt Dios bën rxhiaalaman guidib guidxliuj. <sup>7</sup> Bibig bën naj zi'c xiiil guin cwa'man gui'ch guin ladxaa bën zojb loj yagxhil guin. <sup>8</sup> Chi cwa'man gui'ch

guin, guidap ree be za' gajxh cwë' yagxhil guin në gra guigajl-bitap ree bengol guin bazuxib reeman lojman. Tijb gaj ree bengol guin ca' reeman tijb gaj arp ca' tēē reeman cojp or ni guidxa goxyaal, go'xh guin naj xtiidx ree xbejn Cristo chi rbejdx rniab reeman Dios. <sup>9</sup> Bengol guin ree rool reeman tijb cant cüb ni rëb:

Lüj rayal tia' gui'ch guin  
abi' guixhialil se ni naguiidnën.

Din lüj güjtil

abi' con xrejnl ni guxie'l gudijxil

por graloj bejn din gac reeman xbejn Dios,

achet güünan xhietëēz diidx rniee reeman,

o xhie loj diaa, o xhie guiedx o xhie nacion zëēd reeman.

<sup>10</sup> Beenl laa reeman rey

been tēēl laa reeman bixhioz par dux Dad ree Dios,

abi' laa reeman nabee loj guidxliuj.

<sup>11</sup> Baguia tēēn biguiejn tēēn cha' zien ree anjl gadëd ro' yagxhil zagdxë guin con guidap ree be guin në ree bengol guin. Abi' bénguixiujczi naj reeman por mil naj reeman. <sup>12</sup> Abi' dád rejs rniee reeman rëb reeman:

Bén naj zi'c xi xiil Dios, bén güt,

laaman rayal tia' gualrniabee,

laaman rayal gap gualnaza'c,

quiarguiejn, në gojl,

respejt, guza't reeman laaman zagdxë,

guilies tēē reeman xvaloraman.

<sup>13</sup> Dxel biguiejnan cha' gra ree ni been Dios, zi'c ni yu' ree xanyabaa, loj guidxliuj në ni yu' ree lën liuj në ree ni yu' loj nijsdoo, rëb reen:

Bén zobj loj xyagxhil gualrniabee në bén naj zi'c xi xiilaman,

par laa reeman naj

respejt, diidxza'c, gualrniabee,

abi' guilies reeman xvalor reeman

zianczi në par tiblyaaa.

<sup>14</sup> Chi gulox rëb reen zian, dxel guidap ree be za' yagaj rëb reeb:

—Amén.

Abi' guigajlbitap ree bengol za' yagaj bazuxib par gap reeman laaman respejt, bén ni naban zianczi në par tiblyaaa.

## 6

### *Guigajdx ree se*

<sup>1</sup> Dxel baguian biquied bén naj zi'c xi xiil Dios se yaloj guin, abi' zi'c chi rbidxa' guziaaw zian biguiejnan gunee tijb ree be guin, rëbib:

—jGuda!



<sup>2</sup> Dxel baguian gulentie tijb way naquich, abi' bén dxiib laab ca'man tijb xi arcw flejch. Abi' cwa'man tijb coron guial ma beenman gan, dxel briiman persi ziguieenman gan mazri.

<sup>3</sup> Chi biquied bén naj zi'c xi xiil Dios se barojp guin biguiejnan rëb be barojp guin:

—jGuda!

<sup>4</sup> Dxel gulentie tijb way xnia, abi' bén dxiib laab ca'man tijb espad narooob në guialrniabee par gustijlaman bejn ree loj guidxliuj din gugÿjt lasa' reeman.

<sup>5</sup> Chi biquied bén naj zi'c xi xiil Dios se bayon, biguiejnan rëb be bayon guin:

—jGuda!

Dxel baguian gulentie tijb way ya's, abi' bén dxiib laab ca'man tijb xijglibr. <sup>6</sup> Abi' galay guidap ree be guin biguiejnan cha' tijb bén rëb:

—Tib quil trigo lasajcan tib dxej dxiin abi' choon quil cebada lasajcan tibdxej dxiin, per ache güünl sejt në vin.

<sup>7</sup> Chi biquied bén naj zi'c xi xiil Dios se badajp guin, biguiejnan rëb be badajp guin:

—jGuda!

<sup>8</sup> Dxel baguian gulentie tijb way naguiëch, abi' bén dxiib laab laman guialgÿjt, abi' zinal gabijl laaman. Cwa' reeman guialrniabee par gugÿjt reeman tib part loj tajp lala' ree bénguidxliuj. Yu' reeman guiët por wadijl, o por guialrliaan, o por guialguijdx, o por ree be doxh yu' loj guidxliuj.

<sup>9</sup> Chi biquied bén naj zi'c xi xiil Dios se bagaay guin, baguian xan altar za' ree xsprijt ree bén bagÿjt reeman guial bililadx reeman guzujdxi'ch tëe reeman loj xtiidx Dios. <sup>10</sup> Abi' rbidxa' reeman rejs rëb reeman:

—Dios, Dad bén rniabee, lÿj naj bén naya nali abi' rÿjnl zi'c rayal, ¿za plact gaglaal par güün xguialguxtisil con ree bén ni bagÿjt dunujn loj guidxliuj din yaguijx reeman ni been reeman?

<sup>11</sup> Dxel tijb gaj reeman cwa' tijb lajd naquich, abi' bagojn reeman laa reeman din cwëz reeman stibda'n yaza' lasa' reeman, din ryaadxri guiët ree xcompniar reeman zi'c güt reeman, bén ni cayÿjn gajc ree sirv Dios.

<sup>12</sup> Chi baguian biquied bén naj zi'c xi xiil Dios se baxo'p guin, dxel guxu rejs da't abi' gubijdx gojcan nagas zi'c tijb lajd ya's. Guiáad bëew gojcan naxnia zi'c rejn, <sup>13</sup> abi' ree bajl xanyabaa biajb reen loj guidxliuj zi'c ryajb ree higo ni ya' loj yag higo chi rbi' bidoxh. <sup>14</sup> Dxel gunidloj xanyabaa zi'c tijb gui'ch ni rdüüb, abi' gra ree guia' në ree yuj riga' ree loj nijs bachaa xliajt reen. <sup>15</sup> Abi' ree rey në gra ree bén rniabee loj guidxliuj, në ree bén rniabee ree suldad në ree bén rijcw, në ree bén yu' gojl par gra, në ree bén naj zi'c bén nado', në

ree bén ad najt zi'c bén nado', gra reeman baquie'chloj lën guiajbiliaa në lën ree yalaj. <sup>16</sup> Abi' rëb reeman loj ree guia' në loj ree yalaj:

—Gol biajb du guijcan, gol baquie'ch tëë dunujn loj bén zojb loj xyagxhil guialrniabee në loj xcasti bén naj zi'c xi xiil Dios, <sup>17</sup> din ma bidxin dxej doxh ni gudëed reeman casti, abi', ¿chu zajc taan casti guin?

## 7

### *Tibgayuu tiuubitap mil ree bén Israel*

<sup>1</sup> Chi gulox baguian ni guin ree, baguian tajp ree anjl za' reeman guidap xquin guidxliuj par gucwëez reeman bi ni zëed guidap xquin, chitëë guibi' bi loj guidxliuj, ni'qui loj nijsdoo, ni'qui ree loj yag. <sup>2</sup> Dxel baguian stijb anjl zëedaman niz lod rliejn gubijdx, ca'man xse Dios naban. Abi' dád rejs guneenëman guidap ree anjl guin, bén ni ca' ree guialrniabee par güün reeman ni güün reeman con guidxliuj në con nijsdoo, <sup>3</sup> rëbaman loj reeman:

—Ad xhie güündi guidxliuj, ni'qui nijsdoo, ni'qui ree yag, xt chi ma gulox bacaa ree xse dux Dios ree lucwaj ree xbejnman.

<sup>4</sup> Dxel biguiejnan bël reeman cwa se guin lucwaj. Por gra ree bén Israel, tibgayuutiubita mil reeman cwa se guin lucwaj. <sup>5</sup> Din chiptio'p mil ree bén zëed loj xdiaa Judá cwa se guin, në chiptio'p mil ree bén zëed loj xdiaa Rubén në chiptio'p mil ree bén zëed loj xdiaa Gad. <sup>6</sup> Në chiptio'p mil ree bén zëed loj xdiaa Aser, në chiptio'p mil ree bén zëed loj xdiaa Neftalí, në chiptio'p mil ree bén zëed loj xdiaa Manasés, <sup>7</sup> con chiptio'p mil ree bén zëed loj xdiaa Simeón, chiptio'p mil ree bén zëed loj xdiaa Leví, në chiptio'p mil ree bén zëed loj xdiaa Isacar, <sup>8</sup> chiptio'p mil ree bén zëed loj xdiaa Zabulón, chiptio'p mil ree bén zëed loj xdiaa José, chiptio'p mil ree bén zëed loj xdiaa Benjamín cwa se guin lucwaj reeman.

### *bénguixiuj najcw lajd naquich*

<sup>9</sup> Dxel baguian bénguixiuj ree, per bénguixiuj ree ni'qui chut zajc gulab laa reeman, bén ni za ree gadxagayaa guiedx, gadxagayaa diaa, bén rníee ree gadxagayaa diidx bén za ree gra lad në gadxagayaa nacion. Za' reeman delant loj xyagxhil bënriabee në delant loj bén naj zi'c xi xiilaman. Najcw reeman lajd naquich ca' tëë reeman zijn. <sup>10</sup> Abi' rëb reeman rejs da't:

Dunujn raya'pan perdon por dux Dadan Dios bén zojb loj xyagxhil guialrniabee në por bén naj zi'c xi xiilaman.

<sup>11</sup> Abi' gadëd ro' yagxhil guin con guidap ree be ni za' yagaj con guigajlbitap ree bengol, gadëd yagaj za' gra ree anjl

abi' bazuxib reeman delant loj xyagxhil Dios xt basajb guijs reeman liuj par gap reeman laaman respejt, <sup>12</sup> rëb reeman:

¡Amén! guialrniabee, gojl,  
guialrajc, respejt, diidxza'c,  
guialrlies xvaloraman në quixtëë,

naj reen par dux Dad ree Dios zianczi në par tiblayaa. Amén.

<sup>13</sup> Loj hor zii tijb ree bengol guin gunabdiidx lon:

—¿Chu ree bén ni najcw lajd naquich guin, ban tëë ree bénan?

<sup>14</sup> Badxi'nän rën:

—Ad ragbeetan Dad, lüj ragbee.

Dxel naman lon:

—Laa reeman naj bén guzagdiaj da't abi' naquich xab reeman guial ma naya reeman ma biquied xtol reeman con xrejn bén naj zi'c xi xiil Dios. <sup>15</sup> Zeel za' reeman delant xi yagxhil Dios, abi' dxej guiaal cayüjn reeman sirv lod zojbaman. Abi' bén zojb loj yagxhil guin ma za'man con laa reeman, abi' laaman gap laa reeman. <sup>16</sup> Ad yu'tri dxej guiliaan reeman, ad ze'c tëët reeman nijs, ad zudxüü tëët gubijdx laa reeman, ad zagnalaa tëët reeman. <sup>17</sup> Din bén naj zi'c xi xiil Dios bén za' galay lod za' xi yagxhil Dios, laaman gap laa reeman zi'c tijb bén rajp ree xiil abi' chinëman laa reeman lod rajch nijs ni runee guialnaban. Dxel Dios laaman gutiaa loj reeman gra ree nijs brii loj reeman chi biin reeman.

## 8

### *Guigajdx se*

<sup>1</sup> Chi biquied bén naj zi'c xi xiil Dios se ni goc gajdx guin, bayajcdxe xanyabaa cost garol hor. <sup>2</sup> Dxel baguian gajdx ree anjl za' reeman delant loj Dios, cwa' reeman gajdx trompejt.

<sup>3</sup> Dxel bi't stijb anjl con tijb chaabacwi ni or, guzuliman delant lo altar guin abi' yu' bén badëëd zien yaal din cu'man goxyaal guin loj altar or ni za' delant loj yagxhil zagdx ni naj zi'c xyagxhil tijb rey, din tijbzi chë'pnë goxyaal guin xtiidx gra ree xbejn Dios, diidx ni rniee reeman chi rbejdx rniab reeman laaman. <sup>4</sup> Dxel diidx ladxaa anjl guin brii goxyaal guin con ree xtiidx ree xbejn Dios, diidx ni rniee reeman chi cabejdx canab reeman laaman, abi' wë'p reen niz loj Dios. <sup>5</sup> Dxel bacha anjl guin chaabacwi guin guijs ni yu' loj altar guin abi' bazurlojman laan loj guidxliuj. Abi' dád rejs guridxa' guziaaw, gojc naquie', wë'p nijs, abi' bi't xudoxh.

### *Trompejt ree*

<sup>6</sup> Dxel guigajdx ree anjl ni ca' ree trompejt guin, guzujchaaw reeman par gucwejdx reeman laan.

<sup>7</sup> Chi bacwejdx anjl yaløj guin trompejt ni ca'man, biajb guiajyabaa loj guidxliuj no'chan bajl nē rejn. Dxel cost garol guidxliuj we'c con ree yag nē ree gui'xh naga' yu' lojn.

<sup>8</sup> Chi bacwejdx anjl barojp guin trompejt ni ca'man, dxel zi'c naj guia'ro' ni cacaguij naj ni biajb loj nijsdoo, abi' cost garol nijsdoo bayajcan rejn loj hor guin. <sup>9</sup> Abi' cost garol ree be ni naban loj nijsdoo güjt reeb abi' cost garol ree barcw ni yu' loj nijsdoo guidloj.

<sup>10</sup> Chi bacwejdx anjl bayon guin trompejt ni ca'man, dxel biajb bajl xanyabaa ni narooB ni cacaguij zi'c chi rtiaguij guied, loj cost garol guiiw ni yu' nē cost garol ree lod rajch nijs biajban. <sup>11</sup> Bajl xanyabaa ni biajb lan Ajenjo, abi' cost garol nijs guin ree gojc nala abi' dād zien ree bejn güjt guial bayajc ree nijs guin nala.

<sup>12</sup> Chi bacwejdx anjl badajp guin trompejt ni ca'man, abi' cost garol gubijdx bicajy, cost garol bëew nē cost garol ree bajl xanyabaa bicajy. Abi' guial bicajy reen, dxel cost garol dxej nē guiaal ad basnit.

<sup>13</sup> La'tgaj cuguian ni guin ree, biguiejnan zi'c chi rzuj tijb bisia xanyabaa. Dxel biguiejnan cha' tijb anjl rbixdiajman rëbaman:

—iProb, per prob, per probza ree bén ni yu' loj guidxliuj por zachoon trompejt ni ryaadx gucwejdx za choon ree anjl!

## 9

<sup>1</sup> Chi bacwejdx anjl bagaay guin trompejt ni ca'man, dxel baguian zi'c tijb bajl xanyabaa ni biajb loj guidxliuj, abi' bajl xanyabaa guin cwa'n guibliaw par guixhialan ro' bizë ni ad yu't lod rliox. <sup>2</sup> Chi guxhalan ro' bizë guin tijb go'xh yo'xhchab brii lën bizëe guin zi'c chi ririi go'xh lën tijb horn narooB, xt bascajy go'xh guin gubijdx nē bi. <sup>3</sup> Abi' lën go'xh guin brii ree bi'tsu abi' bire'ch reeb loj guidxliuj, abi' cwa' reeb guialrniabee par gac reeb bedoxh zi'cgajc nixüb. <sup>4</sup> Per gunabee reeman laa reeb chitëe xhie güün reeb guixya' ree, ni'qui ree yag, ni'qui ree gui'xh naga'. Naabzi ree bén ni ad yu't ree xse Dios lucwaj. <sup>5</sup> Per ad par gugüjtt reeb bejn, naabzi par sagdiaj reeman gaay bëew. Abi' lod rudidxa' reeb riyajnan zi'c ryajn lod rudidxa' nixüb. <sup>6</sup> Lën ree dxejzii quuil ree bejn guialgüjt, per ad zadxejlt reeman laan. Guiën reeman guiët reeman per ad zëjtt reeman.

<sup>7</sup> Bi'tsu guin ree naj reeb zi'c naj ree way ni ma za' par che reeb loj wadijl, guijc reeb yu' zi'c coron or, abi' loj reeb naj zi'c loj bejn. <sup>8</sup> Abi' guidxguijc reeb naj zi'c guidxguijc béngunaa, guiáad dxidlay reeb naj zi'c dxidlay beedx. <sup>9</sup> Guidib luxdoo reeb nada'cwan zi'c guiib, abi' xhiil reeb rüjnan naquie' zi'c rajc naquie' chi ruxüünnë ree way carrejt loj wadijl. <sup>10</sup> Abi'

xbaan reeb naj zi'c xbaan ree nixüb, abi' con lupuntan rudidxa' reeb. Con xbaan reeb yu' reeb gojl par gusagdiaj reeb bejn ree loj gaay bëëw. <sup>11</sup> Anjl ni rniabee bizë ni ad yu't lod rliox laaman rniabee ree bi'tsu guin. Anjl guin con diidx Hebreo laaman Abadón, abi' con diidx grieg laaman Apolión, diidx guin ree rën guiëb reen bën ruloox.

<sup>12</sup> Zian rliox gualzi yaløj, dxel gui't zatio'p gualzi.

<sup>13</sup> Chi bacwejdx anjl baxo'p trompejt ni ca'man, dxel biguejnan tijb cha' bejn briin galay ree cajch ni za' guidap xquin altar or ni za' delant loj Dios. <sup>14</sup> Cha' bën biguejnan rëbaman loj anjl baxo'p bën ca' trompejt guin:

—Baslaa guidap ree anjl ni naxii ro' guiw ro' ni la Eufrates.

<sup>15</sup> Zian bidxin or, bidxin dxej, bidxin bëëw në ijz ni naj par laa guidap ree anjl guin din gugüjt reeman garol ree bénguidxliuj. <sup>16</sup> Abi' biguejnan bël naj xsuldad reeman bën dxiib ree way. Naj reeman tio'pgayuu millon. <sup>17</sup> Ze baguian way guin ree con ree bën dxiib laa reeb: Bën dxiib ree way guin, guidib luxdoo reeman nada'cw guiib culor xnia, ni sul në ni naguiëch. Abi' guijc ree way guin naj reen zi'c guijc ree beedx, abi' ro' reeb ririi bajl, go'xh në azufre. <sup>18</sup> Abi' garol ree bénguidxliuj güjt por bajl guin, go'xh guin në azufre guin ni ririi ro' reeb. <sup>19</sup> Con ro' ree way guin rugüjt reeb bejn ree, abi' con xbaan reeb rucheelguijdx reeb din lupunt xbaan reeb najn zi'c guijc bëël.

<sup>20</sup> Per los demasri ree bën ni ad güjtt por ree gualzi guin, ad basa'nt reeman ni mal rüjn reeman. Ad bacwëëzt rën reeman xindxab ree con ree Dios ni naj or, plajt, bronce në ree dios guiaj con ree dios yag, dios ni ad rajct ruguiaa, ad rajct riguejcn ad rajc tëët rza reeman. <sup>21</sup> Ad bacwëëz tëët rugüjt reeman bejn ree, ad basa'n tëët reeman gualbidxaa, ad basa'n tëët reeman ni dxuudx ni rüjn reeman con bën ad najt lacheel reeman, ad basa'n tëët reeman gualgubaan.

## 10

### *Tijb anjl ca' gui'ch*

<sup>1</sup> Dxel baguian stijb anjl bën gojl da't, zidguiajtaman xanyabaa lën tijb zaj abi' guijcaman dxiib tijb guidgij. Lojman naj zi'c gubijdx, abi' guia'man naj zi'c tio'p bajl ziool.

<sup>2</sup> Dxel ca'man tijb librdoo naxal lojn. Abi' bazuj guia' ladbeeman loj nijsdoo, abi' guia'man lad ruvejs bazujman laan loj guidxliuj. <sup>3</sup> Dxel guridxa'man rejs da't zi'c rbidxa' beedx, chi guridxa'man guridxa' gajdx ree guziaaw. <sup>4</sup> Chi gulox guridxa' gajdx ree guziaaw guin, ma nucan ni rëb guigajdx ree guziaaw guin chi biguejnan cha' tijb bën na lon diizd xanyabaa:

—Ad gucaal ni gunee guigajdx ree guziaaw guin, din ad rayalt gagbee ree bejn laan.

<sup>5</sup> Abi' anjl ni baguian za'li loj nijsdoo në loj guidxliuj gules yaa ladbeeman xanyabaa, <sup>6</sup> abi' badëë xtiidxaman por bën naban tiblyaa, bën been xanyabaa, guidxliuj në nijsdoo, në gra ni yu' xanyabaa, loj guidxliuj në loj nijsdoo guial ad zaglaatri gac ni rayal gac. <sup>7</sup> Din chi gucwejdx anjl ni goc gajdx trompejt ni ca'man dxel ma bidxin dxej gac zi'c naj xixgab Dios, zi'c bagojnman loj ree bën badëë xtiidx Dios loj ree bejn bën ni rüjn ree sirv lojman.

<sup>8</sup> Dxel zatijb gaj gunee bën ni guneenë naj diizd xanyabaa, naman:

—Wej bica' librdo ni zojbyal loj ladxaa anjl ni za' loj nijsdoo në loj guidxliuj.

<sup>9</sup> Dxel wan lod za' anjl guin, rën lojman din gunee man librdo guin lon, dxel naman lon:

—Cwa'n gudawan. Ro'l guiatan nejxh zi'c dxijn, per lën nala yaban.

<sup>10</sup> Dxel cwa'n librdo guin ladxaa anjl guin, abi' gudawanan. Ro'n biguijtan nejxh zi'c dxijn, per chi gulox gudawanan nala biguijtan lënan. <sup>11</sup> Dxel bagojn reeman naj guial gusnuu gugojnan bejn ree ni na Dios gac con zien ree nacion, rey ree në ree guiedx, xhietëëz diidx rniee reeman.

## 11

### *Tio'p ree testiw*

<sup>1</sup> Abi' baneeman tijb var ni rtia'beenë bejn, naman lon:

—Bisu bica'bee xyadoo Dios në altar, dxel gulabil bën cayajp ree Dios respejt lën yadoo guin. <sup>2</sup> Per ad tia'beel lule' yadoo guin din lule' guin ma badëë Diosan loj ree bën ad najt ree bën Israel, laa reeman naj bën gusagdiaj ree bën Jerusalén loj choon ijz garol. <sup>3</sup> Abi' naj gaxhalan tio'p ree da bejnan din guza't reeman naj. Grop reeman gacw lajd ya's, abi' laa reeman guiniee da diidxan choon ijz garol.

<sup>4</sup> Grop ree bën guin naj grop ree yag olivo në grop ree candeler ni za' loj dux Dad ree Dios bën rniabee loj guidxliuj.

<sup>5</sup> Bal chu bën rën güünnë laa reeman xhienin, ro' reeman grii bajl din gugüjt reeman bën rdxe'ch ree laa reeman. Zian guiët ree bën rën güün laa reeman xhienin. <sup>6</sup> Grop ree bën guin rajp reeman guialrniabee par gusiaaw reeman xanyabaa chitëë gal guia loj choon ijz garol guin chi guiniee reeman da diidxan. Rajp tëë reeman guialrniabee par guchaa reeman nijs gacan rejn, abi' zajc guiniab reeman din gui't graloj guialzi loj guidxliuj bëltëëz volt rën reeman. <sup>7</sup> Per chi ma bayaaloj tiamp ni guiniee reeman da diidxan, dxel tijb monstroo, tijb

be doxh grii lën bizë ni ad rliox, be guin ca'pnë laa reeman abi' güünb laa reeman gan abi' gugüjtib laa reeman. <sup>8</sup> Dxel gaa xcuerp reeman lunejz luguiedx Jerusalén lod güt xdad reeman Jesucrist loj crüzj, luguiedx ni naj yan zi'cgajc Sodoma në Egipto. <sup>9</sup> Dxel graløj ree bejn bën rniee ree gadxagayaa diidx, bën gralad ree, bën za graløj ree nacion zuguaa reeman gaa xcuerp ree bën guin lunejz choon dxej garol, per ad zatiëjbt reeman guiguie'ch ree bën guin. <sup>10</sup> Abi' ree bën naban loj guidxliuj dád yabaa reeman guial ma güjt ree bën guin, abi' guial tant yabaa reeman xt yazaladx reeman xhie renin loj lasa' reeman, din par laa reeman dád basagdiaj ree bën guin laa reeman. <sup>11</sup> Per chi ma bayaaløj choon dxej garol guin, yasban Dios bën guin ree dxel chixche reeman abi' gra ree bën guguaa dád guidxeb reeman. <sup>12</sup> Dxel dád rejs biguien cha' tijb bën ni gunee xanyabaa, rëbaman loj grop ree bën guin:

—Gol wë'p guie.

Abi' wë'p reeman xanyabaa lën tijb zaj delant loj gra ree bën rdxe'ch laa reeman. <sup>13</sup> Hor ni bayë'p reeman xanyabaa bi't tijb xudoxh abi' zien ree ni bize'n luguiedx guin abi' gajdx mil bejn güjt. Guiaad gra ree bën ad güjtt dád bidxeb reeman abi' gules reeman xvalor Dios bën yu' xanyabaa. <sup>14</sup> Zian rliox guialzi rarojp, dxel laa zëed gajc guialzi ni rayon.

### *Trompejt ni goc gajdx*

<sup>15</sup> Chi bacwejdx anjl ni goc gajdx guin trompejt ni ca'man, dxel rejs da't biguien cha' ree bejn xanyabaa rëb reeman:

Ma bidxin dxej yaya'n gra xguialrniabee  
guidxliuj loj dux Dad ree Dios

në loj Jesucrist abi' nabee reeman zianczi në tiblayaa.

<sup>16</sup> Guigajlbitap ree bengol zojb loj xyagxhil reeman delant loj Dios, bazuxib reeman xt basajb loj reeman liuj gojp reeman laaman respejt, <sup>17</sup> rëb reeman:

Dux Dadan Dios, lüj rajp gra guialrniabee

abi' najl Dios yan në diizd gocli abi' gui'til.

Quixtëe lüj guial ma culüü xguialrniabee naroo bil ni rajpil  
abi' ma guzuløj canabeel.

<sup>18</sup> Bénguidxliuj ree bidxe'ch reeman,

per ma bidxin dxej gulüü xguialrdxe'chil.

Ma bidxin dxej güün xguialguxtisil con ree bengüt

par gudëel ni rayal tia' ree xbejnl

bën badëed ree xtiidxil, në ree bën bililadx lüj.

Në ree bën rajp lüj respejt.

Ma bidxin dxej zi'c ree benzojbloj në ree bën ad zojblojt tia'  
reeman ni rayal reeman,

dxel gunidlojl bën ruxhiin ree loj guidxliuj.

<sup>19</sup> Chi gulox rëb reeman zian, bixal xyadoo Dios xanyabaa dxel biguien xcaj promejs ni been Dios diizd gocli. Dxel guzuloj rë'p nijs, rajc naquie', rëez guziaaw, bi't xudo'xh abi' dád zro' biajb guiajyabaa.

## 12

### *Tijb béngunaa në tijb dragon*

<sup>1</sup> Dxel gojc tijb sen ro' xanyabaa. Balüüloj tijb béngunaa nadüübaman gubijdx, abi' nuzuj guia'man loj bëw abi' guijcaman yu' coron ni gocchaaw con chiptio'p bajl xanyabaa.

<sup>2</sup> Yu' xi'n béngunaa guin abi' rbixdiajman ragnaa lënman guial ma gal xi'nman. <sup>3</sup> Per gojc stijb sen xanyabaa. Balüüloj tijb dragon ro', tijb bedoxh najb culor xnia. Yu' gajdx guijquib, chii xcajchib yu' tää tijb coron tijb gaj guijquib. <sup>4</sup> Abi' con xbaanb bazaalib cost garol bajl xanyabaa loj guidxliuj. Dxel guzujb loj béngunaa guin din gawib xi'nman naabzi galix.

<sup>5</sup> Gojl xi'n béngunaa guin tijb xindo niguiaaw, abi' laax nabee loj guidxliuj con tijb var guib. Dxel biquied reeman laax loj xniaax, bidxinx lod zojb Dios lod canabeeman. <sup>6</sup> Abi' béngunaa guin baxüünman par niz lod naj ganax yujbidx, lod ma beenchaaw Dios par laaman, lod gudëed reeman ni gawaman choon ijz garol.

<sup>7</sup> Dxel guyu wadijl xanyabaa, anjl ni la Miguel con ree xi anjlaman gudijlnë reeman dragon guin con ree xi anjlib. <sup>8</sup> Per ad beent be guin gan con ree xi anjlib loj anjl Miguel con ree xi anjlaman, dxel ad gojctri nibajn be guin xanyabaa con ree xi anjlib. <sup>9</sup> Zianan zeel bazaal reeman dragon guin loj guidxliuj con ree xi anjlib. Dragon guin naj bëel gulal ni la xindxab në satanás xin rusquiee gra ree bénguidxliuj.

<sup>10</sup> Dxel biguien cha' tijb bejn rejs da't diizd xanyabaa rëbaman:

—Ma bidxin dxej baslaa Dios dunuj ree, ma bidxin xguial-rniabeeman chi nabeenëman Jesucrist, din ma biquied bén rbe'c xguialquia ree dux compniar ree, bén rdxinnë ree guialquia guin loj dux Dad ree Dios dxej guiaal. <sup>11</sup> Abi' dux compniar ree been reeman gan por rejn ni guxhie' bén naj zi'c xi xiil Dios në por ni rëb reeman xhienaag rliladx reeman xtiidx Dios, ad bidxebt reeman majsi niëjt reeman. <sup>12</sup> Zeel gol badxe' luxdoodi nix gra ree bén zojb xanyabaa per, i'probza lëjt bén zojb ree loj guidxliuj në ree be yu' loj nijsdoo! Din ma biguiajt xindxab lod zojbidi, dád rdxe'chix guial ragbeex sta'nz dxej raya'n par laax.

<sup>13</sup> Chi baguiaa dragon guin guial ma biajbib guidxliuj, dxel briinalib béngunaa naj xniaa xindo guin. <sup>14</sup> Dxel badëe reeman tio'p xiil béngunaa guin zi'c xiil bisiaro' din gac suman



loj bëel guin xt lod naj ganax yujbidx, lod gudëed reeman ni gawaman choon ijz garol. <sup>15</sup> Abi' gulëe ro' dragon guin tijb guiw nijs din chinën béngunaa guin. <sup>16</sup> Per bixal loj guidxliuj persi gu'n guibidx nijs gulëe ro' dragon guin. Zian been guidxliuj béngunaa guin yudar. <sup>17</sup> Dxel dád bidxe'ch dragon guin béngunaa guin, abi' zitilnëb sta'n ree bën ni za loj xdiaaman, bën ruzoob ree xtiidx Dios zinal tëe reeman xtiidx Jesucrist.

## 13

### *Tio'p ree bedoxh*

<sup>1</sup> Wej dragon guin bisub ro' nijsdoo. Abi' naj baguia guial brii tijb monstroo loj nijsdoo, tijb bedoxh be yu' gajdx guiyc, chii xcajchib abi' loj tijb gaj cajch guin yu' tijb gaj coron, abi' loj guigajdx guiiquib ca tijb diidx ni rnieeguijdx Dios. <sup>2</sup> Bedoxh ni baguian naj zi'c tijb tigr, per guia'b najn zi'c naj guia' ojs, abi' ro'b najn zi'c ro' beedx. Dxel dragon ni guzu ro' nijsdoo badëedib loj monstroo guin xluarib lod rniabeeb abi' guialrniabee ro' ca'b par nabeeb. <sup>3</sup> Tijb guiyc monstroo guin baguian tijb lod nadxeelguijdx ni rulüü ad zusbajnt laab, per bayajc lod nadxeelguijdx guin abi' gra ree bénguidxliuj badxaløj abi' binal reeman monstroo guin. <sup>4</sup> Dxel gojp da't reeman respejt dragon guin guial badëedib guialrniabee loj monstroo guin gojp da't tëe reeman respejt monstroo guin, rëb reeman:

—¿Chu naj zi'c monstroo guin abi' chu zajc til con laab?

<sup>5</sup> Monstroo guin gojccaaw ro'b par guilies xvalor gajquib, abi' guinieeguijdxib Dios, gojpib guialrniabee par güünb zian loj choon ijz garol. <sup>6</sup> Abi' guneeguijdxib Dios, guneeb diidx-mal ree por laaman, por xyadooman në por gra ree bën zojb xanyabaa. <sup>7</sup> Gojp monstroo guin permis par sub contr ree xbejn Dios abi' güünb laa reeman gan. Abi' gojpib guialrniabee par nabeeb graløj ree bejn, bën ni rniee ree gadxagayaa diidx, bën gra lad ree, gra ree nacion. <sup>8</sup> Gra ree bën ad cat laj loj xlibr guialnaban diizd chi gad guidxliuj gacchaaw, loj xlibr bën naj zi'c xi xiil Dios bën güüt por ree bejn, gra reeman gap da't respejt monstroo guin. <sup>9</sup> Bén rën ree gucaagdiajg, gol bacaagdiajg. <sup>10</sup> Bén naj che ladxguuib, cheman ladxguuib. Bén naj guiët con espad, con espad guiëtaman. Zeel bën naj ree xbejn Dios ad yadxaguidi ad gucwëez tëe chililadxidi Dios.

<sup>11</sup> Dxel baguian stijb monstroo ren briib loj guidxliuj, yu' tio'p xcajchib zi'c xcajch xiil, per cha'b naj zi'c cha' dragon. <sup>12</sup> Abi' lasa'gajc guialrniabee ca' monstroo ni brii loj nijsdoo lasa'gajcan ca'b abi' por laab gojp da't ree bejn respejt monstroo ni brii loj nijsdoo, monstroo ni bayajc lod nadxeelguijdx

ni rulüücüzi gugüjt laab. <sup>13</sup> Abi' monstroo ni brieri loj guidxliuj në gajquib rüjn milagr narooob ree, xt rajc rniabeeb rguiajt bajl diizd xanyabaa xt loj guidxliuj delant loj ree bejn. <sup>14</sup> Zian rusquieeb bénguidxliuj ree por ree milagr ni rüjnb delant loj monstroo ni brieri loj nijsdoo, abi' rniabeeb rüjn ree bénguidxliuj tijb xfigur monstroo ni brieri loj nijsdoo, monstroo ni bidxeel-guijdx con espad abi' gubajnb. <sup>15</sup> Abi' monstroo ni brieri loj guidxliuj xt gojpib guialrniabee par gudëedib guialnaban loj xfigur monstroo ni brieri loj nijsdoo, par guiniee figur guin në par gugüjtib gra ree bén ni ad rajpt respejt figur guin. <sup>16</sup> Gunabee tée monstroo ni brieri loj guidxliuj gra ree bejn, zi'c ree bengol zi'c ree xindoo, benrijcw ree në ree bénprob, bén naj ree zi'c bén nado' në ree bén ad najt zi'c bén nado', din chu' sen yaa reeman ladbee o lucwaj reeman. <sup>17</sup> Abi' achut zajc sii o guto' ya bal id ca reeman sen guin, abi' sen guin naj laj monstroo guin o xinumbrib.

<sup>18</sup> Guie ryaadx guialrignia'. Bén rajp guialrignia' cwëë xcwentaman con xnumbr monstroo guin, abi' numbr guin naj xho'pgayuu gayojnbixho'p. Con numbr guin ririi laj tijb bénguidxliuj.

## 14

### *Cant ni biil tibgayuu tiuubitap mil ree bejn*

<sup>1</sup> Baguia téen guial za' bén naj zi'c xi xiil Dios guijc dajn ni la Sión. Bén naj zi'c xi xiil Dios za'man con tibgayuu tiuubitap mil ree bejn, graczi reeman ca lucwaj reeman laj bén naj zi'c xi xiil Dios në laj xDadaman. <sup>2</sup> Abi' biguiejnan tijb naquie' xanyabaa zi'c naquie' rüjn zil da't nijs, o zi'c rguien rbidxa' guziaaw rejs da't, o zi'c chi rusijdx zien ree bejn arp. <sup>3</sup> Dxel rool reeman tijb cant cüb delant loj yagxhil lod zobj bén rniabee në loj guidap ree be za' yagaj në loj ree bengol guin. Ad zile't chu gusiid cant guin, naabzi ree bén tibgayuu tiuubitap mil guin, laa reeman naj bén gulaa loj ree bénguidxliuj. <sup>4</sup> Abi' laa reeman naj ree xinguaaw ni ad bagaalt béngunaa, gojc reeman naya abi' zinal reeman bén naj zi'c xi xiil Dios bantëez guin rejman. Laa reeman naj ree bén gulaa loj ree bénguidxliuj abi' zi'c guialnaza'c yaloy ni rinë bejn loj Dios zian naj reeman delant loj Dios në delant loj bén naj zi'c xi xiil Dios. <sup>5</sup> Ad goct basquiee reeman, nayadxuj reeman delant loj Dios.

### *Ruson ni badëë guiyon ree anjl*

<sup>6</sup> Dxel baguian tijb anjl rzujman xanyabaa con tijb ruson ni naj par tiblayaa par gugoynman gra ree bén naban loj guidxliuj, xhietëez diidx rniee reeman, o xhietëez loj diaa

zëed reeman, o xhietëez ciuda o nacion zëed reeman. <sup>7</sup> Dxel dád rejs gunee anjl guin rëbaman:

—Gol bidxeb Dios, gol gules xvaloraman, din ma bidxin hor yadëed ree bejn cwent lojman. Gol gojp da't respejt bën been xanyabaa, guidxliuj në nijsdoo në lod rajch nijs.

<sup>8</sup> Dxel rëb stijb anjl:

—Ma biajb, ma biajb Babilonia din zi'c chi rusüdx tijb bejn stijb bejn, zian ma basquiee ciuda narooB guin gra ree bénguidxliuj guial güün reeman graloj ree nidxuudx, graloj ree dol ro'.

<sup>9</sup> Dxel rejs da't gunee anjl bayon guin rëbaman:

—Bal chu gap da't monstuo guin respejt con xfigurib abi' tiëbaman tia xsenb lucwajman o yaaman, <sup>10</sup> bën zii yayal xcasti narooB Dios, zro' da't gudëëdaman laaman casti. Abi' sagdiajman loj bajl ni caye'c azufre delant loj ree xianjl Dios në delant loj bën naj zi'c xi xiil Dios. <sup>11</sup> Ad yu' tëet dxej yayü' bajl guin. Ni'qui radxe ni'qui guiaal achet guialraziiladx par ree bën rajp da't respejt monstuo guin con xfigurib, o bën ca ree xsenb. <sup>12</sup> Zeel bën naj ree xbejn Dios bën ruzoob ree xtiidxaman abi' rililadx reeman Jesucrist, ad rayalt yalenya' reeman.

<sup>13</sup> Biguiejn tëen cha' bën ni na lon diizd xanyabaa:

—Bacaa ni ganin lojl: “Diizd yan xiquilbaa ree bën rëjt con guialrliladx Jesucrist.”

Dxel rëb xSprijt Dios: “Walican din ma yaziiladx reeman xcwent ree guialzi ni gudëd reeman abi' chinë reeman guial-benza'c reeman.”

### *Guialnaza'c ni runee guidxliuj*

<sup>14</sup> Dxel baguian tijb zaj naquich abi' loj zaj guin zojb zi'c tijb bejn. Yu' tijb coron or guijcaman abi' yaaman ca'man tijb hoz ni nadoxh ro'. <sup>15</sup> Dxel brii stijb anjl lën yadoo abi' rejs da't guneeman bën ni zojb loj zaj guin rëbaman:

—Badxe' xi hosil, batüüg ree guialnaza'c loj guidxliuj din ma gojl reen ma bidxin tiamp ni yado'p reen.

<sup>16</sup> Abi' bën zojb loj zaj guin badëed xi hosaman loj guidxliuj abi' bato'paman guialnaza'c loj guidxliuj.

<sup>17</sup> Dxel brii stijb anjl lën yadoo ni naj xanyabaa, ca' gajcaman tijb hoz ni nadoxh ro'. <sup>18</sup> Dxel niz loj altar brii stijb anjl bën rajp guialrniabee par bajl, abi' dád rejs guneenëman bën ca' hoz ni nadoxh ro' guin, rëbaman lojman:

—Badxe' xi hosil ni nadoxh ro', batü' ree uv ni yu' loj guidxliuj din ma gojl reen ma gojl tiamp ni yado'p reen.

<sup>19</sup> Dxel badëed anjl guin xi hosaman loj guidxliuj guin, abi' bato'paman uv guin ree loj guidxliuj. Abi' badxe'man uv guin ree lod guixii reen, laan rën guiëb lod yu' xcasti Dios. <sup>20</sup> Dxel xijch ciuda guin bixii ree uv guin abi' lën lod bixii ree uv guin

birii rejn. Rejn guin bixie'n loj guidxliuj zi'ct choon gayuu kilometro abi' wë'pan zi'ct xt niz ro' ree way.

## 15

*Bén naj ree xi anjl Dios con guigajdx ree gualzi*

<sup>1</sup> Dxel baguian stijb senro' xanyabaa, tijb sen ni diidxli badxaløj bejn: Baguian gajdx ree anjl con gajdx gualzi. Gualzi guin ree naj gajdx ni chigra gac din con gualzi guin ree gusiaaløj Dios xcastiman.

<sup>2</sup> Baguia tēen zi'c nijsdoo, per najn zi'c tijb vidr xculor bajl. Dxel lojn za' ree bén been ree gan loj monsturo, loj figur con loj xnumbrib, ca' reeman arp ni badēēd Dios loj reeman.

<sup>3</sup> Abi' cayool reeman xcant Moisejs xbejn Dios nē xcant bén ni naj zi'c xi xiil Dios, rēb cant guin:

Naroob nē ni diidxli radxaløj bejn

naj ree ni rüjnl, dux Dadan Dios Bén rajp gra gualrniabee.

Xnejz da't nē zi'c rayal rüjnl,

lūj gual rniabeel gra ree bénguidxliuj.

<sup>4</sup> ¿Chu ad zadxebt lūj?

¿Chu ad zuza'tt lūj zagdxē, dux Dadan Dios?

Tijbzi lūj naj bén naya nali

abi' bénguidxliuj gui't gap da't reeman lūj respejt

gual ma balüül bejn ree gual xnejz rüjnl.

<sup>5</sup> Chi gulox baguian ni guin ree, dxel baguian bixal luar lod mazri nagle' lēn xyadoo Dios xanyabaa. <sup>6</sup> Abi' lēn yadoo guin brii gajdx ree anjl bén ca' ree gajdx ree gualzi, najcw reeman lajd naquich ni rdiin bacha', abi' naxii tijb cinch or luxdoo reeman. <sup>7</sup> Abi' tijb guidap ree be ni za' lod za' Dios, badēēb loj tijbgaj ree anjl guin tijb cojp or ni guidxa xcasti Dios bén naban guidib tiamp nē par tiblyaaa. <sup>8</sup> Abi' lēn yadoo guin gudxan xgo'xh xbacha' Dios nē xgualrniabeeman. Achut gojc niu lēn yadoo guin xt chi ma gulox guigajdx ree gualzi ni zidnē ree anjl guin.

## 16

*Cojp ni guidxa ree xcasti Dios*

<sup>1</sup> Dxel biguiejnan cha' bejn rejs da't guneeman diidz lēn yadoo guin, rēbaman loj guigajdx ree anjl guin:

—Gol chej, gol bigla't xcasti Dios ni yu' loj guigajdx ree cojp guin loj guidxliuj.

<sup>2</sup> Dxel wej anjl yaløj guin, bala'taman ni yu' loj xcojppaman loj guidxliuj. Abi' gra ree bén ni yu' xsen monsturo guin bén gop da't ree respejt xfigurib, brii guiadxyoodx lad reeman, ni rdoob da't.

<sup>3</sup> Abi' anjl barojp guin bala'taman ni yu' loj xcojppaman loj nijsdoo. Abi' nijs guin bayajcan rejn zi'c xrejñ tijb bengüt abi' gra ree be naban loj nijs guin güjt.

<sup>4</sup> Anjl bayon guin bala'taman ni yu' loj xcojppaman loj ree guiw në lod rajch ree nijs abi' nijs guin ree bayajc reen rejn.

<sup>5</sup> Abi' biguiejnan rëb anjl ni rniabee ree nijs guin:

—Xnejz naj ni cayüjñl në zi'c cayüjñ xguialguxtisil, Dad Dios, lüj naj bën naya nali, najl Dios yan në diizd gocli. <sup>6</sup> Din bënguidxliuj ree guxhie' reeman rejn bagüjt reeman xbejn reel në ree bën badëed ree xtiidxil. Zeel ma badëedil rejn guië' reeman, abi' zian rayal reeman.

<sup>7</sup> Abi' niz loj altar biguiejnan cha' stijb bën rëb:

—Walican, Dad Dios bën rajp gra guialrniabee. Xnejz në zi'c rayal cayüjñ xguialguxtisil.

<sup>8</sup> Abi' anjl badajp guin bala't ni yu' loj xcojppaman loj gubijdx din guze'can bejn ree zi'c bajl. <sup>9</sup> Gra reeman we'c por xguialnalaa da't gubijdx guin. Per ni'qui zian ad bayüjñt reeman xgab por xtol reeman, ad baza'tt reeman Dios zagdx guneeguijdxli reeman laaman, laaman guial najman bën rniabee ree guialzi guin.

<sup>10</sup> Anjl bagaay guin bala'taman ni yu' loj xcojppaman lod rbej monstroo ni rniabee guin, abi' bicajy loj guidxliuj, abi' xt rawya' lüdx ree bejn por guialzi ni cadëd reeman. <sup>11</sup> Per ni'czi zian ad basa'nt reeman ni mal ni rüjñ reeman, al mazri been reeman por guialzi ni gudëd reeman në por guiadx ni gudxib lad reeman, guneeguijdx reeman Dios bën zobj xanyabaa.

<sup>12</sup> Anjl baxo'p guin bala't ni yu' loj xcojppaman loj guiwro' la Eufrates abi' gubidx nijs loj guiw guin. Zian bixal nejz din täd ree rey bën zëed ree lad lod rliejñ gubijdx. <sup>13</sup> Dxel baguian ro' dragon guin, con ro' monstroo guin në ro' bën rusquiee rëb rudëe xtiidx Dios loj ree bejn brii choon ree sprijt mal ni naj zi'c bidx. <sup>14</sup> Guiyon ree sprijt guin naj xsprijt xindxab, abi' rüjñ reen milagr abi' rej reen lod za' gra ree rey loj guidxliuj persi rado'p reeman din til reeman con Dios bën rajp gra guialrniabee, dxej ni gui'taman guidguieenman gan loj gra reeman.

<sup>15</sup> Rëb Jesucrist:

—Gol badxe'guijc guial dxejczy guialan zi'c chi ri't tijb xingubaan tijbzi golp. Xiquilbaa ree bën rbëz naj, bën za'sin ree chi guialan din chitëe yaya'nxtu reeman zi'c chi rniaaz bën za' zibëel.

<sup>16</sup> Sprijt mal guin ree bato'p gra ree rey ni yu' loj guidxliuj tijb luar lod la Armagedón con diidx hebreo.

<sup>17</sup> Abi' anjl bagajdx guin bala't ni yu' loj xcojppaman loj bi, abi' diizd lën yadoo ni yu' xanyabaa niz lod za' xyagxhil bën rniabee, biguien rejs da't cha' bën rëb:

—Ma bayaaloj gojc ni rayal gac.

<sup>18</sup> Abi' guzuloj rë'p nijs, rajc naquie', rbidxa' guziaaw dxel bi't xudoxh, tijb xudoxh ni ad goct wayi't diizd guzuloj yu' bejn loj guidxliuj, din xu guin naj ni mazczi ni doxh. <sup>19</sup> Abi' gula' ciuda narooob guin gojcan choon lala', dxel guidib guidxliuj bize'n ree ciuda në ree guiedx. Abi' Dios ad bayanladxtaman Babilonia par gudëë xcasti ro'man loj ciuda narooob guin. <sup>20</sup> Abi' gunijt ree gra yuj riga' loj nijsdoo në ree guia'. <sup>21</sup> Biajb tēë guiajyabaa guijc ree gra ree bénguidxliuj, dxel tijbgaj ree guiaj yabaa guin na' reen cost tiuu quil. Abi' ree bejn guneeguijdx reeman Dios, por ree gualzi guin, gual dád ni doxh gojc chi biajb ree guiajyabaa guin.

## 17

### *Gualguxtis ni güün Dios con béngunaa dxuudx*

<sup>1</sup> Abi' tijb guigajdx ree anjl guin bi'taman naman lon:

—Guda din gulün lüj casti ni rayal béngunaa dxuudx ni zojb loj nijsro', <sup>2</sup> laaman goc xtuu ree rey ni yu' loj guidxliuj, abi' zi'c rusüdx tijb bejn stijb bejn, zian bazaalguiiwaman bejn ree loj guidxliuj con ree ni ad rüjnt sirv ni rüjnman.

<sup>3</sup> Abi' por xSprijt Dios binë anjl guin naj lod naj ganax yujbidx. Ni baguian tijb béngunaa dxiibaman tijb monsturo xnia, abi' guidib ladib ca diidxguijdx par Dios, yu' gajdx guijquib con chii xcajchib. <sup>4</sup> Abi' béngunaa guin najcwaman lajd murad në ni xnia, najcchaawnën ganax or në ree guiaj zagdxë në ree perl. Abi' ca'man tijb cojp or guidxa ree ni nabixhladx lojn në ree ni dxuudx ni rüjnman. <sup>5</sup> Abi' lucwajman ca tijb letrer ni achutczri rignia' ni rën guiëban, rëb loj letrer guin: “Babilonia, ciuda narooob ni naj xniaa ree béngunaa dxuudx në xniaa ree ni dxuudx ni rajc loj guidxliuj,” <sup>6</sup> Dxel gogbeen gual rzüdx béngunaa guin con xrejn ree xbejn Dios, con xrejn ree bën ni güt gual gunee reeman xtiidx Jesús. Abi' dád badxalon chi baguian zian. <sup>7</sup> Dxel na anjl guin lon:

—¿Chexc zeel dád radxalojl? Naj gusignia' lüj ni rën guiëb béngunaa ni baguiaal në monsturo ni dxiibaman, be ni yu' gajdx guijc con chii xcajch. <sup>8</sup> Monsturo ni baguiaal, laab naj be guban gocli, per yan ad nabantrib. Per gulüülojb lën bizë ni ad yu't lod rliox dxelri nidlojb tiblayaa. Abi' ree bën naban loj guidxliuj, bën ni ad cat ree laj loj xlibr gualnaban diizd gocli chi gad guidxliuj gacchaaw, laa reeman yadxaloj chi guguaa reeman monsturo ni guban gocli, be ad nabant yan per gui'tib.

<sup>9</sup> Guie ryaadx quiarguejn. Guigajdx guijc monsturo guin rën guiëban gajdx guia' lod zojb béngunaa guin <sup>10</sup> rën tēë

guiëban gajdx ree rey. Gaay ree rey guin ma gudëed xguialrniabee, abi' bén baxo'p guin naj bén canabee yan. Dxelri nabee bén bagajdx guin, per ad xchejt nabeeman. <sup>11</sup> Abi' monstroo ni guban gocli, abi' yan ad nabantrib, laab gac rey baxujn, per loj gajc gajdx ree rey guin grii rey gac xhujn dxel yayalib lod rayalib casti par tiblyaaa.

<sup>12</sup> 'Guidxii cajch ni baguiaal rën guiëb chii ree rey ni ad wazulojt nabee. Per chi tia' reeman guialrniabee, ad xchejt nabee reeman con monstroo guin. <sup>13</sup> Abi' guidxii ree rey guin yaya'n reeman diidx abi' yayü xguialguxtis reeman con xguialrniabee reeman loj monstroo guin, <sup>14</sup> abi' til reeman con bén naj zi'c xi xiil Dios. Per güün bén naj zi'c xiil guin laa reeman gan din laaman naj Dad loj gra ree dad, naj tëëman rey loj gra ree rey. Abi' bén za' ree con bén naj zi'c xi xiil Dios, laa reeman naj bén bazoob xtiidx Dios, bén ma naj ree par laaman abi' diidxli zinal reeman xnejz Dios.

<sup>15</sup> Na tëë anjl guin lon:

—Nijs ni baguiaal lod zojb béngunaa dxuudx guin laan rën guiëb graloj ree bén rniee graloj ree diidx, bén gra lad ree, bén zëed ree gra loj ree nacion. <sup>16</sup> Abi' monstroo guin con guidxii xcajchib ni baguiaal, guidxe'ch reeman béngunaa dxuudx guin, tio'nldx reeman laaman, gusa'n reeman zibëëlamán, gaw reeman xbëëlamán abi' guze'c reeman laaman. <sup>17</sup> Dios yazaladx loj guidxii ree rey guin quiarguiejn din güün reeman zi'c rënman. Yaya'n reeman diidx din yayü xguialrniabee reeman loj monstroo guin, xt gac cumplid ni rëb Dios gac. <sup>18</sup> Abi' béngunaa ni baguiaal, laaman naj ciuda narooob ni rniabee ree rey yu' loj guidxliuj.

## 18

### *Biajb guiedx Babilonia*

<sup>1</sup> Chi gulox baguian ni guin ree, dxel baguian stijb anjl zidguiajtaman xanyabaa. Rajpaman zro' guialrniabee, abi' xbacha'man basni guidib guidxliuj, <sup>2</sup> abi' rnieeman rejs da't rëbaman:

—Ma biajb, ma biajb Babilonia ma naj ciuda narooob guin zi'c lidx ree xindxab, zi'c lidx ree graloj ree sprijt mal, zi'c lidx ree graloj ree be ni rzuj, bedxuudx ree be rbijxhladx ree bejn. <sup>3</sup> Din zi'c chi rusüdx bejn stijb bejn, zian ma batiaalguiiw ciudaro' guin gra ree bénguidxliuj par güün reeman graloj ree ni dxuudx. Abi' ree rey yu' ree loj guidxliuj ma been reeman ni dxuudx guin ree con ciuda guin, abi' ree bén rüjn negojs loj guidxliuj ma naj reeman rijcw por graczi ree ni dxuudx rajc ni.

<sup>4</sup> Dxel biguejnan cha' stijb bén gunee diizd xanyabaa rëbaman:

—Gol brii loj ciuda guin, da bejn reen, chitëë go'chidi loj ree dol ni rajc ni chitëë tëdidi guialzi ni gac ree loj ciuda guin.

<sup>5</sup> Din dád zien xtol reeman zeel ma bidxinan xt xanyabaa, abi' Dios ad zayanladxtaman ni mal guin ree. <sup>6</sup> Gol beennë ciuda

guin zi'cgajc beennën ben ren ree, gol been din yaguijxan xcastin tio'p volt mazri guial loj ni beennën bejn ree abi' gol basagdiajn tio'p volt mazri guial loj ni basagdiajn ben ren ree. <sup>7</sup> Gol basagdiaj ciuda guin naya zi'c babaan chi beenan ni

dxuudx ree, abi' zi'c beenan xgab rëban: “Zooban guie zi'c tijb bén rniabee, ad najtan bén bizëjb ad yu' tëët dxej chu'nayan.”

<sup>8</sup> Zeel tijbzi dxej guidxajg lasa' ree guialzi par ciuda guin, zi'c guialgüjt, guialrunaya, guialrliaan, dxel che'can con bajl. Din narooob xguialrniabee dux Dad ree Dios bén gudëed casti ciuda guin.

<sup>9</sup> Abi' ree rey ni yu' loj guidxliuj, bén babaa ree guial been reeman ni dxuudx con ciuda guin, zoon reeman, naya sagdiaj reeman chi guguaiaa reeman go'xh ni caye'can. <sup>10</sup> Abi' zijt su reeman chi guguaiaa reeman casti ni cadëdan, dxel guiëb reeman:

—iProbza lüj, probza lüj Babilonia, ciuda narooob ni guyu gojl par gra! Din tibrajtzi bi't casti par lüj.

<sup>11</sup> Abi' ree bén rüjn negojs loj guidxliuj zoon reeman zu tëë luxdoo reeman naya por ciuda guin, din achutri sii ni ruto' reeman, <sup>12</sup> zi'c or, plajt, guiaj zagdxe ree, perl, lajd zagdxe ree, lajd sed ree culor murad con ni xnia, në graloj ree tabl ruree nejxh në graloj ree ni been reeman con ree tabl zagdxe, bronce, guiib con marmol në marfil. <sup>13</sup> Ad zajc tëëtri guto' reeman canel në graloj ree ni ruree nejxh, ad zajctri guto' reeman goxyaal, mirra, perfum, vin, sejt oliv, harin zagdxe, trigo, go'n, xiil, way, carrej, ad zajc tëëtri ree guto' reeman bejn ree. <sup>14</sup> Abi' guiëb reeman loj ciuda guin:

—iAd rajptril guialnaza'c ni bayuladx da'til, tiblayaa ma banijtil zi'c gubanl con gra ree ni za'c ni gopil!

<sup>15</sup> Gra ree bén been negojs, bén gojc ree rijcw por ciuda guin, zijt su reeman guialrdxeb reeman casti ni cadëd ciuda guin. Zoon reeman, zazagdiaj reeman, zunaya reeman. <sup>16</sup> Abi' guiëb reeman:

—iProbza, probza ciuda narooob guin! Laan guial guzu-jchaawan con ree lajd zagdxe, lajd culor murad con ni xnia, laan guial guzujchaawan con or, con perl në con guiaj zagdxe <sup>17</sup> din, i tibrajtzi gunidloj gra ree guialnaza'c guin!

Gra ree bén zë lën barcw, zi'cgajc xcapitan ree barcw, gra ree mariner në los demazri ree bén rüjn dxiin lën barcw,



guzudxe reeman zijt <sup>18</sup> chi baguiaa reeman go'xh ni cayëc ciuda guin, abi' gurixdiaj reeman rëb reeman:

—¿Goc guyu tijb ciuda lasa' ciuda ro' guie?

<sup>19</sup> Abi' baroob yuj guiyc reeman, roon reeman abi' guyu-naya luxdoo reeman rëb reeman:

—¡Probza!, probza ciuda narooob guin por xguialnaza'can gra ree bën been negojs bën rajp ree barcw gojc reeman rijcw, din tibrajtzi gunidlojn.

<sup>20</sup> Dxel biguien cha' bën na:

—Per lëjt bën zobj ree xanyabaa, lëjt najdi xi apóstoles Jesucrist, lëjt bën rudëed ree xtiidx Dios në los demazri ree bën naj xbejn Dios, gol babaa por ni cazajc ciuda guin din zian cayün Dios xguialguxtisaman por ni beennë ciuda guin lëjt.

<sup>21</sup> Abi' tijb anjl gojl da't, gulesaman tijb guiaj narooob, zi'c tijb guiaj mulin abi' bazaalaman laan loj nijsdoo rëbaman:

—Zi'c bazalbin guiaj guie con guidib da gojlan zian nidoxh sac ciuda narooob Babilonia, abi' achutri guguaa Babilonia guin stijb. <sup>22</sup> Ad zagüentri ree cha' arp, ni'qui ree xinrucwejdx, ni'qui ree bidxa, ni'qui ree cha' trompejt ad zagüentri loj ciuda guin. Achutri bejn güün dxiin ni, ni'qui xnaquie' mulin ad zagüentri ni. <sup>23</sup> Achetri guij che'c loj ciuda guin, achutri guxhliaa. Gra ree bën been negojs loj ciuda guin ganax bën zobjloj gojc reeman loj guidxliuj, abi' ciuda guin basquieen gra ree nacion con ree ni dxuudx ni beenan.

<sup>24</sup> Abi' loj ciuda guin bagüjt reeman bën badëed ree xtiidx Dios, në ree bën rliladx Dios, abi' por ciuda guin bagüjt reeman los demasri ree bën ma güjt loj guidxliuj.

## 19

<sup>1</sup> Chi gulox baguian biguiejn tëen zian, dxel dád rejs biguiejnan cha' zien da't ree bën canee xanyabaa rëb reeman:

¡Quixtëë Dios! Por dux Dad ree Dios zëed perdon, respejt në guialrniabee,

<sup>2</sup> din laaman waliman abi' xnejz rüjn xguialguxtisaman, ma badëedaman casti béngunaa dxuudx ni bazaalgüiiv bénguidxliuj ree con ree xni malaman,

ma been Dios guialguxtis con laaman persi baguixxaman ni bagüjtaman xbejnman.

<sup>3</sup> Abi' biguiejnan rëb reeman stijb:

—¡Quixtëë Dios! Ad yu't dxej yayü' go'xh ni caye'c ciuda guin.

<sup>4</sup> Abi' guigajlbitap ree bengol con guidap ree be naban guin bazuxib reeman delant loj xyagxhil Dios par gap da't reeman laaman respejt, rëb reeman:

—¡Quixtëë Dios! ¡Diidxza'c guin ree naj par laaman!

<sup>5</sup> Abi' niz lod za' yagxhil guin biguiejnan cha' bén rëb:  
 Gradi zi'c bengol zi'c xindoo  
 gol gules xvalor dux Dad ree Dios,  
 lêjt rüjndi laaman sirv abi' rajpidi laaman respejt.

*Xguialruxhliaa bén naj zi'c xi xiil Dios*

<sup>6</sup> Biguiejn tëën zi'c chi rguien cha' zien da't bejn, o zi'c xnaquie' nijsro', o zi'c chi rbidxa' da't guziaaw, rebaman:  
 ¡Quixtëë Dios! Din ma canabee dux Dad ree Dios,  
 bén ca' gra guialrniabee.

<sup>7</sup> Yan yadxë' du luxdoo ree zagdxë, yabaa ree yales tëë ree xvaloraman.

Din ma bidxin dxej guxhliaa bén naj zi'c xi xiilaman  
 abi' bén gac lacheelaman ma za'chaawaman.

<sup>8</sup> Najcwaman lajd zagdxë, ni naquich, naya rulaa tëën bacha'.  
 Din lajd naquich guin rën guiëban ni zagdxë ni been ree xbejn  
 Dios.

<sup>9</sup> Abi' na anjl guin lon:

—Bacaa: “Xiquilbaa ree bén naj gui't loj xguialruxhliaa bén naj zi'c xi xiil Dios.”

Na tëë anjl guin:

—Ni guie ree naj xtiidxli Dios.

<sup>10</sup> Dxel bazuxiban loj anjl guin par ga'p da'tan laaman respejt, per naman lon:

—Ad güünl zian. Din zi'cgajc lüj xmandadzi Dios cayguieen,  
 zi'cgajc gra ree lasa'l bén wali ree rüjncwent xtiidx Jesucrist.  
 Gojp da't respejt Dios.

Din por Jesús zëed ni rniece ree bén rudëed xtiidx Dios.

*Bén dxiib tijb way naquich*

<sup>11</sup> Dxel baguian zojbyal xanyabaa baguia tëën tijb way naquich. Bén dxiib laab laman: Bén ruzoob xtiidxaman në bén wali, din xnejz rüjn xguialguxtisaman në xwadijlaman,  
<sup>12</sup> guiaalojman rulaan bacha' zi'c bajl abi' zien ree coron yu' guijcaman, tib lajtaman ca laj tijb bejn ni achut rignia', tijbzi laaman ragbee xhie rën guiëban, <sup>13</sup> guidib rejnzi xabaman, abi' laman Xtiidx Dios.

<sup>14</sup> Abi' ree xsuldadaman bén yu' xanyabaa zinal reeman laaman dxiib reeman way naquich, najcw reeman lajd zagdxë ni naquich ni naya tëë. <sup>15</sup> Ro'man ririi tijb espad ni nadoxh ro', con espad guin gudëedaman casti bénguidxliuj, në con var guiib nabeeman laa reeman. Zi'c rë'p bejn guijc uv par guixiin, zian gudëedaman loj reeman casti narooob ni zëed por Dios bén rajp gra guialrniabee. <sup>16</sup> Loj xcajpaman con cüdaman ca ree diidx ni rëb: “Rey bén rniabee loj ree rey në Dad bén rniabee loj ree dad.”

<sup>17</sup> Dxel baguian tijb anjl za'liman loj gubijdx, dád rejs rbidxa'man, rbejdxaman gra ree be ni rzuj xanyabaa, rëbaman:

—Gol guda, gol bachajg lasa'di lod gunee Dios ni gawidi zro' da't, <sup>18</sup>zi'c xbëël ree rey, xbëël ree capitán, xbëël ree bën achut rüjn gan, zi'c xbëël ree way, xbëël ree bën rbib laa reeb, xbëël gra ree bejn, zi'c xbëël ree bën naj zi'c bën nado' nē xbëël ree bën ad najt zi'c bën nado', zi'c xi bëël ree bengol nē ree xindoo.

<sup>19</sup> Dxel baguian monstruo con ree rey yu' loj guidxliuj nē ree xsuldad reeman, nadxag lasa' reeman par til reeman con bën dxiib way naquich guin con ree xsuldadaman. <sup>20</sup> Per laa reeman gunaaz reeman monstruo guin con bën rusquiee rëb rudëe xtiidx Dios loj ree bejn, bën rüjn milagr niz loj monstruo guin. Abi' por ree milagr guin basquieeman bën guyu ree xsen monstruo guin goj p tē reeman respejt xfigurib. Abi' monstruo guin con bën rusquiee ni rëb rudëe xtiidx Dios loj ree bejn, grop reeman guidib naban reeman bazaal reeman laa reeman loj bajl lod caye'c azufre. <sup>21</sup> Abi' los demazri ree xbejn monstruo guin güjt reeman con espad ni ririi ro' bën dxiib way naquich guin, abi' gudaw ree be ni rzuj xanyabaa laa reeman, xt gudxa lën reeb gudaw ree xbëël reeman.

## 20

### *Ti mil ijz*

<sup>1</sup> Dxel baguian zidguiajt tijb anjl xanyabaa, ca'man xguiibliaw bizë ni ad yu't lod rliox, ca' tēeman tijb caden na-roob. <sup>2</sup> Abi' gunaazaman dragon, bëël gulal ni la xindxab nē satanás, guxhiiman laab con caden guin por timil ijz. <sup>3</sup> Dxel bazaalaman laab lën bizë ni ad yu't lod rliox abi' basiaawdx'i'chaman bizë guin chitëe gusquieeri reeb bejn ree loj guidxliuj xt chi ma bayaaloj timil ijz dxel yariib lën bizë guin tiblädëd.

<sup>4</sup> Dxel baguian yagxhil zagdx ree lasa' xyagxhil ree rey, lojn zojb ree bën ni ma cwa' guialrniabee par güün reeman guialguxtis. Baguia tēen xsprijt ree bën ni biru' yējn guialgutie'ch reeman xtiidx Dios nē gra ni ragbee reeman por Jesús. Laa reeman ad gojpt respejt monstruo guin ni'qui xfigurib abi' ad cwëjbt reeman niu xsenb lucwaj reeman o yaa reeman. Abi' baguian baban reeman stijb, dxel gunabee reeman con Cristo timil ijz. <sup>5</sup> Laan naj ni yaloj ni yaban ree bengüt, per stijb ree bengüt ad zabant reeman xt yaza' timil ijz. <sup>6</sup> ¡Xiquilbaa ree bën yaban yaloj! Laa reeman ma naya niz loj Dios abi' ad zayaltri reeman guialgüjt rarojp, laa reeman gac xbixhioz Dios con xbixhioz Cristo abi' nabeenë reeman laaman timil ijz guin.

<sup>7</sup> Chi ma bayaaloy timil ijz guin, dxel yarii xindxab guin lod nayaawix <sup>8</sup> Par gusquieex bejn ree guidib guidxliuj. Gusquieex Gog në Magog din guchajg lasa' ree xbejn reeman din güün reeman wadijl. Abi' guidop zien da't reeman zi'c üx ni riga' ro' nijsdoo. <sup>9</sup> Gra lad gui't reeman, guidop reeman gadëd lod za' ree xbejn Dios në gadëd ro' guiedx lod rënman. Per laaman diizd xanyabaa guixhiaalaman bajl ni guze'c bën guin ree xt yadëj reeman. <sup>10</sup> Abi' xindxab ni basquiee laa reeman laax chu' loj bajl lod caye'c azufre, lod ma za' monsturo con bën rusquiee rëb rudëë xtiidx Dios loj ree bejn, lod ad yu't dxej yarii reeman lod sagdiaj tëë reeman dxej guiaal.

### *Yadëed ree bejn cwent loj Dios*

<sup>11</sup> Dxel baguian tijb yagxhil zi'c xi yagxhil rey, tijb yagxhil narooob ni naquich. Lojn zojb tijb bejn abi' delant lojman biquied guidxliuj në xanyabaa, gunidloj reen tiblayaa. <sup>12</sup> Dxel baguian guial delant loj yagxhil guin lod zojb Dios, ni za' ree bengüt, zi'c ree bengol zi'c ree xindobëz. Abi' bixal loj ree libr, dxel bixal loj stijb libr ni la xlibr guialnaban. Dxel been Dios xguialguxtisaman con ree bengüt guin zi'c ca loj ree libr guin xcwent ree ni been reeman. <sup>13</sup> Nijsdoo bayü xbengütan, abi' guialgüjt bayü xbengütan, abi' ree bengüt ni za' lod cabëz reeman guidxin dxej ni yadëed reeman cwent loj Dios, bibig reeman yagaj din güün xguialguxtis Dios con laa reeman bal conin been reeman. <sup>14</sup> Dxel guialgüjt con lod guzu ree bengüt gulëjz reeman guidxin dxej yadëed reeman cwent loj Dios, grop reen bazaal reeman loj bajl, bajl guin naj guialgüjt barojp. <sup>15</sup> Abi' loj gajc bajl guin bayal ree bën ad cat laj loj xlibr guialnaban.

## 21

### *Xanyabaa cüb con guidxliuj cüb*

<sup>1</sup> Chi gulox baguian ni guin ree, dxel baguian tijb xanyabaa cüb con tijb guidxliuj cüb, din xanyabaa con guidxliuj ni guyu diizd yaloy ma gunijt reen, ziangajc nijsdoo. <sup>2</sup> Dxel baguian Jerusalén cüb, xguiedx narooob Dios zidguiajtan xi xanyabaa Dios. Dád za'chaawan zi'c rzujchaaw tijb biingunaa chi ma guxhlaam con xin gac lacheelim. <sup>3</sup> Abi' dád rejs biguiejnan cha' bën gunee lod za' xyagxhil Dios, rëbaman:

—Ma za' Dios con ree bejn, guibannëman laa reeman abi' laa reeman gac xbejnman, guiáad laaman suman con laa reeman abi' gacaman xDios reeman. <sup>4</sup> Laaman gutiaa loj reeman nijs biin reeman, dxel achetri guialgüjt chu', guialroon, guialrunaya në guialzi, din gra ree ni guyu gocli ma gudëd reen.

<sup>5</sup> Abi' bén zojb loj yagxhil guin, naman:

—Gra cayünan nicüb.

Na tääman:

—Bacaa ree diidx guie, din laa reen naj diidxli ni rayal chililadx bejn.

<sup>6</sup> Dxel naman:

—Ma gojc ni rayal gac. Naj naj zi'c A con Z, din tijbzi naj rniabee diidz guia'xchej në par tiblyaa. Bén re'c nijs, naj yazaladx nijs lojman nijs ni ririi lod rajch nijs ni runee guialnaban.

<sup>7</sup> Bén ni güün gan loj dol, laaman yayal gra ree ni guin. Abi' naj gac xDiosaman guiáad laaman gac da xi'nán. <sup>8</sup> Per ree bén rdxeb sudxi'ch loj ni rliladx reeman naj, bén ad rliladxt ree naj, bén ruladx ree güün ganax ni mal, bén rugüjt ree bejn, bén rüjn ree nidxuudx con ree bén ad najt lacheel reeman, bén rüjn ree guialbidxaa, bén rën ree ni naladx reeman naj ree Dios, në gra ree bén rusquiee, laa reeman rayal loj bajl lod caye'c azufre, bajl guin naj guialgüjt rarojp.

### *Jerusalén cüb*

<sup>9</sup> Dxel tijb guigajdx ree anjl bén ca' ree guigajdx ree cojp ni guidxa guigajdx ree guialzi bigra guin, bi'taman lod za'n, naman lon:

—Guda, din gulün lüj biinxdüb ni gac lacheel bén naj zi'c xi xiil Dios.

<sup>10</sup> Abi' por Sprijt binë anjl guin naj guijc tijb guia' narooob, guijc tijb guia' ya. Ni balüüman naj Jerusalén, xciuda narooob Dios zidguiajtan xi xanyabaa Dios. <sup>11</sup> Rulaan bacha' por xbacha' Dios. Abi' bacha' guin naj zi'c xbacha' tijb guiaj lasajc, guiaj zagdxe ni la Jaspe, nayni zi'c tijb vidr. <sup>12</sup> Gadëd ro' ciuda guin naj tijb ze' narooob, tijb ze' ya con chiptio'p ree port, abi' tijb gaj ro' ree port guin za' tijb gaj ree anjl. Lad ree port guin ca zi'c la guidxiptio'p cwaa ree bén Israel, tijb gaj lad port guin ca zi'c la tibcwaa gaj reeman. <sup>13</sup> Choon ree port guin naj niz lod rliejn gubijdx, abi' choon reen naj niz lod rëéz gubijdx, za choon ree port guin naj niz lad norte, za choonan naj niz lad sur. <sup>14</sup> Abi' con chiptio'p guiaj naj xcimiant ze' guin, dxel loj ree guiaj guin ca laj ree guidxiptio'p ree xi apóstoles bén naj zi'c xi xiil Dios.

<sup>15</sup> Anjl ni guneenë naj ca'man tijb var or din tia'beenëman ciuda guin con ree port guin con ze' guin.

<sup>16</sup> Ciuda guin najn ni cuadrad, zi'cgajc zioolan ziangajc gulajgan. Cwa'bee anjl guin laan con var or ni ca'man, xi mididan naj tio'p mil tio'p gayuu kilometro, zi'c guyoolan ziangajc yan, ziangajc gulajgan. <sup>17</sup> Dxel cwa'man midid ze' guin, abi' ze' guin najn gayojnbitap mejtr zi'c naj xmidid bénguidxliuj zi'c bare'xh anjl guinan.

<sup>18</sup> Ze' guin gojcnën guiaj ni la Jaspe, abi' ciuda guin najnën ganax or, zi'cgajczi naj vidr nayni. <sup>19</sup> Xguiaj cimiant ze' guin najcchaawnën gadzagayaa ree guiaj zagdxe. Guiaj yaloj guin najcchaawnën con guiaj ni la Jaspe, guiaj barojp guin najcchaawnën guiaj ni la zafiro, guiaj bayon guin najcchaawnën guiaj ni la ágata, guiaj badajp guin najcchaawnën guiaj ni la esmeralda, <sup>20</sup> guiaj ni bagaay guin najcchaawnën guiaj ni la ónice, guiaj ni baxo'p guin najcchaawnën guiaj ni la cornalina, guiaj bagajdx guin najcchaawnën guiaj ni la crisólito, guiaj goc xhujn najcchaawnën con guiaj ni la berilo, guiaj goc gaa najcchaawnën guiaj ni la topacio, guiaj ni goc chii najcchaawnën guiaj ni la crisoprasa, guiaj ni goc chiptib najcchaawnën guiaj ni la jacinto, guiaj ni goc chiptio'p najcchaawnën guiaj ni la amatista. <sup>21</sup> Gra guidxiptio'p ree xport ciuda guin gojcnë reen con chiptio'p ree perl, tijb gaj perl guin najnë tijbgaj port. Abi' nejb naroo ni naa galay ciuda guin najn ganax or, zi'c tal naj tijb vidr ni rdëd biani grop xijch.

<sup>22</sup> Ni'qui tijb yadoo ad baguiatan loj ciuda guin din dux Dad ree Dios bén ca' gra guialrniabee con bén naj zi'c xi xiilaman, laa reeman naj xyadoo ciuda guin. <sup>23</sup> Abi' loj ciuda guin ad rüjnt naguiejn gusni gubijdx ni'qui bëew, din xbacha' Dios rusni ni abi' bén naj zi'c xi xiilaman laaman naj bajl ni. <sup>24</sup> Bén zëed ree lod rent lod ren sa reeman loj bacha' guin, bén ma naj ree perdon. Abi' ree rey loj guidxliuj guie guidnë xguialza'cdxoon reeman loj ciuda guin. <sup>25</sup> Xport ciuda guin ad yu't dxej yaaw reen radxe, abi' ni ad zut guiaal. <sup>26</sup> Gra xguialza'cdxoon con gra xguialzagdxe ree bén zëed lood rent lood ren, guidxin reen loj ciuda guin. <sup>27</sup> Per ad yu't dxej chu' ni dxuudx loj ciuda guin, ni'qui ree bén rüjn ni dxuudx ni'qui ree bén rusquiee, bén cazi ree laj loj xlibr guialnaban ni ca' bén naj zi'c xi xiil Dios, laaz reeman chu' loj ciuda guin.

## 22

<sup>1</sup> Balüü tëë anjl guin lon tijb guiiw naya ni razaladx guialnaban, naynidxuj zi'c tijb guiaawajn. Ririi nijs guin lod za' xyagxhil Dios con bén naj zi'c xi xiilaman, <sup>2</sup> abi' zën galay loj nejb naroo ni naa galay ciuda guin. Galay nejb guin naa guiiw guin, abi' grop lad guiiw guin zojb yag ni runee guialnaban ni rtia chiptio'p loj ninejxh, gazobëew ridxaa ninejxh ni rtia lojn. Abi' ree xbalag yag guin rüjn reen sirv par gac bejn nadaan. <sup>3</sup> Achetri ni mal chu' ni, abi' Dios con bén naj zi'c xi xiilaman cwe loj xi yagxhil reeman guiáad ree xbejn reeman gap da't laa reeman respejt. <sup>4</sup> Abi' ni guguiaaloj reeman Dios, bén ni ca ree lajman lucwaj. <sup>5</sup> Achetri guiaal

chu' ni, ad ryaadxt bajl ni'qui gubijdx din dux Dad ree Dios gusni ni, abi' ma nabee reeman tiblayaa con laaman.

*Ma zidyob gui't Jesucrist*

<sup>6</sup> Dxel na anjl guin lon:

—Diidx guie ree naj ni diidxli ni rayal chililadx ree bejn. Abi' Dios bén razaladx diidx loj ree bén rudëed xtiidxaman loj ree bejn, laaman guxhaal xi anjl din gulüüman bejn ree ni ma zidyob gac. <sup>7</sup> Dad Jesucrist rëb guial nayob gui'taman.

¡Xiquilbaa ree bén ridxga' ni ca loj libr guie ni rugojn ni gac!

<sup>8</sup> Naj Waj, baguian biguiejn tëën ni guin ree. Abi' chi gulox baguian biguiejn tëën ni guin ree, dxel bazuxiban par ga'p da'tan respejt anjl ni balüü ree ni guin lon. <sup>9</sup> Per naman lon:

—Ad güünl zian. Din naj zi'cgajc lüj, xmandadzi Dios cayguieen, zi'cgajc ree xcompniaril bén rudëed ree xtiidx Dios, në ree bén ridxga' ree ni ca loj libr guie. Zeel Dios gojp da't respejt.

<sup>10</sup> Na tëëman lon:

—Ad guquie'chil diidx ni zëed ree loj libr guie, diidx ni rugojn ree ni gac, din ma zidyob gac reen. <sup>11</sup> Gol basa'n ree ben mal con xni mal reeman, abi' ree bén naban nadxuudx zu naban reeman nadxuudx bal zian ruladx reeman. Per bén rüjn ree zi'c rayal gusnuu güün reeman zi'c rayal abi' ree bén naban zi'c rën Dios gusnuu guiban reeman zi'c rën Dios.

<sup>12</sup> Rëb Jesucrist:

—Gol badxe'guijc guial nayob guialan, abi' guidne'n ni rayal tijbgaj bejn bal gonin been tijbgajman. <sup>13</sup> Naj naj zi'c lejtr A con lejtr Z, lejtr ni rzulojnë ni rlioxnë tëë alfabeto, din tijbzi naj rniabee diizd guia'xchej në par tiblayaa.

<sup>14</sup> Xiquilbaa ree bén ni naj zi'c ree bén ma gudiib xab guial ridxga' reeman xtiidx Dios, din gac chu' reeman niz ro' xport ciuda guin din gap tëë reeman derejch gaw reeman ni nejxh ni rtia loj yag runee guialnaban. <sup>15</sup> Abi' xijch ciuda guin yaya'n ree benguijdx, bén rüjn ree gualbidxaa, bén rüjn ree ni dxuudx con ree bén ad najt lacheel reeman, bén rugüjt ree bejn, bén ni rajp ree respejt ni naladx reeman naj dios, në ree bén ruladx cwëëguijc ni rusquiee rniece tëë reeman diidx rusquiee ree. <sup>16</sup> —Naj Jesús ma guxhal da anjlan din gugojnman lëjt gra ree ni guie din guiëbidi laan loj gra ree bén rililadx naj. Naj naj quijb xdiaa rey Davi, loj xdiaaman zialan. Naj naj zi'c bajl nayni ni rliejn rsildoo.

<sup>17</sup> XSprijt Dios con biinxdüb ni gac lacheel bén naj zi'c xi xiil Dios rëb reeman:

—Guda.

Abi' bén rigujiejn rniece reeman zian, rëb gajcaman:

—Guda.

Chutëöz bén re'c nijs, gol guda, abi' bén rën zajc guië'man nijs runee guialnaban lagajzi.

<sup>18</sup> Gra ree bén riguiejn ree diidx ni zëed loj libr guie ni gac, naj rni lojdi bal chu bén gucaa guijc ni zëed loj libr guie, ziangajc zusro' Dios guialzi ni zëed loj libr guie par laaman.

<sup>19</sup> Ziangajc bal chu chiquied xhie diidx guijc ree diidx ni zëed loj libr guie ni gac ziangajc chiquied Dios guijc ni rayalaman loj yag runee guialnaban ni ruza't libr guie ad zayu tëëtaman loj xciuda Dios ni ruza't libr guie.

<sup>20</sup> Bén ragbee guial diidxli naj gra ree ni guie, rëbaman:

—Walin, nayob guialan.

Zian gacan Dad Jesús, ¡Guda!

<sup>21</sup> Dad Jesús güünle' gradi. Amén.